


# Manikáne O Ehwehne



God's New Talk: The New Testament in the Awa Language of  
Papua New Guinea

**Manikáne O Ehwehne  
God's New Talk: The New Testament in the Awa Language of Papua New Guinea  
Nupela Testamen long tokples Awa long Niugini**

copyright © 1974, 1997 Wycliffe Bible Translators, Inc.

④ Faith Comes by Hearing

Language: Awa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2013-12-11

---

PDF generated using Haiola and XeLaTeX on 28 Dec 2024 from source files dated 31 Aug 2023

9673cf68-887a-574e-9ac8-846469c86b12

## Contents

|                                  |     |
|----------------------------------|-----|
| FRT . . . . .                    | 1   |
| Mátíyu . . . . .                 | 3   |
| Máhka . . . . .                  | 65  |
| Árúka . . . . .                  | 102 |
| Sóni . . . . .                   | 166 |
| Eqmaro Ke . . . . .              | 208 |
| Aroma . . . . .                  | 266 |
| 1 Kórína . . . . .               | 294 |
| 2 Kórína . . . . .               | 321 |
| Kárétia . . . . .                | 338 |
| Épésa . . . . .                  | 348 |
| Píripái . . . . .                | 358 |
| Kórósía . . . . .                | 365 |
| 1 Tésárónáíka . . . . .          | 371 |
| 2 Tésárónáíka . . . . .          | 377 |
| 1 Tímóti . . . . .               | 380 |
| 2 Tímóti . . . . .               | 388 |
| Táítása . . . . .                | 394 |
| Pírémona . . . . .               | 397 |
| Íbaru Ke . . . . .               | 399 |
| Sémisi . . . . .                 | 421 |
| 1 Píta . . . . .                 | 429 |
| 2 Píta . . . . .                 | 437 |
| 1 Sóni . . . . .                 | 442 |
| 2 Sóni . . . . .                 | 449 |
| 3 Sóni . . . . .                 | 450 |
| Súta . . . . .                   | 452 |
| Sokigi . . . . .                 | 455 |
| Read the New Testament . . . . . | 484 |

# **Manikáne O Ehwehne**

## **God's New Talk: The New Testament in the Awa Language of Papua New Guinea**

### **Nupela Testamen long tokples Awa long Niugini**

*Manikáne O Ehwehne*

The New Testament in the Awa language of Papua New Guinea  
[awb]

Translation: © 1974, 1997, 2002, Wycliffe Bible Translators, Inc.

Print publication 2002 by The Bible League  
Print version ISBN 0 86893 364 3

Web version  
2012, Wycliffe Bible Translators, Inc.  
[www.Wycliffe.org](http://www.Wycliffe.org)

<http://pngscriptures.org>

[www.ScriptureEarth.org](http://www.ScriptureEarth.org)

This translation is made available to you under the terms of the Creative Commons license (Attribution-Noncommercial-No Derivative Works).  
<http://creativecommons.org/licenses/by-nc-nd/3.0>

**Your are free to share** – to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

**Notice** – For any reuse or distribution, you must make clear to others the license terms of this work.

#### **Tok Orait**

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manmeri**. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating**. Na tu, **yu no ken senisim Tok**.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik strem samting i no orait long dispela tok orait, strem tok, salim Buk Baibel, o tainim Tok bilong God long nupela tok ples, yu ken **askim mipela**.

Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, **plis askim mipela.**

**Púku Áwíqkakaq Ogahq Awíkákáq Náhmbahq Áwíqkakaq Kéh  
Kánéhe**

Púku Áwíq[tab]Ogahq Awíq[tab]Náhmbahq

## Mátíyu Ebeq sáhnsahwe ahtebé ehwehne.

Mátíyuwe téh táhkísi moné mewe arámbéhríuwana anehe Sísaga we kéro aní míankeheéna we omaq atowana wene táhkísi arámbéhrí suena Sísa kérówe. We mó awíqmé Árítwáie. Wega wenawahrah Asíú kékabé iwíáhéné mah pukú sehiranúwe. Asiu kegá mah pukú sáhnsahwe Sísane ehweh kawerue siahtebéra wensabé aiq pútare atageheéna Mátíyuga sehiranúwe. Asiu kegá iwíáhéra, Mókake Manikánka anotah aní omaq atahnana wega ite Asiu kené Wahnháme míanieéna sinkehe uwe. Sísa Karáhégá ite meirena kaweraitankeheéna Manikánka we omaq atena eqmarowe. Wenawahrah Asíú kéné sína Wahnháhmé íre mó aní míre. We Sísa wire éra Asiu kegá wensabé aiq pútare atageheéna Mátíyuga mah pukú sehiranúwe.

### Mátíyuga mah kawéq éhwéh sehiranúwe.

*Sísa Karáhéné aigaqnaréh síwíqmari kékéh éhwéhne.*

*(Árúka 3.23-38)*

<sup>1</sup> Sísa Karáhéné aigaqnaréh síwíqmari mahraue kékéh.

Sísa Tébítí kahnáhne.

Tébítíwe Ébáráhma kahnáhne.

<sup>2</sup> Ébáráhmawe Áhísáhkine abowáe.

Áhísáhkiwe Sékópane abowáe.

Sékópawé Súrareh ábárahnahnahne sibowáe.

<sup>3</sup> Súrawe Pérésareq Sérareqne sibowáe.

Mi aníténé sinowawé wenawíq Támárie.

Pérésawé Ésárónine abowáe.

Ésáróniwe Árámine abowáe.

<sup>4</sup> Árámiwe Ámínárápawé abowáe.

Ámínárápawé Násónine abowáe.

Násóniwe Sámónine abowáe.

<sup>5</sup> Sámóniwe Póásine abowáe.

Póásine anowawé wenawíq Áráhpae.

Póásiwe Óbétine abowáe.

Óbétine anowa wenawíq Árútie.

Óbétíwe Sésine abowáe.

<sup>6</sup> Sésiwe Tébítí anotah wahnháhné abowáe.

Tébítíwe Sórómónine abowáe.

Sórómónine anowawé téhwe Úríane ahre míowe.

<sup>7</sup> Sórómóniwe Áréóbóámane abowáe.

Áréóbóámwae Ábíyane abowáe.

Ábíyawé Ásane abowáe.

<sup>8</sup> Ásawe Séhósápátine abowáe.

Séhósápátiwe Séórámáne abowáe.

Séórámawé Úsíane abowáe.

<sup>9</sup> Úsíawe Sótámane abowáe.

Sótámane Áhásane abowáe.

Áhásawé Ésékíane abowáe.

<sup>10</sup> Ésékíawe Mánásene abowáe.

Mánásewe Émónine abowáe.

Émóniwe Sósáíane abowáe.

<sup>11</sup> Sósáíawe Séhóiákínireh ábárahnahnahne sibowáe.

Mi tanáhráq Pábíróni marákóípéqté kégá Ísara ke táhtoqme meriqmera sene marakórapeq mórítowe.

<sup>12</sup> Pábíróni marákórápéq mórítówana

Séhóiákíniwe Séátíérane abowáe.

Séátíérawe Sérúbábérane abowáe.

<sup>13</sup> Sérúbábérawe Ábíútine abowáe.

Ábíútiwe Éríákímane abowáe.

Éríákímawe Ásórane abowáe.

<sup>14</sup> Ásórawé Sárókine abowáe.

Sárókiwe Ékímane abowáe.

Ékímawe Éríútine abowáe.

<sup>15</sup> Éríútiwe Éréásane abowáe.

Éréásawe Mátánine abowáe.

Mátániwe Sékópane abowáe.

<sup>16</sup> Sékópawé Sósépane abowáe.

Sósépawé Máhríane awehkawae.

Máhríaga Sísä maqmarowara mi anímé Karáhée atowe. Karáhewé áwahewé ite meirena kaweraitankeheéna Manikánka we omaq atowe.

<sup>17</sup> Ébárahma míotaqtenue Tébítitaq seuwekue airápété itaréitaré ábáhnínáhnah míowe. Tébíti míotaqtenue Pábíróni marákórápéq mórítótaq seuwekue mó airápété itaréitaré ábáhnínáhnah míowe. Pábíróni marákórápéq mórítótaqtenue Karáhégä marakóipeq tutaq seuwekue mó 14 se ábáhnínáhnah míowe.

*Máhríaga Sísä Karáhé maqmaro ehwéhne.*

(Árúka 2.1-7)

<sup>18</sup> Sísä Karáhé maqmaro ehwéh teiníboq íráhro. Wenano Máhría Sósépaga ahreyabéútaq Sósépareq íre noguyataq Manikáne Awanka iwiáh atowana kíá míowe.

<sup>19</sup> Sósépaga ahriahri peh kaweq sansánúwe. Wega meyanaú ahrégá kíá mó ehwéh irena wega iwiáhéné, Mó wehreq nogoye éna Máhría ayehítéhneho éna wehuke míotaq íre ehweh atasa peh auwaníe iwiáhúwe.

<sup>20</sup> Mira iwiáhúwana Maniká itene Wahnah míéhrabeq íópeqté áninká áónáh atena wensabé, Sósépao, Tébíti kahnáh ánino, Írátíahno. Manikáne Awanka iwiáh atéhrana Máhría kíá míéhre. Minayabe we meweyabe íre áhreúno.

<sup>21</sup> We animai maqmiahnana wega wehukene ahbabáq kaweraritena merirankéhe. Minayabe wenawíq Sísae ato úwe.

<sup>22</sup> Minayabe Manikánka iwiáh atowana wene ehweh irarú aninká mahraréna,

<sup>23</sup> Írátíahro. Wehreq íre nogu ahrárígá kíá ména animai maqmiahnara Émánuérae atagéhe úwe. (Aisaia 7.14)

Mi awíqmé Émánuérawé áwahewé Maniká itereq mía míai áwíre.

<sup>24</sup> Sósépaga áónáhéné irigútaq itene Wahnah míéhrabeq íópeqté áninká teawu ehwéh sehgienna Máhría meyowe.

<sup>25</sup> Wega mewena Máhríaga ani íre maqmiotaq Sósépaga peh míowana animai maqmarowana Sísae áwíratowe.

## 2

*Ahtebia kégá Sísä kabaru ehwéhne.*

<sup>1</sup> Anotah wahnáh aní wenawíq Éróti Súria marákórápéqté kéné wahnah míotaq Máhríaga Pétáriéma suwahpeq Sísä maqmiowe. Maqmiowara ío kiembogirabeqte ké ahtebia kégá Sarúsarama suwahpeq suwe.

<sup>2</sup> Segá mibeqté kékabé, Inahunahní Asiu kené anotah Wahnáh úkina anímé eheq míehro? Ío kiembogirabeq wehyoqka, Anotah Wahnáh maqmarehre sokigi áinsábé wensabé iwíah íwíah ataneheeéq súne uwe.

<sup>3</sup> Uwana Érótiga mi ehwéh irena wene arupipeq iwíah kikiruwara moke Sarúsarama suwahpeqte kéné sirupipeq moq iwíah kikiruwe.

<sup>4</sup> Érótiga moke Manikáne ehweh mibeq mahbeq arítah kéreq Mósísiga sehgióro ú ehweh síwáhnoro kereq síáhrabéna sensabé, Wehuke merirankeheéna Manikánka omaq ato aní eheq maqmianabo úwe.

<sup>5</sup> Úwara sega wensabé, Súria marákórápéq Pétáriéma suwahpeq maqmianae éra minayabe Manikáne ehweh irarú aninká sehiranue mahraréna,

<sup>6</sup> Pétáriéma suwahpeqte kéo, Súria marákórápéq moke mó kehiná suwahpeq iteruwahpeq kiotaikiro? Írakaumo. Pétáriéma suwahpeq anotah aní maqmarahnana mi aninká néne animári Ísara ke wahnahnéna kaweq ah sokigi arinkéhe úwe. (*Maika 5.2*)

<sup>7</sup> Érótiga ío kiembogirabeqte kékopéq síáhrabúwara sega weba suwana sensabé, Téhwe mi wehyóq aneq tanáhráq ábóraragurairo kasenúwara teawúwe.

<sup>8</sup> Teawúwana mi keyábé mahraréna, Mi kariq áninsábé kawerue kogabaroro. Mi aní koábóraq márehrataq íné moq koiwíah íwíah ataníboq sereníero éna Pétáriéma suwahpeq eqmaq suowe.

<sup>9</sup> Eqmaq suowara pokue ahtaqpéq míowana pópoqnah kiembogirabeq wehyoqka ebeq kure mi kariq ání mío nah kotaq abobórähpeq kowara

<sup>10</sup> tagéra sirupipeq anotahtaq eyoyówe.

<sup>11</sup> Nahupéq kibekéra mi kariq ánínseq wenano Máhríareq tagéra sirehunseraráq méra mi kariq áninsábé iwíah íwíah atówe. Iwíah íwíah atera sene unahpípéqté péwe kóraakáq kaweq weríakáq kaweq kunkúni pahuráhákáq áwúwe.

<sup>12</sup> Manikánka mi ke áónáh aritena sensabé, Érótiba íre seuwekoru aritowara sega mó ahtápéqtáq sensu wahpeq pokuwe.

### *Sósépareh karírnáninká Ísípi marákórápéq poku ehwéhne.*

<sup>13</sup> Ahtebia kégá mitaq suera pokuwana itene Wahnah Maniká míehrabeq íópipeqté áninká Sósépa áónáh atena wensabé, Irigue mi kariq ánínseq wenanoreq Ísípi marákórápéq pehbeheráh meriqme mórito. Érótiga mi aní subiq suanieéna kabarinaire. Teawéna tanáhráq seuwekinkehboq mibeq kowíahno úwe.

<sup>14</sup> Úwana Sósépaga irigéna inokáhpeq mitaq suena mi kariq ánínseq wenanoreq meriqmena pokue Ísípi marákórápéq pokúwe. Éróti íre pukú tanahráq Sósépareh karírnání Ísípi marákórápéq kowíowe.

<sup>15</sup> Minayabe itene Wahnahnka wene ehweh irarú ani iwíah atowana sehiranue mahraréna,

Nénahni Ísípi marákórápéq míehnsábé mitaq sue mahbeq súno atóge ire. (*Hosea 11.1*) Mi ehwéh aiq pútaraginkeheéna Manikánka Sósépansabé Ísípi marákórápéq kowíahno atowe.

### *Kariq maigáu subiq súáhro arito ehwéhne.*

<sup>16</sup> Ahtebia kégá Érótine ehweh íre sehgira mó ahtáqpéq pokue taqnobagunsabe Érótiga áyátó púana anotah abiáhnsánúwe. Anotah abiáhnsánéna Pétáriéma suwahpeqkakáq wahtote kehiná suwahpeqkakáq mó ke eqmaq suanaútaq sensabé, Moke náhtate kariq máigáu subiq súáhro aritowe. Ahtebia kégá wehyoq ehwéh teawú tanahráq Érótiga iwíahéna, Mi anímé amahnága peh náh neh aníne éna moke náhtate kariq máigáu subiq súáhro aritowe.

<sup>17</sup> Érótiga miraúnka Sérémáíane naho éhwéh aiq pútaragúwe. Manikánka wene ehweh irarú ani Sérémáía iwíáh atowana wega sehiranue mahraréna,

<sup>18</sup> Áréma suwahpeqte kégá ibiséra áhnte ibítúnátúnánowara íráhwe. Áréséraga wene animárínsábé ibisehre. Moke subiq sutonsabé wenawahrahga wene arupipeq íre kaweratahráhowana peh ibisehre úwe.\* *(Jeremaia 31.15)*

### *Kehrari marákórápéq kowió ehwehne.*

<sup>19</sup> Sósépareh karíronání Ísípi marákórápéq míowana Éróti pukúwana íópeqté áninká Sósépa áónáh atowe.

<sup>20</sup> Áónáh atena wensabé, Irigue mi anínseq wenanoreq meriqme iteruwahrah Ísara kené marakórapeq seuwekúno. Mi aní subiq suanehe íwíáhuro ke aiq pukuro puah meriqme kouwekúno úwe.

<sup>21</sup> Kouwekúno úwana Sósépaga mi anínseq wenanoreq meriqmena Ísípi marákórápéq suena Ísara kené marakórapeq kouwekuwe.

<sup>22</sup> Érótine ahninkáwá wenáwíq Ákéráúsae. Wega wenabone arambehri Súria marákórápéq Ísara keráq wahnah arámbéhrí awaq miowana Sósépaga minayabe irena mi marákórápéq pokéyabe áhreúwe. Manikánka Sósépa áónáh atena wensabé, Súria marákórápéq íre pokúno éna Kehrari marákórápéq kowíahno úwana meriqmena pokue Kehrari marákórápéq kowíowe.

<sup>23</sup> Kehrari marákórápéq kowéna Néhsara suwahpeq pokéna mitaq kaegaeúwe. Minayabe Manikánka wene ehweh iraru ke iwíáh aritowara Sísansabé sehiranue mahraréra, We Néhsara suwahpeqte ánine ataneherawoe éra sehiranuwe.

## 3

### *Sóni wání meri merinú anínká teriu ehwehne.*

*(Máhka 1.2-8; Árúka 3.1-18; Sóni 1.19-28)*

<sup>1</sup> Mi tanáhráq wání meri merini aní Sóniga Súria marákórápéq séna mibeqté úwórápéq ména weba su ke ehweh teri terinúwe.

<sup>2</sup> Wega mahraréna, Manikánka wahnah wahnahmirabeq aiq wahtotaq kék púaq itene ahbabáq sansa sueq kaweqtaq míáhro úwe.

<sup>3</sup> Manikánka wene ehweh irarú ani wenáwíq Áísáía iwíáh atowana Sóni éhweh sehiranue mahraréna,

We uworapeqté sawai sawaiéna mahraréna, Itene Wahnah sína ahmé aborisahro. Wene ah kaweraráhro ire úwe. *(Aisaia 40.3)*

<sup>4</sup> Sóniga kékma áyórate kogahnia aneraneratiowe. Áú arétí wene ayahbataq konahntiowe. Tábahnkákáq sehenáhrabahnkakák nówé.\*

<sup>5</sup> Sarúsarama suwahpeqte kékreq moke Súria marákórápéqté kékhná suwahpeqte kékreq Sorana aroipéq wahtotaq kehiná suwahpeqte kékreqka Sóniba suwe.

<sup>6</sup> Weba séra sene ahbabáqsabe Manikápa pahsúówana Sóniga Sorana aroipéq wání meriuwe.

### *Sóniga Péhrasi keyábé ehweh arito ehwehne.*

\* **2:18:** Árésérawe Sékópane ahre míowe. Áréséra akéqmé Súrareh ábárahnhahnhe sinoiboe. Súrareh ábárahnhahnhe airápéteté téhtaré káhnáh méra moke Ísara kené sigaqnaréhe. Mi tanáhráq Áréséra wewega íre ibisówe. Wene aigaqnaréh ininsónká ibisówe. \* **3:4:** Sóniwe Manikáne ehweh irarú ani wenáwíq Éráisa tahnsa aníne. 2 King 1.8, Malakai 4.5, Mátíyu 11.13-14, 17.10-13 tagáhno.

<sup>7</sup> Péhrasi kereq Sáyúsi kereqka<sup>†</sup> wání meaneheéra Sóniba suwana wega sensabé, Itewe wehene animári móe. Insegá teínsábé áhreue ínéba seo? Manikánka kamah inehoéq ínéba se mino.

<sup>8</sup> Aiq pútaq kaweqtaq míaneheqmúne íwíáhirataq itene ahbabáq sansa sueq kaweq sansánoro. Mirairataq Manikánka tagéna, Ite amahnága kaweq sansánowe aitankéhe.

<sup>9</sup> Ébáráhma itene igaqna míéh púaq itewe Manikáne animári méq kaweq ke míone éq iteitensabé iwiáh íwíáhiyeho. Manikánka mah ebáhmárítáté Ébáráhmane anahwaréh mirarahráhire.

<sup>10</sup> Wehukenínká awanká áwaheraq tehsúme maréhrana kaweq será íre íyéh áwanká moke apiwe ira parianawire úwe.<sup>‡</sup>

<sup>11</sup> Sóniga mó mahraréna, Itene ahbabáq sansa aiq súahnsábé wání mei meinuge. Íné peh wání mei meinugana íné kiotaiki aní inehe sinawire. Inehe si anímé anotah aní púana ínéga wene súu meweyabe íre awehrari aní múge. Wega Wenawa eqmarahnana wehukenínká ira kekínsarah Wenawanka iteba tuinkéhe.

<sup>12</sup> Wehukega ayu siqmiáhtaq sega kaweq ayú sene nahtapeq sáharera atutu ira paríahwe. Mira onserah Manikánka kaweqtaq míáh kékéh, Néne mátaburapeq kiwíáhro aritena ahbabáq keyabé, íre puinkorahi iraipéq pokoro aritanawire úwe.

### *Sóniga Sísa wání meawu ehwéhne.*

(Máhka 1.9-11; Árúka 3.21-22)

<sup>13</sup> Sóniga mi ehwéh pahsuqme teriuwana Sísaga Kehrari marákórápéqté sure Sorana aroipéq Sóniga wání meawinkeheéna weba súwe.

<sup>14</sup> Sísaga wání meanieéna weba súwana Sóniga ahqáho atena wensabé, Aneqsabé ínéga wání meninkeheé seno? Arega íné wání meninaraqmé aiq kawerinae úwana

<sup>15</sup> Sísaga wensabé, Amahnága arega wání meninkéhe. Minawé Maniká awahbeh arámbéhríe úwana Sóniga wene ehwehnsabé kowe atowe.

<sup>16</sup> Kowe atena Sísa wání meawuwana Sísaga wánípipeqté kiutaq sabona sawekúwana Manikáne Awanka tunse kiboki tahnsanéna Sísaba márunsurahúwana tagówe.

<sup>17</sup> Tagówana iópeqté éhwéhnká mahraréna, Are niruní nénáhní móne. Arensabé nirutaboiruge úwe.

## 4

### *Owainawanka Sísa áhwárawe tagó ehwehne.*

(Máhka 1.12-13; Árúka 4.1-13)

<sup>1</sup> Manikáne Awanka Sísa abatapi móatowana owainawanka weba séna Sísaga ahbabárinkeheéna áhwárawe tagéna áwioqnówé.

<sup>2</sup> Sísaga áhnte wehekáh, 40wehekáh tópah awehriúnsabe anotah arúpíbíúwe.

<sup>3</sup> Anotah arúpíbíúwana owainawanka wensabé, Are Manikáne ahninkáwá míahna puah mah ebáhmárínsábé, Tópah úkúno ato úwe.

<sup>4</sup> Úwana Sísaga wensabé, Manikáne ehwehnka aiq mahraréna, Tópahnka wehuke íre organúq sitahráhi nanere. Írakaumo. Peh morá Manikánka irari ehwehnká organúq sitahráhire íre úwe. (Lo 8.3)

<sup>5</sup> Úwana owainawanka Sísa meqmena kaweq mapéq Sarúsarama suwahpeq Manikánsabe iwiáh íwíáh atáh náh nahnsorapéq móatena

<sup>6</sup> wensabé, Are Manikáne ahninkáwá míahna puah maraipéq ahkuagúno. Minayabe Manikáne ehwehnka aiq mahraréna,

<sup>†</sup> 3:7: Péhrasi kereq Sáyúsi kereqsabé éhwéhmé píku anehepeqte séhíramé Manikáne Púkuipéq Kéh Áwahe Éhwéhne ue kéhrabeq tagáhno. <sup>‡</sup> 3:10: Mah pabéqmé éhwéhmé ira paríehnserah Manikánka íre kaweqtaq míáh ké kamah arinawire.

Manikánka wene íopeqté kékáyábe are wahnahnatíáhro aritankéhe. Ebahtaq arene aigárá peraq míehnaho éra sene siyahkaratáté are pankeragéhe ire úwe. *(Buk Song 91.11-12)*

<sup>7</sup> Úwana Sísaga ahqáho atena wensabé, Manikáne ehwehnka mó mahraréna, Maniká arene anotah Wahnáh áhwárawe tagé áwíoqnéhaho éra sene siyahkaratáté are pankeragéhe ire úwe. *(Lo 6.16)*

<sup>8</sup> Owainawanka Sísa mó meqmema anotah sawéhrápéq kieno moke mah kawéq márakóákáq moke kékáyábe are wahnahnatíáhro aritankéhe ire úwe.

<sup>9</sup> Sokigi awena wensabé, Káuqmuneue ínénabe iwíáh iwíáh aintéhnaraqmé moke tagahna naneqmarí awiníe

<sup>10</sup> Úwana Sísaga wensabé, Owainawano, íné nuwe pokúno. Manikáne ehwehnka mahraréna, Maniká itene Wahnhnsabé iwíáh iwíáh ateq webataq we awahbeh arámbéhrí miraoro ire úwe. *(Lo 6.13, 10.20)*

<sup>11</sup> Úwana owainawanka Sísa auwena pokúwara íopeqté kékáyábe Sísaba séra séhréh atówe.

*Sísaga Kehrari marákórápéq wene arambehri áhwáró ehwehne.*

*(Máhka 1.14-15; Árúka 4.14-15)*

<sup>12</sup> Sóni karábúsiipéq atárówe u ehwéh irena Sísaga Kehrari marákórápéq pokúwe.

<sup>13</sup> Pokéna Néhsara suwahpeq suena Kehrari kawéhú ayehráq Kápénéáma suwahpeq kowíowe. Mi marákowé Sébúrúna kahnáhnseq Nápátári kahnáhnseqka téhwe aborisowe.

<sup>14</sup> Sísaga mitaq pokúnka Manikáne ehwehme aiq pútaragúwe. Manikánka wene ehweh irarú ani Áísáia iwíáh atowana sehiranue mahraréna,

<sup>15</sup> Sorana aroipéq seberaebéq Kehrari kawéhú kéhrabeq Sébúrúna kahnáhnseq Nápátári kahnáhnseqne marakó kékáyábe.

<sup>16</sup> Mitaqté kékáyábe sunkíkírirabeq mía míao kegá téhreh tagagehe. Puké marákó sunkíkírirabeq téhrankehe úwe. *(Aisaia 9.1-2)*

*Sísaga itaréitaré wéhyábé, Íné séníráhro ú ehwehne.*

*(Máhka 1.16-20; Árúka 5.1-11)*

<sup>17</sup> Mi tanáhráq Sísaga kaweq ehwéh síwáhnoré sansa áhwárówe. Wega mahraréna, Manikánka wahnah wahnahnime aiq wahtoní puaq itene ahbabáq sansa sueq kaweqtaq míáhro úwe.

<sup>18</sup> Sísaga Kehrari kawéhú ayehrápéq nogena se ábárahré Ehntarureq Sáímónireq tagówe. Sáímóniwe mó awíq Pítæ. Se pah meyóya aníté míóyansabé kahweraté wánípipeq uwe taga tagauyana tagówe.

<sup>19</sup> Tagéna sensabé, Íné séníráhtao. Amahnága itega kahweraté uwe taga tagaéta pah meyehye. Mina óyanserah wehuke ínéba meriqmeta sigehe. Minayabe íwáhnorinibooq séníráhtao úwe.

<sup>20</sup> Séníráhtao úwara sene kahwe apubúue mitaq marera Sísa kéróye.

<sup>21</sup> Kéróyaná Sísaga kure mó abárahré, Sébérine ahninkáwárará Sémísireq Sónireq tagówe. Tagówara sereq sibowá Sébérireqka sípiipéq méra sene kahwewari kawerarówe. Kawerarówana Sísaga mi abárahréyábé, Máhotao úwara

<sup>22</sup> sega apubúue sípiakáq sibowánkákáq suera Sísa kéróye.

*Sísaga síwáhnoréna áhnte awáhré kékáyábe kawerarito ehwéhne.*

*(Árúka 6.17-19)*

<sup>23</sup> Sísaga moke Kehrari marákórápéq ah nogéna Asiu kené momiwí nahmáritápéq síwáhnoréna Maniká wahnah wahnahnirabeqte ehwéh teri terinéna moke náonkakáq kéréq awahre kereq kaweraritowe.

<sup>24</sup> Sísa éhwéh mitaq teri mahtaq terinuwara moke Sísa marákórápéqté kékáyábe are wahnahnatíáhro aritankéhe ire úwe. Minayabe mi kegá moke awahre kereq owainawanka subiqmaq subiqmarú kereq

iransá aruqaruru kereq aigárá soriqnah kereq meriqmera Sísaba móritówana wega moke mi ke kaweraritowe.

<sup>25</sup> Kehrari marákórápéqté kéreq Tékáporísa marákórápéqté kéreq Sarúsarama suwahpe-pte kéreq Súrla marákórápéqté kéreq Sorana aroipéq seberaebéqté kéreq, peh íregáritaq kegá Sísa kérówe.

## 5

### *Sísaga sáwéhrapeq síwáhnorú ehwehne.*

<sup>1</sup> Sísaga mi ke tagéna sáwéhrapeq kiwéna tútuue míowaq ite we kérahwána kegá weba sewane.

### *Sísaga iwíáh íwíáhoro ú ehwehne.*

(Árúka 6.20-23)

<sup>2</sup> Sísaga Iwáhnoréna mahraréna,

<sup>3</sup> Tabonah keo, itega Manikánsabe, Iteriahriáh íre miraorahúne éq séhréh aito íwíáhéra íópeq Manikánka wahnah wahnahnirabeq awaq miahráhonsabé iwíáh íwíáhoro.

<sup>4</sup> Amahnága irupipeq umehiraq ibisah keo, Manikánka séhréh aitená itene iru ukiq itankéhe. Minayabe iwíáh íwíáhoro.

<sup>5</sup> Íre píribahria peh uwaresa kéo, mah marákó márakkó awaq miahráho puaq iwíáh íwíáhoro.

<sup>6</sup> Kaweqtaq mé sansa sehgieyabe suwahbeh keo, ite arupibii aní tahná móe. Wání tahbobói aní tahná móe. Manikánka ite tabonaho naneq náinkéhe. Minayabe iwíáh íwíáhoro.

<sup>7</sup> Mó keyábé irutaboirariteq séhréh arítáh kéo, Manikánka itensabé moq arutaboirait-ena séhréh aitahna puaq iwíáh íwíáhoro.

<sup>8</sup> Irupipeq kaweq iwíáh aruqaruro keo, Maniká tagahraho puaq iwíáh íwíáhoro.

<sup>9</sup> Morá ké tahnsanue tobéh ehweho sansá sueq pehwehribeq míáhro íwíáhoro keo, Manikánka itensabé, néne animári móe aitahna puaq iwíáh íwíáhoro.

<sup>10</sup> Manikáne kaweq sansá sehgónsabé mó kegá íwíoqnáh keo, Manikánka wahnah wahnahnirabeq awaq miahráho puaq iwíáh íwíáhoro.

<sup>11</sup> Néne animáriño, néne animári míáh púara mó kegá íre kaweq ehwéh aiterá íwíoqnéra péhepehe ehwéhnue íéhruruirataq iwíáh íwíáhoro.

<sup>12</sup> Segá miraonka íópeq itene ápeq anotah úki puaq iru eyoyóéq iwíáh íwíáhoro. Segá ite íwíoqnahnserah Manikáne ehweh iraru ke naho síwíoqnowe úwe.

### *Ite sóreq tahnsá ké wóe ú ehwehne.*

(Máhka 9.50; Árúka 14.34-35)

<sup>13</sup> Sísaga pabeqme ehwéh mó mahraréna, Itewe mah kehiná kékínáné sóreq tahnsá móe. Sóreq auqmah naneq úkínaraqmé kaweraranéhkono? Írakaumo. Auqmah soréq íre tei puara wehukéga sigarátáté abasawe seraweh keragéhe úwe.

### *Ite téreh tahnsá ké wóe ú ehwehne.*

(Árúka 8.16-18)

<sup>14</sup> Sísaga mó pabéqmé ehwéh síwáhnoréna, Mah kehiná kékínánká tagageheéq ite téreh tahnsá ké wóe. Sáwéhrapeqté náhmári kopípéq íre kahrahire.

<sup>15</sup> Mina inserah wehukéga áráhmu keqmaráhtáq páhkétiraté íre akariaráhwe. Írakaumo. Peh tahberaq máráhwana téhráhnara moke nahupeq míáh kégá kawerue tagahrahewe.

<sup>16</sup> Wehukenínká áráhmu tahberaq máréhnserah wehukéga tagehrataq kaweq sansánoro. Mó kegá itene kaweq sansá tagéra Maniká Iteribo íópeq míéh ánínsabé iwíáh atagéhboq kaweq sansánoro úwe.

### *Mósísiga sehgóro ú ehwehne.*

<sup>17</sup> Sísaga mó mahraréna, Ínénabewé Mósísiga sehgóro ú ehwehnkákáq Manikáne ehweh iraru kené ehwehnkákáq sabiruanieéna sire íwíhoo? Írakaumo. Íre sabiruanieéna suge. Peh mi ewhéh áwahe sokigi ainieéna suge.

<sup>18</sup> Teí éhwéh ahtebagehboq íráhro. Íópeqkákáq mah marákó márakóákáq peh kahnaraq Mósísiga sehgóro ú ehweh íre parabagia peh kagainae. Mi ewhéhmé pehgáriq íre parabagia peh moke kagainawire. Mi ewhéhnká moke aiq pútaragínana anehe íópeqkákáq mah marákó márakóákáq parabaginawire.

<sup>19</sup> Minayabe wehukeníká mi ewhéh pehgáriq anteruena mó keyábé, Ínéga unserah-noro éna pagu paguníaraq mi anímé Manikánka wahnah wahnahnirabeq pehgáriq aní míankehe. Mó aníká mi ewhéh sehgiena mó keyábé, Kawerue sehgíro síwáhnoríaraq mi anímé Manikánka wahnah wahnahnirabeq anotah aní míankehe.

<sup>20</sup> Teiníboq írátiáhro. Itega Manikáne sansá sehgironka Péhrasi kereq Mósísine ehweh síwáhnoro kereqne arambehri íre kiotaikínaraqmé Manikánka wahnah wahnahnirabeq kioráhoo? Írakaumo. Íre kioráhowe úwe.

*Apubúue insahwé ato ú ehwehne.*

*(Árúka 12.57-59)*

<sup>21</sup> Sísaga mó mahraréna, Naho naho síwáhnoruro kegá itene igaqnáréhyabe teríú ehweh itega aiq íráhwe. Sega síwáhnoréra, Wehukení subiq sueho. Subiq suahna anímé kotiorabeq móatagéhe uwe. *(Kisim Bek 20.13, 21.12)*

<sup>22</sup> Sega miraue iraruwana amahnága ínéga teiníboq írátiáhro. Wene iyahnabo anínsábé abiahnsa atahna anímé kotiorabeq móatagéhe. Wene iyahnabo anínsábé íre kaweq ehweh atahna anímé kaunsíri kebá móatagéhe. Wene iyahnabo anínsábé múguwahgu uwoyansa aní móne atahna anímé iraipéq pokinae.

<sup>23</sup> Manikánsabe iwiáh íwíáh atáh náhúpéqté táhbérápéq irigé, Mahna Maniká náwiníe íwíáhóne. Are mitaq irigé arene iyahnabo aníká arenasabé abiahnsa atéhnsábé ahreraq matiahnawe

<sup>24</sup> arega awinieina naneq tahbe áwaheraq maro. Áwaheraq mare apubúue arene iyahnabo anípá pokue insahwé ato. Insahwé ate kouwekue mitaq marahna naneq mewe Maniká náwo úwe.

<sup>25</sup> Sísaga mó mahraréna, Mó aníká are ehweh ataníeéna anotah sahsí móatanaínaraq ahtapeq kirataq apubúue insahwé ato. Kotiorabeq kirataq wega anotah sahsí are móatahnana wega párísiba móatahnana karábúsiipéq móatehnehboq apubúue insahwé ato.

<sup>26</sup> Teiníboq írátiáhro. Karábúsiipéq móatahnara pehipi íre soraq auwagéhe. Ebeqme anotah apéq paiqmaréhnaraqmé anehe soraq auwagéhe úwe.

*Sísaga mó aníné ahre weh abariiyeho ú ehwehne.*

<sup>27</sup> Sísaga mó mahraréna, Itega írátó ehwehnká mahraréna, Mó aníné weh ahre abariiyeho ire. *(Kisim Bek 20.14)*

<sup>28</sup> Mi ewhéh írátowana amahnága ínéga teiníboq írátiáhro. Arene auranka mó aníné ahre tagé, Íné mi iní abariyéabe níre íwíáhónawe arene arupipeq abarié ahbabáq aiq miraóne.

<sup>29</sup> Minayabe arene auranka are ahbabáratana ínaraq mi aurá piruo. Peh morá áúránkákáq míéhnaraq pehgáriq íre kawerinae. Téhtaré áúránkákáq míéhnaraq kagai iraipéq pokinaraq anotah íre kawerinae.

<sup>30</sup> Arene púpeqte áyáhnkáránká are ahbabáratana ínaraq mi ayáhnkárá kiraqsuo. Peh morá áyáhnkáránkákáq míéhnaraq pehgáriq íre kawerinae. Téhtaré áyáhnkáránkákáq míéhnaraq kagai iraipéq pokinaraq anotah íre kawerinae úwe.

*Sísaga, Ahre kaqsúého ú ehwehne.*

*(Mátíyu 19.9; Mákha 10.11-12; Árúka 16.18)*

<sup>31</sup> Sísaga mó mahraréna, Itega írátó ehwéhnká mahraréna, Arene ahre kaqsuaníe inaraqmé minayabe tíkéti pepáhq kowewe móawo úwe.

<sup>32</sup> Minayabe amahnága ínéga teiníboq írátíahro. Arene ahrega mó wehreq ahbabárirataq mi tanáhráq kaqsuankéhe. Pehipi kaqsúéhnaraq wega mó wehkínaraq mi tanáhráq ahbabárinae. Mi iní meyahna anínká moq mi tanáhráq ahbabárinae. Minayabe arene ahre pehipi kaqsúéhneho uge úwe.

### *Sísaga peh koweakáq ahqáhoakáq irarero ú ehwehne.*

<sup>33</sup> Sísaga mó mahraréna, Itega mó ehwéh írátó ehwéhmé itene igaqnarehyabe teríú éhwéhnká mahraréna,

Arega iraré, Manikánka tagariéhtáq ínéga teawú ehwéh mirainauge énawe péhenineho.  
Arene ehweh kawerue sehgio ire. *(Namba 30.2)*

<sup>34</sup> Segá miraue iraruwana amahnága ínéga teiníboq írátíahro. Arega mirainauge inaraq Manikánka tagariéhtáq mirainauge íre úno. Íopeqmé Manikánka wahnah wahnahni puah, Iónka tagariéhtáq mirainauge íre úno.

<sup>35</sup> Mah marákowé Manikáne tahbe tahnsá púa, Marakóga tagariéhtáq mirainauge íre úno. Sarúsarama suwahpeqme itene anotah Wahnáhné mátabu púa, Sarúsaramaga tagariéhtaq mirainauge íre úno.

<sup>36</sup> Arega irarénaga peh morá arene tontonah ayáhránká pabusa ayáhrá íre úkorahi puah, Niyahqnonka tagariéhtáq mirainauge íre úno.

<sup>37</sup> Arega, Ahqáho. Íre mirainauge íwíahónawe peh, Ahqáho úno. Arega, Kowe. Mirainauge íwíahónawe peh, Kowe úno. Owainawanka ahbabáq ehweh atahnah áhnte irarinehboq peh morá ahqáhoakáq koweakáq irarúno úwe.

### *Sísaga, Ahbabáq íre ayahqmaro ú ehwehne.*

*(Árúka 6.29-30)*

<sup>38</sup> Sísaga mó mahraréna, Itega írátó ehwéhnká mahraréna,  
Mó anínká arene aura piauwahnah arega moq wene aura piruo. Mó anínká arene áwéh  
sehqauwahnah arega moq wene áwéh sehqauwo ire. *(Lo 19.21)*

<sup>39</sup> Mi ehwéh írátówana amahnága ínéga teiníboq írátíahro. Are áwíoqneh anímé íre  
ayahqmaro. Mó anínká are ahsuehinahwe éberiopéq pabeq suehnana ahsuehino.

<sup>40</sup> Mó anínká are ehweh atena síoti meaníe ínaraqmé arene síotiakáq arene sáhkétiakáq  
náwo.

<sup>41</sup> Wahnah anínká wene ménsámehnsá abaqme ákáhtaq wahtotaq morá kírómitá kúno  
atahnahwe ákáhtaq íre wahto téhtaré kírómitá mewe móato.

<sup>42</sup> Mó anínká arensabé aneqpopoq nánio ínahwe náwo. Mó naneq átáríaniiboq nánio ínahwe  
náwo úwe.

### *Arene naruoyabé irutaboiroro ú ehwehne.*

*(Árúka 6.27-28,32-36)*

<sup>43</sup> Sísaga mó mahraréna, Itega írátó ehwéhnká mahraréna,  
Arene iyahnaboyabé arutaboiré arene naruoyabé íre arutaboiroro ire.

<sup>44</sup> Mi ehwéh írátówana amahnága ínéga teiníboq írátíahro. Íre peh morá itene iyahnaboy-  
abé irutaboiroro. Itene naruoyabé moq irutaboiroro. Íwíognah keyábé púrerarítáhro.

<sup>45</sup> Íopeqté Ítéribóné animári méq ite íwíognah ke púrerarítáhro. Manikánka ahbabáq kereq  
kaweq kereqne marakóraq monseráhnue, Patahúno atéhre. Wega kaweqtaq míáh kéreq  
ahbabáq kereqne marakóraq monseráhnue, Ibonsúno atéhre.

<sup>46</sup> Peh morá itensabé sirutaboiro keyábé irutaboirirataqmé Manikánka ápeq awinkéhbo?  
Írakaumo. Ahbabáq kereqka moq sensabé sirutaboiro keyábé sirutaboirowe.

<sup>47</sup> Peh morá itene iyahnaboyabé mehweh arítéhrame anotah kawéq sánsápo? Írakaumo.  
Maniká íre tagariáh kégá mi sansá mirao mino.

<sup>48</sup> Íópeqté Ítéribogá kaweqtaq mía míainserah ite moq kaweqtaq mía míaoro úwe.

## 6

### *Sísaga mó ke séhréh arite sansansábé teí éhwéhne.*

<sup>1</sup> Sísaga mó mahraréna, Peh mó kegá itene kaweq arámbéhrí tagéra, Kaweq kee íwíahigehééq mi arámbéhrí ábóraq miraonsabé íre kawerowe. Mirairataq mókake íópeqté Ítéribogá mi arámbéhríyábé ápeq íre náinawire.

<sup>2</sup> Minayabe arega tabonah ke nárínaraq mó kegá tagagehboq ebeq pembiáh póbíeh ání íre eqmaro. Mó kegá momiwí nahtápéqkákáq wahba ahtápéqkákáq pembiáh póbíeh ání eqmarera anehe mitaq séra tabonah ke náriéwe. Tabonah keyabé íre sirutaboirue náriera péhepehe sansánowara mó kegá tagéra kaweq ke wóe íwíah aitogeheéra ábóraq náriéwe. Teiníboq írátíáhro. Mi sansáno kegá ábóraq nárié púara tagah kegá sensabé íwíah íwíah arítáhnsábé mókake mó apéq íre meyagéhe. Segá mira onserahniyeho.

<sup>3</sup> Arega tabonah ke nárínaraqmé mó kegá tagehboq peh kopípéq nário.

<sup>4</sup> Kopípéq nárínaraqmé Iteriboga tagéna ápeq náwinkéhe úwe.

### *Sísaga púreré sansansábé teriu ehwéhne.*

#### *(Árúka 11.2-4)*

<sup>5</sup> Sísaga mó mahraréna, Táhmaro kegá ábóraq kaweq sansánéra peh kopípéqmé íre kaweq sansánéra kopéráhpéro ke wóe. Itega púrerirataqmé mi kegá púrero serahniyeho. Segá momiwí nahtápéqkákáq wahba áhtápéqkákáq mó kegá tagehrataq, Kaweq ke wóe íwíah aritageheéra ábóraq iriwe méra púrerowe. Teiníboq írátíáhro. Mi sansáno kegá ábóraq púrerotaq tagah kegá sensabé íwíah íwíahonsabé mókake mó apéq íre meyagéhe.

<sup>6</sup> Arega púrerinaraq arene paqnahipeq kibekue onsa paiqmare kopípéq mé púrerúno. Iteribo íre ábóraq míeh ánínéna moke kopípéq árámbéhrí tagehre. Minayabe kopípéq mé púrerinaraq mina tagéna arene púreq ehwéh irena náwinkéhe.

<sup>7</sup> Maniká íre tagariáh kegá íwíahéra, Manikánka itene ehweh kawerue irankeheéra móñkakákáq móñkakárue íre wahto ehwéh teawenéhe íwíahowe.

<sup>8</sup> Segá mira onserahnue púreriyeho. Itega íre teawétáq Maniká Iteriboga ite tabonaho naneq tagariéhre.

<sup>9</sup> Minayabe púrerirataq mahraréq,

Íópeqté Ítériboo, arenáwíq pankerone.

<sup>10</sup> Arega mah kehiná kékhná wahnah wahnahnaritahna tanáhráq apubúue ábóraragúno ato.

Moke íópeqté ké are awahbeh sansánonserah mah marákóípéqté ké moq are awahbeh sansá miraoro aito.

<sup>11</sup> Ibora itene táhutahuq avehraq kirabo aito.

<sup>12</sup> Mó kegá ahbabáraitáhtáq itega mina íre iahreraq masa peh suone. Itega mi-raúnanserah itene ahbabáq moq íre ahreraq matiahno.

<sup>13</sup> Ahbabáqka ite saiqnariahrahirabeq íre móito. Owainawanka saiqnari-ahrahirabeqte meiqme móbeq móito.

[Arega ahriahri wahnah wahnahnaité págege kiotaikóna aní míahnaq arensabé íwíah íwíah atone. Aiq míre.] Miraue púreroro úwe.

### *Mó kené ahbabáq íre ahreraq matiáhro ú ehwehne.*

<sup>14</sup> Sísaga mó mahraréna, Mó kegá ahbabáraitéhraq íre iahreraq matiéhrataqmé íópeqté Ítéribogá itega onserahninkehe. Wega itene ahbabáq íre ahreraq matiankehe.

<sup>15</sup> Mó kegá ahbabáraitéhraq iahreraq matiáhnaraqmé íópeqté Ítéribogá moq itene ahbabáq ahreraq matiankehe úwe.

### *Sísaga táhutahuqsabé avehrié sansa teriu ehwehne.*

<sup>16</sup> Sísaga mó mahraréna, Itega táhutahuq awehriirataq péhepehe sansáno kegá abiah marera mirao serahniyeho. Mó kegá se tagéra, Kaweq ke wóe íwíáhigeheéra mi kegá awehriotaq abiah márähwe. Teiníboq írátiáhro. Mi sansáno kegá awehriotaq tagah kegá sensabé iwíáh íwíáhonsabé mókake mó apéq íre meyagéhe.

<sup>17</sup> Arega táhutahuq awehriinaraq arene auranabiah pabeq paberé arene ayahra kaweq komúúno.

<sup>18</sup> Mirainaraq are tagehra kegá táhutahuq awehrionayabé íre ahtebahrahowe. Iteribo íre ábóraq míéh ánínéna moke kopípéq árámbéhrí tagehnsabé ápeq náwinkéhe úwe.

*Sísaga kaweq naneq morábí sáhonsabé teriu ehwehne.*

(Árúka 12.33-34)

<sup>19</sup> Sísaga mó mahraréna, Mah marákóípéq kaweq naneqmarínsabé irutaboiréq morábí sáhiyeho. Mah marákóípéq sáharáh náneq sósahbahrankírana abehq náneq ka sóirara aebó kegá aebóowe.

<sup>20</sup> Peh morá íópeq kaweq naneqsabé irutaboiréq mitaq morábí sáharáhro. Mitaq íre sósahbahrankinae. Íre abehq náneq ka sóinae. Aebó kégá mitaq íre aebóorahowe.

<sup>21</sup> Itene kaweq naneq morábí sáharáhrabeqsabé irutaboironeheqmóe úwe.

*Itene iurame inonkataq kék áráhmú tahnsane ú ehwehne.*

(Árúka 11.34-36)

<sup>22</sup> Sísaga mó mahraréna, Arene aurame arene anonkataq kék áráhmú tahnsáne. Arene auranka kaweq naneq tagehnaraq arene arupipeq téhranae. Arene auranka ahhbabárorahi naneq tagehnaraq arene arupipeq sunkíkírinae.

<sup>23</sup> Arene arupipeqté térehme sunkíkíragínaraq kaweq sansá íre miraorahé peh ahbabáq sansanorahóne úwe.

*Téhtaré wáhnáhné arambehri moráráq íre sehgoráhi ehwéhne.*

(Árúka 16.13)

<sup>24</sup> Sísaga mó mahraréna, Arambehri anínká téhtaré wáhnáhné arambehri íre moráráq sehgoráhire. Wega mó wahnáhnsabé awahbéna mó wahnáhnsabé íre awahbanae. Wega mó wahnáhné arambehri kawerue sehgienna mó wahnáhné arambehri áhwára áhwárainae. Mina inserah itega Manikánsabe irutaboiro sansánkákáq móneyabé irutaboiro sansánkákáq íre moráráq sehgoráhowe úwe.

*Iwíáh kikiriyeho ú ehwehne.*

(Árúka 12.22-31)

<sup>25</sup> Sísaga mó mahraréna, Teiníboq írátiáhro. Ite mah marákóípéq mé tanahráq itene táhutahuqkakáq itene inonkataq inerineré naneqkakáqsabé iwíáh kikiriyeho. Oga méwé íre peh morá tópah nahnagae. Itene inonkame íre peh morá inerineré naneq mire.

<sup>26</sup> Kabarane sánsá iwíáhue tagahro. Mi kanká ménsúmehnsú uqmarena nera kéhtáq koawaqmena nahupeq sahiro? Írakaumo. Íópeqté Ítéribogá mi kansábé iwíáhéné pehipi kiraboire. Itewe wehuke puana Maniká Iteriboga itensabé anotahtaq iwíáhéné kawerue kirabo aítéh mino.

<sup>27</sup> Arega arene oga mé tanahráqsabé iwíáh kikirinaraqmé ábátáq mérearahráhiro? Ahqáho. Írakaumo úwe.

*Íre mationa naneq náinkéhe ú éhwéhne.*

<sup>28</sup> Sísaga mó mahraréna, Aneraneré naneqsabé aneqsabé iwíáh kikiroo? Uworapeqté árá íyéh naneqsabé iwíáhue tagahro. Uworapeqté naneqka íre arambehrire. Korósi íre kogahnire.

**29** Anotah wahnáh ání Sórómóni naho ména we áhnte mensáméhnsá matawéna áhnte kawéq awahriq korósí matiowe. Uworapeqté kawéq árá íyéh náneqka moke Sórómónine kawéq awahriq naneq kiotaikire.

**30** Uworapeqté náneq íre kagai naneq mire. Ibora íyéhrana ahbiah tahnsá kekírataq tagire. Manikánsabe pehgáritaq aiq pútare atáh kéo, Manikánka mi kawéq árá suki-wiéhnsábé wega ite moq sukitahráhi mino.

**31** Aneq nanehnkono? Né waní eheqte tuiro? Aneqtaté aneranerue míanehnkono éq iwíáh kikiriyeho. Ahqáho.

**32** Maniká íre tagariáh kégá minayabe iwíáh iwíáhéra sene sirupipeq iwíáh kikirowe. Iteriboga ite íre mationa naneq aiq tagaríehre.

**33** Ahriahri Manikánka wahnah wahnahnirabeqte sánsánsábé irutaboiréq sehgíoro. Sehgieq we kaweqtaq míéhnserah ite moq kaweqtaq míaneheqmúne éq iwíáhoro. Mirairataq Manikánka ite íre mationa naneq náinkéhe.

**34** Ahbiah sína naneqsabé iwíáh kikiriyeho. Ahbiah sína naneqsabé mi tanáhráqsábé iwíáhigehe. Irupipeq umehorahi naneqsabé ibora aiq awehraq kéhranawe ahbiah sína naneqsabé iwíáh kikiriyeho úwe.

## 7

*Mó kené sánsá íre saraq sitáhro ú ehwehne.*

(Árúka 6.37-38,41-42)

**1** Sísaga mó mahraréna, Mó kené sánsá saraq siteq ahbabáq ke woe íre oro. Mirairataq Manikánka itene sánsá moq saraq itena ahbabáq ke woe aitankéhe.

**2** Itega mó kené sánsá saraq sitáhnserah Manikánka itene sánsá moq saraq itankéhe. Itega mó kené sánsá saraqme náriénserah Manikánka moq mina tahnsanue saraqme náinkéhe.

**3** Arenawahrah aníné aurapi pehgáriq átútú tagé arerene aurapi anotah sehikárá kékhsábé aneqsabé arerene auransabé íre iwíáhono?

**4** Arene aurapi anotah sehikárá kékrahwe aneqsabé arenawahrah anínsábé, Arene aurapite átútú meauwanínkono eno?

**5** Are ahbabáq kopéráhpéróna ání móne. Téhwe arerene aurapite séhikárá merue anehemé arenawahrah aníné aurapite átútú kawerue tagé meauwahráhóne.

**6** Manikánsabe suwahrieh kewé Manikáne epéqté éhwéh íre teríero. Mirairataq ianká wehukení pehnserah sega ite íwíoqnagehe. Póéráhqka kaweq naneq segarúpípéq abasawe maisarúéhnserah sega mi ehwéh íre irasa peh awiréh aitaneherawoe úwe.

*Págageue púreroro ú ehwehne.*

(Árúka 11.9-13)

**7** Sísaga mó mahraréna, Itega púrerirataqmé náio ira naneq náinkéhe. Págageue kabari-rataq ábórarínaq taganeheqmóe. Onsaraq pako pakoirataq sitankéhe.

**8** Nánio i anínká meyankéhe. Kabari anínká ábóraq marankéhe. Onsaraq pakobakoi anímé Manikánka siatahnana nahupeq kibekinkehe úwe.

**9** Sísaga mó mahraréna, Arenahninká arensabé, Tópah nánio ínaraqmé arega ebah náwiníbo? Írakaumo.

**10** Wega, Paseh nánio ínaraqmé wehe náwiníbo? Írakaumo.

**11** Ite sibowáréh ahbabároraoh keéq itene animári peh kaweq naneq nári nárino mino. Íópeqté Ítéribogá wensabé, Nánio e kewé peh kaweq naneq nárinkéhe.

**12** Mó kegá ite iuwahbeh sansánue ite kaweraitáhnserah itega moq mina tahnsanue se kawerarítáhro. Mi sansámé Mósísine ehwehnkakáq Manikáne ehweh iraru kené ehwehnkakáq áwahe wíre úwe.

*Sobuya méhpéhpéq kibekoro ú ehwehne.*

(Árúka 13.24)

<sup>13</sup> Sísaga mó mahraréna, Sobuya méhpéhpéq kibekoro. Iraipéqté méhpéh anotah abáé méhpéh míre. Iraipéqté áh moq abae ah marapeq tunsíá áh kéhrara áhnte kegá mi ahtápéq poku pokuowe.

<sup>14</sup> Oga mérapeqté méhpéhmé sobuya méhpéh míre. Oga mérapeqté áhmé moq sobuya ah senahpeq kiríeh áh kéhrara mibeq kieyabe umehi puara íre áhnte kegá mi ahtápéq kiegiewe úwe.

*Péhe éhwéh irare keyábé aiq pútare arítého ú ehwehne.*

(Árúka 6.43-44, 13.25-27)

<sup>15</sup> Sísaga mó mahraréna, Íre Manikáne ehweh peh seyene péhe éhwéh irare keyábé aiq pútare arítéhboq mi kené arambehri tagariáhro. Ábóraq se sipisípiq tahnsá méra peh sirupipeqmé úrinsi íá tahnsa míáhwe.

<sup>16</sup> Sene arambehri kawerue tagarawéq sene sánsá ahtebahrahewe. Ógaranká inunara íre íyéhre. Káránkáránsáhnka pópo íre íyéhre.

<sup>17</sup> Kaweq awánkánká kaweq será íyéhranawe abehq awánkánká íre kaweq será íyéhre.

<sup>18</sup> Kaweq awánkánká abehq sérá íre iyahráhire. Abehq awánkánká kaweq será íre iyahráhire.

<sup>19</sup> Kaweq será íre íyéh awánkámé apiwe ira pariéhre.

<sup>20</sup> Minayabe péhe éhwéh irare kené arambehri tagarawéq sene sánsánsábé iwiáhorahewe úwe.

<sup>21</sup> Sísaga mó mahraréna, Áhnte kegá ínénabe, Néne Wahnah mone aintáhwe. Íre mi ehwéh irarenka Manikánka wahnah wahnahnirabeq kioráhwe. Írakaumo. Íopeqté Nánibó awahbeh arámbéhrí mirao kegá sebataq mitaq kioráhwe.

<sup>22</sup> Sainsuahna tanáhráq áhnte kegá ínénabe, Néne Wahnah mone aintera, Arenáwírue Manikáne ehweh irarurauge. Arenáwírue owainawamarí kaqsuq kaqsururauge. Arenáwírue ótaq sansámári miraurauge irarigehe.

<sup>23</sup> Irarirataq ínéga sensabé, Itewe íre tagarióge. Ite ahhbabáq ke puaq íné nueq pokoro aritaníe úwe.

*Nah piehya anítéyábé pabeqme ehwéhne.*

(Árúka 6.47-49)

<sup>24</sup> Sísaga mó mahraréna, Néne ehweh irena sehgó ánímé ahtebia ání wene nah págege marákóráq pearéh ání tahnsane.

<sup>25</sup> Págege marákóráq pearéh púana anotah ibónsirana wání periéhrana sóiririrana wene nah íre kúrugúruue sokogia peh págegeue kéhre.

<sup>26</sup> Néne ehweh irena íre sehgó ánímé múguwahgu ání wene nah mareqmareq marákóráq pearéh ání tahnsane.

<sup>27</sup> Anotah ibónsirana wání periéhrana sóiririrana wene nah kúrugúruue sokogire. Sokogirana moke íre kaweragire úwe.

<sup>28</sup> Sísaga mi ehwéh síwáhnorue parabaruowara író kega wene ehwehsabé áhtenuwe.

<sup>29</sup> Mósísine ehweh síwáhnoro kegá síwáhnorunserah Sísaga íre úwe. Wega ahtebia áninká tahnsa síwáhnorú púara wene ehweh író kega áhtenuwe.

*Sísaga anotah naonkákáq ání kawerato ehwéhne.*

(Máhka 1.40-44; Árúka 5.12-14)

<sup>1</sup> Sísaga sáwéhrapeqté tuwara peh íregáritaq kegá we kérówe.

<sup>2</sup> Kérówana anotah naonkákáq áninká weba séna áhtenú púana arehunseraráq ména wensabé, Anotah aníno, are awahbáhnaraqmé kaweraintahráhóne úwe.

<sup>3</sup> Úwana Sísaga ayahnkahkahrue wenaneq táhtorena wensabé, Aiq mirauge. Are awaho ani míahno atowana mina irarútaq wene náonaba apubúue wagúwana kaweragúwe.

<sup>4</sup> Kaweragúwana Sísaga wensabé, Írátiahno. Mó ke teríneho. Írakaumo. Manikáne ehweh mibeq mahbeq aitéh ánipá pokue arene anonka móreawo. Are awaho ani úkire igeboq Mósísiga irarúnserahnue Manikánsabe titirúno úwe.

*Kíápéténine arambehri aní kawerato ehwéhne.*

(Árúka 7.1-10)

<sup>5</sup> Sísaga Kápénéáma su wahapeq sútaq 100 Aroma sontiá kéné kiápéténiga weba séna, Séhréh ainto éna,

<sup>6</sup> Anotah aníno, néne arambehri aní néne nahtapeq ména anotah erirana íre nogoráhire úwe,

<sup>7</sup> Úwana Sísaga wensabé, Ínéga arene nahtapeq kogawerataníe

<sup>8</sup> úwana kiápéténiga wensabé, Íné pehgáriq aní múge. Are anotah aní míahna puah néne nahtapeq íre súno. Peh mahtaq mé ehweh irarinana néne arambehri aní kaweragíno.

<sup>9</sup> Íné moq wahnah sansá tagarióge. Néne wahnah aiq míéhrana íné moq wahnah anínéna sóntia ke wahnahnuge. Ínéga mó sontiá áninsábé, Pokúno atótáq wega apubúue pokire. Mó sontiá áninsábé, Mahbeq súno atótáq wega apubúue ínéba sire. Néne arambehri áninsábé, Miraúno atótáq wega apubúue miraire úwe.

<sup>10</sup> Úwana Sísaga mi ehwéh irotaq áhtenéna we anehe su keyábé, Teiníboq írátíahro. Mah aninká ínénabe anotahtaq aiq pútare aintena ínéga mirainawire íwíáhire. Nánuwahrah Asíú kégá ínénabe mina tahnsanue íre aiq pútare aintáhwe.

<sup>11</sup> Teiníboq írátíahro. Ío kiembogirabeqte kéreq ío tupekirabeqte kéreqka séra Manikánka wahnah wahnahnirabeq kibekéra tútuue méra Ébáráhmareh Áhísáhkireh Sékópareh moráráq táchutahurigehe.

<sup>12</sup> Manikánka nánuwahrah Asíú kékáyabé, Ínéga wahnah wahnahnurabeq máhoro irara sega ahqáho atonsabe máhpeq sunkíkirabeq kaqsuankéhe. Kaqsuahnaraq sega mitaq uwo uwo éra ibisagehe.

<sup>13</sup> Minayabe, Íráhro éna kiápéténinsabé, Arene nahtapeq pokúno. Arega aiq pútare aintahnanserah inkehe úwana mi tanáhráq wene arambehri aní kaweragúwe.

*Sísaga Pítane ahrahnawa kawerato ehwéhne.*

(Máhka 1.29-31; Árúka 4.38-39)

<sup>14</sup> Sísaga Pítane nahupeq kibekúwana Pítane ahrahnawa osoro awáhrééna máhriqtaq míowana tagówe.

<sup>15</sup> Sísaga mi iníné ayahnkara táhtorowana wene awahre kaweragúwana irigéna táchutahuq tíwe náwuwe.

*Sísaga áhnte awahré ké kawerarito ehwéhne.*

(Máhka 1.32-34; Árúka 4.40-41)

<sup>16</sup> Ío tupekútaq wehukega owainawanka subiqmaq subiqmarú ke meriqmera Sísaba móritówe. Móritówana Sísaga peh ehweh irarúnka owainawamarí kaqsuena moke awahre ke kaweraritowe.

<sup>17</sup> Kaweraritonsabe Manikáne ehweh aiq pútaragúwe. Wene ehwéh irarú ani Áísáíaga Manikáne púkuipéq naho sehiranue mahraréna,  
Wega moke itene awahre meyéhre úwe.

(Aisaia 53.4)

*Sísaga we kéreyabe irarú ehwéhne.*

(Árúka 9.57-60)

<sup>18</sup> Sísaga peh íregáritaq weba sáhurió ke tagéna ite we kérähwána keyábé, Mah kawéhú seberaebéq pokonehe

<sup>19</sup> úwana Mósísine ehweh síwáhnorú anínká weba séna wensabé, Íwáhnoraníno, are poku pokuónarabeq kéranié úwe.

<sup>20</sup> Úwana Sísaga wensabé, Úrinsi iá wene nahme ebahnarahpipeq kékre. Kabarane nahme sehweraapeq kékre. Íné wehukení úku aníné nahme íre kékre

<sup>21</sup> úwana mó aní we kéro anínká wensabé, Ebeqme nánibo pukinana komaisarena anehe are kéranié

<sup>22</sup> úwana Sísaga wensabé, Pusa kégá pukira ke maisaragéhboq íné séniro úwe.\*

### *Sísaga irarúnka sóiriq táqnáigú ehwehne.*

(Máhka 4.36-41; Árúka 8.22-25)

<sup>23</sup> Sísareq ite we kérähwána kerekka sípiipéq kibekue kure kure

<sup>24</sup> káwehu ákáhtaq kowana Sísá sípiipéq sugowana apubúue anotah soirírúnka anotah nonaburóróúwana wáninka kiegambehgue sípi wánípipeq tupekinaúwe.

<sup>25</sup> Tupekinaútaq ite we kérähwána kega Sísá iriateq wensabé, Wánípipeq tupekue pukonehboq kaweraito ewanana

<sup>26</sup> wega itensabé, Aneqsabé áhreoo? Itega ínénabe pehgáriqtaq aiq pútare aintáhwe éna irigéna sóiriqsabé, Táqnáigúno éna wánínsabe, Túbáh agúno úwana sóiriqka táqnáigúwana wáninka moq túbáh agúwe.

<sup>27</sup> Túbáh agúwaq itega áhtenéq itete náhenéq, We aneq anípo? Sóiriqkakáq wánínkakaqká wene ehweh íréhre ewanae.

### *Sísaga owainawamarí kaqsuo ehwéhne.*

(Máhka 5.1-17; Árúka 8.26-37)

<sup>28</sup> Sísaga sípi kewewena kure Kehrari kawéhú seberaebéq Kárára kené marakórapeq kúwe. Mitaq wehuke maisia ónápípéq kaegaeuya anítéreq piehgíúwe. Sirupipeq míó owáínawámárínká mi aníté subiqmaq subiqmaru puara anotah uwóyánsá aruqaruru-yara mó kegá sensabé áhreéra mi ahtápéq íre nogoráhúwe.

<sup>29</sup> Segá Sísá tagéra apubúue kareéra wensabé, Manikáne ahninkáwá wóne. Aneraitaníbo? Kamah aina tanáhráq íre sinsabé ite kamah ainie seno uye.

<sup>30</sup> Se míórabeq ákáhtaq wahtotaq íregáritaq poeráhqmárínká uworapeq náwe sahtaqme nowe.

<sup>31</sup> Nonsabe owainawamarínká Sísansabé, Ite eqmaq íuwéhnaraqmé mi poeráhqmáríné sirupipeq eqmaq iuwo éra pagu pagunuwe.

<sup>32</sup> Pagu pagunuwaná Sísaga sensabé, Pokurero aritowara segá mi aníté suera póéráhqmariné sirupipeq kowíowara mi kamárínká sáwéhrapeqté pehbeheráh tunse mentúpipeq tunse wánínkue pukuwe.

<sup>33</sup> Póéráhqtaq wahnahnu kegá tagéra sensuwahpeq pehbeheráh pokéra owainawanka subiqmaq subiqmarú aníté éhweh teriera moke tago naneqsabé éhwéh sensuwahrah teríúwe.

<sup>34</sup> Teríúwara moke mibeqté kégá Sísaba kure wensabé, Itene marakó sue pokúno éra pagu pagunuwe.

## 9

### *Sísaga aiayah pukia ání kawerato ehwéhne.*

(Máhka 2.1-12; Árúka 5.17-26)

<sup>1</sup> Sísaga sípiipéq kibekéna káwehu seberaebéq wenawahpeq pokúwe.

<sup>2</sup> Mó kegá íre ah nogoráhú aní aiayah pukia ání wene máhriqkakáq sehitaqmaqme sehgiwera Sísaba móatówe. Segá iwiáhéra, Sísaga kaweratanawire iwiáhuwana Sísaga sene

\* <sup>8:22:</sup> Sísaga pusa kékabé irarúmá áwahewé sene sirupipeqté síwá pusa kék tahnsa miáh kékabé irarúwe.

iwíáh tagéna aiayah pukia ánínsábé, Náníbáq móne. Arene ahbabáq aiq kawerató púah arene arupipeq eyoyóue míahno úwe.

<sup>3</sup> Úwara Mósísine ehweh síwáhnoru kegá seye náhenéra, Mah anímé, Íné Maniká míoge íwíáhéné anotah ahbabárire uwe.

<sup>4</sup> Uwana Sísaga sene iwíáh tagéna sensabé, Irupipeqmé aneqsabé ahbabáq iwiáho?

<sup>5</sup> Aiayah pukia ánínsábé aneq ehwéh teawinínkono? Arene ahbabáqsabe kaweratóge teawinínkono? Are irigue arene máhriq mewe ah nogo teawinínkono? Íre págege ehwéhmé ahnabo?

<sup>6</sup> Íné wehukení úku anínká mah marákó márákó wehukene ahbabáq kawerari-tahráhuse. Sokigi ainíboq tagariáhro éna aiayah pukia ánínsábé, Irigue arene máhriq mewe arene nahtapeq pokúno úwana

<sup>7</sup> mi anínká irigue wene nahtapeq pokúwe.

<sup>8</sup> Pokúwara tago kegá áhtenuwe. Manikánka wehukení págege atowana ótaq sansá miraúnsabe sega áhtenéra Manikánsabe iwíáh íwíáh atówe.

### *Sísaga Mátíyunsabé, Íné séniro ú ehwehne.*

(Máhka 2.13-17; Árúka 5.27-32)

<sup>9</sup> Sísaga mitaq suena ahtaçpeq nogutaq tákisi moné méyahwa aní néníwíq Mátíyu íné tagówe. Tagówana íné tákisi moné méyahwarabeq néne ópisirapéq tútuue míáhwana tagéna ínénabe, Íné séniro úwana irigue kéráhwae.

<sup>10</sup> Sísaga nahtapeq tákutahurútaq áhnte tákisi moné meyo kereq mó ahbabáq kéreqka mitaq séra Sísareq ite we kéráhwána kereq moraráq tákutahurowane.

<sup>11</sup> Tákutahurowanara Péhrasi kegá mina tagéra ite Sísa kéráhwána keyábé kasenéra, Ité íwáhnori anínká aneqsabé tákisi moné aebóo kereq mó ahbabáq kéreq moraráq tákutahuriro uwe.

<sup>12</sup> Uwana Sísaga mi ehwéh irena sensabé, Sótehga awaho ke máráhsíni íre náriasa peh morá awahre ke nárire.

<sup>13</sup> Mina inserah ínéwé kaweqtaq míáh ké siahrabéna séhréh aritanieéna íre suge. Peh ahbabáq ke siahrabéna kaweraritanieéna suge. Minayabe Manikáne ehwehnka mahraréna,

Titiré sansansábé íre nuwahbena peh arutaboiré séhréh arite sansansábé nuwahbehere  
ire.  
Mi ehwéhmé iwíáhue tagéq ahtebahro úwe.

### *Sísaga tákutahuq awehrio sansánsábé síwáhnorú ehwehne.*

(Máhka 2.18-22; Árúka 5.33-39)

<sup>14</sup> Sóni kéró kega Sísaba séra wensabé, Itereq Péhrasi kereqka mó tanáhráq mó tanáhrárue tákutahuq awehriúnara árahinsabé are kéráh kégá tákutahuq íre awehrioo uwe.

<sup>15</sup> Uwana Sísaga sensabé pabeqme ehwéh teriena, Pahuwirotaqmé o menáhwénká wene iyahnaboba míéhtáqmé sega íre ibisia peh iwíáh íwíáhowe. Mókake o menáhwé seba íre míahnaraqmé mi tanáhráq wene iyahnaboga wensabé sirutaboiréra tákutahuq awehrigehe úwe.\*

<sup>16</sup> Sísaga mó pabeqme ehwéh mahraréna, Wehukenínká nahonáh sáhkétí kawerinieéna o ambántáráté íre párúwe kawerire. Miraitaq tahirímé nahonáh sáhkétí mó subanki irino.

<sup>17</sup> Wehukenínká o nahniáq sera ano naho naho mémene áuyahwa antéhyápípéq íre ahkíre. Miraitaq tahirímé sera anonka muinaraq nahonáh antéhyá tapoagirana sera ano marakóraq antigi irino. Wehukenínká o será ano o antéhyápípéq ahkíre. Wehukega

\* <sup>9:15:</sup> Mi ehwéh áwahewé Sísa o menáhwé tahnra áni míre. O menáhwéné iyahnabowe Sísa tagáriáh ké tahnsane.

ahkírataq mi tehtáré náneqme kawerue kanae. O será anome kawerue kanae. Antehyamé moq kawerue kanae úwe.<sup>†</sup>

*Sísaga awahre iní kaweratena ahrari oganúq ato ehwehne.*

(Máhka 5.22-43; Árúka 8.41-56)

<sup>18</sup> Sísaga mi ehwéh síwáhnorútaq Asiu kené wahnah anínká Sísaba séna áhtónsabe arehunseraráq ména wensabé, Nániyahu peh amahnága putiéhre. Arene ayahnkaratáté koráhtoréhnaraq we oga úkinae

<sup>19</sup> úwana Sísaga irigue mi aní kérōwaq ite we kérāhwána kegá moq kérāhwáne.

<sup>20</sup> Ahtapeq kowanana awahre iní, airápétē téhtaré ópéq wene korahq íre taraqnagú inínká Sísaba anehepeq kúwe.

<sup>21</sup> Anehepeq kure wewe náhenéna, Íné peh wene korósi koráhtoráhnaraqmé kawerain-tankéhe éna wene korósi ayehrápéq koráhtorowe.

<sup>22</sup> Táhtorowana Sísaga pabeqme we tagéna wensabé, Arega ínénabe aiq pútare aintahna puana aru ukiq atóge úwana mi tanáhráq mi iní awaho ini úkúwe.

<sup>23</sup> Sísaga pokue wahnah aníné nahtapeq kibekúwara pembíahnu kereq ibitunátúnánu kereq míowana tagówe.

<sup>24</sup> Tagéna sensabé, Mi ahráriwé íre airaiq pukia peh sugéhre. Máhpeq túmíahro úwara wensabé awiréh atówe.

<sup>25</sup> Awiréh atówana wega moke mío ke kaqsuena mi ahráriné máhriqtapéq kowéna wene ayahnkara táhtorowana irigúwe.

<sup>26</sup> Irigú ehweh mitaq teri mahtaq terinuwara moke mi marákórápéqté kegá írówe.

*Aura pira ánitéreq ahkambu anínseq kawerarito ehwéhne.*

<sup>27</sup> Sísaga mitaq suena ahtapeq kútaq aura pira ánítégá we kérera wensabé, Tébítine anahwao, arutaboiraito uye.

<sup>28</sup> Sísaga nahupeq kibekúwara mi anítégá weba suyana Sísaga sensabé, Itene iura kaweraitahráhunsabé aiq pútare aintehyo úwara sega wensabé kowe atera, Are aiq miraorahóne uye.

<sup>29</sup> Uyana Sísaga siura táhtoqme sensabé, Itega ínénabe aiq pútare aintehyanserah mirainauge úwara

<sup>30</sup> mi tanáhráq siura tagahrahuye. Tagahrahuyana wega sensabé págegeue iraréna, Miraunsabé mó ke teríyeho aritowara

<sup>31</sup> sega wene ehweh íre sehgira Sísaga miraú ehweh teríúyana mi ehwéh moke mi kehiná suwahpeq abae agúwe.

<sup>32</sup> Mi anítégá pokuyataq mó kegá owainawanka subiqmaq subiqmarú ani, ehweh íre orahú ani meqmera Sísaba móatówe.

<sup>33</sup> Sísaga owainawa kaqauwowana mi anínká ehwehnúwara moke tago kegá áhtenéra, Ísara marákórápéq morá ibora mahna tahnsa tagóne uwe.

<sup>34</sup> Uwara Péhrasi kegá mahraréra, Owainawamaríné wahnahnka Sísaba págege atéhnsábé owainawamarí kaqsuahráhire uwe.

*Sísaga tagó ke arutaboirarito ehwéhne.*

<sup>35</sup> Sísaga moke mi ke suwahpeqkakáq áhnte kehiná suwahpeqkakáq nogena Asiu kené momiwí nahmáritápéq Manikánka wahnah wahnahnirabeqte éhwéh síwáhnoréna moke awahre kereq kaweraritowe.

<sup>36</sup> Sísaga sáhurió ke tagéna sensabé arutaboiraritowe. Se íre wahnahnkakáq sípísipíq tahnsa méra kaweqtaq íre míahrahéra sirupipeq iwíáh kikiru puana sensabé arutaboiraritowe.

† 9:17: Ahwa inínká tátúbi awera íre tímire. Tíritáq tahirímé osoréh áwérá anonka muwe tátú tapoue awera téhpipeq sáhagi irino. Mina inserah Sísane o ehwéhmé wehukene naho sánsánká íre avehraq kékre.

<sup>37</sup> Minayabe ite we kérähwána keyábé mahraréna, Nera kék tákutahúq áhnte kékñserah Maniká íre tagariáh kék áhnte míáhwe. Tákutahúq koawaqmíáh kék peh tákmaro míáhnserah Manikáne ehwéh korerié kék peh tákmaro míáhwe.

<sup>38</sup> Minayabe, Maniká Iteribonsabé, Arene sotápéq koawaqmiahráho ke eqmaq suo ue púreroro.

## 10

*Eqmaro ke airápétē téhtaré kéné síwíq kék éhwéhne.*

(Máhka 3.13-19; Árúka 6.12-16)

<sup>1</sup> Sísaga airápétē téhtaré kék we kérähwána keyábé íáhrabéna owainawamarí kaqsuera moke awahre ke kaweraritägeheéna págege aitowe.

<sup>2</sup> Ite eqmaq iuwo kewe iteíwíqmari mahraue Sáimóniwe mó awíq Pítæ. Pítane ábáqkawawé Ehntarue. Se ábárahré Sébérine ahninkáwáráré Sémísireq Sónirere.

<sup>3</sup> Mó anímári iteíwíqmari mahraue Pírípi, Pátórómíyu, Tómáhsí, íné Mátíyue. Sísa íre kérrena íné Mátíyuwe tákhsí moné meyáhwa aní míáhwae. Mó eqmaq suo aníté sensíwíqmé Ápiásane ahninkáwá Sémísireq Táriásarere.

<sup>4</sup> Mó eqmaq suo ani Kénáni marákörápéqté aní wenáwíq Sáimónie. Mó aní Sísane naruuo koweriranaú aní wenáwíqtare Súrasa Ísíkáriótie. Itéiwíqmé mirauee.

*Sísaga we kéró ke arambehriraq eqmaq suo ehwéhne.*

(Máhka 6.7-13; Árúka 9.1-5)

<sup>5</sup> Sísaga ite airápétē téhraníté eqmaq iuwanaútaq itensabé mahraréna, Wáhnaupéqté kéné marakórapeqkakáq Sámária ke suwahpeqkakáq íre pokoro.\*

<sup>6</sup> Peh morá Ísara kebá pokoro. Se tanahraipéq tabanagi sipísípíq tahnsa kée.

<sup>7</sup> Seba pokue mahraréq, Manikánka wahnah wahnahnime aiq wahtonagire teríero.

<sup>8</sup> Awahre ke kawerariteq pusa kék iririteq náonkakáq kék kawerariteq owainawamarí kaqsúáhro. Págege aitónsábé ápeq íre méyáhro. Pehipi séhréh ariteq kawerarítáhro.

<sup>9</sup> Pokonehe irataq ebah monéákáq sehenáh monéákáq kahnaraq mitaq mareq pokoro.

<sup>10</sup> Unah íre mewe pokoro. Téhtaré síótí súu pegiqnáhnkarankákáq íre mewe pokoro. Séhréh arítéh kégá arambehri aní avehraq apéq náwigéhe. Minayabe ite íre matiéhra naneq náigéhe úwe.

<sup>11</sup> Sísaga ite we kérähwána keyábé mó mahraréna, Mó ke suwahpeq kirataq Manikáne ehwehnsabé awahbeh aní kogabaroro. Abóraq maréhrataq wega itensabé, Néne nah-tapeq segáéro ínaraqmé wene nahtapeq kogáéro. Moke mi ke suwahpeq míéhra tanáhráq peh morá mitaq kaegaeoro.

<sup>12</sup> Wehukene nahtapeq kirataq mi karíónánínsábé, Manikánka iru ukiq itankéhe teríero.

<sup>13</sup> Terírataq sega ite mehweh aitéhrataq seba míáhro. Segá íre mehweh aitéhrataqmé mah éhwéhmé mewe mó kené nahtaqpeq pokoro.

<sup>14</sup> Mó anínká ite íre mehweh aitená itene ehwehnsabé iuwahriehre ínaraqmé wene nah sueq itene igárátáq kahna tanáhúq poruarueq pokoro.

<sup>15</sup> Teiníboq írátiáhro. Sóróma suwahpeqte kékreq Kómóra suwahpeqte kékreqka naho ahbabáruwe. Manikánka ehwéh aitahna tanáhráq mi kegá miraunka ákáhtaq kamah arinkéhe. Ite íre mehweh aitera itene ehwehnsabé iuwahriehre ira kegá mirairanka Manikánka anotahtaq kamah arinkéhe úwe.

*Íwíognagehe ú ehwéhne.*

(Máhka 13.9-13; Árúka 21.12-17)

---

\* **10:5:** Sámária keyabé éhwéhmé púku anehepeqte séhíramé Manikáne Púkuipéq Kék Áwahe Éhwéhne ue kékhabeq tagáhno.

<sup>16</sup> Sísaga itensabé mó mahraréna, Írátiáhro. Sipisípiqka úrinsi iápá míéhnserah íwíoqnehra kebá eqmaq iuwaníe. Wehe ahtebia ká míéhrana kiboki uwaresa ká míéhre. Mi katáré míehya serahnoro. Ahtebia ánímári méq uwaresa ánímári míáhro.

<sup>17</sup> Wehukega ite íre kaweraitéhboq kawerue auráq matíáhro. Segá ite kaunsíri ke kotiorabeq móitera sene momiwí nahtápéq áréti sahtáté iubigéhe.

<sup>18</sup> Néne sánsá sehgónsábé ákáhtaq wahnáh kéreq anotah wahnáh kéreqka ehweh aitageheéra seba móitagéhe. Mi tanáhráq sereq mó nahnsó kéreq néne ehweh terigéhe.

<sup>19</sup> Segá ehweh aitéhrarabeq móítéhrataq aneq ewhéh irarenehnkono éq árahue terienéhkono éq iwíáh kikiriyeho. Írakaumo. Mi tanáhráq Manikáne Awanka iwíáh aitahnaq ewhéh irarero.

<sup>20</sup> Mi tanáhráq íre iteitene ehweh irarigehe. Manikáne Awanka iwíáh aitahna ewhéh irarigehe úwe.

<sup>21</sup> Sísaga mó mahraréna, Mó anínká wenawah wenábáq kotiorabeq móritena sáhsí keyábé, Subiq suahro aritankéhe. Sibowárehga moq sene animárínsábé mina tahn-sanigehe. Sene animárínká sinoibone naruo úkéra mó keyábé subiq suahro aritagéhe.

<sup>22</sup> Néne sánsá sehgó púara ómi kegá itensabé iuwahriehre aitagéhe. Itega néne sánsá íre susa anehe tanahráqkákáq kawerue sehgrataq Manikánka meirena airaiq kaweraitankéhe.

<sup>23</sup> Mó ke suwahpeq íwíoqnehrataqmé mitaq sueq pehbeheráhnue pokue mó ke suwahpeq kowíáhro. Teiníboq írátiáhro. Ísara kené táhúnipéq itene arambehri íre parabarúéhrataq íné wehukení úku anínká kouwekinauge.

<sup>24</sup> Sigaru anínká wene tísa íre kiotaikire. Arambehri anínká wene wahnah íre kio-taikire.

<sup>25</sup> Sigaru anínká wene tísaba mía míairana arambehri aní wene wahnahpa mía míainserah itega ínéba mía míawe. Mó kegá íné iteruwahnsabé owainawane wahnah wenáwíq Pésébúrie aintárónsabé segá ite ínéba mía míao ke moq íre kaweq ewhéh aitagéhe úwe.

### Peh Manikánsabe áhreoro ú ehwehne.

(Árúka 12.2-7)

<sup>26</sup> Sísaga mó mahraréna, Íwíoqnah keyábé áhreiyeho. Amahnága moke kopípéq kék náneq mókake ábóraraginae. Moke epéqté éhwéh ábóraraginae.

<sup>27</sup> Ite sunkíkírirabeq teiú éhwéh téhrehrabeq teríero. Epéq íráh éhwéh nahnsorapéqté sawai sawaiue teríero úwe.

<sup>28</sup> Sísaga mó mahraréna, Peh morá itene inonka subiq suahráho keyábé íre áhreoro. Mi kegá iteyuwa íre subiq suahráhowe. Írakaumo. Minayabe sensabé íre áhreoro. Peh morá Manikánsabe áhreoro. Wega ebeq itene inonka subiqmarena anehe iteyuwa iraipéq suahráhire.

<sup>29</sup> Peh morá pabusa mónéráté téhtaré káriq kabárá máhkétirapéq paiqmaráhwe. Iteriboga moke kabaramarínsábé iwíáhue tagéna íre kowe atahnaraq mi karíq kábárá marakóraq pehipi íre márunsurahorahire.

<sup>30</sup> Mina inserah Maniká Iteriboga ahriahri itensabé iwíáhue tagehre. Itene iyahqnopeqte íyáhrámé sáhnsahwe tagariéhre.

<sup>31</sup> Wega ite aiq moke tagariéh púaq íre áhreoro. Itega kabaramarí kiotaiko puana Manikánka ite íre abitaruanae.

### Íné Sísane ani múge iraréyabe ayehítéhneho i ehwehne.

(Árúka 12.8-9)

<sup>32</sup> Sísaga mó mahraréna, Wehukenínká mó keyábé, Sísane ani múge terinaraq mókake Nánibonsabé, Mi anímé néne ani míre teawiníe.

<sup>33</sup> Mó ke míáhtáq ínénabe ahqáho aintéh ánímé ínéga mókake Nánibo míéhrabeq wens-abé ahqáho ataníe úwe.

*Sínsabé anotahtaq arutaboiroro i ehwéhne.*

(Árúka 12.51-53, 14.26-27)

**34** Ínémé sainkue míah ké insahwé aitanieéna marakóipeq tutaire íwíáhoo? Írakaumo. Peh sainsuanieéna tutauge.

**35** Íné tutau puana ahninkawágá abowánsábé abiahnsa atankéhe. Ayahunkawagá anowansabé abiahnsa atankéhe. Anahbukawagá ahrahnawansábé abiahnsa atankéhe.

**36** Wenawahrah anímárinká wene naruo úkigehe. **(Maika 7.6)**

**37** Wenanoibonsabé anotahtaq arutaboiréna ínénabe peh ákáhtaq arutaboiraintéh ánime íre néne ani míahrahire. Wene ahninkawáreq ayahunkawareqsabé anotahtaq arutaboiréna ínénabe peh ákáhtaq arútábóíraintéh ánime íre néne iyahnabo aní míahrahire.

**38** Nánibone arambehri miraunsabé íné awankátaq táhpawe nubiq suagéhe. Ínéga miraunserah miraue séníráhro. Minayabe néne arambehriraq túbáh agéna peh we awahbeh arámbéhrí sehgí ánime íre néne ani míahrahire.

**39** Wewensabé arutaboiréna peh wewe awahbeh iwíáh mira aruqaruri ánime oga mérapeq íre awaq miahráhire. Néne sásá sehginieéna wewe awahbeh iwíáh susuri ánime oga mérapeq awaq miankéhe úwe.

*Sísa tagariáh ké séhréh arítéh áníné ápeqsabé éhwéhne.*

(Máhka 9.41)

**40** Sísaga mó mahraréna, Ite mehweh aitáh kégá íné moq mehweh aintáhwe. Ínénabe mehweh aintáh kégá íné eqmaq núwéh ání moq mehweh atáhwe.

**41** Manikáne ehweh irari anínká sitaq mó anínká iwíáhéna, We Manikáne ehweh irari aní púana séhréh ataníe ire. Séhréh ataníe éna mi anínsábé mehweh atena kiraboime kaweq sansánire. Manikánka wene ehweh irari aní ápeq awinanserah we mehweh atéh ání moq ápeq awinkéhe. Kaweqlaq mía míai anínká sitaq mó anínká iwíáhéna, We kaweqlaq mía míai aní púana séhréh ataníe ire. Séhréh ataníe éna mi anínsábé mehweh atena kiraboime kaweq sansánire. Manikánka kaweqlaq mía míai aní ápeq awinanserah we mehweh atéh ání moq ápeq awinkéhe.

**42** Teiníboq írátíáhro. Pehgáriq aní íné séníréh ání míéh púana mó anínká né waní náwinana Manikánka mi aníné ápeqme íre tabanagia peh ahreraq kanawire úwe.

## 11

*Sóniga we kéróya aníté Sísaba eqmaq suo ehwéhne.*

(Árúka 7.18-35)

**1** Sísaga moke mi ehwéh ite we kéráhwána ke teiuwe. Wega ite airápété téhraníté we kéráhwána keyábé itene arambehriyabé íwáhnoréna mitaq suena wahtotaq kehiná suwahpeq mó ke síwáhnorinieéna pokúwe.

**2** Sóni wání meri merini aní karábúsiipéq ména Sísa Karáhéga miraú ehweh irena we kéróya anítégá Sísa kasenigeheeéna weba eqmaq suowe.

**3** Eqmaq suowara Sísaba kéra wensabé, Sóniga, Arewe Manikánka eqmaraníe ú anípo? Ite mó anínsábé áwénunonehnkono ire uye.

**4** Uyana Sísaga sensabé, Irehya ehwéhkákáq tagéhya naneqkakákó Sóni koreawétao.

**5** Ínéga miraunka aura pira kégá tagahwara aigará soriqnah kega ah nogówara náonkakákó kéné náo wagirara ahre parosa kégá ehweh irahwe. Pusa ké iriwe organúq sitena tabonah ke Manikáne kaweq ehwéh síwáhnoruge.

**6** Ínénabe árahinabomo íwíáh íre iwiáhia peh ínénabe kawerue aiq pútare aintéh ánime aru ukiqme aní míéhre. Mah ehwéh Sóni koreawétao úwe.

**7** Úwara Sóni kéróya anítégá mitaq suera pokuyataq Sísaga weba sáhurió ke Sóni éhweh teriuwe. Wega mahraréna, Sóniga uworapeq íwáhnoruraitaq koraganehe urotaqmé we

inse wíre íwíáhuroo? Sóiririrana onega míu míu inserah Sóni mó iwíáh mó iwíáhi aní míre íwíáhéq koragaroo? Írakaumo. Sóniwe íre mina tahnsa ání míre.

<sup>8</sup> Sóni koraganehe urotaqmé we inse wíre íwíáhéq koragaroo? Kaweq korósí aneraneria ání koragaroo? Írakaumo. We íre mina tahnsa ání míarairara kaweq korósí aneraneria kewé uworapeq íre mía peh wahnah kené nahtapeq mía míaowe.

<sup>9</sup> We inse wíre íwíáhéq koragaroo? We Manikáne ehweh irari aníne íwíáhuroo? Aiq pútaq iwíáhowe. Írátiáhro. We Manikáne ehweh irari anínéna moke mó ke áwáhu ke kiotaikuraire.

<sup>10</sup> Sóni éhwehme Manikáne ehwehnka mahraréna,  
Néne ehweh korerina anímé ebeq eqmarahnana are sina ah kawerarankéhe ire úwe.

(Malakai 3.1)

<sup>11</sup> Sísaga mó mahraréna, Teiníboq írátiáhro. Sóni wání meri merini aní anotah anínirara moke mó kegá we íre kiotaikowe. Íre kiotaikowana Manikánka wahnah wahnahnirabeq íópipeq kibeki aní pehgáriq anínká Sóni kiotaikire.

<sup>12</sup> Sóniga ehweh iraruraitaqkakáq amahnágaákáq págege sansáno kegá íópeq Manikánka wahnah wahnahnirabeq kibekoneheqmúne éra sene págege sansánowe.

<sup>13</sup> Manikáne ehweh iraru kereq Mósísireqka Manikánka wahnah wahnahnirabeqte éhwéh teiúwana Sóniga suraire.

<sup>14</sup> Sene ehweh aiq pútare arítáhmé kawerowe. Segá pabeqme ewhéh irarume Éráisa móñkakáq sinæ ewe. Sóniga menah surainsabé sene ehweh aiq pútaraguraire.

<sup>15</sup> Íre parosa áhréákáq kéo, írátiáhro úwe.

<sup>16</sup> Sísaga mó mahraréna, Amahnága oga míáh kewé ite aneq tahnsá kée teiníkono? Itewe káriq anímárínká máhkétirapéq ogi ogionserah tahnsá kék wóe. Mó anímárínká mó anímárínsabé abiahnsa aritera sensabé,

<sup>17</sup> Igonkónúnaraq itega íre ábáhrowe. Ibitunántúnánúnaraq itega íre ibisahwe ewe.

<sup>18</sup> Sóniga suraitaq wega táhutahuq avehriéna náhníáq sera ano íre narainsabé sega abiahnsa atera, Owainawanka iwíáh atéh ání míre atárówe.

<sup>19</sup> Íné wehukení úku anínká surautaq táhutahuqkakáq náhníáq sera anonkakaq pehipi nogara sega ínésabe abiahnsa aintera mahraréra, We kobuq kahburi uwoyansa aní míre aintera tákísi moné meyáh kereq mó ahbábáq kereqne iyahnabo aní míre aintáhwe. Segá ínésabe mi ewhéh irarewara Maniká tagariáh kegá ahtebé sansánirataq mó kegá tagéra, Se aiq pútaq sansánowe ewe úwe.

Sísaga, Kamah ainehboq kawerurero ú ehwehne.

(Árúka 10.13-15)

<sup>20</sup> Sísaga mó kehiná suwahpeq áhnte otáq sánsánuwara tago kegá sene ahbabáq sansa íre suónsabe Sísaga mi keyábé ehweh aritowe.

<sup>21</sup> Wega mahraréna, Kórásíni suwahpeqte kereq Pétásáíra suwahpeqte kérero, kamah ainehboq kawerurero. Iteruwahpeq áhnte otáq sánsá miraurauge. Táíya suwahpeqte kereq Sáírona suwahpeqte kereqka mina tagotaq tahirímé sene ahbabáq naho suera kaweqtaq mío irino. Segá mina tagotaq tahirímé sene ahbabáq aiq suónsabe Manikánka tagankeheéra nahonáh kórósí aneranerue tanah abaq marera sene ahbabáqsabe tútuue ibiso irino.

<sup>22</sup> Teiníboq írátiáhro. Manikánka ehweh aitahna tanáhráq mi keyábé peh ákáhtaq kamáh arinkéhe. Mi tanáhráq ite Kórásíni suwahpeqte kereq Pétásáíra suwahpeqte kereq anotahtaq kamah ainawire.

<sup>23</sup> Kápénéáma suwahpeqte kéo, ite kaweq ke míone éq minayabe íópeqté mátábúrapéq kioneheqmúne íwíáhoo? Írakaumo. Mibeq íre kioneheqmóe. Peh iraipéq kowíáhro aitanawire. Ínéga págege otáq sánsá iteruwahpeq mirauraugaq tagarowe. Mirauraunserah Sóróma suwahpeq miraowataq tahirímé mi kegá sene ahbabáq sansa suera

kaweqtaq míó irino. Sene ahbabáq súótaq tahirímé Manikánka sensuwahpeq íre kekira peh kék irino.

<sup>24</sup> Amahnága teiníboq írátiáhro. Manikánka ehwéh aitahna tanáhráq wega Sóróma suwahpeqte kékabé arutaboiréna peh ákáhtaq kamáh arinkéhe. Mi tanáhráq ite anotah-taq kamah ainawire úwe.

*Sísaga, Ínéba sero éna ahrenahro aitaníe ú ehwehne.*

(Árúka 10.21-22)

<sup>25</sup> Sísaga púrerue mahraréna, Nániboo, arega moke íopeqkákáq mah marákó mårákóákáq wahnahnóne. Wehukene sásá ahtebah kewé arene sásá íre sokigi ariasa peh morá káriq aní tahnsa ké arene sásá aiq sokigi aiene. Minayabe arensabé iwíáh iwíáh atóge.

<sup>26</sup> Nániboo, arerega iwíáhue aiq miraóne úwe.

<sup>27</sup> Sísaga mitaq míó keyabé mó mahraréna, Nániboga moke náníre. Mó kegá íné Manikáne ahninkáwá íre tábúsoqme tagariáhwana Nániboga webataq íné wenahni tagariéhre. Mó kegá Nánibo íre tagariáhwana ínébataq wenahninká we tagarióge. Íné wenahninká sokigi aiéna kegá moq Maniká Iteribo tagariagehe úwe.

<sup>28</sup> Sísaga mó mahraréna, Págege arámbéhriéq irupipeq umehi keo, ínéba sero. Ínéba sirataq ahrenahro aitená iru ukiq itaníe.

<sup>29</sup> Néne arambehri sehgieq néne sásá ahtebahro. Íné uwaresa ánínéna pehwehrue mía míau aní púaq ínéba sirataq irupipeq ukiq itahnaq ahrenagehe.

<sup>30</sup> Néne arambehriwe irupipeq íre págegeorahi arámbéhri wíre. Mi arámbéhri sehgírataq irupipeq eyoyó aitaníe úwe.

## 12

*Sísaga ahrena ahrena wehekáh arambehriýabe irarú ehwehne.*

(Máhka 2.23-28; Árúka 6.1-5)

<sup>1</sup> Mi tanáhráq ahrena ahrena wehekáh Sísareq ite we kérahwána kereqka páréti mirao naneq será sotápéq kótaikowanaraq irupibiúwaq itega mi será késabaríqme késabaríqme ue kure nahwane.

<sup>2</sup> Nahwanara Péhrasi kegá tagéra Sísansabé, Tagáhno. Are kéráh kégá ahrena ahrena wehekáh íre mirao naneq sansánowe. Minayabe sega ahbabárowe uwe.

<sup>3</sup> Uwana Sísaga sensabé, Itewe Manikáne púkuipéqté séhíramé Tébítireq we kéró kereqka sirupibiútaq mirau sansámé íre sáhnsahwe ahtebaho?

<sup>4</sup> Tébítiga Manikánsabe iwíáh iwíáh atáh náhúpéq kibekéna Manikánka tagankeheéra måró paréti mewe nówara we kéró kega moq nowe. Nonsabe íre mirao naneq miraowe. Mósíne ehwéh irarunka mi parétiwé pehipéqté kégá íre nah nanere. Peh morá Manikáne ehwéh mibeq mahbeq arítáh kégá nahrahewe ire. (1 Samuel 21.1-6)

<sup>5</sup> Mósíne ehwéh mibeq mahbeq arítáh kéné ehwéh aiq sáhnsahona wino. Mi ehwéhká teímé ahrena ahrena wehekáh sega Manikánsabe iwíáh iwíáh atáh náhtápéq arambbehriwana Manikánka íre abiahnsa aritowe ire.

<sup>6</sup> Teiníboq írátiáhro. Íné mahtaq ména Manikánsabe iwíáh iwíáh atáh náhtápéq kio-taikuge.

<sup>7</sup> Manikáne ehwehnka mahraréna, Titiré sansansábé íre nuwahbehrana peh arutaboiré sansa séhréh arite sansansábé nuwahbehere ire. (Hosea 6.6)

Itega mi ehwéh ahtebahtaq tahirímé íné séníráh ké kaweqtaq míáh kékabé, Ahbabárowe íre aritewáh irino.

<sup>8</sup> Íné wehukení úku anínká ahrena ahrena wehekáh wahnah wahnahnuge úwe.

*Sísaga ahrena ahrena wehekáh sawenkahnia áyáhnkákáq ání kawerato ehwehne.*

(Máhka 3.1-6; Árúka 6.6-11)

<sup>9</sup> Sísaga mitaq suena Asiu kené momiwí nahtápéq kibekúwana

<sup>10</sup> sawenkahnia áyáhnkákáq ání míowe. Péhrasi kegá Sísa ehweh ataneheéra we kasenéra, Ahrena ahrena wehekáh wehuke kaweratewé Mósísine ehwehnka ahqáho atehro uwe.

<sup>11</sup> Uwana Sísaga sensabé, Ahrena ahrena wehekáh itene ka íre wahto matáípéq tupekitaq mi ka tumeyáh mino.

<sup>12</sup> Wehukenínká ménkámehnká aiq kiotaiki mino. Minayabe ahrena ahrena wehekáh Mósísine ehwehnka kaweq sansánsábé íre ahqáho atéhre.

<sup>13</sup> Íre ahqáho atéhre éna sawenkahnia áyáhnkákáq áninsábé, Arene ayahnkara obariro úwana wene ayah obariowana kaweragúwana ébeq ayáhnkárá tahnsa úkúwe.

<sup>14</sup> Péhrasi kegá tueague só síoéra, Sísawe árahue subiq suanéhnkono uwe.

*Sísawe Manikáne arambehri anínsábé éhwéhne.*

<sup>15</sup> Árahue subiq suanéhnkono u ehwéh Sísaga irena mitaq suena pokúwara áhnte kegá we kérówe. Áhnte kegá we kérówana moke awahre ke kaweraritena

<sup>16</sup> sensabé, Íné éhwéh mó ke teriyeho aritowe.

<sup>17</sup> Sísaga áhnte awáhré ké kaweraritonsabe Manikáne ehweh irarú ani Áísáíaga sehiranú ehwehnká aiq pútaragúwe. Mi ehwéhmé Manikánka irarú ehweh wega sehiranue mahraréna,

<sup>18</sup> Néne arambehri mirai aní ínéga omaq ató ání aiq míéhre. Wensabé nirutaboiréna wene arambehriyabé nuwahbehre. Ínéniwanka weba mía míánana wega nahnsó ke kaweq sansá terinkéhe.

<sup>19</sup> Wega íre ehwehinae. Wega íre anotahtaq ehwehninae. Ahtapeqté íre sawai sawainae.

<sup>20</sup> Wega mareqmareq sah íre airaiq piteruanæ. Áráhmu pehgáriq téhráhnaraq íre puinsuanæ. Ahqáho. Mirainaga kaweq sansánká ahbabáq sansa kiotaikinae.

<sup>21</sup> Nahnsó kegá wene ehweh irera, Ite kaweraitankéhe íwíáhigehe úwe. (*Aisaia 42.1-4*)

*Owainawanka Sísa séhréh atéhre éra péhe éhwéh iraru ehwéhne.*

(*Máhka 3.20-30; Árúka 11.14-23, 12.10*)

<sup>22</sup> Mó kegá aura pira ání, íre ehwehnorahú aní meqmera Sísaba móátówe. Wene arupipeq owainawa mío púana we íre ehwehnorahú ání, aura pira ání míowe.

<sup>23</sup> Sísaga mi aní kaweratowana ehwehnéna aura tagówe. Mina tago kegá áhtenéra seye náhenéra, Kaweratéh ánímé Tébítine anahwabómo uwe.

<sup>24</sup> Péhrasi kegá kawerato ehweh irera, Pésébúri owainawane wahnahnka Sísa págege atena séhréh atéh púana Sísaga owainawamarí kaqsuahráhire éra seye náhenéra ehmuniq éhmúníruwe.

<sup>25</sup> Ehmuniq éhmúníruwana Sísaga sene iwíáh tagéna sensabé, Wahba márakórápéqté kegá seye ebehirataq sainkoneherawoe. Minayabe se págegeue morá ké íre míahrahewe. Sensuwahrahreq seye ebehirataq sainkoneherawoe. Minayabe se págegeue morá ké íre míahrahewe.

<sup>26</sup> Owainawanseq wenawahrahreq ebehotaq tahirímé se sainkéra págegeue morá ké íre míahraho irino.

<sup>27</sup> Ínéga owainawa kaqsúótáq owainawane wahnahnka séhréh aintéhtáq tahirímé ite kéíráh kegá owainawa kaqsúáhtáq insega séhréh arítéh iripo? Ite kéíráh kegá itene ehwehnsabé íre tábúsoréhre aitáhwe.

<sup>28</sup> Manikáne Awanka págege aintena séhréh aintéh púana owainawa kaqsuq kaqsuruge. Mina tagéq Manikánka wahnah wahnahni sansá iteba aiq sire éq tagariáhwe úwe.

<sup>29</sup> Sísaga mó mahraréna, Wehukenínká ayahnsa kira wéhné ménsámehnsá meyanieéna wene nahupeq árahue kibekorahiro? Ebeqme ayahnsa kira wéh táhtoqme táhru táhruarena anehe wene nahtapeqté ménsámehnsá pehipi meyahráhire úwe.

**30** Sísaga mó mahraréna, Wehukenínká íre néne iyahnabo aní míéhmé néne naruo aní míre. Wehukenínká ínéreq íre soruparítéhrataqmé wega wehuke karegaráh aruqarurire.

**31** Peh morá Manikáne Awansabe abehq éhwéh atáh kewé Manikánka mi ke íre insahwé aritankéhe. Mi ahbabáq peh ahreraq matiankehe úwe.

**32** Íné wehukení úku anínsábé níéhruru aintéh ánime Manikánka insahwé atahráhire. Manikáne Awansabe éhruru atéh ánime Manikánka amahnágaákáq mókakeakáq mi aní íre insahwé atena wene ahbabáq peh ahriahri ahreraq matiankehe úwe.

*Íre kaweq awánkánká abehq sérá iyanae i ehwéhne.*

(Árúka 6.43-45)

**33** Sísaga Péhrasi keyábé mó mahraréna, Peh morá kaweq awánkánká kaweq será íyéhre. Íre kaweq awánkánká abehq sérá íyéhre. Wehukenínká awanká sera tagéna mi awánká ahtebehre.

**34** Itewe wehene animári móe. Itene irupipeq kék náneq itene íwéhga irarerahire. Itene irupipeq íre kaweq iwiáh kék púaq kaweq ehwéh íre irarerahowe.

**35** Kaweq ánime wene arupipeq kaweq iwiáh kék púaq kaweq sansánire. Ahbabáq ánime wene arupipeq ahbabáq iwiáh kék púaq ahbabáq sansanire.

**36** Teiníboq írátiáhro. Ehweh aitahna tanáhráq Manikánka wehukene ehweh iwiáhue tagéna moke sene abehq éhwéhnsábé saraqmarankéhe.

**37** Kaweq ehwéh irare irareóna aníno, Kaweq aní móne atankéhe. Ahbabáq ehweh irare irareóna aníno, Ahbabáq ani móne atankéhe úwe.

*Sísansabé, Ótaq sansánúno u ehwéhne.*

(Máhka 8.11-12; Árúka 11.29-32)

**38** Táhmaro Mósísine ehweh síwáhnoro kereq Péhrasi kereqka Sísansabé, Íwáhnoraníno, itega Manikáne arambehri miraóna aní taganehboq arega ótaq sansánúno uwe.

**39** Uwana Sísaga sensabé, Amahnága oga míáh kégá Manikánsabe íre iuwahbehraq ahbabáq ke míáhwe. Ótaq sansánúno ewo? Írakaumo. Wehukení wenawíq Sónaga sóreq wanípípéq tupekútaq Manikánka ótaq sansá miraúwe. Peh morá mi sansá teienaq iwiáhue tagagehe.

**40** Sóna apahtáró wéhékáh anotah pahné arupipeq míonserah íné wehukení úku aní apahtáróráq marakóipeq míanie.

**41** Níníbe suwahpeqte kégá ahbabáruwana Sónaga ehweh koreriutaq wene ehweh irera sene ahbabáq sansa suera kaweptaq míowe. Minayabe Manikánka ehweh aitahna tanáhráq Níníbe suwahpeqte kégá iriwe méra ite amahnága oga míáh kékabé, Íre kawerowe éra ehweh aitagéhe. Amahnága iteba míó ánime Sóna kiotaiku aní múge. Níníbe suwahpeqte kégá Sónane ehweh írónserah árahinsabé néne ehwehme íre iraho?

**42** Sórómóniga Ísara ke wahnahnútaq wáhnaupéqté kéné wahnah inínká wene ahtebia éhwéh iranieána íre wahtopeqte weba súwe. Teiníboq írátiáhro. Amahnága iteba míó ánime Sórómóni kiotaiku aní múge. Mi inínká Sórómónine ahtebia éhwéh ironserahme árahinsabé néne ehweh íre iraho? Minayabe Manikánka ehweh aitahna tanáhráq mi inínká iriwe ména itensabé ehweh aitankéhe úwe.

*Owainawanka kouwekinsabé éhwéhne.*

(Árúka 11.24-26)

**43** Sísaga Mósísine ehweh síwáhnoro kereq Péhrasi kereqsabé mó mahraréna, Owainawanka wehukení auwena pokitaq wání íre kéhrabeq nogena ahrenahrahirabeq kabarire. Kabarirana írakauninsabé iwiáhéna,

**44** Ínéga súo náhtápéq seuwekinauge éna áuwátái wéhükénípá kouwekire. Kouwekéna wene nah tagehrana aiq kabantáhwe kaweraréhre.

<sup>45</sup> Kawerarena mó abapete téhraníté áhnte ahbábáq ówáínawámári koweriréhre. Moke mi owáínawámári mi anípá kowíáhwe. Téhwe peh morá ówáínawánká mi anípá míéhtáq íre kawerire. Anehemé áhnte owáínawámárnká weba míáhnsábé anotahtaq íre kawerire. Mi aní íre kaweraginserah amahnága ite oga míáh áhbábáro ke íre kaweqlaq míaneheqmóe úwe.

*Sísane anowaréh ábákawaréhwé inseréhbo i ehwéhne.*

(Máhka 3.31-35; Árúka 8.19-21)

<sup>46</sup> Sísaga nahupeq ména ehweh teriutaq wenanoreq wenábáqmarinseq máhpeq iriwe méra Sísareq ehwehnéyabe suwahbówe.

<sup>47</sup> [Suwahbówana mó anínká Sísansabé, Arenanoreq arenábáqmarinseq máhpeq iriwe méra arensabé áhrabowe úwe.]

<sup>48</sup> Úwana Sísaga mío keyabé mahraréna, Náinowé insebo? Nánibáqsome inseréhbo éna

<sup>49</sup> ite we kéráhwána ke ayahnáwíqme mahraréna, Mah kewé náinoreq nánibáqmarinseq móe.

<sup>50</sup> Íopeqté Nánibó awahbeh arámbéhrí sehgíó kewé nánibáqmari móe. Náinahnoreh wóe. Náinoréh wóe úwe.

## 13

*Ayu suitabéyabe pabeqme ehwéhne.*

(Máhka 4.1-9; Árúka 8.4-8)

<sup>1</sup> Mi wehekáh Sísaga nahtapeqté tueyokéna káwehu ayehráq tunse mitaq tútuue míowe.

<sup>2</sup> Tútuue míowara íregáritaq weba sáhatíó púana Sísaga wánípipeq ko sipúipéq kibekue tútuue míowara moke mío kega arahwéraq iriwe míowe.

<sup>3</sup> Míowana Sísaga áhnte pabeqme ehwéh síwáhnorúwe. Wega mahraréna, Ayu suitabeh anínká wene sotápéq ayu suitabanieéna pokire.

<sup>4</sup> Suitabehtaq mó ayú ahtaq megirana kabaranka sésiq nehre.

<sup>5</sup> Mó ayú kiruraq megirana pehgáriq marákó kékhsábé mi ayú apubúue kiapoue kíréhre.

<sup>6</sup> Anotah patáhitaq tamurupague íre ánúq píeh púana ehyatagire.

<sup>7</sup> Mó ayú náwerarúítáq megirana náwe kirena kárígariirana sera íre íyéhre.

<sup>8</sup> Mó ayú kaweq marákóráq megirana kiapoue kirena áhnte será iratanire. Mó ayú 100 será íyéhrana mó ayú 60 será íyéhrana mó ayú 30 será íyéhre.

<sup>9</sup> Íre parosa áhréákáq kéo, kawerue íráhro úwe.

*Sísaga moke pabeqme ehwéh teriunsabe irarú ehwehne.*

(Máhka 4.10-12; Árúka 8.9-10)

<sup>10</sup> Síwáhnorúwaq ite we kéráhwána kegá Sísaba séq wensabé, Mó ke síwáhnorónaraq aneqsabé pabeqme ehwéh terieno ewane.

<sup>11</sup> Ewanana Sísaga itensabé, Manikánka íópeq wahnah wahnahnirabeqte éhwéhmé menah wehukega íre írátíahrahruowe. Amahnága Manikánka mi ehwéh ite sokigi aíre. Peh mó ke íre sokigi aríre.

<sup>12</sup> Manikánka wene ehweh kawerue íréh ání mó sokigi awinana áhnte ahtebanae. Wene ehwehnsabé anetaníbo i aní mó íre sokigi awinana we pehgáriq ahtebeh naneq abitaginae.

<sup>13</sup> Minayabe wehuke pabeqme ehwéh teríúge. Sene siuranka tagéra íre tagaríáhwe. Sene siahrega irera íre írátíáh púana pabeqme ehwéh teríúge. (Lo 29.4)

<sup>14</sup> Minayabe Manikánka iwíáh atowana Áísáíaga sehiranú ehwehnká aiq pútáragire. Mi ehwéhmé Manikánka irarú ehweh wega sehiranue mahraréna, Itega ehweh ireq itene irupipeq íre írátíáhwe. Itega tagéq itene irupipeq íre tagaríáhwe.

<sup>15</sup> Mi kené sirupipeq íre ahtebahrahewe. Seyene siahre aiq parokire. Seyene siura aiq mútúgire. Segá íre miraotaq tahirímé sene siuranka tagéra sene siahrega irera sene sirupipeq ahtebéra sene ahbabáq suera íné níáhrabo irino. Sene ahbabáq suera íné níáhrabotaq tahirímé kawerarító irino úwe. *(Aisaia 6.9-10)*

<sup>16</sup> Sísaga ite we kéráhwána keyábé mó mahrraréna, Itene iuranka áhntetaq tagahnsabe itene iahrega áhntetaq íráhnsábé iwíáh iwíáhoro.

<sup>17</sup> Teiníboq írátíáhro. Áhnte Manikáne ehweh iraru kereq kaweqlaq mía míau kereqka itega tagah naneq tagéyabe suwahbówara íre tagowe. Itega íráh éhwéhnsábé sega ireyabe suwahbówara íre írówe úwe.

### *Sísaga ayunsabe éhwéh áwahe pahsuo ehwéhne.*

*(Máhka 4.13-20; Árúka 8.11-15)*

<sup>18</sup> Sísaga itensabé, Ayu suitabé pabeqme ehwéh áwahe ahtebagehboq írátíáhro.

<sup>19</sup> Manikánka wahnah wahnahnirabeqte éhwéh siahrega irera íre ahtebah kewé ahtapeq megí ayú tahnsane. Owainawanka sirupipeqté mi ehwéh apubúue seaebóire.

<sup>20</sup> Kiruraq megí ayúmé kiapoinserah wehukenínká Manikáne ehweh irena arupipeq eyoyóéna apubúue kowe atéhre.

<sup>21</sup> Manikáne ehwehnka arupipeq íre ánú píehnsábé pehgáriq tanáhráq sehgóre. Mi ehwéh sehgóinsábé mó kegá áwioqnahwana íre kaweqlaq sunúq sire. Mi tanáhráq wega túbáh agéna Maniká áuwéhre.

<sup>22</sup> Náwe tarúítáq megí ayúmé wehukenínká Manikáne ehweh irena sehginie íwíáhéná mah marákó márakóípqué néeqsabé iwíáh íwíáhéná ménsámehnsánkakaq móneakáqsábé arutaboirire. Náwe soaginserah minawarininká saiqnariéh púana wega Manikáne arambéhri íre miraire.

<sup>23</sup> Kaweqlaq marákóráq megí ayúmé wehukenínká Manikáne ehweh irena arupipeq tábúsoqme iwíáhire. Kaweqlaq marákóráq kaweqlaq será íyéhnséráh wega mi ehwéh sehgienna Manikáne arambéhri kawerue miraire. Kawerue miraéna mó anínká 100 tahnsá áhnte kaweqlaq arámbéhríirana mó anínká 60 tahnsá kaweqlaq arámbéhríirana mó anínká 30 tahnsá árámbehríire úwe.

### *Náweyabé pabeqme ehwéhne.*

<sup>24</sup> Sísaga mó pabeqme ehwéh mahrraréna, Manikánka íópeqté wahnah wahnahnime wehukenínká wene sotápéq kaweqlaq ayú uqmatainserahne.

<sup>25</sup> Inokáhpeq wehuke sugé tanahráq wene naruo anínká sure kaweqlaq ayú uqmataitaq náwe uqmarena pokuraire.

<sup>26</sup> Kaweqlaq ayú kirena iyanauraitaq náweakáq kítáire.

<sup>27</sup> So abone arambéhri anímárinká sure wensabé, Arene sotápéq peh kaweqlaq ayú uqmatonawe mah nawé eheqte kirehro urowe.

<sup>28</sup> Urowana sene wahnahnka sensabé, itene naruo anínká mi nawé uqmataire urairara sega wensabé, Náwe soranéhnikono urowana,

<sup>29</sup> Ahqáho. Náwe soréhrataq kaweqlaq naneqkakáq pagorúéhboq moráráq kirankéhe.

<sup>30</sup> Moráráq kirahnana nera kahnaraq ínéga arambéhri keyábé, Téhwe mi nawé saué airíwe ira pariáhro. Anehe kaweqlaq será ísíwe néne ménsámehnsá kék náhúpéq sáharáhro aritaníe uraire úwe.

### *Pehgáriq ayúnsábé pabeqme ehwéhne.*

*(Máhka 4.30-32; Árúka 13.18-19)*

<sup>31</sup> Sísaga mó pabeqme ehwéh mahrraréna, Manikánka wahnah wahnahnime pehgáriq ayú tahnsane. Mi ayúmá íre mó sotápéqté ayú tahnsane. Írakaumo. Mi ayúmá pehgáriq ayúne.

<sup>32</sup> Wehukenínká mi pehgáriq áyú wene sotápéq uqmatairana kirena anotah awánká úkéna moke mó mensáméhnsá kiotaikire. Anotah awánkánirana kabaramarínká séra ayahnaweraq sene nah piáhwe úwe.

### *Muoráhi naneqsabé pabeqme ehwéhne.*

(Árúka 13.20-21)

<sup>33</sup> Sísaga mó pabeqme ehwéh mahraréna, Tírí ínínká muoráhi naneq párawahipéq maqme ayahnirana moke múíre. Manikánka íópeq wahnah wahnahnime mina páréti muoráhi naneq tahnsáne úwe.

### *Sísaga peh pabeqme ehwéh teriu ehwéhne.*

(Mákha 4.33-34)

<sup>34</sup> Sísaga weba sáhurió ke ehweh teriena sensabé íre pahsuqme teriasa peh pabeqme ehwéhmári teriuwe.

<sup>35</sup> Manikáne ehweh irarú aniné ehweh aiq pútaraginkeheéna Sísaga peh pabeqme ehwéh teriuwe. Mi pukúípéqté ehwéhnká mahraréna, Ehweh teriénaraq peh pabeqme ehwéh teriníe. Mah marákó márakó miraútaqkakáq menahnkákáq epéqté ehwéh káráirana amahnága teriníe ire. (Buk Song 78.2)

### *Sísaga náweyabé áwahe pahsuo ehwehne.*

<sup>36</sup> Sísaga weba sáhurió ke suena nahupeq kibekúwaq ite we kérahwána kegá weba séq wensabé, Mi pabéqmé ehwéh náwe uqmatai ehwéhmé pahsuqme teio ewane.

<sup>37</sup> Ewanana Sísaga itensabé pahsuqme teiena, Kaweq ayú uqmatai anímé íné wehukení úku aníne.

<sup>38</sup> Somé mah marákó márakóe. Kaweq ayúmá Manikánka wahnah wahnahnirabeq kioráho ke wóe. Náwewe owainawane animári móe.

<sup>39</sup> Náwe uqmatai anímé owainawa mire. Nera kahna tanáhráqmé mah tanáhráq parabagínana Manikánka sainsuahna tanáhráq míre. Sera ísíra kewé íópeqté ké wóe.

<sup>40</sup> Náwe sauwe ira paríahnsarah mah tanáhráq parabagínana Manikánka sainsuahna tanáhráq sinawire.

<sup>41</sup> Mi tanáhráq íné wehukení úku anínká íópeqté ké eqmaq suahnara Manikánka wahnah wahnahnirabeq kioráhiria ke míéhrataq moke ínéhgíó kéreq mó ahbábáq kéreq sorupagehe.

<sup>42</sup> Sorupéra anotah iráípéq kaqsuehrara mitaq ibiséra uwo uwo oneherawoe.

<sup>43</sup> Mi tanáhráq Manikáne animári Sensiboga wahnah wahnahnirabeq kaweqtaq méra patahi serahnigehe. Íre parosa áhréákáq kéo, kawerue íráhro úwe.

### *Móné antéhyá sotápéq kopéq suo ehwéhne.*

<sup>44</sup> Sísaga mó mahraréna, Manikánka íópeq wahnah wahnahnime wehukenínká móne antéhyá wene sotápéq ubuqme kopéq suonserahne. Mó anínká mi antéhyá ábóraq marena áhnte moné mipipéq kékhsábé mitaq mó akariaréhre. Wene arupipeq eyoyóirana móne paiqmianieéna moke wene ménsámehnsá paiqmarena mi moné mewena móne antéhyá kék só kobaiqmáréhre úwe.

### *Pásésuqsabé pabeqme ehwéhne.*

<sup>45</sup> Sísaga mó mahraréna, Manikánka íópeq wahnah wahnahnime ménsámehnsá paiqmaq paiqmari anínká kaweq pasésúq paiqmaranieéna kabari serahnire.

<sup>46</sup> Wega peh morá pásésúq áhnte kaweq pasésúq tagéna moke wene ménsámehnsá paiqmarena mi moné mewena mi pasésúq kobaiqmáréhre úwe.

### *Pah siqmíáhnsábé pabeqme ehwéhne.*

<sup>47</sup> Sísaga mó mahraréna, Manikánka íópeq wahnah wahnahnime kahweraté uwe taga tagao serahnire. Wehukega káwehupípéq anotah kahwératé uwe tagaéra áhnte mó naneq ka mó naneq kanue maqmíáhwe.

<sup>48</sup> Maqmíáhtáq kahweipéq áhnte kéhrara arahwéraq tútuue méra pah siqmíáhwe. Siqmarera kaweq ka pah antéhyápípéq sáharera íre kaweq ka súáhwe.

<sup>49</sup> Mina onserah mah tanáhráq parabagínaraq íópeqté kégá sure kaweq ke míéhrarabeqte áhbábáq ké aiqme meriqmera

<sup>50</sup> anotah iráípéq tuparuehrara mitaq ibiséra uwo uwo oneherawoe úwe.

<sup>51</sup> Sísaga ite we kérähwána keyábé, Teiú éhwéh moke aiq iraho úwaq itega wensabé, Aiq ironé ewane.

<sup>52</sup> Ewanana Mósísiga sehgóro ú ehweh íráh kégá íné wahnah wahnahu ehwéh aiq ahtebahwe. Mi kegá anotah nah matiéh áninká mira inserahnowe. Anotah nah matiéh áninká peh morá páqnáhípéq áhnte mensáméhnsá matiéhre. Wega mi paqnáhípéqté o mensáméhnsánkákáq nahonáh ménsáméhnsánkákáq mewe máhpeq tueyokire úwe.\*

*Néhsara suwahpeqte kégá Sísansabé suwahrió ehwehne.*

*(Máhka 6.1-6; Árúka 4.16-30)*

<sup>53</sup> Sísaga mi pabéqmé éhwéh teiena mitaq suena

<sup>54</sup> wenawahperurá pokúwe. Mitaq momiwí nahtápéq kibekéna síwáhnorúwara író kega, We árahue ahtebia ání úkurairo éra, Wega ótaq sansá árahue mirairo éra áhtenuwe.

<sup>55</sup> Áhtenéra, We peh nah piéh áníné ahninkáwá wíre. Wenanowé Máhría wire. Sémisiwe, Sósépawe, Sáimóniwe, Súrásawe, wenábáqmari móe.

<sup>56</sup> Wenanahnoreh mahtaqté ánímári móe. Minayabe we árahue ahtebia ání úkurairo éra

<sup>57</sup> wensabé abiahnsa atówe. Abiahnsa atówana Sísaga sensabé, Manikáne ehweh irari anínsábé mó ke suwahpeqte kégá iwíáh iwíáh atáhwe. Peh morá wenawahpeqte kereq wenawahrahreqka wensabé íre iwíáh iwíáh atáhwe úwe.

<sup>58</sup> Úwana sega wensabé íre aiq pútare ató púana mitaq áhnte otáq sánsá íre miraúwe.

## 14

*Sóni wání meri merinú aní pukú ehwehne.*

*(Máhka 6.14-29; Árúka 3.19-20, 9.7-9)*

<sup>1</sup> Sísa éhweh mitaq teri mahtaq terinuwana mi tanáhráq anotah wahnáh ání Érótiga irowe.

<sup>2</sup> Irena wene arambehri keyábé mahraréna, Mah anímé Sóni wání meri merini aní míre. We pukéna mó oga úkurai puana amahnága págege otáq sánsánire úwe.

<sup>3-4</sup> Sóni oga míotaq wega Érótinsabé ehweh atena mahraréna, Arenábáqne ahre meron-awe Mósísiga sehgóro ú ehweh aiq anterutone úwe. Wenábáq Píripine ahre Éróriásá meyonsabe Sóniga ehweh atowana meyo inínká mi ehwéhnsábé ayehítónsabe Sóni abiahnsa atowe. Abiahnsa atowana Érótiga, Sóni táhtoqme karábúsiipéq móátáhro úwara táhtoqme karábúsiipéq móátówe.

<sup>5</sup> Móátowana Érótiga, Sóni subiq suaníe iwíáhéná túbáh agúwe. Wehukega, Sóniwe Manikáne ehweh irari aní míre iwíáhunsabé sensabé áhreéna túbáh agúwe.

<sup>6</sup> Érótine anowagá we maqmio ahreraq ko tanáhráq sútaq wereq máhoro ú kereqka táhutahuruwana Éróriásane ayahunkawagá mitaq ména ábáhrúwe. Ábáhrúwana Érótiga iwíáh iwíáhéná wensabé,

<sup>7</sup> Arega nánio ina naneq náwiníe éna, Pópoqnahga tagariéhtáq awinauge úwe.

<sup>8</sup> Mi ahráríné anowagá Sóninsabé abiahnsa atena weniyyahu pagu pagunúwana wega Érótinsabé, Íné Sóni wání meri merini aníné ayahqno kiraqsuq maqme kunubaipéq maqme ménio úwe.

\* <sup>13:52:</sup> Anotah nah matiéh ání éhwehme áwahe mahraue kéhre. Mósísiga sehgóro ú ehweh ahtebéra Sísane ehweh ahtebah kegá Mósísine naho éhwéhnsánkákáq Sísane o éhwéhnsánkákáq síwáhnororahowe. Manikánka íópeqté wahnah wahnahnirabeqte sánsá ahtebéra síwáhnororahowe.

<sup>9</sup> Úwana Érótiga mi ehwéh irotaq wene arupipeq umeh agúwe. Pópoqnahga tagaríéhtáq awinauge ú púana wene arupipeq iwíáh kikiruwe. Ínéreq táchutahuro kegá néne ehweh íráh púana niyehitéhneho éna, We awahbeh naneq náwero úwe.

<sup>10</sup> We awahbeh naneq náwero úwana Érótiga eqmaq auwo aninká karábúsiipéq tunse Sónine ayahqno kiraqsuena kunubaipéq maqme mewe séna

<sup>11</sup> mi ahrári awuwana wenano móawuwe.

<sup>12</sup> Sóni kéró kega we subiq súó ehweh irera sure wene anonka sesehgíwera mómaisarera Sísa koreawúwe.

*Sísaga 5 táhúséni (5,000) weh kiraboú ehwehne.*

(Mákha 6.31-44; Árúka 9.10-17; Sóni 6.1-13)

<sup>13</sup> Sóni subiq sutowana Sísaga irena mitaq suena sípi kewewena kure abatapi pokinaúwe. Áhnte kegá, We seberaebéq pokire u irera sensuawahpeq suera peh marakóipeq pehbeheráh kure Sísa kinaúrabeq kuwe.

<sup>14</sup> Sísaga mitaq kure sípiipéqté arahwéraq tuegútaq áhnte wehekéq tagéna sensabé arutaboiraritena awahre ke kaweraritowe.

<sup>15</sup> Ío tupekinaútaq ite we kérähwána kegá Sísa séq wensabé, Amahnága penkinaire. Mahtaq peh abatapi púa mah kegá mó ke su wahpeq sene táchutahuq kobaiqmaragéhboq eqmaq suo ewane.

<sup>16</sup> Ewanana Sísaga itensabé, Se aneqsabé pokigehbo? Itega táchutahuq kirabooro úwe.

<sup>17</sup> Úwaq, Ite íre áhnte tahutáhúq peh moberíáh párétíákáq téhtaré páhnkákáq matione ewanana

<sup>18</sup> Sísaga itensabé, Mina mewe sero úwe.

<sup>19</sup> Mewe sero éna míó keyabé, Náweraq tútuue míáhro éna mi parétíákáq páhnkákáq mewena íópeq tagéna Manikánsabe, Kaweróne atowe. Kaweróne atena páréti keqme ite we kérähwána ke náiuwaq itega míó ke náriewáne.

<sup>20</sup> Náriewánara ómiga nowana siyahbankirowe. Siyahbankirowara arahqmé airápété téhtaré páhsíkétí úsawe obenkíq márówe.

<sup>21</sup> Mi tahutáhúq no wehwé íregáritaq 5 táhúséni (5,000) weh wóe. Ani ahre áhnte míó púara íre sáhnsáhúwe.

*Sísaga wání káwehu abobóráhtaba nogu ehwéhne.*

(Mákha 6.45-52; Sóni 6.16-21)

<sup>22</sup> Sísaga ite we kérähwána keyábé, Sípiipéq kiasagoro seberaebéq ite nonótáh pokoro éna eqmaq iuwowe. Ite we kérähwána ke eqmaq iuwena anehe mó ke sensuawahpeq eqmaq suowe.

<sup>23</sup> Eqmaq suena púrerinieéna sáwéhrapeq kiuwe. Penkútaq Sísa webataq ména

<sup>24</sup> púrerúwaq ite we kérähwána ke sípiipéq káwehu ákáhpi míahwane. Anotah soíríuwana wáninka nonaburóróuwana mi sipí íre peheráh korahúwe.

<sup>25</sup> Ahyahbinkerotaq Sísaga wání abobóráhtaba iteba súwaq

<sup>26</sup> we tagéq anotah ahrééq, Wahnsa wíre íwíáhquéq áhreéq kareowanæ.

<sup>27</sup> Kareowanana Sísaga apubúue mahraréna, Pehitaq míáhro. Íné úge. Íre áhreoro úwe.

<sup>28</sup> Úwana Pítaga wensabé, Néne Wahnahno, aiq pútaq are inaraqmé ínénabe, Wání abobóráhtaba noge ínéba súno ainto úwe.

<sup>29</sup> Ínéba súno ainto úwana Sísaga wensabé, Máho úwana Pítaga sípiipéqté tuegue wánítaba Sísa áhnibórá kúwe.

<sup>30</sup> Áhnibórá kéné sóiriq tagéna áhreéna wánípipeq tupekinaútaq Sísanabé, Néne Wahnahno, íné séhréh ainto éna áwíahraq súwe.

<sup>31</sup> Áwíahraq súwana Sísaga apubúue tubanantáwena wensabé, Arega ínénabe íre kawerue aiq pútare aintahne. Aneqsabé árahinabomo íwíáhono úwe.

<sup>32</sup> Segá sípiipéq kiasaguyana sóiriq táqnáigúwe.

<sup>33</sup> Ite sípiipéq míahwana kegá Sísansabé iwíáh iwíáh ateq, Are aiq pútaq Manikáne ahninkáwá wóne atahwáne.

*Sísaga áhnte awáhré ké kawerarito ehwéhne.*

(*Máhka 6.53-56*)

<sup>34</sup> Itega sípiipéq seberaebéq kure Kénésáréti marákórápéq kowanara

<sup>35</sup> mitaq míó kega Sísa tagéra, we Sísae uwe. Sísae éra, Awahre ke mitaq meriq mahtaq merirue sero uwara moke awahre ke meriqmera Sísaba móritówe.

<sup>36</sup> Awahre kegá Sísansabé, Arene ambanta ayehrápéq táhtoranéhnkono éra wene ambanta tátoró ke ómi kaweragúwe.

## 15

*Manikáne ehwehnka iteinahbúréhne sansá kiotaikire i ehwéhne.*

(*Máhka 7.1-13*)

<sup>1</sup> Péhrasi kereq Mósísine ehweh síwáhnoro kereqka Sarúsarama suwahpeqte Sísaba sure wensabé,

<sup>2</sup> Are kéráh kégá iteinahbúréhne sansámé aneqsabé anteruaho? Sene siyahnkara íre pabeq paberia peh náwíqkakaq síyáhnikárátáté táchutahuq nahwe uwe.

<sup>3</sup> Uwana Sísaga sensabé, Itewe aneqsabé peh iteitene sánsá sehgióneheéq Manikánka sehgióro ú ehweh anetaníbo éq anteruaho?

<sup>4</sup> Manikáne ehwehnka mahraréna,  
Iteinoibone ehweh ireq se séhréh arítáhro ire.

Mi ehwéhká mó mahraréna,

Wenanoibonsabé íre kaweq ehwéh arítéh ání subiq súáhro ire. (*Kisim Bek 20.12, 21.17*)

<sup>5</sup> Manikáne pükuga miraue irariraq itega síwáhnoréq, Wehukeníká wenanoibo séhréh aritahráhi monébópoq mó naneqpopoq matawéna wenanoibonsabé mahraréna, Mahnawé Maniká íre áwátáutaq tahirímé náiú irino ire.

<sup>6</sup> Wehukeníká miraue irariraq itega, Mi anínká wenanoibonsabé anetaníbo ime aiq kawerire ewe. Wega se íre séhréh arítéhmé aiq kawerire ewe. Minayabe iteitene ehweh sehgiónsábé Manikánka sehgióro ú ehweh anterúáhwe.

<sup>7</sup> Itewe peh kopéráhpéro ahbabáq ke woe. Itega miraonsabé Manikáne ehweh irarú ani Áísáíaga naho sehiranú ehwehnká aiq pútaragire. Mi ehwéhmé Manikánka irarú ehweh Áísáíaga sehiranue mahraréna,

<sup>8</sup> Mah kegá ínénabe síwéhrate iwíáh iwíáhéra peh sirupipeq ínénabe íre suwahbehre.

<sup>9</sup> Segá peh wehukene sánsá síwáhnoréra, Mahnawé Manikáne sansá míre ewe. Minayabe segá ínénabe péhepehe iwíáh iwíáh aintáhwe úwe. (*Aisaia 29.13*)

*Sísaga, Wehukeníné arupipeqté íwíáhgá ahbabáratahráhire ú ehwehne.*

(*Máhka 7.14-23*)

<sup>10</sup> Sísaga míó keyabé, Ínéba sewiáhro. Néne ehweh ireq iwiáhue tagahro.

<sup>11</sup> Wehukeníká táchutahurinka íre ahbabáratéhre. Írakaumo. Peh morá wehukeníné áwéhipté éhwéhká ahbabáratéhre úwe.

<sup>12</sup> Ite Sísa kéráhwána kegá weba séq wensabé, Arega iraréna ehwéhká Péhrasi ke siyehitehme aiq tagahno ewanana

<sup>13</sup> Sísaga itensabé, Íópeqté Nánibogá íre uqmaréh náneqme pagoruankéhe.

<sup>14</sup> Péhrasi kewé pehragarítáhro. Segá iwíáhéra, Ite siyahnkahrúna ke úne ewe. Írakaumo. Se peh aura pira ké míáhwe. Aura pira ánínká mó aurá pira ání ahnkahrínaraq mataipéq moraráq inahnsuboyeherawoye úwe.

<sup>15</sup> Úwana Pítaga Sísansabé, Mah pabéqmé éhwéh pahsuqme teio úwana

<sup>16</sup> wega sensabé, Wehukeníká táchutahurinka íre ahbabáratahane uge. Mi ehwéhnume ite moq íre íratíaho?

**17** Táhutahuqka wehukeníné iwíáhipeq íre túire. Peh ahmbiupipéq tunse tueagire. Minawé íre iraho?

**18** Wehukeníné áwéhipeqte éhwéhmé wene arupipeqté áhwárehre. Wene arupipeqté íwíáhgá ahbabáratanae.

**19** Wehukeníné arupipeqté ahbabáq iwiáh áhwárehre. Mó aní subiq suewé, mó aníné ahre weh abariéwé, aebówé, péhe éhwéhmé éhruruéwé,

**20** mahnawarinká wehukení ahbabáratéhre. Peh náwíqkakaq áyáhtáté nehnka wehukení íre ahbabáratéhre úwe.

*Nahnso inínká Sísansabé kawerue aiq pútare ato ehwéhne.*

(Máhka 7.24-30)

**21** Sísaga mitaq suena Táíya su wahpeqte kereq Sáírona su wahpeqte kereqne marakórapeq pokúwe.

**22** Mibeqté Kénáni marákórápéqté ínímé íre Asiu anínká Sísaba séna wensabé, Tébítine anahwao, anotah aní móne. Owainawanka nániyahu subiqmaq subiqmarinsabé arutaboirainto úwe.

**23** Arutaboirainto úwana Sísaga peh ehiya míowaq ite we kérähwána kegá Sísansabé, Mi inínká inehe séna áhnte ehwéhninsabé kaqsuo éq pagu pagunowane.

**24** Pagu pagunowanana Sísaga mahraréna, Manikánka peh morá Ísara kebá eqmaq núwátáire. Ísara kewé tabanagi sipísípíq tahnsa kee úwana

**25** mi inínká Sísaba séna áhtónsabe wene aigárápí arehunseraráq ména, Anotah aníno, séhréh ainto úwe.

**26** Séhréh ainto úwana Sísaga wensabé, Animáríné táhutahuq mewe iamárípá tuparuewé íre kaweq sansáne úwe.\*

**27** Úwana wega Sísansabé, Anotah aníno, arega irarénawe aiq pútaro. Iamárínká sibowáné tahbe tehnopeqte megi apípí mewe nahtaq sibowágá íre kaqsuéhre. Mina inserah séhréh ainto úwana

**28** Sísaga wensabé, Arega ínénasabe anotahtaq aiq pútare aintahna iní móne. Are awah-beh naneq mirainauge úwana mi tanáhráq wene ayahunkawa apubúue kaweragúwe.

*Sísaga áhnte awáhré ké kawerarito ehwéhne.*

**29** Sísaga mitaq suena Kehrari kawéhú ayehráq kure sáwéhrapeq kiená mitaq tútuue míowe.

**30** Tútuue míowara áhnte kegá aigárá soriqnah kereq aura pira kereq sawenkahnia áiyáyhákáq kereq íre ehwehnorahu kereq áhnte mó awahre kereq meriqmera Sísaba suwana wega moke mi awáhré ké kaweraritowe.

**31** Ehweh íre irarerahu kegá ehweh iraruwara sawenkahnia áiyáyhákáq kégá awaho ke úkuwara soriqnah kega ah nogúwara aura pira kégá siura ebiúwara tago kegá áhtenuwe. Áhtenéra ite Ísara kené Manikánsabe iwíáh iwíáh atówe.

*Sísaga 4 táhúséni (4,000) weh kiraboú ehwéhne.*

(Máhka 8.1-10)

**32** Sísaga ite we kérähwána ke íáhrabéna itensabé, Mahtaq míáh kégá ínéba apahtáró wéhékáh méra amahnága se táhutahuq íre kékhsábé sensabé nirutaboiruge. Íre kirabo aritasa pehipi eqmaq súáhnaraq ahtapeq siunúnkaq surahiye. Pehipi íre eqmaq suaníe úwe.

**33** Úwaq ite we kérähwána kegá wensabé, Mahtaq peh abatapinirara míáh ké peh íregáritaq míáhwe. Se avehraq tahutáhúq nagehboq árahue áhnte tahutáhúq meyahráhuno ewane.

\* **15:26:** Sísaga mi inínsabé íre ehweh atena peh pabeqme ehwéh teawuwe. Nahnso kewé mi iámári tahnsanowara Asiu kewé mi anímári tahnsa móe. Minayabe wene ehwehme áwahewé mahraréna, Nahnso ke séhréh aitanieéna Asiu ke suotaq tahirímé íre kaweru irino úwe. We tagaríómé mi inínká wensabé aiq pútare atowana we séhréh atowe.

<sup>34</sup> Ewanana Sísaga itensabé, Árahue parétí kehro úwaq itega wensabé, Abapete téhtaré párétíákáq táhmaro pehgáriq pahnkákáq kékhe ewane.

<sup>35</sup> Sísaga weba sáhurió keyabé, Marakóraq tútuoro éna

<sup>36</sup> mi abápété téhtaré párétíákáq pahnkákáq mewena Manikánsabe, Kaweróne atena ite we kérähwána ke keqme iuwaq itega moke mó ke náriewáne.

<sup>37</sup> Náriewánara ómiga nowana siyahbankirowe. Siyahbankirowara arahqmé abapete téhtaré páhsíkétí úsawe obenkíq márówé.

<sup>38</sup> Mi tahutáhúq no wehwé 4 táchuséni (4,000) weh wóe. Ani ahreve peh áhnte mío púara íre sáhnsáhúwe,

<sup>39</sup> Siyahbankirowana Sísaga mi ke eqmaq suena sípiipéq kiasague Mágára marákórápéq pokúwe.

## 16

*Sísansabé, Ótaq sansánúno u ehwéhne.*

*(Máhka 8.11-13; Árúka 12.54-56)*

<sup>1</sup> Péhrasi kereq Sáyúsi kereqka Sísaba séra wega ahhbabárinkeheéra wensabé, Manikánka are séhréh atahna taganehboq íopeqté ótaq sansánúno uwe. Ótaq sansánúno éra áhwárawe tagowe.

<sup>2</sup> [Áhwárawe tagowana wega sensabé, Ío tupekitaq penehriraq tagéq íre ibonsinawire ewe.

<sup>3</sup> Ahbiahipeq ibo muqmuriraq tagéq iboramé ibonsinawire ewe. Íopeq tagéq ibone sásá ahtebahwe. Mina aiq ahtebéq peh ínéga amahnága mirau arámbéhrí tagéq íre ahtebahwe.]

<sup>4</sup> Amahnága oga míah kégá Manikánsabe íre iuwahbehraq ahhbabáq ke míahwe. Ótaq sansá sokigi aio ewo? Írakaumo. Sóna sóreq wanípípéq míotaq Manikánka ótaq sansá miraúwe.\* Peh morá mi sansá iahreraq itahnaq iwiáhue tagagehe. Mó otáq sásá íre sokigi ainie éna se suena pokúwe.

*Páréti muoráhi naneqsabé pabeqme ehwéhne.*

*(Máhka 8.14-21)*

<sup>5</sup> Ite Sísa kérähwána kegá káwehu seberaebéq pokowanaraq páréti ibitagúwaq íre meyawháne.

<sup>6</sup> Sísaga itensabé, Tagaríahro. Péhrasi kereq Sáyúsi kereqne páréti muoráhi naneq pehragahro úwe.

<sup>7</sup> Úwaq itega iteite náhenéq, Itega páréti ibitaginsabé mi ehwéh teíre ewane.

<sup>8</sup> Ewanana Sísaga itene ehweh ahtebéna itensabé, Ite páréti íre kék éhwéhmé aneqsabé sío síoo? Itega ínénabe pehgáritaq aiq pútare aintáhwe.

<sup>9</sup> Amahnága teiú éhwéh íre iraho? Ínéga 5 táchuséni (5,000) weh moberíah párétí keqme kirabourautaq arahqmé áhnte matome íre iahreraq kehro?

<sup>10</sup> Abapete téhtaré páréti keqme 4 táchuséni (4,000) weh kirabourautaq arahq áhnte matome íre iahreraq kehro?

<sup>11</sup> Íné íre párétiyabé iraruge. Minayabe árahinsabé íre iahtebaho? Péhrasi kereq Sáyúsi kereqne páréti muoráhi naneq pehragahro úwe.

<sup>12</sup> Úwaq ite we kérähwána kegá iwiáhquéq, Íre páréti muoráhi naneqsabé peh Péhrasi kereq Sáyúsi kereqka síwáhnoro ehwéhnsábé irarire éq iahtebahwane.

*Pítaga Sísansabé, Are Manikáne ahninkáwá wóne ú ehwéhne.*

*(Máhka 8.27-30; Árúka 9.18-21)*

\* <sup>16:4:</sup> Wehukení wenáwíq Sónansabé éhwéhmé púku anehepeqte séhíramé Manikáne Púkuipéq Kék Áwahe Éhwéhne ue kérabéq tagáhno.

**13** Sísaga Sésária Píripái suwahpeq wahtotaq kútaq ite we kérähwána keyábé kasenéna, Mó kegá íné wehukení úku anínsábé inse aintaho úwe.

**14** Inse aintaho úwaq, Arensabé mó kegá, Sóni wání meri merini aní míre ewe. Mó kegá, Are Éráisa wire ewara mó kegá, Are Manikáne ehweh irarú ani wenawíq Sérémáia wire ewe. Mó kegá, Are peh Manikáne ehweh irari aní míre ewe ewane.

**15** Ewanana Sísaga itensabé, Itega ínénabe inse aintaho úwana

**16** Sáimóni Pítaga wensabé, Manikánka ite meirena kaweraitankeheéna omaq ato aní móne, Maniká mía míai anínirah are wenahni móne úwe.

**17** Úwana Sísaga Pítansabé, Sónine ahninkáwá Sáimónio, arega irarénayabé iwíáh iwíáhúno. Arega irarénawe peh wehukega íre iwíáh atáhwah iraréne. Peh morá íopeqté Nánibogá iwíáh atéhre.

**18** Teiníboq írátíáhro. Arenawíq Pítæ.† Wehukega ebahtaq pearáh náh íre míu míuia peh págegeue kagainserah íné tagariáh kewé séhréh aitahnaq págegeue mía míagehe. Íné tagariáh kégá pukirataq iraipéq íre pokigehe.

**19** Íopeq Manikánka wahnah wahnahnirabeqte ónsáráté kí áwúge. Arega mah marákóípéq ahqáho atehna naneq Manikánka mi naneqsabé moq íopeq ahqáho atanae. Arega mah marákóípéq kowe atehna naneq Manikánka mi naneqsabé moq íopeq kowe atanae.

**20** Kowe atanae éna ite we kérähwána keyábé, Ínéwé Manikánka omaq ato aní míre mó ke teriyeho úwe

*Sísaga, Íné pukéna oga úkinauge ú ehwehne.*

*(Máhka 8.31-9.1; Árúka 9.22-27)*

**21** Mi tanáhráq Sísaga ite we kérähwána keyábé Sarúsarama suwahpeq pukinaú ehweh pahsuwe. Wega itensabé, Sarúsarama suwahpeq pokinauge. Mitaq mibeqté Asiu kené aboawah wehreq Manikáne ehweh mibeq mahbeq arítáh kerek Mósísine ehweh síwáhnoro kerekka níwíognéra nubiq suaneherawoe. Nubiq suehrana íné pukéna apahtáró wéhékáhtáq iriwe oga úkinauge úwe.

**22** Úwana Pítaga Sísa meqmena móbeq móatena wensabé ehweh atena, Néne Wahnahno, arega iraréna ehwéhmé aíq pútaragínehboq Manikánsabe ahqáho ato inauge úwe.

**23** Úwana Sísaga pabeqme Pítansabé, Owainawano, móbeq míahno atena, Arega iraréna ehwéhmé Manikánka íre iwíáh atéhre. Minawé peh wehukeníne iwíáh púa íné pokona ah parosuéhneho úwe.

**24** Sísaga ite we kérähwána keyábé mahraréna, Íné sénireyabe awahbeh aníno, arerene awahbeh iwíáh suo. Manikáne arambehri mira aruqarurunsabé sega íné awankátaq táhparagéhe. Ínéga miraunserah miraue séniro.

**25** Wewensabé arutaboiréna peh wewene awahbeh iwíáh mira aruqaruri anímé oga mérapeq íre awaq miahráhire. Néne sásá sehginieéna wewe awahbeh iwíáh susuri anímé oga mérapeq awaq miankéhe.

**26** Wehukenínká moke mah marákóípéqté ménsáméhnsá matiéhtáq tahirímé oga mérapeq íre awaq miahnaraqmé mi mensáméhnsánká árahue séhréh atéh iripo? Oga mérapeq awaq meyabe aneqtaté paiqmarankéhbo? Ahqáho. Íre paiqmarahráhire.

**27** Nánibone patahga tahnsa téreh naneqkakáq íné wehukení úku anínseq íopeqté kerekka túónagake moke mah kehiná kékínáné arambehri iwíáhue tagéna sainsuanauge.

**28** Teiníboq írátíáhro. Táhmaro iriwe míona ke pehipi íre pukigehe. Ebeqme íné wehukení úku aní Wahnah aní míahnaq tagéq anehe pukigehe úwe.

† **16:18:** Káríki kené ehweh Pítæ úmé ebahne.

## 17

*Sísane auranabiah mó kugú agú ehwehne.*

(Máhka 9.2-13; Árúka 9.28-36)

<sup>1</sup> Sísaga síwáhnorúwana abapete morá wéhékáh parabagúwana wega Sémísireq Sónireq mi abárahré mó aní Pítarerue meriqmena anotah sawéhrápéq kiuwe.

<sup>2</sup> Kiuwara sega tagotaq Sísane auranabiah mó kugú kaweq kugú agúwe. Wene auranabiah patahga tahnsa agúwana wene korósi anotah tabérábé téhreh tahnsá úkúwe.

<sup>3</sup> Téhreh tahnsá úkúwara Mósísireq Éráísareqka íópeqté tunse ábóraragéra Sísareq ehwehnuwe.

<sup>4</sup> Ehwehnuwana Pítaga Sísansabé, Itene Wahnahno, ite mahtaq míonayabé aiq kawerire. Are awahbáhnaraqmé ínéga apahtáró úqná pearaníe. Arene morá Mósísine morá Éráíane moráue pearaníe úwe.

<sup>5</sup> Pearaníe útaq anotah tabérábé írabúyánká seubítíowana mipéqté éhwéhnká mahraréna,

Mah anímé niruní nénáhní míre. Íné wensabé anotah nuwahbehre. Wene ehweh íráhro úwe.

<sup>6</sup> Úwara Sísa kéró anítogá anotah ahrééra sirenunseraráq méra siuranabiah marakóiperatiówana

<sup>7</sup> Sísaga seba séna se táhtotawéna sensabé, Íre áhreoro. Irigoro úwara

<sup>8</sup> sega awahnkanéra mó ke íre tagéra peh morá Sísa webataq tagowe.

<sup>9</sup> Sáwéhrapeqté tuegutaq Sísaga sensabé, Iteiyuwanka tageh naneq amahnága mó ke teriyeho. Íné wehukení úku aní pukéna iriwe oga úkonaraq terigéhe úwe.

<sup>10</sup> Úwara we kéró anítogá Sísansabé kasenéra, Mósísine ehweh síwáhnoro kegá, Éráísa ebeq sínaraq anehe Manikánka omaq ato aní anehe sinæ eme aneqsabé irareo uwe.

<sup>11</sup> Uwana Sísaga sensabé, Éráísa moke náneq kaweratanieéna suraire.

<sup>12</sup> Ínéga teiníboq írátiáhro. Éráíawe aiq suraire. Wega suraitaq we tagaro kegá, We Éráísa wire íre iwíáhia peh seye suwahbarai sansánuwe. Seye suwahbarai sansánéra we íre kaweratárówe. Segá we áwíoqnarónserah íné wehukení úku aní moq níwíoqnagehe

<sup>13</sup> úwara we kéró anítogá ahtebéra, Sísaga irarime Sóni wání meri merini anínsábé irarire uwe.

*Sísaga owainawa kaqauwena animai kawerato ehwehne.*

(Máhka 9.14-29; Árúka 9.37-42)

<sup>14</sup> Segá áhnte ke míópi tueguwana mó anínká Sísaba séna we áhtónsabe arehunseraráq ména wensabé,

<sup>15</sup> Anotah aníno, nénahninsábé arutaboirate séhréh ato. We uwoyansanéna iraipéq tabiqme tabiqmeéna anotah erirana wánípipeq aguaguire.

<sup>16</sup> Meqmena are kéráh kébá móátóge. Móátógarawe sega íre kaweratahráhowe úwe.

<sup>17</sup> Íre kaweratahráhowe úwana Sísaga míó keyabé, Ite íre aiq pútare ainteq saiyo ke wóe. Iteba mía míaume ahkake awehraq kanabo? Itega miraonsabé nirupipeq umehime ahkake parabaginabo? Ahkake parabaginabo éna abowansabé, Arenahni ínéba meqme súno úwana meqmena súwana

<sup>18</sup> Sísaga owainawansabé, We auwe pokúno atowana auwena pokútaq mi aní kaweragúwe.

<sup>19</sup> Ite we kéráhwána kegá itebataq Sísaba séq wensabé, Itewe árahinsabé owainawa íre kaqsuahráhuno kasenowane.

<sup>20</sup> Kasenowanana itensabé, Itega pehgáritaq aiq pútare aintah púaq íre kaqsuahráhowe. Teiníboq írátiáhro. Manikánka séhréh aitahnaga miraorahúne íwíáhirataq wega séhréh aitéhnká miraorahowe. Téhwe mi iwíáh pehgáriq awánká ayu tahnsá kahnaraq itega

sáwéhyabe, Móberagúno atéhrataq mirainawire. Mira íwíáhirataq áhnte pagégé sánsá miraorahowe.

<sup>21</sup> [Ínéga kaqauwó ówáínawá wehukega pehipi íre kaqsuahráhowe. Táhutahuq awehriéq púrerareq mina tahnsa owáínawámári kaqsuahráhowe úwe.]

*Sísaga, Íné pukéna oga úkinauge mónekakáq irarú ehwehne.*

(Máhka 9.30-32; Árúka 9.43-45)

<sup>22</sup> Sísareq ite we kéráhwána kerekka Kehrari marákórápéq nowánaraq wega itensabé, Sega íné wehukení úku aní móintehrara nubiq suaneherawoe.

<sup>23</sup> Nubiq suehrana íné pukéna apahtáró wéhékáhtáq iriwe oga úkinauge úwaq ite we kéráhwána kené irupipeq umehagúwe.

*Sísaga, Táhkísi moné awo ú ehwehne.*

<sup>24</sup> Sísareq itereqka kure Kápénéáma su wahapeq kowanaraq Asiu kené momiwí nahtápéqté wáhnáhnká Pítaba séna wensabé, Ite íwáhnori anínká momiwí nahtápéq táhkísi moné awinkéhbo úwana

<sup>25</sup> kowe úwe. Kowe éna nahupeq kibekúwana Sísaga wensabé ebeq kasenéna, Sáímónio, mah marákóípéqté wáhnáh kégá inseréhne táhkísi moné meyaho? Sensuwahrahne móne meyaho? Mó kahnáhné móne meyaho? Inseréhne meyáhwe íwíáhono úwana

<sup>26</sup> Pítaga wensabé, Mó kahnáhné móne meyáhwe úwana Sísaga wensabé, Minayabe ite Maniká kahnah míoya puata wene momiwí nahtápéq kawerinkeheéta táhkísi moné íre náwéyataq tahirí aiq kaweri irino.

<sup>27</sup> Segá itensabé abiahnsa aitéhboq pehipi aveyéhe. Mi tahkísí móne meyankéhboq arega wání káwehutapeq pokue úku wánípipeq tuparuqme tagehnana téh pariahna pahné áwéhipeq tagé mipéq ebah moné tagankehe. Minawé arereq ínéreqne táhkísi moné awehraq kanae. Mina mewe táhkísi moné meyéh aní móawo úwe.

## 18

*Manikánka wahnah wahnahnirabeqte anotah anímé insebo i ehwéhne.*

(Máhka 9.33-37; Árúka 9.46-48)

<sup>1</sup> Mi tanáhráq ite we kéráhwána kegá Sísaba séq wensabé, Íopeq Manikánka wahnah wahnahnirabeq kiotaiki anímé insebo ewane.

<sup>2</sup> Ewanana Sísaga káriq aní áhrabéna ite ákáhpi atena

<sup>3</sup> itensabé, Teiníboq írátiáhro. Itene píribahri sansá sueq káriq aní tahnsa úkirataq Manikánka wahnah wahnahnirabeq kioráhowe.

<sup>4</sup> Wewensabé íre iwíáhi aní peh mah káriq aní tahnsa ména íopeq Manikánka wahnah wahnahnirabeq mó ke kiotaikire.

<sup>5</sup> Ínénsabe arutaboiraintena mahna tahnsa káriq aní séhréh atéh áninká íné moq séhréh aintéhre.

*Ahbabáq sansanká aiq pútare atona sansá saiqnaruahráhi ehwéhne.*

(Máhka 9.42-48; Árúka 17.1-2)

<sup>6</sup> Sísaga mó mahraréna, Wehukeníká ínénsabe aiq pútare aintéh aní ahbabáq sansa áugi ínaraqmé anotahtaq íre kawerire. Áugii anínká káriq aní áugi ínaraqmé wene anuopi anotah ebáh táhruue púrúrúia káwéhúpípéq tuparuahnana wánípipeq tupekitaq tahirímé aiq kaweri irino úwe.

<sup>7</sup> Síúgio kewé anotah ahbabárowe. Mah marákó márákóípéq ahbabárorahi sansá peh kagaire. Áugi anímé ahbabáq áhwáreh puana Manikánka anotahtaq kamah awinawire.

<sup>8</sup> Arene aiayahnka are ahbabáratana ínaraq mina kiraqsuo. Íre aiayahnkakaq oga mérapeq pokinaraq aiq kawerinæ. Moke aiayahnkakaq ahriahri teh iráípéq kaqauwáhnaraqmé anotah íre kawerinawire.

<sup>9</sup> Arene auranka are ahbabáratana ínaraq mina pируqme suo. Peh morá áúránkákáq oga mérapeq pokinaraq aiq kawerinae. Téhtaré áúránkákáq ahriahri teh iráipéq kaqauwáhnaraqmé anotah íre kawerinawire úwe.

<sup>10-11</sup> Sísaga mó mahraréna, Káriq anímárínsábé abehq náneq mire íwíáhiyehboq kawerurero. Teiníboq írátíáhro. Se wahnahno íópeqté kégá íópeq Nánibo míéhrabeq ahriahri mía míaowe. [Íné wehukení úku anínká tabanago ke kaweraritanieéna suge úwe.]

### *Sipisípiq tabanaginsabé pabeqme ehwéhne.*

(Árúka 15.3-7)

<sup>12</sup> Sísaga mó mahraréna, Sipisípiq wahnahni anínká áhnte sipísípíq 100 sipísípíq matiéhtáq peh morá ká tabanagínaraq wega anerinkehbo? Aneq iwíáhoo? Wega íre tabanago kamári 99 sipísípíqmári uwaruntú sahtaqme nahrabeq sitena tabanagi ka kogabarinkehe.

<sup>13</sup> Mi ka ábóraq marahnaraq iwíáh íwíáhinawire. Íre tabanagi kamárínsábé ákáhtaq iwíáh íwíáhéna ábóraq maréh kánsábé anotahtaq iwíáh íwíáhinawire.

<sup>14</sup> Sipisípiq wahnáhnká wene tabanagi kansábé arutaboirinserah íópeqté Ítéribógá wene animári tabanague iraipéq pokiyeho éna arutaboirire úwe.

### *Are ahbabáratéh ání kawerate sansa ehwéhne.*

<sup>15</sup> Sísaga mó mahraréna, Íné tagariéh ánínká are ahbabáratahnaraq mó ke íre míéhrataq wene ahbabáqsabe koreawo. Wega arene ehweh irahnah aiq insahwé atankéhe.

<sup>16</sup> Arene ehweh íre irahnaraqmé peh morá ánípópoq téhranítébópoq meriqme weba kúno. Itene ehweh irankéhboq se meriqme kúno.

<sup>17</sup> Wega arereq sereqne ehweh íre irahnaraqmé momiwíorabeq Maniká tagariáh ké kororio. Wega moke sene ehweh íre irahnaraqmé we auwe nahnsa aní, ahbabáq ani tahnsa peh áwé tagahro úwe.

<sup>18</sup> Sísaga mó mahraréna, Teiníboq írátíáhro. Itega mah marákóípéq ahqáho atéhra naneq íópeq Manikánka mi naneq moq ahqáho atanae. Itega mah marákóípéq kowe atéhra naneq íópeq Manikánka mi naneq kowe atanae.

<sup>19</sup> Mó teiníboq írátíáhro. Ite téhranítégá mah marákóípéq mó naneqsabé moráénue púrerirataq íópeq Maniká Iteriboga irena mirainawire.

<sup>20</sup> Ite téhranítégábópoq apahránítogábópoq ínésabe iwíáhoneheéq momiwírataq íné itereq míanauge úwe.

### *Mó kené ahbabáq íre ahreraq matiahno ú ehwehne.*

<sup>21</sup> Pítaga Sísaba séna wensabé, Néne Wahnahno, are tagariéh ánínká íné mótaq mótarue ahbabáraintahnaraq árahue tanáhráq wene ahbabáq íre niahreraq matianinkono? Abapete téhtaréráq wene ahbabáq íre niahreraq matianinkono úwana,

<sup>22</sup> Ahqáho. Abapete téhtaréráq íre awehraq kékhe. Arega íre sáhnsahoráhóna tanáhráq wene ahbabáqsabe iwíáhineho. Wene ahbabáqmari íre ahreraq matiahno úwe.

<sup>23</sup> Wene ahbabáqmari íre ahreraq matiahno éna, Teiníboq írátíáhro. Manikánka wahnah wahnahnirabeqte sánsámé mah marákóípéqté wáhnáhnká wene arambehrio ke mirau-rainserah sansáne.

<sup>24</sup> Mi wahnáhnká wene arambehrio kené sítáriarai moné kaweraritankehéna síáhraburaire. Anotah moné 10,000,000 Kína tahnsá átáriarai aní weba móátaráirana

<sup>25</sup> mi aníné átáriarai moné áhnte taqnobaguraire. Minayabe wene wahnahnka átáriarai moné meanieéna mahraréna, Moke we matiéh ménsáméhnsá paiqmareq mi moné náníéro. Mi anínseq wene ahrereq wene animárínseq paiqmareq mi moné náníéro urairana

<sup>26</sup> mi anínká weba séna áhreéna arehunseraráq ména, Ínésabe arutaboirainte pe-hwehrue ainto. Arega íntáriahna moné moke awinauge urairana

<sup>27</sup> wene wahnahnka arutaboiratena mahraréna, Mi monéyábé anetaníbo éna, Pehipi soraq súáhro uraire.

<sup>28</sup> Urairana mi anínká pokue áwáhu arámbéhrí ání wene móne táhmaro Kiná 10 Kína tahnsá átáriarai aní tagéna wene anuopi táhtotawéna wensabé, Ínéga átáriarau moné nánio uraire.

<sup>29</sup> Nánio urairana wega arehunseraráq ména, Ínénabe arutaboirainte pehwehrue ainto. Arega íntáriahna moné mókake awinauge urairana

<sup>30</sup> mi ehwéh íre irasa karábúsiipéq móátáráire. Móatena, Moke nánínagake pugeq auwaníe uraire.

<sup>31</sup> Urairara mó arámbéhrí kégá mina tagéra sirupipeq págege agurairara sega sene wahnah moke koreawátówe.

<sup>32</sup> Koreawátowana sene wahnahnka wene arambehri anínsábé áhraburairana surairana wensabé, Arewe íre kaweq arámbéhrí ání móne. Arega ínénabe arutaboirainto énana néne móneyabé anetaníbo éna íre ahreraq matióge.

<sup>33</sup> Ínéga arensabé nirutaboiratónserah arewé árahinsabé áwáhu arámbéhrí ánínsábé íre arutaboiratahno éna anotah abiáhnsánuraire.

<sup>34</sup> Abiahnsanéna mi aní meqmena karábúsiipéq móátáráire. Néne móne moke nánínagake pugeq auwaníe uraire úwe.

<sup>35</sup> Sísaga mah pabéqmé éhwéh parabaruena anehe Pítarehyabe, Íné tagaríeh áninká ite ahbabáraitahnaraq itene irupipeq wene ahbabáq íre ahreraq matíahro. Ahreraq matiéhrataq teawú wáhnáhnká miraurainserah íopeqté Nánibogá mina tahnsaninkehe úwe.

## 19

*Sísaga wehga wene ahre kaqsueyabe irarú ehwehne.*

(Máhka 10.1-12; Árúka 16.18)

<sup>1</sup> Sísaga mi ehwéh parabaruena Kehrari marákórápéq suena Sorana aroipéq seber-aebéq Súria marákórápéq pokúwe.

<sup>2</sup> Pokúwara áhnte kegá we kérówara mitaqté áwáhré ké kaweraritowe.

<sup>3</sup> Péhrasi kegá Sísaba séra wega ahbabáq ehweh irarinkeheéra áhwárawe tagéra kasenéra, Weh wewega iwíáhue wene ahre suewé mirao naneq sansápo uwe.

<sup>4</sup> Uwana Sísaga sensabé, Manikáne ehwehnka mahraréna, Manikánka mah marákó mårákó mirarotaq wega wehakaq ahreakáq mirarowe ire.

<sup>5</sup> Wene ehwehnka mó mahraréna,

Minayabe o menáhwénká wenanoibone nahtapeq suena wene ahrereq moráráq mía míagehe. Peh morá áníné áú tahnza úkigehe ire. (Stat 1.27, 2.24; Malakai 2.15)

<sup>6</sup> Itega mi sehirámé íre sáhnsahwe tagaroo? Se peh morá ání tahnza úkóyansabé se íre mó aní mó aní tahnza méra peh morá ání tahnza míagehe. Manikánka, Wehakaq ahreakáq moráráq mía míaoたo aritonsabe wehga wene ahre súéhneho úwe.

<sup>7</sup> Wene ahre súéhneho úwara Péhrasi kegá wensabé, Mósísine ehwehnka mahraréna, Wehga wene ahre kaqsuanie ínaraqmé pépahqtaq sehiranue móawena kaqsuankéhe ire.

(Lo 24.1-4)

Mósísiga mah ehwéh aneqsabé irarúwo uwe.

<sup>8</sup> Uwana Sísaga sensabé, Itereq itene igaqnaréhreq saiyo ke míona puana Mósísiga mah ehwéh irarúwe. Manikánka téh wehuke mirarotaq mira íwíáh íre úwe.

<sup>9</sup> Teiníboq írátiáhro. Wene ahre íre ahbabáq ini míahnaraq awehkawagá pehipi kaqsuena mó ahré meyéhmé wega aiq ahbabárire úwe.

<sup>10</sup> Ite we kéráhwána kegá Sísansabé, Wehreq wene ahrereqsabé teienawe mahbiga ahre íre mera ahriahri peh míahnaraq aiq kawerire ewane.

**11** Ewanana Sísaga itensabé, Itega irare ehwéh moke mahbigaunká íre sehgoráhowe. Peh morá Manikánka omaq sitahna kegá sehgoráhowe.

**12** Mó mahbígáúnká ahre meyahráhowara mó mahbígáúnká ahre íre meyahráhowe. Móme sinowaréhga maqmíótaq sene sinonka íre kaweraguraire. Minayabe mi mahbígáúnká ahre íre meyahráhowe. Móme wehukega síwáhnta pirúáhwara ahre íre meyahráhowe. Mó mahbígáúnká iwíáhéra, Manikánka wahnah wahnahnirabeqte árámbéhrí kawerue sehgiunayabé amahnága ahre íre meyaneheqmúne ewe. Mah ehwéh sehgoráhi anínká irankéhe úwe.

*Sísaga, Káriq anímárínká ínéba sewíagehboq ahqáho arítého ú ehwehne.*

*(Máhka 10.13-16; Árúka 18.15-17)*

**13** Wene ayahnkaratáté táhtoqme púreraritankeheéra mó kegá káriq anímári meriqmera Sísaba mórítówe. Mórítowaq ite we kéráhwána kegá mórító keyabé suwehgu ariteq ahqáho aritahwánana

**14** mi káriq ánímári ínéba sewíagehboq ahqáho arítého. Káriq anímárínká ínénabe aiq pútare aintáh serahno kegá Manikánka wahnah wahnahnirabeq awaq miagéhe úwe.

**15** Awaq miagéhe éna Sísaga wene ayahnkaratáté mi káriq ánímári táhtotawéna mitaq suena pokúwe.

*Áhnte mensáméhnsánkákáq ánínsábé árahue oga mérapeq awaq mianabo i ehwéhne.*

*(Máhka 10.17-31; Árúka 18.18-30)*

**16** Peh morá wéhgá Sísaba séna wensabé, Íwáhnoraníno, oga mérapeq awaq mianíboq aneq kawéq árámbéhrí ininkono kasenúwe.

**17** Kasenúwana Sísaga wensabé, Aneqsabé ínénabe kaweç sansánsábé kasenono? Peh morá anínká webataq kaweçtaq mía míaire. Oga mía míainkehboq Manikánka sehgióro ú ehweh sehgio úwe.

**18** Úwana wega Sísansabé, Aneq sehgióro ú ehweh sehginíkono úwana Sísaga wensabé, Mó aní subiq súéhneho. Mó aníné ahre abariineho. Mó anínsábé péhe éhwéh atéhneho.

**19** Iteinoibone ehweh ireq se séhréh arítáhro. Arerensabé arutaboirónanserah arene iyahnabo anínsábé moq arutaboirúno úwe. *(Kisim Bek 20.12-16)*

**20** Úwana mi anínká Sísansabé, Moke mi ehwéh kawerue sehgiúge. Móme aneq arámbéhrí ininkono úwana

**21** Sísaga wensabé, Are kaweçtaq míankehboq pokue moke matiahna mensáméhnsá paiqmaqme móne mewe tabonah ke nário. Mirainaraqmé íópeq kaweç naneqmarí matiankehe. Tabonah ke moke nárie íné séniro úwana

**22** mi anínká irena áhnte mensáméhnsá ko púana wene arupipeq umeh agúwana pokúwe.

**23** Sísaga ite we kéráhwána keyábé mahraréna, Áhnte mensáméhnsá matíah kégá íópeq Manikánka wahnah wahnahnirabeq kieyabe anotah pagégéue mirao naneq mire.

**24** Teiníboq írátíáhro. Kéhma anotah kane. Mi kanká wai abahrabahpipéq kéagínayabé págegeue mirai naneq mire. Mina inserah áhnte mensáméhnsá matíeh ánínká íópeq Manikánka wahnah wahnahnirabeq kinayabé anotah pagégéue mirai naneq mire úwe.

**25** Úwaq itega mi ehwéhnsábé anotah ahténéq Sísansabé, Minayabe insega oga mérapeq awaq miahráhiro ue kasenowane.

**26** Kasenowanana Sísaga ite ebitáwéna itensabé, Wehukega íre miraorahowe. Peh morá Manikánka moke miraorahire úwe.

**27** Úwana Pítaga wensabé, Itega moke mationa naneq sueq are kérone. Minayabe itega aneq awaq mianéhnikono úwana

**28** Sísaga itensabé, Teiníboq írátíáhro. Mókake moke kék náneq o naneq úkínaraq íné wehukení úku anínká págegeue anotah wahnáhnonarabeq tútuue ména wahnahninie.

Mi tanáhráq itega wahnahnirarabeq tútuue még airápété téhtaré Ísara ke káhnáhnsábé ehweh ariteq sainsuagéhe.

**29** Ínénabe sirutaboiréra néne arambehri miraoneheéra sene nahme sene marakówé súáhmé amahnága áhnte mó nahmé marakówé awaq miagéhe. Mókake oga mérapeqkákáq awaq miagéhe. Néne arambehri miraoneheéra sinahnowarehwé siwahwarehwé sensibáqmarimé sensinoibowe sene animárímé súáhmé amahnága áhnte mó kegá sensuwahrah úkigehe. Mókake oga mérapeq moq awaq miagéhe.

**30** Amahnága áhnte ebeq se kegá mi tanáhráq sinehe kigehe. Sinehe se kegá ebeq kigehe úwe.

## 20

### *Arambehrio ke monseráh ápéq náriu pabéqmé éhwéhne.*

**1** Sísaga mó mahraréna, So wahnahnurai aní éhwéh teiníe. Wega wahnahnurainserah Manikánka íópeq wahnah wahnahnire. So wahnahnurai anínká wene sotáq arambehri ke ahbiahipeq kogabaréna

**2** ábóraq marena sensabé, Néne sotápéq koarambehriirataq penahnaraq morá Kíná morá Kíná tahnsanue\* náinie urairara kowe urowana wene sotápéq eqmaq súátáire.

**3** Pópoqnah ákáhtaq kiraitaq paiqnanátapeq kurairara táhmaro mó kegá mitaq peh míarowe.

**4** Peh míarowana wega sensabé, Néne sotápéq koarambehriirataq penahnaraq awehraq apéq náinie urairara

**5** kowe éra koarambehriurowe.

**6** Wéhékáhnabubunkakáq tunsoreráitaqkákáq wega mó ke ábóraq marena wene sotápéq eqmaq súátáire.

**7** Ío tupekinauraitaq wega paiqnanátapeq kouwekurairara táhmaro ke mitaq peh míarowe. Peh míarowana wega sensabé, Aneqsabé moke wéhékáh peh míaho urairara, Mó anínká arambehri íre ínsábé peh míone urowana, Aiq míre. Néne sotápéq koarambehrioro arítaráire úwe.

**8** Koarambehrioro aritená petairabeq so aboga sotáq arambehrio kené wahnah anínsábé áhrabéna wensabé, Moke arambehrio ke síáhrabue ápeq nário. Arambehrirapéq sinehe se ke ebeq nárie ebeq se ke anehe nário uraire.

**9** Sinehe suro ke morá Kíná morá Kínáue síátáire.

**10** Síátáirara ebeq suro kegá iwíáhéra, Wega métáq se ke morá Kíná morá Kínáue sínsábé ite anotah apéq meyaneheqmúne íwíáhurowe. Anotah apéq meyaneheqmúne íwíáhurowana se moq morá Kíná morá Kínáue síátáirara mewera

**11** so abonsabé abiahnsa atárówe.

**12** Abiahnsa atera wensabé, Amahnága se kewé pehgáriq arámbéhríowe. Itewe moke wéhékáh arambehriúnana anotah patáhgá kamah aíre. Minayabe aneqsabé monseráh monseráhnué ápeq náiro urowe.

**13** Úrowana so aboga sene ehweh irena peh morá ánínsábé, Néne iyahnabo aníno, arensabé íre ahbabáratóge. Ahbiahipeq, Néne sotápéq arambehri éwahnaraq morá Kíná awinie ugah kowe aintahna wino.

**14** Minayabe arene móne mewe pokúno. Are áwúnserahnue ineha se ke moq náríúge.

**15** Nénéne móne nárie sansá néne arambehri wire. Anehepeqte ké áhnte náriúnsábé ínénabe abiahnsa aintahna mino uraire úwe.

**16** Sísaga mó mahraréna, Pabeqme ehwéh teiúnserah sinehe se kegá ebeq kirarawe ebeq se kegá sinehe kigehe úwe.

---

\* **20:2:** Asiu kené móne áwíq íre Kínae. Írakaumo. Sene móne mó awíq kowe.

*Náhmbáh 3 tanáhráq Sísaga, Íné pukéna oga úkinauge ú ehwehne.*  
*(Máhka 10.32-34; Árúka 18.31-33)*

<sup>17</sup> Sísaga Sarúsarama suwahpeqte áhtápéq kútaq ite we airápété téhtaré kérähwána ke itebataqsabé mahraréna,

<sup>18</sup> Teiníboq írátiáhro. Ite pokue Sarúsarama suwahpeq míáhnaraq peh morá áninká íné wehukení úku aní Maníkáne ehweh mibeq mahbeq arítah kéreq Mósínsine ehweh síwáhnoro kereqpa mónuankéhe. Mónuahnara sega íné, Subiq súáhro aritehrara

<sup>19</sup> nubiq suageheéra nahnsó kebá mónuagéhe. Nahnsó kegá niwiréh aintera sehikarankákáq áréti sahtáté nubiqmarera awankátaq táhparagéhe. Awankátaq táhparéhrataqmé íné pukonana apahtáró wéhékáhtáq iriwe organúq intankéhe úwe.

*Sémísireq Sónireqka anotah aníté úkéyabe suwahbó ehwehne.*  
*(Máhka 10.35-45)*

<sup>20</sup> Sébérine ahrega sene ahninkáwárará meriqmena Sísaba séna arehunseraráq ména wensabé, Ínéga teawéna ewhéh miraúno úwe.

<sup>21</sup> Úwana Sísaga wensabé, Aneq ewhéh kehro úwana wega wensabé, Arege wahnah wahnahnarabeq míéhnaraq nénahnité mó anímé arene ayah púpeq mó anímé arene ayahnaperue tútuue míagehe arito úwe.

<sup>22</sup> Úwana Sísaga mi abáráhréyábé, Itega mah ewhéhmé íre iwíáhóye. Íre iwíáhóye éna pabeqme ewhéh mahraréna, Ínéga no kahpúípéqté náneq itega moq nahrahoyo úwara sega, Aiq nahahúye uye.

<sup>23</sup> Uyana Sísaga sensabé, Ínéga no kahpúípéqté náneq itega moq nayehetawoye. Peh néne niyah púpeqkakáq niyahapeqkakáq tútuue míéhra ke omaq sitewé íre néne arambéhri wire. Nániboga omaq sitéh ánítégá mitaq tútuue míayeherawoye úwe.

<sup>24</sup> Úwaq ite we kérähwána inayáhnkú kégá mah ewhéh ireq mi abáráhréyábé suwehgu aritahwáne.

<sup>25</sup> Suwehgu aritahwánana Sísaga moke ite we kérähwána keyábé, Ínéba sewíáhro éna itensabé, Mah marákóípéqté sánsámé mó kegá sene ehweh sehgeheéra wahnah kegá wahnahnarítáhwe. Sene anotah wehwárínká, Itene ehweh ireq séhgíóro éra págegeue wahnahnarítáhwe. Mi sansá aiq tagariáhwe.

<sup>26</sup> Itewe mi sansá íre oro. Ahqáho. Íné anotah aní míanie íwíáhi anínká wereq míáh ké séhréh aritankéhe.

<sup>27</sup> Néne iyahnabone wahnah míanie íwíáhi anínká sene arambehrriraq séhréh aritankéhe.

<sup>28</sup> Íné wehukení úku anímé mó kegá íné séhréh aintageheéna tutauge? Írakaumo. Ínéga mó ke séhréh aritanieéna tutauge. Áhnte ke oga míagehboq se merirena kaweraritanieéna pukinie úwe.

*Sísaga aura pira áníté kawerarito ehwéhne.*  
*(Máhka 10.46-52; Árúka 18.35-43)*

<sup>29</sup> Itega Séríko suwahpeq suahwánara áhnte kegá Sísa kérówe.

<sup>30</sup> Kérówara aura pira ánítégá ahnayehráq tútuue méra Sísa kótaikire u irera anotah ewhéhne mahraréra, Tébítine anahwao, arutaboiraito uye.

<sup>31</sup> Uyara míó kega suwehgu aritera ehiya míáhtao arítowara sega íre túbáh agia peh móñkakáq anotahtaq iraréra, Tébítine anahwao, arutaboiraito uye.

<sup>32</sup> Uyana Sísaga iriwe ména sensabé síáhrabéna, Aneraitaníkono úwara

<sup>33</sup> sega wensabé, Anotah aníno, iura kaweraito uyana

<sup>34</sup> Sísaga sensabé arutaboiraritená sene siura táhrowara sega apubúue tagéra Sísa kéróye.

## 21

*Sísaga Sarúsarama suwahpeq kú ehwehne.*

*(Máhka 11.1-11; Árúka 19.28-40; Sóni 12.12-19)*

<sup>1</sup> Itega Sarúsarama suwahpeq wahtotaq konehe owanaraq itega Óríwi sawéhrápéq kiowáne. Mi sawéhwé Páítápási suwahpeq wahtotaq kékre. Mitaq kiowánaraq Sísaga we kéróya anité eqmaq suanaútaq

<sup>2</sup> sensabé, Isebeq wahtotaq ke suwahpeq pokotao. Mitaq kirataq iyaráh kátáré, tónkiakáq wene áráhqakaaq tagéta pugeqme meqme setao.

<sup>3</sup> Pugeréhrataq mó anínká itensabé, Aneqsabé pugerehyo ínaraqmé, Itene Wahnah áhkokóue kinkeheeéta meroye teawétao. Teawírataq wega apubúue, Meqme pokotao inkhé éna eqmaq suowe.

<sup>4</sup> Manikáne ehweh aiq pútaraginkeeéna Sísaga tónki kowerahtao éna eqmaq suowe. Manikáne ehweh irarú aninká nahoh sehiranue mahraréna,

<sup>5</sup> Moke Sáióna\* suwahpeqte ké korerieq mahrarero. Amahnága itene Wahnhahnka iteba sire. We uwaresa ání míéhrana tónkiga áhkokóuena sire. We tónki áráhqne abobiahtaq tútuue míéhrana meqme sire koreríero úwe. *(Sekaraia 9.9)*

<sup>6</sup> Mi anité eqmaq suowara pokue Sísaga teriunserah

<sup>7</sup> mi katáré meriqme séra sene korósi mi kané abobiahtaq uwiq máróyana Sísaga mi tonkíné abobiahtaq kierútu agúwe.

<sup>8</sup> Áhnte kegá Sísansabé iwíáh iwíáh ató púara sene korósi ahtapeq uwiqme abaeue móárówara mó kegá awanká ayahnawe apiwe ahtapeq awahrirarówe.

<sup>9</sup> Awahrirarówara Sísareq moraráq ebeq ku kereq anehe ku kereqka anotah ewhéhnue mahraréra, Tébítine anahwansábé iwíáh iwíáh atone. Itene Wahnah áwírue si anínsábé iwíáh iwíáh atone. Maniká iópeq míéhraq wensabé iwíáh iwíáh atone uwe.

<sup>10</sup> Sísaga Sarúsarama suwahpeq kútaq ómi mibeqté kegá kurináhnéra áhnte ewhéhnéra, Mi anímé insebo uwara

<sup>11</sup> Sísareq su kegá, Mah anímé Manikáne ehweh irari aní wenawíq Sísae. We Néhsara suwahpeqte Kehrari marákórápéqté áníne uwe.

*Sísaga Manikánsabe iwíáh iwíáh atáh náhtápéqté paiqnanánu ke máhpeq kaqsuo ewhéhne.*

*(Máhka 11.15-19; Árúka 19.45-48; Sóni 2.13-22)*

<sup>12</sup> Sísaga Manikánsabe iwíáh iwíáh atáh náhtápéqté wíráípqué kibekéna mitaq paiqnanánu ke máhpeq kaqsuowe. Kaqsuena móne paiqnanánu kené wéhuwehu tahbéwári pioruena kiboki paiqnanánu kené síahwarí paentárara aruowe.

<sup>13</sup> Paentáruena sensabé, Manikáne ewhehnka mahraréna,

Néne nahme púreré nahne ue áwíratagéhe ire.

*(Aisaia 56.7)*

Itega miraonka mah nahmé aebó kegá mehwatíahnserah nah úkire úwe.

<sup>14</sup> Aura pira kéréq soriqnah kereqka Manikánsabe iwíáh iwíáh atáh náhúpéq kibekéra Sísaba suwana kaweraritowe.

<sup>15</sup> Kaweraritowara Manikáne ehweh mibeq mahbeq arítáh kéréq Mósísine ehweh síwáhnoro kereqka Sísaga kawerarito arámbéhri tagowe. Tagowara mibeqté káriq anímárínká mahraréra, Tébítine anahwansábé iwíáh iwíáh atone uwara irera mi kegá Sísansabé abiahnsa atówe.

<sup>16</sup> Abiahnsa atera wensabé, Sega irare ewhéhmé aiq irahno uwara Sísaga sensabé, Aiq íróge. Manikáne ewhehnka mahraréna,

Káriq anímárínseq inahunahnímárínseqka arensabé iwíáh iwíáh atáhwe ire. *(Buk Song 8.2)*

Itega mi ewhéhmé íre sáhnsahoo éna

<sup>17</sup> se suena Sarúsarama suwahpeq suena Pétáni suwahpeq kogauwe.

\* **21:5:** Sáiónawé Sarúsarama suwahpeqsabé mó awíre.

*Sísaga irarúnka awanká apubúue ehyatagú ehwehne.*  
*(Máhka 11.12-14,20-24)*

**18** Ahbiahipeq Sísaga Sarúsarama suwahpeq kouwekinaútaq ahtapeq ména arupibiúwana

**19** awanká tagówana awankánara sabátáhq koragówana íre serankakáq peh ánáh kowe. Awankánara írakaunúnsabe Sísaga mi awánkánsábé, Mókake sera íre iyaniewóne úwana mi awánká apubúue ehyatagúwe.

**20** Apubúue ehyatagúwaq ite we kérahwána kegá tagéq kurináhnéq wensabé, Árahue apubúue ehyatagiro kasenowana

**21** Sísaga itensabé, Teiníboq írátiáhro. Itega árahinabomo íwíáh íre iwíáhia peh Manikánka mirainawire íwíáhirataq ínéga unserahnoneheqmóe. Íre peh morá mahna tahnsanigehe. Itega mi sawéhyábé teaweq, Saweho, arega mitaq sue anotah kawéhúpípéq kogahno teawírataqmé mirainawire.

**22** Itega, Manikánka mirainawire íwíáhéq púrerirataq itega teawíra ehwéh irena mirainawire úwe.

*Sísansabé, Insegá miraúno atáráiro u ehwéhne.*  
*(Máhka 11.27-33; Árúka 20.1-8)*

**23** Sísaga Manikánsabe iwíáh iwíáh atáh náhtápéqté wíráípqué kibekéna síwáhnorúwara Manikáne ehwéh mibeq mahbeq arítáh kéreq Asiu kené aboawah wehreqka weba séra kasenéra, Arega miraóna naneq árahinie miraono? Insegá miraúno atáráiro? Teio uwe. Teio uwana Sísaga sensabé, Ínéga itensabé moq kaseninie.

**24** Ínéga kasenona ehwéh tenírataqmé ínénabe miraúno aintarái aní teiníe úwe.

**25** Teiníe éna kasenéra, Sóniga wání meri merininkeheéna insegá eqmaq áuwátáiro? Manikánka eqmaq áuwátáiro? Peh wehukega eqmaq áuwátóo? Teníero úwe.

Teníero éna, Tenírataqmé ínénabe miraúno aintarái aní teiníe úwara sega epéq só sío sóéra, Anere teawenéhnkono? Manikánka Sóni eqmaq áuwátáire ue teawénaraqmé wega itensabé, Aneqsabé wene ehwehsabé íre aiq pútare ataróo inae éra,

**26** Itega wensabé, Wehukega Sóni eqmaq áuwátówe ue teawénaraqmé mahtaq sáhuriáh kégá, Sóniwe Manikáne ehwéh irarurai aní míre íwíáho puara iubíyeho éra só sóouwe.

**27** Sío sóéra Sísansabé, Sóniwe insegá eqmaq áuwátáiramo. Itega íre tagarione uwana Sísaga sensabé, Itega íné íre teníewe. Minayabe ínéga moq ínénabe miraúno aintarái aní íre teiníe úwe.

*Se ábárahreyábé pabeqme ehwéhne.*

**28** Sísaga sensabé mó mahraréna, Ínéga teiéna ehwéh iwíáhue tagahro. Se ábárahreyábé teiníe. Sibowágá awahwánsábé, Iboramé néne sotápéq koarambehriúno atáráirana,

**29** Ahqáho. Nuwahriehre éna anehe mó iwíáhena wenabone sotápéq koarambehriuraire.

**30** Sibowágá ábáqkawansábé monseráh ehwéh teawátáirana, Koarambehrinauge éna anehe íre koarambehriuraire.

**31** Mi abáráhrégá sibowá awahbarai iwíáh insegá sehgirairo úwara sega wensabé, Awahwágáe uwe.

Uwana Sísaga sensabé, Teiníboq írátiáhro. Aebó kéreq ahbabáq ininsónseqka Maniká awahbeh sansá sehgiera wega wahnah wahnahnirabeq ebeq kiraq ite sinehe kigehe.

**32** Sóni wání meri merini anínká iteba séna kaweqtaq mía míaorahi sansá sokigi aiátáiraq wensabé íre aiq pútare atárówe. Aebó kéreq ahbabáq ininsónseqka wene ehwéh irera wensabé aiq pútare atera sene ahbabáq sansa sutowe. Sutowaq tagéq iteitene ahbabáq sansa íre susa mó iwíáh íre owe. Wensabé íre aiq pútare atárówe úwe.

*Sotáq wahnahnuro ahbábáq kékéyábe pabeqme ehwéhne.*

(Máhka 12.1-12; Árúka 20.9-19)

<sup>33</sup> Sísaga sensabé mó mahraréna, Mó pabeqme ehwéh teiníboq írátíáhro éna, Anotah wehgá sonsoqme náhníáq sera ayu uqmarena wira arena wahnahnína uqná peataire. Pearena náhníáq sera ano kunubaipéq sarerankeheéna mata ubuqmarena mó keyábé, Néne sotáq wahnahnue náwe soqintewáhro aritena mitaq suena íre wahto wáhnaupéqté ké suwahqpeq pokuraire.

<sup>34</sup> Náhníáq sera irái tanáhráq wene arambehri keyábé, Ákáhtaq koweyáhro éna se sotáq wahnahnuro kebá eqmaq súátáire.

<sup>35</sup> Eqmaq súátáirara sotáq wahnahnuro kegá se táhtoqme mó aní subiqmarera mó aní subiq suera mó aní ebahnza subiqme kaqsutowe.

<sup>36</sup> Kaqsutowana so aboga áhnte mó ke eqmaq sutairara sotáq wahnahnuro kegá téh eqmaq sutai ke íre kawerarítáró serahnurowe.

<sup>37</sup> Anehe so aboga wenahni eqmataire. Eqmarena iwíáhéra, Nénahni púara sotáq wahnahnuro kegá wensabé áhtenéra wene ehweh iragéhe éna eqmataire.

<sup>38</sup> Eqmatairana wahto kuraitaq sotáq wahnahnuro kegá we tagéra seye náhenéra, So abone ahninkáwá aiq sire. Mah so awaq mianéhboq we subiq suanéhe iwíáhéra

<sup>39</sup> we táhtoqme máhpeq móatera subiq sutowe.

<sup>40</sup> Subiq sutonsabé so aboga sínaraq wene sotáq wahnahnuro ke anere aritankéhbo kasenúwe.

<sup>41</sup> Kasenúwara sega Sísansabé, So aboga kouwekínaraq mi ahbábáq ké kamah ariena subiq suanawire. Sera putáhnaraq wega kawerue náwíra ke wene sotáq wahnahnigéheéna eqsitankéhe uwe.

<sup>42</sup> Uwana Sísaga sensabé, Manikáne ehwehnka ínénsabe mahraréna, Nah piáh kégá suto wahqká moke nahwiahnsanse kiotaikire. Itene Wahnahnka mi-rainsabé itega, Kaweq sansáne iwíáhúne ire.<sup>†</sup> (Buk Song 118.22-23; Aisaia 28.16)

Ite Asiu kewé mi sehirá íre sáhnsahoo?

<sup>43</sup> Teiníboq írátíáhro. Manikánka wahnah wahnahnirabeq itewe íre awaq mianeheqmóe. Wehukega so kawerue wahnahnéra kaweq tahutáhúq ísíwe sene wahnah áwíranserahnira kegá awaq miagéhe.

<sup>44</sup> [Mi wahqtáq inahnsubíra kené siyahnsamé piteginae. Mi wahqká megue wehukení subinaraq wene ayahnsamé abiro abiro aginawire úwe.] (Aisaia 8.14-15)

<sup>45</sup> Sísaga mah pabéqmé éhwéh irarúwara Manikáne ehweh mibeq mahbeq arítah kéreq Péhrasi kerekka irera, Wega itensabé irarire uwe.

<sup>46</sup> Uwara mitaq mío kega, Sísawe Manikáne ehweh irari aní míre iwíáhunsabé Péhrasi kerekka Sísa táhtoqme karábúsiipéq móataneheqmúne iwíáhéra mío keyabé áhreu puara túbah aguwe.

## 22

*Táhutahuronehboq mahbeq sero únsabe pabeqme ehwéhne.*

(Árúka 14.16-24)

<sup>1</sup> Sísaga mó pabeqme ehwéh mahraréna,

<sup>2</sup> Íopeq Manikánka wahnah wahnahnirabeq pokira sansámé anotah wahnáhnká mi-raurainserahne. Mi wahnáhné ahninkáwágá ahre meanauraitaq wenaboga wehekeq kiraboinieéna áhnte tahutáhúq kawerataire.

<sup>3</sup> Táhutahuq kawerarena wene arambehri keyábé, Ínéga máhoro urau keyábé, Táhutahuq aiq téhre. Mahbeq sero koreríero urairara koreríatówara sega íre surowe.

<sup>†</sup> **21:42:** Asiu kegá sene nahmarí ebahtaté pearówe. Minayabe Káríki ehwéhmé wahq éhwéhme íre kékhe. Peh ebahne kékhe.

<sup>4</sup> Íre suro puana wahnah anínká mó arámbéhrí kékáyabé, Mi ke mónkakáq koreríero. Sensabé mahrarue korerieq, Káhoakáq áráhqkakaq subiqmarena tirúgana aiq téhre. Moke táhutahuq amahnága aiq kawerunsabé peheráh sero ue koreríero éna eqmaq sutaire.

<sup>5</sup> Eqmaq sutairara koreríatówara sega mi ehwéhnsábé anetaníbo éra seyene ahwimin-urowe. Mó anínká wene sotápéq pokurairana mó anínká wene paiqnáná nahtápéq pokurairara

<sup>6</sup> mó kegá wahnahne arambehrio ke táhtoqme íre kaweraritera subiq sutowe.

<sup>7</sup> Subiq sutowana wahnah anínká anotah abíáhnsánéna wene sóntia ke eqmataire. Eqmatairara sóntia kegá subiq suto ke subiq suera sene nahmarí kekirutowe.

<sup>8</sup> Kekirutowana wahnah anínká mó arámbéhrío ke síáhrabéna sensabé, Nénahni ahre meyéhnsábé táhutahuq kawerarena síáhrabu kegá abehq sánsánonsabé ahqáho arítóge.

<sup>9</sup> Minayabe wahba áhtápéq pokue moke tagehra keyábé, Táhutahuq kowe nagehboq máhoro arítáhro urairara

<sup>10</sup> wahba áhtápéq pokue moke tagaro ke meriqmera surowe. Kaweq kereq ahbabáq kereq meriqmera surowana wahnahne nah kígíuraire.

<sup>11</sup> Kígíurairena wahnah anínká meriro ke koragéna pahouwiuro awahriq ambántá íre awahriria surai aní tagówe.

<sup>12</sup> Tagéna wensabé, Árahinsabé awahriq ambántá íre aneranerue suria pehipi seno uraire. Urairana mi anínká íre ehwehnorahurairana

<sup>13</sup> wahnah anínká wene arambehri keyábé, Mah aníné aiayah táchru táchruue máhpeq sunkíkírirabeq tuparúáhro. Mitaq sunkíkírirabeq moke míáh kegá anotah ibiséra uwo uwo urowe úwe.

<sup>14</sup> Sísaga mó mahraréna, Mah pabéqmé éhwéh áwahe íráhro. Manikánka íregárítáq keyábé, Máhoro irara áhnte kegá, Iuwahriehre e puana wega peh táchmaro omaq sitéhre úwe.

### *Sega Sísansabé, Táhkísi moné awenéhnikono u ehwéhne.*

(Máhka 12.13-17; Árúka 20.20-26)

<sup>15</sup> Úwara Péhrasi kegá móbeq pokue só síoéra, Sísaga ahbabáq ehweh irarinkehboq áhwárawe tagéq aneq pagégé éhwéh kasenonehnkono éra iwiáhuwe.

<sup>16</sup> Iwiáhéra táchmaro se kéró kereq Éróti kahnáh kéreq Sísaba eqmaq suowara kure Sísansabé, Anotah aníno, ite tagarionawe arewe aiq pútaq éhwéh iraréna aní móne. Arega anotah kereq pehgáriq kereqsabé peh monseráh iwiáhóne. Arega wehuke íre ehnenia peh Manikáne sansá ahriahri tábúsoqme pahsuqme iwiáhonoróne.

<sup>17</sup> Minayabe ite iahtebanehboq teio. Aneq iwiáhono? Itega Aroma kené wahnah aní Sísáhri táhkísi moné awenéhnikono? Árahonehnkono? Arega iwiáhóna ehweh teio uwe.

<sup>18</sup> Teio uwana Sísaga sene sirupipeqté áhbábáq iwiáh tagéna sensabé, Itewe kopéráhpéro ke wóe. Aneqsabé áhwárawe tagéq níwíóqnaho?

<sup>19</sup> Táhkísi ira moné teníero úwara sega peh morá ébáh móne ábóraq márówe.

<sup>20</sup> Ábóraq márówana Sísaga sensabé, Mah monéráq píkisahakáq áwíqkakaq insene kehro úwara sega wensabé,

<sup>21</sup> Aroma kené wahnah aní Sísáhrinee uwe. Uwana Sísaga sensabé, Aroma kené wahnahne náneq wewe náwéro. Manikáne naneq wewe Maniká náwéro úwe.

<sup>22</sup> Péhrasi kega wene ehweh írótaq áhtenéra we auwera pokuwe.

### *Sísaga, Pusa ké organúq sitankéhe ú ehwehne.*

(Máhka 12.18-27; Árúka 20.27-40)

<sup>23</sup> Sáyúsi kewé pusa ké íre iriwe organúq sitankéhe iwiáhu kee. Mi wehekáh táchmaro mi kegá Sísaba séra wensabé,

<sup>24</sup> Iwáhnoraníno, Mósísine sehiranka maharéna,

Íre aninkákáq wéh pukínaraq wenábáqka kéweiní meyankéhe. Mi inínká maqmarahna anímári wenawahne animári míageheéna meyankéhe ire. **(Lo 25.5)**

**25** Minayabe abapete téhraníté se ábárahnhahnah iteba míarowe. Sensuwahga ahre mewena íre aninkákáq uraitaq pukuraire.

**26** Pukurairana náhmbáh 2 abaqqwágá awahwáné kéweiní mewena íre aninkákáq uraitaq pukurairana náhmbáh 3 abaqqwágá moq monseráhnuraire. Moke mi abáráhnáhnahnka mi iní mótaq mótarue mewera íre aninkákáq urotaq orah animári pukurowana

**27** sinehemé mi iní moq pukuraire.

**28** Moke mi abáráhnáhnahnka mi iní meronsabé iriwe organúq sitahnaraq insene ahre míanabo kasenuwe.

**29** Kasenuwana Sísaga sensabé, Itewe Manikáne púkuipéqté séhíránkákáq wega págegeue miraorahi sansánkákáq íre ahtebah puaq áhwára áhwára ahbabáq iwiáhowe.

**30** Manikánka pusa ké iriwe organúq sitahnaraq se peh íópeqté ké tahnza mía míaigehe. Mi tanáhráq wehga ahre íre meyagéhe. Ahrega íre wehkigehe.

**31** Pusa ké iriwe organúq sitahnayabé Manikáne púkuipéqté séhíramé íre sáhnsahoo?

**32** Wene ehwehnka ite teiena,

Íné Ébárhmane Maniká múge. Íné Áhísáhkine Maniká múge. Íné Sékópane Maniká múge ire. **(Kisim Bek 3.6)**

Manikámé íre pusa kéné Manikáne. Írakumo. We peh oga míáh kéné Maniká míre\* úwara **33** mitaq sáhurió kega mi ewhéh irera áhtenuwe.

*Sísaga Manikáne kiotaiki ehwehsabé irarú ehwehne.*

*(Máhka 12.28-31; Árúka 10.25-28)*

**34** Sísaga irarúnka Sáyúsi kegá ehiyansá aguwara Péhrasi kegá irera momiwíéra Sísaba suwe.

**35** Suwana peh morá Péhrasi aní, Mósísine ehweh síwáhnoru anínká Sísaga ahbabáq ehweh irarinkeheéna áhwárawe tagéna kasenúwe.

**36** Kasenéna, Íwáhnoraníno, sehgóro ú ehwehmé aneq ewhéhnká mó ewhéh kiotaikiro úwana

**37** Sísaga wensabé, Kiotaiki ewhéh teaweníboq iro.

Maniká itene Wahnhnsabé arutaboirúno. Moke arene arupipeqkákáq moke arenawankakákáq moke arene iwíáhónaipéqkákáq Maniká itene Wahnhnsabé arutaboirúno.

**38** Mah ewhéhnká moke mó sehgóro ú ehweh aiq kiotaikire.

**39** Mó kiotaiki ewhéh iro. Arerensabé arutaboirónanserah mó anínsabé moq arutaboirúno ire.

**40** Mah ewhéhtáré áwahe wíre. Moke Mósísine ehwehnkákáq Manikáne ehweh iraru kené ehwehnkakáqmé ábogehrapeqté éhwéh míre úwe. **(Lo 6.5; Wok Pris 19.18)**

*Manikánka omaq ato aní éhweh Péhrasi keyábé Sísaga kasenú ehwehne.*

*(Máhka 12.35-37; Árúka 20.41-44)*

**41** Péhrasi kegá momiwíuwana Sísaga sensabé,

**42** Ite meirena kaweraintankeheéna Manikánka omaq ato anínsabé aneq iwíáhoo? We insene anahwa míanabo úwara, We Tébítine anahwa míanae uwe.

**43** Uwana Sísaga sensabé kasenéna, Manikáne Awanka iwíáh atowana Tébítiga mi anínsabé, Néne Wahnhne atowe. Wega aneqsabé irarúwo? Manikáne Awanka Tébítí iwíáh atowana igonkó pukúipéq sehiranúwana mi ewhéhnká mahraréna,

\* **22:32:** Ébárhmareh naho pukuwara maisarówana áhnte opéq parabagútaq Manikánka mah ewhéh irarúwe. Wega, Íné mi kené Maniká múge irarú ehweh áwahewé se íre airaiq pukia peh amahnága oga míáhwe úwe.

**44** Maniká itene Wahnahnka néne Wahnahnsabé, Niyah púpeq tútuue míéhnaraq arene naruo saiqnariankehe atóge úwe ire. *(Buk Song 110.1)*

**45** Írátíahro. Tébítiga mi anínsábé, Néne Wahnahne ato puana we árahue wene anahwa míanabo kasenúwe.

**46** Kasenúwara Péhrasi kegá Sísansabé mó ehwéh íre kasenuwe. Wensabé áhtenéra mó tanáhráq mó tanáhrárue mó ehwéh íre kasenuwe.

## 23

*Péhrasi kereq Mósísine ehweh síwáhnoro kereqka ahbabárowe ú ehwehne.*

*(Máhka 12.38-39; Árúka 11.43,46, 20.45-46)*

**1** Sísaga ite we kérähwána kereq weba sáhuríó kereqsabé mahraréna,

**2** Mósísiga naho síwáhnorúnserah wene ehweh ahtebah kereq Péhrasi kereqka wene ehweh íwáhnorowe.

**3** Íwáhnorue teié éhwéh moke kawerue sehgóro. Íwáhnoro ehwéh seyega íre sehgiro puaq sega mirao sansániyeho. Áhnte ehwéh iraréra seyega mi ehwéh íre sehgiro puaq mirao serahniyeho.

**4** Wehukeninká mó aní anotahtaq piahbiahratéhnserah Péhrasi kegá seyene íre sehgoráho ehwéh tei teinowe. Piahbiahratéh áninká umehi naneq matiéh ání íre náwioréhnserah Péhrasi kegá teri terino ke íre séhréh aritasa peh áwé tagahwe.

**5** Kaweq sansá pehipi íre miraowe. Peh mó kegá tagagehééra miraowe. Manikáne ehweh pépahqtaq sehiranarerá káriq pokísíípéq maqme mó kegá tagagehééra sene siyahnkaratáq sene siyehitaq táhpawé nogówe. Mó kegá tagéra sensabé iwiáh íwíáh aritagehééra íre wahto nahgáq sene korósiraq táhrarera aneranerue míáhwé.

**6** Segá táhutahururorabeq aboawah wehwári tútuue míáhrabeq méyabe suwahbehre. Momiwí nahtápéq peh kaweqtapéq tútuue méyabe suwahbehre.

**7** Segá máhkétirapéq nogótáq mó kegá se mehwéh ariteyabe suwahbehre. Mó kegá sensabé, Íwáhnoraníno ateyabe suwahbehre.

**8** Mó kegá itensabé, Íwáhnoro ke wóe aitého. Ite ábárahnhnah tahnsá míáhwana ite íwáhnori anímé peh morá áníne.

**9** Marakóipeqté kékabé, Nánibo wone arítého. Iteribo peh morá ánínéna íópeq míéhre.

**10** Mó kegá itensabé, Itene Wahnah mone aitého. Manikánka omaq into aní ínébataq itene Wahnah míóge.

**11** Ite míáhrabeqte kiotaiki anímé arene arambehri séhréh aitéh ání míankehe.

**12** Wenáwíq pankerena, Íné anotah aní müge i anímé pehgáriq aní míankehe. Wenáwíq íre pankerena peh uwaresa aní míahnaraqmé anotah aní míankehe.

*Kopéráhpéro ke kamah arina ehwéhne.*

*(Máhka 12.40; Árúka 11.39-52, 20.47)*

**13** Sísaga mó mahraréna, Mósísine ehweh síwáhnoro kereq Péhrasi kerero, kopéráhpéro ke míáh púana kamah ainawire. Mó kegá íópeq Manikánka wahnah wahnahnirabeqte áhtápéq kíyehoéq parosúáhwe. Ite mibeq kieyabe íre iuwahbehre. Peh mibeq kieyabe suwahbeh ke saiqnarítáhwe.

**14** [Kopéráhpéro ke míáh púana kamah ainawire. Itega kékewinínsónsábé péhe éhwéh terieq sene ménsámehnsánkakaq sene nahnkakaq mewe meweowe. Mó kegá ite kaweqtáq míáh ké wóe igeheéq wehuke míáhtáq íre wahtotaq púreq aruqarurowe. Mirao puana Manikánka ehweh aritahna tanáhráq ite anotahtaq kamah ainawire úwe.]

**15** Sísaga mó mahraréna, Mósísine ehweh síwáhnoro kereq Péhrasi kerero, kopéráhpéro ke míáh púana kamah ainawire. Peh morá ání ite kékéhre ání míankeheéq itega íre wahto ahtápéq pokue mó ke suwahpeq mó ke suwahperue pokue síwáhnoréq sóreq waní seberaebéq pokue síwáhnoruwe. Ite kékéhre ání úkitaq itega miraonka mi aníné ahbabáq

itene ahbabáq kiotaikirana áhnte ahbabáq aruqarurire. Wereq itereq moraráq iraipéq pokoneheqmóe úwe.

**16** Sísaga mó mahraréna, Itega mó ke ah sokigi aritaneheéq aura pira ké tahnsa míahwe. Minayabe Manikánka kamah ainawire. Itega síwáhnoréq, Wehukenínká iraréna, Manikánsabe iwíáh íwíáh atáh náhnká tagariéhtáq aiq pútaq mirainauge ínaraq anehe mi ehwéh íre sehginaraqmé anetaníbo ewe. Mi anínká iraréna, Manikánsabe iwíáh íwíáh atáh náhtápéq kék mónégá tagariéhtáq aiq pútaq mirainauge ínaraq anehe mi ehwéh íre sehginaraqmé we anotah ahbabárire ewe.

**17** Ite múguwahguo ke méq íre ireq peh aura pira ké tahnsa móe. Mi monéwé kaweqtapéq kéhnsábé kaweq naneq úkire. Minayabe Manikánsabe iwíáh íwíáh atáh náhnká mi moné aiq kiotaiki mino.

**18** Itega mó síwáhnoréq, Wehukenínká iraréna, Titiré tahbégá tagariéhtáq aiq pútaq mirainauge ínaraq anehe mi ehwéh íre sehginaraqmé anetaníbo ewe. Mi anínká iraréna, Titiré tahbéráq Maniká awe naneqka tagariéhtáq aiq pútaq mirainauge ínaraq anehe mi ehwéh íre sehginaraqmé we anotah ahbabárire ewe.

**19** Ite íre ireq peh aura pira ké tahnsa móe. Titiré naneq kaweqtapéq kéhnsábé kaweq naneq úkire. Minayabe titiré tahbégá mitaq kék náneq aiq kiotaiki mino.

**20** Minayabe wehukenínká iraréna, Titiré tahbégá tagariéhtáq aiq pútaq mirainauge ime wega íre peh morá mi tahbeyábé irarire. Wega moke tahberapeq kék náneqsabéákáq irarire.

**21** Wehukenínká iraréna, Manikánsabe iwíáh íwíáh atáh náhnká tagariéhtáq aiq pútaq mirainauge ime wega íre peh morá mi nahnsábé irarire. Manikánka mi nahtápéq míai puana wega irarime Manikánsabeákáq irarire.

**22** Wehukenínká iraréna, Íónka tagariéhtáq aiq pútaq mirainauge ime íre peh morá íónsabe irarire. Manikánka mitaq íópeq tútuue ména wahnahni puana wega irarime wahnahni anínsábéákáq irarire úwe.

**23** Sísaga mó mahraréna, Mósísine ehweh síwáhnoro kereq Péhrasi kerero, kopéráhpéro ke míah púaq ite kamah ainawire. Moke itene sotápéqté ménsáméhnsá saraqme abapete itaréitaré tahnsa matawéq peh morá Manikáne arambehri mirao ke mewe síwe. Kauerowe. Pehgáriq naneqmarí táwiomé, kímé, náwahbiame, moq saraqme síwe. Kauerowe. Mi sansámé sehgieq íre súáhro. Peh kaweq sansámé mó keyábé irutaboirome Manikánsabe aiq pútare atáhmé mi sansámári ite íre sehgówe. Íre sehgónsábé Manikánka kamah ainehboq mi sansámárínkákáq moq sehgóro.

**24** Itega, Mó ke ah sokigi aritaneheéq aura pira ké tahnsa míahwe. Itega múguwahgui aní tahnsa míahwe. Abehq náneq ka múguwahgui aníné né wanípípéq kéhrana wega anotahtaq éhnehéna mi pehgáriq kák súéhre. Mi pehgáriq kák suena anotah ka wenáwíq kékma wene né wanípípéq kéhrana mi anotah kiotaiki ka íre tagéna pehipi nehre. Itega mi aní tahnsa míahwe úwe.\*

**25** Sísaga mó mahraréna, Mósísine ehweh síwáhnoro kereq Péhrasi kerero, kopéráhpéro ke míah púana kamah ainawire. Itega káhpuakákáq páretahakákáq pabeq paberotaq peh ábórapeq pabeq paberéq arupipeq íre pabeq paberowana peh náwíqkakaq mitaq kékre. Mina onserah itene inonka pabeq paberowana itene irupipeqmé aebó íwíáhwé iteite iuwehbeh iwíáhwé peh mitaq kékre.

**26** Péhrasi keo, ite peh aura pira ké tahnsa móe. Káhpu arupipeq kawerue pabeq paberirataq mókake ábórapeqkákáq náwíq íre kanae úwe.

**27** Sísaga mó mahraréna, Mósísine ehweh síwáhnoro kereq Péhrasi kerero, kopéráhpéro ke míah púana kamah ainawire. Wehuke maisaráhtáq mó kegá kaweraráhwana kaweq

\* **23:24:** Mi pabéqmé éhwéh áwahewé mahraue kékre. Mi aní tahnsanéq múguwahguéq pehgáriq sansá sehgieq kiotaiki sansámári íre sehgówe úwe.

matábú kéhrana peh maisia máípípéq wehukene ayahnsankakaq kambaresa náneqkakáq kéhre. Ite mina tahnса ké míáhwe.

<sup>28</sup> Mó kegá ite tagéra, Kaweqtaq míáh ké wóe íwíáhowana peh itene irupipeq kopéráhpéq iwiáhákáq ahbabáq iwiáhákáq kéhre úwe.

<sup>29</sup> Sísaga mó mahraréna, Mósí sine ehweh síwáhnoro kereq Péhrasi kerero, kopéráhpéro ke míáh púana kamah ainawire. Itene igaqnáréhga Manikáne ehweh iraru ke subiq súówe. Subiq suera maisarówaq itega se maisarórabeq eba hmitaq pentabaráhwe. Kaweqtaq míá míáuro ke maisarórabeq itega awahriraráhwe.

<sup>30</sup> Itega mahraréq, Itene igaqnáréhga míótaq ite moq míáhwanaraq tahirímé sega Manikáne ehweh iraru ke subiq súótaq se íre subiq suahwána irino ewe.

<sup>31</sup> Itega mi ehweh irareme Manikáne ehweh iraru ke subiq súó kene animári múné ewe.

<sup>32</sup> Sene animári méq itene igaqnáréhga áhwáro ahbabáq itega soruparowana anotah úkire.

<sup>33</sup> Wehene animáriño, ite moq wehemarí móe. Manikánka ehweh aitena sainsuahna tanáhráq, Iraipéqsábé iuwahriehre éq, Tabanagoneheqmúne íwíáhoo? Írakaumo. Mi tanáhráq ite íre tabanagorahowe.

<sup>34</sup> Minayabe teiníboq írátiáhro. Manikáne ehweh irare kereq ahtebia kéreq íwáhnoro kereq iteba eqmaq suaníe. Eqmaq suahnara iteba sirataq itega táhmaro subiq sueq mó tahmáró awankátaq táhpáreq mó tahmáró itene momiwí nahtápéq sahtáté subiqmareq kaqsueq mó ke su wahpeqte mó ke su wahpeqtenue kaqsuagéhe.

<sup>35</sup> Mirairataq kaweqtaq míá míáira ke subiq súéhra puana Manikánka kamah ainawire. Naho mío wehukéní Ábéri kaweqtaq míá míáuwana subiq suowana pukúwe. Pérékiane ahninkáwá Sékáráiae. Manikánsabe iwiáh íwíáh atáh náhúpéq titiré tabhé wahtotaq korabeq Sékáráia subiq súowana pukúwe. Téhwe Ábéri subiq suowara anehe áhnte mó ke subiq súowara sinehe Sékáráia subiq súówe. Moke mi ahbabáqmé iteba kagaire.

<sup>36</sup> Teiníboq írátiáhro. Moke mi ahbabáq amahnága oga míáh kóbá kagai puana minayabe kamah ainawire úwe.

### *Sísaga Sarúsarama su wahpeqte kékabé arutaboirú ehwehne.*

(Árúka 13.34-35, 19.41-44)

<sup>37</sup> Sísaga mó mahraréna, Sarúsarama su wahpeqte kéo, itensabé nirutaboiraitóge. Itega Manikáne ehweh iraru ke subiq sueq Manikánka iteba eqmaro ke ebahnsatate subiq súówe. Kokórega wene áráhqmarí arutaboiréna ahwirinserah áhnte tanáhráq ite wahnah-nue séhréh aiteyabe nuwahbehraqme itega ahqáho aintáhwe.

<sup>38</sup> Írátiáhro. Itega ahqáho aintáhnsábé Manikánka ite iuwena pokire. Iuwena poki puana iteruwahpeqme susa náh tahnса kanae.

<sup>39</sup> Teiníboq írátiáhro. Mókake itega íné pehipi íre tagagehe. Ebeqme mahraréq, Itene Wahnahne áwírue si anínsábé iwiáh íwíáh atone éq anehe íné tagagehe úwe. (*Buk Song 118.26*)

## 24

### *Sísaga, Manikánsabe iwiáh íwíáh atáh náh íre kaweraginawire ú ehwehne.*

(Máhka 13.1-2; Árúka 21.5-6)

<sup>1</sup> Sísaga Manikánsabe iwiáh íwíáh atáh náhtáqté wíráípqué tueyokúwaq ite we kérähwána kegá weba séq wensabé, Mah kawéq náhmári tagáhno ewane.

<sup>2</sup> Ewanana wega itensabé, Amahnága itega moke mah kawéq náhmárimé aiq tahgah-hoo? Teiníboq írátiáhro. Mi peréhnéhnia ébáhmári miraue moráráq íre kagainae. Peh moke paentárara aruaneherawoe úwe.

*Sísaga, Anehe tanahráq íre kaweq sunúq sínawire ú ehwehne.*

(Máhka 13.3-13; Árúka 21.7-19)

<sup>3</sup> Óríwi sawéhrápéq Sísa tútuue míowaq ite we kérahwána kegá itebataq weba séq wensabé, Arega metaq irarénawe ahkake miraoneherabo? Mi tanáhráq itega ahtebanehboq mah marákó márákó parabagina ínaraq arega kiwekinie inaraqmé aneq ábóraraginabo kasenowane.

<sup>4</sup> Kasenowanana Sísaga itensabé, Mi tanáhráqsábé mó kené péhe éhwéhnsábé aiq pútare arítéhboq auráq matawéq tagariáhro.

<sup>5</sup> Mi tanáhráq áhnte kegá mótaq mótarue néníwírue séra mahraréra, Manikánka wehuke merirena kaweraritankeheéna peh morá ání omaq atena eqmaq auwankéhe. Ínéwé mi ání mûge irarirataq áhnte kegá sene péhe éhwéhnsábé aiq pútare aritagéhe.

<sup>6</sup> Mi tanáhráq ebeho ehwéh ireq mó ebéhowe sóiriq ehwéh iragéhe. Íréhrataq íre áhreoro. Téhwe teiú náneq uméh ebeq sínana anehe tanahráqmé íre apubúue sinae.

<sup>7</sup> Mó kehinánseq mó kehinánseqka ebehoneherawoe. Mó wahnáhné awahrahreq mó wahnáhné awahrahrerue ebehoneherawoe. Mitaq mahtaq ehwehranae. Máríinae.

<sup>8</sup> Moke minawarinká uwo uwoira tanáhráq áhwáranae úwe.

<sup>9</sup> Sísaga mó mahraréna, Mi tanáhráq mó kegá ite táhtoqme mó kegá subiq suageheéra meiqmera móitagéhe. Itega néne sánsá sehgó púara mah kehiná kékínánká itensabé íre suwahbanae.

<sup>10</sup> Mi tanáhráq áhnte kegá néne sánsá sinehepeq suera wensabé wensabé íre suwahbáhnaraq sene naruoba móruagéhe.

<sup>11</sup> Mi tanáhráq áhnte kegá, Íné Manikáne ehweh iraru aní mûge éra péhenigehe. Péhe éhwéh irarirara áhnte kegá sene péhe éhwéhnsábé aiq pútare aritagéhe.

<sup>12</sup> Miraue ahbabáq sansanká anotah ukína puara áhnte kegá sirutaboiré sansa suagéhe.

<sup>13</sup> Ite néne sánsá íre susa anehe tanahráqkákáq kawerue sehgó rataq Manikánka ite meirena oga mérapeq móitankéhe.

<sup>14</sup> Ebeqme Manikánka wahnah wahnahnirabeqte kaweq ehwéh mah kehiná kékínánká irageheéra síwáhnorirana anehemé anehe tanahráq sinkehe úwe.

*Íre kaweq sunúq sínaraqsábé éhwéhne.*

(Máhka 13.14-23; Árúka 21.20-24)

<sup>15</sup> Sísaga mó mahraréna, Naho Manikáne ehweh irarú ani Táníériga anotah íre kaweq naneq ábóraraginæ teiuwe. (Daniel 11.31)

Anehe tanahráq Manikánsabe iwíáh iwíáh atáhrabeq mi naneq ábóraragínæ tagagehe. Mah sehirá sáhnsahwe tagah keo, iwíáhue tagahro.

<sup>16</sup> Mi tanáhráq Súria marákórápéq míéhrataq sáwéhrapeq pehbeheráh pokoro.

<sup>17</sup> Mi tanáhráq máhpeq míéhrataq itene ménsámehnsá kiweyanéheéq nahupeq kibekiyehboq pehbeheráh pokoro.

<sup>18</sup> Sotápéq míéhrataq itene korósi koweyaneheéq itene nahtapeq kowekeyehboq pehbeheráh pokoro.

<sup>19</sup> Mi tanáhráq kíá míéhra inínsónseq inahunah inínsónseqka íre pehbeheráh pokorahi puaq sensabé irutaboiroro.

<sup>20</sup> Ahrena ahrena wehekáhtáqkákáq ah kariehínagakeakáq mi iré káwéq súnúq sínehboq púreroro.

<sup>21</sup> Mi tanáhráq anotah íre kaweq sunúq sinawire. Manikánka mah marákó márákó mirarotaqkákáq amahnágaákáq mina tahnasa sunúq íre kékire. Mókake mó mina tahnasa sunúq íre sinae.

<sup>22</sup> Íre sinae éna, Manikánka aiq iwíáhéra, Íné túbáh agonaraq mi sunúqká ómi mah kehiná kékíná subiq suahráhire. Ómi subipáhraruehneho éna mi tanáhráq wahtonaraníe

íwíáhúwe. Mira íwíáhúnsabe wega omaq sitéh kékabé arutaboiri puana mi tanáhráq wahtonaruankéhe úwe.

<sup>23</sup> Sísaga mó mahraréna, Mi tanáhráq mó kegá itensabé, Tagahro. Ite meirena kaweraintankeheéna Manikánka omaq ato anímé mahtaq míéhre irara mó kegá itensabé, Isebeq míéhre igehe. Sene péhe éhwéhnsábé aiq pútare arítého.

<sup>24</sup> Péhe éhwéh irare kegá séra mahraréra, Íné Manikánka omaq intárái aní múge ue seneherawoe. Mó péhe éhwéh irare kegá, Íné Manikáne ehweh iraru aní múge ue seneherawoe. Sirataq ótaq sansánkákáq anotah pagégé sánsánkákáq miraoneherawoe. Áhnte kegá sene ótaq sansá tagéra sensabé aiq pútare aritakehéra mi sansá miraigehe. Manikánka omaq sitéh kéká moq sene péhe éhwéhnsábé aiq pútare aritakehéra miraigehe.

<sup>25</sup> Moke teiú náneq mókake áboraragínawire.

<sup>26</sup> Áboraragína puara mó kegá itensabé íné éhwéh teiera, Abatapi míéhre irataq mitaq íre koragahro. Segá itensabé, Nahupeq míéhre irataq mi ehwéhnsábé íre aiq pútare arítáhro.

<sup>27</sup> Sokaesúéhtáq apubúue mibeqté téhragu mahbeqté téhraguinséráh íné wehukení úku anínká apubúue tuinauge.

<sup>28</sup> Pusa káné anonka kéhrabeq kúqnumarinká ínsínsíowe úwe.

### *Anehe íné wehukení úku anínká tuinauge ú ehwehne.*

(Máhka 13.24-27; Árúka 21.25-28)

<sup>29</sup> Sísaga mó mahraréna, Íre kaweq sunúq sótaikínaraq pópoqnah íre patahinae. Inokáhpeq íre iónitanae. Wehyoqmarí íopeqté meginae. Íopeqté págege naneqmarí moke kúrugúruinae. (*Asaia 13.10, 34.4*)

<sup>30</sup> Mi tanáhráq íné wehukení úku anínká tuinie onaraq íopeqté náneq áboraragínara mah kehiná kékánká tagéra uwo uwo oneherawoe. Íné íopeqté piribirioyahnkakaq téreh nanekakáq págegeue írabúyápipeqté tuonara tagagehe.

<sup>31</sup> Túónagake pembíahnka anotah ehwéhnínaraq Manikánka wene íopeqté ké eqmaq suankéhe. Eqmaq suahnaraq wega omaq sitéh ké moke mah marákó márakkóípqué mitaqté kéweriqme mahtaqté kéweriqme ue ue sigehe úwe.

### *Síane ehweh íre parabagia peh ahriahri kagainawire i ehwehne.*

(Máhka 13.28-31; Árúka 21.29-33)

<sup>32</sup> Sísaga mó mahraréna, Awankánsabe iwíáhue tagéq ahtebahro. Awanká ayahnawe anonkakaq kahnana ánáh aunínaraq itega iwíáhéq, Ópeq áhnibórá sire aiq ahtebóne ewe.

<sup>33</sup> Mina onserah moke teiú náneq áboraragínaraq tagéq íné túóna tanáhráq aiq wahtarire. Íné onsaraq míéhre igehe.

<sup>34</sup> Teiníboq írátiáhro. Amahnága oga míáh kéká ómi pehipi íre pukigehe. Ebeqme moke teiú náneq áboraragínaraq anehe pukigehe.

<sup>35</sup> Íopekakáq mah marákó márakkóákáq parabagínana néne ehwehmé íre parabagia peh ahriahri kagainawire úwe.

### *Sísa tuina tanáhráqmé ómiga íre iahtebóna ehwehne.*

(Máhka 13.32-37; Árúka 17.26-30,34-36)

<sup>36</sup> Sísaga mó mahraréna, Íné túóna wehekáhnkákáq áhwahakáq ómiga íre ahtebahwe. Íopeqté kéká íre ahtebahwe. Íné Manikáne ahninkáwágá moq íre ahteboge. Peh morá Maniká Iteriboga webataq tagariéhre.

<sup>37</sup> Naho naho Nóah míó tanáhráq wehukega ahhbabárára miraunserah íné wehukení úku anínká tuinie onaraq mi tanáhráq oga míéhra kegá miraigehe.

**38** Anotah waní pianaú tanahráq wehukega ahbabárera ahriahri miraunserahnéra táhutahuréra ábáhréra pahuiruwana Nóahga wene sípiipéq kibekúwana anotah ibónsúwana wání piowe.

**39** Segá mi tanáhráqsábé íre ahtebowana wání pewe subipáhraruowara pukuwe. Segá mi tanáhráq íre ahtebonserah íné wehukení úku anínká túónagake míéhра kegá monseráhnigehe.

**40** Mi tanáhráq téhraníté sotápéq arambehrirataq mó aní tumerena mó aní auwankéhe.

**41** Téh inítégá tópah karo karoirataq mó iní tumerena mó iní auwankéhe.

**42** Íné itene Wahnah túóna tanáhráq íre tagariáh púaq níwénunéq kawerue auráq matiáhro.

**43** Anotah wehgá aebó áninká sína tanáhráq ahtebetqaq tahirímé wega áwénunue wahnahnurawéna aebó áninká kibekina ínaraq tagéna kaqsúeh irino.

**44** Minayabe iwíáhue tagahro. Íné wehukení úku anínká ite íre iwíáhira tanáhráq kouwekinauge. Minayabe íwéh panantágínaq níwénunoro úwe.

*Kaweq arámbéhrí ánínseq íre kaweq arámbéhrí ánínseqsabé pabeqme ehwéhne.*

*(Árúka 12.42-46)*

**45** Sísaga mó mahraréna, Ahtebia ání tábúsoqme arámbéhrí anímé insebo? Wene wahnahnka mi anínsábé, Mó arámbéhríó ke wahnahnarito atena táhutahuq tanáhráq tópah nário atéhre.

**46** Wene wahnahnka kouwekéna teawátái arámbéhrí tábúsoqme mirainsabé tagéna wene arambehri anínsábé, Kaweróne atankéhe. Kaweróne atéhnsábé arambehri aníne aru eyoyóinkehe.

**47** Teiníboq írátiáhro. Wene arambehri anínká tábúsoqme arámbéhrí puana wene wahnahnka, Moke néne ménsámehsátaq wahnahnúno atanae.

**48** Ahbabáq arambéhrí áninká iwíáhena, Néne wahnahnka íre apubúue kouwekinae iwíáhire.

**49** Mira íwíáhinsabé áwáhu arámbéhríó ke subiqmarena múgu wahgu kereq táhutahuq néna píah naruq narurire.

**50** Wega íre iwíáhue áwénunína tanáhráq wene wahnahnka séna mina tagéna

**51** anotahtaq kamah awena ahbabáq kopéráhpéro keba móatanae. Mitaqte kegá ibiséra uwo uwo oneherawoe úwe.

## 25

*Inayáhnkú áhráríyábé pabeqme ehwéhne.*

**1** Sísaga mó mahraréna, Mi tanáhráq íópeq Manikánka wahnah wahnahnirabeqme teiú áhrárígáú tahnsane. Inayáhnkú áhrárígáúnká o menáhwé taganeheéra sene áráhmuwarí mewera pokurowe.

**2** Moberiáh áhrárígáúmē múgu wahgu urowara mó mobériáh áhrárígáúmē peh ahtebia áhrári míarowe.

**3** Múgu wahgu áhrárígáúnká peh sene áráhmu mewera káráhsíniakáq íre merowe.

**4** Ahtebia áhrárígáúnká obenkisa káráhsíní ántéhíyánkákáq áráhmuakáq mewera pokurowe.

**5** Pokurowana o menáhwé íre apubúue surainsabé mi ahrárígáú mukúqmahkuréra sugarowe.

**6** Inokáhnabubu mó anínká sawai sawaiéna, O menáhwénká áhníbórá sire. Seragahro uraire.

**7** Seragahro urairara moke mi ahrárígáúnká irigéra sene áráhmu keqmarówe.

**8** Múgu wahgu áhrárígáúnká ahtebia áhrárígáúnsábé, Itene áráhmu puinkinaire.

**9** Káráhsíni náíero urowara, Ahqáho. Itene káráhsíni íre awehraq kékhe. Káráhsíni paiqmaráh kéká kobaiqmáráhro urowe.

<sup>10</sup> Kobaiqmáráhro urowara múguwahgu ahrárígáúnká káráhsíni kobaiqmaraneheéra pokurowana o menáhwé aiq suraire. Wereq ahreibia áhrárígáúnseq táchutahuroneheéra nahupeq kibekéra onsa paiqmatowe.

<sup>11</sup> Onsa paiqmatowara anehe mó ahrárígáúnká sure o menáhwénsábé, Onsa siito urowana

<sup>12</sup> o menáhwénká sensabé, Ahqáho éna, Ite íre tagaríoge uraire.

<sup>13</sup> Mina uronserahniyehboq íné túóna wehekáhnkákáq áhwahakáq itega íre tagaríah púaq kawerue níwénunoro úwe.

*Móne átárlarainsabé pabeqme ehwéhne.*

(Árúka 19.11-27)

<sup>14</sup> Sísaga mó mahraréna, Íné túónawe teiú wéhgá miraurainserahne. We anotah wahnáh ánínéna mó ke su wahpeq pokina uraitaq wene arambehri ke síáhrabéna móne átárlageheéna síátáire.

<sup>15</sup> Sene sánsánsábé iwíáhue tagéna síátáire. Mó aní 5 táchuséni (5,000) Kína awena mó aní 2 táchuséni (2,000) Kína awena mó aní 1 táchuséni (1,000) Kína awena se suena pokuraire.

<sup>16</sup> Pokurairana 5 táchuséni Kína átárlarai anínká apubúue mi monéráté paiqmaq paiqmarurainsabé mó 5 táchuséni Kína meraire.

<sup>17</sup> Mira urainserah 2 táchuséni Kína átárlarai anínká mi monéráté paiqmaq paiqmarurainsabé mó 2 táchuséni Kína meraire.

<sup>18</sup> Merairana 1 táchuséni Kína átárlarai anínká wene wahnahne móne mewena marakó ubuqme mi moné maisawe kopéq sutaire.

<sup>19</sup> Íre wahto tanahráq parabagurairana sene wahnahnka kouwekéna sega átárlaro moné kaweraranieéna síáhraburaire.

<sup>20</sup> Síáhraburairana 5 táchuséni Kína merai anínká átárlarai monéákáq mó 5 táchuséni Kínaakáq mewena sure wene wahnahnsabé, Arene 5 táchuséni Kína átárlómé mi monéráté paiqmaq paiqmaruraunsabé mó 5 táchuséni Kína matíoge urairana

<sup>21</sup> wene wahnahnka wensabé, Kaweróne. Arewe kawerue tábúsoqme arámbéhríona aní móne. Arega pehgáriq naneq tábúsoq marahnayabé, Áhntetaq wahnahnúno ataníe. Arereq ínéreq moráráq iwíáh iwíáhoyehe uraire.

<sup>22</sup> Urairana 2 táchuséni Kína merai anínká átárlarai monéákáq mó 2 táchuséni Kínaakáq mewena sure wene wahnahnsabé, Arene 2 táchuséni Kína átárlómé mi monéráté paiqmaq paiqmaruraunsabé mó 2 táchuséni Kína matíoge urairana

<sup>23</sup> wene wahnahnka wensabé, Kaweróne. Arewe kawerue tábúsoqme arambehrióna aní móne. Arega pehgáriq naneq tábúsoq marahnayabé áhntetaq wahnahnúno ataníe. Arereq ínéreq moráráq iwíáh iwíáhoyehe uraire.

<sup>24</sup> Urairana 1 táchuséni (1,000) Kína merai anínká sinehe sure wene wahnahnsabé, Arewe págege wahnáh aní móne. Íre arega uqmarahna naneq mewe meweóne. Íre arega suitabarahna naneq mewe meweóne.

<sup>25</sup> Arene sánsá tagarió púana arene mónewe marakó ubuqme maisawe kopéq sutauge. Umah. Arega niátóna moné meyo uraire.

<sup>26</sup> Meyo urairana wene wahnahnka wensabé, Íre kaweróne. Arewe taoraho íre kaweq arámbéhríona aní móne. Arega ínénsabe, Íre arega uqmarahna naneq mewe meweóne. Íre arega suitabarahna naneq mewe meweóne eno?

<sup>27</sup> Néne sánsá tagariahna puah aneqsabé néne íntárlarona moné péniipéq íre matono? Mirauronaraq tahirímé kouwekutaq mi monéákáq pénkiraq wahnahno kegá áwíra monéákáq náiená irino uraire.

<sup>28</sup> Mi wahnáhnká wene arambehri keyábé, 1 táchuséni (1,000) Kína matiéh áníné móne mewe 10 táchuséni (10,000) Kína matiéh ání náwero.

**29** Áhnte matiéh ání móñkakáq awenana íregáritaq matiankehe. Tabonah aniné matiéh náneq meyanie.

**30** Mah taoráhó árámbéhrí ánime táhtoqme máhpeq sunkíkírirabeq átahro. Mitaq moke míah kégá ibiséra uwo uwo oneherawoe úwe.

### *Wehukení úku anínká mókake wehuke sainsue ehwehne.*

**31** Sísaga mó mahraréna, Ínéga wehukení úku anínká téhreh naneqkakáq íópeqté kéreq túónaraq wahnahnérapeq tútuue págegeue wahnahninie.

**32** Tútuue wahnahnonaraq moke mah kehiná kékhná niuranabiahtapeq seiriwe míagehe. Iriwe míéhrataq sainsuqme téhtaré túiná araníe. Ménkámehnkáne abowágá wene ka saraqme sipisípiq mó tuiná arena mémewe mó tuiná áréhnserah mah kehiná kékhná mina tahnsanue saraqmaraníe.

**33** Sipisípiq wene ayah púpeq mó tuiná arena mémewe ayahnapeq mó tuiná áréhnserah mah kehiná kékhná mina tahnsanue saraqmaraníe.

**34** Saraqmarena íné anotah Wahnáh áninká niyah púpeq míéhra keyábé, Nániboga kawerowe aitéh kéo, wega wahnah wahnahnirabeq kaweq matábúrapéq sewiáhro. Mah marákó márákó íre mirarotaq ite míageheéna mah matábú kawerarowe.

**35** Íné nirupibiuraitaq itega kirabo aintárówe. Íné tahbobóuraitaq itega wání náníátówe. Íné wáhnaupéqté ání míarautaq itene nahtapeq mehweh aintárówe.

**36** Íné ninerineré naneq íre káráitaq itega náníátówe. Íné nu wahreurautaq itega soberurowe. Íné karábúsiipéq míarautaq itega íné seragarowe teiníe.

**37** Mina kaweqlaq míéhra kegá ínénabe, Itene Wahnahno, are arupibiuraitaq árahtaq kirabourauno? Are tahbobóuraitaq árahtaq wání náwátáuno?

**38** Are wáhnaupéqté ání míaronaraq itene nahtapeq árahtaq mehweh ataráuno? Are aneraneré naneq íre káráitaq árahtaq náwátáuno?

**39** Are awahreuronaraq itega árahtaq soberurauno? Are karábúsiipéq míaronaraq itega árahtaq koragarauno éq kasenigehe.

**40** Kasenirakake íné anotah Wahnáh áninká mahrarinie. Teiníboq írátíáhro. Itega nánuwahrah aní pehgáriq aní mina tahnsa atárótaq itega íné moq mina tahnsa aintárówe inie úwe.

**41** Sísaga mó mahraréna, Anehe tanahráq ínéga niyahnapeq míéhra keyábé, Nániboga íre kawerowe aitéh kéo, íné nueq ahriahri teh iráípéq kowíáhro. Owainawanseq we kéráh íópeqté kéreq mitaq míageheéna Manikánka mi irá parearowe. Mitaq kowíáhro.

**42** Íné nirupibiuraitaq itega íre kirabo aintárówe. Íné tahbobóuraitaq itega wání íre náníátówe.

**43** Íné wáhnaupéqté ání míarautaq itene nahtapeq íre mehweh aintárówe. Íné inerineré naneq íre káráitaq itega íre náníátówe. Íné nu wahreurautaq itega íre soberurowe. Íné karábúsiipéq míarautaq itega íné íre seragarowe inie.

**44** Segá ínénabe, Itene Wahnahno, are arupibiuraitaqmé tahbobóuraitaqmé wáhnaupéqté ání míaronaraqmé aneraneré naneq tabonahuronaraqmé awahreuronaraqmé karábúsiipéq míaronaraqmé itega are tagéq árahtaq íre séhréh ataráuno éra kasenigehe.

**45** Kasenirakake íné Wahnah áninká mahrarinie. Teiníboq írátíáhro. Itega nánuwahrah aní pehgáriq anínsábé ahqáho atárótaq itega íné moq ahqáho aintárówe teriníe.

**46** Terienara mi kegá ahriahri teh iráípéq pokirara kaweqlaq míah kégá oga mérapeq awaq miagéhe úwe.

<sup>1</sup> Sísaga moke mah ehwéh síwáhnoruena ite we kéráhwána keyábé,

<sup>2</sup> Téhtaré wéhékáh sótaikúwana apahtárórág sótaikú iahreraq ko tánáhráq\* sinae. Minayabe ahtebahwe. Mi tanáhráq íné wehukení úku aní awankátaq táchparageheéra móintagéhe úwe.

<sup>3</sup> Mi tanáhráq Manikáne ehweh mibeq mahbeq arítáh kéreq Asiu kené aboawah wehreqka wahnah aní wenawíq Káiyápásane nahtapeq momiwíuwe. Káiyápásawe Manikáne ehweh mibeq mahbeq arítáh kéné wahnahne.

<sup>4</sup> Mi kegá sío síoéra, Sísawe árahue epéq táhtoqme mósubiq suanéhkono íwíáhuwe.

<sup>5</sup> Mira íwíáhéra, Áhnte wehekéqká táchutahurirataq ehwehéra tobehiyehboq Sísapehrganehe uwe.

*Peh morá ínínká Sísane ayahqnopeq wéri abaq ato ehwéhne.*

(Mákha 14.3-9; Sóni 12.1-8)

<sup>6</sup> Pétáni su wahpeqte ání Sáímóniwe anotah nao wagú anine. Minayabe mó kegá, Náonakaq Sáímónie ue wéhuwehu áwíratówe. Sísaga Pétáni su wahpeq ména mi aníné nahtapeq

<sup>7</sup> táchutahuríwana peh morá ínínká áhnte moné tahnsa wérí ano antéhyá mewe sure Sísane ayahqnotaq antiatowe.

<sup>8</sup> Antiatowara ite Sísapehrganehe áhnte moné tahnsa wérí ano antéhyá mewe sure Sísane ayahqnotaq antiatowe.

<sup>9</sup> Íre pehipi antiatéhtáq tahirímé mi werí pailqme áhnte moné mewena tabonah ke nári irino ewane.

<sup>10</sup> Ewanana Sísaga itene ehweh irena itensabé, Aneqsabé mi inínsábé awehgu ataho? Wega mira aintéh sánsámé kaweq sansáne.

<sup>11</sup> Tabonah kewe ahriahri iteba mía míowe. Ínémé ahriahri iteba íre mía míainie.

<sup>12</sup> Íné maisarageheéna mi inínká ninonkataq wéri anti aintena kaweraintéhre.

<sup>13</sup> Teiníboq íratiáhro. Kawaq ehwéh mah marákó mårákó teri terinirataq wega amahnága mirai naneq ehwehnkákáq terigéhe. Terírataq íréhra kegá wéri abaq intéh inínsábé íwíáhigehe úwe.

*Súrasaga wahnah keyábé, Ite meiqmena Sísaba móitaníe ú ehwéhne.*

(Mákha 14.10-11; Áruká 22.3-6)

<sup>14</sup> Ite Sísapehrganehe ke airápété téhraníté míahwane. Itebaté ání wenawíqtare Súrasa Isíkáriótie. Wega Manikáne ehweh mibeq mahbeq arítáh kéká pokue

<sup>15</sup> sensabé, Sísapehrganehe méáuwáhnaraqmé aneq nánianéhbo úwara wega mirainkeheéra sega 30 ebáh mórite tanahráqsábé íwíáhue kabarúwe.<sup>†</sup>

<sup>16</sup> Náwúwana wega se Sísaba mórite tanahráqsábé íwíáhue kabarúwe.

*Sísareq we kéró kerekka morárág táchutahuru ehwéhne.*

(Mákha 14.12-21; Áruká 22.7-14,21-23; Sóni 13.21-30)

<sup>17</sup> Íre múi párétí né tanahráq súwe. Mi tanáhráq ebeqte wéhékáh ite we kéráhwána kegá Sísaba séq wensabé, Sótaikú tanahráq iahreraq kéká táchutahuru nankehboq eheq kogaweratanéhkono ue kasanowane.

<sup>18</sup> Kasenowanana wega peh morá ánínsábé íwíáhena itensabé, Sarúsarama su wahpeq teiátáu anípá pokue wensabé, Íwáhnori anínká mahraréna, Íné tanahráq aíq sire. Ínéreq íné séníráh kerekka arene nahtapeq sótaikú tanahráq iahreraq kéká táchutahuru nanehe ire koreawéro úwe.

\* **26:2:** Sótaikú sihreraq ko tanahráqsábé ehwéhmé píku anehepeqte séhíramé “Manikáne Píkuipéq Kék Áwahe Éhwéhne” ue kékátagáhno. † **26:15:** Mi 30 ebáh móritewé árahue monébómo. Itega íre tagarione. Wehukega íwíáhéra ákáhtaq áhnte monée íwíáhowe.

**19** Koreawéro úwaq itega mi ehwéh sehgieq mitaq sótaikú tanahráq iahreraq ko tahutáhúq kawerarahwáne.

**20** Ío tupekútaq Sísareq ite airápété téhraníté we kérähwána kereqka tútuue táchutahuwane.

**21** Táchutahuwaranaraq Sísaga itensabé, Teiníboq írátiáhro. Ite míáhrabeqte áninká néne naruo kowerirankéhe úwaq

**22** ite we kérähwána kegá ireq irupipeq umeh agúwe. Umeh agúwaq ite morání moráninkáue Sísansabé, Néne Wahnahno, arega ínénsabe irareno ue kasenowane.

**23** Kasenowanana Sísaga itensabé, Ínéreq moraráq páréti wahba parétahípéq pámbáhuya anínká néne naruo kowerirankéhe.

**24** Kowerirahnaraq Manikáne ehwehnka aiq irarinserah íné wehukení úku aní pukinie. Néne naruo kowerirahna aní anotahtaq kamah awinawire. Wenanoga we íre maqmiotaq tahirímé aiq kaweri irino úwana

**25** Súrásá Sísane naruo koweriranaú anínká wensabé, Íwáhnoraníno, arega ínénsabe irareno úwana Sísaga wensabé, Arerega aiq iraréne úwe.

*Sísaga párétiakáq sera ano ko kahpúákáq náriu ehwéhne.*

(Máhka 14.22-26; Árúka 22.15-20; 1 Kórína 11.23-25)

**26** Itega táchutahuwaranaraq Sísaga páréti mewena Manikánsabe kaweróne atena keqme ite we kérähwána ke náiena itensabé, Mahnawé niwaq mire. Nahro úwaq nahwane.

**27** Nahwanana náhníáq sera ano ko kahpú mewena Manikánsabe kaweróne atena náiena itensabé, Itega ómiga moke nahro.

**28** Néne korahq mire. Néne korahq tuinaga itereq áhnte mó kereq Manikánka insahwé aitena itene ahbabáq kaweraitankéhe.

**29** Teiníboq írátiáhro. Náhníáq sera ano mahtaq mó íre nanie. Mókake Nániboga wahnah wahnahnirabeq itereq o será ano nanehe úwe.

**30** Itega Manikánsabe iwíáh íwíáh igonkónéq máhpeq tueyokéq Óríwi sawéhrápéq pokowane.

*Sísaga Pítansabé, Íné nuwaniewóné ú ehwehne.*

(Máhka 14.27-31; Árúka 22.31-34; Sóni 13.36-38)

**31** Sísaga itensabé, Manikáne ehwehnka mahraréna, Ínéga sipisípiq Wahnáh subiq súáhnaraqmé moke sipisípiqmarínká kobeq séberigehe ire.

(*Sekaraia 13.7*)

Mi ehwéhnká irarinserah ibora ínókáhpéq ite ómiga íné nueq kobeq séberigehe.

**32** Manikánka íné organúq intahnaraq Kehrari marákórápéq ebeq konaq inehe sigehe úwe.

**33** Úwana Pítaga Sísansabé, Ómiga are áúwéhrataqmé ínéga íre auwanauge úwana

**34** Sísaga wensabé, Teawiníboq írátiáhno. Ibora ínókáhpéq kokórega ehwehnina ínaraq arega íné íre tagarióge apahtáróráq irariniewóné úwe.

**35** Úwana Pítaga wensabé, Mó kegá arereq ínéreq iubiq íuwéhrataqmé ínéga, Are aiq tagarióge atanauge úwaq moke ite Sísa kérähwána kegá Pítaga irarú serahnowane.

*Sísaga Késémáni matábúráq kobúrerú ehwehne.*

(Máhka 14.32-42; Árúka 22.39-46)

**36** Sísareq ite we kérähwána kereqka mitaq sueq Késémáni matábúráq pokowane. Sísaga itensabé, Ite mahtaq tútuue míehrana íné móbeq kobúrerono éna

**37** Pítareq Sébérine ahninkáwáráréreq móbeq móritowe. Móritena wene arupipeq anotah uméhue págege agúwana

**38** wega sensabé, Nirupipeq anotah uméhinka pukorahuge. Mahtaq tótuméq tagariáhro éna

<sup>39</sup> se suena wahtotaq móbeq pokéna marakóraq káuqmunue ména púrerúwe. Púrerue mahraréna, Nániboo, are awahbáhnaraqmé nirupipeq umehi naneq menuwahráhóne. Íre íné nu wahbeh sansá peh are awahbeh sansánúno ue púrerúwe.

<sup>40</sup> Púreraruena we kéró anitóbá kouwekúwara sugówana tagówe. Wega Pítarehyabe, Pehgáriq tanáhráq árahinsabé íre tótuméq tagariaho?

<sup>41</sup> Iteiyuwanka kaweq sansánsábé su wahbehre. Peh itene inonka mareqmareréq íre miraorahowe. Owainawanka ahbabáq aitehnehboq tótuméq púreroro úwe.

<sup>42</sup> Púreroro éna mónkakáq se suena kobúrerúwe. Púreréna mahraréna, Nániboo, nirupipeq umehi naneq íre menuwahnayabé are awahbeh sansá sehginie úwe.

<sup>43</sup> We kéró anitóbá mó kouwekúwara anotah mukúqmáhkúru puara se peh sugówe. Sugówana tagéna

<sup>44</sup> Sísaga mó nkakáq suena pokue apahtáróráq monseráhnue púrerúwe.

<sup>45</sup> Púreraruena seba kouwekúwara sensabé, Ite peh ahrenaneheéq sugaho? Írátíahro. Íné wehukení úku anípá ahbabáq ke kowerire tanahráq aiq sire.

<sup>46</sup> Pokonehboq irigoro. Tagahro. Néne naruo koweriréh áninká aiq sire úwe.

### *Súrásaga Sísane naruo koweriro ehwéhne.*

(Máhka 14.43-50; Árúka 22.47-53; Sóni 18.3-12)

<sup>47</sup> Sísaga ehwehnútaq Súrásá we kéró anínká súwe. Manikáne ehweh mibeq mahbeq arítáh kéreq Asiu kené aboawah wehreqka áhnte mó ke eqmaq súowara sega pokamarinkákáq sahmárinkákáq Súrásareq moraráq suwe.

<sup>48</sup> Seneherautaq koweriro anínká su ke teriena, Ínéga nánkóqnahna anímé Sísa wire. We táhtoráhro úwe.

<sup>49</sup> Minayabe Súrásaga Sísaba apubúue séna wensabé, Íwáhnoraníno, aiq míahno éna nánkóqnówe.

<sup>50</sup> Nánkóqnówana Sísaga wensabé, Néne iyahnabo aníno, arega mirainie íwíahóna naneq apubúue miraúno úwara wereq su kegá Sísa ambubuuue táhtotíowe.

<sup>51</sup> Táhtotíowana Sísareq mío anínká wene poka mewena Manikáne ehweh mibeq mahbeq arítéh áníné arambehri aní apiwe wene ahre kiraq auwowe.

<sup>52</sup> Kiraq auwowana Sísaga wensabé, Arene poka sabiruo. Itega ebeho naneq mewe ebehirataq mó kegá mi naneqtaté iubiq suagéhe.

<sup>53</sup> Nánibonsabé, Séhréh ainto teawútáq tahirímé séhréh aintanieéna áhnte íopeqté ké ínéba eqmaq súéh irino. Minayabe íre ahtebaho?

<sup>54</sup> Ínéga mina tahnsanutaq tahirímé íné pukonayabé Manikáne ehwehnka árahue aiq pútaragi iripo úwe.

<sup>55</sup> Sísaga weba su keyábé mahraréna, Aneqsabé aebó ání táhtoráhnserah pokankakaq sahnkákáq íné meniraneheéq seo? Mó wehekáh mó wehekáhnue Manikánsabe iwíah íwíah atáh náhtápéq tútuue íwáhnorurautaq mi tanáhráq itega íné íre táhtotiarowe.

<sup>56</sup> Manikáne ehweh iraru kegá sehiranu ehwéh aiq pútaraginkeheéq miraowe úwaq ite we kérähwána kegá Sísa auweq pehbeheráh pokowane.

### *Wahnah kegá Sísa ehweh ató ehwehne.*

(Máhka 14.53-65; Árúka 22.54-55, 63-71; Sóni 18.13-14, 19-24)

<sup>57</sup> Mi tanáhráq Manikáne ehweh mibeq mahbeq arítáh kéné wahnahme wenáwíq Káyápásae. Mósí sine ehweh síwáhnoro kereq Asiu kené aboawah wehreqka Káyápásane nahtapeq momiwíue míowe. Momiwíue míowara Sísa táhtoró kega we meqmera Káyápásane nahtapeq móatówe.

<sup>58</sup> Se mótaq we mótarue Pítaga sinehe kaqme kure nahnoerápéqté mátábúráq párisiwarí máhpeq tútuue míorabeq kéna sega Sísa aneronehrabomo éna taganieéna tútuue míowe.

<sup>59</sup> Sísa subiq suaneheéra Manikáne ehweh mibeq mahbeq arítáh kéréq moke mó kaunsírí kéréqka Sísansabé péhe éhwéh atéhra keyábé kabaruwe.

<sup>60</sup> Kabaruwara áhnte kegá iriwe méra péhe éhwéh teríúwe. Sega teríú ahbabáq Sísa íre subiq suahráhu ahbabáre. Sinehe mó anítégá iriwe méra mahraréra,

<sup>61</sup> Mah anímé aiq mahraréna, Ínéga Manikánsabe iwíah íwíah atáh náh sokoruqme apahtáró wéhékáh mó pearahráhuge uraire uye.

<sup>62</sup> Uyana Manikáne ehweh mibeq mahbeq arítáh kéné wahnahnka iriwe ména Sísansabé, Mi anítégá iraréya ehwéhmé arega íre terieráhono? Sene ehweh aiq pútaq éhwéhpo úwana

<sup>63</sup> Sísaga íre iraria peh ehiya míowe. Peh ehiya míowana wega Sísansabé, Maniká oga mía míai anínká tagariéhtáq pahsuqme teio. Manikánka ite Asiu ke meirena kaweraitankeheéna peh morá ání omaq atowe. Arewé mi anípo? Arewé Manikáne ahninkáwábo? Pahsuqme teio úwana

<sup>64</sup> Sísaga wensabé, Arege aiq iraréne. Teiníboq írátíáhro. Íné wehukení úku aní Manikáne ayah púpeq tútuue ména íopeq írábúyápipeqté tuonaq tagagehe úwe.

<sup>65</sup> Úwana Manikáne ehweh mibeq mahbeq arítáh kéné wahnahnka mi ehwéh irotaq abiahnsanú púana wene korósi subansuena mahraréna, Manikánsabe íre kaweq ehwéh atéhre. Minayabe mó keyábé móme íre kasenoro. Ahqáho. Wega Manikánsabe íre kaweq ehwéh atéhraq íráhwe.

<sup>66</sup> Minayabe aneratanéhnkono úwara sega wensabé, Wega ahbabáq ehweh aiq irari puaq subiq suo atanéhe uwe.

<sup>67</sup> Táhmaro kegá Sísane auranabiah tehqni atera siyahitate subiqmárówe. Táhmaro mío kega we siyahpóra subera wensabé,

<sup>68</sup> Are Manikánka omaq ato aníninaraqmé are subiqmaréh ání insebo? Teio uwe.

### *Pítaga, Sísa íre tagarióge ú ehwehne.*

(Máhka 14.66-72; Árúka 22.56-62; Sóni 18.15-18,25-27)

<sup>69</sup> Pítawe máhpeq mátaburapeq tútuue míowana arambehri ahrárigá weba séna wensabé, Are Kehrari marákórápéqté ání Sísareq míarone úwe.

<sup>70</sup> Sísareq míarone úwana ómiga írátíótaq Pítaga ahqáho atena mi ahráryábé, Arege iraréna ehwéhmé íre ahteboge éna

<sup>71</sup> mitaq suena ogesáh ogesáhraq kowíowe.

Kowíowana mó arámbéhrí áhrárigá we tagéna wereq mío keyabé, Mah anímé Sísa Néhsara suwahpeqte ánínseq míaraire úwe.

<sup>72</sup> Úwana Pítaga mó ahqáho atena, Pópoqnahga tagariéhtáq aiq pútariahnsanuge éna, Arege iraréna anímé íre tagarióge úwe.

<sup>73</sup> Mótaq tahnsa mitaq mío kega Pítaba séra wensabé, Arereq wereqne ehweh peh morá éhwéh púa are wenawahrah ání móne uwana

<sup>74</sup> Pítaga ehbonéna mahraréna, Pópoqnahga tagariéhtáq itega irare anímé íné íre tagarióge. Ínéga péhe éhwéh teawénaraqmé Manikánka íné nubiq suankéhe úwana kokórega ehwehnúwe.

<sup>75</sup> Kokórega ehwehnúwana Sísaga teawu éhwéh Píta ahreraq konsabe iwíahúwe. Mi éhwéhnúmé, Kokórega ehwehnina ínaraq arega íné íre tagarióge apahtáróráq irariniewóne úwe. Kokórega ehwehnútaq Pítaga mi éhwéh iwíahéna máhpeq tueagéna anotahtaq ibisówe.

### *Sísa meqmera Páhírátilba móátó ehwehne.*

(Máhka 15.1; Árúka 23.1-2; Sóni 18.28-32)

<sup>1</sup> Ahbiahipeq moke Manikáne ehweh mibeq mahbeq arítáh kéréq Asiu kené aboawah wehreqka Sísá subiq súéhra ewhéh sío síoéra

<sup>2</sup> wene ayahnkaratáq nágáqtate táhru táhrue meqmera anotah wahnáh ání Páhírátiba móatówe.

*Súrása páríkirio ehwéhne.  
(Eqmaro 1.18-19)*

<sup>3</sup> Súrása Sísane naruo koweriro anínká mina tagéna, Íre kawerurauge íwíáhéra wega meyo moné, 30 ebáh móné mewena Manikáne ehweh mibeq mahbeq arítáh kéréq aboawah wehreqpa sure sensabé,

<sup>4</sup> Kaweqtaq míai aní ahbabáratewóge úwe. Úwara sega wensabé, Íre itereq wehgaq míre. Arerene wíre uwana

<sup>5</sup> Súrásaga mi moné Manikánsabe iwíáh íwíáh atáh náhúpéq móruparuena tueyokue wewe móbárikiriowe.

<sup>6</sup> Manikáne ehweh mibeq mahbeq arítáh kégá mi moné mewera mahraréra, Mah monéwé wehukení subiq sueyabe móné púaq Manikánsabe iwíáh íwíáh atáh náhtápéqté mónekáq moraráq íre maranéhe uwe.

<sup>7</sup> Segá sío síoéra wáhnaupéqté ké maisaraneheéra téh marakóráté párétah mirao marákó mi monéráté paiqmarówe.

<sup>8</sup> Segá paiqmárónsabe wehukega mi marákoyábé Korahq Marákóe ue áwírarówe. Amahnágaákáq mi awíq peh kékre.

<sup>9</sup> Manikáne ehweh irarú ani wenáwíq Sérémáíaga naho mahraréna, Ísara kegá wehukení paiqmaraneheéra 30 ebáh móné omaq matowe.

<sup>10</sup> Maniká néne Wahnahnka tenínsarah sega mi monéráté téh marakóráté párétah mirao marákó paiqmáráhwé úwe *(Jeremaia 11.12-13)*

*Páhírátiga Sísansabé kasenú ehwehne.*

*(Máhka 15.2-5; Árúka 23.3-5; Sóni 18.33-38)*

<sup>11</sup> Segá Sísá anotah wahnáh ání Páhírátiba móatówana wega wensabé kasenéna, Arewé Asiu kené Wahnahpo úwe. Úwana Sísaga wensabé, Arege aiq iraréne úwe.

<sup>12</sup> Manikáne ehweh mibeq mahbeq arítáh kéréq Asiu kené aboawah wehreqka Sísá ehweh atówana sene ehweh íre ayahqmarena peh ehiya míowe.

<sup>13</sup> Peh ehiya míowana Páhírátiga wensabé, Segá ehweh atáh éhwéhmé íre irahno úwana

<sup>14</sup> Sísaga Páhírátine ehweh moq íre ayahqme teawuwe. Íre ayahqme teawunsabe Páhírátiga áhtenéna iwíáh kikirúwe.

*Páhírátiga, Sísá awankátaq táhparáhro ú ehwehne.*

*(Máhka 15.6-15; Árúka 23.13-25; Sóni 18.38-19.16)*

<sup>15</sup> Anotah tahutáhúro tanáhráq mó opéq mó opérue karábúsiipéqté ání Asiu kegá pugeqio teawú ani Páhírátiga pugesuaq pugesuarúwe.

<sup>16</sup> Mi tanáhráq ahbabáq ani wenáwíq Páréhba karábúsiipéq míowe.

<sup>17</sup> Áhnte Asiu kegá Páhírátiba suwana wega sensabé, Páréhba pugeq auwanínkono? Sísá Manikánka omaq atena eqmaréhre e aní pugeq auwanínkono? Inse pugeq auwanínkono kasenúwe.

<sup>18</sup> Kasenéna iwíáhéra, Manikáne ehweh mibeq mahbeq arítáh kégá, Sísaga ite kiotakineho éra abiahnsa atáh púara ínéba meqme sewe íwíáhúwe. Mira íwíáhú púana wega sensabé, Inse pugeq auwanínkono úwe.

<sup>19</sup> Páhírátiga kotiorabeq wahnahnúwana wene ahrega ehweh eqmarena mahraréna, Asiu kegá ehweh atáh ánínsábé inokáhpeq áónáhéra nirupipeq áhnte uméhirana tagoge. Minayabe mina kaweqtaq míai aní pehragato úwe.

**20** Manikáne ehweh mibeq mahbeq arítáh kéréq Asiu kené aboawah wehreqka míó keyabé pagu pagunéra, Mah ewhéh Páhíráti koreawéro. Wensabé teaweq, Páréhba pugeq auwe Sísa subiq suo ue koreawéro éra pagu pagunuwara míó kega, Páréhba pugeq auwo uwe.

**21** Uwana Páhírátiga mónkakáq sensabé, Mah aníté inse pugeq auwaníkono úwara ómiga, Páréhba pugeqio uwana

**22** Páhírátiga sensabé, Sísa Manikánka eqmaréhre e anímé anerataníkono úwe. Anerataníkono úwara sega wensabé, Awankátaq táhpawé subiq suo uwana

**23** Páhírátiga sensabé, Aneqsabébo? We aneq ahbabáriro úwara sega ehweh kikiréra, Awankátaq táhpawé subiq suo uwe.

**24** Uwana Páhírátiga iwiáhéná, Mahtaq míah kégá néne ehweh íre irah púana anotah tobéhiyehboq túbáh aginie. Túbáh aginie éna wehukega tagaríotaq wání antehya mewe wene ayahnkara pabeq paberuwé. Pabeq paberaruena sensabé, Tagariáhro. Mah aní subiq sue iwiáh íre néne peh iteitene iwiáh wíre úwe.

**25** Úwara moke míó kega mahraréra, We subiq súéhranka itereq itene animárínseq kamah ainawire uwe.

**26** Minayabe Páhírátiga Páréhba pugeq auwena Sísa áréti sahtáté subóro aritena sóntia kegá awankátaq táhpawé subiq suageheéna siuwe.

*Sóntia kegá Sísansabé awiréh ató ehwehne.*

(Máhka 15.16-20; Sóni 19.2-3)

**27** Páhírátine sóntia kegá Sísa meqmera wahnah anínká ehwehúrabeq kibekue móatera ómi mó sóntiá ké síáhrabuwara Sísa momiwiúrówe.

**28** Momiwiéra moke wene korósí ugurú auwera peh morá tautáúq korósí abaq atera

**29** Ógaratáté keborarerá wene ayahqnotaq suki atówe. Suki atera wiahnókara wene ayah púpeq atera wene auranabiahtapeq sirehunseraráq méra wensabé péhepehe iwiáh iwiáh atera awiréh atówe. Awiréh atera wensabé, Aiq míahno? Arewe Asiu kené Wahnah mone\* éra

**30** tehqni atera wiahnó sahtáté ayahqnotaq subiqmarera

**31** awiréh atówe. Awiréh atera abaq ató korósí akai auwera wewene korósí suki atera awankátaq táhparaneheéra meqmera pokuwe.

*Sísa awankátaq níriraté táhparó ehwehne.*

(Máhka 15.21-32; Árúka 23.26-43; Sóni 19.17-27)

**32** Sóntia kegá Sísa meqmera awankátaq táhparanehera urabeq pokue Sáíríni marákórápéqté ání wenáwíq Sáimóni piehgíútaq saiqnatera, Sísa táhparéhra awánkámé abaqme kúno atónsabe abaq mena kúwe.

**33** Segá pokue Kógóta sawéhrápéq kíúwe. Mi sawéh áwíqmé áwahewé wehukení ayahqno tánúnsutapére.

**34** Mitaq segá íre érorahi kítabeh maráhsíní mewera náhníáq sera anopipéq sombirahue Sísa náwúwana nawe tagéna ahqáho éna íre nówé.

**35** Íre nówara sega we meqmera awankátaq níriraté wene ayahnkaratáq subiqmaq aigárátáq subiqmarue táhparera awanká pankeqme marakóipeq pearówe. Pearera, Wene korósí insega meyanabomo éra saraq mianeheéra káhsieu saraqme meyówe.

**36** Saraqme mewera tútuue méra Sísa awahnkanuwe.

**37** Ehweh átó ehweh kanehraq sehiranuwara wene ayahqno abobóráhpeq awankátaq táhparówe. Mi sehiránká mahraréna, Mah anímé Sísa Asiu kené Wahnahne úwe.

\* **27:29:** Anotah wahnáh áninká aneranerinserah Sísa aneraneratówe. Mi tanáhráq anotah wahnáh kégá tautáúq korósí sukiera wahnah ayáhúq sukiera sene síahraq tútuue méra wiahnó kara tahnsa náneq siyah púpeq táhtotawéra wahnahnowe.

<sup>38</sup> Sísa awankátaq táhparórabeq aebó áníté moq awankátareráq níri pewe táhparéra pankeqme ayehré ayehré pearówe.

<sup>39</sup> Pearówara mitaq sótaiku kegá Sísa tagéra awiréh atera sinuo kóbiq kóbiréra wensabé íre kaweq ehwéh atówe.

<sup>40</sup> Íre kaweq ehwéh atera mahraréra, Manikánsabe iwíáh iwíáh atáh náh sokoruqme apahtáróráq mó pearahráhóna aníno, arere sérehúno. Oga míankehboq marakóipeq tueagúno. Arewé aiq pútaq Manikáne ahninkáwá inaraqmé maraipéq tueagúno éra awiréh atówe.

<sup>41</sup> Awiréh atówara Manikáne ehweh mibeq mahbeq arítáh kéreq Mósísine ehweh síwáhnoro kereq Asiu kené aboawah wehreqka Sísansabé moq awiréh atówe.

<sup>42</sup> Awiréh atera mahraréra, Wega mó ke kaweraritena peh wewe íre kawerorahire. Wega, Íné Asiu kené Wahnah muge iwíáhire. Wega marakóipeq tueagínaq tagéq wensabé aiq pútare atanéhe.

<sup>43</sup> Wega, Íné Manikáne ahninkáwá úge éna Manikánka séhréh aintankéhe iwíáhire. Manikánka wensabé arutaboirínaraq seséhréh atanae éra awiréh atówe.

<sup>44</sup> Aebó áníté awankátaq táhparó anitégá moq íre kaweq ehwéhnéra Sísansabé awiréh atóye.

### *Sísa pukú ehwehne.*

(Máhka 15.33-41; Árúka 23.44-49; Sóni 19.28-30)

<sup>45</sup> Wéhékáhnabubu moke mah marákó márákó sunkíkíragúwana íó tunsorerutaqkakáq peh sunkíkíratiowe.†

<sup>46</sup> Tunsorerutaq Sísaga wewene ehwehtaq Wenabonsabé anotahtaq mahraréna, Írói, Írói, tahmah sabáhtahnie úwe. Mi ehwéhnúmá, Nániboo, Nániboo, aneqsabé íné nuwahno úwe.

<sup>47</sup> Úwara táhmaro iriwe míó kega irera mahraréra, Éráísansabé áhrabire uwe.

<sup>48</sup> Mibeqté áninká pehbeheráh sehenáh tahnsa náneq mewena kítabeh nah naneqpipéq pámbáhue sehikaratáq maqme pankeqme Sísaga píbíra nankeheéna awuwe.

<sup>49</sup> Awutaq mó kegá, Peh áwé tagahro éra, Éráísaga segaweratanabiramo. Taganehe-qmúne uwana wenawa kieyokúwana

<sup>50</sup> Sísaga mónekakáq anotahtaq ehwehnéra wenawa Maniká awena putiowe.

<sup>51</sup> Putiotaq Manikánsabe iwíáh iwíáh atáh náhtápéqté páráhnkéq tahnsa ónsá senahpeqté subame tunse téhtaré úkúwe. Téhtaré úkúwana máriúwana ebahmarí parebare agúwe.

<sup>52</sup> Parebare agúwana maisaró oná sigúwe. Sigúwana Manikánsabe aiq pútare atera puku weh áhréné sinonka Manikánka iriritena organúq sitowe.

<sup>53</sup> Maisiapípétá kie irigéra anehe Sísa organúkútaq mi kegá Sarúsarama suwahpeq pokuwara áhnte mó kegá tagowe.

<sup>54</sup> Máriúwara sóntia kereq sene kiápéténireqka minaakaq moke mó naneqmarínkákáq tagéra anotah ahrééra mahraréra, Mah anímé aiq pútaq Manikáne ahninkáwá wíre uwe.

<sup>55</sup> Sísa íre putiotaq Kehrari marákórápéq suena pokútaq áhnte mó inínsónká we séhréh ataneheéra kérówe. Sísa putiotaq mi ahrérónká móbeq iriwe méra awahnkanuwe.

<sup>56</sup> Mágára suwahpeqte íní wenáwíq Máhríae. Wenaogo Máhríawé Sémísireq Sósépareqne sinowae. Mi inítéreq Sébérine ahninkawáráréné sinowareqka moq iriwe méra awahnkanuwe.

### *Sísané anonka maisé onápípétá maisaro ehwehne.*

(Máhka 15.42-47; Árúka 23.50-55; Sóni 19.38-42)

<sup>57</sup> Árimátéa suwahpeqte ání wenáwíq Sósépae. We áhnte monéákáq ánínéna Sísansabé aiq pútare atowe.

† 27:45: Wéhékáhnabubume Písíni ehwéh 12 kíróku kéhre. Tunsorerutaq 3 kíróku kéhre.

<sup>58</sup> Sísá pukú wehekáh íó tupekútaq Sósépaga Páhírátiba pokéna wensabé, Sísane anonka mewena mómaisaraníkono úwana kowe atena sóntia keyábé, Sísane anonka mah aní áwéro úwe.

<sup>59</sup> Áwero úwara sega wene anonka áwúwana Sóséparehga Sísane anonka mewera íre wahto taberábe ambántáipéq úbíqme

<sup>60</sup> Sósépane o ubusa ónápípéq mómaisarówe. Maisarera anotah ebáh paentáwe kure maisaró mehpéh paiqmarera pokuwe.

<sup>61</sup> Mágára suwahpeqte íní Máhríareq mó wenaogo Máhríareqka mitaq tútuue méra awahnkanuye.

### *Sóntia kegá maisarórabeq wahnahnú ehwéhne.*

<sup>62</sup> Sísá maisaró wehekáhmé Asiu kene ahrena ahrena wehekáhné ménsámehnsá kawerare wehekáhne. Mi wehekáh parabagúwana mó wehekáh Manikáne ehwéh mibeq mahbeq arítáh kéreq Péhrasi kereqka Páhírátiba kosoruparawéra

<sup>63</sup> wensabé, Anotah aníno, péhepehenurai anínká oga míaraitaq mahraréna, Íné pukéna apahtáróráq mó organúkinauge uraire. Itega mi ehwéhnúmé aiq iahreraq kéhre.

<sup>64</sup> We kétó kegá we maisatorabeqte wene anonka segiroqmera mó kopéq suera mó keyábé, We organúkire teríyehboq arega sóntia keyábé mi maitáq apahtáróráq kowahnoro arito. Arega íre mirainaraq anehete péhe éhwéhká ebeq piah péhe éhwéh kiotaikinae uwe.

<sup>65</sup> Uwana Páhírátiga sensabé, Sóntia ke meriqmeq we maisatorabeq pokue mitaq óna paiqme págege atawéq kawerue wahnahnarito úwe.

<sup>66</sup> Kawerue wahnahnarito úwara sega sóntia ke meriqmera pokue méhpéh paiqmáró ebáh ónsá perahsarera mó kegá sirúého éra sóntia keyábé kawerue wahnahnoro arítówe.

## 28

### *Sísá organúkú ehwéhne.*

(Máhka 16.1-10; Árúka 24.1-10; Sóni 20.1-18)

<sup>1</sup> Ahrena ahrena wehekáh parabagúwana o wikí kowara ebeqte wéhékáh ahbiahipeq íó kiembogútaq Mágára suwahpeqte íní Máhríareq mó wenaogo Máhríareqka maisarorabeq tagayehééra pokuye.

<sup>2</sup> Tagayehééra pokuyana anotah maríuwana Manikáne íopeqté áninká tunse méhpéh paiqmáró ebáh paentáwe móbeq marena mi ebáhtáq tútuue míowe.

<sup>3</sup> Wene auranabiah sokeqsúéh tahnsa kúgú agúwana wene korósi anotah tabérábé píribíríyáh tahnsane.\*

<sup>4</sup> Mitaq wahnahnuríó sontiá kégá we tagéra anotah ahrééra iransánéra pusa ké tahnsa úkuwe.

<sup>5</sup> Íopeqté áninká mi inítéyábé, Íre áhreotao. Íné tagariómé itega Sísá awankátaq táhpato aní seragéhye.

<sup>6</sup> We mahtaq íre míéhre. Wega irarurainserah organúkire. Wene anonka matotaq seragahtao.

<sup>7</sup> Tagéta peheráh pokue we kétó ke koreríetao. We iriwe organúkéna Kehrari marákórápéq ebeq kínaq we anehe kirataq Sísá mitaq tagagehe. Aiq teiúge. Koreríetao úwe.

<sup>8</sup> Úwara mi inítégá áhreéra peh sene sirupipeq iwíáh íwíáhéra apubúue mitaq suera pehbeheráhnue ite Sísá kérähwána ke teieyeheéra pokuye.

<sup>9</sup> Pokue ahtapeq kuyataq Sísareq sereq piehgíúwe. Sísaga sensabé, Pehwehrue míáhtao úwara mi inítégá weba kure wene aigará táhtoqme iwíáh íwíáh atóye.

\* **28:3:** Tók Písíni ehwéhmé piribirioyah tahnsane áwíqmé íre kéhre. “Olsem ais” kéhre.

<sup>10</sup> Iwíáh íwíáh atóyana Sísaga sensabé, Íre áhreotao. Nánuwahrahyabé korerieq, Kehrari marákórápéq pokoro. Mitaq íné tagagehe. Koreríetao éna eqmarowe.

*Maisarórabeq sóntia ke teríú ehwehne.*

<sup>11</sup> Eqmarowara mi inítégá pokuyara maisarórabeqte sóntiá kégá Sarúsarama su wahpeq pokue Manikáne ehweh mibeq mahbeq arítáh ké moke tago naneq teríúwe.

<sup>12</sup> Teríuwara Manikáne ehweh mibeq mahbeq arítáh kéreq Asiu kené aboawah wehre-qka momiwíue sío síoéra moráénéra sóntia kegá sene ehweh sehgigeheéra áhnte moné síúwe.

<sup>13</sup> Móne siera mahrraréra, Mó keyábé mahraue terieq, Inokáhpeq ite sugéwonayabé we kétó kegá sure wene anonka mewera eheqpopoq morúáhwe teríero uwe.

<sup>14</sup> Teríero éra, Anotah wahnáh áninká ite sugéwaro ehwéh irahnaraq itega mi ehwéh tábúsoqme teawenéhe. Teawénaraq wega ite íre kamahinae uwe.

<sup>15</sup> Uwara sóntia kegá móne mewera mi pehe éhwéh sehgiúwe. Asiu kegá mi ehwéh Súria marákórápéq mitaq teri mahtaq terinuwara abae agúwe. Miraunsabé mi tanáhráqkákáq amahnágaákáq Asiu kegá mi ehwéhnsábé, Aiq pútaq ehwéhne atáhwe.

*Sísaga we kéró keyabé, Néne ehweh koreríero ú ehwehne.*

*(Máhka 16.14-18; Árúka 24.36-49; Sóni 20.19-23)*

<sup>16</sup> Ite airápété morá ké Sísa kérahwána kegá pokue Kehrari marákórápéq Sísaga teiu sawéhrápéq kiowáne.

<sup>17</sup> Mitaq Sísa tagéq wensabé iwíáh íwíáh atahwáne. Peh táhmaroga sirupipeq téhtaré íwíáhuwe.

<sup>18</sup> Sísaga iteba wahtotaq séna itensabé, Maniká Nániboga íópeqkákáq mah marákó márákóákáq moke wahnahnúno aintena págege aintéhre.

<sup>19</sup> Minayabe pokue mah kehiná kékíná íné séníráh ké úkigehboq kosíwáhnororo. Nániboreq íné wenahninseq Manikáne Awانseq íwírue wání meriéro.

<sup>20</sup> Moke teiátáu ehwéh tábúsoqme sehgigéhbo kawerue síwáhnororo. Kawerue írátíahro. Amahnágaákáq mókakeakáq mah marákó márákó parabagína tanáhráqkákáq peh itereq mía míainauge úwe.

## Máhka Ebeq sáhnsahwe ahtebé ehwehne.

Máhkawe Sarúsarama suwahpeqte ánínéna téhtaré áwíq kékre. We mó awíqmé Sóni Máhkae. Sísaga marakóipeq ména síwáhnorútaq Máhkawe peh mahbi míowe. We Páhnábása awahrah aní ména Pítá séhréh atena anehe Páhnábásareq Porareq séhréh aritowe. Aroma kegá págege sansánsábé suwahbó púana Sísaga págegeue miraú arámpéhríyábé Máhkaga sehiranúwe. Aroma kegá mah pukú sáhnsahwe Sísane ehweh kawerue siahtebéra Sísansabé aíq pútare atageheéna Máhkaga sehiranúwe.

### Máhkaga mah kawéq éhwéh sehiranúwe.

*Sóni wání meri merini anínká irarú ehwehne.*

*(Mátíyu 3.1-12; Árúka 3.1-9,15-17; Sóni 1.19-28)*

<sup>1</sup> Sísa Karáhewé Manikáne ahninkáwá wíre. Kawe q ehweh áwahewé

<sup>2</sup> Manikáne ehweh irarú ani wenáwíq Áísáíaga púkuipéq sehiranue mahraréna, Írátiáhro. Néne ehweh korerie anímé ah kawerinkeheéna ebeq eqmaróge.

<sup>3</sup> We abatapi ména sawai sawaiéna mahraréna, Itene Wahnah sína ahmé aborisahro. Wene ah kaweraráhro inkehe úwe. *(Aisaia 40.3)*

<sup>4</sup> Mah sehiránká irarinserah wání meri merini aní wenáwíq Sóni uworapeq ména ehweh teri terinéna, Manikánka itene ahhbabáqsabe kaweraitankéhboq ahhbabáq sansa sueq kaweqtaq míáhro. Itene ahhbabáq sansa sueq kaweqtaq míehrataqmé wání meinie úwe.

<sup>5</sup> Súria marákórápéqté kéreq Sarúsarama suwahpeqte kéreqka ómiga weba suwe. Su kegá sene ahhbabáqsabe Maniká teawuwana Sóniga Sorana aroipéq wání meriuwe.

<sup>6</sup> Sóniga kéhmane áyórate kogahnia aneraneratiowe. Áú arétí wene ayahbataq konah-natiowe. Tábahnkákáq sehenáhrabahnkakáq nówé.

<sup>7</sup> Sóniga mahraréna, Inehe si anímé anotah aní ména íné kiotaiqme aní míre. We anotah aní púana ínéga nirehunseraráq ména wene súu nahniáq pugereyabe íre awehrari aní mûge.\*

<sup>8</sup> Ínéga peh wání mei meinonana wega Manikáne Awa náinkéhe úwe.

*Sóniga Sísa wání meawu ehwehne.*

*(Mátíyu 3.13-17; Árúka 3.21-22)*

<sup>9</sup> Mitaqkake Sísaga Néhsara suwahpeq Kehrari marákórápéqté súwana Sóniga Sorana aroipéq Sísa wání meawuwe.

<sup>10</sup> Meawuwana Sísaga wánípipeqté kiutaq tagówana sabonah sawekúwana Manikáne Awanka tunse kiboki tahnsanéna Sísaba márunsurahúwe.

<sup>11</sup> Márunsurahúwana íópeqté éhwéhká mahraréna, Are niruní nénáhní móne. Arensabé nirutaboiruge úwe.

*Owainawanka Sísa áhwárawe tagó ehwehne.*

*(Mátíyu 4.1-11; Árúka 4.1-13)*

<sup>12</sup> Manikáne Awanka Sísa meqmena abatapi móatowe.

<sup>13</sup> Áhnte wehekáh 40 wehekáh Sísa mitaq míowana owainawanka weba séna Sísaga ahhbabárinkeheéna áhwárawe tagéna áwíoqnówe. Sísa ménkámehnká míórabeq míowara íópeqté kegá weba séra séhréh atówe.

\* **1:7:** Naho pükúwé “Manikáne O Ehwehne” ue púkuipéq mahraue karaire. Sóniga mahraréna, Inehe si anímé anotah aní ména íné kiotaiqme aní púana wega ehweh iraríaraq íné ehiya míanie úwe.

*Sísaga Kehrari marákórápéq wene arambehri áhwáró ehwehne.*

(Mátíyu 4.12-17; Árúka 4.14-15)

<sup>14</sup> Mó kegá Sóni karábúsiipéq átowana Sísaga Kehrari marákórápéq pokéna Manikáne kaweq ehwéh teri terinúwe.

<sup>15</sup> Teriena, Ibora awehraq tanáhráq míre. Manikánka wahnah wahnahnime aiq wahtoní puaq itene ahbabáq sueq kaweqtaq méq mah kawéq éhwéhnsábé aiq pútare aintáhro úwe.

*Sísaga itaréitaré wéhyábé, Íné séníráhro ú ehwehne.*

(Mátíyu 4.18-22; Árúka 5.1-11)

<sup>16</sup> Sísaga Kehrari kawéhú ayehrápéq noguwara se ábárahré Ehntarureq Sáímónireq tagówe. Sáímóniwe mó awíq Pítæ. Se pah meyóya anité míyansabé kahweraté wánípipeq uwe taga tagauyana tagówe.

<sup>17</sup> Tagéna sensabé, Íné séníráhtao. Amahnága itega kahweraté uwe taga tagaéta pah meyehye. Mina óyanserah wehuke ínéba meriqmeta sigehe. Minayabe íwáhnoriniboq séníráhtao úwe.

<sup>18</sup> Séníráhtao úwara sene kahwe apubúue mitaq marera Sísá kéróye.

<sup>19</sup> Kéróyana Sísaga kure mó abárahré Sébérine ahninkáwáráré síwíqmé Sémísireq Sónireq sene sípiipéq méra kahwewarí kaweq kaweruyana tagówe.

<sup>20</sup> Tagéna Sísaga máhotao úwara mi abárahrégá sibowáreq wereq arambehriu kereq sípiipéq suera Sísá kéróye.

*Sísaga owainawa kaqauwo ehwéhne.*

(Árúka 4.31-37)

<sup>21</sup> Segá Kápénéáma suwahpeq tunse ahrena ahrena wehekáh Sísaga momiwí nahtápéq kibekéna síwáhnorúwe,

<sup>22</sup> Síwáhnoréna Mósísiga sehgóro ú ehweh síwáhnoro kegá síwáhnorunserah Sísaga íre miraúwe. Ahqáho. Wega págegeue síwáhnorú púara wene ehweh író kega áhtenuwe.

<sup>23</sup> Áhtenuwana owainawanka subiqmaq subiqmarú aní momiwí nahtápéq míowana owainawanka iwíáh atowana anotahtaq mahraréna

<sup>24</sup> Sísao, are Néhsara suwahpeqte ání móne. Arega itewe aneraitaníbo? Iubiq iuanie seno? Are Maniká míéhrabeq kaweqtaq mía míáóna aní móne. Arewe aiq tagarióge úwe.

<sup>25</sup> Úwana Sísaga owainawansabé awehgu atena wensabé, Ehiya mé we auwe pokúno atowe.

<sup>26</sup> Auwe pokúno atowana owainawanka mi aní kúrugúru atena kareéna we auwena pokúwe.

<sup>27</sup> Pokúwara ómi míó kega anotah ahténéra ehmuniq éhmúníréa, Aneqpomo? O ehweh míre. Anotah wahnáh ánínká síwáhnori serahnéna Sísaga págege ehwéhnué owainawankákáqsábé, Miraoro i puara sega wene ehweh apubúue íráhwe uwe.

<sup>28</sup> Moke Kehrari marákórápéq Sísá ehweh apubúue mitaq teri mahtaq terinuwara írówe.

*Sísaga Pítane ahrahnawa kawerato ehwéhne.*

(Mátíyu 8.14-15; Árúka 4.38-39)

<sup>29</sup> Sísareh Sémísireh Sónirehga Asiu kené momiwí nahtápéq suera kure Sáímónireq Ehntarureqne nahupeq kibekuwé.

<sup>30</sup> Sáímónine ahrahnawa osoro awahrééna máhriqtaq míowara míó kega Sísá apubúue teawúwe.

<sup>31</sup> Teawúwana Sísaga weba séna ayahnkara táhloqme iriatowana kaweragúwana táhutahuq tíwe náriuwe.

*Sísaga áhnte awáhré ké kawerarito ehwéhne.*

(Mátíyu 8.16-17; Árúka 4.40-41)

<sup>32</sup> Mi wehekáh ío tupekútaq wehekeqká ómi awahre kereq owainawanka subiqmaq subiqmarú kereq meriqméra Sísaba móritówe.

<sup>33</sup> Mi kehiná suwahpeqte kégá ómi méhpeh sahuriówe.

<sup>34</sup> Sísaga áhnte awahreu ke kaweraritená áhnte owáinawámári kaqsuowe. Owainawa-marinká Sísa tagarío púana wega se ehiyansá aritowe.

*Sísaga Kehrari marákórápéq kure kaweq ehwéh teriu ehwehne.*

(Árúka 4.42-44)

<sup>35</sup> Ahyahbinkerotaq Sísaga iriwe ména mitaq suena abatapi kowéna Manikánsabe púrerúwe.

<sup>36</sup> Sáimónireq wene iyahnaboreqka koanebahrára

<sup>37</sup> Sísa tagéra wensabé, Ómi kegá arensabé anebahrowe teawúwe.

<sup>38</sup> Teawúwana Sísaga sensabé, Mó ke suwahpeqkakáq ehweh teriníboq pokonehe. Terinieéna tumióge úwe.

<sup>39</sup> Sísaga moke Kehrari marákórápéq noginieéna pokéna Asiu kené momiwí nahmárítápéq ehweh teriena owainawamarí kaqsuowe.

*Sísaga anotah naonkákáq ání kawerato ehwéhne.*

(Mátíyu 8.1-4; Árúka 5.12-16)

<sup>40</sup> Anotah naonkákáq áninká Sísaba séna áhtenú púana arehunseraráq ména Sísansabé pagu pagunéna, Are awahbáhnaraqmé kaweraintahráhóne úwe.

<sup>41</sup> Úwana Sísaga wensabé arutaboiratena ayahnkahkahruue wenaneq táhtorena wensabé, Aiq mirainauge. Are awaho ani míahno atowana

<sup>42</sup> mina irarútaq wene náonaba apubúue wagúwana kaweragúwana

<sup>43</sup> Sísaga eqmaranaútaq wensabé, Írátiahno.

<sup>44</sup> Mó ke teríneho. Írakaumo. Manikáne ehweh mibeq mahbeq aítéh ánípá pokue arene anonka móreawo. Are awaho ani úkire igeħboq Mósísiga irarúnserahnue Manikánsabe titirúno éna apubúue eqmaq auwowe.

<sup>45</sup> Eqmaq auwowana kaweragú aninká pokéna kawerato ehweh mitaq teri mahtaq terinúwara áhnte kegá írówe. Áhnte kegá író púana Sísaga mó ke suwahpeq íre korahúwe. Írakaumo. Peh abatapi kowíowara mó marákórápéqté kéreq mó marákórápéqté kéreq áhnte kegá mitaq weba suwe.

## 2

*Sísaga aiayah pukia ání kawerato ehwehne.*

(Mátíyu 9.1-8; Árúka 5.17-26)

<sup>1</sup> Sísaga táchmaro wehekáh ména mitaq suena Kápénéáma suwahpeq kouwekúwara wene nahtapeq míéhre mitaq teri mahtaq terinuwara írówe.

<sup>2</sup> Irera áhnte kegá weba sáhatíowara kígíúnsabe mó kegá méhpeh íre míahrahuwana Sísaga kaweq ehwéh teriuwe.

<sup>3</sup> Itaréitaré ánítogá aiayah pukia ání sehgiwera weba suwe.

<sup>4</sup> Séra ahtapeq kutaq áhnte wehekéqká nahupeq kígíúnsabe sega Sísaba íre kioráhéra nahnsorapéq kire Sísane ayahqnonsonraq abogéh piruqmarera abahrabahrútaq aiayah pukia ání wene máhriqkakáq sehitaqmaqme meqmera Sísa míorabeq márunátówe.

<sup>5</sup> Segá iwiáhéra, Sísaga kaweratanawire iwiáhuwana wega sene iwiáh tagéna aiayah pukia ánínsábé, Nánibáq móne. Arene ahbabáq aiq kaweratóge úwe.

<sup>6</sup> Úwara Mósísiga sehgióro ú ehweh síwáhnoro kegá tútuue méra sirupipeq iwiáhéra,

<sup>7</sup> Mi ehwéhmé aneqsabé irariro? Manikánsabe íre kaweq ehwéh atéhre. Ahbabáqsabe insega kaweraritahráhiro? Manikánka webataq wehukene ahbabáqsabe kawerari-tahráhire íwíahuwe.

<sup>8</sup> Sísaga sene sirupipeqté íwíah wene arupipeq tagéna sensabé, Itewe aneqsabé mira íwíaho?

<sup>9</sup> Aiayah pukia áninsábé aneq ehwéh teawiníkono? Arene ahbabáqsabe kaweratóge teawiníkono? Are irigue arene máhriq mewe ah nogo teawiníkono? Íre págege ehwéhmé ahnabo?

<sup>10</sup> Íné wehukení úku anínká mah marákó márakkó wehukene ahbabáq kawerari-tahráhige. Sokigi ainíboq tagariáhro éna aiayah pukia áninsábé,

<sup>11</sup> Teawiníboq iro. Irigue arene máhriq mewe arene nahtapeq pokúno úwe.

<sup>12</sup> Pokúno úwana irigue wene máhriq apubúue mewena pokúwara ómi míó kega tagéra áhtenue Manikánsabe íwíah íwíah atera, Mahna tahnasa morá ibora tagóne uwe.

### Sísaga Árígáinsabé, Íné séniro ú ehwehne.

(Mátíyu 9.9-13; Árúka 5.27-32)

<sup>13</sup> Sísaga Kehrari kawéhú ayehráq mó kúwara ómi míó kega weba sáhatíowana Manikáne ehweh síwáhnorúwe.

<sup>14</sup> Sísaga mitaq suena ahtapeq nogutaq táhkísi moné meyo aní wenawíq Árígái tagówe.\* Árígáwe Ápíásane ahninkáwá táhkísi moné meyo nahtápéq tútuue míowana Sísaga wens-abé, Íné séniro úwana Árígáiga irigue kérōwe.

<sup>15</sup> Áhnte táhkísi moné meyo kereq mó ahbabáq kereqka Sísa kérónsabe Sísaga Árígáine nahtapeq táhutahurútaq mi kegá Sísareq we kéró kereq táhutahuruwe.

<sup>16</sup> Táhutahuruwara Mósísiné ehweh síwáhnoru Péhrasi kegá minayabe tagéra Sísa kéró keyabé kasenéra, Sísawe aneqsabé táhkísi moné meyáh kéréq ahbabáq kereq moraráq táhutahuriro uwe.

<sup>17</sup> Uwana Sísaga mi ehwéh irena sensabé, Sótehga awaho wehuké måráhsíni íre náriasa peh morá awahre ke náríre. Mina inserah ínéwé kaweqtaq míáh ké séhréh aritanieéna íre suge. Peh ahbabáq ke kaweraritanieéna suge úwe.

### Sísaga táhutahuq awehrio sansánsábé síwáhnorú ehwehne.

(Mátíyu 9.14-17; Árúka 5.33-39)

<sup>18</sup> Sóni kéró kereq Péhrasi kereqka táhutahuq awehriutaq wehukega Sísaba séra kasenéra, Sóni kéráh kéréq Péhrasi kérírah kéréqka táhutahuq awehriowara aneqsabé are kéráh kegá íre awehrioo uwe.

<sup>19</sup> Uwana Sísaga sensabé pabeqme ehwéh teriena, Pahuwirotaqmé o menáhwé wene iyahnabo ba míéltáqmé táhutahuq awehrioo? Írakaumo.

<sup>20</sup> Mókake o menahwé seba íre míahnaraqmé mi tanáhráq wene iyahnaboga sirutaboiréra táhutahuq awehrigehe úwe.†

<sup>21</sup> Sísaga mó pabeqme ehwéh mahraréna, Wehukenínká nahonáh sáhkétí kawerarieéna o ambántáráté íre páruwe kawerire. Miraitaq tahirímé nahonáh sáhkétí subanki irino.

<sup>22</sup> Wehukenínká o nahniáq sera ano naho naho méméné áuyahwa antehyápípéq íre ahkíre. Miraitaq tahirímé sera anonka muinaraq nahonáh ántéhyá tapoagirana sera ano marakóraq antigí irino. Wehukenínká o será ano o antéhyápípéq ahkíre. Wehukega ahkírataq mi tehtáré náneqme kawerue kanae. O será anome kawerue kanae. Antehyamé moq kawerue kanae úwe.‡

### Sísaga ahrena ahrena wehekáhnsábé arambéhriéyabe irarú ehwehne.

(Mátíyu 12.1-8; Árúka 6.1-5)

\* <sup>2:14:</sup> Mátíyuwe mó awíq Árígáie. Mátíyu 9.9 tagáhno. † <sup>2:20:</sup> Mi ehwéh áwahewé aigárápéqté ehwéh Mátíyu 9.15 tagáhno. ‡ <sup>2:22:</sup> Mi ehwéh áwahewé aigárápéqté ehwéh Mátíyu 9.17 tagáhno.

<sup>23</sup> Ahrena ahrena wehekáh Sísareq we kéró kerekka páréti mirao naneq será sotápéq kótaikutaq we kéró kega mi será késabaríqme késabaríqmeue kuwe.

<sup>24</sup> Kuwara Péhrasi kegá Sísansabé, Are kéráh ké tagáhno. Ahrena ahrena wehekáh íre mirao sansámé sewe aneqsabé miraoo uwe.

<sup>25</sup> Uwana Sísaga sensabé, Itewe Manikáne púkuipéqté séhíramé Tébítireq we kéró kerekka tabonahéra sirupibiútaq mirau sansámé íre sáhnsahwe ahtebaho?

<sup>26</sup> Wehukení wenawíq Ábíátawe Manikáne ehweh mibeq mahbeq arito aní míotaq Tébítiga Manikánsabe iwíáh iwíáh atáh náhúpéq kibekéna Manikánka tagankeheéra máró paréti mewe néna we kéró ke náriuwara sega moq nowe. Mósínsine ehweh irarunka mi parétíwé pehipéqté kégá íre nah nanere. Peh morá Manikáne ehweh mibeq mahbeq arítáh kégá nahrahowe ire. *(1 Samuel 21.1-6)*

tega mi sehirá íre sáhnsahwe ahtebaho úwe.

<sup>27</sup> Sísaga Péhrasi keyábé mó mahraréna, Ahrena ahrena wehekáh ko púana Manikánka wehuke miraroo? Írakaumo. Wehuke mó púana ahrena ahrena wehekáh mirarowe.

<sup>28</sup> Íné wehukení úku anínká ahrena ahrena wehekáhnkákáq wahnah wahnahnuge úwe.

### 3

*Sísaga ahrena ahrena wehekáh sawenkahnia áyáhnkákáq ání kawerato ehwehne.*

*(Mátíyu 12.9-14; Árúka 6.6-11)*

<sup>1</sup> Sísaga Asiu kené momiwí nahtápéq mó kibekúwana sawenkahnia áyáhnkákáq ání míowe.

<sup>2</sup> Míowara Péhrasi kegá Sísa ehweh ataneheéra ahrena ahrena wehekáh Sísaga mi aní kaweratanabiramo éra ebitiówe.

<sup>3</sup> Ebitíowana Sísaga sawenkahnia áyáhnkákáq ánínsábé, Ínéba sewíahno éna ebitío keyabé,

<sup>4</sup> Mósísga sehgíoro ú ehwehnkáwé ahrena ahrena wehekáhnsábé anere teiro? Wehuke kaweraranéhnkono? Íre kaweraranéhnkono? Wehuke séhréh aritanéhnkono? Subiq suanéhnkono úwara se ehiya míowe.

<sup>5</sup> Se sawenkahnia áyáhnkákáq ánínsábé íre sirutaboiria sirupipeq págegeunsabe Sísane arupipeq umeh agúwe. Umeh agúwana wega se ebitáwéna abiahnsa aritena sawenkahnia áyáhnkákáq ánínsábé, Arene ayahnkara obariro úwana wene ayah obarirowana kaweragúwe.

<sup>6</sup> Kaweragúwara Péhrasi kegá tueague Érótine iyahnaboreqka momiwíue sío síoéra, Sísawe árahue subiq suanéhnkono uwe.

*Káwehu ayehráq áhnte kegá momiwíu ehwéhne.*

*(Árúka 6.17-19)*

<sup>7</sup> Sísareq we kéró kerekka mitaq suera káwehu ayehráq pokuwara áhnte Kehrari marákórápéqté kégá we kérówe.

<sup>8</sup> Kehrari marákórápéqté kéreq Súria marákórápéqté kéreq Sarúsarama suwahpeqte kéreq Írúméa marákórápéqté kéreq Táiya suwahpeqte kéreq Sáírona suwahpeqte kéreq Sorana aroipéq seberaebéqté kéreqka áhnte kehinánká Sísaga miraúnsabe irera weba suwe.

<sup>9</sup> Áhnte kegá sunsabe Sísaga we kéró keyabé, Áhnte kegá pagunúéhboq sípi wahtotaq mewe sero úwe.

<sup>10</sup> Áhnte awahre ke kaweraritonsabe moke mó awáhré kégá Sísa táhtoraneheéra pehentáwe sunsabe Sísaga we kéró keyabé mi ehwéh teriuwe.

<sup>11</sup> Owainawamarínká Sísa tagéra wensabé áhreu puara arehunseraráq méra anotahtaq mahraréra, Are Manikáne ahninkáwá wóne uwana

<sup>12</sup> Sísaga sensabé abiah matawéna, Íné éhwéh irariyehboq ehiya míáhro úwe.

*Sísaga we kéró ke omaq sito ehwehne.*

(Mátíyu 10.1-4; Árúka 6.12-16)

<sup>13</sup> Sísaga sáwéhrapeq pokéna wega omaq siteyabe awahbó ke síáhrabúwara weba kíúwe.

<sup>14</sup> Kíúwana airápété téhraníté weba míageheéna omaq sitowe. Sensabé eqmaro kee síwíraritená mi kegá ehweh koreri terinigeheéna omaq sitowe.

<sup>15</sup> Segá owainawamarí kaqsuageheéna págege atena omaq sitowe.

<sup>16</sup> Wega omaq sito kewe Sáímóniwe mó awíq Pítæ ue áwíratena

<sup>17</sup> se ábárahré Sébérine ahninkáwárará Sémísireq Sónireqsabé Póánégie ue síwíraritowe. Mi awíq áwahewé puruburu aníté tahnsane ue síwíraritowe.

<sup>18</sup> Ehntaru, Pírípi, Pátórómíyu, Mátíyu, Tómáhsí omaq sitena Sémísi Ápiásane ahninkáwá omaq atowe. Sáímóniwe we Kénáni marákórápéqté ánínseq Táriásareq omaq sitowe.

<sup>19</sup> Súrása we mó awíq Ísíkáriótí Sísane naruo koweriranaú anínseq omaq sitowe.

*Owainawanka Sísa séhréh atéhre éra péhe éhwéh iraru ehwéhne.*

(Mátíyu 12.24-32; Árúka 11.14-23, 12.10)

<sup>20</sup> Sísaga nahupeq kibekúwara áhnte wehekéqká weba mó kiranéhnatiówe. Mitaq kígjunsabe Sísareq we kéró kereqka íre táhutahurorahuwe.

<sup>21</sup> Sísa awahrahga minayabe írótaq, We uwoyansa aní úkire éra we koweraneheéra suwe.

<sup>22</sup> Sarúsarama suwahpeqte Mósísine ehweh síwáhnoro kegá seye náhenéra, Pésébúri, owainawane wahnhahnka Sísa págege atena séhréh atéh púana Sísaga owainawa kaq-suahráhire éra ehmuniq éhmúníruwe.

<sup>23</sup> Ehmuniq éhmúníruwana Sísaga sensabé, Ínéba sewiáhro éna pabeqme ehwéh mahraréna, Owainawanka wewe árahue kaqsuankéhbo?

<sup>24</sup> Wahba marákórápéqté kégá seye ebehirataq sainkoneherawoe. Minayabe se págegeue morá ké íre míáhrahowe.

<sup>25</sup> Sensuwahrahreq seye ebehirataq sainkoneherawoe. Minayabe se págegeue morá ké íre míáhrahowe.

<sup>26</sup> Owainawanseq wenawahrahreq ebehotaq tahirímé se sainkéra págegeue morá ké íre míáhrahó irino.

<sup>27</sup> Wehukenínká ayahnsa kira wéhné ménsámehnsá meyanieéna wene nahupeq pehipi íre kibekorahire. Írakaumo. Ebeqme wega ayahnsa kira wéh táhtoqme táhru táhruarena anehe wene nahtapeqté ménsáméhnsá pehipi meyahráhire úwe.

<sup>28</sup> Sísaga mó mahraréna, Teiníboq írátiáhro. Ahbabárera Manikánsabe abehq éhwéh atáh kewé Manikánka mi ke kaweraritahráhena mi ahbábáq íre ahreraq matiankehe.

<sup>29</sup> Peh morá Manikáne Awansabe abehq éhwéh atéh ánime Manikánka mi aní íre insahwé atankéhe. Mi ahbábáq peh ahreraq matiankehe úwe.

<sup>30</sup> Segá, Owainawanka Sísa séhréh atéhre unsabe Sísaga mi ehwéh irarúwe.

*Sísane anowaréh ábákawaréhwé inseréhbo i ehwéhne.*

(Mátíyu 12.46-50; Árúka 8.19-21)

<sup>31</sup> Sísane anowareeq ábákawaréhreqka séra máhpeq iriwe méra mó keyábé, Sísansabé, Mahbeq tuo teawéro uwe.

<sup>32</sup> Uwara áhnte wehekéq weba sáhatawéra wensabé, Arenanoreq arenábáqmarinseq máhpeq méra arensabé áhrabowe uwe.

<sup>33</sup> Uwana Sísaga sensabé, Náinoreq nánibáqmarinseq inseréhbo éna

<sup>34</sup> weba sáhatió ke tagéna, Itewe náinoreq nánibáqmarinseq móe.

<sup>35</sup> Maniká awahbeh arámbéhrí mirao kewé nánibáqmari móe. Náinahnoreh wóe. Náinoréh wóe úwe.

## 4

*Ayu suitabéyabe pabeqme ehwéhne.*

(Mátíyu 13.1-9; Árúka 8.4-8)

<sup>1</sup> Sísaga káwehu ayehráq tunse mó síwáhnorúwe. Síwáhnorúwara íregárítaq weba sáhatíó púana wega wánípipeq ko sipíipéq kibekue tútuue míowe. Tútuue míowara moke mío kega arahwéraq míówana

<sup>2</sup> wega áhnte pabeqme ehwéh síwáhnorúwe.

<sup>3</sup> Síwáhnoréna, Teiníboq írátíahro. Ayu suitabé aninká ayu suitabanieéna pokire.

<sup>4</sup> Suitabehtaq mó ayú ahtaqt megirana kabaranka sésiq nehre.

<sup>5</sup> Mó ayú kiruraq megirana pehgáriq marákó kék púana mi ayú apubúue kiapoue kíréhre.

<sup>6</sup> Anotah patáhitaq tamurupague ánúq píeh púana ehyatagire.

<sup>7</sup> Mó ayú náwe tarúítáq megirana náwe kirena kárigariirana íre kawerue kíréhre. Minayabe sera íre íyéhre.

<sup>8</sup> Mó ayú kaweq marákóráq megirana kiapoue kirena áhnte será íyéhre. Mó ayú 30 íyéhrana mó ayú 60 íyéhrana mó ayú 100 íyéhre.

<sup>9</sup> Íre parosa áhréákáq kék, kawerue íráhro úwe.

*Sísaga ayu pabeqme ehwéh áwahe pahsuo ehwéhne.*

(Mátíyu 13.10-17; Árúka 8.9-10)

<sup>10</sup> Áhnte kegá íre míotaq airápét téhraníté Sísa kéró kereq mitaq mío kereqka pabeqme ehwéhnsábé áwahe kasenuwe.

<sup>11</sup> Kasenuwana Sísaga sensabé, Manikánka wahnah wahnahniabeqte éhwéhmé áwahe ite sokigi aiená mó ke peh pabeqme ehwéh teri terinuge.

<sup>12</sup> Minayabe mó kegá siuranká tagéra sirupipeq íre tagariahrahewe. Sene siahrega irera sirupipeq íre írátíahrahewe. Minayabe sene ahbabáq sansa peh kíhrana Manikánka sene ahbabáq íre kaweraritena peh ahreraq matiankehé úwe. (Aisaia 6.9-10)

*Sísaga moke pabeqme ehwéh teriunsabe irarú ehwehne.*

(Mátíyu 13.18-23; Árúka 8.11-15)

<sup>13</sup> Sísaga sensabé mó mahraréna, Ite mah pabéqmé éhwéh íre iraho? Mó pabeqme ehwéhmé árahue iranéhbo?

<sup>14</sup> Ayume Manikáne kaweq ehwéhne. Ayu suitabé anínká mi kawéq éhwéh teri terinire.

<sup>15</sup> Ahtapeq megi ayúmé wehukega Manikáne ehweh íráhwana owainawanka sirupipeqté mi ehwéh apubúue seaebóire.

<sup>16</sup> Kiruraq megi ayúmé apubúue kiapoinserah wehukega Manikáne ehweh irera sirupipeq eyoyóéra apubúue kówe atáhwe.

<sup>17</sup> Manikáne ehwehnka sirupipeq íre ánú píehnsábé pehgáriq tanáhráq sehgiówe. Manikáne ehweh sehgiónsábé mó kegá síwíoqnahwana íre kaweq sunúq sire. Mi tanáhráq sega apubúue túbáh agéra Maniká áuwáhwe.

<sup>18</sup> Náwe tarúítáq megi ayúmé wehukega Manikáne kaweq ehwéh irera sehgiónehe íwíáhéra

<sup>19</sup> mah marákó mårákóípéqté náneqsabé iwiáh kikiréra sene áhnte matiáh ménsáméhnsánsábé sirutaboirowana mó mensáméhnsánsábé aigará pabekire. Náwe soagirana sera íre íyéhmé mi kegá Maniká awahbeh sansá íre sehgiówe.

<sup>20</sup> Kawe q marákóráq megi ayúmé wehukega Manikáne ehweh irera sirupipeq tábúsoqme iwiáhewe. Kawe q marákóráq kaweq será íyéhnsára sega mi ehwéh sehgióra Manikáne arambehri kawerue miraowe. Kawerue miraéra mó kegá 30 tahnsá árámbéhriowara mó kegá áhnte 60 tahnsá kaweq arámbéhriowara mó kegá peh íregárítaq 100 tahnsá áhnte kaweq arámbéhriowewe úwe.

*Sísaga téreh naneq íre akariaráhnsábé pabeqme irarú ehwehne.*

(Árúka 8.16-18)

<sup>21</sup> Sísaga sensabé mó mahraréna, Árámhu mewe setaq eheq maraho? Antehyatáté áráhmu íre akariaráhwe. Mähriq tahbé tehnopeq íre márähwe. Írakaumo. Kaweruwe téhrankeheéq peh tahberapeq marähwe.

<sup>22</sup> Amahnága moke kopípéq kék náneqme mókake ábóraq kanae. Moke akariuríeh náneq moq ábóraq kanae.

<sup>23</sup> Íre parosa íáhréákáq kék, kawerue íráhro úwe.

<sup>24</sup> Sísaga sensabé mó mahraréna, Itega íréhra ehwéh iwíáhue íráhro. Itega mó ke náríanserah Manikánka mina tahnsanue náinkéhe.

<sup>25</sup> Matiéh ání Manikánka mó náwinkéhe. Íre matiéh ánímé Manikánka wene pehgáriq náneq meyankéhe úwe.

*Ayu kíréhnsábé pabeqme ehwéhne.*

<sup>26</sup> Sísaga mó mahraréna, Manikánka wahnah wahnahnime wehukéniká ayu marakóipeq suitabehnserahne.

<sup>27</sup> Inokáhpeq sugayugaéna ahbiahipeq irigéna wene arambehrirana ayume kiapoue kíréhre. Kiapoue kíréh sánsámé suitabeh aníká íre ahtebbehre.

<sup>28</sup> Marakóga mirainka ménsámehnsá kirena íyéhre. Ebeq ánáh kiapoue kirena anehe sera iyena nera kékre.

<sup>29</sup> Ménsámehnsá nera kéhtáq pokatate serame apiwe meyháhwe. Nera kék púara apiwe meyháhwe úwe.

*Pehgáriq ayúnsábé pabeqme ehwéhne.*

(Mátíyu 13.31-32; Árúka 13.18-19)

<sup>30</sup> Sísaga mó mahraréna, Manikánka wahnah wahnahnime aneq tahnsáne teiníkono? Minayabe aneq pabeqme ehwéh teiníkono?

<sup>31</sup> Manikánka wahnah wahnahnime sotápéq uqmaréh ayu tahnsane. Mi ayúmé íre mó sotápéqté áyú tahnsane. Írakaumo. Mi ayúmé pehgáriq ayúne.

<sup>32</sup> Wehukéniká mi pehgáriq áyú wene sotápéq uqmatairana kirena anotah awánká úkéna moke mó mensámehnsá kiotaikire. Awankánirana anotah ayáhnawé kékhrara kabaramarínká ayahnaweraq surahéra sene nah mitaq áhpeq piáhwe úwe.

*Sísaga peh pabeqme ehwéh teriu ehwéhne.*

(Mátíyu 13.34-35)

<sup>33</sup> Sísaga áhnte mina tahnsa pabeqme ehwéhnue Manikáne ehweh teriuwe. Sirupipeq mi ehwéh iwíáhue irahráhunserahnue teriuwe.

<sup>34</sup> We kéró keyabé epéq moke pahsuqme siwáhnoréna peh mó keyábé pabeqme ehwéh teriuwe.

*Sísaga irarúnka sóiriq táqnáigú ehwehne.*

(Mátíyu 8.23-27; Árúka 8.22-25)

<sup>35</sup> Mi wehekáh tupekinaútaq Sísaga we kéró keyabé, Káwehu seberaebéq pokonehe úwara

<sup>36</sup> we kéró kega mibeq sáhurió ke suera Sísa mío sipí kewewera Sísa meqmera kuwe. Mó sipíwárínkákáq moraráq kuwe.

<sup>37</sup> Anotah soírirúwana wáninka sípiipéq kiegambeh agu aguúwana sípiipéq wání obenkíkinaútaq

<sup>38</sup> Sísawe sípi ambarupéq ayahqno kunubaraq sugowe. Sugowara sega Sísa iriatera wensabé, Íwáhnoraníno, ite wánípipeq pukonehe únayabé anetaníbo íwíáhono uwe.

<sup>39</sup> Uwana Sísaga irigéna sóiriqsabé, Táqnáigúno éna wánínsabe, Pehwehrue mé túbáh agúno úwana sóiriqka táqnáigúwana wáninka moq túbáh agúwe.

<sup>40</sup> Túbáh agúwana wega sensabé, Aneqsabé áhreoo? Aneqsabé ínénsabe íre aiq pútare aintaho úwara

<sup>41</sup> sega anotahtaq áhreéra seye náhenéra, Mah anímé insebo? Sóiriqkakáq wánínkakaq wene ehweh íréhre uwe.

## 5

### *Sísaga owainawamari kaqsuo ehwéhne.*

(Mátíyu 8.28-34; Árúka 8.26-39)

<sup>1</sup> Sísareq we kéró kereqka sípi kewewera kure Kehrari kawéhú seberaebéq Kérása kené marakórápéq kuwe.\*

<sup>2</sup> Sísa sípiipéqté tueagúwana mibeqté ánime owainawanka subiqmaq subiqmarú aninká wehuke maisia ónámárípípéqté séna weba súwe.

<sup>3</sup> Mi aninká maisia ónámárípípéq kaegaeuwara wehukega wene aigárátáq ayahnkaratáq séniraté táhru táhru aruqaruruwana suraqsu suraqsurú púara íre saiqnariahahuwe.

<sup>4</sup> Wene ayahpíte séní sabirue surasuq surasuréna wene aigárápíté séní piteruq piterurúwe. Segá táhtorótaq íre ambubu atiahrahahuwe.

<sup>5</sup> Inokáhpeqkakáq wéhékáhnakaq ahriahri we maisia ónámárípípéqté sáwéhrapeqté kare kareéna kenkawéhrate wene anonka amurúruqme kirasuq kirasurúwe.

<sup>6</sup> Sísaga sípiipéqté kiuwana mi aninká móbeqte we tagéna pehbeheráh weba sure wensabé áhtó púana arehunseraráq sewíowe.

<sup>7</sup> Sewéna kareéna, Sísao, are íópeqté Manikáne ahninkáwá wóne. Aneraintaníbo? Íópeqté Manikánka tagaríeháq níeraníneho úwe.

<sup>8</sup> Sísaga wensabé, Owainawano, we auwe pokúno atonsabe mi ehwéhnsábé kareúwe.

<sup>9</sup> Kareúwana Sísaga wensabé, Arenáwíq tenio úwana mi aninká, Ite áhnte míonayabé néníwíq Íregáritare éna

<sup>10</sup> Sísansabé, Ite mahtaqté kaqme íre wahto eqmaq iuwehneho úwe.

<sup>11</sup> Wahtotaq sáwéhrapeq íregáritaq poeráhqká náwe sahtaqme nowara

<sup>12</sup> owainawamarínká Sísansabé, Mi poeráhqmáripá eqmaq iuwo éra, Póéráhqne sirupipeq míanehboq ite pokoro aito éra pagu pagunuwe.

<sup>13</sup> Pagu pagunuwana Sísaga kowe aritowara owainawamarínká wehukení auwera póéráhqmariné sirupipeq kowiówara 2táhúséni (2,000) póéráhqmárinká sáwéhrapeqté pehbeheráh tunse mentúpipeq wáníkuwe pukuwe.

<sup>14</sup> Póéráhqtaq wahnahnú kegá tagéra pehbeheráh pokue sotápéq míó kereq sene nahtapeq míó kereq koreríuwara seraganeheéra suwe.

<sup>15</sup> Sísaba suwana owainawamarí kaqauwo aninká kaweq iwíáhorahéna aneranerue tútuue míowara su kegá tagéra áhreuwe.

<sup>16</sup> Áhreuwará tago kegá kawerato ehweh su ke teriera póéráhq mari puku ehwéh teríuwara

<sup>17</sup> sega Sísansabé, Itene marakó sue pokúno éra pagu pagunuwe.

<sup>18</sup> Sísa sípiipéq kiasague pokinaútaq owainawamarí kaqauwo aninká wensabé, Íné are kéranié úwe.

<sup>19</sup> Kéranié úwana Sísaga ahqáho atena wensabé, Arenawahpeq pokue íné arene Wah-nahnka arensabé nirutaboirue kawerató éhwéh arenawahrah korerio úwe.

<sup>20</sup> Úwana wega pokue Tékáporísa marákórápéq mó ke suwahpeq mó ke suwahperue Sísaga we kawerato ehweh koreri terinuwara moke író kega áhtenuwe.

\* <sup>5:1:</sup> Kérása marákó mó awíq kéhre. Mátíuya sehiranú pukúipéq marakó áwíq Kárárae kéhre. Mátíyu 8.28 tagáhno.

*Sísaga awahre iní kaweratena ahrari oganúq ato ehwehne.*

(Mátíyu 9.18-26; Árúka 8.40-56)

<sup>21</sup> Sísaga sípi kewewena kure Kehrari kawéhú seberaebéq seuwekúwara áhnte wehekéq weba sáhuriówe. Káwehu ayehráq míowana

<sup>22</sup> Asiu kené momiwí nahtápéqté wáhnáh ání Sáírusaga mitaq séna Sísa tagéna áhtó púana wene aigárápí káuqmunue arehunseraráq ména wensabé,

<sup>23</sup> Nániyahu pukinaire. Wenaneq koráhtoréhnana kaweraginkehboq máho. Oga míankehboq máho éna pagu pagunuwana

<sup>24</sup> Sísaga we kérone.

We kérone áhnte kegá moráráq kure Sísa kú ahtápéq we pehentáruq we pehentárurue kuwe.

<sup>25</sup> Awahre iní kure airápété téhtaré ópéq áhnte opéq wene korahq íre taraqnágia peh tuerueúwe.

<sup>26</sup> Peh tuerueúwana wega áhnte sotéh kébá poku pokuuwara sega we áhnte érawuwana wene móne sinsinue parabaruowana íre kaweragúwe. Írakaumo. Anotah íroke awáhréúwe.

<sup>27</sup> Mi inínká Sísa éhweh irena áhnte kegá moráráq kutaq

<sup>28</sup> wewe náhenéna, Íné peh wene korósi koráhtoráhnaraqmé kaweraintankéhe úwe.

<sup>29</sup> Áhnte wehekéqká kígíuwana awahre inínká Sísa anehepeq sure wene korósi koráhtorowe. Koráhtorowana wene korahq apubúue taraqnágúwana wene arupipeq iwíahéna, Íné aiq kaweraintéhre úwe.

<sup>30</sup> Úwana Sísaga iwíahéna, Ínéga inse kawerauwogo éna pabeqme, Néne korósi insega táhtorehro kasenúwe.

<sup>31</sup> Kasenuwara we kéró kega Sísansabé, Áhnte kegá are paguno púah aneqsabé, Néne korósi insega táhtorehro eno uwe.

<sup>32</sup> Uwana Sísaga táhtoro ani taganieéna aurankaúwe.

<sup>33</sup> Kawerato ininká, Íné aiq kaweraintéhre éna áhre iransánéna Sísaba sure arehunseraráq sewéna moke teawuwe.

<sup>34</sup> Teawuwana Sísaga wensabé, Náinahnoo, arega aiq pútare aintahnaga kaweratóge. Are awaho ani mianiewóne. Pehwehrue pokéwahno úwe.

<sup>35</sup> Pehwehrue pokéwahno úwara wahnah aníné nahtapeqté táhmaro kegá sure abowansabé mahraréra, Areniyahu aiq pukire. Aiq puki puah síwáhnori anínká sinsabé ahqáho ato uwana

<sup>36</sup> Sísaga sene ehwehnsábé íre iwíahia abowansabé, Íre áhreúno. Peh aiq pútare ainto éna

<sup>37</sup> áhnte we kéró keyabé, Mahtaq míáhro aritena peh morá téhq abáráhré Sémísireq Sónireq mó aní Pítareq meriqmena pokúwe.

<sup>38</sup> Pokue mi wahnáhné nahtapeq sutaq irobibiu ke tagówara áhnte ibiséra anotah ibítúnátúnánuwe.

<sup>39</sup> Ibitunátúnánuwana Sísaga nahupeq kibekéna irobibiu keyábé, Aneqsabé áhnte ehwehnéq ibitunátúnánoo? Mah ahrári íre airaiq pukia peh sugéhre úwara

<sup>40</sup> sega awiréh atówe. Awiréh atówana Sísaga ómi míó ke mähpeq kaqsuena mi ahrárné anoiboreq we kéró kereq meriqmena ahrarine mähriqtapéq pokúwe.

<sup>41</sup> Pokéna wene ayahnkara táhtotawéna wewene ehwehtaq mahraréna, Tarita kumie úwe. Tarita kumie úmé, Ahrario, Ínéga teawúge. Irigúno úwe.

<sup>42</sup> Irigúno úwana wega apubúue irigéna ah noguwe. Mi ahrárné ópeqme airápété téhtaré ópéq míotaq pukuwana Sísaga iriatowe. Iriatowara tago kegá áhtenuwana

<sup>43</sup> Sísaga sensabé, Mó kegá íréhboq íre teríero éna wenanoibonsabé, Iteriyahu táchutahuq náwétao úwe.

## 6

*Néhsara suwahpeqte kégá Sísansabé suwahríó ehwehne.*

(Mátíyu 13.53-58; Árúka 4.16-30)

<sup>1</sup> Sísaga mitaq suena wenawahpeq pokúwara we kéró kega kérówe.

<sup>2</sup> Ahrena ahrena wehekáh Sísaga Asiu kené momiwí nahtápéq síwáhnorúwara áhnte író kega áhtenuwe. Áhtenéra mahraréra, Wega irari ehwéhmé eheqte ehwéhpo? We árahue ahtebia ání úkurairo? Wega ótaq sansámári árahue mirairo?

<sup>3</sup> We peh nah pe tagaríeh ání míre. We Máhríane ahninkáwá wíre. We Sémísireh Sósépareh Súrásareh Sáímónirehne siwahwá wíre. Wenanahnoreh mahtaqté ánimári móe éra wensabé abiahnsa atówe.

<sup>4</sup> Abiahnsa atówana Sísaga sensabé, Manikáne ehweh irari anínsábé mó ke suwahpeqte kégá iwiáh iwiáh atáhwe. Peh morá wenawahpeqte kéreq wenawahrahreq wene näh-tapeq kaegaeo kerekka wensabé íre iwiáh iwiáh atáhwe úwe.

<sup>5</sup> Mibeqté kégá wensabé íre aiq pútare ató púana wega mitaq ótaq sansá íre áhnte miraorahúwe. Peh táhmaro awahré ké táhtorena kaweraritowe.

<sup>6</sup> Wensabé íre aiq pútare atónsabe Sísaga áhtenúwe.

*Sísaga we kéró ke arambehriraq eqmaq suo ehwehne.*

(Mátíyu 10.5-15; Árúka 9.1-6)

Sísaga mó kehiná suwahpeq mó kehiná suwahperue kosíwáhnorúwe.

<sup>7</sup> Wega we kéró ke airápété téhranítéyábe síáhrabéna mó mi anité mó mi anitéue eqmaq suowe. Eqmaq suanaútaq owainawamarí kaqsusageheéna wega págege aritená

<sup>8</sup> sensabé, Ite ahtapeqsabé tópahme unahmé mónewe íre meyáhro. Peh morá pegiqnáhnkara mewequeq

<sup>9</sup> súu sukiwe pokoro. Téhtaré síótí íre sukióro.

<sup>10</sup> Ite mó ke suwahpeq kirataq peh morá áníné nahupeq kaegaeoro.

<sup>11</sup> Wehukega ite íre mehwéh aitera itene ehwehnsabé iuwahriehre irataq sene nah sueq itene igárátáq kahna tanáhúq poruarueq pokoro úwe.

<sup>12</sup> Úwara eqmaq suo kega pokue mó kehinánsábé mahraréra, Kaweraitankéhboq itene ahbabáq sansa sueq kaweqtaq míáhro teri terinuwe.

<sup>13</sup> Segá áhnte owáináwámári kaqsuera awahre ke óríwi awánká sérá ano abaq sitera kawerarítowe.

*Sóni wání meri merinú aní pukú ehwehne.*

(Mátíyu 14.1-12; Árúka 3.19-20, 9.7-9)

<sup>14</sup> Sísa éhweh mitaq teri mahtaqté terinuwana anotah wahnáh ání Érótiga irowe. Táhmaro kegá iraréra, Sóni wání meri merini aní pukéna mó oga úkurai puana amahnága págege otáq sánsánire uwe.

<sup>15</sup> Uwara mó kegá, We Éráísa wire uwara mó kegá, We Manikáne ehweh irari anímé naho Manikáne ehweh iraru ke tahnsa aní míre uwe.

<sup>16</sup> Uwana Érótiga Sísa éhweh irena mahraréra, Ínéga ayahqno kiraq áuwátáu anímé Sóni we mó oga úkuraire úwe.

<sup>17-18</sup> Sóni oga míotaq wega Érótinsabé ehweh atena mahraréra, Arenábáqne ahre meronawe Mósísiga sehgóro ú ehweh aiq anterutone úwe. Érótiga wenábáq Píripine ahre Éróriása meyonsabe Sóniga wensabé ehweh atowana meyo inínká mi ehwéhnsabé ayehitónsabe Sóni abiahnsa atowe. Abiahnsa atowana Érótiga sóntia keyabé, Sóni táhtoqme karábúsiipéq móátáhro úwara táhtoqme karábúsiipéq móátówe.

<sup>19</sup> Móátówana mi iní Éróriásaga Sóninsabé abiahnsa atataú púana Sóni subiq suaníe iwiáhúmé íre miraorahúwe.

<sup>20</sup> Érótiga Sóninsabé áhtenéna iwíáhéra, We íre ahbabáq ani peh kaweqtaq mía míai aní míre éna, Pehrágahro únsabe mó kegá Sóni íre subiq suahráhuwe. Érótiga Sónine ehweh irotaq iwíáh kikiréna peh Sónine ehweh ireyabe awahbówe.

<sup>21</sup> Érótine anowagá we maqmio ahreraq ko tanáhráq sútaq wega anotah tahutáhúq kawerarena wahnah wehwárínseq sóntia wahnáh wéhwárínseq Kehrari marákórápéqté áhnte moné ko wehwárínseq kirabo aritowe.

<sup>22</sup> Éróriásane ayahunkawagá seba séna ábáhrúwara Érótireq weba táchutahuru kereqka ábáhrúnsabe áhnte iwíáh iwíáhuwe. Minayabe Érótiga mi ahráiyábé, Arega nánio ina naneq náwiníe.

<sup>23</sup> Pópoqnahga tagariéhtáq aiq pútariahnsanuge. Arega nánio ina naneq náwiníe. Wahnahnu naneqsabé ákáhtaq nánio inaraqmé náwiníe úwe.

<sup>24</sup> Úwana ayahunkawagá tueyokue wenanonsabe, Aneq nánio ininkono úwana we-nanoga, Sóni wání meri merini aníné ayahqno nánio úno úwe.

<sup>25</sup> Úwana wega pehbeheráh kibekéna Érótinsabé, Íné Sóni wání meri merini aníné ayahqnon-sabe níre. Amahnága kunubaipéq maqme nánio úwe.

<sup>26</sup> Nánio úwana Érótiga mi ehwéh irotaq wene arupipeq áhnte umeh agúwe. Pópoqnahga tagariéhtáq awinauge ú púana wene arupipeq iwíáh kikiruwe. Ínéreq táchutahuro kegá néne ehweh íráh púana niyehitéhneho éna, Mi ahráiyábé íre ahqáho atahráhúwe.

<sup>27</sup> Minayabe wega sóntia anínsabé, Sónine ayahqno kogiraqme mewe súno éna apubúue eqmaq suowana tunse karábúsiipéq Sónine ayahqno kiraq suowe.

<sup>28</sup> Kiraqme kunabaipéq maqme mewe séna mi ahrári awuwana wenano móawuwe.

<sup>29</sup> Sóni kéró kega we subiq súo ehweh irera sure wene anonka sesehgíwera maisia ónápípéq móárówe.

### Sísaga 5 táchuséni (5,000) weh kirabou ehwehne.

(Mátíyu 14.13-21; Árúka 9.10-17; Sóni 6.1-13)

<sup>30</sup> Sísaga eqmaq suo kega weba kouwekéra sega mirau ehwéhnkákáq síwáhnoru ehwéhnkákáq moke teawúwe.

<sup>31</sup> Íregáritaq kéra séra unsabe Sísareq we kéró kereqka íre táchutahurorahu puana Sísaga sensabé, Máhoro. Ahrenagehboq itebataq abatapi pokonehe úwe.

<sup>32</sup> Minayabe sípi kewewera kure sebataq abatapi pokuwe.

<sup>33</sup> Pokuwara áhnte kegá sípi tagéra, Sísareq we kéró kereq aiq tagóne éra sensuwahpeq suera peh marakóipeq pehbeheráh kure Sísá kinaúrabeq kuwe.

<sup>34</sup> Sísaga koráwégútaq áhnte wehekéq tagéna sensabé arutaboiraritowe. Íre wahnahnkákáq sípísípíq tahnsa mío púana sensabé arutaboiraritená áhntetaq síwáhnorúwe.

<sup>35</sup> Ío tupekinaútaq we kéró kega Sísaba séra wensabé, Mótaq penkinae. Mahtaq peh abatapi púa.

<sup>36</sup> mah kegá so kék márákóráq wahtotaq kehiná suwahpeq táchutahuq kobaiq-maragéhboq eqmaq suo uwe.

<sup>37</sup> Uwana Sísaga sensabé, Itega mah ke táchutahuq kirabooro úwara sega wensabé, Ite áhnte moné 200 Kína mewe q páréti kobaiqmaqme kiraboonenhkono uwe.

<sup>38</sup> Uwana wega sensabé, Páréti árahue kehro? Koragahro úwara sega kosáhnsahera Sísansabé, Párétiwe moberíáh kékre. Pahme téhtaré kékre uwe.

<sup>39</sup> Uwana Sísaga mío keyabé, Narunarunitaq isepí kiria mahpi kiriaue tútuue míáhro úwara sega miraue tútuue míowe.

<sup>40</sup> Áhnte ke 100 wehekéq morabí isepí tútuue mía 50 wehekéq morabí mahpi tútuue míauwe. Miraue kiranéhnue tútuue míowe.

<sup>41</sup> Sísaga mi moberíáh párétiákáq téhtaré páhnkákáq mewena íópeq tagéna Manikánsabe, Kaweróne atena páréti keqme we kéró kega kirabogeheéna náriuwe.

**42** Náriuwara ómiga nowana siyahbankirowe.

**43** Siyahbankirowara páréti arahqkakaq pah arahqkakaq airápété téhtaré páhsíkétí úsawe obenkíq márówe.

**44** Mi tahutáhúq no wehwé íregáritaq 5táhúséni (5,000) weh wóe.

*Sísaga káwehu wání abobóráhtaba nogu ehwéhne.*

*(Mátíyu 14.22-33; Sóni 6.16-21)*

**45** Míowana Sísaga we kéró keyabé, Sípiipéq kiasagoro. Seberaebéq ite nonótáh Pétásáíra suwahpeq pokoro éna apubúue eqmaq suena mío keyabé, Iteruwahpeq pokoro éna

**46** mitaq suena púrerinieéna sáwéhrapeq kiuwe.

**47** Penkútaq we kéró kega sípiipéq káwehu ákáhpi míowana Sísaga webataq marakóipeq míowe.

**48** Míowara siurataapeqté anotah soirírúnsabe awankátate wání subame kéra ahyanahyanuwana sóiriqka saiqnówana tagówe. Ahyahbinkerotaq Sísaga wání abobóráhtaba seba kure kótaikinaútaq

**49** sega we tagéra, We wahnsa wíre íwíáhéra kareuwe.

**50** Ómiga we tagéra anotah ahrééra kareuwana Sísaga sensabé, Pehitaq míáhro. Íné úge. Íre áhreoro úwe.

**51** Sísaga sípiipéq kiasagéna sereq kiwíowana sóiriq táqnáigúwara sega anotah ahténuwe.

**52** Áhtenéra páréti keqme kiraboúnsabe sirupipeq íre iwíáhia peh íre irasa míowe.

*Sísaga áhnte awáhré ké kawerarito ehwéhne.*

*(Mátíyu 14.34-36)*

**53** Segá sípiipéq kure seberaebéq kérawégue Kénésáréti marákórápéq kure mitaq sípi arahwéraq móárówe.

**54** Móárówara mío kega tagéra, Sísa wire éra

**55** pehbeheráh sensuwahrahba pokue, Sísa míéhre mitaq teri mahtaq terinuwara awahre ke sene máhriqkakáq meriqmera weba mórítówe.

**56** Sísaga moke mi ke suwahpeqkakáq moke táchúnipéqkákáq úpeqkakáq nogutaq sega awahre ke máhkétirapéq mórítówe. Mórítera Sísansabé pagunera, Awahre ke arene korósi aiq táhtoragéhe uwara wene korósi táhtoró ke moke kaweragúwe.

## 7

*Manikáne ehwehnka iteinahbúréhne sansá kiotaikire i ehwéhne.*

*(Mátíyu 15.1-9)*

**1** Péhrasi kereq Mósísine ehweh síwáhnoro kereqka Sarúsarama suwahpeqte sure Sísaba sáhatíowara

**2** we kéró kega siyahnkara íre pabeq paberia pehipi nowara tagowe.

**3** Péhrasi kereq moke mó Asiu kereqka sinahbúwáréhne sansá sehgiro puara ahriahri ebeq siyahnkara pabeq paberaruer aanehe táhutahuq aruqaruruwe.

**4** Máhkétirapéqté séyéutaq sega ebeq mósosexua aanehe táhutahuruwe. Segá sinahbúwáréhne sansá áhnte mó sansá miraéra káhpuwe antehyamé tíniwe pabeq pabeq aruqaruruwe.

**5** Péhrasi kereq Mósísine ehweh síwáhnoro kereqka Sísansabé kasenéra, Iteinahbúréhne sansámé are kéráh kégá aneqsabé anteruera peh náwíqkakaq síyahnkárátáté táhutahuq naho uwe.

**6** Uwana Sísaga sensabé, Itewe peh kopéráhpéro ke wóe. Manikáne ehweh irarú ani Áísáíaga naho Manikáne ehwehnka mahraréna,

Mah kegá néníwíq síwéhrate pankerera peh sirupipeq ínénabe íre suwahbehre.

**7** Segá wehukega sehgióro e ehwéh síwáhnoréra, Mahnawé Manikáne sansáne ewe. Minayabe sega ínénabe péhepehe íwíáh íwíáh aintáhwe úwe. *(Aisaia 29.13)*

Itega miraonsabé púkuipéqté éhwéhnká aiq irarire.

<sup>8</sup> Itega Manikánka sehgóro ú ehweh sueq peh wehukene sánsá ambubu atawéq sehgírowe úwe.

<sup>9</sup> Sísaga mó mahraréna, Iteitene sánsá sehgióneheéq Manikánka sehgóro ú ehwehnsábé anetaníbo éq anterúáhwe.

<sup>10</sup> Mósísiga naho mahraréna,

Iteinoibone ehweh ireq se séhréh arítáhro úwe.

Wega mó mahraréna,

Wenanoibonsabé íre kaweq ehwéh arítéh ání subiq súáhro úwe. (*Kisim Bek 20.12, 21.17*)

<sup>11</sup> Manikáne pükuga miraue irariraq itega síwáhnoréq, Wehukenínká wenanoibo séhréh aritahráhi monébópoq mó naneqpopoq matawéna wenanoibonsabé mahraréna, Mahnawé Maniká íre áwátáutaq tahirímé náiyú irino ire.

<sup>12</sup> Wehukenínká miraue irariraq itega, Mi anínká wenanoibonsabé anetaníbo ime aiq kawerire. Wega se íre séhréh arítéhmé aiq kawerire ewe.

<sup>13</sup> Minayabe iteitene ehweh sehgiónsábé Manikánka sehgóro ú ehweh anterúáhwe. Mahna tahná sánsá áhntetaq mira aruqaruréq mó keyábé, Itene sánsá sehgóro arítáhwe úwe.

*Sísaga, Wehukeníné arupipeqté íwíáhgá ahbabáratahráhire ú ehwehne.*

(*Mátiyu 15.10-20*)

<sup>14</sup> Sísaga móñkakáq mitaq mío keyabé, Ínéba sewíáhro. Ite ómiga néne ehweh ireq iwíáhue tagahro.

<sup>15</sup> Wehukenínká táhutahurinka íre ahbabáratéhre. Írakaumo. Peh morá wene arupipeqté íwíáhgá ahbabáratahráhire.

<sup>16</sup> [Ahreakaq kéo, mah ehwéh írátiáhro úwe.]

<sup>17</sup> Sísaga weba sáhatíó ke suena nahupeq kibekúwara we kéró kega mi pabéqmé éhwéhnsábé kasenuwe.

<sup>18</sup> Kasenuwana wega sensabé, Ite moq íre írátiáho? Wehukenínká táhutahurinka íre ahbabáratéhre. Minayabe íre iraho?

<sup>19</sup> Táhutahuqka wehukeníné íwíáhipeq íre túíre. Peh ahmbiupipéq tunse tueagire úwe. Sísaga mah ehwéh irarúmé, Moke táhutahuq nah naneq mire úwe.

<sup>20</sup> Sísaga mó mahraréna, Wehukeníné arupipeqté íwíáhgá ahbabáratéhre.

<sup>21</sup> Wehukeníné arupipeqté, wene íwíáhipeqté, ahbabáq iwiáh áhwárehre. Íre kaweq íwíáhwé, mahbi ahrari abariéwé, aebówé, wehuke subiq suewé,

<sup>22</sup> mó aníné ahre weh abariéwé, mó aníné ménsámehnsánsabe aigará pabekime, íre kaweq sansámé, péhepehenéwé, íre mirao naneq miraime, mó anínsábé íre kaweq íwíáh atewé, éhruruéwé, píribahriéwé, saiyoéwé,

<sup>23</sup> moke mah ahbabáqmé, wehukeníné arupipeqté áhwárehre. Mahnawarinká wehukení ahbabáratéhre úwe.

*Nahnso inínká Sísansabé kawerue aiq pútare ato ehwéhne.*

(*Mátiyu 15.21-28*)

<sup>24</sup> Sísaga mitaq suena Táíya su wahpeqte kéné marakórapeq pokúwe. Pokéna nahupeq kiená, Íné mahtaq míónsábé mó ke teríyeho úwanawe we kopípéq íre míahrahíúwe. Írakaumo.

<sup>25</sup> Owainawanka wene ayahunkawa subiqmaq subiqmarú inínká Sísa míéhre u irena apubúue sure Sísansabé áhtó púana wene aigárátáq arehunseraráq sewíowe.

<sup>26</sup> We mitaqté náhnsó ínínéna Káríki ehwéh iro iní míre. Wega Sísansabé, Nániyahu subiqmaq subiqmari owáinawá segasuo teawuwe.

<sup>27</sup> Teawuwana Sísaga wensabé, Ebeqme animáráinká táhutahurigehe. Sene táhutahuq mewe iamáripá tuparuewé íre kaweq sansáne.

<sup>28</sup> Úwana wega Sísansabé, Anotah aníno, arega irarénawe aiq pútaróne. Iamarínká animáríné siyahpíte megí apípí tahbe tehnopeqte mewe nahtaq sibowágá íre kaqsúéhre úwe.

<sup>29</sup> Úwana Sísaga wensabé, Arega irarénayabé seuwekúno. Owainawanka areniyahu aiq auwena pokire.

<sup>30</sup> Aiq auwena pokire úwana wene nahtapeq pokue tagówana owainawa kaqauwo aní aiq auwowana wene máhriqtäq awahoraq míowana tagówe.

### *Sísaga ahre parosa íre ehwehnorahi aní kawerato ehwehne.*

<sup>31</sup> Sísaga Táíya suwahpeq suena Sáíróna suwahpeq kótaikéna Tékápórísa marákórápéq tuena Kehrari kawéhútáq kúwe.

<sup>32</sup> Mó kegá ahre parosa ání íre kaweq ehwéhnú ani Sísaba meqmera suwe. Sega Sísansabé, Kaweraginkehboq arene ayahnkaratáté táhtoro uwe.

<sup>33</sup> Uwana Sísaga mi aní meqmena mipi sáhurió ke suena móbeq pokue wene ayahnobeqtaté mi aníné ahreipeq paroqmatawéna anehe wene ayahnobeqtaq tehqniarena mi aníné anehbíraq marena

<sup>34</sup> iópeq tagéna ahyanahyanéna ahre parosa ánínsábé mahraréna, Épátae úwe. Mi ehwéhnúmé, Ahre sio úwana

<sup>35</sup> wene ahre siatowana wene anehbí kaweragúwana wega kaweq ehwéhnúwe.

<sup>36</sup> Sísaga sensabé, Mó ke teríyeho úwara sega mó ke teriúnsabe wega teríyeho uge úwara sega áhnte mó ke teri terinuwe.

<sup>37</sup> Mi ehwéh író kega anotah ahténéra mahraréra, Wega moke kawerue miraire éra ahre parosa ání iro atéhre. Íre ehwehnorahi aní ehwehnúno atéhre uwe.

## 8

### *Sísaga 4 táchuséni (4,000) weh kiraboú ehwehne.*

*(Mátiyu 15.32-39)*

<sup>1</sup> Mitaqqake áhnte kegá Sísaba sáhatíowana se táchutahuq íre konsabe Sísaga we kéró keyabé siáhrabéna sensabé,

<sup>2</sup> Mahtaq míáh kégá íneba apahtáró wéhékáh míáhnsábé amahnága se táchutahuq íre kék púana sensabé nirutaboiruge. Íre kirabo aritasa pehipi eqmaq súáhnaraq ahtapeq siunúnkaq surahiyeho. Pehipí íre eqmaq suaníe.

<sup>3</sup> Sene nahtapeq eqmaq súáhnaraqmé sirupibiyabé ahtapeq siunúnkaq márunsurahoneherawoe. Táhmaro míáh kégá íre wahtopeqte surove úwe.

<sup>4</sup> Úwara we kéró kega wensabé, Mahtaq peh abatapi míre. Mah ke awehraq tahutáhúq nagehboq árahue áhnte tahutáhúq meyahráhuno uwe.

<sup>5</sup> Uwana Sísaga sensabé, Árahue parétí kehro úwara abapete téhtaré kékhe uwe.

<sup>6</sup> Sísaga weba sáhurió keyabé, Marakóraq tútuoro éna mi abápété téhtaré párétí mewena Manikánsabe, Kaweróne atena párétí keqme we kéró kega míó ke kiraboigeheéna siuwara sega moke míó ke náriúwe.

<sup>7</sup> Segá táhmaro káriq pah kowana Sísaga Manikánsabe kaweróne atena we kéró keyabé, Minaakaq kirabooro úwe.

<sup>8</sup> Kirabooro úwara míó kega nowana siyahbankirowe. Siyahbankirowara arahqmé abapete téhtaré páhsíkétí úsawe obenkiq márówe.

<sup>9</sup> Peh íregáritaq wehuké 4 táchuséni (4,000) ke míowe.

Sísaga mi ke eqmaq suena

<sup>10</sup> sípiipéq apubúue kiasagéna wereq we kéró kereq kure Tárámánúta marákórápéq pokue.

*Sísansabé, Ótaq sansánúno u ehwéhne.*  
*(Mátíyu 16.1-4)*

11 Péhrasi kegá Sísaba séra wensabé ehweh atera, Manikánka are séhréh atahna tagane-hboq íopeqté ótaq sansánúno uwe. Ótaq sansánúno éra we áhwárawe tagowe.

12 Áhwárawe tagowana Sísane arupipeq págege agúwana wega mahraréna, Amahnága oga míáh kégá aneqsabé ótaq sansá tagéyabe suwahbehro? Teiníboq írátíahro. Sega ótaq sansá íre tagagehe. Ahqáho. Írakaumo úwe.

13 Írakaumo éna Péhrasi ke suena sípi kewewena kérawégue seberaebeq pokúwe.

*Páréti muoráhi naneqsabé pabeqme ehwéhne.*  
*(Mátíyu 16.5-12)*

14 We kéró kega páréti meweyabe sibitagúwara peh morá páréti síipiipéq kowe.

15 Sísaga sensabé págegeue mahraréna, Tagariáhro. Péhrasi kereq Érotireqne páréti muoráhi naneq pehragahro úwe.

16 Úwara sega seye náhenéra, Ite páréti íre kéhnsábé Sísaga mi ehwéh teíre uwe.

17 Uwana Sísaga sene ehweh ahrebéna sensabé kasenéna, Ite páréti íre kéh éhwéhmé aneqsabé sío sío? Amahnága teiú éhwéh íre iraho? Itene irupipeq íre ahrebaho?

18 Itene iurame kéhraq íre tagariaho? Itene iahrewé kéhraq íre írátíaho? Ínéga mirauraume ite íre iahreraq kehro?

19 Ínéga 5 táchuseni (5,000) weh moberíah páréti keqme kirabourautaq arahqmé árahue unáh úsawe obenkíq matoo úwara sega wensabé, Airápét téhtarée uwe.

20 Uwana Sísaga sensabé, Mó ke 4 táchuseni (4,000) weh abapete téhtaré páréti keqme kirabourautaq arahqmé árahue unáh úsawe obenkíq matoo úwara sega wensabé, Abapete téhtarée uwe.

21 Uwana wega sensabé, Minayabe ite amahnágaákáq íre iraho úwe.

*Sísaga aura pira ání kawerato ehwéhne.*

22 Segá Pétásáira suwahpeq suwara mó kegá aura pira ání Sísaba meqme séra wensabé, Mah ání kaweraginkehboq arene ayahnkaratáté táhtoro uwe.

23 Uwana Sísaga aura pira ání ayahtaq ahmboqmena ahnansahrapeq pokéna wene aura tehqni atena ayahnkaratáté táhtorena wensabé, Aiq tagahno úwe.

24 Úwana wega tagéna, Ínéga nogó ké tagogana se awanká tahnsa nogówana tagoge úwe.

25 Úwana Sísaga ayahnkaratáté wene aurapi mó táhtorowana wega ebitawéna wene aura kaweragúnsabe kawerue tagówe.

26 Kawerue tagówana Sísaga wensabé, Mah kehiná suwahpeq amahnága kouwekineho éna wene nahtapeq eqmaq auwowe.

*Pítaga Sísansabé, Are Karáhé wóné ú ehwéhne.*  
*(Mátíyu 16.13-20; Árúka 9.18-21)*

27 Sísaga we kéró kereq meriqmena Sésária Píripái suwahpeq mitaq wahtotaq mó kehiná suwahpeqtaq pokinaúwe. Ahtapeq kutaq wega sensabé kasenéna, Mó kegá ínénabe inse aintaho úwe.

28 Úwara, Arensabé mó kegá, Sóni wání meri merini ání míre ewara mó kegá arenasabé, Éráísa wire ewara mó kegá arenasabé, Manikáne ehweh irari ání míre ewe uwe.

29 Uwara Sísaga sensabé kasenéna, Itega ínénabe inse aintaho úwana Pítaga wensabé, Manikánka ite meirena kaweraitankeheéna omaq ato aní móne úwana

30 Sísaga sensabé minayabe mó ke teriyeho úwe.

*Sísaga, Íné pukéna oga úkinauge ú ehwéhne.*  
*(Mátíyu 16.21-28; Árúka 9.22-27)*

<sup>31</sup> Sísaga we kéró ke síwáhnoréna, Íné wehukení úku aní níwíoqnaneherawoe. Asiu kené aboawah wehreq Manikáne ehweh mibeq mahbeq arítah kerek Mósísine ehweh síwáhnoro kerekka ínésabe, Iuwahriehre éra nubiq suanerawoe. Nubiq suehrana íné pukéna apahtáró wéhékáhtaq iriwe oga úkinauge úwe.

<sup>32</sup> Sísaga mah ewhéh pahsuqme irarúwana Pítaga we meqmena móbeq móatena wensabé awehgu atena, Arega iraréna ewhéhmé aiq pútaragineho úwe.

<sup>33</sup> Úwana Sísaga pabeqme we kéró ke tagéna Pítansabé awehgu atena wensabé, Owainawano, móbeq míahno atena, Arega iraréna ewhéhmé Manikánka íre iwíah atéhre. Minawé peh wehukene iwíah wíre úwe.

<sup>34</sup> Sísaga we kéró kerek moke míó kereqsabé, Ínéba sewíahro éna, Íné sénireyabe awahbeh aníno, arerene awahbeh iwíah suo. Manikáne arambehri mira aruqarurunsabé sega íné awankátaq táhparagéhe. Ínéga miraunserah miraue séniro.

<sup>35</sup> Wewensabé arutaboiréna peh wewene awahbeh iwíah mira aruqaruri anímé oga mérapeq íre awaq miahráhire. Néne kaweq ewhéh koreriena néne sásá sehginieéna wewe awahbeh iwíah susuri anímé oga mérapeq awaq miankéhe.

<sup>36</sup> Wehukenínká moke mah marákóipéqté ménsáméhnsá matiéhtáq tahirímé oga mérapeq íre awaq miahnaraqmé mi mensáméhnsánká árahue séhréh atéh iripo?

<sup>37</sup> Oga mérapeq awaq Meyabe aneqtaté paiqmarankéhbo? Ahqáho. Írakaumo. Íre paiqmarahráhire.

<sup>38</sup> Amahnága oga míah kégá Manikánsabe íre suwahbehrara peh ahbabáq aruqaruwe. Mah tanáhráq ínénabeákáq néne ehwehnsabéákáq ayehiteh anímé íné wehukení úku anínká túónagake mi anínsábé moq niyehitanawire. Nánibone patahga tahnsa térehre naneqkakáq íné wehukení úku aníseq Manikáne íópeqté kerekka túónagake mi anínsábé niyehitáhnana ahqáho ataníe úwe.

## 9

<sup>1</sup> Sísaga mó mahraréna, Teiníboq írátiáhro. Táhmaro iriwe míona ke pehipi íre pukigehe. Ebeqme Manikánka págegeue wahnah wahnahnínaq tagéq anehe pukigehe úwe.

*Sísane auranabiah mó kugú agú ehwehne.*

*(Mátíyu 17.1-13; Árúka 9.28-36)*

<sup>2</sup> Sísaga síwáhnorúwana abapete morá wéhékáh parabagútaq wega Pítareh Sémísireh Sónireh sebataq meriqmena anotah sawéhrápéq kiuwe. Kiuwara mó kegá íre míowara sega tagotaq Sísane auranabiah mó kugú kaweq kugú agúwe.

<sup>3</sup> Wene korósi patahga tahnsanue anotah tabérábé agúwe. Mina tahnsa tabérábewé mah marákóipéqté ambanta pabeq paberí anínká íre miraorahire.

<sup>4</sup> Éráísareq Mósísireqka íópeqté tunse ábóraragéra Sísareq ehwehnuwe.

<sup>5</sup> Ehwehnuwana Pítaga Sísansabé, Íwáhnoraníno, ite mahtaq míonayabé aiq kawerire. Apahtáró úqná pearanéhe. Arene morá, Mósísine morá, Éráísane moráue pearanéhe úwe.

<sup>6</sup> Se anotah ahréu puana Pítaga íre iwíahia pehipi irarúwe.

<sup>7</sup> Irarútaq írabúyánka seubítíowana mipéqté éhwéhká mahraréna, Mah anímé niruní nénáhní míre. Wene ehweh íráhro úwe.

<sup>8</sup> Úwara Sísa kéró kega apubúue aurankahnkaue tagowara mi aníté íre míoyana peh morá Sísa webataq sereq míowara tagowe.

<sup>9</sup> Sáwéhrapeqté tuegutaq Sísaga sensabé, Itega tagéq irewáh éhwéh amahnága mó ke teríyeho. Íné wehukení úku anínká pukéna oga úkonaraq terigéhe úwe.

<sup>10</sup> Únsabe sega mó ke íre teriasa peh oga úkona ehwéhnsábé seyega iwíahue kasenuwe.

<sup>11</sup> Kasenéra, Mósísine ehweh síwáhnoro kegá, Éráísa ebeq sinaraq anehe Manikánka omaq ato aní anehe sinae eme aneqsabé irareo uwe.

<sup>12</sup> Uwana Sísaga sensabé, Éráísaga moke kawerinieéna ebeq suraire. Mó kegá íné wehukení úku aní níwíoqnéra niwiréh aintagéhe. Minayabe Manikáne púkuipéqté séhíranká aiq teí mino?

<sup>13</sup> Ínega teiníboq írátíahro. Éráisa aiq suraire. Púkuipéqté séhíranká aiq irarinserah mó kegá seye suwahbarai sansánéra we íre kaweratárówe úwe.\*

*Sísaga owainawa kaqauwena animai kawerato ehwehne.*

(Mátíyu 17.14-21; Árúka 9.37-43)

<sup>14</sup> Sísareq apahranító we kéró kereqka mó Sísa tagaríah kóbá túwara áhnte mó kegá seba sáhuriówara Mósísine ehweh síwáhnoro kereqka se ehwehuwe.

<sup>15</sup> Ómi mitaq sáhurió kega Sísa tagotaq áhtenéra pehbeheráh weba séra mehwehuwe.

<sup>16</sup> Mehwehuwana Sísaga sensabé kasenéna, Itereq sereq aneq ewhéhnoo úwe.

<sup>17</sup> Se míorabeqte wéhgá Sísansabé, Íwáhnoraníno, nénahni areba meqme suge. Owainawanka we subiqmaq subiqmarinsabé wega ehweh íre irahráhire.

<sup>18</sup> Owainawanka we subiqmaq subiqmaritaq marakóraq tontehriparéhrana arehya kiobinue áwéhraq nankiq nánkírirana wene anonka tawiróbana atia atiaire. Are kéráh kékábé, Owainawa kaqauwáhro ugarawé sega íre miraorahowe úwe.

<sup>19</sup> Íre miraorahowana Sísaga míó keyabé, Ite íre aiq pútare ainteq saiyo ke wóe. Iteba mía míaume ahkake awehraq kanabo? Itega miraonsabé nirupipeq umehime ahkake parabaginabo? Mi anímái ínéba meqme sero úwara

<sup>20</sup> meqmera móátowe. Meqmera móátowana owainawanka Sísa tagótaq mi anímái kúrugúru atowana we marakóraq mårunsurahéna tabenoráhbénoue arehya kiobinúwe.

<sup>21</sup> Sísaga mi aníné abowánsábé kasenéna, Arenahnimé téhwe ahkake miraurairo úwe. Úwana abowágá, Pehgáriq aní míaraitaq mirauraire.

<sup>22</sup> Owainawanka we subiq suanieéna iraipéq áhntetaq susuréna wánípipeq áhntetaq susurire. Arega miraorahónawe arutaboiraité miraúno úwana

<sup>23</sup> Sísaga wensabé, Arega miraorahónawe ono? Manikánsabe aiq pútare atéh áninká moke miraorahire úwe.

<sup>24</sup> Úwana abowágá apubúue mahraréna, Aiq pútare atóge. Arensabé aiq pútare atómé íre awehraq kékhsábé séhréh ainto úwe.

<sup>25</sup> Úwana áhnte mó ke weba peheráh sure mipi sewiówana Sísaga se tagéna owainawansabé awehgu atena wensabé, Íre ehwehnia ahre parosa owáinawáno, mah aní auwe pokúno. Weba mó íre súno úwana

<sup>26</sup> Owainawanka ehwehnabaéna kúrugúru atena auwena pokúwe. Pokúwana mi anímái pusa aní tahnza míonsabe áhnte míó kega, We aiq putiéhre uwana

<sup>27</sup> Sísaga wene ayahnkara táhtoqme iriatowana irigúwe.

<sup>28</sup> Irigúwana Sísaga nahupeq kibekúwara we kéró kega wensabé, Itewe árahinsabé owainawa íre kaqsuahráhuno kasenuwe.

<sup>29</sup> Kasenuwana Sísaga sensabé, Mina tahnza pehipi íre kaqsuahráhowe. Peh púrerirataq kaqsuahráhowe úwe.

*Sísaga, Íné pukéna oga úkinauge móñkakáq irarú ehwehne.*

(Mátíyu 17.22-23; Árúka 9.43-45)

<sup>30</sup> Sísareq we kéró kereqka mitaq suera Kehrari marákórápéq ákáhpi kíúwe. Kíuwana we kéró ke síwáhnorinieéna mó kegá íné míónsábé írého úwe.

<sup>31</sup> We kéró ke síwáhnorú púana áhnte ke míorabeq íre pokúwe. We puké tanahráqsábé síwáhnoréna, Íné wehukení úku aní móintehrara nubiq suaneherawoe. Nubiq suehrana íné pukena apahtáró wéhékáhtáq oga úkinauge úwe.

\* <sup>9:13:</sup> Éráisa suraime pabeqme ehwéhne. Mátíyu 17.12-13 tagáhno.

**32** Úwara sene sirupipeq wene ehweh íre irera kasenéyabe áhreuwe.

*Anotah anímé insebo i ehwéhne.  
(Mátíyu 18.1-5; Árúka 9.46-48)*

**33** Segá Kápénáma suwahpeq kure nahupeq kibekuwe. Sísaga sensabé kasenéna, Ahtapeqmé aneq ehwéh sío síoéwaho úwara

**34** segá ehiya míowe. Ahtapeq nogútaq mó anínká mó anínkáue, Íné anotah aní ite kiotaiqme aní múge iraréra ehwéhu puara ehiya míowe.

**35** Sísaga tútuue ména airápétē téhraníté we kéró keyabé, Ínéba sewiáhro éna anotah aní míanie íwíáhi anínká pehgáriq aní tahnsa míankehe. Wega moke mó ke séhréh aritankéhe úwe.

**36** Séhréh aritankéhe éna káriq aní meqme se ákáhpi iriatena sawiwena sensabé,

**37** Ínénabe arutaboiraintena mahna tahnsa káriq ání séhréh atéh ánínká íné moq séhréh aintéhre. Íné séhréh aintéh ánínká íre peh morá ínébataq séhréhire. Íné eqmaq núwéh ání moq séhréh atéhre úwe.

*Íre itene naruo aní míeh ánímé itene iyahnabo aní míre ú ehwéhne.  
(Árúka 9.49-50)*

**38** Sóniga Sísansabé, Íwáhnoraníno, mó anínká arenáwírue owainawamarí kaqsuéhraq tagéq ahqáho atone. Wega ite íre séíréhnsábé ahqáho atone úwe.

**39** Úwana Sísaga wensabé, Íre ahqáho atáhro. Néníwírue irarinsabé ótaq sansá mirai anínká abehq éhwéh íre apubúue irare intahráhire.

**40** Íre itene naruo aní míeh ánímé itene iyahnabo aní míre.

**41** Teiníboq írátíáhro. Ite Manikánka eqmaq núwéh áníné animárí míáhnsábé mó anínká ite né waní náinaraqmé mi aníné ápeqme íre tabanagia peh ahreraq kanawire úwe. Manikánka mi aníné náwéna apéqmé ahreraq kanawire úwe.

*Ahbabáq sansanká aiq pútare atona sansá saiqnaruahráhi ehwéhne.  
(Mátíyu 18.6-9; Árúka 17.1-2)*

**42** Sísaga mó mahraréna, Wehukenínká ínénabe aiq pútare aintéh ání ahbabáq sansa áúgi ínaraqmé anotahtaq íre kawerire. Áúgi anínká káriq aní áúgi ínaraqmé wene anuopi anotah ebáh táhru púrúrúia káwéhúpípéq tuparuahnana wánípipeq tupekitaq tahirímé aiq kaweri irino.

**43** Arene ayahnkaranká are ahbabáratana ínaraq mina kirasuo. Are peh morá áyáhnkáránkákáq oga mérapeq pokinaraq aiq kawerinae. Are téhtaré áyáhnkáránkákáq ahriahri iraipéq kaqauwahnaraqmé anotah íre kawerinawire.

**44** [Mitaq sene sinonka ahriahri ábe soinae. Mitaq íre puinkorahi iráípere.]

**45** Arene aigáránká are ahbabáratana ínaraq mina kirasuo. Are peh morá áigáránkákáq oga mérapeq pokinaraq aiq kawerinae. Are téhtaré áigáránkákáq ahriahri iraipéq kaqauwahnaraqmé anotah íre kawerinawire.

**46** [Mitaq sene sinonka ahriahri ábe soinae. Mitaq íre puinkorahi iráípere.]

**47** Arene auranka are ahbabáratana ínaraq mina piruo. Peh morá áúránkákáq Manikánka wahnah wahnhnirabeq pokinaraq aiq kawerinae. Téhtaré áúránkákáq ahriahri iraipéq kaqauwahnaraqmé anotah íre kawerinawire.

**48** Mitaq sene sinonka ahriahri ábe soinae. Mitaq íre puinkorahi iráípere úwe. (*Aisaia 66.24*)

**49** Sísaga mó mahraréna, Wehukenínká táhutahuqtaq sóreq ahbiorahnanserah Manikánka ómi irobinataté ahbioqmarankéhe.

<sup>50</sup> Sóreq kaweq nanere. Sóreq auqmah naneq úkínarraqmé itega árahue kaweraranéhbo? Írakaumo. Sóreqka táchutahuq teorahi nanere. Mina inserah itene iyahnabo anímári míáhrabeq pehwehrue méq kaweq soréq tahnsanue míáhro úwe.

## 10

*Sísaga wehga wene ahre kaqsueyabe irari ehwéhne.*

(Mátíyu 19.1-12; Árúka 16.18)

<sup>1</sup> Sísaga mitaq suena Sorana aroipéq seberaebéq Súria marákórápéq pokúwara áhnte wehekéqká weba sáhatíowana wega ahriahri miraúnserahnue síwáhnorúwe.

<sup>2</sup> Péhrasi kegá Sísaba séra wega ahbabáq ehweh irarinkeheéra áhwárawe tagéra kasenéra, Wehga wene ahre suewé mirao sansápo uwana

<sup>3</sup> Sísaga sensabé, Mósísine ehwehnka anereiro úwara

<sup>4</sup> sega wensabé, Mósísine ehwehnka mahraréna,

Wehga wene ahre kaqsuaníe ínaraqmé pépahqtaq sehiranue móawena kaqsuankéhe ire uwe.

<sup>5</sup> Uwana Sísaga sensabé, Ite saiyoéq itene irupipeq págege onsabé, Mósísiga mi ehwéh sehiranúwe.

<sup>6</sup> Wene ehweh íráhro. Wene ehwehnka mahraréna,

Manikánka téh mah marákó mårákó mirarotaq wega wehakaq ahreakáq mirarowe.

<sup>7</sup> Minayabe wehga wenanoibone nah suena wene ahrereq moráráq mía míagehe ire. (Stat 1.27, 2.24)

<sup>8</sup> Se peh morá áníné áú tahnsa úkigehe. Minayabe se íre mó aní mó aní tahnsa méra peh morá ání tahnsa míagehe.

<sup>9</sup> Manikánka wehakaq wene ahreakáq moráráq mía míotao aritonsabe wehga wene ahre súéhneho úwe.

<sup>10</sup> Sísareq we kéró kerekka nahupeq kibekutaq sega móñkakáq ahre sue sansansábé kasenuwe.

<sup>11</sup> Kasenuwana wega sensabé, Wehga wene ahre suena mó ahré meyharnaraqmé wega ebeq piah ahré ahbabáratena we íre kaweratéhre.

<sup>12</sup> Ahrega wenawehq awena mó anítáq wehkínaraq wega ebeq piah weh ahbabáratena we íre kaweratéhre.

*Sísaga, Káriq anímárinká ínéba sewíagehboq ahqáho arítého ú ehwehne.*

(Mátíyu 19.13-15; Árúka 18.15-17)

<sup>13</sup> Sísaga káriq anímári táhtorankeheéra mó kegá meriqmera móritówara we kéró kega móritó keyabé suwehgu aritera ahqáho arítówe.

<sup>14</sup> Ahqáho arítówana Sísaga mina tagéna abiahnsa aritená sensabé, Mi káriq anímáriká ínéba sewíagehboq ahqáho arítého. Káriq anímárinká ínénabe aiq pútare aintáh serahno kegá Manikánka wahnah wahnahnirabeq awaq miagéhe.

<sup>15</sup> Teiníboq írátíáhro. Káriq anímárinká Manikánka wahnah wahnahnirabeq sabé sirutaboirowe. Peh morá sega onserahno kegá mibeq kioráhowe úwe.

<sup>16</sup> Sísaga mi káriq anímári sawiwsena wene ayahnkaratáte táhtoqme Manikánsabe, Kawerarite séhréh arito ue púrerúwe.

*Áhnte mensáméhnsánkákáq ánínsábé árahue oga mérapeq awaq mianabo i ehwéhne.*

(Mátíyu 19.16-30; Árúka 18.18-30)

<sup>17</sup> Sísaga ahtapeq pokinaútaq wehga peheráh séna arehunseraráq ména wensabé kasenéra, Íwáhnoraníno, arewe kaweq aní míahne. Oga mérapeq awaq mianíboq anerinkono úwe.

<sup>18</sup> Uwana Sísaga wensabé, Aneqsabé kaweq aníne aintahno? Manikánka webataq kaweqtaq mía míaire.

**19** Sehgíoro ú ehwehmé aiq ahtebáhne. Mi ehwéhmé mahraue kéhre. Mó aní subiq súého. Mó aníné ahre weh abariiyeho. Aebóiyeho. Mó keyábé péhe éhwéh arítáhro. Péhe éhwéhnue mó kené ménsámehnsá meyého. Iteinoibone ehweh ireq se séhréh arítáhro úwe.

**20** Uwana wega Sísansabé, Íwáhnoraníno, íné pehgáriq mahbi míarau tanáhráqkákáq amahnágaákáq moke mina kawerue sehgíúge úwe.

**21** Úwana Sísaga we tagéna arutaboiratena wensabé, Peh morá náneq íre miraóne. Are pokue moke matiahna mensáméhnsá paiqmaqme móne mewe tabonah ke nário. Mirainaraqmé íópeq kaweq naneqmarí matiankehe.

**22** Tabonah ke nárie íné séniro úwana mi anínká irena áhnte mensáméhnsá ko púana wene arupipeq umeh agúwana pokúwe.

**23** Sísaga pabeqme we kéró ke tagéna sensabé, Áhnte mensáméhnsá matiáh kégá Manikánka wahnah wahnahnirabeq kieyabe anotah pagégéue mirao naneq mire úwe.

**24** Úwara we kéró kega mi ehwéhnsábé áhtenuwana Sísaga mó mahraréna, Náníbáqmarino, ménsámehnsánsabe iwíáho kegá Manikánka wahnah wahnahnirabeq Kíransabé anotah pagégéue mirao naneq mire.

**25** Kéhma anotah kane. Mi kanká wai abahrabahpipéq kéagínayabé págegeue mirai naneq mire. Mina inserah áhnte mensáméhnsá matiéh áninká Manikánka wahnah wahnahnirabeq kinayabé anotah pagégéue mirai naneq mire úwe.

**26** Úwara sega mi ehwéhnsábé anotah ahténéra Sísansabé, Minayabe insega oga mérapeq awaq miahráhiro uwe.

**27** Uwana Sísaga se ebitáwéna sensabé, Wehukega íre miraorahowana Manikánka miraorahire. Peh morá Maniká wewega moke miraorahire úwe.

**28** Úwana Pítaga wensabé, Itega moke mationa naneq sueq are kérone úwana

**29** Sísaga mahraréna, Teiníboq írátiáhro. Ínénabe sirutaboiréra kaweq ehwéh teriera néne arambehri miraoneheéra sene nahme, sene marakówé súáhmé amahnága Manikánka áhnte mó 100 mó nárinkéhe. Nárinara sega áhnte nahmá, marakówé matiagehe. Néne arambehri miraoneheéra sinahnowarehwé si wahwarehwé sensibáqmarimé sensinoibowe sene animárimé súáhmé

**30** amahnága áhnte mó kegá sensuwahrah úkigehe. Síbákawaréhwé, sinahnowáréhwé, sinowaréhwé, animárimé áhnte úkigehe. Mah tanáhráq kaweq ehwéhnsábé suwahriáhna kegá se síwioqnagehe. Mókake oga mérapeq awaq miagéhe.

**31** Amahnága áhnte ebeq se kegá mi tanáhráq sinehe kigehe. Sinehe se kegá ebeq kigehe úwe.

### *Náhmbáh 3 tanáhráq Sísaga, Íné pukéna oga úkinauge ú ehwehne.*

*(Mátíyu 20.17-19; Árúka 18.31-34)*

**32** Sísareq we kéró kereqka ahtapeq méra Sarúsarama suwahpeq kure Sísaga ebeq kúwara sega áhtenuwe. Anehe ku kegá áhreuwe. Sísaga airápété téhraníté we kéró keyabé síáhrabéna sensabé mó kegá we miraoneherau ehwéh móñkakákáq teriuwe.

**33** Teriena, Írátiáhro. Ite Sarúsarama suwahpeq pokonaraq sega íné wehukení úku anímé Manikáne ehweh mibeq mahbeq arítáh kéréq Mósíne ehwéh síwáhnoro kereqpa mónuankéhe. Mónuwehrara sega íné, Subiq súáhro aritera nahnsó kebá mónuwehrara

**34** sega niwiréh aintera tehqni aintera sehikarankákáq áréti sáhtáté nubiq marera nubiq suagéhe. Nubiq súéhrana íné pukéna apahtáró wéhékáhtáq oga úkinauge úwe.

### *Sémísireq Sónireq anité úkéyabe suwahbó ehwehne.*

*(Mátíyu 20.20-28)*

**35** Sémísireq Sónireq Sébérine ahninkáwáraráégá Sísaba séra wensabé, Íwáhnoraníno, ite iuwahbeh naneq, itega teawéya naneq, miraúno uye.

<sup>36</sup> Uyana wega sensabé, Aneq miraitaníkono úwe.

<sup>37</sup> Úwara sega wensabé, Arega wahnah wahnahnónarabeq íópeq míéhnagake ite mó anímé arene ayah púpeq mó anímé arene ayahnaperue tútuue míagehe aito uye.

<sup>38</sup> Uyana Sísaga mi abáráhréyábé, Itega tenieya ehwéhnsábé íre iwíáhóye. Íre iwíáhóye éna pabeqme ehwéh mahraréna, Ínéga no kahpúípéqté náneq itega moq nahrahoyo? Mó kegá íná núwéhrarabeq sénirahráhoyo úwara sega wensabé,

<sup>39</sup> Itega miraorahúye uye.

Uyana Sísaga sensabé, Ínéga no kahpúípéqté náneq itega moq nayehetawoye. Mó kegá íná núwéhranserah ite moq iuwaneherawoe.

<sup>40</sup> Peh néne niyah púpeqkakáq niyahapeqkakáq tútuue míéhra ke omaq sitewé íre néne arambbehri wire. Manikánka omaq sitéh ánítégá mitaq tútuue míayeherawoye úwe.

<sup>41</sup> Úwara inayáhnkú we kéró kega mah ehwéh irera Sémísireq Sónireqsabé suwehgu arítówe.

<sup>42</sup> Suwehgu arítówara Sísaga moke we kéró keyabé, Ínéba sewíáhro éna sensabé, Mah marákóípéqté sánsámé mó kegá sene ehweh sehgigeheéra wahnah kegá wahnahnártáhwe. Sene anotah wehwárínká, Itene ehweh ireq sehgóro éra págegeue wahnah arítáhwe. Mi sansá aiq tagariáhwe.

<sup>43</sup> Itewe mi sansá íre oro. Ahqáho. Íné anotah aní míanie íwíáhi anínká wereq míáh ké séhréh aritankéhe.

<sup>44</sup> Néne iyahnabone wahnah míanie íwíáhi anínká sene arambehriraq séhréh aritankéhe.

<sup>45</sup> Íné wehukení úku anímé mó kegá íná séhréh aintageheéra tutauge? Írakaumo. Ínéga mó ke séhréh aritanieéna tutauge. Áhnte ke oga míagehboq se merirena kaweraritanieéna pukinie úwe.

### *Sísaga aura pira ání kawerato ehwehne.*

(Mátíyu 20.29-34; Árúka 18.35-43)

<sup>46</sup> Sísareq we kéró kereqka Séríko su wahpeq kuwe. Segá Séríko su wahpeq suaneherautaq áhnte mó kegá kérówe. Aura pira ání wenáwíq Pátíméúsi ahnayehráq tútuue ména ineh inehuwe. We Tíméúsine ahninkáwáe.

<sup>47</sup> Wega tútuue ména, Sísa Néhsara su wahpeqte ánínká kouwekire u irena anotahtaq mahraréna, Sísao, Tébítine anahwao, ínénabe arutaboirainto úwe.

<sup>48</sup> Úwara áhnte kegá wensabé awehgu atera, Ehiya míáhno uwana wega íre tóbáh agia peh anotahtaq mó mahraréna, Tébítine anahwao, ínénabe arutaboirainto úwe.

<sup>49</sup> Úwana Sísaga mitaq kowéna, Mahbeq súno teawéro úwara sega aura pira ánínsábé áhrabéra, Iwíáh íwíáhé irigúno. Arensabé áhrabire uwana

<sup>50</sup> wene káhq ambántá akairuena apubúue kie irigue Sísaba súwana

<sup>51</sup> wega wensabé, Aneq mira ataníkono úwana aura pira ánínká wensabé, Íwáhnoraníno, íná taganiboq néne niura kawerainto úwana

<sup>52</sup> Sísaga wensabé, Pehwehrue pokéwahno. Ínénabe aiq pútare aintahnaga aiq kaweratoge úwana wene aura apubúue kaweragúwana ahtapeq Sísa kérówe.

## 11

### *Sísaga Sarúsarama su wahpeq kú ehwehne.*

(Mátíyu 21.1-11; Árúka 19.28-40; Sóni 12.12-19)

<sup>1</sup> Sísareq we kéró kereqka Sarúsarama su wahpeq wahtotaq kíútaq sega Óríwi sawéhrápéq kíúwe. Mi sawéhwé Páítápási su wahpeq Pétáni su wahpeq wahtotaq kíútaq kehre. Mi sawéhráq kíútaq Sísaga we kéróya anité eqmaq suanaútaq

<sup>2</sup> sensabé, Isebeq wahtotaq ke suwahpeq pokotao. Mitaq kirataq iyaráh ká tónki áráhq wehuke íre áhkókoue nogí ká tagéta pugeqme meqme setao.

<sup>3</sup> Pugeréhrataq mó anínká itensabé, Aneqsabé pugerehyo ínaraq wensabé, Itene Wahnah áhkókoue kinkeheéta meroye. Wega mótaq tónki eqmarahnana kéna sinkehe teawétao éna eqmaq suowe.

<sup>4</sup> Eqmaq suowara pokue anotah ahtápéq onsa kéhrabeq iyaro tonkí áráhq tagéra pugeróye.

<sup>5</sup> Pugeróyataq mitaq iriwe míó kega sensabé, Aneroyo? Tónkiwe aneqsabé pugerehyo uwara

<sup>6</sup> sega Sísaga teriu ehweh teríúyara sega sensabé, Meyáhtao uwe.

<sup>7</sup> Meyáhtao uwara tónki áráhq Sísaba seweqméra sene korósi mi kané abobiahtaq uwiq márójana Sísaga mi tonkíné abobiahtaq kierútú agúwe.

<sup>8</sup> Áhnte kegá Sísansabé iwíáh iwíáh ató púara sene korósi ahtapeq uwiqme abaeue móárówara mó kegá uworapeqté áwánká ánáhakaq áyáhnawé apiwe ahtaqpeq awahri-rarówe.

<sup>9</sup> Sísareq moráráq ebeq ku kereq anehe ku kereqka anotahtaq mahraréra, Itene Wahnah áwírue si anínsábé iwíáh iwíáh atone.

<sup>10</sup> Tébítí iteriboga naho wahnah wahnahnúnserah kawerue wahnah wahnahnína anínsábé iwíáh iwíáh atone. Maniká íópeq míéhraq wensabé iwíáh iwíáh atone uwe.

<sup>11</sup> Sísaga Sarúsarama suwahpeq kiená Manikánsabe iwíáh iwíáh atáh náhúpéq kibekéna mitaq moke ko naneq aurankaué tagówe. Penkinaúnsabe wereq we kéró kereq airápété téhranítégá mitaq suera Pétáni suwahpeq pokuwe.

*Sísaga awankánsabe sera íre iyankéhe ú ehwehne.*

*(Mátíyu 21.18-19)*

<sup>12</sup> Ahbiah tahnsá sega Pétáni suwahpeq suera ahtapeq sutaq Sísa arupibiúwe.

<sup>13</sup> Arupibiúwana ánáhakaq áwánká móbeq tagéna awankánara sabátáhq koragówana íre serankakáq peh ánáh kowe. Sera íre iyo tanahráq púana sera írakaunúwe.

<sup>14</sup> Írakaunúwana Sísaga mi awánkánsábé ehweh teawena, Mókake sera íre íyéhna puara mó kegá arene sera íre íséwe naneherawoe úwara we kéró kega wene ehweh írówe.

*Sísaga Manikánsabe iwíáh iwíáh atáh náhtápéqté wíráípéq paiqnanánu ke máhpeq kaqsuo ehwéhne.*

*(Mátíyu 21.12-17; Árúka 19.45-48; Sóni 2.13-22)*

<sup>15</sup> Sísareq we kéró kereqka Sarúsarama suwahpeq kíútaq Sísaga Manikánsabe iwíáh iwíáh atáh náhtápéqté wíráípéq kibekéna mitaq paiqnanánu ke máhpeq kaqsuowe. Kaqsuena móne paiqnanánu kené wéhuwehu tahbékárí pioruena kiboki paiqnanánu kené síahwarí pioruena paetárara aruowe.

<sup>16</sup> Paetáruena sensabé, Manikánsabe iwíáh iwíáh atáh náhtápéqté wíráípéqmé itene ménsámehnsá íre mewe nógóro aritowe.

<sup>17</sup> Íre mewe nógóro aritena síwáhnoréna, Manikáne ehwehnka mahraréna, Néne nahme mah kehiná kékínánká púreré nahne áwíratagéhe ire. *(Aisaia 56.7)*  
Itega miraonka mah nahmé aebó kégá mehwatíáhnserah nah úkire úwe.

<sup>18</sup> Úwara ómi mitaq sáhurió kega Sísane ehwehnsabé áhtenu puara Manikáne ehweh mibeq mahbeq arítáh kéréq Mósísine ehweh síwáhnoro kereqka tagéra Sísansabé áhreeéra, We árahue subiq suanéhnkono éra sói síouwe.

<sup>19</sup> Ío tupekútaq Sísareq we kéró kereqka Sarúsarama suwahpeq suera pokuwe.

*Púrerínaraq aiq pútaq náninawire iwíáhi anínká meyankéhe ú ehwehne.*

*(Mátíyu 21.20-22)*

<sup>20</sup> Ahbiahipeq sega Sarúsarama suwahpeq kouwekoneherautaq ehyatagú awanká tagowana aiq moke ehyatagúwe.

<sup>21</sup> Ehyatagúwana Sísaga mi awánká teawu ehwéhmé Pítaga ahreraq matawéna Sísansabé, Íwáhnoraníno, tagáhno. Inokáh arega ehweh teawátóna awánká aiq ehyatagire úwana

<sup>22</sup> Sísaga sensabé, Manikánsabe aiq pútare atáhro.

<sup>23</sup> Teiníboq írátiáhro. Wehukenínká sáwéhyabe teawena, Sáwého, arega mitaq sue anotah kawéhúpípéq kogahno teawinaraqmé mirainawire. Wega teawina ehwéhnsábé árahinabomo íwíah íre ínaraq peh ínéga iraru ehwéh aiq pútaraginawire íwíah ínaraqmé mirainawire.

<sup>24</sup> Teiníboq írátiáhro. Ite púrerirataq aiq pútaq náinawire íwíáhirataq náinawire úwe.

<sup>25</sup> Sísaga mó mahraréna, Are iriwe púrerina tanáhráq mó anínsábé abiahnsa atéhnaraq wene ahbabáqsabe íre iwíáhue ahreraq matiahno.

<sup>26</sup> [Íópipeq míeh Ítéribogá arene ahbabáqsabe íre iwíáhinkeheé abiahnsa atéh áníné ahbabáqsabe íre iwíáhue ahreraq matiahno úwe.]

*Sísansabé, Insegá miraúno atáráiro u ehwéhne.*

(Mátíyu 21.23-27; Árúka 20.1-8)

<sup>27</sup> Segá Sarúsarama suwahpeq mó sure Sísaga Manikánsabe iwíah íwíah atáh náhtápéqté wíráipéq nogutaq Manikáne ehweh mibeq mahbeq arítáh kéreq Mósíne ehweh síwáhnoro kereq Asiu kené aboawah wehreqka weba séra

<sup>28</sup> kasenéra, Arega miraóna naneqme árahinie miraono? Insegá miraúno atéhnsábé miraono? Teio uwe.

<sup>29</sup> Teio uwana Sísaga sensabé, Ínéga itensabé moq kaseninie. Kasenona ehweh tenírataqmé ínénabe miraúno aintarái aní teiníe.

<sup>30</sup> Teiníe éna Sóniga wání meri merininkeheéna insegá eqmaq áuwátáiro? Manikánka eqmaq áuwátáiro? Peh wehukega eqmaq áuwátóo? Teníero úwe.

<sup>31</sup> Teníero éna, Tenírataqmé ínénabe miraúno aintarái aní teiníe úwara sega epéq só síoéra, Anere teawenéhnkono? Manikánka eqmaq áuwátáire teawénaraqmé wega itensabé, Aneqsabé wene ehwehnsábé íre aiq pútare atáró inae.

<sup>32</sup> Ite wehukega Sóni eqmaq áuwátówe moq íre teaweráhúne uwe. Ómi mó kegá, Sóni aiq pútaq Manikáne ehweh irari aní míre íwíáhunsábé sega mi keyábé áhreu puara

<sup>33</sup> Sísansabé, Sóniwe insegá eqmaq áuwátáiramo. Ite íre tagarione uwana Sísaga sensabé, Itega íné íre teniéwe. Minayabe ínéga moq ínénabe miraúno aintarái aní íre teiníe úwe.

## 12

*Sotáq wahnahnuro ahbábáq kékáháq pabeqme ehwéhne.*

(Mátíyu 21.33-46; Árúka 20.9-19)

<sup>1</sup> Sísaga Asiu keyábé pabeqme ehwéh mahraréna, Wehga sonsoqme náhníáq sera ayu uqmarena wirarena wahnahnína uqná peataire. Pearena náhníáq sera ano kunubaipéq sarerankeheéna mata ubuqmarena mó keyábé, Néne sotáq wahnahnue náwe soqintewáhro aritena mitaq suena íre wahto wáhnaupéqté ké suwahpeq pokuraire.

<sup>2</sup> Náhníáq sera irai tanáhráq ákáhtaq koweankeheéna wene arambehri aní sotáq wahnahnuro kebá eqmataire.

<sup>3</sup> Eqmatairara sotáq wahnahnuro kegá we táhloqme sera íre náwasa subiqmarera kaqsúówe.

<sup>4</sup> Kaqsúówana so aboga mó arámbéhrí aní seba eqmatairara sega wene ayahqnotaq subiq marera íre kaweq sansá atárówe.

<sup>5</sup> Íre kaweq sansá atárówana so aboga mó aní eqmatairara sega we subiq sutowana mó wene arambehri ke eqmaq sutairara sega mó tahmáró subiqme kaqsuera mó tahmáró subiq sutowe.

<sup>6</sup> Subiq sutowana peh morá mó aní míaraire. Mi wehné arunáwí áhnínkawá míarairana wega iwiáhena, Nénahni púara sega wensabé áhtenéra wene ehweh iragéhe éna anehe wenahni eqmataire.

<sup>7</sup> Eqmatairara wahto kuraitaq sotáq wahnahnuro kegá we tagéra seye náhenéra, So abone ahninkawá aiq sire. Mah so awaq mianéhboq we subiq suanéhe íwiáhéra

<sup>8</sup> we táhcoqme sopípéq subiq suera wene anonka máhpeq tuparutowe.

<sup>9</sup> Wenahni subiq sutonsabé so aboga mi ke anere aritankéhbo? Teiníboq írátiáhro. So aboga wene sotápéq séna wahnahnuro ke subiq suanawire. Subiq suena wene so mó ke kawerue wahnahnigeheéna eqsitankéhe.

<sup>10</sup> Eqsitankéhe éna, Minayabe Manikáne ehwehnka íné éhwéh mahraréna, Nah piáh kégá suto wahqká moke nahwiahnsanse kiotaikire.\*

<sup>11</sup> Itene Wahnahnka mirainsabé itega, Kaweq sansáne íwiáhúne ire. *(Buk Song 118.22-23)*

Itewe mi sehirá íre ahtebahó úwe.

<sup>12</sup> Úwara wene ehweh irera seye náhenéra, Sísaga mah pabéqmé éhwéhnue itepi parobehre íwiáhuwe. Mira íwiáhu puara sío síoéra, We táhcoqme karábúsiipéq móatanéhe éra peh mitaq sáhurió keyabé áhreunsabe mó iwiáhéra Sísauwera pokuwe.

*Sega Sísansabé, Táhkísi moné awenéhnikono kasenu ehwéhne.*

*(Mátíyu 22.15-22; Árúka 20.20-26)*

<sup>13</sup> Asiu wahnah kegá táchmaro Péhrasi kereq táchmaro Érótine iyahnaboreqsabé, Sísaga áhwára áhwára ehwéh irarinkehboq áhwárawe tagéq pokue págegeue kogasenoro éra eqmaq súówe.

<sup>14</sup> Eqmaq súówara kure Sísansabé, Íwáhnoraníno, ite tagarionawe arewe aiq pútaq ehwéh iraréna aní móne. Arega anotah kereq pehgáriq kereqsabé peh monseráh iwiáhóne. Arega wehuke íre ehnenia peh Manikáne sansá tábúsoqme pahsuqme íwáhnoróne. Minayabe teio. Aneq iwiáhono? Itega Aroma kené wahnahme Sísáhri tákísi moné awenéhnikono? Árahonehnkono uwe.

<sup>15</sup> Árahonehnkono uwana Sísaga sene epéráhpérü iwiáh tagéna sensabé, Aneqsabé íné áhwárawe tagéq níwíloqnaho? Ebah moné taganibooq mewe sero úwara

<sup>16</sup> sega peh morá ébáh móne ábóraq márówáne. Ábóraq márówana wega sensabé, Mah monéráq insene píkisahakáq áwíqkakaq kehro úwara sega wensabé, Aroma kené wahnah aní Sísáhrine uwe.

<sup>17</sup> Uwana wega sensabé, Aroma kené wahnahne náneq wewe náwero. Manikáne naneq wewe Maniká náwero úwara sega wene ehwehnsabé áhtenuwe.

*Manikánka pukia ké iriwe organúq sitankéhe ú ehwehne.*

*(Mátíyu 22.23-33; Árúka 20.27-40)*

<sup>18</sup> Sáyusi kewé pusa ké íre iriwe organúq sitankéhe íwiáhu kee. Táchmaro mi kegá Sísaba séra wensabé,

<sup>19</sup> Íwáhnoraníno, Mósísine sehiranka maharéna, Íre aninkákáq wéh pukínaraq wenábáqka kéweiní meyankéhe. Mi inínká maqmarahna anímári wenawahne animári míageheéna meyankéhe íre. *(Lo 25.5)*

<sup>20</sup> Minayabe abapete téhraníté se ábárahnhahnah míarowe. Siwhawágá ahre mewena íre aninkákáq uraitaq pukurairae.

<sup>21</sup> Pukurairana náhmbáh 2 abaqqwágá awahwáné kéweiní mewena íre aninkákáq uraitaq pukurairana náhmbáh 3 abaqqwágá moq monseráhnuraire. Moke mi abáráhnáhnahnka mi iní mótaq mótarue mewera íre aninkákáq urotaq orah animári pukurowe.

\* <sup>12:10:</sup> Aigárápéqté éhwéh Mátíyu 21.42 tagáhno.

<sup>22</sup> Moke mi abápéqté téhraníté se ábárahnhnah mótaq mótarue mi kewéíní mewera íre aninkákáq urotaq orah animárínká pukurowana sinehemé mi iní moq pukuraire.

<sup>23</sup> Moke mi abáráhnahnka mi iní meronsabé iriwe organúq sitahnaraq insene ahre míanabo kasenuwe.

<sup>24</sup> Kasenuwana Sísaga sensabé, Itewe Manikáne púkuipéqté séhírankákáq wega págegeue miraorahi sansánkákáq íre ahtebah puaq áhwára áhwára ahbabáq iwiáhowe.

<sup>25</sup> Manikánka pusa ké iriwe organúq sitahnaraq se peh íópeqté ké tahnsa mía míaigehe. Mi tanáhráq wehga ahre íre meyagéhe. Ahrega íre wehkigehe.

<sup>26</sup> Pusa ké organúq sitahnayabé Mósísiga sehgóro ú sehira íre sáhnsahoo? Uworapeqté káriq awanká irarehnsabé sehiramé Manikánka Mósísinsabé mahraréna,

Íné Ébáráhmane Maniká múge. Íné Áhísáhkine Maniká múge. Íné Sékópane Maniká múge úwe. *(Kisim Bek 3.2,6)*

<sup>27</sup> Manikámé íre pusa kéné Manikáne. Írakaumo. We peh oga míáh kéné Maniká míre. Minayabe itega íre tábúsoqme iwiáhowe úwe.

*Manikáne kiotaiki sansánsábé éhwéhne.*

*(Mátíyu 22.34-40; Árúka 10.25-28)*

<sup>28</sup> Mósísiga sehgóro ú ehweh síwáhnori aní mitaq súwara Péhrasi kegá ehwehuwana irowe. Sísaga Sáyúsi kené kase ehwehnsabé tábúsoqme teriu púana wega Sísansabé kasenéna, Sehgíro ú ehwehmé aneq ehwéhnká mó ehwéh kiotaikiro úwe.

<sup>29</sup> Úwana Sísaga wensabé, Kiotaiki ehwéh teaweníboq iro.

Ísara keo, írátiáhro.

Maniká itene Wahnah peh morá ání míéhre.

<sup>30</sup> Maniká itene Wahnhahnsabé irutaboiroro.

Moke itene irupipeqkákáq

moke itene iwiáhopipéqkákáq

moke itene págege inónkánkákáq

Manikánsabe irutaboiroro.

Mah ehwéhmé moke mó sehgíro ú ehweh aiq kiotaikire.

<sup>31</sup> Mó kiotaiki ehwéh iro.

Arerensabé arutaboirónanserah

mó anínsábé moq arutaboirúno.

*(Lo 6.4-5; Wok Pris 19.18)*

Mó sehgíro ú ehwehnká mah ehwéhtáré íre kiotaikire úwe.

<sup>32</sup> Úwana síwáhnori anínká Sísansabé, Íwáhnoraníno, arega aiq tábúsoqme iraréne. Manikámé peh morá áníne. Peh morá webatare. Arega aiq pútaróne.

<sup>33</sup> Itega Manikánsabe moke itene irupipeqmé, moke itene iwiáhipeqmé, moke itene págege inónkámé irutaboirúnawe, anotah kawéq sánsáne. Iteitensabé irutaboirúnanserah mó anínsábé moq irutaboirúnawe anotah kawéq sánsáne. Wehukega ménkámehnká subiqme agewe Manikánsabe titiraruqarurowe. Arutaboiré sansanká moke titiré sansa kiotaikire úwe.

<sup>34</sup> Úwana Sísaga we ahtebah ehwéh irena wensabé, Manikánka wahnah wahnah-nirabeq arewe wahtotaq míahne úwara míó ke síáhtónsabe mó ehwéh íre kasenuwe.

*Manikánka omaq ato aní éhwéh Sísaga kasenú ehwehne.*

*(Mátíyu 22.41-46; Árúka 20.41-44)*

<sup>35</sup> Sísaga Manikánsabe iwiáh íwíáh atáh náhtápéqté wíráípéq síwáhnoréna míó keyabé, Mósísine ehweh síwáhnoro kegá, Manikánka omaq ato aní koweriréh ánímé we peh Tébítine anahwa wíre ewe. Mi ehwéhmé aneqsabé irareo kasenéna

<sup>36</sup> Manikáne Awanka Tébíti iwiáh atowana igonkó pukúípéq sehiranuwana mi ehwéhnká mahraréna,

Maniká itene Wahnahnka néne Wahnahnsabé,  
Niyah púpeq tútuue míéhnaraq  
arene naruo saiqnariankehe atóge úwe ire.

(*Buk Song 110.1*)

<sup>37</sup> Tébítiga mi anínsábé, Néne Wahnahne ato puana we árahue wene anahwa míanabo kasenúwe.

*Péhrasi kereq Mósísine ehweh síwáhnoro kereqka ahbabárowe ú ehwehne.*  
(*Mátíyu 23.1-36; Árúka 11.37-54, 20.45-47*)

Kasenúwara áhnte wehukégá wene ehweh irera anotahtaq iwíáh íwíáhowe.

<sup>38</sup> Sísaga síwáhnorútaq mahraréna, Mósísine ehweh síwáhnoro kegá mira onserahniyeho. Mó kegá se tagéra sensíwiq pankergeheéra íre wahto korósí úbíqméra nogówe. Sega máhkétirapéq nogótáq mó kegá se mehwéh ariteyabe suwahbehre.

<sup>39</sup> Momiwí nahtápéq pokotaq peh kaweqtapéq tútuue méyabe suwahbehre. Táhutahurorabeq aboawah wehwári tútuue míáhrabeq méyabe suwahbehre.

<sup>40</sup> Sega kéweinínsónsábé péhe éhwéh teriera sene ménsámehnsánkakaq sene nahnkakaq mewe meweowe. Mó kegá ite kaweqtaq míáh ké wóe igeheéq wehuke míáhtáq íre wahtotaq púreq aruqaruwé. Mirao puana Manikánka ehweh aritahna tanáhráq se anotahtaq kamah arinkéhe úwe.

*Tabonah inínká Maniká náwu monéyábé éhwéhne.*  
(*Árúka 21.1-4*)

<sup>41</sup> Wehukega Maniká móne náwúrabeq Sísaga wahtotaq tútuue míowara áhnte kegá séra sene móne mitaq náwúwana tagówe. Tagówara áhnte monéákáq kegá áhnte moné náwúwe.

<sup>42</sup> Náwúwana tabonah kewéíninká séna káriq monéráré náwuwe. Mi monéráré peh morá ákáhtaq pabusa móne tahnsane.

<sup>43</sup> Sísaga we kéró keyabé, Ínéba sewíáhro éna teiníboq írátiáhro. Mah tabónáh kewéíninká náwí mónegá moke mó kegá náwé móne kiotaikire.

<sup>44</sup> Sega sene pehipi matíah móne náwéwana mah tabónáh kewéíninká moke wene matiéh mónewé aiq náwíre. Aiq náwí púana amahnága táhutahuq paiqmarahna moné íre kékre. Minayabe wega náwí mónegá moke mó kegá náwé móne kiotaikire úwe.

## 13

*Sísaga, Manikánsabe iwíáh iwíáh atáh náh íre kaweraginawire ú ehwehne.*

(*Mátíyu 24.1-2; Árúka 21.5-6*)

<sup>1</sup> Sísaga Manikánsabe iwíáh iwíáh atáh náhtáqté wíráípéqté tueyokútaq we kéró anínká wensabé, Íwáhnoraníno, tagáhno. Nah kékéh ébáhmé áhnte kaweq ebáhne. Áhnte kaweq ebáh náhmári tagáhno úwe.

<sup>2</sup> Úwana Sísaga wensabé, Amahnága mi anótáh náhmári aiq tagahno? Mi peréhnéhnia ébáhmári miraue íre moráráq kagainae. Peh moke paentárara aruaneherawoe úwe.

*Sísaga anehe tanahráq íre kaweq sunúq sínawire ú ehwehne.*  
(*Mátíyu 24.3-14; Árúka 21.7-19*)

<sup>3</sup> Manikánsabe iwíáh iwíáh atáh náh korabeq seberiopéq Óríwi sawéhrápéq Sísa tútuue míowara Pítareh Sémísireh Sónireh Ehntarurehga weba séra kasenuwe.

<sup>4</sup> Kasenéra, Arega métáq irarénawe ahkake miraoneherabo? Miraonehera irataq aneq ábóraginabo uwe.

<sup>5</sup> Uwana Sísaga sensabé, Mi tanáhráqsábé mó kené péhe éhwéhnsábé aiq pútare arítéhboq auráq matawéq tagariáhro.

<sup>6</sup> Áhnte kegá mótaq mótarue néníwírue séra, Ínéwé Manikánka eqmaq núwéh ání múge irarirataq áhnte kegá sene péhe éhwéhnsábé aiq pútare aritagéhe.

<sup>7</sup> Mi tanáhráq ebehowe ira ehwéh ireq mó ebehowe sóiriq ehwéh íréhrataqmé íre áhreoro. Téhwe teiú náneq ebeq sínana anehe tanahráq íre apubúue sinae.

<sup>8</sup> Mó kehinánseq mó kehinánseqka ebehoneherawoe. Mó wahnáhné awahrahreq mó wahnáhné awahrahrerue ebehoneherawoe. Mitaq mahtaq márínae. Ehwehranae. Minawarinká uwo uwoira tanáhráq áhwáranae úwe.

<sup>9</sup> Sísaga mó mahraréna, Kawerue auráq matíáhro. Segá ite kaunsíri ke kotiorarabeq móitera sene momiwí nahtápéq áréti sahtáté iubigéhe. Néne sánsá sehgiónsábé ákáhtaq wahnáh kéréq anotah wahnáh kéréqka ehweh aitageheéra seba móitagéhe. Mi tanáhráq néne ehweh terigéhe.

<sup>10</sup> Téhwe kaweq ehwéh moke mah kehíná kékíná teri terinigehe.

<sup>11</sup> Segá ehweh aitageheéra táhtoqme meiqmera móíuwéhrataq itega irarira ehwéhnsábé iwíáh kikiriyeho. Írakaumo. Mi tanáhráq Manikáne Awanka iwíáh aitahna ehwéh irarero. Mi tanáhráq íre itetene ehweh irarigehe. Manikáne Awanka iwíáh aitahna ehwéh irarigehe.

<sup>12</sup> Subiq suageheéra siwahwáréhga sibákawaréh móruehrara sibákawaréhga siwahwáréh móruagéhe. Subiq súáhro aritagéhe. Sibowáréhga monseráhnue sene animári móruagéhe. Animárinká sinoibonsábé abiahnsa aritera subiq súáhro aritagéhe.

<sup>13</sup> Néne sánsá sehgió púara ómi kegá itensabé íre suwahbanae. Néne sánsá íre susa anehe tanahráqkákáq peh kawerue sehgirätaq Manikánka ite meirena oga mérapeq móitankéhe úwe.

*Sísaga íre kaweq sunúq sínaraqsábé teriu ehwéhne.*

*(Mátíyu 24.15-28; Árúka 21.20-24)*

<sup>14</sup> Sísaga mó mahraréna, Íre kaweq ahbábárorahi naneq Manikánsabe iwíáh iwíáh atáhrabeq maragéhe. Mitaq órira kahnara tagagehe. Mah sehirá tagah keo, iwíáhue tagahro. Mi tanáhráq Súria marakórápéq míéhrataq sáwéhrapeq pehbeheráh pokoro.

<sup>15</sup> Mi tanáhráq máhpeq míéhrataq itene ménsámehnsá kiweyaneheéq nahupeq kibekiyehboq pehbeheráh pokoro.

<sup>16</sup> Sotápéq míéhrataq itene korósi koweyaneheéq itene nahtapeq kouwekiyehboq pehbeheráh pokoro.

<sup>17</sup> Mi tanáhráq kía míéhra inínsónseq inahunah inínsónseqka íre pehbeheráh pokorahi puaq sensabé irutaboiroro.

<sup>18</sup> Ah áhnte kariéhínagake mi iré káwéq súnúq sínehboq púreroro.

<sup>19</sup> Mitaqkake anotah íre kaweq sunúq sinawire. Manikánka mah marákó márákó mirarotaqkakákáq amahnágaákáq mina tahnsa sunúq íre kékére. Mókake mó mina tahnsa sunúq íre sinae.

<sup>20</sup> Íre sinae éna, Manikánka aiq iwíáhéná, Íné túbáh agonaraq mi sunúqká ómi mah kehíná kékíná subiq suahráhire. Ómi subipáhraruehneho éna mi tanáhráq wahtonaraníe iwíáhúwe. Mira iwíáhúnsabe wega omaq sitéh kékére arutaboiri puana mi tanáhráq wahtonaruankéhe úwe.

<sup>21</sup> Sísaga mó mahraréna, Mi tanáhráq mó kegá itensabé, Tagahro. Ite meirena kaweraintankeheéra Manikánka omaq ato anímé mahtaq míéhre irara mó kegá itensabé, We isebeq míéhre igehe. Sene péhe éhwéhnsábé aiq pútare arítého.

<sup>22</sup> Íné Manikánka omaq intarái aní muge irarira kereq íné Manikáne ehweh iraru aní muge irarira kereq péhepehe ehwéhnsabe seneherawoe. Segá sirataq ótaq sansánkákáq anotah pagégé sánsánkákáq miraigehe. Áhnte kegá sene ótaq sansá tagéra sensabé aiq pútare aritakeheéra mi sansá miraigehe. Manikánka omaq sitéh kéká moq sene péhe éhwéhnsábé aiq pútare aritakeheéra miraigehe.

<sup>23</sup> Moke teiú náneq mókake ábóragina puaq auráq matawéq tagaríáhro úwe.

*Anehe íné wehukení úku anínká tuinauge ú ehwehne.*

*(Mátíyu 24.29-31; Árúka 21.25-28)*

<sup>24</sup> Sísaga mó mahraréna, Mitaqkake íre kaweq sunúq sótaikínaraq pópoqnah íre patahi-nae. Inokáhpeq íre íónitanae.

<sup>25</sup> Wehyoqmarí íópeqté meginae. Íópeqté págege naneqmarí moke kúrugúruinae. *(Aisaia 13.10, 34.4)*

<sup>26</sup> Mi tanáhráq íné wehukení úku anínká piribirioyahnkakaq téreh naneqkakáq págegeue tuonara tagagehe.

<sup>27</sup> Túónagake pembíáhnka anotah ehwéhnínaraq Manikánka wene íópeqté ké eqmaq suankéhe. Eqmaq suena wega omaq sitéh kékabé, Moke mah marákó mårákörápéqté mitaqté kéweriqme mahtaqté kéweriqme ue ue meriqme sero inkehe úwe.

*Sísane ehweh íre parabagia peh ahriahri kagainawire i ehwéhne.*

*(Mátíyu 24.32-35; Árúka 21.29-33)*

<sup>28</sup> Sísaga mó mahraréna, Awankánsabe iwíáhue tagéq iahtebahro. Awanká ayahnawe anonkakaq kahnana ánáh aunínaraq itega iwíáhéq, Ópeq áhníbórá sire aiq ahtebóne ewe.

<sup>29</sup> Mina onserah moke teiú náneq ábóraragínaq tagéq íné túóna tanáhráq aiq wahtotarire igehe.

<sup>30</sup> Teiníboq írátiáhro. Amahnága oga míáh kégá ómi pehipi íre pukigehe. Ebeqme moke teiú náneq ábóraragínaq tagéq anehe pukigehe.

<sup>31</sup> Íópeqkákáq mah marákó mårákóákáq parabagínana ínéga teiú éhwéhmé íre parabagia peh ahriahri kagainawire.

*Sísa tuina tanáhráqmé ómiga íre iahtebóna ehwéhne.*

*(Mátíyu 24.36-44)*

<sup>32</sup> Sísaga mó mahraréna, Íné túóna wehekáhnkákáq áhwahakákáq ómiga íre ahtebahwe. Íópeqté kégá íre ahtebahwe. Íné Manikáne ahninkáwágá moq íre ahteboge. Peh morá Maniká Iteriboga webataq mi wehekáh tagariéhre.

<sup>33</sup> Túóna tanáhráq ite íre tagariáh púaq níwénunéq kawerue auráq matiáhro.

<sup>34</sup> Íné túónaraqmé wehga íre wahto ah nógínserahne. Wega wene nahtapeq suena pokinaitaq wene arambehri ke wahnah arámbéhríráq sítéhre. Mó aní mó arámbéhríráq mó aní mó arámbéhríráue sítéhre. Ahnansahraq wahnah atéh ánínsábé, Kawerue auráq matiahno éna pokire.

<sup>35</sup> Mina inserah íné anotah Wahnáh túóna tanáhráq íre tagariáh púaq kawerue auráq matiáhro. Íó tupekínaraqpópoq inokáhnabubupopoq kokórega téh ehwéhnínaraqpópoq ahbiahipeqpópoq tuinauge.

<sup>36</sup> Apubúue túónaraq ite sugéhboq peh kawerue auráq matiáhro.

<sup>37</sup> Itensabé teiú éhwéh ómi mah kehiná kékíná teríúge. Níwénunéq kawerue auráq matiáhro úwe.

## 14

*Wahnah kegá Sísa subiq suaneheéra moraénu ehwéhne.*

*(Mátíyu 26.1-5; Árúka 22.1-2; Sóni 11.45-53)*

<sup>1</sup> Ahrina tahnsá sótaikú iahreraq ko tanahráq íre múí párétí né tanahráq wahtonútaq Manikáne ehweh mibeq mahbeq arítáh kékéq Mósínsine ehweh síwáhnoro kerekka sói sóiéra, Sísawe árahue epéq táhtoqme mósubiq suanéhkono íwíáhuwe.

<sup>2</sup> Mira íwíáhéra, Áhnte wehekéqká táchutahurirataq ehwehéra tobéhiyehboq Sísa pehra-ganehe uwe.

*Peh morá íninká Sísane ayahnopeq wéri abaq ato ehwehne.*  
*(Mátíyu 26.6-13; Sóni 12.1-8)*

<sup>3</sup> Pétáni suwahpeqte ání Sáímóniwe anotah nao wagú anine. Minayabe mó kegá, Náonkakaq Sáímónie ue wéhuwehu áwíratówe. Sísaga Pétáni suwahpeq ména mi aníné nahtapeq táchutahurúwana peh morá íninká áhnte moné tahnsa wérí ántéhyá mewe súwe. Mewe séna mi antéhyá piteruqme Sísane ayahqnopeq wéri antiatowe.

<sup>4</sup> Antiatowara táhmaro míó kega abiahnsanéra seye náhenéra, Mi weríwé aneqsabé pehipi antiatehro?

<sup>5</sup> Íre pehipi antiatéhtáq tahirímé mi werí paiqmarena 300 moné mewena mi moné tabonah ke nári irino éra mi inínsábé awehgu atówe.

<sup>6</sup> Awehgu atówana Sísaga sensabé, Mi iní pehragatáhro. Aneqsabé awehgu ataho? Wega mira aintéh sánsámé kaweq sansáne.

<sup>7</sup> Tabonah kewe ahriahri iteba mía míaowaq ite iuwahbáhnagake séhréh aritahráhowe. Ínéwé ahriahri iteba íre mía míainie.

<sup>8</sup> Mi inínká aiq miraorahi sansá aiq miraire. Íné maisarageheéna mi inínká ninonka abaq intéhre.

<sup>9</sup> Teiníboq írátiáhro. Mah marákó márákó kaweq ehwéh teri terinirataq wega amahnága mirai naneq ehwehnkákáq terigéhe. Terírataq íréhra kegá wérí abaq intéh inínsábé iwíahigehe úwe.

*Súrásaga wahnah keyábé, Ite meiqmena Sísaba móitaníe ú ehwehne.*  
*(Mátíyu 26.14-16; Árúka 22.3-6)*

<sup>10</sup> Sísá kéró ke airápété téhraníté míowe. Sebaté ání wenáwíqtare Súrásá Ísíkáríótie. Wega Manikáne ehweh mibeq mahbeq arítáh kéká pokue sensabé, Sísá iteba méauwaníe úwe.

<sup>11</sup> Méauwaníe teriuwara iwíáh íwíáhéra móne awenéhboq miraúno uwana Súrásaga kowe aritená se Sísaba mórite tanáhráqsábé iwíáhue kabarúwe.

*Sísareq we kéró kerekka moráráq táchutahuru ehwéhne.*  
*(Mátíyu 26.17-25; Árúka 22.7-14,21-23; Sóni 13.21-30)*

<sup>12</sup> Íre múi párétí né tanahráq ebeqte wéhékáh sótaikú iahreraq ko tanahráq sútaq Asiu kegá sipisípiq áráhq subiqme titiru tanahráq súwe. Mi tanáhráq we kéró kega Sísaba séra wensabé, Sótaikú tanahráq iahreraq kéká táchutahúq nankehboq eheq kogaweratanéhnkono ue kasenuwe.

<sup>13</sup> Kasenuwana Sísaga we kéróya aníté eqmaq suanaútaq sensabé, Wahtotaq kehiná suwahpeq pokotao. Obenkisa wání ántéhíyánkákáq ánínseq piehgírataq kéráhtao.

<sup>14</sup> We kibekína nahtápéqté ábówánsábé mahraréta, Íwáhnori anínká mahrrárena, Ínéreq iné séníráh kerekka sótaikú tanahráq iahreraq kéká táchutahúq nanehboq mi paqnáhípéq teio ire teawetao.

<sup>15</sup> Teawírataqmé wega ménsámehnsá aiq kaweria páqnáhípéq teinkéhe. Mitaq itene táchutahuq kaweraráhtao éna eqmaq suowe.

<sup>16</sup> Eqmaq suowara mi anítégá mi ke suwahpeq pokue Sísaga teriunserah tagéra mitaq sótaikú tanahráq iahreraq ko táchutahúq kaweraróye.

<sup>17</sup> Ío tupekútaq Sísareq airápété téhraníté we kéró kerekka mitaq séra

<sup>18</sup> tútuue táchutahurutaq Sísaga sensabé, Teiníboq írátiáhro. Ite míáhrabeqte ání inéreq moráráq nöya anínká néne naruo kowerirankéhe úwe.

<sup>19</sup> Úwara sene sirupipeq umeh agúwara morá ání morá anínkáue Sísansabé, Arege inénsabe irareno ue kasenuwe.

<sup>20</sup> Kasenuwana Sísaga sensabé, Airápété téhraníté omaq sitórabeqte anínká inéreq morá párétahípéq páréti pámbáhuya anímé we wire.

**21** Manikáne ehwehnka aiq irarinserah íné wehukení úku aní pukinie. Néne naruo kowerirahna aní anotahtaq kamah awinawire. Wenanoga we íre maqmiotaq tahirímé aiq kaweri irino úwe.

*Sísaga párétiakáq sera ano ko kahpúákáq náriu ehwéhne.*

(Mátíyu 26.26-30; Árúka 22.15-20; 1 Kórína 11.23-25)

**22** Segá táchutahurutaq Sísaga páréti mewena Manikánsabe kaweróne atena keqme náriena sensabé, Mahnawé niwaq mire. Náhro úwara nowe.

**23** Nowana wega náhníáq sera ano kahpú mewena Manikánsabe kaweróne atena náriuwara ómiga nowe.

**24** Sísaga sensabé, Mahnawé néne korahq mire. Néne korahq tuinaga itereq áhnte mó kereq Manikánka insahwé aitená itene ahbabáq kaweraitankéhe.

**25** Teiníboq írátiáhro. Náhníáq sera ano mahtaq mó íre nanie. Mókake Manikánka wahnah wahnahnínarabeq míáhnaraq o sera ano nanie úwe.

**26** Segá Manikánsabe iwiáh iwiáh igonkónéra máhpeq tueyokéra Óríwi sawéhrápéq pokuwe.

*Sísaga Pítansabé, Íné nuwaniewóne ú ehwéhne.*

(Mátíyu 26.31-35; Árúka 22.31-34; Sóni 13.36-38)

**27** Sísaga sensabé, Manikáne ehwehnka mahraréna,  
Ínéga sipisípiq Wahnáh subiq súáhnaraqmé moke sipisípiqmarínká kobeq séberigehe ire.

(*Sekaraia 13.7*)

Mi ehwéhniká irarinserah ite ómiga íné nuweq kobeq séberigehe.

**28** Manikánka íné organúq intahnaraq Kehrari marákórápéq ebeq konaq inehe sigehe úwe.

**29** Úwana Pítaga Sísansabé, Ómiga are áuwéhrataqmé ínéga íre auwanauge úwana

**30** Sísaga wensabé, Teawiníboq írátiáhno. Ibora inókáhpéq kokórega téhtaréráq ehwehnina ínaraq arega íné íre tagaríóge apahtáróráq irariniewóne úwe.

**31** Úwana Pítaga mi ehwéhnsábé anotahtaq ahqáho éna Sísansabé, Mó kegá arereq ínéreq iubiq súéhrataqmé ínéga are aiq tagaríóge atanauge úwara sega moke wega irarúnserahnuwe.

*Sísaga Késémáni matábúráq kobúrerú ehwéhne.*

(Mátíyu 26.36-46; Árúka 22.39-46)

**32** Sísareq we kéró kereqka mitaq suera mátabu áwíq Késémáni pokuwe. Sísaga sensabé, Ite mahtaq tútuue míehrana íné kobúrerono éna

**33** Pítareh Sémísireh Sónireh móbeq móritowe. Móritena wene arupipeq anotah uméhue págege agúwana

**34** wega sensabé, Nirupipeq anotah uméhinka pukorahuge. Mahtaq tótuméq tagaríáhro éna

**35** se suena wahtotaq móbeq pokéna marakóraq káuqmunue ména púrerúwe. Púreréna íre kaweq sunúq weba sínehoéna púrerúwe.

**36** Púrerue mahraréna, Nániboo, arega moke miraorahóne. Mah íré káwéq súnúq móruo. Íre íné nuwahbeh sansá peh are awahbáhna sansánúno ue púrerúwe.

**37** Púreraruena wega Pítarehba kouwekéna tagówara sugówe. Sugówana wega Pítansabé, Sáiómónio, aneqsabé sugahno? Pehgáriq tanahráq árahinsabé íre tótumé níwénunorahoo?

**38** Iteiyuwanka kaweq sansánéyabe iuwahbehre. Peh itene inonka mareqmarero puaq íre miraorahowe. Minayabe owainawanka ahbabáq aitehnehboq tótuméq púreroro éna

**39** móñkakáq kobúrerúwe. Métáq púrerúnserahnue mó púreréna

**40** Pítarehba mó kouwekéna tagówara se anotah mukúqmáhkúru puara se peh sugówe. Sugówana Sísaga iriritowara siyehitónsabe ehiya míowe.

**41** Sísaga apahtáróráq kéna séna ú púana sensabé, Ite peh ahrenaneheéq sugaho? Aiq míre. Íné wehukení úku aní ahababáq ke kowerire tanahráq aiq sire.

**42** Pokonehboq irigoro. Tagahro. Néne naruo koweriréh áninká aiq sire úwe.

*Súrasaga Sísane naruo koweriro ehwéhne.*

(Mátíyu 26.47-56; Árúka 22.47-53; Sóni 18.3-12)

**43** Sísaga mi ehwéh irarútaq Súrasa we kéro aninká apubúue súwe. Manikáne ehweh mibeq mahbeq arítáh kereq Mósísiga miraoro ú ehweh síwáhnoro kereq Asiu kené aboawah wehreqka áhnte mó ke eqmaq súowara sega pokamarinkákáq sahmárinkákáq Súrasareq moraráq suwe.

**44** Seneherautaq koweriro aninká su ke teriena, Ínéga nánkóqnahna anímé Sísa wire. Táhtoqme kawerue meqme móáuwáhro úwe.

**45** Minayabe Súrasaga sútaq Sísaba apubúue séna wensabé, Íwáhnoraníno éna nánkóqnówe.

**46** Nánkóqnówara sega Sísa táhtoqme ambubuuue táhtotíowe.

**47** Táhtotíowana mó aninká wene poka mewena Manikáne ehweh mibeq mahbeq arítéh áníné arambehri aní apiwe wene ahre kiraq auwowe.

**48** Kiraq auwowana Sísaga sensabé, Aneqsabé aebó ání táhtoráhnserah pokankákáq sahkákáq íné meniraneheéq seo?

**49** Mó wehekáh mó wehekáhnue Manikánsabe iwíáh iwíáh atáh náhtápéq áhnte wehekáh itereq ména íwáhnorurautaq mi tanáhráq itega íné íre táhtotiarowe. Manikáne ehwehnka irarinserah aiq pútaraginkeheéq miraowe úwara

**50** we kéró kega Sísa auwera pehbeheráh pokuwe.

**51** Pokuwana káriq mahbígá peh taberábe ambántá úbíqmena Sísa anehe kaqmena kérōwe. Kérowara míó kega we táhtorówana

**52** wene ambanta kesuena pehrákora pehbeheráh pokúwe.

*Wahnah kegá aboawah weh mírábeq Sísa ehweh ató ehwéhne.*

(Mátíyu 26.57-68; Árúka 22.54-55,63-71; Sóni 18.13-14,19-24)

**53** Segá Sísa meqmera Manikáne ehweh mibeq mahbeq arítáh kéné wahnahpa pokuwara moke Manikáne ehweh mibeq mahbeq arítáh kereq Mósísine ehweh síwáhnoro kereq Asiu kené aboawah wehreqka mitaq momiwíwe.

**54** Se mótaq we mótarue Pítaga sinehe kaqme kure Manikáne ehweh mibeq mahbeq arítáh kéné wahnahne nahnoerápéqté mátábúráq kúwe. Kure mitaqté párísíréhreq tútuue méra iraraq totoruwe.

**55** Manikáne ehweh mibeq mahbeq arítáh kereq moke mó kaunsíri kereqka Sísa subiq suanéhboq wega ahababáruraime insega tagarairo éra kabaruwara íre pahsúówe.

**56** Sísaga miraúnsabe áhnte kegá péhe éhwéhnéra íre morá éhwéh iraruwe.

**57** Táhmaro kegá irigue péhe éhwéh atera mahraréra,

**58** Itega wene ehweh írátáúne. Wega iraréna, Manikánsabe iwíáh iwíáh atáh náh wehukega pearó nah sokoruqme apahtáró wéhékáh mó nah pearaníe. Íre niyahnkaratáté pearaníe uraire éra

**59** sene ehwehme peh úbíráhbíq ehwehnéra íre morá éhwéh iraruwe.

**60** Manikáne ehweh mibeq mahbeq arítáh kéné wahnahnka irigue ákáhpi kowéna Sísansabé kasenéna, Mah kegá arensabé irare ehwéhmé arega íre terieráhono? Sene ehweh aiq pútaq ehwéhpo úwana

**61** Sísaga íre iraria peh ehiya míowe.

Peh ehiya míowana wega Sísansabé, Manikánka ite Asiu ke meirena kaweraitankeheéna peh morá ání omaq atowe. Arewe mi anípo? Arewe Manikáne ahninkáwábo kasenúwana

<sup>62</sup> Sísaga wensabé, Íné we uge. Íné wehukení úku anínká Manikáne ayah púpeq tútuue ména íópeq írábúyápipeqté tuonaq tagagehe úwe.

<sup>63</sup> Úwana Manikáne ehwéh mibeq mahbeq arítáh kéné wahnahnka mi ehwéh irotaq abiahnsanú púana wene korósi subansuena mahraréna, Wega aiq irarinsabé mó keyábé móme íre kasenoro. Ahqáho.

<sup>64</sup> Wega Manikánsabe íre kaweq ehwéh atéhraq íráhwe. Minayabe aneratanéhnkono úwara sega moke mahraréra, Wega ahababáq ehwéh aiq irari puaq subiq suo atanéhe uwe.

<sup>65</sup> Táhmaro kegá Sísa tehqni atera wene auranabiah ambantaraté akariatawéra subiq-marera, Insegá are subiqmarehro? Teio uwara párísirehga Sísa meqmera mósubúwe.

### *Pítaga, Sísa íre tagarióge ú ehwehne.*

(Mátíyu 26.69-75; Árúka 22.56-62; Sóni 18.15-18,25-27)

<sup>66</sup> Pítaga nahnoerápéqté mátábúráq tumíowana Manikáne ehwéh mibeq mahbeq arítéh áníné arambehri ahrágírá súwe.

<sup>67</sup> Súwana Pítaga iraraq totoruwana mi ahrágírá we tagéna ebitáwéna wensabé, Are Sísa Néhsara suwahpeqte ánínseq míarone úwe.

<sup>68</sup> Úwana Pítaga ahqáho atena, Arega iraréna ehwéhmé íre ahteboge. Aneq ehwéhnono éna mitaq suena méhpehpeq pokúwana kokórega téh ehwehnúwe.

<sup>69</sup> Mi ahrágírá méhpehpeq Pítá mó tagéna míó keyabé, Mah anímé Sísa awahrahní míre úwe.

<sup>70</sup> Úwana Pítaga mó ahqáho atowe.

Pehgáriq motáq tahnsa mitaq míó kega Pítansabé, Are Kehrari marákórápéqté ání púahe are wenawahrahní móne uwe.

<sup>71</sup> Uwana Pítaga ehbonéna mahraréna, Manikánka tagariéhtáq aiq pútariahnsanuge. Itega irare anímé íné íre tagarióge. Ínéga péhe éhwéh teawénaraqmé Manikánka íné nubiq suankéhé úwana

<sup>72</sup> Kokórega mó ehwéhnútaq Sísaga teawu ehwéh Pítá ahreraq kowe. Mina teawu ehwéhmé, Kokórega téhtaréráq ehwehnina ínaraq arega apahtáróráq íné íre tagarióge irariniewónue úwe. Pítaga mi ehwéh ahreraq kowana wene arupipeq umehuwana anotahtaq ibisówe.

## 15

### *Sísa meqmera Páhírátiba móátó ehwehne.*

(Mátíyu 27.1-2,11-14; Árúka 23.1-5; Sóni 18.28-38)

<sup>1</sup> Ahbiahipeq Manikáne ehwéh mibeq mahbeq arítáh kéréq Asiu kené aboawah wehreq Mósínsine ehwéh síwáhnoro kereq moke mó kaunsíri kéréqka momiwíue Sísa subiq súéhra ehwéh sío síoéra wene ayahnkaratáq nágáqtate táhru táhru meqmera anotah wahnáh ání Páhírátiba móátówe.

<sup>2</sup> Móátowana Páhírátiga wensabé, Arewe Asiu kené wahnahpo kasenuwana wega wensabé, Arega aiq iraréne úwe.

<sup>3</sup> Úwara Manikáne ehwéh mibeq mahbeq arítáh kégá Sísa áhnte ehwéh atówe.

<sup>4</sup> Ehwéh atówana Páhírátiga Sísansabé, Segá arensabé áhnte ehwéh atáhwe. Minayabe arega ehwéh íre terieráhono kasenuwana wega peh ehiya míowe.

<sup>5</sup> Peh ehiya míó púana Páhírátiga iwíáhue tagéna áhtenuwe.

### *Páhírátiga, Sísa awankátaq táhparáhro ú ehwehne.*

(Mátíyu 27.15-26; Árúka 23.13-25; Sóni 18.38-19.16)

<sup>6</sup> Anotah tahutáhúro tanáhráq mó opéq mó opérue karábúsiipéqté ání Asiu kegá pugeqio teawú ani Páhírátiga pugesuaq pugesuarúwe.

<sup>7</sup> Wehukení wenawíq Páréhbae. Wereq mó kereq ebehutaq Páréhbaga wehukení subiq suonsabe karábúsiipéq míowe.

<sup>8</sup> Karábúsiipéq míowara áhnte kegá kire Páhírátinsabé, Are ahriahri mira aruqarurona serahnúno uwe.

<sup>9</sup> Uwana Páhírátiga sensabé, Asiu kené anotah Wahnáh pugeq inínkono kasenúwe.

<sup>10</sup> Kasenéna iwíáhéna, Manikáne ehweh mibeq mahbeq arítáh kégá, Sísaga ite kio-taikíneho éra abiahnsa atáh púara ínéba meqme sewe íwíáhúwe. Mira íwíáhú púana wega sensabé, Asiu kené anotah Wahnáh pugeq inínkono kasenúwe.

<sup>11</sup> Kasenúwara Manikáne ehweh mibeq mahbeq arítáh míó keyabé pagu pagunéra, Mah ehwéh Páhíráti koreawéro. Wensabé teaweq, Páréhba pugeqauwe Sísá subiq súáhro arito koreawéro éra pagu pagunuwara míó kega, Páréhba pugeqio uwe.

<sup>12</sup> Uwana Páhírátiga sensabé mó kasenéna, Itega ite Asiu kené Wahnhahne ue áwíratáh ánime aneratanínkono úwe.

<sup>13</sup> Aneratanínkono úwara sega ehweh kikiréra, Awankátaq táhpawé subiq suo uwana

<sup>14</sup> Páhírátiga sensabé, Aneqsabébo? We aneq ahababáriro kasenúwara sega mó anotah ehwéhnabaéra, Awankátaq táhpawé subiq suo uwe.

<sup>15</sup> Uwana Páhírátiga míó kene sirupipeq eyoyóigeheéna Páréhba pugeq auwena Sísá áréti sahtáté subóro aritena sóntia kegá awankátaq táhpawé subiq suageheéna siuwe.

### *Sóntia kegá Sísansabé awiréh ató ehwehne.*

(Mátíyu 27.27-31; Sóni 19.2-3)

<sup>16</sup> Sóntia kegá Sísá meqmera wahnah anínká ehwehúrabeq kibekue móatera ómi mó sontiá ké síáhrabuvara momiwíuriówe.

<sup>17</sup> Momiwiéra peh morá tautáúq korósí abaq atera ógaratáté keborarerá wene ayahqnotaq suki atówe.

<sup>18</sup> Suki atera wensabé, Aiq míahno? Arewe Asiu kené Wahnhah mone éra

<sup>19</sup> wiahnó sahtáté ayahqnotaq subiqmarera tehqni atera sirehunseraráq méra Sísansabé péhepehe iwíáh iwíáh atera

<sup>20</sup> awiréh atówe. Awiréh atera abaq ató korósí akai auwera wewene korósi suki atera awankátaq táhparaneheéra meqmera pokuwe.

### *Sísá awankátaq níriraté táhparó ehwehne.*

(Mátíyu 27.32-44; Árúka 23.26-43; Sóni 19.17-27)

<sup>21</sup> Sóntia kegá Sísá meqmera pokuwana Sáíríni marákórápéqté ání wenawíq Sáímóni ah-tapeq sure Sarúsarama su wahpeq pokinieéna sótaikinaúwe. We Árékásántareq Árúpareqne sibowá míowe. Sóntia kegá we saiqnatera, Sísá táhparéhra awánkámé abaqme kúno atónsabe abaqmena kúwe.

<sup>22</sup> Sísá meqmera Kógota sawéhrápéq kíúwe. Mi sawéh áwíqmé áwahewé wehukení ayahqno tánúnsutapére.

<sup>23</sup> Mitaq sega íre érorahi kítabeh maráhsíní mewera náhniáq sera anopipéq sombirahue Sísá náwúwana ahqáho éna íre nowe.

<sup>24</sup> Íre nowara sega we meqmera awankátaq níriraté wene ayahnkaratáq subiqmaq aigárátáq subiqmarue táhparera awanká pankeqme marakóipeq pearówe. Pearera, Wene korósi insega meyanabomo éra saraqmianehéra káhsiee saraqme meyówe.

<sup>25</sup> Wéhékáh ió ákáhtaq kiutaq awankátaq táhparówe.

<sup>26</sup> Ehweh átó ehweh kanehraq sehiranúwara wene ayahqno abobórähpeq awankátaq táhparówe. Mi sehiránká mahraréna,

Asiu kené Wahnhahne úwe.

<sup>27-28</sup> Sísá awankátaq táhparórabeq aebó ánité moq awankátaréráq níri pewe táhparéra pankeqme ayehré ayehré pearówe.

<sup>29</sup> Pearówara mitaq sótaiku kegá Sísa tagéra awiréh atera sinuo kóbiq kóbiréra wensabé íre kaweq ehwéh atówe. Íre kaweq ehwéh atera mahraréra, Manikánsabe iwíáh iwíáh atáh nah sokoruqme apahtáróráq mó pearahráhóna aníno,

<sup>30</sup> arere séhréhúno. Oga míánkehboq marakóipeq tueagúno éra awiréh atówe.

<sup>31</sup> Awiréh atówara Manikáne ehweh mibeq mahbeq arítáh kéreq Mósísine ehweh síwáhnoro kerekka moq awiréh atera mahraréra, Wega mó ke kaweraritená peh wewe íre kawerorahire éra

<sup>32</sup> wega, Íné áhnte wehuké merirena kaweraritankeheéna Manikánka omaq intowe iwíáhire. Íné Ísara kené Wahnah aní múge iwíáhire. Wega maraipéq tueagínaq tagéq wensabé aiq pútare atanéhe éra awiréh atówe. Awankátaq táhparó anitégá moq íre kaweq ehwéhnéra Sísansabé awiréh atóye.

### *Sísa pukú ehwehne.*

(Mátíyu 27.45-56; Árúka 23.44-49; Sóni 19.28-30)

<sup>33</sup> Wéhékáhnabubu moke mah marákó márákó sunkíkíragúwana ío tunsorerutaqkakáq peh sunkíkíratiowe.

<sup>34</sup> Tunsorerutaq Sísaga wewene ehwehtaq Wenabonsabé anotahtaq mahraréna, Írói, Írói, tahmah sabáhtahnie úwe. Mi ehwéhnúmé, Nániboo, Nániboo, aneqsabé íné nuwahno úwe.

<sup>35</sup> Úwara táhmaro iriwe mío kega irera mahraréra, Íráhro. Éráísansabé áhrabire uwe.

<sup>36</sup> Mibeqté áninká pehbeheráh sehenáh tahnsa náneq mewena kítabeh nah naneqpipéq pámbáhue sehikaratáq maqme pankeqme Sísaga píbíra nankeheéna awuwe. Awena mahraréna, Éráísa marakóipeq atanabiramo. Taganeheqmúne úwe.

<sup>37</sup> Úwana Sísaga anotahtaq ehwehnéna putiowe.

<sup>38</sup> Putiotaq Manikánsabe iwíáh iwíáh atáh náhtápéqté párahnkéq tahnsa ónsá senahpeqté subame tunse téhtaré úkúwe.

<sup>39</sup> Sántia kené kiápéténiga Sísane auranabiahtapeq ména we putionsabe tagarawéna mahraréna, Mah anímé aq pútaq Manikáne ahninkáwá wíre úwe.

<sup>40</sup> Sísa putiotaq ahreronká mobeq iriwe méra awahnkanuwe. Mágára suwahpeqte íní wenawíq Máhríae. Sémisi anehe piah anínseq wenawah Sósépareqne sinowa wenawíq moq Máhríae. Mó iní wenawíq Sárómie.

<sup>41</sup> Sísaga Kehrari marákórápéq síwáhnorútaq mi inítogá we kérera wene táhutahuq tíátowe. Mi inítáróreq mó Sarúsarama suwahpeqte su ahrérónseqka mobeq iriwe méra awahnkanuwe.

### *Sísane anonka maisé onápípéq maisaró ehwehne.*

(Mátíyu 27.57-61; Árúka 23.50-55; Sóni 19.38-42)

<sup>42</sup> Ahbiah tahnsá ahrena ahrena wehekáh ibora táhnsá táhutahuq kaweq kaweré wehekáh ío tupekútaq Sósépaga Páhírátiba pokúwe.

<sup>43</sup> Sósépawe Árimátéa suwahpeqte ánínúwara mó kegá, We kaweq abóawáh wéh wíre iwíáhuwe. We Manikánka wahnah wahnahni tanáhráq áwénunue taga tagau aní míre. We íre áhreia Páhírátiba pokéna wensabé, Sísane anonka mewena mómaisaraníkono úwe.

<sup>44</sup> Úwana Páhírátiga, We putiehramo íwíáhéna kiápéténine wahnah áhrabéna, Aiq putiehro éna kasenúwe.

<sup>45</sup> Kasenúwana, Aiq putiéhre úwana Páhírátiga Sósépansabé, Wene anonka meyo úwe.

<sup>46</sup> Úwara Sóséparehga íre wahto taberábe ambántá paiqmarera Sísane anonka kiwewe marakóraq márumarera ambantaipéq úbíqme mewera ubusa onápípéq mómaisarówe. Maisarera ebah ubusa ónápípéq marera anotah ebáh paentáwe kure maisiaró mehpéh paiqmarera pokuwe.

<sup>47</sup> Mágára su wahpeqte íníñseq mó wenaogo Máhría Sósépane anowareqka Sísa maisarórabeq tagoye.

## 16

*Sísa organíkú ehwehne.*

(Mátíyu 28.1-8; Árúka 24.1-12; Sóni 20.1-10)

<sup>1</sup> Ahrena ahrena wehekáh parabagúwara Mágára su wahpeqte íní Máhríareq Sárómireq Sémísine anowa mó Mahríáreqka Sísame anonka abaq ataneheéra kaweq kunkúni werí paimqmárówe.

<sup>2</sup> Paiqmárówana o wikí kowara ebeqte wéhékáh ahbiahipeq ió kiembogútaq mi inínsónká maisiaró onápípéq pokéra ahtapeq kure

<sup>3</sup> seye náhenéra, Méhpéh paiqmáráh ébáhmé insega paentáwe méreitanabomo uwe.

<sup>4</sup> Uwana anotah ebáhnaba kowara sega tagowana méhpehtaq íre paisa peh móbeq kowara tagowe.

<sup>5</sup> Tagéra maisiaró onápípéq kibekuwana íre wahto taberábe korósíákáq máhbí éberiopéq tútuue míowara tagéra áhtenuwe.

<sup>6</sup> Áhtenuwana wega sensabé, Íre áhtenoro. Ite Sísa Néhsara su wahpeqte ání awankátaq táhpato aní seragahwe. We organükéna mahtaq íre míéhre. We maisatotaq tagahro.

<sup>7</sup> We kéró kereq Pítareq korerieq, Wega Kehrari marákórápéq ebeq kínaq itega mitaq kirataq tagagehe. Wega teiátáinserah itega mitaq we tagagehe koreriéro úwe.

<sup>8</sup> Úwana mi inínsónká tueyokéra iransánue áhtenunsabe pehbeheráh kure áhreu puara ahtapeq sótaiku ke íre teriasa peh ehiya méra pehbeheráh kótaikuwe.

*Mágára su wahpeqte íní Máhríaga Sísa tagó ehwehne.*

(Mátíyu 28.9-10; Sóni 20.11-18)

<sup>9</sup> [Ebeqte wehekáh o wikí ahbiahipeq Sísa organükéna wega Mágára su wahpeqte íní Máhríaba ebeq súwe. Wega mó tanáhráq abapete téhtaré ówáínawánsábé, Máhría auweq pokoro arito iní míre.

<sup>10</sup> Sísga mi iníbá ebeq súwana mi inínká pokue Sísa kéró keba pokúwara Sísa pukúnsabe wensabé sirutaboiréra ibisowana Máhríaga koreriena,

<sup>11</sup> Sísa oga míéhrana tagoge úwe. Úwara wene ehwehnsabé íre aiq pútare atówe.

*Sísa kéróya ánítégá ahtapeq Sísa tagoya ehwéhne.*

(Árúka 24.13-35)

<sup>12</sup> Anehe téhranítégá uworapeqté áhtápéq nogúyataq Sísga mó aní tahná úkue seba súwe.

<sup>13</sup> Súwara sega kouwekéra moke Sísa kéró ke koreríúyara sene ehwehnsabé moq íre aiq pútare arítówe.

*Sísga we kéró keyabé, Néne ehweh koreriéro ú ehwehne.*

(Mátíyu 28.16-20; Árúka 24.36-49; Sóni 20.19-23)

<sup>14</sup> Anehe we kéró ke peh abapete morá ké méra táchutahurutaq Sísga seba súwe. Sirupipeq págege éra we organükú ehwehnsabé íre aiq pútare arítónsabe sensabé siwehguúwe.

<sup>15</sup> Sensabé, Moke mah marákó márákó pokue mah kehiná kékíná kaweq ehwéh koreriéro.

<sup>16</sup> Ínénabe aiq pútare aintera wání meyhára kewé Manikánka organúq sitankéhe. Ínénabe íre aiq pútare aintehá kewé ehweh aritankéhe.

<sup>17</sup> Ínénabe aiq pútare aintehá kegá teiéna otáq sásá miraigehe. Néníwírue owainawa-marí kaqsuagéhe. Kambare ehwéhnigehe.

<sup>18</sup> Ayahtate wehe táhtoragéhe. Pukorahi naneq nehrataq íre pukigehe. Siyahnkaratáté awahre ke táhtoréhrataq kaweraginkehe úwe.

*Manikánka Sísa íópeq tumero ehwehne.*

*(Árúka 24.50-53; Eqmaro 1.9-11)*

<sup>19</sup> Sísa itene Wahnhahnka aiq teriuwana Manikánka we íópeq tumerowana wene ayah púpeq tútuue míowe.

<sup>20</sup> We kéró kega pokue mah marákó márákó áhnte kehiná kaweq ehwéh teri terinuwe. Itene Wahnhahnka se séhréh aritonsabe sega ótaq sansá mirauwara író kega tagéra, Mah ehwéhmé aiq pútaq Manikáne ehwéhne uwe.]

## Árúka Ebeq sáhnsahwe ahrebé ehwehne.

Árúkawe íre Asiu anínéna we nahnsó aní míowe. Wega téh sóteh arámbéhríéna anehe Pora kéréna séhréh atowe. Árúkaga Sísane arambehri wene auranka íre tagéna peh Sísá tago keyábé kasenéna kawerue ahrebéna mah pukú sehiranúwe. Nahnsó kegá mah pukú sáhnsahwe Sísane ehweh kawerue siahtebéra wensabé aiq pútare atageheéna sehiranúwe. Anehe Árúkaga Eqmaro Kene ehweh pukú sehiranúwe.

### Árúkaga mah kawéq éhwéh sehiranúwe.

#### *Árúkaga Tíopírása ebeq sehiranú ehwehne.*

<sup>1</sup> Tíopírása anotah wahnáh ánino, ite míaraunarabeq áhnte kegá Manikánka miraurai naneqsabé iwíáhéra sehiranurowe.

<sup>2</sup> Sehiranuro kegá Manikáne ehweh teri terinera wega miraurai naneq tagaro kené ehweh irera teniátówe.

<sup>3</sup> Téhwe tago kereq sehiranuro kereqsabé kasenéna sene ehweh iwíáhue tagarage. Anehe ínéga moq mi ehwéhnsábé tábúsoqme sehiranéna areba eqmarahnah sáhnsahinkéhe. Tíopírása kaweq aníno,

<sup>4</sup> arega aiq pútaq ehwéh irankeheéna sehiranue teawúge.

#### *Íopeqté áninká Sóni ehweh pahsuo ehwéhne.*

<sup>5</sup> Súria marákórápéq wahnahnú aní Érótiga wahnahnútaq Manikáne ehweh mibeq mahbeq arítéh aní wenawíq Sékáráía ména we Ábýa kahnáh mibeq mahbeq arito ani míowe. Wene ahre Áróni kahnáh íní ména wenawíqmé Érísábétie.

<sup>6</sup> Mi akéqká kaweqtaq méra Manikánka sehgóro ú ehwehnkákáq wene sánsánkákáq moke tábúsoqme sehgiúye.

<sup>7</sup> Se orení ákéq méra Érísábéti orahini puara se íre aninkákáq míóye.

<sup>8</sup> We kahnáhnká arambehriutaq Sékáráíaga Manikáne ehweh mibeq mahbeq arito ani ména arambehriúwe.

<sup>9</sup> We kahnáhnká sene sánsánéra Manikánsabe iwíáh iwíáh atáh náhtápéq kaweq kunkúni naneq pariankeheéra Sékáráíaga eqmarówe.

<sup>10</sup> Pare tanahráq áhnte kegá máhpeq méra púreruwana Sékáráíaga webataq nahupeq kibekéna mi kawéq kúnkúni naneq tahberapeq pariowe.

<sup>11</sup> Pariowana Maniká míéhrabeq íopeqté áninká ábóraragéna tahbe ayehrápéq iriwe míowana

<sup>12</sup> Sékáráíaga we tagéna kurináhnéna iwíáh kikiréna áhreúwe.

<sup>13</sup> Áhreúwana íopeqté áninká wensabé, Sékáráíao, íre áhreúno. Manikánka arega púreróna ehwéhmé aiq íréhnsábé arene ahre Érísábétiga animai maqmiankéhe. Maqmiahnaraq arenahninsábé Sónie ue áwírato.

<sup>14</sup> Maqmiahnaraqmé arene arupipeq eyoyóue iwíáh iwíáhinehe. Áhnte mó kegá moq iwíáh iwíáhigehe úwe.

<sup>15</sup> Iwíáh iwíáhigehe éna, Maniká itene Wahnahnka wensabé, Are anotah aní míahno atanawire. Ahriahri we náhníáq sera anonkakaq píahakák awehriinhe. Wenanone arupipeq míahnaraq ahriahri Manikáne Awanka wereq mía míainkehe.

<sup>16</sup> Wereq mía míairana wega Manikáne ehweh teri teriníñaraq áhnte Ísara kegá Maniká itene Wahnahne sánsá kawerue sehigéhe.

<sup>17</sup> Éráísa Manikáne ehweh irarú ani marakóipeq míotaq anotah aní ména págegeue síwáhnorúnserah itene Wahnahnka sinaitaq arenahninká ebeq séna síwáhnorinkehe. Minayabe sibowáréhreq sene animárínseq insahwé aritankéhe. Itene Wahnhá sína tanáhráq áwénunigehboq ahbabáq kega arenahniné ehweh irera sene ahbabáq suera kaweqtaq míagehe teawuwe.

### *Íópeqté áníné ehwehnsabé íre aiq pútare ató ehwehne.*

<sup>18</sup> Íópeqté áninká mi ehwéh Sékáráía teawuwana Sékáráíaga wensabé, Íné ore úkugana néne ahre moq orení míéhre. Minayabe arega iraréna ehwéhmé árahue aiq pútaraginabo úwe.

<sup>19</sup> Úwana íópeqté áninká wensabé, Néníwíq Kébárie. Íné Manikáne auranabiahtapeq iriwe mía míau aní múge. Mah kawéq éhwéh teawinkeheéna wega, Koreawo éna eqmaq núwéhre éna,

<sup>20</sup> Irátiahno. Arewe néne ehweh íre aiq pútare aintahne. Minayabe mókake are ehweh íre irarerahóne. Ínéga teawú éhwéh aiq pútaragínaraq arega ehweh irarerahóne úwe.

<sup>21</sup> Mähpeq míó kega Sékáráía áwénunéra iwíáhéra, We aneqsabé íre wahto tanáhráq Manikánsabe iwíáh iwíáh atáh náhúpéq peh míehro uwe.

<sup>22</sup> Uwana wega tueyokútaq we ehweh íre irarerahúwe. Ehweh íre irarerahéna wene ayahnkaratáté áwíqme teriena ehwehnurá íre irarerahúwe. Mähpeq míó kega miraú tagéra, Manikánsabe iwíáh iwíáh atáh náhúpéq míéhtáq wenawanka tagehre iwíáhuwe.

<sup>23</sup> Iwíáhuwaná we ehweh íre irarerahéna wene arambehri tanáhráq parabagútaq wene nahtapeq pokúwe.

<sup>24</sup> Mi tanáhráq parabagúwaná wene ahre Érisábéti kíá ména moberíáh ió wene nah-tapeq peh míowe.

<sup>25</sup> Mitaq ména mahraréna, Íné orahini mírautaq áhnte niyehitaraire. Manikánka ínésabe arutaboiraintena séhréh aintarái puana amahnága íné íre niyehitehre úwe.

### *Íópeqté áninká Máhríansabé, Sísa maqmarankéhe ú ehwehne.*

<sup>26</sup> Érisábéti abapete morá ió kíá míowana Manikánka íópeqté ání wenáwíq Kébári Kehrari marákórápéq Néhsara suwahpeq eqmarowé.

<sup>27</sup> Eqmarowana wega Máhríao Néhsara suwahpeqte áhráríbá tuwe. Máhríawe mó weh mahbíreq íre nogu ahrári wíre. Tébíti kahnáh máhbí wenáwíq Sósépa míowana Máhríaga we kéranaútaq Kébáriga weba tuwe.

<sup>28</sup> Weba tuena wensabé, Aiq míahno éna Maniká itene Wahnahnka arensabé anotah-taq arutaboiratena arereq míéhre úwe.

<sup>29</sup> Úwana Máhríaga mi ehwéh iwíáhue tagéna wewe náhenéna, Aneq ehwéhpómo. Íre niahteboge éna iwíáh kikirúwe.

<sup>30</sup> Iwíáh kikirúwaná íópeqté áninká wensabé, Máhríao, íre áhreúno. Manikánka arensabé anotah arútábóíratéhre.

<sup>31</sup> Minayabe are kíá míaniewóne. Are kíá mé animai maqmíéhnaraq Sísae ue áwírato.

<sup>32</sup> We anotah aní míahnara áhnte kegá wensabé, Maniká Iteribone ahninkáwá wíre ataneherawoe. Maniká itene Wahnahnka wensabé, Tébíti arene aigaqnaga Ísara ke wahnahnúnserah arega moq se wahnahniniewóne atankéhe.

<sup>33</sup> We Sékópa kahnáh ánímári ahriahri wahnahnaritená wene wahnahné tanáhráq íre parabaginawire úwe.

<sup>34</sup> Íópeqté áninká teawuwana Máhríaga wensabé, Íné íre wehreq nogú ání púana árahue kíá míaninkono úwe.

<sup>35</sup> Úwana íópeqté áninká wensabé, Manikáne Awanka areba tuena nonahwega marakó akariuriéhnserah areba moq akariuriankehe. Manikánka págege atena kawerue auráq

matiankehe. Minayabe mó kegá arega maqmíehna anínsábé, Kaweqtaq mía míai anímiré éra we Manikáne ahninkawá wíre ataneherawoe úwe.

<sup>36</sup> Íópeqté áninká mó mahrrárena, Mó kegá arenawahrah iní wenawíq Érísábétinsabé, Orahinine atárówana we orenínéna amahnága kía míéhre. We abapete morá ió kía ména animai maqmiankéhe.

<sup>37</sup> Manikánka moke miraorahi mino úwe.

<sup>38</sup> Úwana Máhríaga wensabé, Íné Manikáne arambehriu ahráriúge. Arega aiq irarénanserah Manikánka mirainkehe úwana íópeqté áninká we auwena pokúwe.

### *Máhríaga Érísábéti koragó ehwehne.*

<sup>39</sup> Mi tanáhráq Máhríaga Érísábéti koraganieéna apubúue sokahuena pokue Súria marákórápéq áhnte sawéh korabeq kiuwe.

<sup>40</sup> Kiena Sékáráíane nahupeq kibekéna Érísábéti mehwéh atowe.

<sup>41</sup> Mehweh atowana irotaq wene arupipeq mío anínká anotah kabau kabauúwe. Kabau kabauuwana Manikáne Awanka Érísábétiba séna iwíáh atowe.

<sup>42</sup> Iwíáh atowana Érísábétiga anotahtaq mahrrárena, Máhríao, Manikánka mó inínsónsábé arutaboiréna peh arerensabé anotahtaq arutaboiratéhre. Manikánka arega maqmíehna anínsábé anotahtaq arutaboiratéhre.

<sup>43</sup> Íné pehgáriq iní múge. Néne Wahnahne anowagá aneqsabé ínéba seno?

<sup>44</sup> Irátiahno. Amahnága arene ehweh írótaq ínéga maqmíahna aníne arupipeq eyoyói puana nirupipeq kabau kabauire.

<sup>45</sup> Arega Manikánka eqmatai aníne ehwehnsabé aiq pútaraginawire íwíáhuronayabé Manikánka arensabé, Kaweróna atéhre úwe.

### *Máhríaga igonkónú ehwehne.*

<sup>46</sup> Máhríaga mahrrárena,

Néniwanka itene Wahnahnsabé iwíáh iwíáh atéhre.

<sup>47</sup> Manikánka íné kaweraintéh áninsábé iwíáh iwíáh atóge.

<sup>48</sup> Ínéwé pehgáriq inínéna Manikáne arambehriu iní míóganawe wega íné tagéna ínénsabe arutaboiraintéhre. Mókake ómi kehinánká ínénsabe iraréra, Manikánka ínénsabe anotahtaq arutaboiratéhre igehe.

<sup>49</sup> Maniká peh anotah pagégé ánínéna íné áhnte séhréh aintaráirara sega mirarue irarigehe. Manikámé anotah kawéq áwíqkakaq aní míéhre.

<sup>50</sup> Manikánka mó tanáhráq mó tanáhrárue ahriahri wensabé áhteno keyábé arutaboirarítéhre.

<sup>51</sup> Wewene ayahtate págege sansánue sokigi aíre. Mó kegá, Itewe anotah anímári múne íwíáhéra píribahriowana Manikánka mi ke kaqsúéhrara kobeq séberagowe.

<sup>52</sup> Wega anotah wahnáh anímári wahnahnorabeqte kaqsuena pehrápeqte anímárínsábé wahnahnoro arítéhre.

<sup>53</sup> Wega sirupibii ke kaweq naneqmarí náriena áhnte kék ké íre náriasa pehipi kaqsúéhre.

<sup>54-55</sup> Manikánka Ébáráhmareq wene anahwareq itene igaqnaréhreqsabé, Ahriahri nirutaboiraitanauge ire. Wega mi ehwéh ahreraq matawéna wene arambehri anímári Ísara keyábé arutaboiraritena séhréh arítéhre úwe.

<sup>56</sup> Máhríaga mi ehwéh iraréna apahtáró iótáq kaegaeéna Érísábétine nah suena wene nahtapeq pokúwe.

### *Sóni maqmaro ehwéhne.*

<sup>57</sup> Wene maqmare tanáhráq sútaq Érísábétiga animai maqmarowe.

<sup>58</sup> Manikánka wensabé anotahtaq arutaboiratéhre éhwéhnuwara wene iyahnaboreq wenawahrahreqka irera wereq moraráq iwíáh iwíáhuwe.

<sup>59</sup> Iwíáh íwíáhéra mi aní abapete apahtáró wéhékáh míotaq sega wene áú amurúruaneheéra séra mahraréra, Wenabo áwíq Sékáráía wire. Mah kariq ánínsábé moq abowá áwíq Sékáráíae atanéhe uwana

<sup>60</sup> wenanoga, Ahqáho aritena, Sónie ue áwíratayehetauye úwe.

<sup>61</sup> Úwara sega wensabé, Mi awíqmé íre arenawahrah síwíq míre éra

<sup>62</sup> wenabonsabé siyahnkaratátē áwíqmé kasenéra, Arenahninsábé arega inse ataníbo uwe.

<sup>63</sup> Uwana Sékáráíaga ayahnkaratátē awirena, Pépahq menio úwara pépahq áwúwana wega sehiranéna, Wenawíq Sónie ue sehiranuwara áhtenuwe.

<sup>64</sup> Áhtenuwana Sékáráíane áwéh kaweragúwana wega apubúue irarerahéna Manikánsabe pahsuqme iwíáh íwíáh atowe.

<sup>65</sup> Mibeqté kégá mi otáq sánsá tagéra áhre aguwara Súria marákórápéqté kégá sáwéhrapeqté mitaq teri mahtaq terinuwara moke írówe.

<sup>66</sup> Mi ewhéh író kega sirupipeq iwíáhue tagéra, Mah aní mókake aneq mirainkehbo éra Manikánka we págegeue séhréh atanawire íwíáhuwe.

### *Sékáráíaga irarú ehwehne.*

<sup>67</sup> Manikáne Awanka mi aníné abowá Sékáráíaba sure iwíáh atowana wega kahna naneqsabé mahraréna,

<sup>68</sup> Maniká itene Wahnahnka Ísara ke meirena kaweraitanieéna si puaq iwíáh íwíáh atone.

<sup>69</sup> Wega anotah aní ite kaweraitahna aní omaq atéhre. Mi anímé Tébítí kahnáh áníne.

<sup>70</sup> Minayabe Manikánka wene ehweh iraru ke naho íwíáh aritowara teiúwe.

<sup>71</sup> Itensabé iuwahrieh ke itene naruoga ite saiqnariáhnsábé sega iubíyehoéna wega meirena kaweraitankéhe.

<sup>72</sup> Manikánka omasa éhwéh aiq ahreraq matawéna itene igaqnarehyabe arutaboiraritena séhréh aritowe.

<sup>73</sup> Wega itene igaqna Ébáráhma mirainauge ú ehweh teawena,

<sup>74</sup> Itene naruoga saiqnariáhtáq koweiraníe úwe. Minayabe íre áhreia peh wene arambehri miraonehqmúne.

<sup>75</sup> Moke itene ogamé tanahráq Maniká awahbeh sansánéq kaweqlaq méq wene arambehri tábúsoqme miraoneheqmúne úwe.

<sup>76</sup> Manikáne Awanka mó iwíáhatowana Sékáráíaga wenahni Sóninsabé mahraréna, Nénahnino, mó kegá arensabé, Maniká itene kiotaiqme Wahnáhné ehweh iraréna aní móne ataneherawoe. Itene Wahnahne ah kawerarankéhboq arega ebeq pokinkehe.

<sup>77</sup> Manikánsabe áwíahraqso ke organúq sitankéhboq se merirena sene ahbabáqsabe kaweraritankéhe ue terinkéhe.

<sup>78</sup> Manikámé áhnte arútáboíraitéh aní mía míaire. Pópoqnahga áhníbórá kiembogina inserah Manikánka ite áhníbórá kaweraitanaire.

<sup>79</sup> Sunkíkírirabéq pukoraho ke tagagehboq Manikánka ahtapeq téhraitankéhe. Minayabe wega iahnkahrínaq ite iru ukiq ítéh áhtápéq nogoráhúne úwe.

<sup>80</sup> Manikáne Awanka iwíáh atowana Sékáráíaga mi ewhéh wenahni Sóni teawuwe. Mi aní anonurena Maniká awahbeh sansánsábé arutaboiréna sehgiuwe. Wega Ísara ke ehweh terie tanáhráq íre suriotaq peh abatapi úpeq kaegaeúwe.

## 2

### *Máhríaga Sísa maqmaro ehwéhne.*

(Mátíyu 1.18-25)

<sup>1</sup> Mi tanáhráq anotah wahnáh ání wenáwíqtare Sísáhri Ógáhsátu moke Aroma keráq wahnahnatiowe. Wega moke wehuke síwíqmari púkuipéq sehiranoro aritowe.

<sup>2</sup> Mi tanáhráqmé Aroma kegá ebeq síwíq sehiranu tanáhráre. Wehukení wenawíq Kúwírínáhsí Síria marákórápéqté kéné wahnah míotaq sehiranue meyowe.

<sup>3</sup> Aroma wahnáh kégá moke síwíqmari meyaneheéra ómiga sensuwahpeq pokuwe.

<sup>4</sup> Sósépawe Tébítí kahnáh ání ména Néhsara suwahpeq Kehrari marákórápéq suena Súria marákórápéq Pétáriéma suwahpeq Tébítí kahnáh suwahpeq kíuwe.

<sup>5</sup> Sensíwíq terieyeheéra Sósépareq wene ahre arári Máhríareq Néhsara suwahpeq kíuye. Máhríawe anotah kia míowe.

<sup>6</sup> Sega Néhsara suwahpeq kíuyataq we ani maqme tanahráq wahtonúwe.

<sup>7</sup> Páhsíntía nahmári mágriq íre ko púara sega káhone nahtapeq káuye. Mitaq Máhríaga wene ebeq piah anímái maqmarena ambanta ánáhnkiwe mi kané táhutahuq kunúbáípéq suge atowe.

### *Íópeqté áninká sipisípiq wahnahnu ke teriu ehwéhne.*

<sup>8</sup> Mi ke suwahpeqte áhnánsáhrápéq sipisípiq wahnáh ánimári uworapeq méra sene kamarítáq wahnahnuwe.

<sup>9</sup> Wahnahnuwana íópeqté áninká ábóraragúwana Maniká itene Wahnahne téreh naneqka anotahtaq téhrówara sega anotah ahré aguwe.

<sup>10</sup> Íópeqté áninká sensabé, Íre áhreoro. Írátiáhro. Mah kawéq éhwéh teinieéna suge. Teiú éhwéhká ómi kehináné sirupipeq anotahtaq eyoyó aritankéhe.

<sup>11</sup> Tébítí kahnáh suwahpeq ite meirena kaweraitahna ání inokáhpeq maqmíehre. Manikánka we omaq atowana we anotah Wahnáh ání ména ite meirena kaweraitahna ání míre.

<sup>12</sup> Aniné ambanta ánáhnkiwe káhone táhutahuq kunúbáípéq míehre tagéq we wire ue ahtebagehe úwe.

<sup>13</sup> Úwara peh íregáritaq íópeqté kégá ábóraragéra Manikánsabe iwíáh iwíáh atera mahraréra,

<sup>14</sup> Maniká kiotaiqme aníniraq wensabé iwíáh iwíáh atone. Mah marákó mårákóípéq Maniká awahbeh sansá sehgíra ke siru ukiqsitankéhe uwe.

### *Sipisípiqtaq wahnahnu kegá Sísa korago ehwéhne.*

<sup>15</sup> Íópeqté kégá se suera íópipeq tuekutaq sipisípiqtaq wahnahnu kegá seye náhenéra, Manikánka teí áninsábé Pétáriéma suwahpeq koraganehboq pokonehe uwe.

<sup>16</sup> Pokonehe éra pehbeheráh pokue anebahruwana mi aní káhone táhutahuq kunúbáípéq sugowara Máhríareq Sósépareq míoya tagowe.

<sup>17</sup> Tagéra pokue íópeqté áníné ehweh mitaq teri mahtaq terinuwe.

<sup>18</sup> Terinuvara író kegá sipisípiq wahnáhmáríné ehwehnsabé iwíáhue tagéra, Aneq ehwéhpómo iwíáhéra áhtenuwe.

<sup>19</sup> Máhríaga moke mi ehwéh ahreraq matawéna wene arupipeq iwíáh atawéna tagówe.

<sup>20</sup> Sipisípiq wahnáh kégá kouwekéra sega író ehwéhkákáq tago naneqsabéákáq Manikánsabe iwíáh iwíáh atówe. Iwíáh iwíáh atera, Íópeqté áninká teínserah aiq pútaragire uwe.

### *Sega Sísae ue áwírató ehwéhne.*

<sup>21</sup> Máhríá íre kíá míotaq íópeqté áninká wensabé, Are ani maqmíehnaraq Sísae ue áwírató úwe. Minayabe mi aní maqmarowara abapete apahtáró wéhékáh míotaq sega wene áú amurúruera Sísae ue áwíratówe.

### *Símióniga Sísa tagéna pahsuo ehwéhne.*

<sup>22</sup> Mósísga sehgióro ú ehwehná irarinserah sene wánítapeq mósose tanahráq parabagútaq Sósépareq Máhríareqka Sísa Sarúsarama suwahpeq meqmera Manikánsabe, Arene ani míankehe uye.

<sup>23</sup> Minayabe itene Wahnahne ehwehná mahraréna, Itene ebeq piah anímáigáú ómi meriqme Maniká ménawéro ire.

(Wok Pris 12.1-8)

**24** Itene Wahnahne ehwehnka mó mahraréna, Téhtaré kíbókíráré náwétao. Kiboki írakaunínaraq téhtaré píná áráhqtáré náwétao ire. (*Wok Pris 12.8*)

Sega mi ewhéh sehgioyeheéra Sísa meqmera kíuye.

**25** Sarúsarama suwahpeqte kóré wenawíq Símiónie. Wega Maniká awahbeh sansánsábé arutaboiréna kaweqtaq mía míaéna Ísara ke kawerarite tanáhráqsábé áwénunúwe. Áwénunúwana Manikáne Awanka wereq mía míaéna

**26** ehweh teawena, Arewe pehipi íre pukiniewóne. Írakaumo. Ebeqme ite meirena kaweraitankeheéna itene Wahnahnka omaq ato aní tagé anehe pukinkehe úwe.

**27** Manikáne Awanka mi koré iwíáh atowana wega Manikánsabe iwíáh iwíáh atáh náhúpéq kibekúwara Sísane anoibo akéqká Mósísiga sehgóro ú ewhéh sehgioyeheéra Sísa meqmera mitaq kíuye.

**28** Kíuyana Símóniga tagéna Sísa sawiwena Manikánsabe iwíáh iwíáh atena mahraréna,

**29-30** Néne Wahnahno, arene arambehri aní míóge. Arega eqmarahna anímé ite meirena kawaraitahna anímé néne niuranka amahnága aiq tagoge. Minayabe arega aiq teniátóna ewhéh aiq pútaraginkehboq niru ukiq intehnana pukono.

**31** Ómi kehiná míáhrabeq arega kaweraitahna aní eqmarahne.

**32** Wega térehnká inserahnínaraq nahnsónka kaweq ah tagagehe. We míéhnsábé Ísara ke arenawahrahga iwíáh iwíáhigehe úwe.

**33** Símóniga Sísa éhwéh mahrarúwara Sísane anoibo akéqká mi ewhéhnsábé áhnenéra áhnte iwíáhuye.

**34** Iwíáhuyana Símóniga sensabé, Pehwehrue míáhtao éna wenano Máhríansabé mahraréna, Mah anínká áhnte Isárá ké séhréh aitankeheéna Manikánka we omaq atéhre. Séhréh aitahnaraq mó kegá we sinehepeq suehrara mó kegá wensabé aiq pútare atagéhe. Wega Manikáne sansá sokigi ínaraq áhnte tagehra kegá wensabé éhruru atehrana

**35** sirupipeqté áhbábáq ábóraq aginawire. Minayabe sogiqka agaréq áwítáq anotah erinserah arene arupipeq anotah eragínah pukorahuge iwíáhiniwóne úwe.

### *Áhna korenínká miraúnsabe ewhéhne.*

**36** Manikáne ewhéh irarú iní wenawíq Áhna mitaq míowe. We Pánúérine ayahunkawa ména Áséra kahnáh iní ména naho kóréní míowe. We wehkútaq abapete téhtaré ópéq wenawehqseq míowana

**37** wenawehq pukúwana íregáritaq opéq peh kéweiní ména we 84 opéq míowe. Wega Manikánsabe iwíáh iwíáh atáh náhúpéq íre suena peh mitaq mía míaéna Manikánsabe iwíáh iwíáh atotaq wega táchutahuq awehriéna púreq aruqarurúwe. Wega mitaq wéhékáhnkakaq inokáhpeqkakáq Manikánsabe iwíáh iwíáh atowe.

**38** Mi tanáhráq wega Sísa tagéna Manikánsabe iwíáh iwíáh atena Sarúsarama suwahpeqte ké merirena kaweraritahna anínsábé áwénunu ke Sísa éhwéh teriuwe.

### *Sósépa akéqká Sísa meqmera Néhsara suwahpeq kouwekuya ewhéhne.*

**39** Wenanoibo akéqká moke Mósísine ewhéh sehgiéra mitaq suera sensuwahpeq Kehrari marákórápéq Néhsara suwahpeq kouwekuye.

**40** Kouwekuyana mitaq Sísa anonurena págege ahtébiá aní úkúwana Manikánka wensabé arutaboiréna séhréh ata ataúwe.

### *Sísga Manikánsabe iwíáh iwíáh atáh náhúpéq kibekú ewhéhne.*

**41** Sísane anoibo akéqká mó opéq mó opérue sótaikú siahrreraq ko tánáhráq Sarúsarama suwahpeq táchutahuroyeheéra poku pokuye.

**42** Sísa anotah anímái úkútaq airápété téhtaré opéq míotaq wereq wenanoibo akéqseqka Sarúsarama suwahpeq pokuwe. Sega Asiu kené sánsá sehgióneheéra pokuwe.

**43** Táhutahuq tanahráq parabagúwara mi akéqká mitaq suera sensuwahpeq kouwekuyana Sísaga Sarúsarama suwahpeq kowíowara wenanoibo akéqká minayabe íre íróye. Sega íre irera, We itene iyahnabo anímárínseq nogíre íwíáhéra peh morá wéhékáh nogúye.

**44** Wega seba íre súwara wensabé anebahréra sensuwahrahreq sene iyahnabo anímárínseqsabé, Sísá tagaho ue kasenuye.

**45** Anebahruyaná we íre ábóraq míonsabe sega Sarúsarama suwahpeq anebahroyeheéra kiwekuye.

**46** Segá anebahréra téhtaré wéhékáh íre ábóraqmarera apahtáróráq Manikánsabe iwíáh iwíáh atáh náhúpéq anebahréra Sísá mitaq tagoye. Tagoyana Sísaga íwáhnoru kené ehweh iranieéna sereq tútuue ména wega iwíáhú ehweh kasenúwe.

**47** Kasenúwana moke wene ehweh író kega iwíáhéra, Mah anímé áhnte ahtébía ánine. Wega peh ahtebia éhwéh pahsúéhre íwíáhuwara

**48** wenanoibo akéqká mina tagéra áhtenuye. Wenanoga wensabé, Nénahnino, arenaboreq ínéreqka are áhnte anébáhréta irupipeq anotahtaq págegeúye. Aneqsabé itensabé íre iwíáhia miraono úwe.

**49** Úwana Sísaga sensabé, Aneqsabé ninebahroyo? Nánibone nahtapeq míahrahume íre tagariehyo úwe.

**50** Úwara sega mi ehwéh áwahewé íre ahteboye.

**51** Sísaga Néhsara suwahpeq se kérirena sene ehweh kawerue sehgiuwana wenanoga minayabe moke ahreraq matawéna iwíáhuwe.

**52** Sísá mó anonurena anotah aní ahtebia ání míowara Manikánka wensabé arutaboirúwara wehukega wensabé iwíáh iwíáhuwe.

### 3

*Sóni wání meri merinú anínká teriu ehwehne.*

(Mátíyu 3:1-12; Mákha 1:2-8; Sóni 1:19-28)

**1** Anotah wahnáh ání wenáwíqtare Sísáhri Táibériúsa míowe. Wega 15 opéq wah-nahnúwana mó wahnáh ání wenáwíqtare Póntíasa Páhíráti ména Súría marákórápéq wah-nahnúwe. Mi tanáhráq Érotiga Kehrari marákórápéq wahnahnúwana wenábáq wenáwíq Pírípi ména Ítúria marákóákáq Tárakóníti marákóákáq wahnahnúwe. Wahnahnúwana mó wahnáh ání wenáwíq Árísánía ména Ábíréni marákórápéq wahnahnúwe.

**2** Wahnahnúwara Ánásareq Káiyápásareqka Manikáne ehweh mibeq mahbeq arítáh kéráq wahnahnuye. Mi tanáhráq Sékáráíane ahninkáwá wenáwíq Sóni abatapi míowana Manikánka terie arámbéhri atowe.

**3** Terie arámbéhri atowana Sóniga moke Sorana aroipéq wahtotaq ko marákórápéq kure ehweh teriuwe. Teriena, Manikánka itene ahbabáqsabe kaweraitankéhboq ahbabáq sansa sueq kaweqlataq míáhro. Itene ahbabáq sansa sueq kaweqlataq míéhrataqmé wání meiníe úwe.

**4** Minayabe Manikáne ehweh irarú ani wenáwíq Áísáíaga naho púkuipéq sehiranue mahraréna, We uworapeqté sawai sawaiéna mahraréna, Itene Wahnah sína ahmé aborisahro. Wene ah kaweraráhro.

**5** Mi ah obarirankeheéq nonsuwewarí akariaruqme anotah sawéhwárínkákáq káriq sawéhwárínkákáq apansuqme mi ah tábúsoq maráhro. Aesa áh obaríqme sabahro. Ebah masahpawé kaweroro.

**6** Manikánka kaweraitahna arámbéhri mah kehiná kékéhínánká tagagehe ire úwe. (Aisaia 40:3-5)

**7** Áhnte wehekéqká wání meyaneheéra Sóniba suwana wega sensabé, Itewe wehene animári móe. Manikánka anotahtaq kamah ainehboq pehbeheráh pokoro insegá teiro?

<sup>8</sup> Itene ahbabáqmari sueq kaweq sansánoro. Mirairataq Manikánka tagéna ite amahnága mó sansánowe íwíáhhinkehe. Ébáráhma itene igaqna míeh púaq itewe kaweq ke míone éq iteitensabé irariyeho. Manikánka mah ebáhmárítáté Ébáráhmane anahwaréh mirarahráhire.

<sup>9</sup> Wehukeníká awanká áwaheraq tehsúme maréhrana kaweq será íre íyéh áwánká moke apiwe ira pariankéhe úwe.\*

<sup>10</sup> Sóniba su kegá wene ehweh irera wensabé, Aneronehnkono uwe.

<sup>11</sup> Aneronehnkono uwana wega sensabé, Téhtaré síótí matiéh áninká íre síótiakáq ání peh morá síótí náwo. Áhnte topáh matiéh áninká tabonah ke wehwehúno úwe.

<sup>12</sup> Táhkisi moné meyáh kégá wání meyaneheéra Sóniba séra wensabé, Íwáhnoraníno, ite aneronehnkono uwe.

<sup>13</sup> Aneronehnkono uwana sensabé, Wehukene móne pehipi meyéhboq peh morá táhkisi móne meyáhro úwe.

<sup>14</sup> Sántia kegá wensabé, Itewe aneronehnkono kasenuwana wega sensabé, Mó kené ménsámehsá meyaneheéq wehuke subiqmareq pehipi meyého. Sensabé péhe éhwéh ariteq sene ménsámehsá pehipi meyého. Itene arambéhriyabé meyáhna apéq awehraq kékhe íwíáhoro úwe.

<sup>15</sup> Manikánka Asiu ke merirena kaweraritankeheéna peh morá ání omaq atowara Asiu kegá we áwénunuwe. Asiu kegá Sónine ehweh irera éhnehéra iwiáhéra, Sóniwe itega áwénunúna anípómo uwe.

<sup>16</sup> Uwana Sóniga sensabé ayahqme teriena, Inehe si anímé anotah aní ména íné kiotaiqme aní míre. We anotah aní púaña ínéga wene súu nahniáq pugereyabe íre awehrari aní muge. Wega Manikáne Awa iteba eqmarankéhe. Wehukeníká uworapeq kekiaréhrana anotah irárehnserah Manikáne Awanka iteba tuinkéhe.

<sup>17</sup> Wehukega ayu siqmíáhtáq sega kaweq ayú sene nahtapeq sáharera íre kaweq ayú iraipéq súáhwe. Mira onserah Manikánka eqmaréh áninká kaweqtaq míah kékabé, Néne mátaburapeq kiwiáhro aritená ahbabáq keyabé, Íre puinkorahi iráipéq mía míaoro aritankéhe úwe.

<sup>18</sup> Sónine ehweh író kega iwiáhigeheéna wega áhnte mó mina tahnsa éhwéh pahsuena oga mé ehweh teri terinúwe.

*Érótiga Sóni karabúsiipéq móato ehwéhne.*

*(Mátíyu 14.3-4; Mákha 6.17-18)*

<sup>19</sup> Érótiga wenábáqne ahre Éróriásá meyowaná Sóniga minaakaq wene mó ahbabáqkákáqsábé abiahnsa atena íre kaweróne atowe.

<sup>20</sup> Íre kaweróne atowana Érótiga sóntia keyabé, Sóni táhtoqme karabúsiipéq móátáhro úwara táhtoqme karabúsiipéq móátówe. Minayabe Érótine ahbabáq áhnte agúwe.

*Érótiga Sóni karabúsiipéq íre móatotaq Sóniga Sísa wání meawu ehwéhne.*

*(Mátíyu 3.13-17; Mákha 1.9-11)*

<sup>21</sup> Sóniga áhnte ke wání meriena Sísa moq wání meyawuwana púrerútaq sabona sawekúwana

<sup>22</sup> Manikáne Awanka tunse kiboki tahnsanéna Sísaba márunsurahúwe. Marunsurahúwana íopeqté éhwéhniká mahraréna,  
Are niruní nénáhní móne. Arensabé nirutaboiruge úwe.

*Sísane aigaqnaréh síwíqmari kékéh ehwéhne.*

*(Mátíyu 1.1-17)*

<sup>23</sup> Sísaga wene arambehri áhwárótaq we 30 opéq marakóipeq míowe. Wehukega iwiáhéra, Sísawe Sósépane ahninkáwáe uwe.

\* **3:9:** Mi ehwéh áwahewé aigarápquéte éhwéh Mátíyu 3.10 tagáhno.

Sósépawe Érine ahninkáwáe.

<sup>24</sup> Ériwe Mátátine ahninkáwáe.

Mátátiwe Árígáine ahninkáwáe.

Árígáwe Mékine ahninkáwáe.

Mékiwe Sánáine ahninkáwáe.

Sánáwe mó Sosépane ahninkáwáe.

<sup>25</sup> Sósépawe Mátatíásane ahninkáwáe.

Mátatíásawe Émósine ahninkáwáe.

Émosiwe Náhúmane ahninkáwáe.

Náhúmawe Ésárine ahninkáwáe.

Ésáriwe Nágáine ahninkáwáe.

<sup>26</sup> Nágáiwe Matane ahninkáwáe.

Matawe Mátatíásane ahninkáwáe.

Mátatíásawe Séménane ahninkáwáe.

Séménawe Sósékané ahninkáwáe.

Sósékawe Sórane ahninkáwáe.

<sup>27</sup> Sórawe Sóánánane ahninkáwáe.

Sóánánawe Árésane ahninkáwáe.

Árésawe Sérubábérane ahninkáwáe.

Sérubábérawe Séatiérane ahninkáwáe.

Séatiérawe Néríne ahninkáwáe.

<sup>28</sup> Néríwe Mékine ahninkáwáe.

Mékiwe Éráine ahninkáwáe.

Éráiwe Kósámane ahninkáwáe.

Kósámaue Émárámane ahninkáwáe.

Émárámawe Éane ahninkáwáe.

<sup>29</sup> Éawe Sósúane ahninkáwáe.

Sósúawe Éríésárane ahninkáwáe.

Éríésárawe Sórímane ahninkáwáe.

Sórímawe Mátátine ahninkáwáe.

Mátátiwe Árígáine ahninkáwáe.

<sup>30</sup> Árígáwe Símónine ahninkáwáe.

Símóniwe Súrane ahninkáwáe.

Súrawe Sósépane ahninkáwáe.

Sósépawe Sónámune ahninkáwáe.

Sónámuwe Éríákímane ahninkáwáe.

<sup>31</sup> Éríákímawe Méríane ahninkáwáe.

Méríawe Ménane ahninkáwáe.

Ménawe Mátatane ahninkáwáe.

Mátátawe Nétánine ahninkáwáe.

Nétániwe Tébítine ahninkáwáe.

<sup>32</sup> Tébítíwe Sésine ahninkáwáe.

Sésiwe Óbétine ahninkáwáe.

Óbétíwe Póásine ahninkáwáe.

Póásiwe Sámónine ahninkáwáe.

Sámóniwe Násónine ahninkáwáe.

<sup>33</sup> Násóniwe Ámínarápane ahninkáwáe.

Ámínarápawe Átínine ahninkáwáe.

Átíniwe Áránine ahninkáwáe.

Árániwe Ésárónine ahninkáwáe.

Ésáróniwe Pérésane ahninkáwáe.

Pérésawe Súrane ahninkáwáe.

<sup>34</sup> Súrawe Sékópane ahninkáwáe.

Sékópawe Áhísáhkine ahninkáwáe.

Áhísáhkiwe Ébáráhmane ahninkáwáe.  
 Ébáráhmawe Térane ahninkáwáe.  
 Térawe Náhórane ahninkáwáe.  
<sup>35</sup> Náhórawe Sérükane ahninkáwáe.  
 Sérükawé Áréune ahninkáwáe.  
 Áréuwe Pérékane ahninkáwáe.  
 Pérékawé Ébérane ahninkáwáe.  
 Ébérawe Sérane ahninkáwáe.  
<sup>36</sup> Sérawe Káínane ahninkáwáe.  
 Káínawé Ápásátine ahninkáwáe.  
 Ápásátiwe Síemane ahninkáwáe.  
 Síémawe Nóahne ahninkáwáe.  
 Nóahwe Árámekane ahninkáwáe.  
<sup>37</sup> Árámekawé Métúsárange ahninkáwáe.  
 Métúsárawe Ínókune ahninkáwáe.  
 Ínókuwe Sárétane ahninkáwáe.  
 Sárétawé Máhrarárine ahninkáwáe.  
 Máhraráriwe Káínánane ahninkáwáe.  
<sup>38</sup> Káínánawé Énósane ahninkáwáe.  
 Énósawé Sétine ahninkáwáe.  
 Sétive Éhrámane ahninkáwáe.  
 Éhrámawe Manikáne ahninkáwáe.

## 4

*Owainawanka Sísa áhwárawe tagó ehwehne.*  
*(Mátíyu 4.1-11; Mákha 1.12-13)*

<sup>1</sup> Manikáne Awanka Sísareq mía míauwana Sísaga Sorana aroipéq suena pokúwana Manikáne Awanka abatapi móatowe.

<sup>2</sup> Móatowana abatapi ména áhnte wehekáh 40 wehekáh mitaq míowana owainawanka weba séna Sísaga ahababárinkeheéna áhwárawe tagéna áwíoqnówe.

Mi tanáhráq Sísaga táhutahuq awehriéna 40 wehekáh parabagútaq anotah arúpíbíúwe.

<sup>3</sup> Anotah arúpíbíúwana owainawanka wensabé, Are Manikáne ahninkáwá míahna puah mah ebáhmárínsábé tópah úkúno ato úwe.

<sup>4</sup> Úwana Sísaga wensabé, Manikáne ehwehnka aiq mahraréna,  
 Tópahnka wehuke íre organúq sitahráhi nanere ire úwe. *(Lo 8.3)*

<sup>5</sup> Úwana owainawanka Sísa meqmena moke mah marákó mårákóípéqté wáhnáhné arambehri apubúue sokigi atena

<sup>6</sup> wensabé, Ínéwé iwíáhue omaq atáhna anínká moke tagáhna ke wahnhahninkehe. Mina omaq ate arámbéhrí peh ínénéne arambehri wire.

<sup>7</sup> Arega ínésabe arehunseraráq mé iwíáh íwíáh aintehnana arega moke tagáhna ke wahnhahnúno ataníe úwana

<sup>8</sup> Sísaga wensabé, Manikáne ehwehnka aiq mahraréna,  
 Maniká itene Wahnhahnsabé iwíáh íwíáh ateq webataq we awahbeh arámbéhrí miraoro  
 ire úwe. *(Lo 6.13, 10.20)*

<sup>9</sup> Úwana owainawanka Sísa meqmena Sarúsarama suwahpeq Manikánsabe iwíáh íwíáh atáh náh nahnsorapéq móatena wensabé, Are Manikáne ahninkáwá míahna puah maraipéq ahkuagúno úwe.

<sup>10</sup> Ahkuagúno éna wega minayabe Manikáne ehwehnka aiq mahraréna,  
 Manikánka wene íópeqté kényabé are wahnhahnatiáhro aritankéhe.

<sup>11</sup> Ebahtaq arene aigárá peraq míéhneho éra sene siyahnkaratáté are pankeragéhe ire úwe. *(Buk Song 91.11-12)*

<sup>12</sup> Úwana Sísaga ahqáho atena wensabé, Manikáne ehwehnka mó mahraréna, Maniká arene anotah Wahnáh áhwárawe tagé áwíoqnéhneho ire úwe. *(Lo 6.16)*

<sup>13</sup> Úwana owainawanka mi tanáhráq mó íre áhwárawe tagéna peh túbáh agúwe. Sísaga anotahtaq ahqáho atonsabe owainawanka iwíáhénéna, Mó tanáhráq kouwekinie éna we auwena pokúwe.

*Sísaga Kehrari marákórápéq wene arambehri áhwáró ehwehne.*

*(Mátíyu 4.12-17; Mákha 1.14-15)*

<sup>14</sup> Manikáne Awanka Sísá págege atowana wega Kehrari marákórápéq kouwekúwara we éhweh mitaq teri mahtaq terinuwé.

<sup>15</sup> Mirauwana we Asiu kené momiwí nahmárítápéq síwáhnorúwara ómiga wensabé iwíáh íwíáh atówe.

*Néhsara su wahpeqte kégá Sísansabé anotah abíáhnsá ató ehwehne.*

*(Mátíyu 13.53-58; Mákha 6.1-6)*

<sup>16</sup> Sísaga wenawahpeq Néhsara pokéna ahrena ahrena wehekáh wene sánsánéna Asiu kené momiwí nahtápéq kibekúwe. Kibekéna Manikáne ehweh sáhnsahinieéna iriwe míowe. Iriwe míowara

<sup>17</sup> mitaqté kégá Áísáíaga sehiranú pukú Sísá áwúwana mi pukúípqué kabarue mah ehwéh kotaq sáhnsahuwe.

<sup>18</sup> Wega sáhnsahwe mahraréna, Manikáne Awanka ínéba ména págege aintena, Tabonah ke néne kaweq ehwéh korerio éna eqmaq núwéhre. Saiqnariéh kékabé sabirue ehweh korerio. Aura pira kékabé siura ebioráho ehwéh korerio. Síwíognahwara sirupipeq umehi keyábé sabirue ehwéh korerio.

<sup>19</sup> Manikánka kaweraritahna tanáhráqsábé korerio éna eqmaq núwéhre úwe. *(Aisaia 61.1-2)*

<sup>20</sup> Sísaga aiq sáhnsahwe parabaruena mi pukú wahnah aní awena tútuue míowara moke mitaq mío kega we ebitíówe.

<sup>21</sup> Ebitíowana wega sensabé, Ínéga sáhnsáhú ehwéh íráhtáq ibora mi ehwéh aiq pútaragire úwe.

<sup>22</sup> Úwara moke mío kega wene ehwehnsabé iwíáh íwíáhéra seye náhenéra, Kaweq ehwéhne éra áhtenuwe. Áhtenéra árahue mi kawéq ehwéh irarerahiro éra mah anímé peh Sósépane ahninkáwá míeh mino uwe.

<sup>23</sup> Uwana Sísaga sensabé, Iteriborehga mah pabéqmé ehwéh iraréra, Are sóteh aní míahna puah arerene awahre kawerúno ewe. Itega ínénabe, Arega Kápénéáma marákórápéq ótaq sansá miraónaq irone íwíáhqué arega mitaq mirauronanserah mahtaq arenawahpeqkakáq moq miraúno íwíáhoo?

<sup>24</sup> Teiníboq írátiáhro éna, Wenawahrahga Manikáne ehweh irari anínsábé, Are íre Manikáne ehweh iraréna aní móne ata ataowe.

<sup>25</sup> Aiq pútaq ehwéh teiníe. Naho Manikáne ehweh irarú ani Éráísa marakóipeq míowana apahtáró ópéq mó opéq ákáhtaq íre ibonsúnsabe moke mi marákóráq anotah ehwéhrówe. Mi tanáhráq áhnte kewéínínsó Ísara kené marakórapeq míowana

<sup>26</sup> Manikánka Éráísa seba eqmaroo? Írakaumo. Manikánka we nahnsó kewéíní Sárépáta su wahpeq Sáíróna marákórápéqté ínípá eqmarowe.

<sup>27</sup> Manikáne ehweh irarú aní Érísa oga míotaq áhnte Ísara ke anotah naonkákáq ké míowe. Manikánka Érísa séhréh atehrana wega áhnte kaweraritoo? Írakaumo. Peh morá Síria marákórápéqté náhnsó wéh aní wenawíq Néáma anotah naonkákáq míowana kaweratowe úwe.

<sup>28</sup> Úwara moke mitaq momiwí kegá irera anotah abíáhnsá atówe.

<sup>29</sup> Abiahnsa atónsabe iriwe méra Sísa táhloqme sensuwahpeqte áhnánsáhrápéq abariwe móátówe. Mitaq mentú kowara sega Sísa mentúpipeq pagunsuaneheéra móátówana

<sup>30</sup> wege mi wehekéq ákáhpitaq kure pokúwe.

*Sísaga owainawa kaqauwo ehwéhne.*

(Mákha 1.21-28)

<sup>31</sup> Sísaga pokéna Kehrari marákórápéq Kápénéáma suwahpeq tunse ahrena ahrena wehekáh Asiu kené momiwí nahtápéq síwáhnorúwe.

<sup>32</sup> Págegeue síwáhnorú púara sega áhtenuwe.

<sup>33</sup> Áhtenuwana owainawanka subiqmaq subiqmarú aní Asiu kené momiwí nahtápéq míowana owainawanka iwíáh atowana anotahtaq mahraréna,

<sup>34</sup> Sísao, are Néhsara suwahpeqte ání móne. Arega itewe aneraitaníbo? Iubiq iuanie seno? Arewe Maniká míéhrabeq kaweptaq mía míaóna aní móne. Arewe aiq tagaríóge úwe.

<sup>35</sup> Úwana Sísaga owainawansabé awehgu atena, Ehiya mé we auwe pokúno atowana owainawanka wehekeq ákáhpi mi aní aunúnkaq márunsurahúwana íre subisa pehipi auwena pokúwe.

<sup>36</sup> Pokúwara ómi míó kega anotah ahténéra seye náhenéra, Aneq pagégé éhwéhpo? Anotah wahnáh áninká síwáhnorinserahnéna Sísaga pokúno éhwéh págegeue teriuwara owainawamarínká mi aní auwera pokowe uwe.

<sup>37</sup> Sísa éhweh mitaq teri mahtaq teriuwara ómi mi marákórápéqté kégá írówe.

*Sísaga Pítane ahrahnawa kawerato ehwéhne.*

(Mátiyu 8.14-15; Mákha 1.29-31)

<sup>38</sup> Sísaga Asiu kené momiwí nahtápéq suena Sáímónine nahtapeq pokúwana Sáímónine ahrahnawa osoro awáhréuwara míó kega Sísansabé, Kawerato uwe.

<sup>39</sup> Uwana Sísaga awahre inípá kure wene máhriqtaq iriwe ména iraró awáhréyábé, Túbáh agúno atowana kaweragúwana mi inínká apubúue irigéna táchutahuq tíwe náriuwe.

*Sísaga áhnte awáhré ké kawerarito ehwéhne.*

(Mátiyu 8.16-17; Mákha 1.32-34)

<sup>40</sup> Ío tupekútaq awahre kené iyahnabo anímárínká se sehgiwera Sísaba mórítówe. Mórítówana Sísaga wene ayahnkaratáté moke awahre ke moraní moranínue táhatorowana sene awahre kaweragúwe.

<sup>41</sup> Kaweragúwara owainawamarínká mó ke suanaútaq ehwehnabaéra Sísansabé, Are Manikáne ahninkáwá wóne éra mi ke suera pokuwe. Pokutaq Sísaga sensabé, Ehiya míahro aritowe. Owainawamarínká, Sísawe Manikánka wehuke kaweraritankeheéna omaq ato aní míre éra sirupipeq we tagaríónsabe Sísaga ehiyansá aritowe.

*Sísaga mó ke suwahpeq kure kaweq ehwéh teriu ehwéhne.*

(Mákha 1.35-39)

<sup>42</sup> Ahyahbinkerotaq Sísaga mitaq suena abatapi pokúwe. Mibeqté kégá we anebahrué kure tagéra wensabé, Pokinehboq iteba sewíahno atówe.

<sup>43</sup> Atówana Sísaga sensabé, Ínéwé mó kehiná suwahpeqkakáq Manikánka wahnahrabeqte éhwéh wene kaweq ehwéh koreriníe. Manikánka, Korerio éna eqmaq núwátáire úwe.

<sup>44</sup> Sísaga Súria marákórápéq Asiu kené momiwí nahmárítápéq mi ehwéh koreri terinúwe.

<sup>1</sup> Sísaga Kénésáréti kawéhú<sup>\*</sup> áhnopeq iriwe ména síwáhnorútaq su kegá Manikáne ehweh iraneheéra weba kowíorabeq áhnte ke soruparíó puana mitaq kígíúwe.

<sup>2</sup> Pahnsábátáhru kegá sene sípiraré áhnopeq marera arahwéraq sene kahwewarí pabeq paberuwana Sísaga mi sipíráré tagówe.

<sup>3</sup> Su kegá pagu pagununsabé Sísaga Sáimónine sípiipéq kie irigue wensabé, Mahtaq sue móbeq móatiahno úwe. Úwara sípiipéqté kégá wene ehweh sehgíuwana wega mi sipíipéq tútuue ména áhnopeq mío keyabé síwáhnorúwe.

*Pítarehga sene sípiakáq suera Sísa kéró ehwehne.*

(Mátíyu 4.18-22; Mákha 1.16-20)

<sup>4</sup> Síwáhnorú ehweh parabagútaq wega Sáimónirehyabe, Pah meyagéhboq púrúrúia kawéhútápéq pokue kahwe tuparuqme uwe tagahro úwe.

<sup>5</sup> Úwana Sáimóniga Sísansabé, Anotah aní móne. Itega inokáhpeq uwe taga tagaéwonana írakaunire. Peh arega tenienayabé mó uwe taganie úwe.

<sup>6</sup> Segá sene kahwewarí tuparuqme uwera áhnte pah maqmíowe. Peh íregáritaq pah maqmíowana sene kahwewarí surakinaúnsabe

<sup>7</sup> sega mó sipíipéq mío íyáhnábó ánímárlínsábé siyah sahnupéra seséhréh aitáhro uwara sure mi sipíráréípquéq pah márówana umehúnsabe sípiraré wánínkorahúwe.

<sup>8</sup> Sáimóniwe we mó awíq Pítæ. Wega mina tagéna Sísane auranabiahtapeq arehunseraráq ména wensabé, Néne Wahnahno, ínéwé áhnte ahbábáq aní mío púah arega nue pokúno úwe.

<sup>9</sup> Se áhnte pah maqmíónsabe Pítareq wereq mío kereqka anotah ahténuwe.

<sup>10</sup> Pítane iyahnabo aníté sensíwíq Sémísireq Sónireqme Sébérine ahninkwáráré míoye. Pítarehga iwiáhunserah sega moq mira íwíáhuye. Sísaga Pítansabé, Íre áhreúno. Ibora arega kahweipéq pah maqmiahnanserah mókake wehuke ínéba meriqme sinkehe úwe.

<sup>11</sup> Úwara sega sene sípi áhnopeq arahwéraq abariue marera moke suera Sísa kérówe.

*Sísaga anotah naonkákáq ání kawerato ehwéhne.*

(Mátíyu 8.1-4; Mákha 1.40-45)

<sup>12</sup> Sísaga mó ke suwahpeq míotaq anotah naonkákáq ánínká we tagéna áhtenú púana arehunserárue wene ayahqno káuqmunurawéna Sísansabé pagu pagunéna, Anotah aní móne. Are awahbáhnaraqmé kaweraintahráhóne úwe.

<sup>13</sup> Úwana Sísaga ayahnkahkahrué wenaneq táhtorena wensabé, Aiq mirauge. Are awaho ani míahno atowana mina irarútaq wene náonaba apubúue wagúwana kaweragúwe.

<sup>14</sup> Kaweragúwana Sísaga wensabé, Are kaweratónsábé mó ke teríneho. Írakaumo. Manikáne ehweh mibeq mahbeq aítéh ánípá pokue arene anonka móreawo. Are awaho ani úkire igeħboq Mósísiga irarúnserahnue Manikánsabe titirúno úwe.

<sup>15</sup> Úwara Sísaga miraú ehweh mitaq teri mahtaq terinuwara áhnte kegá wene ehweh iraneheéra suwe. Awahre kegá, Sísaga kaweraitankéhe íwíáhéra weba suwe. Áhnte kegá weba suwana

<sup>16</sup> wega ahriahri miraúnserahnéna púrerinieéna abatapi pokúwe.

*Sísaga aiayah pukia ání kawerato ehwehne.*

(Mátíyu 9.1-8; Mákha 2.1-12)

<sup>17</sup> Sísaga síwáhnorútaq Péhrasi<sup>†</sup> kereq Mósísine ehweh síwáhnoru kereqka mitaq tútuue méra írówe. Segá sensuwahpeqme Sarúsarama suwahpeqkakáq moke Kehrari

\* **5:1:** Kehrari kawéhúmá mó awíq Kénésáréti kawéhúne. † **5:17:** Aigárápéqté éhwéh Mátíyu 3.7 tagáhno.

marákórápéqté ké suwahpeqkakáq Súria marákórápéqté ké suwahpeqkakáq sensuwah-peq suera Sísane ehweh iraneheéra suwe. Manikánka Sísa págege atena séhréh atowana wega awahre ke kaweraritowe.

<sup>18</sup> Mó kegá aiayah pukia ání wene sehitaq Sísaba móataneheéra sehgiwera suwe. Sísa míeh náhtápéq móatanehe íwíáhéra

<sup>19</sup> áhnte wehekéq nahupeq kígünsabe sega íre kioráhuwe. Íre kioráhéra nahnsorapéq kire abogéh piruqmarera abahrabahrútaq aiayah pukia ání wene máhriqkakáq sehitaq-maqme wehuke míópi Sísane auranabiahtapeq márunkátówe.

<sup>20</sup> Segá iwíáhéra, Sísaga kaweratanawire íwíáhuwana Sísaga sene iwíáh tagéna aiayah pukia ánínsábé, Nánibáq móne. Arene ahbabáq aíq kaweratatóge úwe.

<sup>21</sup> Úwara Péhrasi kereq Mósísine ehweh síwáhnoru kereqka seye náhenéra, Mah anímé Manikánsabe íre kaweq ehwéh atéhre. Ahbabáqsabe insega kaweraritahráhiro? Manikánka webataq wehukene ahbabáq kaweraritahráhire uwe.

<sup>22</sup> Uwana Sísaga sene iwíáh irena sensabé, Itene irupipeqmé aneqsabé mira íwíáho?

<sup>23</sup> Aiayah pukia ánínsábé aneq ehwéh teawinínkono? Arene ahbabáqsabe kaweratatóge teawinínkono? Are irigue ah nogo teawinínkono? Íre págege ehwéhmé ahnabo?

<sup>24</sup> Íné wehukení úku anínká mah marákó márakkó wehukene ahbabáq kawerari-tahráhige. Sokigi ainíboq tagariáhro éna aiayah pukia ánínsábé, Teawiníboq iro. Irigue arene máhriq mewe arene nahtapeq pokúno úwe.

<sup>25</sup> Úwana ómi ke míótaq mi anínká apubúue irigéna wene máhriq mewena Manikánsabe anotahtaq iwíáh iwíáh atena wene nahtapeq pokúwe.

<sup>26</sup> Pokúwara tago kegá anotahtaq áhnenéra Manikánsabe iwíáh iwíáh atera seye náhenéra, Iboramé ótaq sansá tagóne uwe.

*Sísaga Mátíyunsabé, Íné séniro ú ehwehne.*

(Mátíyu 9.9-13; Mákha 2.13-17)

<sup>27</sup> Sísaga tuekúwana táhkísi moné meyo ani wenáwíq Áríwái‡ tagówana wega táhkísi moné meyorabeq tútuue míowana tagéna Sísaga wensabé, Íné séniro úwana

<sup>28</sup> wega irigue moke mitaq ko naneq suena Sísa kérówe.

<sup>29</sup> Áríwáiga wene nahtapeq Sísa kiraboúwara áhnte táhkísi moné meyó kereq mó kereqka Sísarehreq táhutahuruwe.

<sup>30</sup> Táhutahuruwara Péhrasi kereq Mósísine ehweh síwáhnoru kereqka mina tagéra Sísa kéró keyabé kasenéra, Táhkísi moné meyáh kéréq mó ahbabáq kéréqme itewe aneqsabé moráráq naho éra abiahnsa arítówe.

<sup>31</sup> Sísaga sene ehweh irena sensabé, Sótehga awaho ke máráhsíni íre náriasa peh morá awahre ke náríre.

<sup>32</sup> Mina inserah ínéwé kaweqtaq míáh ké séhréh aritanieéna íre suge. Peh ahbabáq ke kaweraritanieéna suge úwe.

*Sísaga táhutahuq awehrio sansánsábé síwáhnorú ehwehne.*

(Mátíyu 9.14-17; Mákha 2.18-22)

<sup>33</sup> Wehukega Sísansabé, Sóni kéráh kégá mó wehekáhnue kawerue púreroneheéra táhutahuq awehriowe. Awehriowara Péhrasi ke kéríráh kégá moq mira aruqarurowe. Peh are kéráh kégá íre awehriéra pehipi nahwe uwana

<sup>34</sup> Sísaga pabeqme ehwéh teriena, Pahuwiotaqmé o menáhwé míéhtáqmé itega wene iyahnaboyabé, Táhutahuq awehrioro terieráho? Írakaumo.

<sup>35</sup> Mókake o menáhwé seba íre míahnaraqmé mi tanáhráq wene iyahnaboga táhutahuq awehrigehe úwe. §

‡ 5:27: Mátíyuwe mó awíq Áríwái. Mátíyu 9.9 tagáhno. § 5:35: Mi ehwéh áwahewé aigárápéqté éhwéh Mátíyu 9.15 tagáhno.

<sup>36</sup> Sísaga mó pabeqme ehwéh mahraréna, Wehukeníká nahonáh sáhkétí kawerinieéna o sahkétí subansuqmaqme mi subánsátáté párúwe nahonáh sáhkétí kawerinabo? Írakaumo. Miraitaq tahirímé nahonáh sáhkétí mó subanki irino.

<sup>37</sup> Wehukeníká o nahniáq sera ano naho naho méméné áuyahwa antéhyápípéq íre ahkíre. Miraitaq tahirímé sera anonka muinaraq nahonáh ántéhyá tapoagirana sera ano marakóraq antigí irino.

<sup>38</sup> Wehukeníká o será ano o antéhyápípéq ahkíre. Wehukega ahkírataq mi tehtáre náneqme kawerue kanae. O será anome kawerue kanae. Antehyamé moq kawerue kanae úwe.\*\*

<sup>39</sup> Naho sérá ano neh anínká iwíáhime, Naho sérá ano áhnte tei puana mi anónká o será ano kiotaikire íwíáhire úwe.

## 6

*Sísaga ahrena ahrena wehekáh arambéhriéyabe irarú ehwehne.*

(Mátíyu 12.1-8; Mákha 2.23-28)

<sup>1</sup> Ahrena ahrena wehekáh Sísareq we kéró kereqka páréti mirao naneq será sotápéq kótaikutaq we kéró kega mi será késabaríqmé késabaríqmeue kure ayahnue ái poruwe nowe.

<sup>2</sup> Nowara Péhrasi kegá sensabé, Ahrena ahrena wehekáh íre mirao naneq sansá míre. Aneqsabé miraoo uwe.

<sup>3</sup> Uwana Sísaga sensabé, Itewe Manikáne púkuipéqté séhíramé Tébítireq we kéró kereqka sirupibiútaq mirau sansámé íre sáhnsahwe ahtebaho?

<sup>4</sup> Wega Manikánsabe iwíáh íwíáh atáh náhúpéq kibekue Manikánka tagankeheéra máró paréti mewe néna we kéró ke náriuwara sega moq nowe. Mósíne ehweh irarunka mi parétíwé pehipéqté kégá íre nah nanere. Peh morá Manikáne ehweh mibeq mahbeq arítáh kégá nahrahewe ire. (1 Samuel 21.1-6)

<sup>5</sup> Sísaga sensabé, Íné wehukení úku anínká ahrena ahrena wehekáh wahnah wahnah-nuge úwe.

*Sísaga ahrena ahrena wehekáh sawenkahnia áyáhnkákáq ání kawerato ehwehne.*

(Mátíyu 12.9-14; Mákha 3.1-6)

<sup>6</sup> Mó ahrena ahrena wehekáh Sísaga Asiu kené momiwí nahtápéq kibekue síwáhnorúwana mitaq sawenkahnia áyáhnkákáq ání míowe.

<sup>7</sup> Mósíne ehweh síwáhnoro kereq Péhrasi kereqka mitaq méra Sísa ehweh ataneheéra ahrena ahrena wehekáh wehukení kaweratanabiramo éra ebitiówe.

<sup>8</sup> Ebitiówana Sísaga sene sirupipeqté íwíáh aiq tagéna ómi kegá tagotaq sawenkahnia áyáhnkákáq ánínsábé, Iriwe míahno úwana we irigue míowe.

<sup>9</sup> Irigue míowana Sísaga míó keyabé, Itensabé kaseninie. Mósíne ehwehnkawé ahrena ahrena wehekáhnsábé anere teiro? Kaweq sansá miraonéhnkono? Íre kaweq sansá miraonehnkono? Wehuke kaweraritaneheéq séhréh aritanéhnkono? Íre kaweratanéhnkono éna

<sup>10</sup> míó ke aurankaue tagéna sawenkahnia áyáhnkákáq ánínsábé, Arene ayahnkara obariro úwana wene ayah obarirowana kaweragúwe.

<sup>11</sup> Kaweragúwara mi kegá tagéra anotah abíáhnsánéra sío síoéra, Sísawe aneronehnkono uwe.

*Sísaga we kéró ke omaq sito ehwehne.*

(Mátíyu 10.1-4; Mákha 3.13-19)

<sup>12</sup> Mitaqkake Sísaga púrerinieéna sáwéhrapeq kiwéna moke mi inókáhpéq mitaq púrerúwe.

\*\* <sup>5:38:</sup> Mi ehwéh áwahewé aigarápéqté éhwéh Mátíyu 9.17 tagáhno.

<sup>13</sup> Púreréna ahbiahipeq we kéró ke síáhrabéna airápété téhraníté omaq sitowe. Sensabé eqmaro kee ue síwíraritowe.

<sup>14</sup> Omaq sito ke síwíqmarimé mahraue Sáímóninsabé Pítae atowe. Pítane ábákawawé Ehntarue. Mó anímári síwíqmarimé mahraue Sémisi, Sóni, Pírípi, Pátórómíyu,

<sup>15</sup> Mátíyu, Tómáhsí, Ápíásane ahninkáwá Sémisi, Sáímóni Séróti kahnáh ání,

<sup>16</sup> mó Sémísine ani Súrása, mó aní téhtaré áwíqkákáq ání Súrása Ísíkáríótí miraue omaq sitowe. Súrása Ísíkáríótíwe anehe Sísane naruo koweriro aníne.

*Sísaga áhnte awáhré ké kawerarito ehwehne.*

(Mátíyu 4.24-25; Mákha 3.7-12)

<sup>17</sup> Segá sáwéhrapeqté tútaq ukisatáq míowara áhnte we kéró kereq mó kereq míowe. Súria marákórápéqté kereq Sarúsarama suwahpeqte kereq nahmbísi marákórápéq Táiyá suwahpeq Sáírona suwahpeq mibeqté kereq suwe.

<sup>18</sup> Mi kegá Sísane ehweh iraneheéra séra sene awahre kaweraitankehééra weba suwe. Owainawanka subiqmaq subiqmarú kega moq weba suwana Sísaga kaweraritowe.

<sup>19</sup> Sísane anepeqte págege arítéh náneqka wereq wahtotaq míó ke kaweraritonsabe ómiga we táhtoqnaneheéra suwe.

*Sísaga iwíáh iwíáhoro ú ehwehne.*

(Mátíyu 5.1-12)

<sup>20</sup> Sísaga we kéró ke tagéna síwáhnoréna, Tabonah keo, Manikánka wahnah wahnah-nirabeq awaq miahráhonsabé iwíáh iwíáhoro.

<sup>21</sup> Amahnága irupibii keo, mókake iyahbankiranæ. Minayabe iwíáh iwíáhoro.

Amahnága umehiraq ibisah keo, mókake wíréh wíréhigehe. Minayabe iwíáh iwíáhoro.

<sup>22</sup> Íné wehukení úku aní séníráhnsábé mó kegá itensabé suwahrianae. Ite kaqí-uwanerherawoe. Ite íéhruruoneherawoe. Ite íre kaweq anímári móe aitanerherawoe. Íné séníráhnsábé mina tahnsa sánsámári mirairataq iwíáh iwíáhoro.

<sup>23</sup> Segá mirairanka íópeq itene ápeq anotah úkinae. Minayabe sega mirairataq ábáhrue iru eyoyóéq iwíáh iwíáhoro. Segá ite íwíóqnehranserah sene sigaqnaréhga Manikáne ehweh iraru ke moq naho síwíognowe.

<sup>24</sup> Amahnága áhnte mensáméhnsá matíáh keo, kamah ainawire. Itega iuwahbeh naneq aiq merowe.

<sup>25</sup> Amahnága iyahbankiréh keo, mókake irupi kamah ainawire. Amahnága wíréh wírého keo, mókake ibitunatúnánu ibisagehe.

<sup>26</sup> Ómi kegá ite kaweq ke wóe irataq iwíáhue kawerurero. Irare kené sigaqnaréhga mina unserahnéra péhe éhwéh teríú keyabé kaweq ke wóe arítówe úwe.

*Itene naruoyabé irutaboiroro ú ehwehne.*

(Mátíyu 5.38-48)

<sup>27</sup> Sísaga mó mahrrárena, Néne ehweh íráh keo, teiníboq írátiáhro. Itene naruoyabé irutaboiroro. Itensabé suwahrieh ke kawerarítáhro.

<sup>28</sup> Iéhruruo keyábé Manikánsabe teaweq, Mi ke kawerarito ue teawéro. Íwíóqnah keyábé púrerarítáhro.

<sup>29</sup> Mó anínká are ahsuehinahwe éberiopéq pabeq suehnana ahsuehino. Arene sáhkéti meyahnaraq síoti meyaníe ínaraq íre ahqáho ato.

<sup>30</sup> Mó anínká arensabé aneqpopoq nánio ínahwe náwo. Mó anínká arene ménsámehnsá meyehtaq wensabé, Néne meyahna naneq apubúue menio íre irarúno.

<sup>31</sup> Mó kegá ite iuwahbeh sansánue ite kaweraitáhnsenára itega moq mina tahnsanue se kawerarítáhro úwe.

<sup>32</sup> Sísaga mó mahraréna, Itega peh morá itensabé sirutaboiro keyábé irutaboiri-rataqmé inseréhga, Ite kaweq ke wóe íwíáhigehbo? Írakaumo. Ahbabáq kega moq sensabé sirutaboiro keyábé sirutaboiro mino.

<sup>33</sup> Itega peh morá ite kaweraitáh ké kawerarítáh sánsánirataq inseréhga, Ite kaweq ke wóe íwíáhigehbo? Írakaumo. Ahbabáq kega moq mina tahnsa mirao mino.

<sup>34</sup> Itega peh morá ite náieráho ke nárírataq inseréhga, Ite kaweq ke wóe íwíáhigehbo? Írakaumo. Ahbabáq kega iwíáhéra, Meyáh kégá mókake ite moq náigéhe éra sene ahbabáq iyahnabo náieráho mino?

<sup>35</sup> Itene naruoyabé irutaboirue kawerarítáhro. Nárírataqmé mókake náigéhe íwíáhiyehboq pehipi náriero. Mirairataqmé Maniká Iteriboga anotah apéq inkéhe. Itega wene animári míagehe. Maniká Iteribo anotah aní mía míáéna íre peh morá we kaweratáh keyábé arutaboirarítéhre. Wensabé íre iwíáh íwíáhia peh ahbabáq keyabé moq arutaboirire.

<sup>36</sup> Maniká Iteriboga ómi keyábé arutaboirinserah itega moq irutaboirarítáhro úwe.

*Mó kené sánsá íre saraq sitáhro ú ehwehne.*

(Mátíyu 7.1-5)

<sup>37</sup> Sísaga mó mahraréna, Mó kené sánsá saraq siteq ahbabáq ke woe aritého. Mirairataq Manikánka moq itene sánsá saraq itena ahbabáq ke woe aitanawire. Mó kegá ahbabáraitó íwíáh íre iahreraq mareq súáhro. Súéhrataqmé Manikánka moq itene ahbabáq íre ahreraq marena suankéhe.

<sup>38</sup> Nárírataq Maniká Iteriboga moq náinawire. Wega tasu tasue obenkíqme náinkéhe. Itega saraqme náríranserah wega moq mina tahnsanue náinkéhe úwe.

<sup>39</sup> Sísaga mah pabéqmé éhwéh mahraréna, Aura pira áninká mó aurá pírá ání ahmboqme ah sokigi atahráhiro? Írakaumo. Miraóyataq tahirímé mi anítégá mataipéq inahnsuboya irino.

<sup>40</sup> Áwáhnorirana íréh áninká we áwáhnori aní íre kiotaikorahire. Moke ahtebawiah-naraq we áwáhnori aní tahnsa míankehe úwe.

<sup>41</sup> Sísaga mó pabéqmé éhwéh mahraréna, Arenawahrah aníné aurapi pehgáriq atútú tagé arerene aurapi anotah sehikárá kékhsábé aneqsabé arerene auransabé íre iwíáhono?

<sup>42</sup> Arene aurapi anotah sehikárá kékrahwe arega íre tagahne. Minayabe aneqsabé arenawahrah anínsábé, Arene aurapite átútú meauwanínkono eno? Are ahbabáq kopéráhpéróna aní móne. Téhwe arerene aurapite séhikárá merue anehemé arenawahrah aníné aurapite átútú kawerue tagé meauwahráhóne úwe.

*Íre kaweq awánkánká abehq sérá iyanae i éhwéhne.*

(Mátíyu 7.16-20, 12.33-35)

<sup>43</sup> Sísaga mó mahraréna, Kaweq awánkánká abehq sérá íre íyéhre. Abehq áwánkánká kaweq será íre íyéhre.

<sup>44</sup> Wehukenínká awanká sera tagéna mi awánká ahtebbehre. Wehukenínká wisuraqte pópo íre isioráhéra káránkárásáhtaqté kombahatóq íre isioráhire.

<sup>45</sup> Kaweq anínká wene arupipeq kaweq iwíáh kék púana kaweq sansáni. Ahbabáq anínká wene arupipeq ahbabáq iwíáh kék púana ahbabáq sansáni. Wehukeníne arupipeq iwíáh obenkítíeh púana wene áwéhga mi iwíáh irarerahire úwe.

*Nah piehya anítéyábé pabeqme éhwéhne.*

(Mátíyu 7.24-27)

<sup>46</sup> Sísaga mó mahraréna, Néne ehweh íre sehgirosabé aneqsabé néne Wahnah mone aintaho?

<sup>47</sup> Ínéba séna néne ehweh irena sehgi ánime aneq tahnsa anípo? Teiníe.

<sup>48</sup> Néne ehweh irena sehgí ánímé nah píeh áninká marakó íre wahto ubuqme nah-wiahnsanse págege marákóráq pearéh ání tahnsane. Págege marákóráq kawerue pearéh púana anotah ibónsirana wání píehtáq wene nah íre kúrugúruue sokogia peh págegeue kékre.

<sup>49</sup> Néne ehweh irena íre sehgí ánímé aneq tahnsá ánípo? Teiníe. Néne ehweh irena íre sehgí ánímé págege marákó íre ubuqme pehipi wene nah pearéh ání tahnsane. Anotah ibónsirana wání píehtáq mi nah kúrugúruue sokogire. Sokogirana moke íre kaweragire úwe.

## 7

### *Kíápéténine arambehri aní kawerato ehwéhne.*

(Mátíyu 8.5-13)

<sup>1</sup> Sísaga mah ehwéh síwáhnoréna mitaq suena Kápénéáma su wahapeq mátabuipeq kékáwe.

<sup>2</sup> Mitaq 100 Aroma sontiá kéné kíápéténiga ména wene arambehri aní anotah arútábóíratowana mi aní anotah awáhrééna pukinaúwe.

<sup>3</sup> Sísa iteruwahapeq míéhre u irena kíápéténiga Asiu kené aboawah wehyábé, Néne arambehri aní segawerato koreawéro ue eqmaq suowe.

<sup>4</sup> Eqmaq suowara Sísaba séra, Máho ue pagu pagunéra Sísansabé, Kíápéténíwe áhnte kawéq aní púaawahre aní segawerato.

<sup>5</sup> Kíápéténiga ite Asiu keyábé áhnte arútábóíraitena itene momiwí nah pearena eqitáráire éra pagu pagunuwe.

<sup>6</sup> Pagu pagunuwaná Sísaga se kéríqme mi aníné nah wahtotaq kútaq kíápéténiga mó eqmaro kereq piehgíúwe. Segá Sísansabé, Anotah aníno, kíápéténiga teí éhwéhmé iro. Wega arensabé mahraréna, Íné pehgáriq aní mó púaawahre nahupeq íre súno.

<sup>7</sup> Are anotah aní míahna puana areba íre koragoge. Arega peh ehweh irarinana néne arambehri aní kaweragíno.

<sup>8</sup> Íné moq wahnah sansá tagaríóge. Néne wahnah aiq míéhrana íné moq wahnah aní ména sóntiá ke wahnahnuge. Ínéga mó sontiá áninsábé, Pokúno atótáq wega apubúue pokire. Mó sontiá áninsábé, Mahbeq súno atótáq wega apubúue ínéba sire. Néne arambehri anínsábé, Miraúno atótáq wega apubúue miraire. Kíápéténiga aiq irarire uwana

<sup>9</sup> Sísaga mi ehwéh irena áhtenéna pabeqme weba mó keyabé, Teiníboq írátiáhro. Mi anínsábé anotahtaq aiq pútare aintéhre. Nánuwahrah Asíú kégá mina tahnsanue íre aiq pútare aintáhwe úwe.

<sup>10</sup> Úwara eqmaq suo kega kíápéténine nahtapeq kouwekue sutaq mi awáhré aní kaweragúwana awaho ani mówara kérágowe.

### *Sísaga pukú mahbí iriwe organúq ato ehwéhne.*

<sup>11</sup> Mó tanáhráq Sísareq we kéró kereq áhnte mó kereqka Náini su wahapeq pokuwe.

<sup>12</sup> Kuriraq wahtotaq sutaq mibeqté kégá pusa aní mómaisaneheéra sehgiwera suwe. Pukú aníné anowagáwé peh morá mi aní maqmarena keweiní mówara áhnte we-nawahrahreq suwe.

<sup>13</sup> Sísaga pukú aníné anowa tagéna wensabé arutaboiratena mahraréna, Íre ibisáhno éna

<sup>14</sup> sehiq koráhtorowara sehgiwe su kegá mitaq iriwe mówe. Sísaga pusa áninsábé mahraréna, Káriq mahbío, irigúno úwe.

<sup>15</sup> Irigúno úwana pusa áninká iriwe tútuue ména ehwehnúwe. Ehwehnúwana Sísaga mi aní anowabá atowara

<sup>16</sup> tago kegá áhtenéra Manikánsabe iwíáh íwíáh atówe. Iwíáh íwíáhatera mahraréra, Manikáne ehweh irari anínká iteba sire. Manikánka wene animári séhréh aitanieéna aiq sire uwe.

<sup>17</sup> Súria marákórápéqté kéréq móberiopéqté kéréq Sísaga miraú ehweh mitaq teri maha-taq terinuwara írówe.

*Sóniga we kéróya aníté Sísaba eqmaq suo ehwehne.*

(Mátíyu 11.2-19)

<sup>18</sup> Sóni kéró kega moke mi ehwéh teawúwana Sóniga téhraníté omaq sitena

<sup>19</sup> Sísansabé ehweh kasenigeheéna eqmaq suowe. Eqmaq suanaútaq mi anítéyábé, Sísansabé kogasenéta, Arewe Manikánka eqmaraníe ú anípo? Ite mó anínsábé áwénunonehnkono kogasenotao úwe.

<sup>20</sup> Úwara sega Sísaba kéra wensabé, Wání meri merini aní Sóniga eqmaq íuwéhrata súye. Wega ite eqmaq iuwanauraitaq mahraréna, Arewe Manikánka eqmaraníe ú anípo? Ite mó anínsábé áwénunonehnkono uraire uye.

<sup>21</sup> Mi tanáhrág Sísaga áhnte awáhré kéréq owainawanka subiqmaq subiqmarú kereq aura pira kéréq kaweraritena

<sup>22</sup> Sóniga eqmaq suo anítéyábé, Irehya ehwéhnkákáq tagéhya naneqkakáq Sóni kore-awétao. Ínéga miraunka aura pira kégá tagahwara aigará soriqnah kega ah nogowara náonkakáq kéné näo wagirara ahre parosa kégá ehweh íráhwe. Pusa ké iriwe organúq sitena Manikáne kaweq ehwéh tabonah ke síwáhnoruge.

<sup>23</sup> Ínénabe árahinabomo íwíáh íre iwíáhia peh ínénabe kawerue aiq pútare aintéh ánímé aru ukiqme aní míéhre. Mah ehwéh Sóni koreawétao úwe.

<sup>24</sup> Sóniga eqmaq suo aníté pokuyataq Sísaga weba sáhurió ke Sóni éhweh teriuwe. Wega mahraréna, Sóniga uworapeq íwáhnoruraitaq koraganeheraurotaqmé we inse wíre íwíáhéq koragaroo? Sóiririrana onega míu míu inserah Sóni mó iwíáh mó iwíáhi aní míre íwíáhéq koragaroo? Sóniwe íre mina tahnsa aní mire. Írakaumo.

<sup>25</sup> We inse wíre íwíáhéq koragaroo? Kaweq korósí aneraneria aní koragaroo? Írakaumo. We íre mina tahnsa ání míarairara ménsámehnsá áhnte kéké siwahriria kewé uworapeq íre mía peh wahnah kené nahtapeq mía míaowe.

<sup>26</sup> We inse wíre íwíáhéq koragaroo? We Manikáne ehweh irari aníne íwíáhuroo? Aiq pútäq íwíáhowe. Írátíáhro. We Manikáne ehweh irari anínéna moke mó áwáhu ke kiotaikuraire.

<sup>27</sup> Sóni éhwehme Manikáne ehwehnka aiq mahraréna, Néne ehweh korerina ánímé ebeq eqmarahnana are sina ah kawerarankehe íre úwe.

(Malakai 3.1)

<sup>28</sup> Sísaga mó mahraréna, Teiníboq írátíáhro. Sóniwe anotah anínirara moke mó kegá we íre kiotaikowe. Íre kiotaikowana Manikánka wahnah wahnahnirabeq íópipeq kibeki aní pehgáriq anínká Sóni kiotaikire úwe.

<sup>29</sup> Úwara táhkísi moné mewe mewe kereq áhnte mó kerekka mi ehwéh irera íwíáhéra, Manikáne sansá aiq kaweq sansáne uwe. Sóniga se wání merinie únsabe mira íwíáhuwe.

<sup>30</sup> Péhrasi kereq Mósísine ehweh síwáhnoro kerekka Sónine wání íre meyónsabe Manikáne kaweq sansánsábé iuwahriehre íwíáhuwe.

<sup>31</sup> Sísaga mó mahraréna, Amahnága oga míáh kéké ite aneq tahnsá kéké teiníkono?

<sup>32</sup> Itewe káriq anímárínká máhkétirapéq ogi ogionserah tahnsá kéké wóe. Mó anímárínká mó anímárínsábé abiahnsa aritera sensabé, Igonkónúnaraq itega íre ábáhrowe. Ibitunátúnánúnaraq itega íre ibisahwe ewe.

<sup>33</sup> Wání meri merini aní Sóniga suraitaq wega táchutahuq avehriéna náhníáq sera ano íre narainsabé itega abiahnsa ateq, Owainawanka wene arupipeq míéh ání míre atárówe.

<sup>34</sup> Íné wehukení úku anínká surautaq táhutahuqkakáq náhníáq sera anonkakaq pehipi nogaq itega ínénabe abiahnsa ainteq mahraréq, Tagariáhro. We uwoyansa kóbuq kahburi aní áhnte nahníáq sera anonkakaq pehipi neh aní míre. We tákhisí moné aebó kéreq mó ahbabáq kéreqne iyahnabo aní míre aintáhwe.

<sup>35</sup> Itega ínénabe mi ehwéh irarewara Maniká tagariáh kégá ahtebé sansánirataq mó kegá tagéra, Se aiq pútaq sansánowe ewe úwe.

### *Sísane aigárátáq wéri abaq ato ehwéhne.*

<sup>36</sup> Peh morá Péhrásí áninká Sísansabé, Ínéreq táhutahuroyehboq máho úwana Sísaga kérrena wene nahtapeq ména táhutahurúwe.

<sup>37</sup> Mi ke su wahpeqte íní we ahbabáq ini míowe. Mi inínká Sísa mitaq míéhre u irena áhnte kawéq kunkúni werí motóreipéq mewe súwana

<sup>38</sup> Sísa míowana mi inínká wene anehepeq sure wene aigárátáq tútuue ména we áhnte ibisó púana wene aqnu Sísane aigárátáq tabagu tabaguúwe. Miraúnsabe mi inínká wene íre wahto áyáhrátaté Sísane aigárátáq sorahruena wene aigárátáq nánkóqnána wéri abaq atowe.

<sup>39</sup> Abaq atowana Sísansabé máho ú Péhrásí áninká miraú tagéna wene arupipeq iwiáhénéa, Mi inímé ahbabáq ini puana Sísa Manikáne ehweh irari aní míéhtáq tahirímé we táhtoréh íní peh ahbabáq ini míre íwíah irino úwe.

<sup>40</sup> Sísaga wene íwíah irena wensabé, Sáimónio, pehgáriq ehwéh teawiníboq írátiahno úwana, Íwáhnoraníno, tenio úwe.

<sup>41</sup> Úwana Sísaga mahraréna, Peh morá áninká téhraníté móne síátáire. Mó aní 100 Kína mó aní peh 10 Kína ue átáriageheéna síátáire.

<sup>42</sup> Anehe mi anínká sensabé, Ínéga íátáu moné náníétao urairara mi anítégá móne tabonahuroya puara íre aweráhuroye. Íre aweráhuroyansabé móne síátái anínká sensabé, Ínéga íátáu monéwé mó náníyehboq anetaníbo. Túbáhagotao teríátáire. Minayabe aneq iwiáhono? Móne síátái anínsábé ah anínká anotahtaq arutaboirire íwíahono úwe.

<sup>43</sup> Úwana Sáimóniga Sísansabé, Áhnte moné merai anínká áwátái anínsábé anotahtaq arutaboirire. Áwátái anínká wéhuwa nániewé anetaníbo atárái puana anotahtaq arutaboirire úwe. Úwana Sísaga, Arega aiq iraréne éna

<sup>44</sup> pabeqme mi iní tagéna Sáimóninsabé, Arewe mi iní aiq tagahno? Arene nahtapeq sutaq nigará pabeq paberé waní íre nániene. Mi inínká wene aqnruraté nigará pabeq paberaintena wene ayahrataté sobaruqnuéhre.

<sup>45</sup> Arega íné íre nánkóqnáhne. Mi inínká áhntetaq nigará nánkóq nánkórire.

<sup>46</sup> Arega niyahqnopeq wéri íre abaq intahne. Mi inínká nigárátáq kaweq kunkúni werí abaq intéhre.

<sup>47</sup> Minayabe teawiníboq írátiahno. Mi inínká ínénabe áhnte arútábóíraintéh púana wene áhnte ahbabáq kaweratóge. Peh támharo ahbabárirana Manikánka kawerato anínká wensabé pehgáritaq arutaboiratéhre éna

<sup>48</sup> mi inínsábé, Arene ahbabáq aiq kaweratóge úwe.

<sup>49</sup> Úwara mó táhutahuru kegá seye náhenéra, Arene ahbabáq aiq kaweratóge irari anímé árahue mirainkehbo uwana

<sup>50</sup> Sísaga mi inínsábé arega ínénabe aiq pútare aintahnaga arene ahbabáqmari aiq kaweratóge. Pehwehrue pokéwahno úwe.

### *Táhmaro inínsónká Sísa kéró ehwéhne.*

<sup>1</sup> Mó tanáhráq Sísaga anotah matábúrápéqkákáq mó kehiná mó kehiná su wahpeqkakáq ah nogena Manikánka wahnah wahnahnirabeqte éhwéh mi kawéq éhwéh síwáhnorúwe. Airápété téhraníté we kéró ke kérówara

<sup>2</sup> kawerarito inínsónseqka moq kérówe. Menah se awahreuwara owainawamarínká se síwíoqnówana Sísaga sene awahre kaweraritená owainawamarí kaqsuowe. Mi inínsó síwíqmarimé mó iní wenawíq Máhríae. Wene iyahnaboga wensabé Mágára iníne ue áwíratówe. Menah Sísaga mi iníné arupipeqté airápétē téhtaré ówáinawá kaqauwowe.

<sup>3</sup> Mó iní Kúsane ahre wenawíq Sóánae. Wenawehqka Érótine arambehri keraq wah-nahnú aníne. Mó iní wenawíq Súsánae. Sereq áhnte mó inínsónseqka Sísareq we kéró kereq séhréh aritera kirabo arítówe. Sísaga ehweh síwáhnorinieéna ah noguwara mi inínsónká séhréh aritaneheéra kérówe.

*Ayu suitabéyabe pabeqme ehwéhne.*

(Mátíyu 13.1-9; Mákha 4.1-9)

<sup>4</sup> Mó tahanírapéqté ké mó tahanírapéqté kéue íregáritaq kegá séra Sísaba sáhuriówe. Áhnte kegá momiwíuriótaq Sísaga mah pabéqmé éhwéh mahrraréna,

<sup>5</sup> Ayu suitabéh anínká ayu suitabanieéna pokire. Suitabehtaq mó ayú ahtapeq megirana wehekeqká abasaráhwana kabaranka sésiq nehre.

<sup>6</sup> Mó ayú kiruraq megirana kiapoue kirena mi marákó íre tantani puana ehyatagire.

<sup>7</sup> Mó ayú náwerarúítáq megirana náwe kirena kárígariirana íre kawerue kirena sera íre íyéhre.

<sup>8</sup> Mó ayú kaweq marákóráq megirana kiapoue kirena áhnte será iratanire úwe. Sísaga mah pabéqmé éhwéh teriena anehe mi keyábé, Íre parosa áhréákáq kéo, kawerue íráhro úwe.

*Sísaga moke pabeqme ehwéh teriu ehwéhne.*

(Mátíyu 13.10-17; Mákha 4.10-12)

<sup>9</sup> Sísa kéró kega wensabé, Mah pabéqmé éhwéhmé áwahe teio uwe.

<sup>10</sup> Uwana Sísaga sensabé, Manikánka wahnah wahnahnirabeqté éhwéhmé áwahe ite sokigi aiená mó peh pabeqme ehwéh teri terinuge. Minayabe ínéga pabeqme ehwéh irarutaq mó kegá siuranka tagéra peh morá sirupipeq íre tagariahrahewe. Sene siahrega irera peh morá sirupipeq íre írátiahrahewe úwe. (Aisaia 6.9-10)

*Sísaga ayunsabe éhwéh áwahe pahsuo ehwéhne.*

(Mátíyu 13.18-23; Mákha 4.13-20)

<sup>11</sup> Sísaga mó mahrraréna, Mah pabéqmé éhwéh áwahe ahtebagehboq teiníe. Ayume Manikáne kaweq ehwéhne.

<sup>12</sup> Ahtapeq megi ayúmá wehukega Manikáne ehweh íráhwana owainawanka sirupipeqté mi kawéq éhwéh seaebóire. Segá mi ehwéhnsábé aiq pútare atehrana kawerarítéhneho éna aebóire.

<sup>13</sup> Kiruraq megi ayú kiapoinserah wehukega Manikáne ehweh irera sirupipeq eyoyóéra apubúue kowe atáhwe. Manikáne ehwehnka sirupipeq íre ánú píehnsábé pehgáriq tanáhráq sehgówe. Áhwárawe tageh tanáhráq segá túbah agéra Maniká áuwáhwe.

<sup>14</sup> Náwe tarúítáq megi ayúmá wehukega Manikáne ehweh irera, Sehgionehe íwíáhéra mó tanáhráqmé sene arambehriyabé iwiáh kikiréa ménsámehnsánsabe sirutaboiréra seyega sirutaboiro naneqmarínsábé iwiáh íwíáhowe. Náwe soaginserah minawarináká saiqnariéh púana segá Manikáne arambehri íre miraorahewe.

<sup>15</sup> Kaweq marákóráq megi ayúmá wehukega Manikáne ehweh irera sirupipeq ambubu atawéra tábúsoqme iwiáhowe. Kaweq marákóráq kaweq será íyéhnserah segá Manikáne arambehri kawerue miraowe úwe.

*Wehukega áráhmu keqmaráhtáq íre akariaráhnsábé pabeqme ehwéhne.*

(Mátíyu 5.14-16; Mákha 4.21-25)

**16** Sísaga mó pabeqme ehwéh síwáhnoréna, Wehukega áráhmu keqmaráhtáq párétahraté íre akariaráhwe. Mähriq tahbé tehnopeq íre måráhwe. Írakaumo. Nahupeq kira kegá kawerue tagageheéra tahberapeq måráhwe.

**17** Moke kopípéq kék náneqme mókake ábóraq kanae. Kopípéq mirao sansá mókake téhráhnarabeq ábóraragínara tagagehe.

**18** Matiéh ání Manikánka mó náwinkéhe. Íre matiéh ánímé Manikánka wene pehgáriq naneq meyankéhe úwe.\*

*Sísane anowareh ábákawaréhwé inseréhbo i ehwéhne.  
(Mátíyu 12.46-50; Mákha 3.31-35)*

**19** Sísane anowareq ábákawaréhreqka weba séra nah kígíunsabe íre kioráhuwe.

**20** Minayabe mó anínká Sísansabé, Arenanoreq arenábáqmarinseq máhpeq méra are tagéyabe suwahbehre úwe.

**21** Úwana Sísaga mitaq mío keyabé, Manikáne ehweh irera sehgó kewé nainoreq nánibáqmarinseq móe úwe.

*Sísaga irarúnka anotah soiríq táqnáigú ehwehne.  
(Mátíyu 8.23-27; Mákha 4.35-41)*

**22** Mó wehekáh Sísaga we kéró keyabé, Seberaebeq pokonehe úwara sípi kewewera pokuwe.

**23** Sísa sípiipéq sugowana anotah soiríuwé. Anotah soiríuwana nonaburóróuwana wáninka sípiipéq kiegambeh agu aguúwana sípi wánípipeq tupekinaúwe.

**24** Minayabe we kéró kega Sísa iriatera wensabé, Itene Wahnahno, ite pukoneheúne uwana Sísaga irigéna sóiriqsabé, Táqnáigúno éna wánínsabe, Túbáh agúno úwana sóiriqka táqnáigúwana wáninka túbáh agúwe.

**25** Túbáh agúwana Sísaga we kéró keyabé, Aneqsabé íre aiq pútare aintaho úwara sega áhlteneü áhreéra seye náhenéra, Mah ání insebo? Wega sóiriqkakáq wánínkakaqsábé ehweh atéhrana wene ehweh íréhre uwe.

*Sísaga owainawamarí kaqsuo ehwéhne.  
(Mátíyu 8.28-34; Mákha 5.1-20)*

**26** Sísarehga sípi kewewera kure Kehrari kawéhú seberaebeq Kérása kené marakórápéq kuwe.†

**27** Sísaga áhnopeq kútaq mibeqté ání owainawanka subiqmaq subiqmarú anínseq piehgíuye. Íre wahto tanáhráq pehrákora mía míáena nahtapeq íre kaena peh wehuke maisia ónápípéq kaegaeúwe.

**28** Mi anínká Sísa tagotaq kareéna arehunseraráq ména ehwehnabaéna, Sísao, are íópeqté Manikáne ahninkáwá wóne. Aneraintaníbo éna kamah aníneho úwe.

**29** Úwana Sísaga owainawansabé, Auwe pokúno atonsabe wega aneraintaníbo úwe. Ahriahri owainawanka mi aní subiqmaq subiqmarúnsabe uwoyansa aní úkúwara wehukega táhtoqme séniraté wene ayahnkaratáq aigárátáq táhru táhruarówe. Táhru táhruarówana sení suraqsuq suraqsurúwana owainawanka mi aní abatapi kaqsuq kaqsurúwe.

**30** Anehe Sísaga wensabé, Arenáwíq insebo úwana néníwíqmé Íregáritare úwe. Áhnte owáínawámárínká wene arupipeq míónsabe mi ehwéh irarúwe.

**31** Owainawamarínká Sísansabé, Íre ambarúnkákáq mátáípéq eqmaq iuwehneho éra pagu pagunuwe.

\* **8:18:** Manikáne sansá kawerue sehgó ánímé Manikánka séhréh atahnana wega wene sánsá mó ahtebahrahire. Wene sánsá íre kawerue sehgó ání Manikánka we ahtebeh naneq meyankéhe. † **8:26:** Kérása marákó mó awíq kékhe. Mátíyu 8.28 tagáhno.

<sup>32</sup> Íregáritaq poeráhqmárínká wahtotaq sáwéhrapeq náwe sahtaqtme nowara owainawamarínká Sísansabé, Póéráhqmariné sirupipeq eqmaq iuwo éra pagu pagunuwaná kowe aritowe.

<sup>33</sup> Kowe aritowara owainawamarínká mi aní auwera pójéráhqmariné sirupipeq kowiówara moke mi kamári sáwéhrapeqté pehbeheráh tunse mentúpipeq wáninkue pukuwe.

<sup>34</sup> Pójéráhqtaq wahnahnu kegá tagéra pehbeheráh pokue sotápéq míó kereq sene nahtapeq míó kereq koreríuwara

<sup>35</sup> seraganeheéra suwe. Sísaba suwana owainawamarí kaqauwo anínká kawe q iwíáhorahéna aneranerue Sísane aigárátáq tútuue míowara su kegá tagéra áhreuwe.

<sup>36</sup> Áhreuwará tago kegá kawerato ehweh su ke teríuwre.

<sup>37</sup> Teríuwara moke Kérásá marákórápéqté kégá Sísaga miraúnsabe áhreu puara wensabé itene marakórapeq sue pokúno atówe. Atówana Sísaga sípiipéq kiasague pokinaútaq

<sup>38</sup> owainawamarí kaqauwo anínká wensabé, Are kéranie úwana Sísaga ahqáho atówe.

<sup>39</sup> Ahqáho atena wensabé, Arenawahpeq pokue Manikánka kaweratéh éhwéh moke korerio úwana wega pokue wenawahpeqte ké Sísaga kawerato ehwéh koreriuwe.

*Sísaga awahre iní kaweratena ahrari ogranúq ato ehwehne.*

*(Mátíyu 9.18-26; Mákha 5.21-43)*

<sup>40</sup> Sísaga mó seberaebeq seuwekúwara mitaq míó kega we áwénunu puara wega súnsabe iwíáh íwíáhuwe.

<sup>41</sup> Asiu kené momiwí nahtápéqté wáhnáh ání Sáírusaga Sísaba séna Sísane aigárápí káuqmunue arehunseraráq ména wensabé, Nániyahu pukinainsabé néne nahtapeq segawerato éna pagu pagunúwe.

<sup>42</sup> Mi ahráriwé wene peh morá ánínéna anotah ahrári airápété téhtaré ópéq ména pukinaúwe.

Pukinaúwana Sísaga abowá kérwara áhnte mó kegá kígíue moráráq ahtapeq kuwe.

<sup>43</sup> Ahtapeq kuwana awahre iní airápété téhtaré ópéq wene korahq íre taraqnágia peh tuerueúwe. Sóteh kegá íre kawerarahráhu puana mi awáhre peh kowe.

<sup>44</sup> Wega Sísá anehepeq sure wene korósi ayehrápéq koráhtorotaq wene korahq apubúue taraqnágúwe.

<sup>45</sup> Sísaga, Néne korósi insega táhtorehro úwara ómi míó kega, Írakaumo uwana Pítaga wensabé, Néne Wahnahno, áhnte kegá are pagume se mino úwe.

<sup>46</sup> Úwana Sísaga, Íné tagaríomé mó anínká íné táhtoréhre. Néne págege mó anípá pokirana tagoge úwe.

<sup>47</sup> Úwana kawerato inínká, We aiq tagaríehre éna weba sure iransánéna káuqmunurawéna Sísaga apubúue kawerato ehwéh irarúwara ómi kegá írówe.

<sup>48</sup> Írówana Sísaga wensabé, Arega aiq pútare aintahnaga kaweratóge. Pehwehrue pokéwahno úwe.

<sup>49</sup> Pehwehrue pokéwahno teawutaq wahnah aníné nahtapeqté anínká sure abowánsabé, Areniyahu aiq pukinsabé síwáhnori ání mó íre pagu pagunúno teawuwe.

<sup>50</sup> Teawuwana Sísaga sene ehweh irena wahnah ánínásabé, Íre áhreúno. Peh aiq pútare aintehnana we kaweraginawire éna

<sup>51</sup> wahnah aníné nahtapeq kútaq ómi mó keyábé, Mákheq míáhro aritowe. Peh morá Pítareq Sónireq Sémísireq ahrarine anoiboreq meriqmena nahupeq kibekuwe.

<sup>52</sup> Áhnte kegá mi ahráriyábá ibiséra ibitunátúnánuwaná Sísaga sensabé, Íre ibisahro. We íre airaiq pukia peh súgéhre úwara,

<sup>53</sup> we airaiq pukire íwíáhu puara Sísansabé awiréh atówe.

<sup>54</sup> Awiréh atówana Sísaga wene ayahnkara táhtotawéna wensabé, Ahrario, irigúno atowana

<sup>55</sup> oga úkéna apubúue iriwe míowe. Apubúue iriwe míowana Sísaga wenanoibonsabé, Táhutahuq náwétao aritowara

<sup>56</sup> sega áhtenuyana Sísaga sensabé págegeue teriena, Mahnayabe mó ke teríyeho úwe.

## 9

*Sísaga we kéró ke arambehriraq eqmaq suo ehwehne.*

(Mátíyu 10.5-15; Mákha 6.7-13)

<sup>1</sup> Sísaga we kéró ke airápété téhranítéyábé síahrabéna sega owainawamarí kaqsuera awahre ke kaweraritágeheéna págege aritená mi arámbéhrí miraoro aritowe.

<sup>2</sup> Miraoro aritená sensabé, Manikánka wahnah wahnahnirabeqte éhwéh síwáhnoréq awahre ke kawerarítáho aritowe.

<sup>3</sup> Wega mó mahraréna, Ah nogoneheéq mewe nógó náneq íre meyháro. Pegiqnáh karamé unahmé táhutahuqme mónewe mó siotiwé íre meyháro.

<sup>4</sup> Itega Manikáne ehweh síwáhnoroneheéq mó ke suwahpeq kirataq peh morá áníné nahupeq kaegaeéq arambehri parabaruéhrataqmé mitaq sueq mó ke suwahpeq pokigehe.

<sup>5</sup> Mó kehiná suwahpeqte kégá íre mehwéh aitéhrataq sega íre kaweq sansá miraonsabé ahteborgeheéq sega tagehrataq igárátáq kahna tanáhúq poruarúáho úwe.

<sup>6</sup> Úwara we kéró kega pokue mó kehiná suwahpeq mó kehiná suwahperue síwáhnoroneheéra poké aguwe. Segá moke mi kehíná kékéhíná suwahpeq Manikáne kaweq éhwéh teri terinéra awahre ke kawerarítówe.

*Érótiga Sísa éhweh irena we insebo ue kasenú ehwehne.*

(Mátíyu 14.1-2; Mákha 6.14-16)

<sup>7</sup> Anotah wahnáh ání Érótiga Sísa éhweh irena áhnte iwíáhúwe. Áhnte iwíáhúwara mó kegá Sísansabé, We wání meri merini ání Sónie. Sóni pukéna oga úkéna amahnága míéhre uwara

<sup>8</sup> mó kegá, We Éráísa. Éráísa amahnága ábóragire uwara mó kegá, We Manikáne ehweh irarú anine. We naho pukú ání iriwe organúkuraire uwe.

<sup>9</sup> Uwana Érótiga sene ehweh irena wega mahraréna, Sóni ínéga ayahqno kiraq áwátáu ání aiq pukuraire. Minayabe amahnága sega mó arámbéhrí mó arámbéhríue miraire e anímé insebo éna Sísa taganie íwíáhúwe.

*Sísaga 5 táhúséni (5,000) weh kiraboú ehwehne.*

(Mátíyu 14.13-21; Mákha 6.30-44; Sóni 6.1-13)

<sup>10</sup> Sísa kéró kega weba kouwekéra moke mirau arámbéhrí teawúwe. Teawúwana Sísaga Pétásáíra suwahpeq sebataq míaneheéna se meriqmena pokúwe.

<sup>11</sup> Áhnte mó kegá, Sísa Pétásáíra suwahpeq pokire uwara irera we anehe kaqmera pokuwe. Pokéra weba suwana Sísaga se mehwéh aritená Manikánka wahnah wahnahnirabeqte éhwéh teriena awahre ke kaweraritowe.

<sup>12</sup> Ío tupekinaútaq Sísa kéró kega weba séra wensabé, Mahtaq abatapi púa mah ke kaweqtapéq kogaera táhutahuq meyageheé wahtotaq kehiná suwahpeq eqmaq suo uwe.

<sup>13</sup> Uwana Sísaga sensabé, Itewe mi ke kirabooro úwe. Kirabooro úwara wensabé, Ite peh mobériáh párétíákáq téhtaré páhnikákáq mationa puaq moke mah kegá nehransabé táhutahuq kobaiqmaranéhkono uwe.

<sup>14</sup> Áhnte 5 táhúséni (5,000) weh míónsabe sega mi éhwéh iraruwe.

Sísaga we kéró keyabé, Saime mó ke mópi tútuue míehrara mó ke mópi tútuue míáhro arítáho úwara

<sup>15</sup> sega mirauwara moke míó kega tútuue míówe.

<sup>16</sup> Sísaga mi mobériáh párétíákáq téhtaré páhnikákáq mewena íópeq tagéna Manikánsabe, Kaweróne atena mi tahutáhúq keqme we kéró kega kirabogeheéna náriuwe.

<sup>17</sup> Náriúwara ómiga nowana siyahbankirowe. Siyahbankirowara arahqmé airápété téhtaré páhsíkéti úsawe obenkíq márówe.

*Pítaga Sísansabé, Are Karáhé wóne ú ehwehne.*  
(Mátíyu 16.13-19; Mákha 8.27-29)

<sup>18</sup> Mó tanáhráq Sísaga webataq púrerúwara we kéró kega weba suwana wega sensabé kasenéna, Mó kegá ínénabe inse aintaho úwe.

<sup>19</sup> Úwara, Arensabé mó kegá, Sóni wání meri merini aní míre ewe. Mó kegá arensabé, Éráisa wire ewe. Mó kegá arensabé, Manikáne ehweh naho iraré oga úkurona aní móne ewe uwe.

<sup>20</sup> Uwana Sísaga sensabé, Itega ínénabe inse aintaho úwana Pítaga wensabé, Arewa Manikánka ite meirena kaweraitankeheéna omaq ato aní móne úwe.

*Sísaga, Íné pukéna oga úkinauge ú ehwehne.*  
(Mátíyu 16.20-28; Mákha 8.30-9.1)

<sup>21</sup> Sísaga we kéró keyabé, Ínéwé Manikánka omaq ato aní míre mó ke teríyeho úwe.

<sup>22</sup> Teríyeho éna mó mahraréna, Íné wehukení úku aní níwíoqnaneherawoe. Asiu kené aboawah wehreq Manikáne ehweh mibeq mahbeq arítáh kéréq Mósísine ehweh síwáhnoro kereqka ínénabe, Iuwahriehre éra nubiq suaneherawoe. Nubiq suehrana íné pukéna apahtáró wéhékáhtáq iriwe oga úkinauge úwe.

<sup>23</sup> Sísaga mó ite we kéráhwána keyábé mahraréna, Íné sénireyabe awahbeh aníno, arerene awahbeh iwíáh suo. Manikáne arambehri mira aruqarurunsabé sega íné awankátaq táhparagéhe. Ínéga miraunserah miraue séniro.

<sup>24</sup> Wewensabé arutaboiréna peh wewene awahbeh iwíáh mira aruqaruri anímé oga mérapeq íre awaq miahráhire. Néne sánsá sehginieéna wewe awahbeh iwíáh susuri anímé oga mérapeq awaq miankéhe.

<sup>25</sup> Wehukeníká moke mah marákóipéqté ménsáméhnsá matiéhtáq tahirímé oga mérapeq íre awaq miahnaraqmé mi mensáméhnsánká árahue séhréh atéh iripo?

<sup>26</sup> Ínénabeakáq néne ehwehnsabéakáq ayehiteh aní íné wehukení úku anínká túónagake wensabé moq niyehitanawire. Íopeqté kéréq Nániboreq ínéreqne patahga tahnsa téreh naneqkakáq túónagake mi anínsábé niyehitanawire.

<sup>27</sup> Teiníboq írátíáhro. Táhmaro ite iriwe míona ke pehipi íre pukigehe. Ebeqme Manikánka wahnah wahnahní tagéq anehe pukigehe úwe.

*Sísane auranabiah mó kugú agú ehwehne.*  
(Mátíyu 17.1-13; Mákha 9.2-13)

<sup>28</sup> Sísaga síwáhnorúwana abapete morá wéhékáh parabagúwana wega sáwéhrapeq púrerinieéna Pítareh Sónireh Sémísireh meriqmena kiuwe.

<sup>29</sup> Wega púrerútaq wene auranabiah mó kugú, kaweq kugú agúwana wene korósi téreh naneq tahnsánue anotah tabérábé agúwe.

<sup>30</sup> Anotah tabérábé agúwara Mósísireq Éráísareqka íopeqté tunse áboraragéra Sísareq ehwehnuwe.

<sup>31</sup> Mi anítégá Manikáne téreh naneqtaté awahrirue méra Sísa Sarúsarama su wahpeq pukinaú ewhéh iraruye.

<sup>32</sup> Iraruyara Pítarehga surahpeq méra irigéra Sísane patahga tahnsani naneq tagéra Sísareq míoya aníté tagowe.

<sup>33</sup> Mi anítégá Sísa auwera pokoyeherauyataq Pítaga Sísansabé, Íwáhnoraníno, ite mahtaq míonayabé aiq kawerire. Apahtáró úqná pearanéhe. Arene morá Mósísine morá Éráísane moráue pearanéhe úwe. Pítaga mi ewhéhnsábé íre iwíáhia pehipi irarúwe.

<sup>34</sup> Irarútaq írábúyánka seúbítawéna Sísa kéró anító akariuriowara sega áhreuwe.

- <sup>35</sup> Áhrewana írabúyápipeqté éhwéhnká mahraréna,  
Mah anímé nénahni míre. We omaq atóge. Wene ehweh íráhro úwe.  
<sup>36</sup> Wene ehweh íráhro úwana Sísa webataq míowara tagowe. Sísa kéró anítogá minayabe  
ehiya méra mi tanáhráq se tago naneq mó ke íre teríúwe.

*Sísaga owainawa kaqauwena animai kawerato ehwehne.*  
(Mátíyu 17.14-21; Mákha 9.14-29)

- <sup>37</sup> Ahbiah tahnsá sega sáwéhrapeq suera túwara áhnte kegá Sísareq piehgíúwe.  
<sup>38</sup> Se míorabeqe wéhgá anotah ehwéhnue mahraréna, Íwáhnoraníno, nénahnimé peh  
morá ání míéhre. We tagáhno.  
<sup>39</sup> Owainawanka we subiqmaréhtáq kare aruqarurire. Owainawanka áwíoqneh  
puana iransá iransánéna wene áwéhipeqté arehya kíobi aruqarurire. Wega áhnte subiq-  
maq subiqmaréna íre apubúue soraq áuwéhre.  
<sup>40</sup> Are kéráh kékabé, Kaqauwáhro éna pagu pagunugarawé sega íre miraorahowe úwe.  
<sup>41</sup> Íre miraorahowe úwana Sísaga míó keyabé, Ite íre aiq pútare ainteq saiyo ke wóe.  
Iteba mía míaume ahkake awehraq kanabo? Itega miraonsabé nirupipeq umehime  
ahkake parabaginabo éna abowansabé, Arenahni ínéba meqme súno úwe.  
<sup>42</sup> Úwana abowágá wenahni meqme sútaq owainawanka we subiqmarena kúrugúru  
atowana Sísaga owainawansabé, Auwe pokúno atena mi aní kaweratena wenaboba  
atowe.  
<sup>43</sup> Manikánka Sísa págegeue séhréh atowara tago kegá minayabe áhtenuwe.

*Sísaga, Íné pukéna oga úkinauge móñkakáq irarú ehwehne.*  
(Mátíyu 17.22-23; Mákha 9.30-32)

- Sísaga moke miraú naneqsabé tago kegá áhtenutaq wega we kéró keyabé,  
<sup>44</sup> Ínéga teiéna ehwéh iwíáhue tagahro. Íné wehukení úku aní móintagéhe úwara  
<sup>45</sup> sega mi ehwéh íre ahtebowe. Mi tanáhráq mi ehwéh áwahewé sirupipeq íre iwíáhuwe.  
Minayabe se íre ahtebéra kasenéyabe áhreuwe.

*Anotah anímé insebo i ehwéhne.*  
(Mátíyu 18.1-5; Mákha 9.33-37)

- <sup>46</sup> Sísa kéró kega mó anínká mó anínkáue, Íné anotah aní ite kiotaiqme aní múge iraréa  
ehwehuwe.  
<sup>47</sup> Sísawe sene sirupipeqté íwíáh tagéna káriq aní meqmena we míorabeq iriwe atena  
<sup>48</sup> sensabé, Ínénsabe arutaboiraintena mahna tahnsa káriq ání séhréh atéh ánínká íné  
moq séhréh aintéhre. Íné séhréh aintéh ánínká íné eqmaq núwéh ánínseq séhréh atéhre.  
Íné pehgáriq aní múge íwíáhi anínká anotah aní ména mó ke kiotaikire úwe.

*Íre itene naruo aní míéh ánímé itene iyahnabo aní míre ú ehwehne.*  
(Mákha 9.38-40)

- <sup>49</sup> Sóniga Sísansabé, Íwáhnoraníno, mó anínká arenáwírue owainawamarí kaqsúéhraq  
tagéq ahqáho atone. Wega ite íre séiréhnsabé ahqáho atone úwe.  
<sup>50</sup> Úwana Sísaga wensabé, Íre ahqáho atáhro. Íre itene naruo aní míéh ánímé itene  
iyahnabo aní míre úwe.

*Sámária kegá Sísansabé ahqáho ató ehwehne.*

- <sup>51</sup> Manikánka Sísa íópeq tumeranaína tanáhráq wahtonúnsabe Sísaga, Sarúsarama  
suwahpeq pokinauge íwíáhúwe.  
<sup>52</sup> Segá káénarabeq kaweraitageheéna Sísaga wehuke Sámária suwahpeq eqmaq  
suowara sega kaweraritaneheéra mibeq pokuwe.  
<sup>53</sup> Mibeqté kégá, Sísa Sarúsarama suwahpeq pokinawire u író púara wensabé íre  
mehweh atówe.

<sup>54</sup> Íre mehwéh atówara Sémísireq Sónireqka minayabe irera Sísansabé, Itene Wahnahno, íopeqté sokaeqsuahnaga mah ke tabipáhrue anehinsagigeheéq tabipáhraruo irareyehnkoyo uye.

<sup>55</sup> Uyana Sísaga ebeq kéné pabeqme se tagéna, Ahqáho. Íre kaweq ehwéhnóye úwe.

<sup>56</sup> Segá mitaq suera mó kehíná suwahpeq pokuwe.

*Sísaga we kéreyabe irarú ehwéhne.*

(Mátyu 8.19-22)

<sup>57</sup> Segá ahtapeq pokue mó anínká Sísansabé, Are pokónarabeq kéranié úwana

<sup>58</sup> Sísaga wensabé, Úrinsi iáné nahme ebahnarahpipeq kékre. Kabarane nahme sehwerapeq kékre. Íné wehukení úku anímé néne nahme íre kékre úwe.

<sup>59</sup> Sísaga mó anínsabé, Séniro úwana, Ebeqme nánibo pukinana komaisarena anehe kéranié úwe.

<sup>60</sup> Úwana Sísaga wensabé, Pusa kégá pukira ke maisaragéhboq arewe Manikánka wahnah wahnahnirabeqte éhwéh kosíwáhnorúno úwe.\*

<sup>61</sup> Mó anínká Sísansabé, Anotah aníno, íné are kéranié éna téhwe nánuwahrahyabé iroro koaritaníkono úwana

<sup>62</sup> Sísaga wensabé, Soberi anínká anehepeq pabeqme taga tagaínaraqmé Manikánka wahnah wahnahnirabeqte árámbéhri íre miraorahire úwe.

## 10

*Sísaga 72 wehekéq eqmaranaútaq teriu ehwéhne.*

<sup>1</sup> Mó tanáhráq Sísaga 72 wehekéq omaq sitena téhraníté téhranítéue moke mó kehiná suwahpeqkakáq sene marakóakaq we mótaq pokinaúrabeq eqmaq suowe.

<sup>2</sup> Eqmaq suanaútaq wega pabeqme ehwéh mahraréna, Sotápéqté ménsáméhnsá moke nera kékhrara íre áhnte kegá koawaqmianeheéra pokowe. Minayabe sotápéqté wáhnáhnsabé, Arene nera kék ménsáméhnsá arambehri kegá koawaqmiageheéq eqmaq sueq púreroro.

<sup>3</sup> Sipisípiq áráhqmarinká úrinsi iámárínká nogórabeq nogónserah ite subiq suahráho ke míáhrabeq eqmaq suaníe.

<sup>4</sup> Móne unáhmé unahnúramé súwe íre meyáhro. Ahtapeq mó ke piehgírataq íre mehwéh arítáhro.

<sup>5</sup> Nahupeq kibekirataq mibeqté kékabé pehwehrue míáhro arito.

<sup>6</sup> Uwaresa ání nahupeq míéhnaraq itene ehweh irankéhe. Uwaresa ání íre míéhrataq itene kaweq ehwéhká iteba kowekinkehe.

<sup>7</sup> Manikáne arambehri mirao puaq itega kibekira nahtápéq kaeareq sega náira tahutáhúq pehipi nahro. Peh morá mi nahupéq kaegaeoro. Séhréh arítéh kégá arambehri ání avehraq apéq náwigéhe. Minayabe ite íre matiéhra naneq náigéhe úwe.

<sup>8</sup> Náigéhe éna, Itega mó ke suwahpeq kirara mehwéh aitera náira tahutáhúq pehipi nahro.

<sup>9</sup> Mitaqté áwáhré kék kawerariteq sensabé, Manikánka wahnah wahnahnirabeq iteba wahtotaragire.

<sup>10</sup> Mó ke suwahpeq kirara sega íre mehwéh aitéhrataq mibeqté wahba áhtápéqmé iriwe méq mahraréq,

<sup>11</sup> Itewe ahtebageheéq mahtaqté tánáhúq, igárátáq kék tánáhúq poruaruanehe oro. Manikánka wahnah wahnahnirabeq iteba wahtotarire. Minayabe iahreraq matíáhro teríero.

\* <sup>9:60:</sup> Sísaga pusa kékabé irarúmá áwahewé sene sirupipeqté síwá pusa kék tahnsa míáh kékabé irarúwe.

<sup>12</sup> Teiníboq írátíáhro. Manikánka ehweh aritahna tanáhráq Sóróma suwahpeqte áhbábáq kékéhtaq kamah arinkéhe. Itega tanahuq poruarueq mi ehwéh terié kékéh anotahtaq kamah arinkéhe úwe.

*Sísaga, Kamah ainehboq kawerurero ú ehwehne.*

(Mátíyu 11.20-24)

<sup>13</sup> Sísaga mó mahraréna, Kórásíni suwahpeqte kéreq Pétásáira suwahpeqte kérero, kamah ainehboq kawerurero. Iteruwahpeq áhnte otáq sánsá mirauraige. Táiyá suwahpeqte kéreq Sáíróna suwahpeqte kéreqka mina tagotaq tahirímé sene ahbabáq naho suera kaweqtaq mío irino. Segá mina tagotaq tahirímé sene ahbabáq aiq súónsabe Manikánka tagankeheéra nahonáh kórósí aneranerue tanah abaq marera sene ahbabáqsabe tútuue ibiso irino.

<sup>14</sup> Minayabe Manikánka ehweh aitahna tanáhráq mi keyábé peh ákáhtaq kamáh arinkéhe. Mi tanáhráq ite Kórásíni suwahpeqte kéreq Pétásáira suwahpeqte kéréqme anotahtaq kamah ainawire.

<sup>15</sup> Kápénéáma suwahpeqte kéo, ite kaweq ke míone éq minayabe íopeqté mátábúrapéq kioneheqmúne íwíáhoo? Írakaumo. Mibeq íre kioneheqmóe. Peh iraipéq kowíáhro aitanawire úwe.

<sup>16</sup> Sísaga eqmaq suanaú keyabé mó mahraréna, Itene ehweh íráh kékéh néne ehweh moq íráhwe. Itensabé ahqáho aitáh kékéh ínénabe moq ahqáho aintáhwe. Ínénabe ahqáho aintáh kékéh íné eqmaq núwéh ánínsabé moq ahqáho atáhwe úwe.

*Sísaga eqmaq suo kega kouweku ehwéhne.*

<sup>17</sup> Sísaga omaq sitena eqmaq suo kega sirupipeq eyoyóue weba kouwekéra wensabé, Itene Wahnahno, arenawírue owainawamarínsabé pokurero aritonara apubúue poku pokuowe uwe.

<sup>18</sup> Uwana Sísaga sensabé, Sokaeqsúéhnká téhrehnserahnue owainawamaríné wahnah wenawíq Séténi íopeqté tunse inahsubuwana tagahwae.

<sup>19</sup> Írátíáhro. Ínéga págege aító púaq itega wehenkakáq tobinahránkakaq abasawe itene naruo aní owainawa kiotaikigehe. Mó naneqka ite íre ahbabáraitahráhire.

<sup>20</sup> Itega owainawamarínsabé miraoro e ehwéh íráhnsabé íre iwíáh íwíáhoro. Peh íopeq Manikánka iteíwíq wene púkuipéq aiq sehiranurainsabé iwíáh íwíáhoro úwe.

*Sísaga iwíáh íwíáhéra Maniká Iteribonsabé kaweróne ato ehwéhne.*

(Mátíyu 11.25-27, 13.16-17)

<sup>21</sup> Mi tanáhráq Manikáne Awanka Sísane arupipeq eyoyó atowana mahraréna, Nániboo, arega íopekákáq mah marákó mårákóákáq wahnhánóne. Wehukene sánsá ahtebah kewé arene sánsá íre sokigi ariasa peh morá káriq aní tahnsa kékéh arene sánsá aiq sokigi ariene. Minayabe arensabé iwíáh íwíáh atóge. Nániboo, arerega iwíáhue aiq miraóne.

<sup>22</sup> Aiq miraóne éna mitaq míáh keyabé, Nániboga moke aiq náníre. Mó kegá íné Manikáne ahninkáwá íre tábuosoqme tagariáhwana Nániboga webataq íné wenahni tagariéhre. Mó kegá Nánibo íre tagariáhwana ínélataq wenahninká we tagarióge. Íné wenahninká we sokigi aiéna kegá moq Maniká Nánibo tagariagehe úwe.

<sup>23</sup> Sísaga pabeqme we kéró keyabé epéq teriena, Itene iuranka áhntetaq tagahnsabe iwíáh íwíáhoro.

<sup>24</sup> Teiníboq írátíáhro. Áhnte Manikáne ehweh iraru kereq anotah wahnáh kéréqka itega tagah naneq tagéyabe suwahbówara íre tagowe. Segá itega íráh éhwéhnsabé ireyabe suwahbówara íre írówe úwe.

*Sísaga, Wáhnaupéqté kékéh moq irutaboiroro ú ehwehne.*

<sup>25</sup> Mósísine ehweh síwáhnori anínká séna Sísaga ahbabáq ehweh irarinkeheéna áhwárawe tagéna kasenúwe. Kasenéna, Íwáhnoraníno, oga mérapeq awaq mianíboq aner-ininkono úwana

<sup>26</sup> Sísaga wensabé, Mósísiga sehgíoro ú ehwehnká anereiro? Minawé arene arupipeq aiq ahtebahno úwana

<sup>27</sup> mi anínká mahraréna, Maniká itene Wahnahnsabé anotahtaq arutaboirúno. Moke arene arupipeqkákáq moke arenawankakáq moke arene iwiáhónaipéqkákáq Manikánsabe arutaboirúno. Arerensabé arutaboirónanserah arene iyahnabo anínsábé moq arutaboirúno ire úwana

<sup>28</sup> Sísaga wensabé, Arega aiq tábúsoqme iraréne. Tenienanserah mirainaraqmé oga mía míainiewóne úwe.

<sup>29</sup> Mi anínká iwiáhénéna, Sísaga íné Mósísine ehweh íre kawerue íréhre iwiáhineho éna wega Sísansabé, Néne iyahnabo aní insebo kasenúwe.

<sup>30</sup> Kasenúwana Sísaga wensabé, Wehga Sarúsarama su wahpeq suena Séríko su wahpeqte áhtápéq tutairara aebó kégá mehwatawéra táhtoqme subiqmarera wene ménsámehnsá moke sabiwera pokurowe. Anotahtaq subiqmato puana pukinauraitaq we íre ngoráhénéna peh ahnayehráq tahperuriaraire.

<sup>31</sup> Tahperuriarairana Manikáne ehweh mibeq mahbeq arítéh anínká tunse mi aní tagéna ébeq ayéhrápéqtáq sótaikue pokuraire.

<sup>32</sup> Mina urainserah Asiu kené sánsá mirai aní we Áriwái kahnáh anínká kire mi aní tagéna we moq ébeq ayéhrápéqtáq sótaikue pokuraire.

<sup>33</sup> Sámária su wahpeqte anínká kire Asiu weh tagéna we ahnayehráq tahperuriarains-abé arutaboiréna

<sup>34</sup> weba sure mayawenkakaq náhníáq sera anonkakaqtáté puramburanútaq abaq atena airí atena mi weh pankeqmaqme wene tónkine abobiahtaq tútu atowana mi kanká áhkokóuwena pokuraire. Sámária su wahpeqte anínká mi weh meqmena páhsíntía nahtápéq móatena mitaq wahnahnuraire.

<sup>35</sup> Ahbiahraq mi nahtápéqté wáhnáh téhtaré móne náwena wensabé, Subiqmato aní kawerue wahnahnatawéwahno éna, Íné kouwekonaraq áwú móne íre awehraq kahnaraq mó awiné uraire úwe.

<sup>36</sup> Sísaga mi ehwéh aiq teawena Mósísine ehweh síwáhnori anínsábé, Apahránítogá ahnayehráq subiqmato aní tagaronsabé wene iyahnabo aní insebo kasenúwe.

<sup>37</sup> Kasenúwana mi anínká Sísansabé, Wene iyahnabo anímé wensabé arutaboiratena séhréh atéh ánine úwana Sísaga wensabé, Arega pokue séhréh atárái anínká miraurai serahnúno úwe.

### *Sísaga Máhtareq Máhríareqne nahtapeq mío ehwéhne.*

<sup>38</sup> Sísareq we kéró kereqka pokue mó ke su wahpeq kuwana mibeqté íní wenáwíq Máhtaga Sísá mehwéh atena wene nahtapeq meqmena móatowe.

<sup>39</sup> Máhtane ónánahwá wenáwíq Máhríae. Máhríaga Sísane ehweh iranieéna wene aigarápi tútuue míowe.

<sup>40</sup> Tútuue míowana Máhtaga táchutahuq kawerinieéna áhnte ahwímínú púana wene arupipeq iwiáh kikirúwe. Iwiáh kikiréna Sísaba séna wensabé, Néne Wahnahno, nénónánahga núwéhrana áhnte ahwímínunsabé arega anetaníbo iwiáhono? Íné séhréh ato teawo úwe.

<sup>41</sup> Teawo úwana Sísaga wensabé, Máhtao, arega áhnte ahwímínónayabé arene arupipeq iwiáh kikiróne.

<sup>42</sup> Peh morá náneqsabé iwiáhúno. Máhríaga mina kiotaiki naneqsabé arutaboiréna aiq omaq maréhraq itega we íre saiqnariayehe úwe.

## 11

*Púrerirataq mahrarero ú ehwehne.*

(Mátíyu 6.9-15, 7.7-11)

<sup>1</sup> Mó tanáhráq Sísaga móbeq ména púreréna parabagúwana we kéro anínká wensabé, Itene Wahnahno, Sóniga we kéráh kékabé púreq ehwéh síwáhnorurainserah íwáhnorúno úwe,

<sup>2</sup> Úwana Sísaga sensabé, Púrerirataq mahrarero.

Iteriboo, arenawíq pankerone.

Arega mah kehiná kékíná wahnah wahnah aritahna tanáhráq apubúue ábóraragúno ato.

<sup>3</sup> Mó wehekáh mó wehekáhnue itene táchutahuq awehraq kirabo aito.

<sup>4</sup> Mó kegá ahbabáraitáhmé itega minayabe íre ahreraq masa peh suone. Itega mi-raúnanserah itene ahbabáq moq íre ahreraq matiahno.

Ahbabáqka ite saiqnariahrahirabeq íre móito.

Miraue púreroro úwe.

<sup>5</sup> Sísaga we kéró keyabé mó mahraréna, Mó kehiná suwahpeqte arene iyahnabo anínká inokáhnabubu sínah are tópah tabonahinaraqmé anerinibo? Mi tanáhráq arenawahrah aníné nahtapeq pokue áhrabé, Irigue tópah nánio ue ineh inehinkehe. Ineh inehéé,

<sup>6</sup> Néne iyahnabo anínká amahnága íre wahtopeqte sirana tópah tabonahunsabé iriwe tópah náninana kiraboono teawinkéhe.

<sup>7</sup> Teawinana arenawahrah anínká wene máhriqpeqté iraréna, Ahqáho. Onsa aiq paiqmarena néne animárínseq sugonayabé túbáh agúno éna, Íre iriwe aweráhuge teawinkéhe.

<sup>8</sup> Teawena, Inehi anímé nánuwahrah aní míéhsábé anetaníbo. Inokáhpeq puana íre náwiníe íwíáhínaraqmé túbáh agineho. Túbáh aginehboq peh píribahriue, Nánio. Nánio úno. Nánio inaraqmé arenawahrah anínká mó iwiáhéna are íre kék náneqmarí irigue náwinkéhe. Mina inserah púrerirataqmé apubúue túbáh agiyehboq peh mótaq mótarue teawéro.

<sup>9</sup> Teiníboq írátiáhro. Itega púrerirataqmé náiyo ira naneq náinkéhe. Págegeue kabarirataq ábórarínaq taganeheqmóe. Onsaraq pakobakoirataq siitankéhe.

<sup>10</sup> Nánio i anínká meyankéhe. Kabari anínká ábóraq marankéhe. Onsaraq pakobakoi anímé Manikánka siatahnana nahupeq kibekinkehe úwe.

<sup>11</sup> Sísaga mó mahraréna, Arenahninká arensabé, Paseh nánio ínaraqmé arega wehe náwiníbo? Írakaumo.

<sup>12</sup> Wega, Iyah oyérá nánio ínaraqmé tobinahrá náwiníbo? Írakaumo.

<sup>13</sup> Ite sibowáréh ahbabároraho keéqmé itene animári peh kaweq naneq nári nárimino. Íopeqté Ítéribogá íre ahbabárorahi aní ména Wenawa eqmaranae. Minayabe wensabé, Arenawa ínéba eqmaro irarinaraq areba eqmaranawire úwe.

*Owainawanka Sísa séhréh atéhre éra péhe éhwéh iraru ehwéhne.*

(Mátíyu 12.22-30; Mákha 3.20-27)

<sup>14</sup> Owainawanka wehukení subiqmaq subiqmarú púana we ahriahri íre ehwehnorahúwe. Íre ehwehnorahúwana Sísaga mi owáínawánsábé pokúno atowana pokúwana mi anínká ehwehnúwara áhnte tago kegá áhtenuwe.

<sup>15</sup> Áhtenuwara mó kegá mahraréra, Owainawamaríné wahnah wenawíq Pésébúríga Sísa págege atena séhréh atéh púana wega owainawamarí kaqsuáhráhire éra seye náhenéra ehmuniq éhmúníruwe.

<sup>16</sup> Ehmuniq éhmúníruwara mó kegá Sísaga ahbabárinkeheéra áhwárawe tagéra sega wensabé, Manikánka séhréh atahnaraqmé íopeqté íre tagariona naneq sokigi aio uwe.

<sup>17</sup> Uwana Sísaga sirupipeqté íwíáh tagéna sensabé, Wahba márakórápéqté kégá seye ebehirataq sainkoneherawoe. Minayabe se sainkéra págegeue morá ké íre míahrahowe.

Sensuwahrahreq seye ebehirataq sainkoneherawoe. Minayabe se moq págegeue morá ké íre míahrahowe.

<sup>18</sup> Owainawanseq wenawahrahreq ebehotaq tahirímé se sainkéra árahue págegeue míagehbo? Írakaumo. Íre págegeue míahrahowe. Itega péhe éhwéh mahraréq, Owainawa-maríné wahnahnka íné séhréh aintéh púana owainawamarí kaqsuahráhuge ewe.

<sup>19</sup> Ínéga owainawa kaqsúótáq owainawane wahnahnka séhréh aintéhtáq tahirímé ite kéiráh kégá owainawa kaqsúáhtáq insega séhréh arítéh iripo? Ite kéiráh kégá itene ehwehnsabé íre tábusoréhre aitáhwe.

<sup>20</sup> Manikáne Awanka págege aintena séhréh aintéh púana owainawamarí kaqsuq kaqsuruge. Mina tagéq Manikánka wahnah wahnahni sansá iteba aiq sire éq tagariáhwe úwe.

### *Ayahnsa kira wéhyábé pabeqme éhwéhne.*

<sup>21</sup> Sísaga mó mahraréna, Ayahnsa kira wehgá wene pokankakaq iqqakakaq sokah sokah atawéna wene nahtapeq wahnahníaraq wene ménsámehnsá peh kaweqlaq kanae.

<sup>22</sup> Mó ayahnsa kira wehgá weba séna wahnahni weh subiqme kaqsuena wene ebeh naneqmarí mewena wene ménsámehnsá saraqme meyankéhe úwe.

<sup>23</sup> Sísaga mó mahraréna, Wehukenínká íre néne iyahnabo aní míéhmé néne naruo aní míre. Wehukenínká ínéreq íre soruparítéhrataqmé wega wehuke karegaráh aruqarurire úwe.

### *Owainawanka kouwekinsabé éhwéhne.*

(Mátíyu 12.43-45)

<sup>24</sup> Sísaga mó mahraréna, Owainawanka wehukení auwena pokitaq wání íre kékhrabeq nogena ahrenahrahirabeq kabarire. Kabarirana írakauninsabé iwíáhéná, Ínéga súo náhtápéq seuwekinauge éna

<sup>25</sup> áuwátái wehukénipá kouwekire. Kouwekéna wene nah tagehrana aiq kabantáhwe parabaruena aiq kaweraréhre.

<sup>26</sup> Kawerarena mó abapete téhraníté áhnte ahhbábáq ówáinawámári koweriréhre. Moke mi ówáinawámári mi anípá kowíáhwe. Téhwe morá ówáinawánká mi anípá míéhtáq íre kawerire. Anehémé áhnte ówáinawámárinká weba míáhnsabé anotahtaq íre kawerire úwe.

### *Manikánka wene ehweh sehgó kékabé kawerowe arítéhre ú ehwehne.*

<sup>27</sup> Sísaga mahrarútaq wene ehweh iro inínká anotahtaq mahraréna, Arenanoga are maqmarena náh náwunsabe Manikánka wensabé kaweróne atéhre úwana

<sup>28</sup> Sísaga wensabé, Nánoga maqintonsabe Manikánka kaweróne atena peh wene ehweh irera sehgó kékabé anotahtaq kawerowe arítéhre úwe.

### *Síansabé, Ótaq sansánúno u éhwéhne.*

(Mátíyu 12.38-42; Mákha 8.12)

<sup>29</sup> Áhnte wehukégá Sísaba sáhuriówana weba sensabé, Ite amahnága oga míáh kéké áhnte ahhbábáq kée. Itega iraréq, Manikánka are aiq pútaq séhréh atéhre tagarianeheéq ótaq sansánúno teni teninowe. Sónaga sóreq wanípípéq tupekútaq Manikánka ótaq sansá miraúwe. Peh morá mi sansá teienaq iwíáhue tagagehe. Ínéga ótaq sansá mó íre sokigi ainíe.

<sup>30</sup> Níníbe suwahpeqte kégá Sóna tagéra Manikánka miraú otáq sánsá tagowe. Amahnága oga míáh kégá íné wehukení úku aní tagéra Manikánka miraína ótaq sánsá tagagehe.

<sup>31</sup> Sórómóniga Ísara keráq wahnahnútaq wáhnaupéqté kéné wahnah inínká wene ahtebia éhwéh iranieéna íre wahtopeqte weba súwe. Teiníboq írátiáhro. Amahnága iteba míó ánímé Sórómóni kiotaiku aní múge. Mi inínká Sórómónine ahtebia éhwéh ironserahme

árahinsabé néne ehweh íre iraho? Minayabe Manikánka ehweh aitahna tanáhráq mi inínká iriwe ména itensabé ehweh aitankéhe.

<sup>32</sup> Nínibe suwahpeqte kégá ahbabáruwana Sónaga ehweh koreriutaq wene ehweh irera sene ahbabáq sansa suera kaweqtaq míowe. Minayabe Manikánka ehweh aitahna tanáhráq Nínibe suwahpeqte kégá iriwe méra ite amahnága oga míah kékéyábé, Íre kawerowe éra ehweh aitagéhe. Amahnága iteba míó ánime Sóna kiotaiku aní múge. Nínibe suwahpeqte kégá Sónane ehweh írónserahme árahinsabé néne ehweh íre iraho?

*Itene iurame itene inonkane áráhmu tahnsane i ehwéhne.  
(Mátíyu 5.15, 6.22-23)*

<sup>33</sup> Sísaga mó mahraréna, Wehukeníká áráhmu keqmaréhtáq kopípéq tahbe tehnopeq íre máröhre. Páhkétiraté íre akariaréhre. Írakaumo. Nahupeq kibeko kegá kawerue tagageheéna áráhmu tahberapeq máröhre.

<sup>34</sup> Arene aurame arene anonkataq kékéh áráhmú tahnsáne. Arene auranka kaweq naneq tagehnaraq arene arupipeq téhranae. Arene auranka ahbabárorahi naneq tagehnaraq arene arupipeq sunkíkírinae.

<sup>35</sup> Arene arupipeqté térehme sunkíkínehboq áwéh panantágínaq tagaríahro.

<sup>36</sup> Itene iwíáhopipéq íre sunkíkíria peh moke téhráhnaraq áráhmuga moke nahupeq térehnserah itene iwíáhopipéqté térehnka itene inonka moke téhranae úwe.

*Péhrasi kegá ahbabárünsabé Sísaga ehweh arito ehwéhne.  
(Mátíyu 23.1-36; Mákha 12.38-40; Árúka 20.45-47)*

<sup>37</sup> Sísane ehweh parabagúwana Péhrasi anínká wensabé, Néne nahtapeq táhutahuroyehboq máho úwana Sísaga we kérena táhutahuq nanaúwe.

<sup>38</sup> Sísaga wene ayahnkara íre pabeq paberia pehipi nónsabe mi anínká áhnenúwe.

<sup>39</sup> Áhnenúwana Sísaga wensabé, Itega káhpuakáq páréyahakáq pabeq paberotaq peh ábórapeq pabeq paberéq arupipeq íre pabeq paberowana peh náwíqkakaq mitaq kékéhre. Mina onserah itene inonka pabeq paberowana itene irupipeqmé aebó íwíáhwé áhnte ahbabáq íwíáhwé mitaq kékéhre.

<sup>40</sup> Ite mígúwahgu saiyo animári móe. Manikánka íre peh morá ábóraq kékéh náneq miraia kopípéqté náneqmarínkákáq miraro mino.

<sup>41</sup> Ite matiáh náneq mó ke wehwehue nárieq séhréh arítáhro. Mirairataqmé moke matiáh náneq peh kaweqtaq kanae úwe.

<sup>42</sup> Sísaga mó mahraréna, Péhrasi keo, moke itene sotápéqté ménsáméhnsá saraqme abapete itaréitaré matawéq peh morá mewe Manikáne arambehri mirao ke síewe. Kawerowe. Pehgáriq naneqmarí táwiomé kímé náwahbiame moq saraqme síewe. Kawerowe. Mi sansá sehgieq íre súáhro. Peh kaweqtaq mé sansamé Manikánsabe irutaboirome mi sansátáré íre sehgiówe. Íre kawerowe. Mi sansánkákáq sehgióro. Íre miraonsabé Manikánka kamah ainehboq tábúsoqme sansánoro úwe.

<sup>43</sup> Sísaga mó mahraréna, Péhrasi keo, ite Asiu kené momiwí nahtápéq kaweqtapéq méyabe iuwahbeh ke wóe. Ite máhkétirapéq nogótáq mó kegá ite mehweh aiteyabe iuwahbeh ke wóe. Minayabe Manikánka kamah ainehboq tábúsoqme sansánoro.

<sup>44</sup> Pusa kékéh másia máiq kékéhabeq mó kegá íre tagia mitaq pehipi nogówe. Mina inserah itene iwíáhipeq kambaresa náneq tahnsá kékéhrara mó kegá íre tagahwe. Minayabe itewe pusa kékéh másia máiq tahnsa móe. Manikánka kamah ainehboq tábúsoqme sansánoro úwe.

*Mósísine ehweh síwáhnoru kegá ahbabárünsabé Sísaga ehweh arito ehwéhne.*

<sup>45</sup> Mósísiga sehgióro ú ehweh síwáhnorú anínká Sísansabé, Arega irarénawe itensabé moq ehweh aitahne úwe.

<sup>46</sup> Úwana Sísaga mahraréna, Mósísine ehweh síwáhnoro keo, Manikánka ite moq kamah ainehboq tábúsoqme sansánoro. Mósísine ehweh áhnte pagége éhwéh púaq itega

síwáhnorowara íráh kégá íre sehgoráhowe. Sega íre sehgoráhonsabé itega mi ke pehgáritaq íre séhréh arítáhwe.

<sup>47</sup> Itene igaqnaréhga Manikáne ehweh iraru ke subiq súowe. Subiq suera maisarówaq ite maisarórabeq itega ebah pentabaráhwe.

<sup>48</sup> Itega miraome aneq sansánoo? Itene igaqnaréhga kaweq ke subiq súónsabe itega sene ahbabáqsabe, Kaweq sansáne éq anehe mi kawéq ké maisarórabeq ebah pentabaráhwe.

<sup>49</sup> Minayabe Manikánka tábúsoqme iwíahéna mahraréna, Néne ehweh irare kereq síwáhnoro kereq seba eqmaq suanauge. Eqmaq suahnara sega táhmaro síwioqnéra mó táhmaro subiq suaneherawoe úwe.

<sup>50</sup> Sísaga mó mahraréna, Sega Manikáne ehweh iraru ke subiq súowe. Manikánka mah marákó márakó mirarotaq téh subiq súotaqte mi ahbabáq amahnága oga míah kéné ahbabáq úkire. Minayabe Manikánka kamah ainawire.

<sup>51</sup> Segá wehukení wenáwíq Ábéri ebeq subiq súowe. Anehemé wehukení wenáwíq Sékáráia Manikánsabe iwíah íwíah atáh náhtápéq míowara subiq súowe. Mi anitéreq moke ákáhpi subiq súó kereqne korahq tunsabe Manikánka amahnága oga míah ké kamah ainawire.

<sup>52</sup> Mósísine ehweh síwáhnoro keo, itega ahtebah onsárápété kí kopéq súáhwe. Itewe mibeq íre kibekia mibeq kibekonehe e keyábé ahqáho arítáhwe. Minayabe Manikánka kamah ainehboq tábúsoqme sansánoro úwe.

<sup>53</sup> Sísaga mitaq suena máhpeq tuegúwara Mósísine ehweh síwáhnoro kereq Péhrasi kereqka wensabé abiahnsa atera áhnte ehwéh kasenuwe.

<sup>54</sup> Sísaga ahbabáq ehweh irarinkeheéra sega mó ehwéh mó ehwéhnue kasenéra áhwárawe tagowe.

## 12

*Péhrasi kegá kopéráhpéro sansá pehragahro ú ehwehne.*

(Mátíyu 10.26-27)

<sup>1</sup> Peh íregáritaq kegá sáhurió púara mó kené sigará músuríowana Sísaga ebeq we kéró keyabé síwáhnoréna, Péhrasi kegá kopéráhpéro sansá pehragahro.

<sup>2</sup> Amahnága moke kopípéq kék náneq mókake ábóraraginae. Moke epéqté éhwéh ábóraraginae.

<sup>3</sup> Itega sunkikírirabeq iraruro ehwéh mó kegá téhrehrabeq iragéhe. Itega nahupeq ehmuniq éhmúnírue irarira ehwéhmé mó kegá irera nahnsorapéqté sawai sawaiue irarigehe úwe.

*Peh Manikánsabe áhreoro ú ehwehne.*

(Mátíyu 10.28-31)

<sup>4</sup> Sísaga mó mahraréna, Néne iyahnabo anímáriño, teiníboq írátíáhro. Peh itene inonka subiq suahráho keyábé íre áhreoro. Mi kegá iteyuwa íre subiq suahráhowe. Írakaumo. Minayabe sensabé íre áhreoro.

<sup>5</sup> Teiníboq írátíáhro. Peh morá Manikánsabe áhreoro. Wega ebeq itene inonka subiq marena anehe iteyuwa iraipéq suahráhi puaq wensabé anotahtaq áhreoro.

<sup>6</sup> Káriq kabárá máhkétirapéq téhtaré pabusa monéráté moberíah kábárá paiq-marahráhire. Mina tahnsa káriq kábárá Maniká Iteriboga íre abitaruéhre.

<sup>7</sup> Maniká Iteriboga moke itene iyahqnopeqte íyáhrámé sáhnsahwe tagariéhre. Wega ite aiq moke tagariéh púaq íre áhreoro. Itega kabaramarí kiotaiko puana Manikánka ite íre abitaruéhre úwe.

*Íné Sísane ani muge iraréyabe ayehitéhneho i ehwéhne.*

(Mátíyu 10.32-33, 12.32, 10.19-20)

**8** Sísaga mó mahraréna, Teiníboq írátíáhro. Wehukenínká mó keyábé, Sísane ani múde terinaraq mókake íné wehukení úku anínká íópeqté ké míéhrataq Maniká Iteribonsabé, Néne ani míre teawiníe.

**9** Arega mó ke míáhtáq ínénabe, Ahqáho. Íné íre tagarióge aintéhnaraq mókake Maniká Iteribo míéhrabeq ínéga arensabé ahqáho atena are íre tagarióge atanauge úwe.

**10** Sísaga mó mahraréna, Íné wehukení úku anínsábé níéhruru aintéh ánímé Manikánka insahwé atena íre ahreraq matianawire. Peh morá Manikáne Awansabé éhrurui anímé Manikánka íre insahwé atanawire. Ahqáho. Peh ahreraq matiankehe úwe.

**11** Sísaga mó mahraréna, Mó kegá ite táhtoqme ehweh aitanehera irataq itene irupipeq iwíáh kikiriyeho. Segá ite meiqmera Asiu kené momiwí nahtápéqté wáhnáhpápópoq wahba wáhnáhpápópoq mó anotah anípápópo móítéhrataq itega, Aneq ewhéhnonehnkono éq áhreiyeho.

**12** Mi tanáhráq Manikáne Awanka irarína ewhéh sokigi ainkéhe úwe.

*Ménsámehsánsabe arutaboiri anínká múguwahgu sansá miraurai ewhéhne.*

**13** Peh íregáritaq kegá sáhuriwana mitaqté áninká Sísansabé, Íwáhnoraníno, nániboga pukurairana wene ménsámehsá nánuwahga moke meraire. Mi mensáméhnsá ákáhtaq náninkéhboq nánuwahnsabé ákáhnsaime náwo teawo úwana

**14** Sísaga wensabé, Íné ménsámehsá saraqme nári nárinkeheéna insega omaq intaráiro?

**15** Insega omaq intaráiro éna mitaq míó keyabé mahraréna, Ménsámehsánsabe igárá pabekínehboq kawerurero. Íre sene áhnte kéh ménsáméhnsánsabé wehuke ogá míáhrahowe úwe.

**16** Sísaga mah pabéqmé éhwéh mahraréna, Anotah wehné so áhnte mensáméhnsá iráirana

**17** wewe náhenéna, Áhnte mensáméhnsá matíónsábé eheq saharanínkono uraire.

**18** Eheq saharanínkono íwíáhénéna, Íné mahrainie éna néne ménsámehsá kéh náhmári sokoruqme mó anotah nahmári pearena néne áhnte mensáméhnsá mipéq sáharaníe.

**19** Mipéq sáharáhnaraq mahra íwíáhinie. Néne matíó ménsáméhnsá áhnte opéq awehraq kanae. Minayabe amahnága túbah aginie. Táhutahurinie. Iwíáh íwíáhénéna ábáhrinie íwíáhuraire.

**20** Iwíáhurairana Manikánka wensabé, Múguwahgu saiyo aní móne. Ibora penahnaraq are pukiniewóne. Minayabe are áhnte matiahna mensáméhnsámé inseréhga awaq miagéhbo uraire.

**21** Maniká Iteribonsabé íre sirutaboiria peh sene ménsámehsánsabe sirutaboiro kewé teawú aní tahnsa ké wóe úwe.

*Itene irupipeq iwíáh kikiriyeho ú ehwehne.*

(Mátíyu 6.25-34)

**22** Sísaga we kéró keyabé mahraréna, Teiníboq írátíáhro. Mah marákóípéq mé tanahráqsábé itene irupipeq iwíáh kikiriyeho. Aneq naninkono? Aneq korósí suki-wianíkono íre íwíáhoro.

**23** Oga méwé íre peh morá tópah nahnagae. Itene inonkame íre peh morá aneraneré naneq mire.

**24** Kúqnu tagéq ahtebahro. Mi kanká ménsúmehsú íre uqmaréhre. Sene táhutahuq tħabé íre kéhre. Minayabe nera kéhtáq íre koawaqmena méáréhre. Manikánka mi kansábé íwíáhénéna pehipi kiraboire. Itewe wehuke puana Maniká Iteriboga itensabé anotah íwíáhénéna kawerue kirabo aitéhre.

**25** Arega arene oga mé tanahráqsábé íwíáh kikirinaraqmé ábátáq mérearahráhiro? Ahqáho. Írakaumo.

**26** Itene oga mé tanahráq ábátáq mérearahráh íre únayabé mó naneqmarínsábé aneqs-abé íwíáh kikironehbo?

<sup>27</sup> Uworseqté náneq kirena kaweq ará íyéh tagéq ahtebahro. Uworseqté náneqka íre arambbehire. Korósi íre kogahnire. Anotah wahnáh ání wenawíq Sórómóni naho ména we áhnte mensáméhnsá matawéna anotah kawéq áwáhríq kórósí matiowe. Uworseqté kaweq ará íyéh náneqka Sórómónine kaweq awahriq naneq kiotaikire.

<sup>28</sup> Uworseqté náneq íre kagai naneq mire. Ibora íyéhrana ahbiah tahnsá kekírataq taginae. Manikánsabe pehgárataq aiq pútare átah kéo, Manikánka mi kawéq árá sukiwíehnsábé wega ite moq sukitahráhi mino.

<sup>29</sup> Aneq nanehnkono íwíáhqué irupipeq áhnte iwíáh kikiriye.

<sup>30</sup> Maniká íre tagariáh kégá minayabe iwíáh íwíáhéra sene sirupipeq iwíáh kikirowe. Iteriboga ite íre mationa naneq aiq tagariéhre.

<sup>31</sup> Minayabe Manikánka wahnah wahnhnirabeqte sánsánsábé irutaboiréq sehgóro. Sehgírataq wega ite íre mationa naneq náinkéhe úwe.

*Sísaga kaweq naneq morábí sáhonsabé teriu ehwehne.*

(Mátíyu 6.19-21)

<sup>32</sup> Sísaga mó mahraréna, Ite sipisípiq nansó tähnsá kéo, íre áhreoro. Maniká Iteriboga wahnah wahnhnirabeq awaq miageheéna aiq omaq itéhre.

<sup>33</sup> Itene ménsámehnsá paiqmaqme mi moné tabonah ke náriéro. Mirairataqmé kagaorahi mensáméhnsá íopeq mitaq sáharagéhe. Mitaq aebó áninká íre aebóorahire. Mitaq wenuqka íre nahrahi puana itene kagaorahi mensáméhnsá peh mitaq kagainawire.

<sup>34</sup> Itene kaweq naneq morábí sáharáhrabeqsabé irutaboironeheqmóe úwe.

*Sísaga, Kouwekonaraqsábé níwénunoro ú ehwehne.*

(Mátíyu 24.42-44)

<sup>35</sup> Sísaga pabeqme ehwéh mahraréna, Itene korósi sukiareq áréti konahnareq árahmu keqme tagariáhro.

<sup>36</sup> Sene wahnhnka pahuwirorabeq suena sína tanáhráqsábé wene arambbehri anímári áwénuno serahnoro. Wega sure onsa pakobakoínaraq sega apubúue onsa sioneherawoe.

<sup>37</sup> Se tótuméra sene wahnhnksabé áwénuno anímárínsábé, Kauerowe aritankéhe. Teiníboq írátíáhro. Sene wahnhnka we áwénuno keyábé iwíáh íwíáhéra áréti konahnwena sensabé, Tútuoro aritena kirabo aritankéhe.

<sup>38</sup> Wega inokáhnabubupopoq tueina ínaraqpópoq sínaraqmé íre sugia peh wensabé áwénuno keyábé anotahtaq, Kauerowe aritankéhe.

<sup>39</sup> Anotah wehgá aebó áninká sína tanáhráq ahtebehtaq tahirímé wega áwénunue wahnhnurawéna aebó áninká kibekina ínaraq tagéna kaqsuéh irino.

<sup>40</sup> Minayabe iwíáhue tagahro. Íné wehukení úku aninká ite íre iwíáhira tanáhráq kouwekinauge. Minayabe íwéh panantágínaq níwénunoro úwe.

*Kaweq arámbéhrí ánínseq íre kaweq arámbéhrí ánínseqsabé ehwehne.*

(Mátíyu 24.45-51)

<sup>41</sup> Pítaga Sísansabé, Itene Wahnhnno, arega mah pabéqmé éhwéhmé peh morá itensabé teieno? Mó keyábéákáq terieno kasenúwe.

<sup>42</sup> Kasenuwana Sísaga mahraréna, Ahtebia ání tábúsoqme arámbéhrí anímé insebo? Wene wahnhnka mi anínsábé, Mó arámbéhrí keráq wahnhnharito atena táchutahuq tanáhráq tópah nário atéhre.

<sup>43</sup> Wene wahnhnka kouwekéna teawátái arámbéhrí tábúsoqme mirainsabé tagéna wene arambbehri anínsábé, Kaueróne atankéhe. Kaueróne atéhnsábé arambbehri aníné aru eyoyóinkehe.

<sup>44</sup> Teiníboq írátíáhro. Wene arambbehri aninká tábúsoqme arámbéhrí puana wene wahnhnka, Moke néne ménsámehnsátaq wahnhnúno atanae.

**45** Ahbabáq arambéhrí áninká iwíáhéra, Néne wahnahnka íre apubúue kouwekinae iwíáhire. Mira iwíáhinsabé mó arámbéhrí wéh áhré subiqmarena múguwahgu kereq táhutahuq néna píah naruq narurire.

**46** Wega íre iwíáhue áwénunína tanáhráq wene wahnahnka séna mina tagéna anotahtaq kamah awena ehweh íre íráh ké míáhrabeq móatankehe úwe.

**47** Sísaga mó mahraréna, Arambehri anínká wene wahnahne iwíáh irena íre miraínaraq wene wahnahnka anotahtaq kamah awinkéhe.

**48** Arambehri anínká wene wahnahne iwíáh íre ahtebéna mina ahbabárínana wene wahnahnka pehgáritaq kamah awinkéhe. Wehukenínká anotah apéq meyahnaraq anotah apéq awinanao. Mina inserah Maniká Iteriboga wehukení áhnte awena págege atena séhréhínaraq mi anínká Sísane arambehri anotahtaq mirainanao úwe.

*Sísaga, Íné wehuke saraq iuwanieéna tutauge ú ehwehne.*

*(Mátíyu 10.34-36)*

**49** Sísaga mó mahraréna, Abe kekinai anínká téh kekiaréhrana tawe abae agire. Mina inserah néne ehwehnka abae aginkeheéna marakóipeq tumíarauge. Ira abae aginserah néne ehwehme apubúue abae agéyabe nuwahbehere.

**50** Segá mótaq íné íre kaweraintéhra puana amahnága nirupipeq áhnte uméhime mókake kaweragine.

**51** Ínémé sainkue míáh ké insahwé aitanieéna marakóipeq tutaire íwíáhoo? Írakaumo. Peh sainsuanieéna tutauge.

**52** Mó karíronání moberíah méra apahránítogá néne ehweh sehgówara mó téhranítégá íre sehgioya puara sainkue míáhwe.

**53** Mó mapéq abowáreq wenahninseq sainkue míehye. Mó mapéqmé anowareq ayahunkawareq sainkue míehye. Mó mapéqmé ahrahnawareq anahbukawareq sainkue míehye úwe.

*Wehukega néne arambehri íre ahtebahrahewe ú ehwehne.*

*(Mátíyu 16.2-3)*

**54** Sísaga weba míó keyabé mó mahraréna, Ibonuqna kéhtáq ibonsinae irarewana ibonsire.

**55** Áúnorahntáh kéhtáq patahinae irarewana patahire.

**56** Kopéráhpéro keo, itega ibonuqnankákáq áúnorahntáhnkakaq ahtebéqmé aneqsabé ínéga amahnága mirau arámbéhrí íre ahtebahrahoo úwe.

*Apubúue insahwé ato ú ehwehne.*

*(Mátíyu 5.25-26)*

**57** Sísaga mó mahraréna, Kaweq sansámé aneqsabé íre iwíáhue mirao?

**58** Mó anínká are ehweh atanieéna anotah wahnáhbá meqme kinaraq ahtapeq kirataq we insahwé ato. Ehwehorabeq kirataq wega are anotah sahsí móatahnaraq wega párísiba móatahnana sega are karábúsiipéq móatéhboq insahwé ato.

**59** Teiníboq írátiáhro. Karábúsiipéq móatahnara íre apubúue soraq auwaneherawoe. Ebeqme anotah apéq paigmarehnaraqmé anehe soraq auwagéhe úwe.

## 13

*Ahbabáq sansa íre súéhrataqmé pukoneheqmóe ú ehwehne.*

**1** Mi tanáhráq táhmaro míó kega Páhírátiga miraú ehweh Sísa teawúwe. Kehrari marákórápéqté kégá Sarúsarama suwahpeq Manikánsabe titiruwana Páhírátiga se subiq súáhro aritowe. Subiq súáhro aritowara subiqmárówara pukutaq sene korahqkakáq titiro naneq kané korahqkakáq moraráq mitaq kowe.

<sup>2</sup> Páhírátiga miraú ehweh Sísa teawuwana wega sensabé, Pukuro kené ahbabáq moke mó Kehrari marákórápéqté kéné ahbabáq aiq kiotaiki puara mina tahnsa pukurowe íwíáhoo?

<sup>3</sup> Írakaumo. Teiníboq írátiáhro. Iteitene ahbabáq sansa íre súéhrataqmé ite moq moke pukoneheqmóe.

<sup>4</sup> Síróáma marákóráq íre wahto íópeq pewe kiría ébáh náh sokoguraitaq 18 wehuké pukurowe. Pukuro kené ahbabáq moke mó Sarúsarama suwahpeqte kéné ahbabáq aiq kiotaiki puara mina tahnsa pukurowe íwíáhoo?

<sup>5</sup> Írakaumo. Teiníboq írátiáhro. Iteitene ahbabáq sansa íre súéhrataqmé ite moq moke pukoneheqmóe úwe.

### *Sera íre íyéh áwánkánsábé pabeqme ehwéhne.*

<sup>6</sup> Sísaga mah pabéqmé éhwéh mahraréna, Wehne sotápéq nah naneq será íyéh áwánká kíréhrana wega sera sabátáhrurairana írakaunuraire.

<sup>7</sup> Írakaunurairana wene sotáq arambehri anínsábé, Apahtáró ópéq ínéga mah awánká sera sabátáhruraurana írakaunuraire. Apiruo. Aneqsabé néne marakóraq pehipi kehro urairana

<sup>8</sup> sotáq arambehri anínká wensabé, Amahnága pehragéna sera iyankéhboq ínéga áwahipeq ubuqme káhone seq maisarahnana

<sup>9</sup> mó opéq iyahnaraqmé kawerinae. Íre iyahnaraqmé apiruankéhe uraire úwe.

### *Ahrena ahrena wehekáh Sísaga owainawanka áwíoqnó iní kawerato ehwéhne.*

<sup>10</sup> Ahrena ahrena wehekáh Sísaga Asiu kené momiwí nahtápéq síwáhnorúwana

<sup>11</sup> abobia káuqmunia iní mitaq míowe. Owainawanka 18 opéq mi iní áwíoqnó púana we taebewe nogena íre iriwe nogoráhú iní míowe.

<sup>12</sup> Sísaga mi iní tagéna wensabé, Mahbeq súno éna arene awahre kaweratoge éna

<sup>13</sup> wene ayahnkaratáté táhtoqnówana apubúue irigéna Manikánsabe iwiáh íwiáh atowe.

<sup>14</sup> Sísaga mi iní ahrena ahrena wehekáh kaweratonsabe mibeqté wáhnáh áninká abiahnsanéna mío keyabé, Arambehri wehekáhmé abapete morá wéhékáh míre. Mó anínká arene awahre kawerateyabe awinaraqmé arambehrié wehekáh sero. Ahrena ahrena wehekáh awahre kaweraiteyabewé íre sero úwana

<sup>15</sup> Sísaga mina tahnsa íwíáho keyábé, Kopéráhpéro keo, ahrena ahrena wehekáh itene kamarí wání nageheéq wiraipeqté meriqmeq wánítapeq móritáh mino?

<sup>16</sup> Mah inímé Ébáráhma kahnáh íníñirana owainawanka íregáritaq opéq 18 opéq áwíoqnehrana ínéga ahrena ahrena wehekáh kaweratómē aiq kaweq sansánu mino úwe.

<sup>17</sup> Úwara mi ehwéhnúnka sene sirupipeq pó púara wene naruo anotah siyehítowara áhnte mó kegá Sísaga miraú arámbéhri tagéra iwiáh íwiáhuwe.

### *Pehgáriq ayúnsábé pabeqme ehwéhne.*

(Mátíyu 13.31-32; Málka 4.30-32)

<sup>18</sup> Sísaga mah pabéqmé éhwéh mahraréna, Manikánka wahnah wahnahname aneq tahnsáne ue teiníñkono? Anere pábéqmé éhwéh teiníñkono?

<sup>19</sup> Manikánka wahnah wahnahname awanká ayu pehgáriq ayú tahnsane. Wehukeníñká mi pehgáriq ayú wene sotápéq uqmatairana kirena anotah úkéna moke mó mensáméhnsá kiotaikire. Awankánirana kabaramaríñká séra ayahnaweraq sene nah piáhwe úwe.

### *Muoráhi naneqsabé pabeqme ehwéhne.*

(Mátíyu 13.33)

<sup>20</sup> Sísaga mó mahraréna, Manikánka wahnah wahnahname anere pábéqmé éhwéh teiníñkono?

**21** Tírí ínínká muoráhi naneq páráhwaipéq maqme ayahnirana moke műíre. Manikánka iópeq wahnah wahnahname mina páréti muoráhi naneq tahnsáne úwe.

*Sobuya méhpéhpéq kibekoro ú ehwehne.*

(Mátíyu 7.13-14,21-23)

**22** Sísaga Sarúsarama suwahpeq pokinie íwíahéna pokue moke táchúnipéqkákáq anotah matábúrápéqkákáq síwáhnorinieéna pokúwe. Pokéna síwáhnorue kure kure Sarúsarama suwahpeq koragúwe.

**23** Koragúwana mó anínká wensabé, Wahnah aníno, oga mérapeq awaq míéhra kewé peh táchmaroga awaq mianeherabo kasenúwe.

Kasenúwana Sísaga míó keyabé,

**24** Tauntahunue sobuya méhpéhpéq kibekoro. Teiníboq írátíáhro. Áhnte kegá nahupeq kibekonehe íwíahéra íre kioráhowe.

**25** Mibeqté Wáhnáhnká onsa paiqmarahnaraq itega méhpéh iriwe méq onsaraq subírataq wensabé, Itene Wahnahno, onsa siito igehe. Onsa siito irana wega itensabé, Ite eheqte kébo? Ínéga ite íre tagaríóge inawire.

**26** Ite íre tagaríóge ínaq itega wensabé, Arereq moráráq táchutahururauna wino. Arega iteruwahpeq íwáhnorurona wino irana

**27** wega itensabé, Itewe íre tagaríóge. Ite eheqte kébo? Ite moke ahbabáq ke puaq íné nueq pokoro aitanawire.

**28** Ébáráhmareq Áhísáhkireq Séköpareq moke Manikáne ehweh iraru kerekka Manikánka wahnah wahnahnirabeq míéhraq tagéq peh máhpeq míéhra puaq uwo uwo éq abuy-oraneheqmóe.

**29** Ío kiembogirabeqte kerekq ío tupekirabeqte kerekq ébeq ayópéqté mó ébeq ayópéqté kerekka sure Manikánka wahnah wahnahnirabeq tútuue méra táchutahurigehe.

**30** Írátíáhro. Amahnága anotah ke ebeq míáh kewé mókake Manikánka wahnah wahnahnirabeq anehepeq pehgáriq ke úkoneherawoe. Amahnága anehepeqte kégá ebeq anotah ke úkigehe.

*Sísaga Sarúsarama suwahpeqte kékabé arutaboirú ehwehne.*

(Mátíyu 23.37-39)

**31** Mi tanáhráq Péhrasi kegá Sísaba séra wensabé, Érótiga are subiq suaníe íwíahinsabé mahtaq sue pokúno uwana

**32** Sísaga sensabé, Mi urínsí íá táhnsá ánínsábé koreaweq mahrarero. Iborankákáq ahbiahakáq owainawamarí kaqsuena awahre ke kaweraritaníe. Apahtáróráq néne arambehri parabaruanié.

**33** Manikáne ehweh iraru ke peh morá Sarúsarama suwahpeq míowara subiqmaq subiqmaruwara puku pukuwe. Íné moq Manikáne ehweh iraru anínéna iborankákáq ahbiahakáq ahrinaakáq ínéga íwíáhu ahtápéq pokue arambehrinauge.

**34** Sarúsarama suwahpeqte kéo, itensabé nirutaboiraitóge. Itega Manikáne ehweh iraru ke subiq sueq Manikánka iteba eqmaro ke ebahnsatate subiq súowe. Kokórega wene áráhqmari arutaboiréna ahwirinserah áhnte tanáhráq ite wahnahnue séhréh aiteyabe nuwahbehraqme itega ahqáho aintáhwe.

**35** Írátíáhro. Ahqáho aintáhnsábé iteruwahpeqme mókake íre kaweraitahnana peh susa náh kanae. Teiníboq írátíáhro. Mókake itega íné pehipi íre tagagehe. Ebeqme mahraréq, Itene Wahnahne áwírue sína anínsábé íwíáh íwíáh atone éq anehe íné tagagehe úwe. (*Buk Song 118.26*)

<sup>1</sup> Ahrena ahrena wehekáh Sísaga Péhrasi wahnáh áníné nahtapeq táchutahurinieéna pokúwara mibeqté kégá we awahnkanuwe.

<sup>2</sup> Wene aiayah mu anínká weba míowana

<sup>3</sup> Sísaga mi aní tagéna Mósí sine ehweh síwáhnoro kereq Péhrasi kereqsabé kasenéna, Ahrena ahrena wehekáh awahre ke kaweraritewé kaweq sansápo úwe.

<sup>4</sup> Úwara íre ehwehnia peh ehiya míowana Sísaga mi awáhre ání kaweratena eqmarowe.

<sup>5</sup> Eqmarena míó keyabé mahraréna, Ahrena ahrena wehekáh itene anipópoq poéráhpópoq mataipéq tupetiahnaraqmé mi wehekáh pankeqme meruaneherabo kasenúwe.

<sup>6</sup> Kasenúwara íre teawasa peh ehiya míówe.

### *Íné pehgáriq aní tahnsa míanie íwíáhúno ú ehwehne.*

<sup>7</sup> Táhmaro táchutahuroneherao kegá kabaréra kaweqtapéq eheq tútuue míanehnkono uwana Sísaga mina tagéna mah pabéqmé éhwéh teriuwe.

<sup>8</sup> Teriena mó anínká arensabé, Máho ínahwe arega anotah táchutahúrirarabeq pokirataq anotah weh tútuue míéhrarabeq íre tútuue míahno. Arensabé máho urai anínká mó aní are kiotaqme anínsábé máho urairamo.

<sup>9</sup> Anotah anínká sínaraq máho urai anínká arensabé, Móbeq míahno. Mó anínká mahtaq tútuue míankehe ínaraq are anotah ayéhítanawire.

<sup>10</sup> Arensabé máho ínaraq ayehrápéq korútue míahno. Miraínaraq arensabé máho urai anínká tagéna arensabé, Irigue mahbeq kaweqtapéq serútue míahno atanae. Wega miraínaraq tagehra kegá arensabé íwíáh íwíáh atagéhe.

<sup>11</sup> Wewega, Íné anotah aní múge íwíáhínaraqmé Maniká Iteriboga wensabé, Pehgáriq aní míahno atankéhe. Wewega, Íné pehgáriq aní tahnsa míanie íwíáhínaraqmé Maniká Iteriboga wensabé, Anotah aní míahno atankéhe úwe.

### *Sísaga, Tabonah ke kawerarito ú ehwehne.*

<sup>12</sup> Sísaga máho ato aninsábé mahraréna, Arega anotah táchutahúq kaweraréhna tanáhráq peh morá arene iyahnabo arenawahrah áhnte monéákáq kékabé máhoro íre úno. Mó tanáhráq sega arensabé, Máho atera táchutahuq náwigéhe. Mina tahnsanue arene ápeq meyankéhe.

<sup>13</sup> Arega anotah táchutahúq kaweraréhna tanáhráq tabonah kereq sawenkahnia kéréq aigará soriqnah kereq aura pira kereqsabé máhoro arito.

<sup>14</sup> Segá are mó naneq íre náweráho puara Manikánka kaweróne atankéhe. Mókake wega kaweqtaq míáh ké iriritahna tanáhráq ápeq awinkéhe úwe.

### *Táchutahuronehboq máhoro únsabe pabeqme ehwéhne.*

(Mátíyu 22.1-10)

<sup>15</sup> Sísareq moráráq táchutahurú anínká mi ehwéh irena wensabé, Manikánka wahnh wahnhnirabeq táchutahurira kewé sirupipeq áhnte eyoyó aginkehe úwana

<sup>16</sup> Sísaga wensabé pabeqme ehwéh mahraréna, Wehga íregáritaq wehekéq kiraboinieéna áhnte táchutahúq kawerataire. Kaweraréna mi keyabé, Máhoro uraire.

<sup>17</sup> Awehraq tanáhráqmé wene arambehri aní teawena máhoro urau keyabé, Táchutahuq tanáhráqmé aíq awehraq mire. Amahnága máhoro korerio éna eqmataire.

<sup>18</sup> Eqmatairana, Máhoro urairara íre serahúne ehwéh mó anínká mó anínkáue teawátówe. Mó anínká wensabé, Marakó paiqmataunsabé mina koraganau puana íre korahuge urairana

<sup>19</sup> mó anínká wensabé, Íné arambehriýabe inayáhnkú káho paiqmataunsabé mi kamári áhwárawe taganau puana íre korahuge urairana

<sup>20</sup> mó anínká wensabé, Íné ahre meyo púana íre korahuge uraire.

<sup>21</sup> Mi arámbéhrí áninká kouwekue sene ehweh wene wahnah teawátairana anotah abiáhnsánuraire. Anotah abiáhnsánéna wensabé, Anotah ahtápéqkákáq pehgáriq ahtápéqkákáq peheráh pokue tabonah kereq sawenkahnia kereq aura pira kereq soriqnah kereq koweriqme súno uraire.

<sup>22</sup> Urairana wene arambehri aninká miraéna kouwekéna wene wahnahnsabé, Aiq miraugarawe sira kewé íre awehraq míahwe urairana

<sup>23</sup> wene wahnahnka wensabé, Néne táchutahuq áhnte nagehboq sotápéqkákáq tanahraipéqkákáq wehuke kogabarue koweriqme súno.

<sup>24</sup> Teiníboq írátíáhro. Téh máhoro urau kegá néne táchutahuq pehgáriq naneq íre naneherawoe uraire úwe.

*Sísaga, Ebeq kawerue iwíáhé anehe íné séniro ú ehwehne.*

(Mátíyu 10.37-38)

<sup>25</sup> Sísaga pokúwara peh íregáritaq kegá kérówana wega pabeqme sensabé,

<sup>26</sup> Wehukega íné pehipi íre séniragéhe. Wenanoiboreq wene ahrerek wene animárínseq wenábáqmarinseq wenanahnorehreq suahnaraqmé íné sénirankéhe. Wewe awahbeh iwíáh suahnaraqmé íné séníréh ání míankehe.

<sup>27</sup> Nánibone arambehri miraunsabé íné awankátaq táhpawé nubiq suagéhe. Ínéga miraunserah miraue séníráhro. Minayabe néne arambehriraq túbáh agéna peh we awahbeh arámbéhrí sehgi ánime né séníréh ání íre míahrahire.

<sup>28</sup> Nah pianaína aninká ebeqme iwíáhue tagankehe. Nah pe naneqmarínkákáq wene móneakáq awehraq kahnaraqmé anehe pearankéhe.

<sup>29</sup> Ebeq íre iwíáhi aninká nahwiahnsanse pearena anehe néne móneakáq íre awehraq kékhe éna mi nah íre pera suankéhe. Tagehra kegá susa náhwíáhnsánsé tagéra mi anínsábé awiréh atera,

<sup>30</sup> Wega áhwáreh arámbéhrí íre parabaruahráhire oneherawoe.

<sup>31</sup> Wahnah aninká mó wahnáh ánínseq wene ebeh kereq ebehue subiq suanéhe iwíáhéna ebeq tútuue ména kawerue iwíáhinkehe. We peh 10 táchuséni (10,000) ebehira ke míehrataq wene naruo peh íregáritaq 20 táchuséni (20,000) ebehira ke míehrataq kaweq iwíáhi wahnáhrnká íre apubúue koebehinkehe.

<sup>32</sup> Itene naruo íre subipáhraruahráhúne iwíáhinaraqmé sene naruo míehrataq ahnsaní eqmarankéhe. Itega íre ebehoneheqmúne. Kaweqtaq míanehboq póqsuanéhe terio éna eqmarankéhe.

<sup>33</sup> Mina inserah íné sénirané íwíáhóna aninká ebeqme iwíáhue tagankehe. Peh morá wewene matiéh náneqsabé, Anetaníbo moke suané íwíáhi aninká íné séníréh ání míankehe úwe.

*Sísaga auqmah soréqsábé pabeqme ehwéh teriu ehwéhne.*

(Mátíyu 5.13; Mákha 9.50)

<sup>34</sup> Sísaga mó mahraréna, Sóreqme kaweq nanere. Sóreq auqmah úkínaraq árahue kaweraranéhnkono? Írakaumo.

<sup>35</sup> Auqmah soréqmé peh abehq úki puaq sotápéq kíréh náneq íre séhréh atahráhire. Sotápéq kawerue kirankéhboq seqkákáq auqmah soréq ayahnue sotápéq maranéhnkono? Írakaumo. Auqmah soréq peh máhpeq suaneheqmúne. Minayabe iahreakaq ké kawerue íráhro úwe.

## 15

*Sipisípiq tabanaginsabé pabeqme ehwéhne.*

(Mátíyu 18.12-14)

<sup>1</sup> Táhkisi moné meyáh kereq ahbabáq kereqka Sísane ehweh iraneheéra weba suwara

<sup>2</sup> Péhrasi kereq Mósísine ehweh síwáhnoro kereqka ehmuniq éhmúníréra, Mah anínká ahbabáq sansano ke mehwéh aritena sereq moráráq táchutahurire uwe.

<sup>3</sup> Uwana Sísaga mi ehwéh irena mah pabéqmé éhwéh mahraréna,

<sup>4</sup> Iteruwahrah anínká áhnte ka 100 sipísípíq wahnahnirana peh morá ká tabanagínaraq wega anerinabo? Wega íre tabanago kamári 99 sipísípíq uwaruntú sahtaqme nahrabeq sitena tabanagi ka kogabarue ábóraq marankéhe.

<sup>5</sup> Ábóraq marahneyabé iwíáh íwíáhéna mi ka sawiwena

<sup>6</sup> wene nahtapeq pokue wenawahrahreq wene iyahnaboreqsabé síáhrabue sensabé, Néne tabanagi ka ábóraq marónsábé iwíáh íwíáhonehe inkehe.

<sup>7</sup> Mina inserah íópeqté kégá 99 kaweqtaq míah kékabé peh ákáhtaq iwíáh íwíáhowe. Peh morá áhbábáq áninká wene ahbabáq suena Manikáne ani ukítáq íópeqté kégá anotahtaq iwíáh íwíáhowe úwe.

### *Tabanagi monéyábé pabeqme ehwéhne.*

<sup>8</sup> Sísaga mó pabeqme ehwéh mahraréna, Mó inínká nayáhnkú móne matiéhrana peh morá móne tabanagínaraq wega anerinabo? Wega áráhmu keqmarena nahupeq kabantáhinkéhe. Kawerue kabarue ábóraq marankéhe.

<sup>9</sup> Ábóraq marena wenawahrahreq wene iyahnaboreqsabé síáhrabue sensabé, Tabanagi moné ábóraq marónsábé iwíáh íwíáhonehe inkehe.

<sup>10</sup> Mina inserah peh morá áhbábáq áninká wene ahbabáq suena Manikáne ani ukínaraq Maniká míéhrabeqte íópeqté kégá ahbabáq súéh áninsábé anotahtaq iwíáh íwíáhigehe úwe.

### *Ábákawa kouwekuraitaq wenaboga iwíáh íwíáhúnsabe pabeqme ehwéhne.*

<sup>11</sup> Sísaga mó mahraréna, Peh morá wéhreq wene ahninkáwáráreq míarowe.

<sup>12</sup> Ábákawagá wenabonsabé, Nániboo, amahnága arene ménsámehnsá saraqme náio urairana sibowágá wene ménsámehnsá saraqme náriátáire.

<sup>13</sup> Náriátáirana ábákawagá táchmaroraq mitaq ména wene ménsámehnsá sokah sokahue íre wahto wáhnaupéqté ké suwahpeq pokéna mitaq míaraitaq wega ahbabáq sansa mira aruqarurainsabé wene móne apubúue parabaguraire.

<sup>14</sup> We tabonah ani ukurairana mitaq anotah ehwéhrarairana we arupibiuraire.

<sup>15</sup> Arupibiurainsabé wega mibeqté áníné arambehri aní úkurairana wene wahnahnka, Uworapeq néne póéráhqtaq kowahnahnúno ataráire.

<sup>16</sup> We áhnte arúpíburairana póéráhqka narotaq sene táchutahuq nahrahurairara mó kegá we íre náwatówe.

<sup>17</sup> Minayabe wene múgu wahgu iwíáh suena tábúsoqme iwíáhéna, Nánibone arambehrio ke áhnte topáh kéhranawe íné mahtaq nirupinsabé pukorahuge.

<sup>18</sup> Íné mahtaq suena nánu wahpeq pokue nánibonsabé mahrarinie. Nániboo, ahbabárurauta arereq Manikánseq ahbabáraitáráuge.

<sup>19</sup> Ahbabáraitáráunsabé mókakewe ínénabe, Nénahnine íre ainto. Peh arene arambehri aní míánkehéé arambehriúno ainto teawiníe éna

<sup>20</sup> mitaq suena wenaboba pokuraire.

We áhníborá suraitaq wenaboga tagéna arutaboirue pehbeheráh weba kure kogáhkoue nánkóqnara airana

<sup>21</sup> wenahninká wensabé, Nániboo, ahbabárurauta arereq Manikánseq ahbabáraitáráuge. Mókakewe ínénabe, Nénahnine íre ainto uraire.

<sup>22</sup> Urairana abowágá wene arambehrio keyábé síáhrabéna sensabé, Kaweq káh ambántá apubúue mewe suki atáhro. Wene ayahnkarapí kera suki ateq wene aigarápi súu suki atáhro.

<sup>23</sup> Kaweq kaho áráh subiqme moráráq táchutahuréq iwíáh íwíáhonehe.

<sup>24</sup> Nénahní pukuraime amahnága oga míéhre. We taqnobaguraime amahnága ábóraq míéh púaq iwíáh íwíáhonehe uraire. Segá táchutahuq kawerarera iwíáh íwíáhurowe.

- <sup>25</sup> Iwíáh íwíáhurowana awahwágá wene sotápéqté séna ábáhruro irena  
<sup>26</sup> arambbehri anínsábé, Aneroo kasenuraire.  
<sup>27</sup> Kasenurairana, Arenábáq séna awaho ani míehnsábé arenaboga káho áráhq subiqme nanehe uraire.  
<sup>28</sup> Urairana awahwágá anotah abíáhnsánéna nahupeq íre kibekurairana wenaboga tueyokue wensabé, Máho ue áhrabéna, Aru ukiqmewé kiinsahwé aito uraire.  
<sup>29</sup> Urairana awahwágá wenabonsabé, Ínéwé áhnte opéq arene arambbehri mira aruqaruruge. Arene ehweh íre anterutauge. Ínéreq néne iyahnaboreqka ábáhrigeheé arega méme áráhqmé íre níátóne.  
<sup>30</sup> Arenahninká ahbabáq ininsónseq arene ménsámehnsá parabaruena sirah arega káho áráhq subiqme náwene uraire.  
<sup>31</sup> Urairana abowágá wensabé, Are nénahni móne. Arereq ínéreq moraráq mía míauye. Moke matío ménsámehnsámé areneákáq matioye.  
<sup>32</sup> Arenábáq pukuraime amahnága oga míehre. We taqnobaguraime amahnága ábóraq míeh púaq itega iwiáh íwíáhue ábáhrúnawe ábéréhre uraire úwe.

## 16

*Ménsámehnsá tínáhuue mirai anínká miraurainsabé pabeqme ehwéhne.*

<sup>1</sup> Sísaga we kéró keyabé mó pabéqmé éhwéh mahraréna, Áhnte monéákáq wéhné ménsámehnsátaq arambbehri anínká auráq átáriararaire. Átáriarairara mó kegá wene wahnhnsabé, Arene arambbehri anínká íre kawerue wahnahnire urowe. Urowana wene wahnahnka irena

<sup>2</sup> mi anínsábé áhrabue kasenéna, Arene áhwára áhwára sansánsábé teniémé aiq pútaq ehwéhpo? Tenio. Arega néne ménsámehnsá moke kawerare mókake minawari íre wahnahninkehe uraire.

<sup>3</sup> Urairana mi anínká wewe náhenéna, Néne wahnahnka kaqnuahnaraqmé aneq arámbéhrí ininkono? Íné nonáwehq ube arámbéhrí íre miraorahuge. Móneyabé ineh inehayabé áhnte niyehitehre.

<sup>4</sup> Íné iwiáhume tínáhuakáq kégá néne iyahnabo úkigehboq sene tínáhu maratarinie. Miraonaraqmé mókake néne arambbehri íre kahnaraq sega íné mehweh aintera sene nahtapeq máho aintera kirabo aintagéhe íwíáhuraire.

<sup>5</sup> Wega mira íwíáhéna tínáhuakáq ké síáhrabéna ebeq surai anínsábé, Néne wahnahne tínáhuue árahue kehro uraire.

<sup>6</sup> Árahue kehro urairana, Obenkisa óéri antéhyá\* 100 antéhyá merauge urairana, Mah pepáhqtáq mahraue sehiranúno éna ínéga 50 obenkisa óéri antéhyá awinauge ue sehiranúno teawátáire.

<sup>7</sup> Anehe surai anínsábé, Néne wahnahne tínáhue árahue kehro urairana, Wítiwe 100 ambékí merauge urairana, Mah pepáhqtáq mahraue sehiranúno éna ínéga wítiwe 80 ambékí awinauge ue sehiranúno teawátáire.

<sup>8</sup> Wega mina tahnsa urainsabé wene wahnahnka wensabé iwiáh íwíáhéna, We ahtebia ánine uraire.

Mah marákóípéqté kégá mah marákóípéqté sánsá aiq ahtebahwe. Minayabe ménsámehnsá paiqmaráhnsábé sene sánsánká téhrehrabeq nogó kéné sánsá kiotaikowe.

<sup>9</sup> Teiníboq írátíáhro. Áhnte ke itene iyahnabo míagehboq mah marákóípéqté ménsámehnsá náríero. Mina parabagína tanáhráq oga mérapeq sega mitaq mehweh aitagéhe úwe.

\* **16:6:** Óéri anome óríwi awankátápéqté sérá anone. Óríwi awánkánsábé éhwéhmé púku anehepeqte séhíramé “Manikáne Púkuipéq Kéh Áwahe Éhwéhne” ue kéhrabeq tagáhno.

<sup>10</sup> Sísaga we kéró keyabé mó mahraréna, Pehgáriq arámbéhrí kawerue mirai anínká anotah arámbéhrí moq kawerue mirainkehe. Pehgáriq naneq pehipi meyéh áninká anotah naneq moq aebóorahire.

<sup>11</sup> Arega mah marákóípéqté ménsáméhnsá íre kawerue wahnahninaraqmé árahue oga mía mía arámbéhrí mirainibo?

<sup>12</sup> Mó aníné ménsámehnsá íre kawerue wahnahninaraqmé arega wahnahninkeheéna insega ménsámehnsá airaiq awinkéhbo úwe.

*Téhtaré wáhnáhné arambehri moráráq íre sehgiordáhi ehwéhne.  
(Mátíyu 6.24)*

<sup>13</sup> Sísaga mó mahraréna, Arambehri anínká téhtaré wáhnáhné arambehri íre moráráq sehgiordáhire. Wega mó wahnáhnsábé awahbéna mó wahnáhnsábé íre awahbanae. Wega mó wahnáhné arambehri kawerue sehgienna mó wahnáhné arambehri áhwára áhwárainae. Mina inserah itega Manikánsabe irutaboiro sansánkákáq móneyabé irutaboiro sansánkákáq íre moráráq sehgiordáhowe úwe.

*Sísaga Manikánka wahnah wahnahnabeqsabé teriu ehwéhne.*

<sup>14</sup> Sísaga mah ehwéh mahrarúwara Péhrasi kegá irera móneyabé sirutaboiro puara wensabé awiréh atáhwe.

<sup>15</sup> Awiréh atáhwana wega sensabé, Mó kegá, Ite kaweq ke wóe aitageheéra arambehri-owe. Manikánka itene kopípéq irupipeqté íwíáh tagariéhre. Wehukega iwiáh íwíáh atáh náneqme Manikánka mi naneqsabé abehq náneq mire atéhre.

<sup>16</sup> Wání meri merini aní Sóniga íre sútaq Mósísine ehwehnkakáq Manikáne ehweh iraru kené ehwehnkakáq kowe. Kowana Sóniga suraitaq Manikánka wahnah wahnahnabeqte kaweq ehwéh tei teinúne. Teinúnara ómi kegá págegeue mitaq kioráhúne íwíáhewe.

<sup>17</sup> Íopeqkákáq mah marákó márakkóákáq mókake tabanaginæ. Peh Manikánka sehgiro i ehwéhmé mi ehwéh pehgáriq íre tabanagorahire.

*Sísaga wehga wene ahre kaqsueyabe irarú ehwéhne.  
(Mátíyu 5.31-32, 19.9; Mákha 10.11-12)*

<sup>18</sup> Wene ahre kaqsuena mó ahré meyéh áninká aiq ahhbabárire. Sutai ahré meyéh áninká moq ahhbabárire úwe.

*Áhnte monéákákáq wéh iraipéq míarainsabé éhwéhne.*

<sup>19</sup> Sísaga Péhrasi keyábé mó mahraréna, Menah áhnte mensáméhnsánkákáq wéhgá kaweq ambántámári aneranerue ména ahriahri kaweq tahutáhúq naruq narururaire.

<sup>20</sup> Wega miraurairana tabonah náonkakáq aní wenáwíq Árásárúsi áhnte mensáméhnsánkákáq wéhné ogesáh ogesáhrapeq tútuue ména

<sup>21</sup> mi wehné táchutahuq apipi nanieéna mitaq míarairana iamárínká séra wene náo wana wanaurowe.

<sup>22</sup> Tabonah ani pukurairara íopeqté kégá wenawa meqmera Maniká míehrabeqte aní Ébáráhmaba móátárówana áhnte mensáméhnsánkákáq wéh moq pukurairara maisiarówe.

<sup>23</sup> Maisarówana wenawanka iraipéq ména anotah erurairana kamahuraire. Wega senahpeq tagarairara íre wahtopeq irerebeq Ébáráhmareq Árásárúsireq moráráq míaroyana tagaraire.

<sup>24</sup> Tagéna Ébáráhmansabé áwíahraqséna, Ébáráhma nániboo, ínénsabe arutaboirainte Árásárúsi eqmarehnana wene ayahnkara wánípipeq pámbáhue ninehbíraq tabaintahnana titiríno. Mah iráípéq anotahtaq níéríre uraire.

<sup>25</sup> Níéríre urairana Ébáráhmaga wensabé, Nánibáre. Are oga míarona tanáhráqmé áhnte kawéq náneqkakáq míaronana Árásárúsi tabonah ani míaraire. Minayabe iwiáhue tagáhno. Amahnága we mahtaq kaweqtaq míéhráh arewe mitaq kamahóne.

<sup>26</sup> Móme ite ákáhpi mentú kéhnsábé mahbeqté kégá mibeq íre tuoráhúnara mibeqté kégá mahbeq íre kioráhowe uraire.

<sup>27</sup> Urairana wega Ébáráhmansabé, Nániboo, Árásárúsi nánibone nahtapeq eqmaro.

<sup>28</sup> Mitaq nánlbáqmari moberíah míáhwé. Mah iráípéq anotah érirabeq se moq siyehboq Árásárúsiga sensabé, Itene ahbabáq sansa sueq kaweqlaq mía míaoro korerinkéhe uraire.

<sup>29</sup> Urairana Ébáráhmaga wensabé, Sega Mósísireq Manikáne ehweh iraru kereqne ehweh matíáhwé. Mina iragéhe uraire.

<sup>30</sup> Urairana, Ahqáho. Sega mina íre iragéhe. Pukia anínká oganúkéna korerinaraqmé se irera sene ahbabáq sansa suaneherawoe uraire.

<sup>31</sup> Urairana Ébáráhmaga wensabé, Sega Mósísireq Manikáne ehweh iraru kereqne ehweh anetaníbo íwíáhirataqmé pukia anínká oganúkéna terinaraq sega wene ehwehnsabé moq anetaníbo íwíáhéra kaweqlaq ke íre ukoneherawoe uraire úwe.

## 17

*Ahbabáq sansanká aiq pútare atona sansá saiqnaruahráhi ehwéhne.*

*(Mátíyu 18.6-7,21-22; Mákha 9.42)*

<sup>1</sup> Sísaga we kéró keyabé mahraréna, Síúgio kewé anotah ahbabárowe. Mah marákó márakóípéq ahbabárarahi sansá peh kagaire. Áúgii anímé ahbabáq áhwáreh puana Manikánka anotahtaq kamah awinawire.

<sup>2</sup> Wehukenínká ínénasabe aiq pútare aintéh ání ahbabáq sansa áúgi ínaraqmé anotahtaq íre kawerire. Áúgii anínká káriq aní áúgi ínaraqmé wene anuopi anotah ebáh táhru táhruue púrúrúia káwéhúpípéq tuparuahnana wánípipeq tupekitaq tahirímé aiq kaweri irino. Iteite kawerurero úwe.

<sup>3</sup> Sísaga mó mahraréna, Arene iyahnabo anínká ahbabárínaraq ehweh ato. Ehweh atéhnaraq wega arensabé, Íre kaweruge. Móme íre mirainie ínaraqmé insahwé ate wene ahbabáqsabe mó íre íwíáhúno.

<sup>4</sup> Wega peh morá wéhékáh abapete téhtaré tánáhráq are ahbabárue ue anehe wega, Íre kaweruge. Mi ahbabáq suaníe ínaraqmé wene ehwehnsabé aiq pútare ate wene ahbabáqsabe íre íwíáhúno úwe.

*Sísaga aiq pútare atéh sánsánsábé teriu ehwéhne.*

<sup>5</sup> We kéró kega Sísansabé, Itega kaweqlaq aiq pútare atanéhboq séhréh aito uwe.

<sup>6</sup> Séhréh aito uwana wega sensabé, Arene íwíáhwé awanká ayu pehgáriq ayú tahnasa kahnaraq itega anotah awánkánsábé, Are sawikue móbeq sóreq waní káwehupípéq kogahno irataq mi awánkánká itene ehweh sehginawire úwe.

*Sísaga kaweqlaq arámbéhrí áníné sánsánsábé irarú ehwéhne.*

<sup>7</sup> Sísaga mó mahraréna, Wahnah korégá wene arambehri anínsábé, Néne sipisípiqtaq wahnahnúno anehe néne sotápéq koarambehriúno atéhrana tupekinaínara wega sotápéqté arámbéhrí suena wene wahnhane nahtapeq sinæ. Wene wahnhahnka wensabé, Aiq míre. Sewe náhno inabo?

<sup>8</sup> Írakaumo. Wahnah korégá wensabé, Néne táhutahuq tíare tahberapeq mewe ménánio éna ínéga nawe parabarúahnaraq arene táhutahuq nankehe inae.

<sup>9</sup> Minawé peh arambehri aniné arambehri puana wega miraitaq wahnh korégá kaweróne inabo? Írakaumo.

<sup>10</sup> Mina inserah Maniká itene Wahnhane ehweh sehgióro. Kawerue sehgieq parabarueq íwíáhéq ite íre kaweqlaq arámbéhríúna anímári múne. Itega miraúnwae peh itene arambehri wire oro úwe.

*Sísaga kawerato anínká kouwekue kaweróne ato ehwéhne.*

<sup>11</sup> Sísaga Sarúsarama suwahpeq pokinaútaq wega Sámárla marákóákáq kótaikue Kehrari marákóákáq kótaikue

<sup>12</sup> mó ke suwahpeq kúwara inayáhnkú ké anotah naonkákáq kégá weba suwe. Mó ke insoq sitéhneho éra sega móbeq iriwe méra

<sup>13</sup> áhrabéra, Sísao, are anotah aní móne. Arutaboiraito uwana

<sup>14</sup> Sísaga se tagéna sensabé, Manikáne ehweh mibeq mahbeq arítah kéká pokue itene náo kaweraginsabé sokigi aríero úwara pokue ahtapeq kutaq sene náo kaweragúwe.

<sup>15</sup> Peh morá áninká wene náo kaweragú tagéna kouwekue Manikánsabe anotahtaq iwíáh iwíáh atena

<sup>16</sup> Sísane aigarápí abiah maraipérue káúqmunue iwíáh iwíáh atena kaweróne atowe. Mi anímé íre Asiu aníne. We Sámárla marákórápéqté ánine.

<sup>17</sup> Sísaga we kasenéna, Inayáhnkú kaweraítóge. Mó abapete itaréitaré ánímári eheq míaho?

<sup>18</sup> Aneqsabé peh morá wáhnaupéqté áninká kouwekéna Manikánsabe iwíáh iwíáh atehro éna

<sup>19</sup> wensabé, Irigue pokúno. Aiq pútare aintahnaga kaweratéhre úwe.

*Sísaga tuina tanáhráqsábé éhwéhne.*

*(Mátíyu 24.23-28,37-41)*

<sup>20</sup> Péhrasi kegá Sísaba séra wensabé, Manikánka wahnah wahnahnína tanáhráq ahkake sinabo uwana wega sensabé, Manikánka wahnah wahnahnína tanáhráq wehukega siuratate íre tagahrahewe.

<sup>21</sup> Wehukega, Mahtaq kéhre. Mitaq kéhre íre irarerahewe. Manikánka wahnah wahnahnime amahnága ite míáhrabeq ábórarire úwe.

<sup>22</sup> Sísaga we kéró keyabé mó mahraréna, Mókake itega íné wehukení úku aní túóna tanáhráq níwénunue irutaboiréq íre tagagehe.

<sup>23</sup> Mi tanáhráq sinaínaraq mó kegá, Mitaq koragahro. Mahtaq seragahro teírataq sene ehweh íre aiq pútare arítáhro.

<sup>24</sup> Sokeqsuéhrana apubúue moke íópeq téhrehnserah íné wehukení úku aní túóna tanáhráq tuinauge.

<sup>25</sup> Téhwe mah tanáhráq wahnahno kegá ínénsabe, Iuwahriehre aintera kamah aniera nubiq suagéhe.

<sup>26</sup> Naho naho Nóah mío tanáhráq wehukega ahhbabárera miraunserah íné wehukení úku aninká tuinie onaraq mi tanáhráq oga míéhra kegá miraigehe.

<sup>27</sup> Anotah waní pianaú tanahráq wehukega ahhbabárera ahriahri miraunserahnéra táchutahuréra ábáhréra pahuiruwana Nóahga wene sípiipéq kibekúwana anotah ibónsúwana wání pionka moke subipáhraruwe.

<sup>28</sup> Mó aní wenáwíq Árótae. We wáhnaupéqté ké suwahpeq Sóróma suwahpeq míotaq mi kegá íre irasa ké méra táchutahuréra paiqnánánéra ayu uqmarera nah pearówana

<sup>29</sup> wega mitaq suena pokútaq íópeqté irobina tuwara mi ke moke tabikue pukuwe.

<sup>30</sup> Mina unserah íné wehukení úku aninká tuinaona tanáhráq wehukega táchutahuréra seyene arambehri miraéra ahhwiminirataq tuinauge.

<sup>31</sup> Mi tanáhráq sinaraq máhpeq míéhrataq itene ménsámhensá meyanéheéq nahupeq kibekiyeho. Mina inserah sotápéq míéhrataq itene nahtapeq kouwekiyeho.

<sup>32</sup> Manikánka Árotane ahre kamah awunsabe ahreraq matíáhro. *(Stat 19.26)*

<sup>33</sup> Wehukenínká peh wewensabé arutaboiréna peh wewe awahbeh iwíáh mira aruqaruri anímé oga mérapeq íre awaq miahráhire. We awahbeh iwíáh suqsuri anímé oga mérapeq awaq miánkéhe úwe.

<sup>34</sup> Sísaga mó mahraréna, Íne wehukení úku aninká túónaraq mi tanáhráq inokáhpeq téhraníté morá máhríqtáq sugéhrataq Manikánka mó aní merena mó aní mitaq auwanae.

<sup>35</sup> Téhrinítégá aboyanirataq mó iní merena mó iní mitaq auwanae.

<sup>36</sup> [Téhtaré wéhgá sotapéq arampehrirataq mó weh merena mó weh mitaq auwanae úwe.]

<sup>37</sup> Úwara we kéró kega wene ehweh irera Sísansabé, Itene Wahnahno, eheqpo uwana wega sensabé, Pusa káné anonka kéhrabeq kúqnumarinká ínsínsiowe úwe.

## 18

### *Sísaga pagu paguni kewéínsábé pabeqme ehwéhne.*

<sup>1</sup> Sísaga we kéró kega púreré sansansábé anetaníbo íwíahéq túbáh agiyehboq peh ahriahri púrerigeheéna mah pabéqmé éhwéhmé teriuwe.

<sup>2</sup> Mó kené koti ehwéh iwíahue irena sene koti kawerarítéh wéhgá wenawahpeq ména Manikánsabe íre áhreia mó keyábé íre iwíah íwíahuraire.

<sup>3</sup> Mi ke suwahpeq kéweiní ména mi wehbá séyééna wensabé, Níwíoqneh aní túbáh aginkehboq ehwéh ato teawa teawanuraire.

<sup>4</sup> Téh séyéuraitaq mi weh áninká wene ehwéh íre irena ahqáho atáráire. Anehemé wega mó iwíahéna, Ínéwé Manikánsabe íre áhreia wehukeyabé íre iwíah íwíahuge.

<sup>5</sup> Peh mi inínká ínéba séyééna pagu pagu aintéhnsábé wene ehwéh sehginíe. Íre sehgiónaraq wega mó séyééna pagu pagu aintahnaraq nuwahqsoreqninae uraire úwe.

<sup>6</sup> Sísaga mó mahrrárena, Mi wehgá íre kaweqlaq ména mi iwíahuraime íráhro.

<sup>7</sup> Wega miraurainsábé Maniká tagariáh kégá ahriahri púreq aruqarurirataq Manikánka íre séhréh aritanabo? Wega íre wahto tanáhráq peh túbáh aginabo? Írakaumo.

<sup>8</sup> Teiníboq írátiáhro. Wega se apubúue séhréh aritanae. Íné wehukení úku anínká mah marákóípéq kiwekona tanahráq mah kegá ínénabe aiq pútare aintaneherabomo úwe.

### *Téhq anítégá púreruya sansátáréyábé pabeqme ehwéhne.*

<sup>9</sup> Mó kegá iwíahéra, Itebataq kaweqlaq ke míone éq, Mó keyábé iuwahriehre uwana Sísaga mah pabéqmé éhwéh mi ke teriuwe.

<sup>10</sup> Péhrasi anínká púrerinieéna Manikánsabe iwíah íwíah atáh náhtápéq kirairana táhkísi moné merai anínká moq púrerinieéna mitaq kiraire.

<sup>11</sup> Péhrasi anínká iriwe ména wewensabé iwíah íwíahéra mahrrárena, Manikáno, íné mó ke tahnsa ání íre míónsábé arensabé iwíah íwíah atóge. Ínéga aebówé, ahhbabáqmé, mó kené ahre abariéwé íre mirau ání múge. Íné íre mahna táhkísi moné meyéh ání tahnsa ání múge.

<sup>12</sup> Ínéga mó wikíráq mó wikíráue arensabé iwíahéra téhtaré wéhékáh táhutahuq awehriuge. Moke meyó náneqme saraqme abapete itaréitaré matawéna mó morá are náwa náwanuge uraire.

<sup>13</sup> Péhrasi anínká mahna tahnsa púrerurairana táhkísi moné meyéh ánínká móbeq iriwe ména wene ahhbabáqsabe ayehitarairana ibiséna aura marakóiperurawéna púreréna, Manikáno, íné ahhbabáq ani míónsábé arutaboirainte kawerainto uraire.

<sup>14</sup> Sísaga mó mahrrárena, Teiníboq írátiáhro. Manikánka táhkísi moné merai aní kaweratáráirana wene nahtapeq pokéna kaweqlaq mílarairana Manikánka mó aní peh áwé tagarairana wene ahhbabáqkakaq mewena pokuraire. Aneqsabébo? Wewensabé iwíah íwíahi anímé Manikánka mi anínsábé, Pehgáriq aní míahno atankéhe. Íné pehgáriq aní múge íwíahí anímé Manikánka mi anínsábé, Anotah aní míahno atankéhe úwe.

### *Sísaga, Káriq anímárínká ínéba sewíagehboq ahqáho arítého ú ehwéhne.*

*(Mátíyu 19.13-15; Mákha 10.13-16)*

<sup>15</sup> Sísaga káriq anímári táhtorankeheéra mó kegá meriqmera móritówara we kéró kega móritó keyabé suwehgu aritera ahqáho arítówe.

<sup>16</sup> Ahqáho arítówana Sísaga mi karíq ánímárińsábé, Máhoro éna we kéró keyabé, Mah karíq ánímári ínéba sewíagehboq ahqáho aritého. Segá mira onserahno kegá Manikánka wahnah wahnahnirabeq awaq miagéhe.

<sup>17</sup> Teiníboq írátiáhro. Mah karíq ánímárínká Manikánka wahnah wahnahnirabeqsabé sirutaboirowe. Peh morá sega mira onserahno kegá mibeq kioráhowe úwe.

*Áhnte mensáméhnsánkákáq ánínsábé árahue oga mérapeq awaq mianabo i ehwéhne.  
(Mátíyu 19.16-30; Mákha 10.17-31)*

<sup>18</sup> Wahnah anínká Sísansabé, Íwáhnoraníno, arewe kaweq aní míahne. Oga mérapeq awaq mianíboq anerininkono úwana

<sup>19</sup> Sísaga wensabé, Aneqsabé kaweq aníne aintahno? Maniká webataq kaweqtaq mía míaire.

<sup>20</sup> Sehgíoro ú ehwehmé aiq ahtebáhne. Mi ehwéhniká mahraréna, Mó aníné ahre weh abariiyeho. Mó aní subiq súého. Aebóiyeho. Mó keyábé péhe éhwéh aritého. Iteinoibone ehweh ireq se séhréh arítáhro ire úwe. (*Kisim Bek 20.12-16; Lo 5.16-20*)

<sup>21</sup> Úwana mi anínká Sísansabé, Káriq aní míarautaqkákáq amahnágáákáq mi ehwéh sehgiúge úwana

<sup>22</sup> Sísaga mi ehwéh irena wensabé, Peh morá náneq íre miraóne. Moke matiahna mensáméhnsá pailqmaqme móne mewe tabonah ke nário. Mirainaraqmé íópeq kaweq naneqmarí matiankehe. Tabonah ke moke nárie íné séniro úwana

<sup>23</sup> mi anínká irena áhnte mensáméhnsá ko púana wene arupipeq umeh agúwe.

<sup>24</sup> Sísaga mi weh tagéna mahraréna, Áhnte mensáméhnsá matiáh kégá Manikánka wahnah wahnahnirabeq kieyabe anotah pagégéue mirao naneq mire.

<sup>25</sup> Kéhma anotah kane. Mi kanká wai abahrabahpipéq kéagínayabé págegeue mirai naneq mire. Mina inserah áhnte mensáméhnsá matiéh ánínká Manikánka wahnah wahnahnirabeq kinayabé anotah pagégéue mirai naneq mire úwe.

<sup>26</sup> Úwara író kega kasenéra, Minayabe insega oga mérapeq awaq miahráhiro ue kasenuwana

<sup>27</sup> Sísaga sensabé, Wehukega íre miraoraho naneq Manikánka miraorahire úwe.

<sup>28</sup> Pítaga wensabé, Iteruwahpeqkakáq moke mationa naneqkakáq sueq kérone úwana

<sup>29</sup> Sísaga sensabé, Teiníboq írátiáhro. Manikánka wahnah wahnahnirabeqte árámbéhrí miraoneheéra sene nah súáhmé amahnágá áhnte mó nahmári awaq miagéhe. Mi árámbéhrí miraoneheéra sene ahreromé, sensibáqmarimé, sensinoibowe, sene animárimé súáhmé

<sup>30</sup> áhnte mó kegá sensuwahrah úkigehe. Mókake oga mérapeq moq awaq miagéhe úwe.

*Náhmbáh 3 tanáhráq Sísaga, Íné pukéna oga úkinauge ú ehwéhne.  
(Mátíyu 20.17-19; Mákha 10.32-34)*

<sup>31</sup> Sísaga moke we kéró ke móbeq sitena sensabé, Íráhro. Manikáne ehweh iraru kegá íné wehukení úku anínsábé naho sehiranuwe. Itega Sarúsarama suwahpeq pokonaraq sega sehiranunserahnue mó kegá miraigehe.

<sup>32</sup> Nánuwahrah Asiú kégá nahsó kebá móintagéhe. Segá niwiréh aintera abehq éhwéh aintera tehqni aintera

<sup>33</sup> nubiq marera nubiq suagéhe. Nubiq suehrana íné pukéna apahtáró wéhékáhtáq oga úkinauge úwara

<sup>34</sup> we kéró kega mi ehwéh íre ahtebowe. Mi ehwéh áwahe kopípéq ko púara sirupipeq íre írówe.

*Sísaga aura pira ání kawerato ehwéhne.  
(Mátíyu 20.29-34; Mákha 10.46-52)*

<sup>35</sup> Sísaga Séríko suwahpeq wahto kútaq aura pira áninká ahnayehráq tútuue ména ineh inehúwe.

<sup>36</sup> Áhnte kegá sótaikuwana mi anínká irena sensabé, Aneroo úwara

<sup>37</sup> sega wensabé, Néhsara suwahpeqte ání Sísa sotaikire teawúwe.

<sup>38</sup> Teawúwana wega anotahtaq mahraréna, Sísao, Tébítine anahwao, ínénsabe arutaboirainto úwara

<sup>39</sup> ebeq ku kegá wensabé awehgu atera, Ehiya míahno atówana wega íre túbáh agia peh anotahtaq mó mahraréna, Tébítine anahwao, ínénsabe arutaboirainto úwe.

<sup>40</sup> Arutaboirainto úwana Sísaga mitaq kowéna, Niyáhrabi aní meqme sero úwara meqméra suwe. Suwana Sísaga wensabé,

<sup>41</sup> Anerataníkono úwana wega, Néne Wahnahno, íné tagéyabe nuwahbehre úwana

<sup>42</sup> Sísaga wensabé, Arega aiq pútare aintahnaga aiq kaweratóge. Tagáhno úwe.

<sup>43</sup> Tagáhno úwana apubúue tagéna Sísa kérena Manikánsabe iwíáh iwíáh atowara mina tago kegá moq iwíáh iwíáh atówe.

## 19

### *Sísaga tákisi moné meyo aníné nahtapeq pokú ehwehne.*

<sup>1</sup> Sísaga Séríko suwahpeq kure kótaikinaúwana

<sup>2</sup> tákisi moné meyó kene wahnah wenawíq Sákíási míowe. We áhnte monéákáq ánínéna,

<sup>3</sup> Sísa taganie iwíáhéra áhnte kegá kígíunsabe we egahq aní púana Sísa íre tagahrahúwe.

<sup>4</sup> Minayabe wega pehbeheráh wehuke kótaikue Sísa taganieéna we sína ahtápéqté áwánkátápéq kire kirútuue míowe.

<sup>5</sup> Tútuue míowana Sísaga wahtotaq séna aura pankeqme Sákíási tagéna wensabé, Sákíásio, arene nahtapeq kowíaniboq are apubúue maraipéq tueagúno úwe.

<sup>6</sup> Tueagúno úwana Sákíásiga apubúue tueague aru eyoyóéna Sísa mehwéh atena wene nahtapeq móatowe.

<sup>7</sup> Mina tago ke ómiga abiahnsanéra áhnte ahbabáq áníné nahtapeq pokinsabé íre kawerire uwe.

<sup>8</sup> Sákíásiga wene nahtapeq iriwe ména Sísansabé, Néne Wahnahno, néne ménsámehnsá saraqme tabonah ke ákáhtaq náriníe. Menahmé ínéga mó keyábé péhe éhwéh teriena sene móne pehipi merauge. Amahnága merau moné itaréitaréráq meraunserahnue mi ke náriníe úwe.

<sup>9</sup> Úwana míó kega írótaq Sísaga wensabé, Arene ahbabáq sansa suahnayabé iboramé ite mi karíónání kaweraitóge. Arewe amahnága aiq pútaq Ébáráhma kahnáh ání míahne.

<sup>10</sup> Íné wehukení úku anínká ahbabáq ke kabarue kawerinieéna tumióge úwe.

### *Sítáriarai monéyábé pabeqme ehwéhne.*

(Mátíyu 25.14-30)

<sup>11</sup> Segá ahtapeq kure Sarúsarama suwahpeq wahto kutaq wereq nogú kega iwíáhéra, Manikánka wahnah wahnahnirabeq ábóraq aginaire unsabe Sísaga mah pabéqmé éhwéh teriuwe.

<sup>12</sup> Teriena, Anotah wehgá íre wahto wáhnaupéqté kéné marakóraq pokinauraire. Mi wehgá iwíáhéra, Pokinaurabeqte wáhnáh áninká ínénsabe, Arenawahpeq pokue arenawahrah kowahnahnúno teninkeheéna pokinauge iwíáhuraire.

<sup>13</sup> Pokinauraitaq wene arambehri ke nayáhnkú ké síáhrabéna 20 Kína 20 Kína ue sítáriawéna sensabé, Íné pokona tanáhráq mah moné matawéq paiqme arambehriewehrana kouwekono éna pokuraire.

<sup>14</sup> Pokurairara wenawahrahga wensabé íre suwahbéna wáhnáh áninsábé, Areba ki anínká itetaq wahnahnéyabe iuwahriehre koreawéro éra mó ke we anehe eqmaq súatówe.

<sup>15</sup> Pokurai wehgá mi wahnáh árámbéhrí mewena wenawahpeq kouwekéna wene arambehri ke móne átáriaro keyábé síahraburaire. Síahrabéna sensabé, Íátáu moné árámbéhrí árahuroo kasenuraira.

<sup>16</sup> Árahuroo kasenurairana ebeq surai anínká wensabé, Anotah weh wóne. Arega níátóna moné mi 20 Kínáráté áhnte paiqmaqme amahnága arene móne íregáritaq Kiná 200 Kína úkire urairana

<sup>17</sup> wahnah korégá wensabé, Kaweróne. Are kaweq arámbéhríona aní móne. Pehgáriq arámbéhrí tábúsoq marahna puah mókakewe arega nayáhnkú kékhná suwahpeq wahnah-ninkehe uraire.

<sup>18</sup> Mó arámbéhrí áninká séna wensabé, Anotah weh wóne. Arega níátóna moné mi 20 Kínáráté paiqmaqme amahnága arene móne 100 Kína úkire urairana

<sup>19</sup> wahnah korégá wensabé, Arewa moberíah kékhná suwahpeq wahnah-ninkehe uraire.

<sup>20</sup> Urairana mó arámbéhrí áninká séna wensabé, Anotah weh wóne. Arega níátóna moné meyo. Ínéga ambantaráté úbíqme kopéq matauge.

<sup>21</sup> Íre arega arambehrióna naneq mewe meweóne. Íre arega uqmatona naneq naruq naruróne. Are págege wahnáh ání míahnayabé áhreéna arene móne kopéqmarena pehipi áwúge uraire.

<sup>22</sup> Urairana wahnah korégá wensabé, Arewa íre kaweq arámbéhríona aní móne. Arega iraréna ehwéhnsábé ehweh atanauge. Íre ínéga arambehriú naneq mewe meweuge éna wino. Íre ínéga uqmatau naneq naruq naruruge éna wino. Íné págege wahnáh ání mío púa.

<sup>23</sup> aneqsabé néne móne pénkiipéq íre matono? Mirauronaraq tahirímé amahnága áwátáu monéákáq pénkiipéqté móneákáq meyó irino éna

<sup>24</sup> mitaq míaro keyábé, Túbáh agurai aníné móne mewe q áhnte kiná 200 kína matiéh ání náwéro uraire.

<sup>25</sup> Urairara sega wensabé, We amahnága 200 Kína matiéh mino urowana

<sup>26</sup> wahnah korégá sensabé, Teiníboq írátiáhro. Áhnte matiéh ání mónekakáq awiníe. Pehgáriq matiéh ání mina meyahnana we tabonah ani míankehe uraire.

<sup>27</sup> Wahnah korégá mó mahraréna, Néne naruowe ínénabe itene wahnah aní méyabe iuwahriehre uro kewé meriqme sure ínéga tagahnaq subiq súáhro uraire úwe.

### *Sísaga Sarúsarama suwahpeq kú ehwehne.*

*(Mátíyu 21.1-11; Mákha 11.1-11; Sóni 12.12-19)*

<sup>28</sup> Sísaga mah pabéqmé éhwéh teriena ahtapeq ebeq kure Sarúsarama suwahpeq pokinaúwe.

<sup>29</sup> Wega Páítápási suwahpeq Pétáni suwahpeq wahtotaq kútaq Óríwi sawéhrápéq kiuwe. Sísaga we kéróya aníté eqmaq suanaútaq

<sup>30</sup> sensabé, Isebeq wahtotaq kehiná suwahpeq pokotao. Mitaq kirataq iyaráh ká tónki aráhq wehuke íre áhkókóue nogí ká tagéta pugeqme meqme setao.

<sup>31</sup> Pugeréhrataq mó anínká itensabé, Aneqsabé pugerehyo ínaraq wensabé, Itene Wahnah áhkókóue kinkehééta meroye teawétao éna eqmaq suowe.

<sup>32</sup> Eqmaq suowara pokue Sísaga teriunserah iyaro tonkí áráhq tagéra pugeróye.

<sup>33</sup> Pugeróyataq mi kané sibowáréhga, Aneqsabé pugerehyo uwara

<sup>34</sup> sega sensabé, Itene Wahnah áhkókóue kinkehééta meroye uyana sega, Meqme pokotao uwara

<sup>35</sup> mi ka meqme Sísaba seweqméra sene korósi mi kané abobiahtaq uwiq máróyana Sísaga mi tonkíné ahbobiahtaq kierútu agúwe.

<sup>36</sup> Tóniga Sísa áhkukóue pokútaq wereq ku kegá Sísansabé iwíáh iwíáh ató púara sene korósi ahtapeq uwiqme awahrirarówe.

<sup>37</sup> Mi ah Óríwi sawéhrápéqté tutaq Sarúsarama su wahpeqsabé wahtotaq kútaq áhnte we kéró kega Sísaga págegeue miraú otáq sánsámárínsábé iwíáhue tagéra Manikánsabe iwíáh iwíáh atówe.

<sup>38</sup> Segá anotahtaq mahraréra,  
Itene Wahnah áwírue si aní anotah anínsábé iwíáh iwíáh atone. Manikánka iru pehwehrue aitena we íópeq míéhraq wensabé iwíáh iwíáh atone uwe. (*Buk Song 118.26*)

<sup>39</sup> Uwara Péhrasi kegá Sísansabé, Are kéráh kégá túbáh agiyehboq ehweh arito uwana

<sup>40</sup> Sísaga sensabé, Teiníboq írátiáhro. Segá túbáh agotaq tahirímé ebahmarínká anotahtaq iwíáh iwíáh aintáh irino úwe.

### *Sísaga Sarúsarama su wahpeqte kékabé ibisó ehwehne.*

<sup>41</sup> Sísaga Sarúsarama su wahpeq wahtotaq kútaq mitaq tagéna mibeqté kékabé arutaboíréna ibisówe.

<sup>42</sup> Ibiséna mahraréna, Ibora itewe Manikánka insahwé aitéh sánsá ahtebahtaq tahirímé nirupipeq eyoyó irino. Amahnágawé itega íre tagariahrahowe.

<sup>43</sup> Mókakewe itene naruoga iteba séra íte abugéqnáhnue moke itene ahmari paitáwéra wahnahnigehe.

<sup>44</sup> Segá itene nahmarí sokoruera itereq itene animárínseq subipáhraruagéhe. Segá moke perehnehnia ebáhtáté miraia naneq sokoruagéhe. Manikánka íte kaweraite tanahráq íre ahtebónayabé mókake itene naruoga miraigehe éna arutaboíraritowe.

### *Sísaga Manikánsabe iwíáh iwíáh atáh náhtápéjté paíqnanánu ke máhpeq kaqsuo ehwéhne.*

(Mátíyu 21.12-17; Mákha 11.15-19; Sóni 2.13-22)

<sup>45</sup> Sísaga Manikánsabe iwíáh iwíáh atáh náhtápéjté wíráípqué kibekéna mitaq paíqnanánu ke máhpeq kaqsuena

<sup>46</sup> sensabé, Manikáne ehwehnka mahraréna,  
Néne nahme púreré nahne ue áwíratagéhe ire. (*Aisaia 56.7*)

Itega miraonka mah nahmé aebó kégá mehwatíahnserah nah úkire úwe.

<sup>47</sup> Sísaga mó wehekáh mó wehekáhnue mitaq síwáhnorúwara Manikáne ehweh mibeq mahbeq arítáh kereq Mósísine ehweh síwáhnoro kereq mibeqté wáhnáhmárínseqka Sísa subiq suanéhboq aneq ehwéh atanéhnkono éra só síouwe.

<sup>48</sup> Sísaga síwáhnorútaq áhnte mó kegá wene ehweh ireyabe suwahbó púara we subiq suanehe iwíáhu kegá íre suboráhuwe.

## 20

### *Sísansabé, Insegá miraúno atáráiro u ehwéhne.*

(Mátíyu 21.23-27; Mákha 11.27-33)

<sup>1</sup> Sísaga mó wehekáh Manikánsabe iwíáh iwíáh atáh náhtápéjté wíráípqué síwáhnoréna kaweq ehwéh teriuwara Manikáne ehweh mibeq mahbeq arítáh kereq Mósísine ehweh síwáhnoro kereq mibeqté Asiu kené ábóáwáh wéhreqka weba séra

<sup>2</sup> kasenéra, Arega miraóna naneqme árahinie miraono? Insegá miraúno atáráinsabé miraono? Teio úwe.

<sup>3</sup> Teio uwana Sísaga sensabé, Ínéga moq itensabé kaseninie.

<sup>4</sup> Sóniga wání meri merininkeheéna insegá eqmaq áúwátáiro? Manikánka eqmaq áúwátáiro? Peh wehukega eqmaq áúwátóó? Teníero úwe.

<sup>5</sup> Teníero úwara sega epéq sío síoéra, Anere teawenéhnkono? Manikánka Sóni eqmaq áuwátáire teawénaraqmé wega itensabé, Aneqsabé wene ehwehnsabé íre aiq pútare atáróo inae.

<sup>6</sup> Wehukega Sóni eqmaq áuwátówe teawénaraqmé mahtaq sáhuriáh kégá, Sóniwe Manikáne ehweh irarurai aní míre íwíáho puara ébahnsa tuparuqme iubíyeho éra sío síouwe.

<sup>7</sup> Sío Síoéra Sísansabé, Sóniwe insega eqmaq áuwátáiramo. Ite íre tagarione uwana

<sup>8</sup> Sísaga sensabé, Itega íné íre teniéwe. Minayabe ínéga moq ínénabe, Miraúno aintárái aní íre teiníe úwe.

*Sotáq wahnahnuro ahbábáq kékáyé pabeqme ehwéhne.*

(Mátíyu 21.33-46; Mákha 12.1-12)

<sup>9</sup> Sísaga mi keyábé mah pabéqmé éhwéh mahraréna, Wehga sonsoqme náhníáq sera ayu uqmarena mó keyábé, Néne sotáq wahnahnue náwe soqintewáhro aritena mitaq suena íre wahto wáhnaupéqté ké suwahpeq kowéna íre wahto tanáhráq mitaq míaraire.

<sup>10</sup> Náhníáq sera irái tanáhráq wene arambehri anínsábé, Ákáhtaq koweyo éna sotáq wahnahnuro kebá eqmatairara sotáq wahnahnuro kegá náhníáq sera íre náwasa subiq-marera kaqsutowe.

<sup>11</sup> Kaqsutowana so aboga mó arámbéhrí ání eqmatairara sega we moq subiqmarera íre kaweç sansá atera sera íre náwasa kaqsutowe.

<sup>12</sup> Kaqsutowana so aboga mó aní eqmatairara sega we anotahtaq subiqmarera so wírá máhpeq tuparutowana

<sup>13</sup> so aboga wewe náhenéna, Anerininkono éna niruní nénáhní eqmaraníe. Nénahni púara sega wensabé áhtenéra wene ehweh iragéhe éna wenahni anehe eqmataire.

<sup>14</sup> Eqmatairara we wahto kuraitaq sotáq wahnahnuro kegá we tagéra seye náhenéra, So abone ahninkáwá aiq sire. Mah so awaq mianéhboq subiq suanéhe íwíáhéra

<sup>15</sup> táhtoqme máhpeq móatera subiq sutowe.

Sega mirauronsabé so aboga mi ke anere aritankéhbo? Teiníboq írátiáhro.

<sup>16</sup> So aboga wene sotápéq séna wahnahno ke subiq suanawire. Wene sotáq mó kegá kawerue wahnahnigeheéna eqsitankéhe úwe.

Eqsitankéhe úwara sega wene ehweh irera mahraréra, Éhneh. Sotáq wahnahnuro kegá miraurome íre kawerurowe uwe.

<sup>17</sup> Uwana Sísaga se ebitáwéna sensabé, Manikáne ehwehnka aiq mahraréna, Nah piáh kegá suto wahqká moke nahwiahnsanse kiotaikire ire.\* (Buk Song 118.22) Mah ehwéh áwahewé aiq ahtebaho kasenúwe.

<sup>18</sup> Kasenúwana mó mahraréna, Mi wahqtáq inahnsubíra kené siyahnsamé piteginae. Mi wahqká megue wehukení subinaraq wene ayahnsamé abiro abiro aginawire úwe.

<sup>19</sup> Úwara Mósí sine ehweh síwáhnoro kereq Manikáne ehweh mibeq mahbeq arítáh kéreqka seye náhenéra, Sísaga mi pabéqmé éhwéhnu itepi parobehre íwíáhuwe. Mira íwíáhu puara sío síoéra, We táhtoqme karábúsiipéq móatanéhe éra peh mitaq sáhurió keyabé áhreu puara íre miraorahuwe.

*Sega Sísansabé, Táhkísi moné inse awenéhnkono kasenu ehwéhne.*

(Mátíyu 22.15-22; Mákha 12.13-17)

<sup>20</sup> Mósí sine ehweh síwáhnoro kereq Manikáne ehweh mibeq mahbeq arítáh kéreqka Sísa táhtore tanáhráqsábé áwénunowara mó keyábé, Sísaba pokue péhe éhwéh teaweq, Arene ehweh ireyabe iuwahbehre oro. Wega ahbabáq ehweh irarinkehboq págegeue kasenéq áhwárawe tagahro. Ahbabáq ehwehnínaraq táhtoqme anotah wahnáhpá móatanéhe éra péheno ke eqmaq súowe.

\* **20:17:** Mátíyu 21.42 aigárápéqté éhwéh tagáhno.

<sup>21</sup> Eqmaq súowara kure Sísansabé, Íwáhnoraníno, ite tagarionawe arega iraréna ehwéhmé tábúsoqme ehwéhnóne. Arega anotah kereq pehgáriq kereqsabé peh monseráh íwiahé peh Manikáne sansá ahriahri tábúsoqme pahsuqme íwáhnoróne.

<sup>22</sup> Minayabe teio. Aneq iwíáhono? Itega Aroma kené wahnah aní Sísáhri tákisí moné awenéhnkono? Árahonehnkono uwe.

<sup>23</sup> Uwana Sísaga sega epéráhpérui iwíáh tagéna sensabé,

<sup>24</sup> Ebah moné taganibooq ábóraq maro éna, Mah monéráq píkisahakáq áwíqkakaq insene kehro úwara

<sup>25</sup> sega wensabé, Aroma kené wahnah anímé Sísáhrinnee uwe. Uwana Sísaga sensabé, Aroma kené wahnahne naneq wewe náwero. Manikáne naneq wewe Maniká náwero úwe.

<sup>26</sup> Úwara Sísane ehwehnsábé áhtenéra wehuke míópi Sísaga áhwára áhwára ehwéh íre irarúnsabe túbáh agéra ehiya míówe.

*Sísaga pusa ké iriwe organúq sitankéhe ú ehwehne.*

(Mátíyu 22.23-33; Mákha 12.18-27)

<sup>27</sup> Sáyúsi kewé pusa ké íre iriwe organúq sitankéhe íwíáhu kee. Táhmaro mi kegá Sísaba séra wensabé,

<sup>28</sup> Íwáhnoraníno, Mósísine sehiranka maharéna,

Íre aninkákáq wéh pukínaraq wenábáqka kéweiní meyankéhe. Mi inínká maqmarahna animári wenawahne animári míageheéna meyankéhe ire. (Lo 25.5)

<sup>29</sup> Minayabe abapete téhraníté se ábárahnhahnah míarowe. Siwhwágá ahre mewena íre aninkákáq uraitaq pukuraire.

<sup>30</sup> Pukurairana náhmbáh 2 abakáwágá awahwáné kéweiní mewena íre aninkákáq uraitaq pukurairana

<sup>31</sup> náhmbáh 3 abakáwágá moq monseráhnuraire. Moke mi abáráhnáhnahnka mi iní mótaq mótarue mewera íre aninkákáq urotaq orah animári pukuwana

<sup>32</sup> sinehemé mi iní moq pukuraire.

<sup>33</sup> Moke mi abáráhnáhnahnka mi iní meronsabé iriwe organúq sitahnaraq insene ahre míanabo kasenuwe.

<sup>34</sup> Kasenuwana Sísaga sensabé, Mah marákó márakóípéqté wéhgá ahre meyáhwara ahreronká wehkowe.

<sup>35</sup> Manikánka iriwe organúq sitahna kegá ahre íre meyagéhe. Ahrega íre wehkigehe.

<sup>36</sup> Se íopeqté kégá mía mía onserah puara mó íre pukigehe. Manikánka se iriwe organúq sitahna puara peh wene animári mía míagehe.

<sup>37</sup> Pusa ké iriwe organúq site ehweh Mósísine sehiranka teíre. Uworapeqté káriq awánkánsábé íre tagia peh téhrówana irobinapipéqté éhwéhnká mahraréna,

Íné Ébárahmane Maniká múge. Íné Áhísáhkine Maniká múge. Íné Sékópane Maniká múge úwe. (Kisim Bek 3.6)

<sup>38</sup> Mi ehwéhnká sokigi aiímé Manikámé íre pusa kéné Manikáne. Írakaumo. We peh oga míáh kéné Maniká míre. Wega tagehme ómi oga míáhwe úwara

<sup>39</sup> táhmaro Mósísine ehweh síwáhnoro kegá Sísansabé, Íwáhnoraníno, arega tábúsoqme iraréne éra

<sup>40</sup> áhtenéra mó íre kasenuwe.

*Manikánka omaq ato aní éhweh Sísaga kasenú ehwehne.*

(Mátíyu 22.41-46; Mákha 12.35-37)

<sup>41</sup> Sísaga sensabé kasenéna, Manikánka merirankeheéna omaq ato aní we Tébítine anahwa wíre ewe. Mi ehwéhmé aneqsabé irarewo? Maniká itene Wahnahnká néne Wahnahnsabé, Niyah púpeq tútuue míéhnaraq arene naruo wahnahnarítáriahno ire.

<sup>42</sup> Manikáne Awanka Tébíti iwíáh atowana igonkó pukúípéq sehiranúwana mi ehwéhká mahraréna,  
Maniká itene Wahnahnka néne Wahnahnsabé, Niyah púpeq tútuue míéhnaraq  
<sup>43</sup> arene naruo saiqnariankehe atóge úwe ire. *(Buk Song 110.1)*  
<sup>44</sup> Írátíáhro. Tébítiga mi anínsábé, Néne Wahnahne ato puana we árahue wene anahwa míanabo úwe.

*Péhrasi kerek Mósísine ehweh síwáhnoro kerekka abbabárowe ú ehwehne.*

*(Mátíyu 23.1-36; Mákha 12.38-40; Árúka 11.37-54)*

<sup>45</sup> Ómi míó kega írótaq Sísaga we kéró ke teriena,

<sup>46</sup> Mósísine ehweh síwáhnoro kegá mirao serahniyeho. Mó kegá se tagéra sensíwíq pankerageheéra íre wahto korósí úbíqméra nógówe. Sega máhkétirapéq nogótáq mó kegá se mehwéh ariteyabe suwahbehre. Momiwí nahtápéq pokotaq kaweqtapéq tútuue méyabe suwahbehre. Táhutahurorabeq aboawah wehwári tútuue míáhrabeq méyabe suwahbehre.

<sup>47</sup> Sega kéweinínsóbé péhe éhwéh teriera sene ménsámehnsánkakaq sene nahnkakaq mewe meweowe. Ite kaweqtaq míáh ké wóe igeheéq wehuke míáhtáq íre wahtotaq púreq aruqarurowe. Mirao puana Manikánka ehweh aritahna tanáhráq se anotahtaq kamah arinkéhe úwe.

## 21

*Tabonah inínká Maniká náwu monéyábé éhwéhne.*

*(Mákha 12.41-44)*

<sup>1</sup> Wehukega séra Maniká móne náwúrabeq áhnte monéákáq kegá mitaq móne náwúwana Sísaga tagówe.

<sup>2</sup> Tabonah kewéíninká séna káriq pabúsá móne náwuwana tagéna

<sup>3</sup> mahraréna, Teiníboq írátíáhro. Mi tabónáh kewéíninká náwi móne moke mó kegá náwé móne kiotaikire.

<sup>4</sup> Sega sene pehipi matiáh móne náwéwana mah tabónáh kewéíninká moke wene matiéh móne wé aiq náwíre. Aiq náwi púana amahnága táhutahuq paiqmarahna moné íre kéhre. Minayabe wega náwi móne moke mó kegá náwé móne kiotaikire úwe.

*Sísaga, Manikánsabe iwíáh iwíáh atáh náh íre kaweraginawire ú ehwehne.*

*(Mátíyu 24.1-2; Mákha 13.1-2)*

<sup>5</sup> Táhmaro kegá Manikánsabe iwíáh iwíáh atáh náhtápéq tagéra mahraréra, Mah nahtáqmé áhnte kawéq ébáhmári awahriq naneqmarí kéhre uwana Sísaga minayabe mahraréna,

<sup>6</sup> Itega tagah naneqme mókake paentárara aruaneherawoe. Mi peréhnéhnia ébáhmári miraue moraráq íre kagainae. Peh moke paentárara aruaneherawoe úwe.

*Sísaga anehe tanahráq íre kaweq sunúq sinawire ú ehwehne.*

*(Mátíyu 24.3-14; Mákha 13.3-13)*

<sup>7</sup> Sega Sísansabé, Íwáhnoraníno, arega irarénawe ahkake miraoneherabo? Miraonehera irataq aneq ábóraraginabo? Miraonehera irataq itega ahtebanehboq ebeqme aneq ábóraragínaq taganehnkono kasenuwe.

<sup>8</sup> Kasenuwana Sísaga mahraréna, Mi tanáhráqsábé mó kené péhe éhwéhnsábé aiq pútare arítéhboq auráq matawéq tagariáhro. Mi tanáhráq áhnte kegá mótaq mótarue néníwírue séra péhenéra, Íné Manikánka eqmaq núwéh ání múge éra, Anehe tanahráq aiq wahtonire igehe. Mina tahnsanira ke íre kéríráhro.

<sup>9</sup> Mi tanáhráq mah marákó márákó ebehowe ira ehwéh ireq íre ahreoro. Íre iransáñoro. Téhwe teiú náneq ebeq sínana anehe tanahráq íre apubúue sinae úwe.

<sup>10</sup> Sísaga anehe tanahráqsábé mó mahraréna, Mó kehinánseq mó kehinánseqka ebehoneherawoe. Mó wahnáhné awahrahreq mó wahnáhné awahrahrerue ebehoneherawoe.

<sup>11</sup> Mi tanáhráq anotah maríinae. Mitaq mahtaq ehwehráhnara áhnte ke awahreoneherawoe. Mi tanáhráq íopeqté naneqmarí tagéq anotahtaq áhreoraho naneqmarí tagagehe.

<sup>12</sup> Mi tanáhráq itensabé suwahrieh kegá ite táhtoqme íwíoqnéra momiwí nahtápéq ehweh aitera karábúsiipéq móitagéhe. Itega néne sásá segíónsábé anotah wahnáh kéreq ákáhtaq wahnáh kéreqka ehweh aitageheeéra seba móitagéhe.

<sup>13</sup> Mirairataq íné éhweh terigéhe.

<sup>14</sup> Mi tanáhráq, Aneq ehwéh irarenehnkono ue iwíáh kikiriyeho.

<sup>15</sup> Ínéga kaweq iwíáh aitahnaq ahtebia éhwéh irarirataq itene naruoga mi ehwéhnsábé íre ahqáho aitahráhowe.

<sup>16</sup> Iteinoiboreq iteribáqmárinseq iteruwahrahreq itene iyahnabo anímárínseqka ite wahnah kebá móitehrara sega ite táhmaro iubiq iuagéhe.

<sup>17</sup> Néne sásá sehgió púara ómi kegá itensabé iuwahriehre aitagéhe.

<sup>18</sup> Itene iyahqnopeqte peh morá íyáhrá íre sáúqkinae.

<sup>19</sup> Néne sásá íre susa anehe tanahráqkákáq kawerue sehgórateq ogá mérapeq awaq miagéhe úwe.

*Sísaga Sarúsarama suwahpeq kekigahki aruaneherawoe ú ehwehne.*

(Mátíyu 24.15-21; Mákha 13.14-19)

<sup>20</sup> Sísaga anehe tanahráqsábé mó mahraréna, Ebehira kegá Sarúsarama suwahpeq abugéqnáhnuriehra tagehrataq áhníbórá mi ke aipáhrue subiq suera nahmarí kekigahki aruaneherawoe tagariagehe.

<sup>21</sup> Mi tanáhráq Súria marákórápéq míéhrataq sáwéhrapeq pehbeheráh pokoro. Sarúsarama suwahpeq míéhrataq mitaq sueq móbeq pokoro. Ahpeq nogírataq Sarúsarama suwahpeq kouwekiyeho.

<sup>22</sup> Mi tanáhráqmé anotah kamáh aina tanáhráre. Manikáne ehwehnka kamah ainawire ime aiq pútaraginawire.

<sup>23</sup> Mi tanáhráq kía míéhra ininsónseq inahunahnínkákáq íninsónseqka íre pehbeheráh pokorahi puaq sensabé irutaboiroro. Manikánka mi ke anotahtaq kamah arinkéhe.

<sup>24</sup> Nahnso kegá mó ke pokatate kiraqme subiq suera mó ke meriqmera moke wáhnaupéqté ké suwahpeq móruagéhe. Nahnso kegá Sarúsarama suwahpeq áhnte opéq wahnahnigehe. Nahnso kegá wahnahné tanahráq parabagínaraq sega mitaq mó íre wahnahnigehe.

*Anehe íné wehukení úku anínká tuinauge ú ehwehne.*

(Mátíyu 24.29-31; Mákha 13.24-27)

<sup>25</sup> Sísaga mi tanáhráqsábé mó mahraréna, Mi tanáhráqmé pópoqnahwe, íómé, wehyoqmarímé ótaq sansánagínaq tagagehe. Sóreq wanínká mueq muerue sóyáh agína puara moke wehukene sirupipeq umeh agínara anotahtaq áhreoneherawoe.

<sup>26</sup> Íopeqté naneqmarínká kúrugúruínaraq wehukega, Anerirapómo éra iwíáh kikiréra anotahtaq áhreoneherawoe.

<sup>27</sup> Mi tanáhráq íné íopeqté piribirioyahnkakaq téreh naneqkakáq págegeue írábúyápipeqté tuonara tagagehe.

<sup>28</sup> Teiú naneqmarí tagehrataq iriwe méq íwéh panantágínaq taganeheqmóe. Manikánka tumeirahna tanáhráq aiq wahtonire úwe.

*Sísane ehweh íre parabagia peh ahriahri kagainawire i ehwéhne.*

(Mátíyu 24.32-35; Mákha 13.28-31)

<sup>29</sup> Sísaga mah pabéqmé éhwéh mahraréna, Éntuankakáq mó awánkánkákáqsábé iwíáhue tagéq ahtebahro.

<sup>30</sup> Awanká ánáh aunínaraq itega iwíáhéq, Ópeq áhnibórá sire aiq ahtebóne ewe.

<sup>31</sup> Mina onserah teiú náneq ábóraragínaq tagéq Manikánka wahnah wahnahni tanáhráq aiq wahtotarire igehe.

<sup>32</sup> Teiníboq írátiáhro. Amahnága ogá míáh kégá ómi pehipi íre pukigehe. Ebeqme moke teiú náneq ábóraragína tagéq anehe pukigehe.

<sup>33</sup> Íopeqkákáq mah marákó márákóákáq parabagínana ínéga teiú éhwéhmé íre parabagia peh ahriahri kagainawire úwe.

### *Sísaga, Ahriahri kawerue tagariáhro ú ehwehne.*

<sup>34</sup> Sísaga mi tanáhráqsábé mó mahraréna, Kaweetaq méq kawerurero. Itega abehq wání néq múguwahguiyeho. Ménsámhensánsabe iwíáh kikiriyeho. Mirairataq ite íre iwíáhirataq mi tanáhráq apubúue sinæ. Kahnkapi wah pariéhnserah

<sup>35</sup> mi tanáhráq moke mah marákó márákóípéq míáh ké parianeherawoe.

<sup>36</sup> Ahriahri níwénunéq kawerue auráq matiáhro. Mi tanáhráq sínaraq teiú náneqmarínká kamah ainehoéq Manikánsabe, Págege ainte séhréh ainto ue púreroro. Mirairataq íné wehukení úku aníné niuranabiahtapeq seiriwe míagehe úwe.

<sup>37</sup> Moke wéhékáh Sísaga Manikánsabe iwíáh iwíáh atáh náhtápéq síwáhnoréna tuperkinaútaq mitaq suena Óríwi sawéhrápéq kigaegaeúwe.

<sup>38</sup> Ahbiahipeq áhnte kegá wene ehweh iraneheéra Manikánsabe iwíáh iwíáh atáh náhtápéq séyéuwe.

## 22

### *Súrásaga wahnah keyábé, Ite meiqmena Sísaba móitaníe ú ehwehne.*

(Mátíyu 26.1-5,14-16; Mákha 14.1-2,10-11; Sóni 11.45-53)

<sup>1</sup> Asiu kené sótaikú siahreraq ko tanahráq íre múí párétí no tanahráq wahtonútaq

<sup>2</sup> Manikáne ehweh mibeq mahbeq arítáh kéreq Mósínsine ehweh síwáhnoro kereqka sío síoéra, Sísawe árahue subiq suanéhnkono uwe. Segá mó keyábé áhreu puara ábóraq íre táhtorahráhuwe.

<sup>3</sup> Sísa kéró ke airápété téhraníté míowe. Sebaté ání Súrása Ísíkáriótie. Owainawanka Súrásane arupipeq kowena iwíáh atowana

<sup>4</sup> pokue Manikáne ehweh mibeq mahbeq arítáh kéreq Manikánsabe iwíáh iwíáh atáh náhtápéqté wáhnáh kéreqpa kure sensabé, Sísa owinahwinonaq subóro úwe.

<sup>5</sup> Úwara iwíáh iwíáhéra móne awenéhboq miraúno uwana

<sup>6</sup> Súrásaga kowe aritena wehuke íre míéhrataq se Sísaba mórite tanáhráqsábé iwíáhue kabarúwe.

### *Téhtaré ántígá táchutahuq kawerare ehwehne.*

(Mátíyu 26.17-25; Mákha 14.12-21; Sóni 13.21-30)

<sup>7</sup> Asiu kené sótaikú siahreraq ko tanahráq íre múí párétí né tanahráq sútaq Asiu kegá sipisípiq áráhq subiqme titiru tanahráq súwe.

<sup>8</sup> Mi tanáhráq Sísaga Pítareq Sónireqsabé, Sótaikú tanahráq ahreraq kék táchutáhúq nanéhboq kogaweraráhtao úwara

<sup>9</sup> sega wensabé, Eheq kogawerarayéhnkoyo ue kasenuyana

<sup>10</sup> Sísaga sensabé, Íráhtao. Wahto kehiná suwahpeq pokue obenkisa wání ántéhyánkákáq ánínseq piehgírataq we kéanehenotao. We pokína nahtápéq kieráhtao.

<sup>11</sup> Mibeqté ábóáwáh wéhyábé, Íwáhnori anínká mahraréna, Ínéreq íné séníráh kéreqka sótaikú iahreraq kék táchutáhúq nanéhboq mi paqnáhípéq sokigi aio ire etao.

**12** Wega ménsámehnsá aiq kaweria anotah paqnáhípéq sokigi ínaraq mitaq itene táchutahuq kaweraráhtao éna eqmaq suowe.

**13** Eqmaq suowara pokue Sísaga teriunserah tagéra mitaq sótaikú tanahráq siahrreraq ko táchutáhúq kaweraróye.

*Sísaga párétiakáq sera ano ko kahpúákáq náriu ehwéhne.*

*(Mátíyu 26.26-30; Mákha 14.22-26; 1 Kórína 11.23-25)*

**14** Táchutahuq tanahráq sinaútaq Sísareq we kéró kereqka táchutahuq naneheéra pokue tútuue míowe.

**15** Sísaga sensabé, Níeraníra tanáhráq aiq wahtonire. Ebeqme mina sótaikú tanahráq iahreraq kék táchutáhúq itereq moráráq naneheéna iwíáhíuge.

**16** Teiníboq írátíáhro. Mah táchutáhúq nahnaraq mah marákóípéq mío tánáhráq mó íre nanie. Manikánka wahnah wahnahnirabeq míahnaraq mitaq nanauge úwe.

**17** Wega náhníáq sera anonkakaq káhpú mewena Manikánsabe, Kaweróne atena sensabé, Umah. Moranínká moranínkáue nahro.

**18** Íné mah marákóípéq mío tánáhráq náhníáq sera ano mó íre nanie. Manikánka wahnah wahnahnirabeq míahnaraq mitaq nanie éna

**19** páréti mewena Manikánsabe kaweróne atena keqme náriena sensabé, Mahnawé niwaq mire. [Nehrataqmé ínénabe iahreraq matíáhro éna ite séhréh aitanieéna pukinie úwe.]

**20** Segá mi táchutáhúq parabagútaq Sísaga náhníáq sera ano móónkakáq mewe páréti náriunserahnue siená sensabé, Mahnawé néne korahq mire. Ite séhréh aitanieéna néne korahqka tuinawire úwe.]

**21** Sísaga mó mahraréna, Tagahro. Néne naruo koweriranai ani itereq moráráq míéhre.

**22** Manikánka aiq irarinserah íné wehukení úku aní pukinie. Néne naruo koweriranai anímé anotahtaq kamah awinawire úwe.

**23** Úwara we kéró kega sío síoéra, Insegá mirainabo ue kasenuwe.

*Sísaga we séhréh atéhoro ú ehwéhne.*

*(Mátíyu 20.25-28; Mákha 10.42-45)*

**24** Sísa kéró kega seye ehwehéra, Ínéga ite kiotaiku aní múge éra mó anínká mó anínkáue mira iwíáhéra ehwehuwe.

**25** Ehwehunsabe Sísaga sensabé, Mah marákóípéqté kéráq págege wahnáhno ke míahwe. Págege wahnáhno ke méra sensuwahrahraq wahnahnéra, Ite kawerue séhréh aitáh wahnáhne ewe.

**26** Itega mina tahnsa íre oro. Ite míáhrabeqte aní anotah anímé iteribáq tahnsa míahno. Wahnah aní míanie iwíáhina anímé arambehri aní méq we séhréh atehoro.

**27** Tútuue táchutahuri anímé anotah aníne iwíáhowe. Wene arambehri aní wene táchutahuq kaweraréh anímé pehgáriq aníne iwíáhowe. Íné iteba mío anímé arambehri aní tahn-sanéna séhréh aita aitauge.

**28** Níwíoqnah tanáhráq itega íné íre nuwasa ínéba mía míaconsabé

**29** Nániboga ínénabe wahnahnúno aintéhserah ínéga itensabé moq wahnahnoro aítóge.

**30** Ínéga wahnah wahnahnarabeq itega mitaq tútuue méq táchutahurigehe. Ísara kahnáh airápété téhtaré míahwe. Itega wahnah kené tahberaq tútuue méq mi kahnáhné ehweh iwíáhue tagéq tábúsoq sitagéhe úwe.

*Sísaga Pítansabé, Íné nuwaniewóné ú ehwéhne.*

*(Mátíyu 26.31-35; Mákha 14.27-31; Sóni 13.36-38)*

<sup>31</sup> Sísaga Pítansabé mahraréna, Sáimónio, Sáimónio, írátíahno. Owainawanka iwíáhéra, Ahreronká námúq sibinsibinonserahnue ite abehq náneq tahnsá úkigeheéna íwíoqnanie ire.\*

<sup>32</sup> Amahnága arega ínésabe aiq pútare ainte néne sánsá ambubu atiahne. Néne sánsá súéhneho éna arensabé púreratóge. Arene ahbabáq sue íné séraníe íwíáhinaraqmé arereq morá árámbéhrí ké séhréh arito úwe.

<sup>33</sup> Úwana Pítaga Sísansabé, Néne Wahnahno, are kérónsábé karábúsiipéq móintaneherabomo nubiq suaneherabomo. Anetaníbo. Kéraníe úwe.

<sup>34</sup> Úwana Sísaga wensabé, Teawiníboq írátíahno. Ibora kokórega ehwehnina ínaraq arega íné íre tagaríóge apahtárórág irariniewóne úwe.

### *Sísaga we kéró keyabé, Poka paiqmárahro ú ehwehne.*

<sup>35</sup> Sísaga sensabé, Mónewe, unahmá, súwe meyého ue eqmaq íuwátáutaq ite aneq tabonahuroo kasenúwara sega wensabé, Írakaumo uwana

<sup>36</sup> wega sensabé, Amahnága móneakáq unahnkákáq matiéhrataqmé mina mewe nogóro. Poka íre matiéhrataq sáhkétiraté móne mewe mi monéráté poka paiqmaráhro.

<sup>37</sup> Aneqsabé teiugo? Manikáne ehwehnka aiq mahraréna, Wereq ahbabáq kereq morábí sáharitagéhe ire. *(Aisaia 53.12)*

Teiníboq írátíahro. Segá íné mirairansabé mi ehwéhnká aiq pútaraginawire úwara

<sup>38</sup> we kéró kega wensabé, Itene Wahnahno, tagáhno. Ite téhtaré pökánkákáq míone uwana wega sensabé, Mina aiq awehrare úwe.

### *Sísaga Óríwi sawéhrápéqté mátábúrápéq kobúrerú ehwehne.*

*(Mátíyu 26.36-46; Mákha 14.32-42)*

<sup>39</sup> Sísaga mitaq suena Óríwi sawéhrápéq poku pokuúnserahnue pokúwara we kéró kega kérówe.

<sup>40</sup> Sísaga mitaq kénéa sensabé, Ahbabáq aitehnehboq púreroró éna

<sup>41</sup> se suena wahtotaq móbeq pokéna marakóraq káuqmunue ména púrerúwe.

<sup>42</sup> Púrerue mahraréna, Nániboo, are awahbáhnaraqmé nirupipeq umehi naneq menuahráhóne. Íre íné nu wahbeh sansá peh are awahbáhna sansánúno ue púrerúwe.

<sup>43</sup> [Púrerúwana íópeqté áninká weba tuena págege atowe.

<sup>44</sup> Págege atowana wene arupipeq áhnte umehúwana mónkakákáq págegeue púrerúwe. Págegeue púrerú púana áhnte munsínsínká tuwe. Munsínsínká korahq tahnsánuue marakóipeq tabagúwe.]

<sup>45</sup> Púrerúrabeqte irigue we kéró ke koragówara sirupipeq umehúnsabe sugówe.

<sup>46</sup> Wega sensabé, Aneqsabé sugaho? Owainawanka ahbabáq aitehnehboq iriwe púreroró úwara áhnte wehuké weba suwe.

### *Súrásaga Sísane naruo koweriro ehwéhne.*

*(Mátíyu 26.47-56; Mákha 14.43-50; Sóni 18.3-11)*

<sup>47</sup> Sísaga ehwehnútaq we kéró aní Súrásareq áhnte mó kereq weba suwe. Súrásaga ebeq séna weba wahtotaq sewéna we nánkóqnanaútaq

<sup>48</sup> Sísaga wensabé, Súrásao, íné wehukení úku aní mónuwanieé nánkóqnano úwe.

<sup>49</sup> Su kegá Sísa táhtoraneherauta we kéró kega tagéra wensabé, Itene Wahnahno, pokatate apiaranéhnkono uwe.

<sup>50</sup> Uwana peh morá kéró anínká wene pokatate Manikáne ehweh mibeq mahbeq arítéh áníne arambehri aní apiwe wene púpeqte áhré kiraq auwowe.

<sup>51</sup> Ahre kiraq auwowana Sísaga sensabé, Aiq míre. Túbáh agoro éna kiraq auwo aníne ahre táhtoqme kaweratowe.

\* **22:31:** Káríki ehwéhmé íre námúqtaq pabeqme peh wítiraq pabeqme ehwéh mirarire.

**52** Manikáne ehweh mibeq mahbeq arítáh kéreq Manikánsabe iwíáh íwíáh atáh náhtápéqté wáhnáh kéreq Sarúsarama suwahpeqte ábóawáh wéhreqka táhtoranehera utaq wega sensabé, Aneqsabé aebó ání táhtoráhnserah pokankakaq sahnkákáq íné menirane-heéq seo?

**53** Mó wehekáh mó wehekáhnue Manikánsabe iwíáh íwíáh atáh náhtápéq iteba míarautaq itega íné íre táhtotiarowe. Amahnága iteitene tánáhrárirana sunkíkírirabeqte sánsánká aiq kiotaikire úwe.

*Pítaga, Íné Sísa íre tagarióge ú ehwehne.*

(Mátíyu 26.69-75; Mákha 14.66-72; Sóni 18.25-27)

**54** Segá Sísa táhtoqme meqmera kure se mótaq we mótarue Pítaga sinehe kaqme kure segá Manikáne ehweh mibeq mahbeq arítáh kéné wahnahne nahtapeq kuwe.

**55** Mi matábúráq ira parewe tútuue míowana Pítaga mitaq kowéna tútuue míowe.

**56** Tútuue míowana ira kawerue téhrówana mibeqté árámbéhri áhrárígá Pítá ebitáwéna mahraréna, Mah anímé Sísaba mía míai aníne úwana

**57** Pítaga ahqáho éna wensabé, We íre tagarióge úwe.

**58** Úwana mótaq tahnása mó wehgá Pítá tagéna wensabé, Are moq mi kahnáh ání móne úwana Pítaga, Íné írakaumo úwe.

**59** Anehe mó wehgá págegeue mahraréna, Mah aní Kehrari marákórápéqté ání púana wereq mía míai aní míre úwana

**60** Pítaga wensabé, Arega irarénawe íné íre tagarióge úwe. Pítaga mi ehwéh irarútaq kokórega ehwehnúwana

**61** Sísaga pabeqme Pítá tagówe. Tagówana Sísane ehweh ahreraq matawéna iwíáhúwe. Mi ehwéhnúmé, Kokórega ehwehnina ínaraq arega íné íre tagarióge apahtáróráq irariniewóne únsabe Pítaga iwíáhéna

**62** kérigue móbeq pokéna anotahtaq ibisówe.

*Segá Sísa áwíóqno ehwéhne.*

(Mátíyu 26.67-68; Mákha 14.65)

**63** Sísa auráq matió kega wensabé awiréh atera subiqmarówe.

**64** Segá ambantatató wene aura akariue táhrarera we subiqmarera kasenéra, Insegá subiq marehro? Teio uwe.

**65** Teio éra segá wensabé áhnte íre kaweq ehwéhnatówe.

*Wahnah kegá aboawah weh míórabeq Sísa ehweh ató ehwehne.*

(Mátíyu 26.59-66; Mákha 14.55-64; Sóni 18.19-24)

**66** Ahbiahipeq Asiu kené aboawah wehwárínseq Manikáne ehweh mibeq mahbeq arítáh kéreq Mósísiné ehweh síwáhnoro kereqka momiwíuríwara Sísa meqmera mi kaunsírí kéká móátówe.

**67** Móátówara segá wensabé, Manikánka ite meirena kaweraitankeheéna peh morá ání omaq atowe. Are we mi anípo? Pahsuqme teio uwana Sísaga sensabé, Ínéga teiénaraqmé itega íre aiq pútare aintaneheqmóe.

**68** Ínéga itensabé kasenonaraqmé íre tenieneheqmóe.

**69** Wahtotaq tanáhráq íné wehukení úku anínká Maniká Iteribone ayah púpeq tútuue mía míainauge úwe.

**70** Úwara segá wensabé, Are Manikáne ahninkáwábo kasenuwana wega sensabé, Itega aiq irarewe. Íné werahu mino úwara

**71** seye náhenéra, Iteitega wene ehweh aiq ironayabé mó kegá kasenéyabe anetaníbo uwe.

## 23

*Páhírátiqa wahnahnútaq sega Sísansabé ehweh ató ehwehne.*

(Mátíyu 27.1-2,11-14; Mákha 15.1-5; Sóni 18.28-38)

<sup>1</sup> Minayabe Sísansabé ehweh ató kega we meqmera Páhírátiiba kure

<sup>2</sup> mitaq mó ehwéh atera mahraréra, Iteruwahrah moke íre kaweraruanieéna péhe éhwéh síwáhnorre. Wega, Aroma kené wahnah aní Sísáhri tákhisí moné íre náwéro aitáráire. Wega, Íné Asiu ke kaweraranieéna su aní múge uraire. Íné anotah Wahnáh aní múge uraire ue ehweh atówe.

<sup>3</sup> Ehweh atówana Páhírátiqa Sísansabé, Arewe Asiu kené wahnahpo kasenúwana wega wensabé, Arega aiq iraréne úwana

<sup>4</sup> Páhírátiqa Manikáne ehweh mibeq mahbeq arítáh kéreq momiwíuríó kereqsabé, Mah aníné ahbabáq íre ahteboge úwe.

<sup>5</sup> Uwara sega págegeue mahraréra, Mi anínká síwáhnoréna pagu paguninsabé wene ehweh íráh kégá ahbabárarahi iwíáhowe. Téhwe Kehrari marákórápéq síwáhnoréna moke Súria marákórápéq síwáhnoréna amahnága mahtaq síwáhnorre uwe.

*Sega Érótiqa wahnahnútaq Sísansabé ehweh ató ehwehne.*

<sup>6</sup> Páhírátiqa mi ehwéh irena sensabé, Mah aní Kehrari marákórápéqté ánipo kasenúwara,

<sup>7</sup> Ee. We mibeqté ánine teawúwe. Páhírátiqa mi ehwéh irena, Érótiwe mibeqté wáhnáhne íwíáhéna mi tanáhráq we moq Sarúsarama suwahpeq míonsabe Sísareq we ehweh ató kereq Érótiiba eqmaq suowe.

<sup>8</sup> Érótiqa Sísa éhwéh mó tanáhráq mó tanáhráruue irena, Wega ótaq sansá miraína tagéyabe níre íwíáhéna íre wahto tanáhráq Sísa tagéyabe awahbéna sega Sísa meqmera sutaq wene arupipeq anotahtaq eyoyóúwe.

<sup>9</sup> Wega Sísa áhntetaq kasenúwana íre ehwehnia peh ehiya míowe.

<sup>10</sup> Manikáne ehweh mibeq mahbeq arítáh kéreq Mósísine ehweh síwáhnoro kereqka mitaq iriwe méra Sísansabé págegeue ehweh atówe.

<sup>11</sup> Érótireq wene sóntia kereqka Sísansabé awiréh atera abehq éhwéh atówe. Segá kaweq karósí Sísa suki atera eqmarówara Sísa meqmera Páhírátiiba kouwekuwe.

<sup>12</sup> Nahomé Érótireq Páhírátireqka seye abiahnsa aruqaruruye. Anehémé mi wehékáh insahwé ue míoye.

*Páhírátiqa, Sísa awankátaq táhparáhro ú ehwehne.*

(Mátíyu 27.15-26; Mákha 15.6-15; Sóni 18.38-19.16)

<sup>13</sup> Páhírátiqa Manikáne ehweh mibeq mahbeq arítáh kéreq mibeqté aboawah wehwárínseq mío kereqsabé, Íráhro éna

<sup>14</sup> sensabé, Ínéba méátah áninsábé ehweh ateq mahraréq, Wega péhe éhwéh síwáhnorre ewe. Itega irare atáh éhwéhnsábé ite míáhtáq kasenéna we íre ahbabáq anine íwíáhugé.

<sup>15</sup> Érótiqa moq wene ahbabáqsabe kasenue tagéna ahbabáq íre kékre íwíáhire. Mah anímé itega we subiq suahráhuna ahbabáq íre kékre.

<sup>16</sup> Minayabe áréti sahtáté subóro aritená anehe pugeq iníe úwe.

<sup>17</sup> [Asiu kené sótaikú siahrreraq ko tánáhráq Páhírátiqa mó opéq mó opérue karábúsiipéqté peh morá ání pugeq suaq pugeq suarúwe.]

<sup>18</sup> Páhírátiqa Sísa pugeqiné úwara ómi mío kega ehweh kikiréra, Ahqáho. Sísa subiq sue Páréhba pugeqio uwe.

<sup>19</sup> Páréhbareq Aroma kereq ebehutaq wega mó aní subiq suonsabe Aroma kegá we karábúsiipéq móatówe.

**20** Páhírátiga, Sísá pugeq auwanuage íwíahéna míó keyabé, Páréhba íre pugeqiné. Sísá pugeqiné úwara

**21** sega anotah ehwéhnabaéra, Ahqáho. Awankátaq táhpawe subiq suo. Awankátaq táhpawe subiq suo uwana

**22** Páhírátiga sensabé anehe mó kasenéna, Aneqsabébo? We aneq ahbabáriro? We subiq suahráhuna ahbábáq íre kékre. Íre kék púaq áréti sahtáté subóro aritena anehe pugeq iníe úwe.

**23** Úwara sega mi ehwéhnsábé anotahtaq ahqáho atera anotah ehwéhnéra, Awankátaq táhpawe subiq suo uwe. Sene ehwehnka Páhírátine ehweh kiotaikúwe.

**24** Minayabe Páhírátiga sensabé, Itega irarenserah mirainie úwe.

**25** Aroma kereq ebehú anínká mó aní subiq suonsabe sóntía kegá karábúsiipéq móató ani pugeq auwowe. Pugeq auwena Sísá awankátaq táhpawe subiq suo irare kegá sene iwiáh sansa miraigeheéna sóntía kebá móatówe.

*Sísá awankátaq níriraté táhparó ehwehne.*

(Mátíyu 27.32-44; Mákha 15.21-32; Sóni 19.17-27)

**26** Sóntía kegá Sísá meqmera pokuwana ahtapeq piehgíú ani, Sáírini marákórápéqté ání wenawíq Sáímóni, sure Sarúsarama suwahpeq pokinaúwe. Pokinaúwara sega we saiqnatera Sísá táhparéhra awánká we abaq atera, Sísá kéro atówe.

**27** Áhnte kegá sinehe kure mibeqté ínínsónká Sísansabé arutaboiréra ibisowe.

**28** Minayabe Sísaga pabeqme sensabé, Ínénabe íre ibisahro. Itereq itene anímárínseqsabé ibisahro.

**29** Mókake Sarúsarama suwahpeqte ké kamah aríena tanáhráq sega mahraréra, Orahinínsómé, inahunahní íre maqmíah ínínsómé, náh íre nárié ínínsómé, sega iwiáh íwíahigehe irarigehe.

**30** Mi tanáhráq, Mi kegá anotah sawéhwárínkákáq pehgáriq sawéhwárínkákáqsábé, Ite apubúue pukonehboq me mewe ite akariúno igehe. (Hosea 10.8)

**31** Íné o awánká tahnasa míahnara sega íné miraonehera onsabé mókakewe ite ehyatia awánká tahnasa míéhra puara mó kegá aneq miraoneherabo úwe.

**32** Sóntía kegá ahbabáq anité Sísareq subiq suaneheéra meriqmera kuwe.

**33** Segá sáwéh áwíq Ayahqno Tánúnsutapéq kíútaq mitaq Sísá awankátaq níriraté wene ayahnkaratáq subiqmaq aigárátáq subiqmarue táhparera awanká pankeqme marakóipeq pearówe. Ahbabáq anité moq awankátareráq níri pewe táhparéra pankeqme ayehré ayehré pearówe.

**34** Pearówana Sísaga púrerue mahraréra, Nániboo, mah kegá mirao naneq sega íre ahtebahwe. Minayabe mi ahbábáqsábé íre iwiáhúno úwe.

Sóntía kegá, Wene korósi insega meyanabomo éra saraqmianehéra káhsieu saraqme meyówe.

**35** Mitaq momiwíu kegá iriwe awahnkanuwara Asiu kené wahnahmarínká Sísansabé awiréh atera mahraréra, Wega mó ke kawerarítáráire. We wehuke merirena Manikáne arambehri mirainkeheéna omaq atéh ánínínaraqmé wewe moq kawerarahrahire uwe.

**36** Sóntía kegá moq awiréh atera weba séra kítabeh nahniáq sérá ano pankeqme awera, Náhno éra

**37** arewe aiq pútaq Asiu kené Wahnah anínínaraqmé arerene anonka kawerúno uwe.

**38** Kanehraq sehiranuwara wene ayahqno abobórähpeq awankátaq táhparówe. Mi sehiránká mahraréra,

Mah anímé Asiu kené Wahnahne úwe.

**39** Awankátaq táhparó ahbábáq áninká moq Sísansabé awiréh atena, Arewe Manikánka omaq ato anípo? We inaraqmé arere séhréhé ite moq séhréh aito úwe.

**40** Séhréh aito úwana mó ahbabáq áninká ebeq irarú aninsábé ehweh atena, Arewa Manikánsabe íre áhreono? Segá ite awankátaq táhpawe subiq súáhro aitáhwe.

**41** Arereq ínéreqme ahbabáq anité púara iubówe. Mi anímé we íre ahbabáq aninirarawe pehipi subiq súáhwe éna

**42** Sísansabé, Sísao, arega wahnahninagake ínénabe ahreraq matiahno úwe.

**43** Úwana Sísaga wensabé, Teawiníboq írátíahno. Iboramé Manikáne kaweq matábúrápéq ínéreq míánkehe úwe.

### *Sísa pukú ehwehne.*

(Mátíyu 27.45-56; Mákha 15.33-41; Sóni 19.28-30)

**44** Wéhékáhnabubu moke mah marákó mårákó sunkíkíragúwana ío tunsorerutaqkakáq peh sunkíkíratiowana

**45** pópoqnah mi tanáhráq íre téhrówe. Manikánsabe iwíah iwíah atáh náhtápéqté páráhnikéq tahnsa ónsá senahpeqté subame tunse téhtaré úkúwe.

**46** Sísaga anotahtaq mahraréna, Nániboo, néniwa arene ayahpi máróge éna putiowe.

**47** Putiowana sóntia kené kíápéténiga tagéna Manikánsabe iwíah iwíah atena mahraréna, Mah anímé íre ahbabária peh kaweqtaq míeh ánine úwe.

**48** Úwara mitaq taganeheéra awahnkanu kegá we putio tagéra sene sirupipeq umeh agúwara mitaq suera sene nahtapeq abae aguwe.

**49** Moke Sísane iyahnaboreq Kehrari marákórápéqté we kéró ininsónseqka moberue iriwe méra moke minawari tagowe.

### *Sísane anonka maisé onápípéq maisaró ehwehne.*

(Mátíyu 27.57-61; Mákha 15.42-47; Sóni 19.38-42)

**50** Súria marákórápéq Árimátéa suwahpeqte wéh wenawíq Sósépa míowe. We aboawah wehéna kaweqtaq mía míauwe.

**51** Mó abóawáh wéhwárínká, Sísa subiq suo atótaq wega íre kowe aritowe. Manikánka wahnah wahnahni tanáhráq áwénunue taga tagauwe.

**52** Wega Páhíratiba kure wensabé, Sísane anonka mewena mómaisaraníkono úwana kowe atowana

**53** Sóséparehga Sísane anonka kiwewe marakóraq márumarera íre wahto taberábe ambántáípéq úbíqme mewera ubusa onápípéq mómaisarówe. Mitaq mó aní íre maisia peh o oná kowe.

**54** Táhutahuq kaweré tanáhráq pehnkinaútaq Asiu kené ahrena ahrena wehekáh sinaútaq maisarówe.

**55** Kehrari marákórápéqté Sísareq su inínsónká Sósépareh kérirera mi oná tagéra Sísa mitaq maisaró tagowe.

**56** Tagéra mitaq suera se káúrabeq kure kaweq kunkúni naneqkakáq wériakáq kawerarówe. Mósíne ehwehnka irarúnserah sega ahrena ahrena wehekáh túbáh aguwe.

## 24

(Mátíyu 28.1-10; Mákha 16.1-8; Sóni 20.1-10)

**1** Ahrena ahrena wehekáh parabagúwara ahbiahipeq ío kiembogútaq mi inínsónká kaweq kunkúni naneq mewera Sísa maisarórabeq pokuwe.

**2** Wahtotaq kutaq óna méhpeh paiqmáró ebáh móbeq kowara tagéra

**3** ónapipéq kibekue tagowana sene Wahnah Sísane anonka íre kowara tagowe.

**4** Tagéra sirupipeq iwíah kikiruwara anotah tehró ambántánkákáq ánité ábóraragéra mitaq iriwe míóyara tagowe.

**5** Tagéra mi inínsónká anotah ahrééra marakóipeq káuqmunuriówara ábóraraguya anítégá sensabé, Pusa aní matorabeqme aneqsabé oga míeh áninsábé kabaroo?

<sup>6</sup> We irigi puana mahtaq íre míéhre. We Kehrari marákórápéq míaraitaq teiátái ehwéh iwíáhue tagahro.

<sup>7</sup> Wega mitaq ména mahraréna, Segá íné wehukení úku aní ahbabáq keba móintehrara awankátaq táhpawé nubiq suehrana apahtáróráq iriwe organúq intankéhe uraire uye.

<sup>8</sup> Uyara mi inínsónká wene ehwéh siahrreraq matawéra

<sup>9</sup> maisarórabeqte kouwekue airápété morá we kéró kereq mó kereqsabé moke korériúwe.

<sup>10</sup> Mi inínsómé, apahq ínító síwíqmé Sóánawe, Mágára suwahpeqte íní wenáwíq Máhríawe, mó Máhría we Sémísine anowae. Sereq mó inínsónseqka mi ehwéh eqmaro ke teríúwara

<sup>11</sup> sega iwíáhéra, Mi inínsónká irare ehwéhmé peh múgu wahgu ehwéhne éra íre aiq pútare arítówe.

<sup>12</sup> [Pítaga mi ehwéh irena pehbeheráh maisarórabeq pokue káuq munue mitaq tagówana peh maisaró ambántámári mitaq kowana tagéna kaurabeq kouwekue wene arupipeq iwíáh kikirue tagówe.]

*Sísa kéróya ánítégá ahtapeq Sísa tagoya ehwéhne.*

*(Máhka 16.12-13)*

<sup>13</sup> Mi inínsónká maisarórabeq pokuro wehekáhmé mó weh anítégá Sarúsarama suwahpeq suera íre wahtotaq 11kírómita Éméása suwahpeq koyehe éra

<sup>14</sup> Sísa pukú ehwehnsábé iwíáhéra iraruye.

<sup>15</sup> Mi anítégá ahtapeq nogera ehwéh iraruyataq Sísa sinehe kure moraráq nogúwe.

<sup>16</sup> Segá we tagéra sirupipeq Sísa wire iwíáh íre orahuye.

<sup>17</sup> Íre orahuyana wega sensabé, Aneq ehwéh mirareyo úwara sega mitaq kowéra sirupipeq umehúnsabe abiah máróye.

<sup>18</sup> Mó morá ání wenáwíq Kíópaga Sísansabé, Mah tanáhráq áhnte kegá Sarúsarama suwahpeq sure míahnah arebataq mirauro naneq íre ahtebahno kasenúwana

<sup>19</sup> Sísa sensabé, Aneq mirauro naneqpo úwe.

Úwara sega wensabé, Sísa Néhsara suwahpeqte ání éhwehne éra we Manikáne ehwéh irarurai ání ména págege sansánéna págegeue íwáhnorurai puaq Manikánseq ite Asiu kereqka págege ání míre atáráúne.

<sup>20</sup> Iteribo iteruwah wehwárínseq Manikáne ehwéh mibeq mahbeq arítáh kereqka subiq súáhro arito urowara awankátaq táhpawé subiq sutowe.

<sup>21</sup> Íre subiq sutotaq itega iwíáhéq, Wega ite Ísara ke kaweraitankéhe iwíáhuraune. Subiq sutotaqté ibora apahsoq kire.

<sup>22</sup> Iteruwahrah inínsónká miraonsabé áhtenéwone. Segá ahbiahipeq we maisatorabeq koragéra,

<sup>23</sup> Wene anonka mitaq íre kéhre ewe. Segá iteba kouweéwótaq mahraréra, Maisatotaq iteyuwanka tagehtaq íopeqté áníté tagóne. Mi anítégá itensabé, We aiq oga míéhre teieye ewe.

<sup>24</sup> Minayabe mó iteruwahrah kegá koragéra mi inínsónká irarenserah tagéra pusa áníné anonka íre tagahwe uye.

<sup>25</sup> Mi anítégá mi ehwéh teawúyana Sísa sensabé, Itewe múgu wahgu iwíáhóye. Manikáne ehwéh iraru kegá teié éhwéhnsábé íre apubúue aiq pútare aritoye.

<sup>26</sup> Manikáne ehwéh iraru kegá mahraréra, Wehuke merirena kaweraritankeheéna Manikánka omaq ato ání ebeq anotah érue pukéna anehemé téhráhnarabeq kinkéhe uwe. Minayabe ite íre ahtebehyo? Íre ahtebehyo éna Manikáne púkuipéqté éhwéh síwáhnorúwe.

<sup>27</sup> We pukú ehwehnsábé Mósísga sehgóro ú ehwehkákáq Manikáne ehwéh iraru kegá sehiranu ehwehkákáq ebeq síwáhnoréna anehe moke mó pukúípéqté éhwéh síwáhnorue teriuwe.

<sup>28</sup> Mi anítégá pokoyeherauya ke suwahpeq wahtotaq kuyataq Sísaga mi aníté suena móbeq pokinaútaq

<sup>29</sup> sega we saiqnatera wensabé, Penkinainsabé itereq kaenéhe. Itereq kaenéhe uyana wega kowe éna nahtapeq kérirowe.

<sup>30</sup> Segá táchutahuronehéera morárág tútuue míowe. Sísaga páréti mewena Manikánsabe kaweróne atena páréti keqme náriuwe.

<sup>31</sup> Náriuwara sega, We Sísa wire íwíáhuyana Sísawe tabanagúwe.

<sup>32</sup> Tabanagúwara seye náhenéra, Itega ahtapeq súnaraq wega Manikáne ehweh teiena íwáhnoritaq itene irupipeq áhnte eyóyóéwéhre uye.

<sup>33</sup> Segá apubúue irigue Sarúsarama suwahpeq kouwekéra airápét morá we kéró kereq momiwíurió kereq tagoyara

<sup>34</sup> sega mi anítéyábé, Itene Wahnah aiq pútaq iriwe organúkire. Organúkirana Sáimóniga aiq tagehre uwé.

<sup>35</sup> Aiq tagehre uwara mi anítégá ahtapeq kutaq irarú ehweh teríuye. Teríéra, Páréti keqme náriutaq itega, Sísa wire úye teríuye.

*Sísaga ábóraragúwara we kéró kega we tago ehwéhne.*

*(Mátíyu 28.16-20; Mákha 16.14-18; Sóni 20.19-23)*

<sup>36</sup> We kéró kega mi ehwéhnsábé ehwehnutaq Sísaga seba ákáhpi seiriwe ména [sensabé, Pehwehribeq míáhro úwara]

<sup>37</sup> sega anotah ahrééra, We wahnsa wíre íwíáhuwana

<sup>38</sup> wega sensabé, Aneqsabé áhreoo? Irupipeqmé aneqsabé iwíáh kikiroo?

<sup>39</sup> Íné wíre ahtebagehboq niyahnkarakákáq nigáránkákáq tagahro. Wahnsawé íre anonkankakákáq ayahnsankakaq ánine.

<sup>40</sup> [Íné wíre ahtebagehboq íné sosanoro éna wene ayahnkarakákáq aigáránkákáq sokigi ariuwe.]

<sup>41</sup> Sokigi ariuwara áhtenéra íwíáh íwíáhéra Sísa oga míonsabe íre aiq pútare atahráhuwana wega sensabé, Táhutahuq mahtaq kehro úwara

<sup>42</sup> sega tira páh áwúwana

<sup>43</sup> mewena sega tagotaq nówé.

*Manikáne Awanka iteba tuinkéhe ú ehwehne.*

<sup>44</sup> Sísaga we kéró keyabé, Mósí sine ehwehnkakákáq Manikáne ehweh iraru kegá sehiranu ehwéhnikakákáq púkuipéqté Igónkónkákáq íné éhwehme aiq pútaraginawire. Menah iteba míaurautaq mina teiátáuge úwe.

<sup>45</sup> Teiátáuge éna Manikáne ehweh kawerue irageheéna ahtebé íwíáh aritena

<sup>46</sup> sensabé, Manikáne ehwehnka mahraréna,

Manikánka wehuke merirena kawerinieéna omaq ato anímé ebeq anotahtaq érue pukínana apahtáróráq iriwe organúq atankéhe íre úwe.

<sup>47</sup> Sísaga mó mahraréna, Wene pükuga mó mahraréna,

Wenáwírue Manikánka kawerarítéh éhwéh ebeq Sarúsarama suwahpeq koreriera anehe mah kehiná kékhná korerigéhe. Mi ehwéh irera sene ahbabáq súah kéké Manikánka kaweraritankéhe íre úwe.

<sup>48</sup> Sísaga mó mahraréna, Mi sehiránká aiq pútaragínaq tagagehe.

<sup>49</sup> Manikánka itensabé, Néniwa eqmaraníe uraire. Ínéga kieqmarahnana iteba tuinkéhe. Mahtaq iteruwahpeq méq áwénunoro. Wega iteba tuena págege aitankéhe úwe.

*Manikánka Sísa iópeq tumero ehwehne.*

*(Mákha 16.19-20; Eqmáro 1.9-12)*

<sup>50</sup> Sísaga we kéró ke meriqmena Sarúsarama suwahpeq suena wahtotaq Pétáni suwahpeq kiuwe. Mitaq kowéna wene ayahnkara pankeqme Manikánsabe, Mah ke kawerarito úwe.

<sup>51</sup> Kawerarito éna se suowana Manikánka we íópeq tumerowe.

<sup>52</sup> [Íópipeq móatowara tago kegá Sísansabé sirehunseraráq méra iwíáh iwíáh atera] sirupipeq anotahtaq eyoyóúwara Sarúsarama suwahpeq kouwekuwe.

<sup>53</sup> Kouwekéra Manikánsabe iwíáh iwíáh atáh náhtápéq kibekéra mitaq Manikánsabe iwíáh iwíáh ata atauwe.

## Sóni Ebeq sáhnsahwe ahtebé ehwehne.

Sóniwe téh pah meyo arámbéhríuwana anehe Sísaga we omaq atowana wega pah mewe arámbéhrí suena Sísa kérōwe. Mátíyureh Máhkareh Árúkarehga sene púku ebeq sehiranuwana anehe Sóniga mah pukú sehiranúwe. Sísaga miraú arámbéhríyábé Sóniga peh ákáhtaq sehiranéna peh Sísaga síwáhnorú ehwéhnsábé áhnte sehiranúwe. Itega mah pukú sáhnsáhírataq Sísaga ite kaweraitankeheéna Maniká Wenaboga we marakóipeq eqmarowe ue ahtebagehe. Sísawe Maniká míéhrabeqte áhne webataq wega ite organúq itahráhi aníne ue ahtebagehe. Mah kehiná kékínánká mah pukú sáhnsahwe Sísane ehweh kawerue siahtebéra wensabé aiq pútare atageheéna Sóniga sehiranúwe.

### Sóniga mah kawéq éhwéh sehiranúwe.

#### *Manikáne Ehwehnka wehukení úkú ehwehne.*

<sup>1</sup> Áawahewé Manikáne Ehweh\* ména we Maniká Iteriboba ména Maniká míowe.

<sup>2</sup> Naho naho téhwe wereq Maniká Iteriboreq moráráq míóye.

<sup>3</sup> Mah Ehwéhniká moke ménsámehsánkakaq ménkámehnkánkakaq wehukeakáq mirarowe. Pehipi íre kowe. Mó anínká íre mirarowana peh webataq wega moke mirarowe.

<sup>4</sup> We oga mía míai aní púana we wehuke míáhrabeq téhrehnka inserahni aní míre.

<sup>5</sup> Sunkíkírirabeq kánéqka téhrehnserah wega wehukega ahbabarorabeq kaweqtaq mía míaire. Sunkíkírinka kánéq íre puinsuahráhire. Mina inserah sene ahbabáronka wene kaweq arámbéhrí íre sabiruahráhowe.

<sup>6</sup> Manikánka wehukení wenáwíq Sóni eqmarowe.<sup>†</sup>

<sup>7</sup> Mó ke ehweh terinkeheéna eqmarowe. Kaweq arámbéhrí aní téhrehnka inserahni anínsábé terinkeheéna eqmarowe. Téhrehnka inserahni anínsábé ómiga aiq pútare atageheéna teriuwe,

<sup>8</sup> Sóniwe we íre mi aní míowe. Téhrehnka inserahni anínsábé terinieéna Sóniga súwe.

<sup>9</sup> Ómi kegá tagageheéna téhrehnka inserahni aní marakóipeq tumíowe.

<sup>10</sup> Mah marákó mårákó miraro anínká mah marákóípéq tumíowara míó kega we íre tagariówe.

<sup>11</sup> Wenawahrahba súwara sega we íre semehwehue kaweria peh áwé tagarúówe.

<sup>12</sup> Peh morá Sísansabé aiq pútare atera áhrabo kegá Manikáne animári úku úkuowe.

<sup>13</sup> Íre iteinoibone korahq itene inonkapipéq kék púaq Manikáne animári míone. Íre iteitene iwíáhga Manikáne animári míone. Íre iteriborehga maqmaranéhe íwíáhonka Manikáne animári míone. Írakaumo. Peh morá Manikánka organúq ítéhraq wene animári míone.

<sup>14</sup> Manikáne Ehwehnka wehukení úkue iteba tumíowe. We aiq pútari aní ména itensabé anotah arútábóírire. Wenaboga webataq wenahni téhreh naneqkakáq págegeakáq atowaq tagaraune.

<sup>15</sup> Sóniga Sísa sinaú ehweh teiena, Itensabé teiewómé mah anínsábé teiewóge. Íné íre míáhwataq we mía míáu ani púana inehe si anímé íné kiotaiqme aní mía míaire úwe.

<sup>16</sup> Wene arupipeq peh kaweq iwíáhi aní púana itensabé arutaboiréna itene irupipeq eyoyó aitéhre.

<sup>17</sup> Manikánka sehgóro ú ehweh Mósísiga teiuwana Sísa Karáhé tuména itensabé arutaboiraitena aiq pútaq ehwéh teíre.

---

\* **1:1:** Ehwehme Sísa Karáhée.    † **1:6:** Mah Soníwé we íre mah pukú sehiranú anine. We wání meri merinú ani míowana mah pukú sehiranú animé we mó Soníwíre.

**18** Iuranka Maniká Iteribo íre tagahrahune. Peh morá wenahni abowáreq mía míai anínká abowáné sánsá tei teinire.

*Sóni wání meri merinú aniné ehwehne.  
(Mátíyu 3.1-12; Mákha 1.7-8; Árúka 3.15-17)*

**19** Sarúsarama suwahpeqte Asiu kegá Manikáne ehweh mibeq mahbeq arítáh kéreq Áríwái kereqsabé, Sóni kogasenoro éra eqmaq súowe. Eqmaq súowara Sóniba séra kasenéra, Are insebo uwe.

**20** Are insebo ue kasenuwana Sóniga pahsuqme teriuwe. Pahsuqme teriena, Manikánka ite meirena kaweraitankeheéna peh morá ání omaq atowe. Ínéwé íre mi aní úge úwe.

**21** Úwara sega wensabé, Árahinsabébo? Are insebo? Are Manikáne ehweh irarú ani wenawíq Éráísabo uwana Sóniga, Írakaumo úwe. Írakaumo úwara, Are áwénunúna aní, Manikáne ehweh iraréna anípo uwana, Írakaumo úwe.

**22** Írakaumo úwara sega wensabé mó kasenéra, Are insebo? Ite eqmaq iúwéhnarabeq ehweh terienéhboq teio. Arewé aneq aní múge íwiáhono uwe.

**23** Uwana Sóniga sensabé, Áísáíaga naho mirarúnserah íné uworapeqté sawai sawaiu aní múge. Wahnah sína ahmé obaríáhro u aní múge úwe. *(Aisaia 40.3)*

**24** Péhrasi kegá eqmaq súowara su kegá Sóninsabé mó kasenéra,

**25** Manikánka ite meirena kaweraitankeheéna peh morá ání omaq atowe. Arewé íre mi aní móne. Arewé íre Éráísa wone. Arewé íre áwénunúna aní, Manikáne ehweh irari aní móne. Minayabe árahinsabé wání meri merinono uwe.

**26** Uwana Sóniga sensabé, Ínéga peh wání meriú aní múge. Inehe si aní, itega íre tagariáh ánime ite míáhpí ákáhpi iriwe míéhre.

**27** Inehe si anímé anotah anínéna íné kiotaiqme aní míre. Minayabe íné inehe si aníné súu nahniáq pugereyabe íre awehrari aní múge.‡

**28** Marakó áwíq Pétanie. Mi marákóráq Sorana aroipéq seberaebéq kéhrana Sóniga mitaq wání merilena mi ewhéh teriuwe.

*Sísawe Manikáne Sipisípiq Áráhq tahnsa ání míre i ehwéhne.*

**29** Ahbiah tahnsá Sísaga Sóniba súwana tagéna mahraréna, Tagaríáhro. Manikáne Sipisípiq Áráhqka mah kehiná kéhínáné ahbabáq meyankéhe.

**30** Mah anínsábé teiewarauge. Íné íre míáhwataq we mía míau aní púana inehe si aní íné kiotaiqme aní míaire.

**31** Ínéwé we mía míai aníne ue íre tagariarauge. Ísara kegá we mía míai aníne ue tagariageheéna wání meri merinuge úwe.

**32** Sóniga mó mahraréna, Manikáne Awanka tunse kiboki táhnsánuena weba márunsurahurairana tagarauge.

**33** Téhwe ínéga we íre niahtearauge. Ínéga wání meri merininkeheéna eqmaq núwátai anínká teniena, Manikáne Awanka weba tumíarai anínká wewega Manikáne Awa inkéhe uraire.

**34** Íné mina aiq tagéna teiúge. We Manikáne ahninkáwá wíre úwe.

*Apahránítogá Sísa kéró ehwehne.*

**35** Ahrina tahnsá Sónireq we kéróya anítéreq mó iriwe míówe.

**36** Sísa noguwana Sóniga tagéna mahraréna, Tagaríáhtao. We Manikáne Sipisípiq Áráhq míre úwe.

**37** Úwara Sóni kéróya anítégá wene ehweh irera Sóni auwera Sísa kéróye.

‡ **1:27:** Mákha 1.7 aigárápéqté éhwéh tagáhno.

<sup>38</sup> Sísa kéróyana wega pabeqme se tagéna sensabé, Aneq sahroyo úwe. Aneq sahroyo úwara sega wensabé Árábáio, are ahbeq kaegaeono uye. Mi áwíq Árábáiwe áwahewé Íwáhnoraníne.

<sup>39</sup> Uyana wega sensabé, Seragahtao úwara sega we kérera Sísa kaegaeúrabeq tagoye. Ío tunsonorerutaq sega weba mitaq míoye.

<sup>40</sup> Sónine ehweh irera se Sísa kéróya aníté mó aní áwíq Ehntarue. We Sáimóni Pítane ábákawae.

<sup>41</sup> Ehntaruga mitaq auwena wenawah Píta anebahréna tagéna wensabé, Manikánka omaq ato anímé Mésáía míehrana aiq tagoge úwe. Mésáíawe áwahewé ite meirena kaweraitankeheéna Manikánka omaq ato aní míre. §

<sup>42</sup> Aiq tagoge éna wenawah meqmema Sísaba móatowe. Sísaga Píta ebitáwéna wensabé, Are Sáimónie. Are Sónine ahninkáwá wóne. Mó kegá mó awíq Sípásie áwíratagéhe úwe. Sípásiwe Pítawe peh morá éhwéhnéna áwahewé ebah mire.

### *Sísaga Píripireq Nátáníéríreq síáhrabú ehwehne.*

<sup>43</sup> Mó ahrina tahnsá Sísaga iwíáhéra, Íné Kehrari marákórápéq pokinie íwíáhéra wehukení wenawíq Pírípi tagéna wensabé, Séniro úwe.

<sup>44</sup> Píripíwe Pétásáíra suwahpeqte ánine. Ehntarureq Pítareq moq mibeqté ánítée.

<sup>45</sup> Píripíga Nátáníéri koragéna wensabé, Mósísiga sehgóro ú ehwehnká tei teinu anímé Manikáne ehweh iraru kega sehiranue tei teinu anímé míehraq tagóne. We Sósépane ahninkáwáe. We Néhsara suwahpeqte ání wenawíq Sísae úwe.

<sup>46</sup> Úwana Nátáníériga wensabé kasenéna, Néhsara suwahpeqte kaweq anímé serahiro úwana Píripíga wensabé, Seragáhno úwe.

<sup>47</sup> Nátáníériga Sísaba súwana we tagéna mahraréna, We aiq pútaq kaweq Ísara ánine. Wene arupipeq íre péhe íwíáhi ánine úwe.

<sup>48</sup> Úwana Nátáníériga Sísansabé, Arewe árahue íné tagariahno úwana Sísaga wensabé, Píripíga arensabé íre áhrabirana tagoge. Are awanká nona míahnana tagoge úwe.

<sup>49</sup> Úwana Nátáníériga Sísansabé, Íwáhnoraníno, are Manikáne ahninkáwá wóne. Are Ísara kené anotah wahnáh ání móne úwe.

<sup>50</sup> Úwana Sísaga wensabé, Are awanká nona míahnana tagoge teawu púah aiq pútare aintahno? Pehgáriq otáq sánsá amahnága mirauge. Mókake anotah otáq sánsá tagankehe úwe.

<sup>51</sup> Sísaga wensabé mó mahraréna, Kawerue írátáhno. Mókake íopeq sawekínaraq tagankehe. Íopeq sawekínaraq Maniká míehrabeq íopeqté kégá íné wehukení úku anípá we kiotaiq we tuotairira tagankehe úwe.

## 2

### *Wánínka náhníáq sera ano úkú ehwehne.*

<sup>1</sup> Ahrina tahnsá Kéána suwahpeq Kehrari marákórápéq pahuwiraritórabeq taganieéna Sísane anowa mitaq míowe.

<sup>2</sup> Sísareq ite we kéráhwána kereqsabé, Pauarítáhrabéq tagagehboq máhoro úwaq sewane.

<sup>3</sup> Mibeqté náhníáq sera ano parabagútaq Sísane anowagá wensabé, Sera ano aiq parabagire úwe.

<sup>4</sup> Úwana Sísaga wensabé, Minawé íre itereq wehgaq mire. Ínéga ótaq sansá mirau tanáhráq íre suriéhre úwe.

<sup>5</sup> Úwana Sísane anowagá arambehri keyábé, Wega miraoro ína ehwéh kawerue sehgóro úwe.

§ <sup>1:41:</sup> Mésáíawe Karáhewé morá áwíq míre. Karáhénabe éhwéhmé púku anehepeqte séhíramé “Manikáne Púkuipéq Kéh Áwahé Éhwéhne” ue kéhrabeq tagáhno.

**6** Abapete morá wání ántéhyá mitaq kowe. Anotah antéhyámári kéra Asiu kegá sene pabeq pabeq sansa miraigeheéna mitaq kowe.

**7** Sísaga sensabé, Antehyamárípípéq wání obenkíq máráhro úwara obenkíq márówe.

**8** Obenkíq márówana Sísaga sensabé, Uwe táhutahuq wahnáh mewe móawéro úwana wáninka náhníáq sera ano úkúwe.

**9** Segá uwera mewera móawúwana táhutahuq wahnáhnká mi será ano nawe tagéna áhtenúwe. Wání antéhyá obenkíq márótaq táhutahuq wahnáhnká íre tagariowara peh morá arambehri kegá tagaríowe.

Táhutahuq wahnáhnká náhníáq sera ano nawe tagéna o menáhwé áhrabúwe.

**10** Áhrabéna wensabé, Kiraboo kene sánsámé sene kaweq nahníáq sera ano ebeq nárigéhe. Nehra kegá siyahbankirahnaraq íre tei será ano nárigéhe. Arega mina onserah íre miraóne. Arega áhnte tei será ano matawé anehe náiene úwe.

**11** Minawé Sísaga ebeqte ótaq sánsá Kéána suwahpeq Kehrari marákórápéq miraúwe. Wega ótaq sansá miraúwara mío kega tagéra áhtenuwe. Mitaq ite we kéráhwána kegá wensabé aiq pútare atahwáne.

**12** Sísareq wenanoreq wenábáqmarinseq ite we kéráhwána kereqka mitaq sueq Kápénéáma suwahpeq pokue táhmaro wehekáh mitaq kowíahwane.

*Sísaga Manikánsabe iwíáh iwíáh atáh náhtápéqté paiqnanánu ke máhpeq kaqsuo ehwéhne.*

*(Mátíyu 21.12-13; Mákha 11.15-17; Árúka 19.45-46)*

**13** Ite Asiu kené sótaikú iahreraq ko tánáhráq wahtotarútaq Sísaga Sarúsarama suwahpeq kiuwe.

**14** Kiená Manikánsabe iwíáh iwíáh atáh náhtápéqté wíráípquéq kibekúwara sipisípiqkakáq káhoakáq kibokiakaq móneakáq paiqnanánu ke tútuue míowe.

**15** Tútuue míowana Sísaga susa náhgáqtátéawa kíráwe mi nahgáqtáté moke paiqmáró keakáq sene ménkámehnkánkakaq máhpeq kaqsuowe. Kaqsuena móne paiqnanánu kené móne paentáruena sene wéhuwehu tahbéwári pioruowe.

**16** Pioruena pina paiqmáró keyabé, Minawari mewe móáhro éna Nánibone nahtapeqté mátábúrápéq paiqnanániyeho úwe.

**17** Úwaq ite we kéráhwána kegá minawarí tagéq Manikáne sehira iahreraq kowe. Mi sehiránká mahraréna,  
Arene nahnsabe anotahtaq iwíáh iwíáhéné peh kawetaq kankeheéna págege sansá mirauge ire. *(Buk Song 69.9)*

*Apahtáróráq mó pearaníe ú ehwéhne.*

**18** Asiu kegá Sísansabé, Árahinsabé kaqsuahno? Arega kaqsuahnayabé ótaq sansá sokigi aio uwe.

**19** Uwana Sísaga sensabé, Mah nah Manikánsabe iwíáh iwíáh atáh náh sokoruehrana ínega apahtáróráq mó pearaníe úwe.

**20** Úwara Asiu kegá wensabé, Mah nah pe arámbéhríwé áhnte opéq 48 opéq arambehriue pearówe. Arega peh apahtáró wéhékáhmé árahue pearanibo uwe.

**21** Sísaga íre nahnuransabé peh wene anonkansabé irarúwe.

**22** Sísa pukúwana organúq atotaq ite we kéráhwána kegá mi ehwéh iahreraq matiahwane. Iahreraq matiahwanayabé itega Manikáne sehirankakaq Sísaga teiu ehwéhkákáqsábé aiq pútare aritahwáne.

*Sísaga ómi kené iwíáh tagariéhre i ehwéhne.*

**23** Ite Asiu kené sótaikú iahreraq ko táhútáhúq tánáhráq Sísaga Sarúsarama suwahpeq míowe. Míotaq wega ótaq sansá miraúnsabe áhnte kegá wensabé aiq pútare atówe.

**24** Sísaga ómi mi kehináné sirupipeq tagario púana sensabé íre aiq pútare aritowe.

**25** Mó kegá Sísa íre teawúwana peh wewega wehukene sirupipeq tagariowe.

### 3

*Manikáne Awanka maqmaréhnsábé éhwéhne.*

<sup>1</sup> Péhrasi aní wenawíq Níkóríma anotah Asiu aní ména  
<sup>2</sup> inokáhpeq Sísaba séna wensabé, Íwáhnoraníno, are Maniká míéhrabeqte ání móne. Aiq tagarióge. Arereq Manikánseq moraráq mía míaóya puah arega ótaq sansá miraóne úwe.

<sup>3</sup> Úwana Sísaga wensabé, Kawerue írátiahno. Peh morá wenanoga maqmaréhnsábé íre awehraq kékhe. Manikánka wahnah wahnahnirabeq kioráhi aní móñkakáq maqmarankéhe úwe.

<sup>4</sup> Úwana Níkórímagá Sísansabé, Árahiro? Anonusa áníné anowagá móñkakáq íre maqmarahráhire. Wenanoga árahue móñkakáq maqmarankéhbo úwe.

<sup>5</sup> Úwana Sísaga wensabé, Kawerue írátiahno. Arenanoga maqatáráinsabé íre awehraq kékhe. Peh morá Manikáne Awanka maqmaréh áninká Manikánka wahnah wahnahnirabeq kioráhire.

<sup>6</sup> Wehukenínká peh mó áwáhu wehukéní maqmarahráhire. Manikáne Awanka webataq o awá maqmarahráhire. Maqmarena inkéhe.

<sup>7</sup> Arenanoga maqatáráinsabé íre awehraq kékhe. Peh morá Manikáne Awanka maqmaréh áninká Manikánka wahnah wahnahnirabeq kioráhire teawúnsábé íre áhtenúno.

<sup>8</sup> Sóiriqka pehipi sirah tagáhne. Sóiriq eheqte sirapómo? Eheq pokirapómo? Are íre tagariahne. Mina inserah Manikáne Awanka o awá maqmarena inkéhe úwe.

<sup>9</sup> Úwana Níkórímagá Sísansabé, Minayabe árahiro

<sup>10</sup> úwana Sísaga wensabé, Are Asiu ke síwáhnoróna aní móne. Minawé árahinsabé íre irahno?

<sup>11</sup> Kawerue írátiahno. Íné író éhwéh iraréna íné tagonsabé teawúgah arega néne ehwehnsabé íre aiq pútare aintahne.

<sup>12</sup> Marakóipeqté teawú náneqmarí arega íre aiq pútare aintahnayabé Maniká míéhrabeqte éhwéh teawenah árahue aiq pútare aintaníbo?

<sup>13</sup> Mó aninká Maniká míéhrabeq íre kíre. Peh morá wehukení úku aninká ínébataq mitaq mía míaéna marakóipeq tumíarauge.

<sup>14</sup> Mósísga káhpahraté miraro wehe uworapeq awankátaq táhparena pankeqme pearonserah sega íné wehukení úku aní pankeragéhe.

<sup>15</sup> Ínénabe aiq pútare aintáh kégá oga mérapeq aiq awaq míáhwe úwe.

*Sísansabé aiq pútare atáh kékábé éhwéhne.*

<sup>16</sup> Manikánka mah kehiná kékínánsábé anotah arútábóíri puana webataq wenahni eqmarowe. Wenahninsabé aiq pútare atáh ké íre toráh agia peh oga mérapeq awaq mianehrawoe.

<sup>17</sup> Wenahninká mah kehiná kékíná ehweh aritankeheéna eqmaroo? Írakaumo. Mah kehiná kékíná kaweraritankeheéna eqmarowe.

<sup>18</sup> Manikánka wenahninsabé aiq pútare atáh ké íre ehweh arítéhre. Manikánka wenahninsabé íre aiq pútare atáh ké ehweh arítéhre. Webataq wenahninsabé íre aiq pútare atáh púana ehweh aritená anotah abiáhnsá arita aritaire.

<sup>19</sup> Téhrehnka inserahni aninká marakóipeq tumíowe. Mahbeqté kégá ahbabáq aruqaruronsabé sunkíkirabeqsabé suwahbéna téhrehrabeqsabé íre suwahbówe. Minayabe ehweh arítéhre.

<sup>20</sup> Ómi ahbabáq kega téhrehrabeqsabé suwahriehnsabé mitaq íre séyéowe. Mó kegá sene ahbabáqmari tagehoéra téhrehrabeq íre séyéowe.

<sup>21</sup> Peh kaweqtaq mía míao kegá téhrehrabeq séyéowe. Manikánka págege arítéhrara mirao arámbéhří mó kegá tagageheéra téhrehrabeq séyéowe.

*Sóniga Sísa sína ehwéh pahsuo ehwéhne.*

<sup>22</sup> Sísareq ite we kérähwána kerekka Sarúsarama suwahpeq sueq Súria marákórápéq pokowane. Sísaga iteba mitaq ména mó ke wání meriuwe.

<sup>23</sup> Sóniga Serima suwahpeq wahtotaq Inona arahno korabeq míowara áhnte waní ko púara mó kegá mitaq suwana Sóniga wání meriuwe.

<sup>24</sup> Mi tanáhráq mó kegá Sóni íre karábúsiipéq móátowe.

<sup>25</sup> Asiu anínseq Sóni kéró kerekka wání sosue sansásábé ehwehéra Sóniba suwe.

<sup>26</sup> Sóniba séra wensabé, Íwáhnoraníno, arereq Sorana aroipéq seberaebéq mitaq teiátóna anímé wega mahtaq ména wání merírara ómiga are auwera weba pokowe uwe.

<sup>27</sup> Uwana Sóniga sensabé, Manikánka webataq itene arambehri tei teinire.

<sup>28</sup> Manikánka ite meirena kaweraitankehéna peh morá ání omaq atowe. Ínéwé íre mi ání úge teiátáu mino. Manikánka íné ebeq eqmaq núwátáire teiátáu mino.

<sup>29</sup> Ibehinínká wenawehqpa pokinserah amahnága ómiga Sísaba poku pokuowe. O menáhwéné iyahnabo anínká mitaq ména wene ehweh irena wene arupipeq eyoyóinserah amahnága ómiga íné nuera weba pokonsabé nirupipeq eyoyóire.

<sup>30</sup> We anotah ání úkínana íné pehgáriq ání úkono úwe.

<sup>31</sup> Maniká míéhrabeqte tutai ání peh anotah ání ména moke mó ke kiotaikire. Marakóipeqté ání peh mahtaqté ání púana peh mahtaqté sánsánéna mahtaqté éhwéh tei teinire. Maniká míéhrabeqte tutai ání peh anotah ání ména moke mó ke kiotaikire.

<sup>32</sup> We anotah ání ména wega tagariéh náneq írátiéh náneq ehwéh teíraq itega íre íráhwe.

<sup>33</sup> Wene ehweh kawerue íráh kégá, Maniká aiq pútaq ání míre atáhwe.

<sup>34</sup> Manikánka eqmaro aninká Manikáne ehweh kawerue tei teinire. Manikáne Awanka weba mía míai puana peh kawerue tei teinire.

<sup>35</sup> Manikánka wenahninsábé arutaboiréna moke auráq matiahno atéhre.

<sup>36</sup> Wenahninsábé aiq pútare atáh kégá oga mérapeq aiq awaq míáhwe. Wenahniné sánsásábé suwahrieh ke oga mérapeq íre awaq miowana Manikánka anotah abíáhnsá arita aritaire úwe.

## 4

### *Sísareq Sámárlia marákórápéqté ínínseq ehwehnuya ehwéhne.*

<sup>1</sup> Mó kegá Péhrasi keyábé, Peh táhmaro kegá Sóniba suwana wání meríátáire. Áhnte kegá Sísaba suwana wání meríátáire uwe.

<sup>2</sup> Írakaumo. Sísaga wání íre meriuwaq peh morá ite we kérähwána kegá meriewáne.

<sup>3</sup> Sísaga mi ehwéh irotaq wereq itereq Súria marákórápéq sueq Kehrari marákórápéq móñkakáq kouwekowané.

<sup>4</sup> Itega Sámárlia marákó kótaikoneheowané.

<sup>5</sup> Sámárlia marákó kótaikowanaraq Sáíka suwahpeq koneheowané. Koneheowanaraq Sékópaga wenahni Sósépa awu marákórápéq kowané.

<sup>6</sup> Sékópaga ubuqmaro matáípéqté wání mitaq kowe. Kowanaraq Sísaga íre wahto nogu púana tawa tawanéna wéhékáhnabubu mitaq tútuue míowe.

<sup>7-8</sup> Ite Sísa kérähwána kegá Sáíka suwahpeq tópah sahq kowanaraq Sámárlia inínká wání sabatáhq súwe. Sísaga wensabé, Wání nánio úwana

<sup>9</sup> Sámárlia inínká wensabé, Íné Sámárlia iní múge. Are Asiu ání míahna puah aneqsabé wání nánio eno úwe. Sámárlia kegá néu antéhyápíté Asiu kegá íre néunsabe kasenúwe.

<sup>10</sup> Sísaga wensabé, Arega Manikánka aweráhi naneq íre tagariahne. Wání nánio teawú ání íre tagariahne. Arega tagariahnaraq tahirí oga mé waní nánio énana náwú irino úwe.

<sup>11</sup> Úwana mi inínká wensabé, Mi matáípéqté wání íre wahto mire. Are antehya íre matiahne. Oga mé wanímé eheqte uwe nániníbo?

<sup>12</sup> Iteinahbú Sékópaga mi matáipéqté wání iuwe. Sékópareh karírnánínseq wene ménkámehnkámarinseqka mitaq nowe. Arega ínénabe, Íné oga mé waní aweráhu aní múge énayabé arewe Sékópa kiotaiqme míahna anípo úwe.

<sup>13</sup> Úwana Sísaga wensabé, Mipéqté wání nehra ke mótaq mó tahbobóoneherawoe.

<sup>14</sup> Náwéna waní nehnaraq mó íre tahbobónawire. Írakaumo. Náwéna waní nehnaraq arupipeq oga mía mía aráhnó tahnasa tuerueinae úwe.

<sup>15</sup> Úwana mi inínká peh mataipéqté wáninsábé wíre ívíahéna wensabé, Mahtaq sényábe nuwahlriehre. Mó tahbobóínehboq teniena waní nánio úwe.

<sup>16</sup> Úwana Sísaga wensabé, Arenawehq koweqme setao úwe.

<sup>17</sup> Úwana, Íné íre nánuwehkakaq ání múge úwana Sísaga wensabé, Íné íre nánuwehkakaq ání múge tenienayabé aiq pútaróne.

<sup>18</sup> Arega mó weh mewe mipinsuq mó weh mewe mipinsurue moberíah wéh mewe sutona wino. Amahnága kérahna wéhwé íre arenawehrurá míre. Minayabe aiq pútaróne úwe.

<sup>19</sup> Úwana mi inínká wensabé, Are moke íné éhweh írátiahna puah íné ívíahume are Manikáne ehweh iraréna aní móne.

<sup>20</sup> Itene igaqnaréhga mah sawéhráq Manikánsabe ívíah ívíah ata atauwe. Arenanahbúréhga ívíahéra, Sarúsarama suwahpeq Manikánsabe ívíah ívíah ata ataoro ewe. Manikánsabe ahbeq ívíah ívíah atanéhnkono úwe.

<sup>21</sup> Úwana Sísaga wensabé, Aiq pútare ainto. Mókakewe íre peh mi sawéhrápéqkákáq Sarúsarama suwahpeqkakáq wehukega Manikánsabe ívíah ívíah ataneherawoe.

<sup>22</sup> Ite Sámária kegá ívíah ívíah atáh náneq íre írátiahwe. Ite kaweraitahna aní Asiu aní púaq Asiu kegá ívíah ívíah aintáh ání tagariáhwe.

<sup>23</sup> Mókakeakáq amahnágaákáq Manikáne Awanka págege arítéh kégá aiq pútaq sansánéra Manikánsabe ívíah ívíah atéhrataq sebataq Iteribonsabé kawerue ívíah ívíah atáhwe. Iteriboga mina tahnasa ké wensabé ívíah ívíah atáhnsábé awahbehre.

<sup>24</sup> Maniká íre áúakaq anínéna peh Wenawanka mía míaire. Minayabe kawerue ívíah ívíah atagéhboq iteiuwanka Manikánsabe ívíah ívíah ateq aiq pútaq sansánoro úwe.

<sup>25</sup> Úwana mi inínká wensabé, Íné írátíomé ite meirena kaweraitankeheéna Mésáía, Manikánka omaq ato anínká sinawire. We sínagake moke teinkéhe úwe.

<sup>26</sup> Úwana Sísaga wensabé, Arega iraréna anímé íné úge úwe.

<sup>27</sup> Úwaq ite Sísa kérahwána kegá kouwekowane. Sísareq mi inínseqka ehwehnuyansabé áhtenowane. Áhtenéq Sísansabé, Árahono? Aneqsabé ehwehnoyo íre iraria peh ehiya míahwane.

<sup>28</sup> Mi inínká wene wání antehya mitaq marena wenawahpeq pokéna wenawahryabé,

<sup>29</sup> Máhoro. Peh morá ání íné íre tagarai anínká moke ínéga mirau naneqmarí pahqnúéhre. We seragahro. We Manikánka omaq ato anípómo. Seragahro úwe.

<sup>30</sup> Úwara sega sensuwahpeq suera Sísaba suwe.

<sup>31</sup> Sámária kegá áhnibórá suraq ite Sísa kérahwána kegá wensabé, Íwáhnoraníno, táhutahurúno ewanana

<sup>32</sup> wega itensabé, Íné itega íre tagariáh táhútahúq kékre úwe.

<sup>33</sup> Úwaq iteite náhenéq, Mó anínká táhutahuq awirápómo ehmuniq éhmúníqtaq irarewane.

<sup>34</sup> Sísaga itensabé, Íné eqmaq núwátái aníné arambehriwe néne táhutahuq mire. Mina mirainauge.

<sup>35</sup> Itaréitaré ió parabagínaraq onkiyonsá nera kék tánahráre iyeho. Amahnága tagariáhro. Onkiyonsá áhnte nera kéknerah Maniká Iteribo íre tagariáh ké áhnte míahwe.

<sup>36</sup> Onkiyonsá nera kéhrara mirauwíahnserah oga mérapeq wehuke móritáhro. Móritezq oga mía mía apéq meyagéhe. Manikáne ehweh teri terino kereq wehuke móritáh kéreqne irupipeq eyoyóinkehboq móritáhro.

<sup>37</sup> Iteinahbúréhga mahraréra, Mó kegá ayu uqmatowara mó kegá onkiyonsá mirauwíahwe uwe. Mina unserah mó kegá Manikáne ehweh teri terinowara mó kegá wehuke meriqmera móritáhwe. Segá mahraru ewhéh aiq pútaragire.

<sup>38</sup> Ínéreq mó kereqka Manikáne ehweh teri terinonaq ite wehuke meriqmeq Iteriboba móritageheéna eqmaq iúwóge. Teri terinúnayabé ite áhnte meriqmeq móritagéhe úwe.

<sup>39</sup> Mi inínká, Moke miraú naneqmarí teníre únsabe áhnte Sáika suwahpeqte Sámária kegá Sísansabé aiq pútare atówe.

<sup>40</sup> Aiq pútare atera Sísaba séra wensabé, Máho. Iteruwahpeq sewíahno uwana Sísaga téhtaréráq sensuwahpeq kowíowe.

<sup>41</sup> Sísaga mitaq síwáhnorúnsabe áhnte mó kegá aiq pútare atówe.

<sup>42</sup> Aiq pútare atera mi inínsábé, Íre peh morá arega teienayabé aiq pútare atone. Ite wene ehweh kawerue ironayabé wensabé aiq pútare atone. We aiq pútaq mah kehiná kékíná meirena kaweraitéh ání míre atone uwe.

*Sísaga anotah wahnáhné ahninkáwá kawerato ehwéhne.*

<sup>43</sup> Sísaga mitaq téhtaréráq ména suena Kehrari marákórápéq pokúwe.

<sup>44</sup> Sísaga naho mahraréna, Manikáne ehweh irari ání mó ke suwahpeqte kégá iwiáh iwiáh atáhwe. Peh morá wenawahrahga wensabé íre iwiáh iwiáh atáhwe úwe.

<sup>45</sup> Sísaga Kehrari marákórápéq pokútaq mibeqté kégá eyoyóue mehweh atówe. Segá Sarúsarama suwahpeq táhutahuq notaq Sísaga miraú arámbéhri aiq tagariówe. Menah miraú arambehri tagarió púara eyoyóue mehweh atówe.

<sup>46</sup> Sísaga Kéána suwahpeq Kehrari marákórápéq wánítate náhniáq sera ano mি-rrorabeq móñkakáq pokúwe. Kápénéáma suwahpeqte wáhnáh wenawahpeq míowana wenahni anotah awáhréúwe.

<sup>47</sup> Mi wahnáh áninká Sísaga Súría marákó suena Kehrari marákórápéq sire u ehwéh irena Sísaba pokue wensabé, Nénahni pukinaire. Areagá nánuwahpeq segawerato éna pagu pagunúwe.

<sup>48</sup> Sísaga wensabé, Areagá ótaq sansá tagéyabe awahbehre. Pehipi íre aiq pútare aintahne úwe.

<sup>49</sup> Úwana wega Sísansabé, Nénahni pukínehboq peheráh súno úwana

<sup>50</sup> Sísaga wensabé, Pokúno. Arenahni oga míanawire úwana mi wehgá Sísane ehwehnsabé aiq pútare atena pokúwe.

<sup>51</sup> Ahbiah tahnsá wene nahtapeqsabé séwotaq wene arambehri kereq ahtapeq piehgíúwe. Segá wensabé, Arenahni kaweragirana oga míéhre teawúwe.

<sup>52</sup> Teawúwana wega sensabé, Aneq tanáhráq kaweragiro úwara segá wensabé, Inokáh tunsorteráitaq kaweraguraire uwe.

<sup>53</sup> Uwana abowágá iwiáhéra, Sísaga, Arenahni oga míanawire teniátái tanáhráq peh monseráh tánáhráre úwe. Minayabe moke mi karíronáninká Sísansabé aiq pútare atówe.

<sup>54</sup> Sísaga menah Súría marákó suena Kehrari marákórápéq séna anehe mi otáq sánsá Kéána suwahpeq miraúwe.

## 5

*Sísaga káwehu ayehráq awahre ání kawerato ehwéhne.*

<sup>1</sup> Mó tanáhráq Asiu kegá Sarúsarama suwahpeq táhutahuq norabeq Sísaga koraganieéna pokúwe.

<sup>2</sup> Sarúsarama suwahpeq kurirapéqté ónsá áwíq Sipisípiq Onsáe. Onsarapéqté kégéu ah ayehrápéq wání káwehu kowe. Íbaru ehwéh, Asiu kené ehwehme mi kawéhú áwíqmé Pétésárae. Mi kawéhú ayehrápéq moberíah atataia náhmári kowe.

<sup>3</sup> Mitaq áhnte awáhré ké íre sugia peh surahpeq míowe. Aigará soriqnahnu kereq aura pira kereq ah íre nogoráhu kereq mitaq míowe.

<sup>4</sup> [Maniká míéhrabeqte íópeqté áninká mó tanáhráq mó tanáhrárue mi waní áwíoq áwíorúwe. Áwíoq áwíorútaq ebeq tu awáhré áníné anepeq wáninka tabagúwana wene awahre suansúá kaweragúwe. Minayabe áhnte awáhré kégá kaweraginkeheéra káwehu ahtáq sáhuriówe.]

<sup>5</sup> Peh morá áninká peh íregáritaq opéq 38 opéq awahreúwe.

<sup>6</sup> We surahpeq míowana tagéna we áhnte opéq awahreúmá Sísaga tagariowe. Tagarawéna wensabé, Awaho ani méyabe awiro úwe.

<sup>7</sup> Úwana mi aninká Sísansabé, Wáninka aroroitaq mó aninká wánípipeq íre meniqmena márunítéhre. Íné tue tueutaq mó aninká ebeq tubaiqme tubaiqmeowe úwe.

<sup>8</sup> Úwana Sísaga wensabé, Irigúno. Arene máhriq mewe pokúno úwana

<sup>9</sup> we suansúá kaweragúwana kie irigue wene máhriq mewena pokúwe.

<sup>10</sup> Minayabe Asiu kegá kawerato aninsábé, Iboramé ahrena ahrena wehekáh míre. Arene máhriq mewe nogíneho uwe.

<sup>11</sup> Uwana wega sensabé, Íné kaweraintéh áninká, Arene máhriq mewe pokúno teníre úwe.

<sup>12</sup> Úwara sega wensabé, Arene máhriq mewe pokúno teawí ánímé inseboue kasenuwe.

<sup>13</sup> Áhnte wehekéqká paitió púana Sísa íre ábóraq míowe. Íre ábóraq míonsabe kawerato aninká sensabé, Kaweraintéh ánímé íre tagaríoge úwe.

<sup>14</sup> Anehetaq Sísa Manikánsabe iwíáh iwíáh atáh náhtápéqté mátábúrápéq ména kawerato aní tagéna wensabé, Amahnága awaho ani míahne. Mó awahreurona serahninehboq móme íre ahhbabárúno úwe.

<sup>15</sup> Kawerato aninká pokue Asiu ke tagéna sensabé, Íné kaweraintéh ánímé Sísae teriuwe.

<sup>16</sup> Sísaga ahrena ahrena wehekáh mi aní kaweratonsabe Asiu kegá Sísa áwíognowe.

<sup>17</sup> Áwíognowaná Sísaga Asiu keyábé, Nániboga ahriahri arambehrii puana ínégaakáq arambehriuge úwe.

<sup>18</sup> Sísaga ahrena ahrena wehekáh arambehriúnsabe Asiu kegá abiahnsanéra subiq suanéhe iwíáhuwe. Sísaga Manikánsabe, Nániboe atowe. Manikánsabe, Nániboe atonsabe Asiu kegá mahraréra, Wega, Ínéreq Manikánseq monseráh áníté úye irarime anotahtaq íre kawerire éra suboneheqmúne iwíáhuwe.

### Sísaga ehweh ariteyabe éhwéhne.

<sup>19</sup> Sísaga sensabé, Kawerue írátíáhro. Íné wenahninká pehipi íre miraorahuge. Nánibone arambehri tagéna wega mirainserah íné wenahninká mirauge.

<sup>20</sup> Nániboga íné wenahninsábé arutaboiraintena wene sásá moke teni teninire. Wega mó kiotaiqme arámbéhriákáq sokigi aintankéhe. Minayabe itega áhtenigehe.

<sup>21</sup> Nániboga puko ke iriwe organúq sítéhnserah íné wenahninká iwíáhu ke organúq sitahráhuge.

<sup>22</sup> Nániboga mah kehiná kékéhíná íre ehweh arítéhre. Ehweh arámbéhríwé moke íné wenahninsábé, Ehweh arito aintéhre.

<sup>23</sup> Nániboga áwíq pankerera iwíáh iwíáhonserah íné wenahni níwíq ómiga pankerera iwíáh iwíáh aintageheéna ehweh arito aintéhre. Íné wenahninsábé suwahrieh kegá eqmaq núwéh ání Nánibonsabé íre iwíáh iwíáh atáhwe.

<sup>24</sup> Kawerue írátiáhro. Néne ehweh irera íné eqmaq núwéh ánínsábé aiq pútare atáh ké oga mérapeq aiq awaq míáhwe. Ínéga se íre ehweh aritaníe. Pukia ánímári tahnsa méra organúkue mía míaowe.

*Sísaga wehuke sainsuahna ehwéhne.*

<sup>25</sup> Kawerue írátiáhro. Amahnágaákáq mókakeakáq pusa kégá íné Manikáne ah-ninkawáné ehweh iragéhe. Irera oga mía míaigehe.

<sup>26</sup> Nániboga organúq itahráhinsérah íné wenahninká moq organúq itahráhuge. Nániboga organúq sito aintéhre.

<sup>27</sup> Nániboga ínénasabe, Are wehukení úkóna aní míahna puah ahbabáq keyabé ehweh arito aintéhre.

<sup>28-29</sup> Mókake ómi pukia ké maisaráhrabeqte kégá néne ehweh iragéhe. Iréhrataq kie irigigehe. Kaweqtaq mía míao keyábé, Oga mérapeq pokoro aritaníe. Ahbabáq aruqaruro keyábé ehweh aritena, Iraipéq pokoro aritaníe. Ínéga iraru ehwéhnsábé íre áhtenoro úwe.

<sup>30</sup> Sísaga mó mahraréna, Ínébataq íre miraorahuge. Íre peh morá ínénéne iwíáhe. Íné eqmaq núwéh áníné iwíáh írátió púana kawerue wahnahnarítóge.

<sup>31</sup> Néne sánsánsábé ínébataq teiútáq tahirímé íre aiq pútare aintáhro teiú irino. (Lo 19.15)

<sup>32</sup> Néne arambehriyabé Nániboga teíre. Néne sánsánsábé irari ehwéh aiq pútaq ehwéhne. Mina aiq írátióge.

<sup>33</sup> Itega wehuke Sóniba eqmaq sutowana wega aiq pútaq ehwéh iraréna néne sánsánsábé teríatáire.

<sup>34</sup> Íre peh wehukene ehweh írátióge. Ite oga mía míaigeheéna mah ehwéh teiúge.

<sup>35</sup> Ah tagageheéna áráhmuga téhrehnsérah itega íné tagariageheéna Sóniga kaweq ehwéh teiátáire. Mi tanáhráq wene ehwehnka itene irupipeq eyoyó aitáráire.

<sup>36</sup> Nániboga miraúno i arámbéhrí mira aruqaruruge. Minayabe Nániboga eqmaq núwéhraq tagariáhwe. Néne arambehriga Sóniga teí éhwéh kiotaikire.

<sup>37</sup> Íné eqmaq núwéh ání Nániboga néne sánsánsábé aiq teiátáire. Wene ehweh ite íre írátiáhwe. Wene auranabiahtapeq íre tagariáhwe.

<sup>38</sup> Itega íné eqmaq núwéh ánínsábé íre aiq pútare aintáh púana wene ehweh itene irupipeq íre kagaire.

<sup>39</sup> Ite oga mérapeq awaq mianeheéq Manikáne sehira sáhnsahwe taga tagowe. Mi sehiránká íné éhwéh aiq teíre.

<sup>40</sup> Aiq teíraq itega ínéba íre séyéonsabé árahue oga mérapeq awaq mianéhbo?

<sup>41</sup> Íné anotah niwíq wehukebate íre meanieéna iraruge.

<sup>42</sup> Itega Manikánsabe íre irutaboiratáhwe. Minawé aiq tagarióge.

<sup>43</sup> Nániboga íné eqmaq núwéhrana sugaqme ite íre mehwéh aintáhwe. Mó aní peh wenawíqtaq si aní mehwéh atáhwe.

<sup>44</sup> Mó kegá itensabé iwíáh iwíáh aitáhnsábé iuwahbehre. Manikánka kaweróne aitah-nayabé íre arutaboiro puaq árahue ínénasabe aiq pútare aintanéhbo?

<sup>45</sup> Ínéga Maniká míéhrabeq ite ehweh aitanae íwíáhiyeho. Mósíiga ite séhréh aitankéhe íwíáhiyeho. Írakaumo. Wene ehwehnka ehweh aitankéhe.

<sup>46</sup> Mósíiga néne sánsánsábé sehiranue teiuwe. Minayabe itega wensabé aiq pútare atáhtáq tahirímé ínénasabe aiq pútare aintáh irino.

<sup>47</sup> Mósíiga teiu sehiránsábé íre aiq pútare atáhnsábé ínéga teíú éhwéh árahue aiq pútare aintanéhbo úwe.

## 6

*Sísaga 5 táhúséni (5,000) weh kirabou ehwehne.*

(Mátíyu 14.13-21; Mákha 6.30-44; Árúka 9.10-17)

<sup>1</sup> Mó tanáhráq Sísaga Kehrari kawéhútáq sípi kewewena kure seberaebeq pokúwe. Kehrari kawéhúmē mó awíq Táibéría kawéhúne.

<sup>2</sup> Mitaq Sísaga awahre ke kawerarito púara áhnte kegá tagéra ótaq sansáne éra we kérówe.

<sup>3</sup> Sísareq ite we kéráhwána kereqka sáwéhrapeq kire mi sawéhráq tútuue míahwane.

<sup>4</sup> Ite Asiu kené sótaikú iahreraq ko tánáhráq táchutahuq né tanáhráq wahtonúwe.

<sup>5</sup> Áhnte kegá Sísaba kíuwana tagéna Sísaga Píripinsabé, Sira kegá tópah nehransabé árahue paiqmaranéhnkono úwe.

<sup>6</sup> Sísaga miraína arámpéhri aiq iwíahéna peh Píripinsabé áhwárawe tagéna wensabé, Árahue paiqmaranéhnkono éna kasenúwe.

<sup>7</sup> Píripiga wensabé, Áhnte monérátē 200 Kína tópah paiqme pehgáritarue sararáhna íre avehraq kanawire úwe.

<sup>8</sup> Sísa kéro aní awíq Ehntaru, Pítane ábákawagá Sísansabé,

<sup>9</sup> Mahtaqté ánímái we moberíah párétíákáq téhtaré páhnkákáq matiéhre. Áhnte ke míah púana mina abehq náneq tahnsáne úwe.

<sup>10</sup> Sísaga ite we kéráhwána keyábé, Tútuoro teríero úwe. Mitaq áhnte ahpépáhq kotaq tútuue míówe. Se peh íregáritaq wehuké 5 táhúséni (5,000) wehuké míówe.

<sup>11</sup> Sísaga mi parétí mewena Manikánsabe, Kaweróne atena keqme tútuue míó ke náriuwe. Párétí náriunserahnue pahnkákáq moq náriuwe. Segá táchutahuqsabé suwahbónserahnue náriuwe.

<sup>12</sup> Ómiga siyahbankirowana Sísaga ite we kéráhwána keyábé, Arahq súéhboq morábí sáharáhro úwe.

<sup>13</sup> Úwaq itega moberíah párétí arahqmé airápété téhtaré páhsíkétí úsawe obenkíq marahwáne.

<sup>14</sup> Míó kega mi otáq sásá tagéra mahraréra, Marakóipeq tuména Manikánka naho néne ehweh irarína aní eqmaraníe ú anímé Sísa wire uwe.

<sup>15</sup> Sísaga iwíahéna, Segá íné táhtorera ínénabe, Amahnága itene anotah wahnáh aní míahno ainteho éna taqnobague webataq sáwéhrapeq pokúwe.

*Sísaga káwehu wání abobóráhtaba nogu ehwéhne.*

(Mátíyu 14.22-33; Mákha 6.45-52)

<sup>16</sup> Ío tupekútaq ite Sísa kéráhwána kegá káwehu waní áhkórapeq tunse

<sup>17</sup> sípi kewewe q kure seberaebeq Kápénéáma suwahpeq koneheowane. Penorabeq Sísaga iteba íre súwe.

<sup>18</sup> Anotah soirírunka nonaburóróúwe.

<sup>19</sup> Sípiipéq kégawanká karatáté wání subame kure peh ákáhtaq wahtó kowanana Sísaga iteba wání abobóráhtaba súwaq tagéq áhreowane.

<sup>20</sup> Áhreowanana Sísaga itensabé, Íné úge. Íre áhreoro úwe.

<sup>21</sup> Itene irupipeq eyoyóéq wensabé, Máho ewanana Sísaga sípiipéq kiasague kirútuue míówe. Kirútuue míotaq ite pokonehe owanarabeq sípiipéq apubúue kowane.

*Sísansabé anebahru ehwéhne.*

<sup>22</sup> Ahbiah tahnsá seberaebeqté kégá iwíahéra, Inokáh peh morá sípi karáirana Sísa mipéq íre pokuraire. We kéró kega sebataq mewera pokurowe uwe.

<sup>23</sup> Táibéría marákórápéqté sípíwári kewewera suwe. Tópah norabeq Sísaga Manikánsabe kaweróne atorabeq mi sípíwári wahtotaq kewewera suwe.

**24** Suwara mío kega Sísansabé anebahréra wereq ite we kérähwána kereq íre míahwanayabé sega Sísa koraganeheéra mi sipiwári kewewera Kápénéáma suwahpeq pokuwe.

### *Oga mía mía tahutáhúqsábé éhwéhne.*

**25** Segá seberaebéq Sísa tagéra wensabé, Íwáhnoraníno, arahtaq seno uwe.

**26** Uwana Sísaga sensabé, Kawerue írátíáhro. Ótaq sansánuraunsabé íre sewe. Peh tópah náiatáugana iyahbankítáinsabé sewe.

**27** Karekorahi tahutáhúqsábé íre arambehrioro. Peh oga mía mía tahutáhúqsábé arambehrioro. Mi tahutáhúqmé íné wehukení úku anínká náiníe. Maniká Nániboga omaq intena kaweróne aintéhre úwara

**28** segá wensabé, Manikáne arambehriwe aneq miraonehnkono uwe.

**29** Uwana Sísaga sensabé, Nániboga íné eqmaq núwéh ánínsabé aiq pútare aintáhmé minawé Manikáne arambehri wire úwe.

**30** Úwara segá wensabé, Itega arensabé aiq pútare atanéhboq aneq otáq sánsá mirainibo?

**31** Manikáne ehwehnka mahraréna,  
Segá nageheéna wega íopeqté tópah náriuwe ire. *(Kisim Bek 16.4)*  
Mina únserah iteinahbúréhga uworapeq pehipi ko topáh nowe. Minayabe arega aneq otáq sánsá mirainibo uwe.

**32** Uwana Sísaga sensabé, Kawerue írátíáhro. Mósísiga íopeqté tópah íre náriuwe. Nániboga aiq pútaq íopeqté tópah náire.

**33** Manikáne tópah, íopeqté tópah márunáíunká mah kehiná kékíná oga míahrahewe úwe.

**34** Úwara segá wensabé, Mi topáh nái náinúno uwe.

**35** Uwana Sísaga sensabé, Íné oga mía mía topáh múge. Ínéba sira kewé mó íre sirupibiinawire. Ínénabe aiq pútare aintáh kéké mó íre tahbobóoneherawoe.

**36** Itega íné tagéq ínénabe íre aiq pútare aintáhwe teiewóge.

**37** Nániboga nánina kegá ómi ínéba sigehe. Ínéba sira kewé íre kaqsuaníe.

**38** Íre ínénene iwíáh peh íné eqmaq núwéh áníné awahbeh árámbéhri mirainieéna íopeqté tumióge.

**39** Íné eqmaq núwéh áninká teniena, Náwéna ke taqnobagiyeboq kawerue wahnah-natawéwahno. Anehe tanahráqmé náwéna ke iriwe organúq sito ire.

**40** Nániboga teniena, Are nénahni tagéra aiq pútare atáh kéké oga mérapeq awaq miagéhe ire. Tenínsabé mi kewé anehe tanahráq iriwe organúq sitanauge úwe.

**41** Sísaga, Íné íopeqté tumió tópah múge únsabe Asiu kegá sibiahnsa atera seye ehmuniq éhmúníruwe.

**42** Ehmuniq éhmúníréra, Ehweh teí ání wenawíq Sísa wire. We Sósépane ahninkáwá wíre. Wenanoibo tagariona akéq móye. Amahnága wega, Íné íopeqté tumióge irarime árahinsabébo uwe.

**43** Uwana Sísaga sensabé, Iteite abiahnsanue ehmuniq éhmúníriyeho.

**44** Wehukega pehipi ínéba íre sigehe. Peh Nánibo íné eqmaq núwéh áninká sabiri kegá ínéba sigehe. Mi kewé anehe tanahráq iriwe organúq sitaníe.

**45** Manikáne ehweh iraru kene sehiranka mahraréna,  
Manikánka ómi síwáhnorinkehe ire. *(Aisaia 54.13)*  
Nániboga síwáhnori ehwéh íráh kégá ómi ínéba sewe.

**46** Mah kehiná kékínánká Nánibo íre tagahwe. Íné, Maniká míéhrabeqte áninká ínébataq Nánibo tagarauge.

**47** Kawerue írátíáhro. Ínénabe aiq pútare aintáh kéké oga mérapeq awaq míáhwe.

**48** Íné oga mía mía topáh múge.

<sup>49</sup> Pehipi ko topáhmé iteinahbúréhga uworapeq méra naruera íre oga mía pehipi pukuwe.

<sup>50</sup> Íopeqté tópáh tumíónsábé nehra kegá íre pukigehe.

<sup>51</sup> Íné íopeqté oga mía mía topáh mûge. Íné nehra kegá oga mía míaigehe. Mah kehiná kékíná oga mía míaigeheéna íné pukinie. Minayabe náíéna topáhmé néne niwaq mire úwe.

### *Sísaga wene korahqkakáq awaqkakaqsábé irarú ehwehne.*

<sup>52</sup> Asiu kegá seyensabé ehwehéra, Mah aníné awaqme árahue náinkéhbo uwana

<sup>53</sup> Sísaga sensabé, Kawerue írátiáhro. Íné wehukení úku aníné korahqkakáq niwaqkakáq peh áwé tagah kegá oga mérapeq íre awaq míahwe.

<sup>54</sup> Néne korahqkakáq niwaqkakáq nah kegá oga mérapeq aiq awaq míahwe. Mi kewé anehe tanahráq íriwe organúq sitaníe.

<sup>55</sup> Oga mía mía tahutáhúqmé néne korahqkakáq niwaqkakáq míre.

<sup>56</sup> Néne korahqkakáq niwaqkakáq nah kegá ínéba mía míaowe. Ínéga seba mía míauge.

<sup>57</sup> Íné eqmaq núwéh ání, Nánibo oga mía míai puana íné moq oga mía míauge. Íné oga mía míaunserah íné nehra kegá oga mía míaigehe.

<sup>58</sup> Íné íopeqté tú tópáh íre iteinahbúréhga no naneq tahnsáne. Segá pehipi ko topáh naruera íre oga mía míaowe. Íopeqté tú tópáh nehra kegá oga mía míaigehe úwe.

<sup>59</sup> Sísaga mi ehwéh Kápénéáma suwahpeq Asiu kené momiwí nahtápéq síwáhnorúwe.

### *Sísawe organúq itahráhi ehwéhkákáq áníne.*

<sup>60</sup> Áhnte we kéró kega mi ehwéh irera seye náhenéra, Minawé anotah pagégé éhwéh míre. Inseréhga iragéhbo uwe. Inseréhga iragéhbo éra ehmuniq éhmúníruwana

<sup>61</sup> Sísaga wene arupipeq sene ehweh irena sensabé, Amahnága teiú éhwéhnsábé iuwahriehro?

<sup>62</sup> Íné wehukení úku anínká túrabeq mó kionaq tagéq aneq iwíáhonehbo?

<sup>63</sup> Manikáne Awanka organúq ítéhre. Peh wehukega íre miraorahowe. Teiú éhwéhnsábé Manikáne Awanka organúq ítéhre.

<sup>64</sup> Ite mó kegá aiq pútare aintáhwaqme mó kegá íre aiq pútare aintáhwe úwe.

Sísaga wene arupipeq wensabé íre aiq pútare átó kereq wene naruuo koweriranaú anínseq tagario púana mi ehwéh irarúwe.

<sup>65</sup> Sísaga sensabé, Minayabe mah ehwéh teiewómé wehukega pehipi ínéba íre sigehe. Peh Nániboga sabiri kegá ínéba sigehe úwe.

<sup>66</sup> Úwara áhnte we kéró kega Sísa auwera mó íre kérówe.

<sup>67</sup> Sísaga ite airápété téhraníté kérahwána keyábé, Ite moq nuweq pokonehbo úwe.

<sup>68</sup> Úwana Sáimóni Pítaga wensabé, Itene Wahnahno, inseba pokonehnkono? Arene ehwehnka organúq itahráhire.

<sup>69</sup> Are Maniká míéhrabeqte kaweqlaq mía míáona aní móne. Aiq tagarione. Minayabe aiq pútare atone úwe.

<sup>70</sup> Úwana Sísaga itensabé, Ite airápété téhraníté omaq itáráuge. Ite míáhrabeqte ání owainawane anine úwe.

<sup>71</sup> We Sáimóni Ísíkáríótine ahninkáwá Súrásansabé irarúwe. We airápété téhraníté míórabeqte ánínká Sísane naruuo weba koweriranaúwe.

### *Sísaga mó ke táhutahurabeq koragó ehwehne.*

<sup>1</sup> Asiu kegá Sísa subíyehoéna wega Súría marákórápéq íre kuríá peh Kehrari marákórápéq mó ke suwahpeq mó ke suwahperue ah noguwe.

<sup>2</sup> Asiu kegá saqmaq saqmaq nahmarí pearera táhutahuru tanáhráq áhníbóránúwe.

<sup>3</sup> Wenábáqmarinká Sísansabé, Ómi are kéráh kégá arene arambehri taganehboq mahtaq sue Súria marákórápéq pokúno.

<sup>4</sup> Arega anotah aní míankehboq kopípéq arambehriinehboq ábóraq arambehriúno. Arega ótaq sansá mirainaraq mah kehiná kehíná kosokigiúno uwe.

<sup>5</sup> Wenábáqmarinká Sísansabé íre aiq pútare ató púara mi ehwéh iraruwe.

<sup>6</sup> Sísaga sensabé, Amahnága íné anotah aní mío tánáhráq íre suriéhre. Ahriahriwe itene tanáhráre.

<sup>7</sup> Ahbabáq kehinánká itensabé suwahbehre. Sene ahbabáqsabe teriu púana ínénabe suwahriehre.

<sup>8</sup> Iteite táhutahurorabeq pokurero. Íné anotah aní mé tanáhráq íre suriéh púana táhutahurorabeq amahnága íre pokinie

<sup>9</sup> éna Kehrari marákóráq peh mitaq míowe.

<sup>10</sup> Táhutahururabeq wenábáqmarinká kuwana Sísaga epéráhpérue mitaq suena Sarúsarama su wahpeq táhutahururabeq pokúwe.

<sup>11</sup> Sísansabé anebahréra Asiu kegá táhutahururabeq mó kebá mó kebánue kasenéra, Sísa eheq míehro éra kasenuwe.

<sup>12</sup> Míó kega Sísane sánsánsábé ehmuniq éhmúníréra mó kegá, We kaweq aní míre uwara mó kegá, Írakaumo. We péhe ání míre uwe.

<sup>13</sup> Se Asiu kené wahnahmarínsábé áhreu puara Sísa éhweh íre pahsúowe.

<sup>14</sup> Táhutahuru tanáhráq ákáhtaq parabagútaq Sísaga Manikánsabe iwíáh iwíáh atáh náhtápéqté wíráípéq kibekéna síwáhnorúwe.

<sup>15</sup> Síwáhnorúwara Asiu kegá áhtenéra mahraréra, Íre sigarue tagaríeh ání míre. Árahue ahtebia ání úkurairo uwe.

<sup>16</sup> Uwana Sísaga sensabé, Ínéga íwáhnoru ehwéhmé íre ínélataq néne iwíáhe. Mina íné eqmaq núwéh áníné iwíáh wíre.

<sup>17</sup> Ínéga íwáhnoru ehwéhmé Manikáne iwíáhbópoq peh ínélataq néne iwíáhbópoq teiúge iwíáho? Manikáne arambehriyabé arutaboiréna mirainauge iwíáhi anínká néne ehwéhme íre peh ínénéne iwíáh peh Manikáne iwíáh wíre ue tagariankehe.

<sup>18</sup> Wewene ehwéh síwáhnori ánínká wewensabé iwíáh iwíáhire. Eqmaq núwéh ánínásábé iwíáh iwíáh atónsábé íre péhenia peh aiq pútariahnsanuge.

<sup>19</sup> Manikánka sehgóro ú ehwéh Mósísiga naho teiu mino. Mi ehwéh ite íre íráhwe. Amahnága íné subiq sueyabe ite aneqsabé iuwahbehro úwe.

<sup>20</sup> Úwara mío kega wensabé, Owainawanka arene arupipeq míeh púahe wega inserahni iwíáhóne. Are subiq suaneheme inseréhga irareo uwe.

<sup>21</sup> Uwana Sísaga sensabé, Ahrena ahrena wehekáhtáq íné peh morá ótaq sansánunsabé ite iwíáh kikirowe.

<sup>22</sup> Mósísiga naho káriq anímáígáúné síú amurúrue sansa teiuwe. Íre Mósísiga peh iteinahbúréhga mi sansá áhwárarówe. Ite ahrena ahrena wehekáh mi sansámé mira aruqarurowe.

<sup>23</sup> Mósísiga sehgóro ú ehwéh anterúéhneho éq itega mi sansá ahrena ahrena wehekáhnkákáq mira aruqarurowe. Mira aruqarume ínéga ahrena ahrena wehekáh wehukení kaweratáráunsabé árahinsabé abiahnsa aintaho.

<sup>24</sup> Apubúue tagéq íre kaweq iwíáhéq ehwéh aintaho. Peh tábúsoqme iwíáhue tagéq irarero úwe.

### *Sísa inseboue kabaru ehwéhne.*

<sup>25</sup> Táhmaro Sarúsarama su wahpeqte kégá kasenéra, Segá subiq suaneherao anímé mah anípo?

<sup>26</sup> Wega mahtaq ábóraq síwáhnorirara wahnah kegá peh túbah agowe. Túbah agonsabé mah anímé wehuke merirena kaweraritankeheéna Manikánka omaq ato aní míre iwíáhowapómo.

<sup>27</sup> Mi aní wenawahpeq aiq tagarione. Manikánka omaq ato anínká sínaraq wenawah-peq ómiga íre tagariagehe uwe.

<sup>28</sup> Uwana Manikánsabe iwíah íwíah atáh tápéqté mátábúrapéq Sísaga síwáhnorena antahtaq mahraréna, Itega íné tagarione éq nánuwahpeq tagariáhwe. Íné tutaume íre ínélataq néne iwíahga tutauge. Íné eqmaq núwéh ání we aiq pútaq aní míéhraq itega we íre tagariáhwe.

<sup>29</sup> We míéhrabeqte tutaugana wega íné eqmaq núwéh púana ínéga we aiq tagarióge úwe.

<sup>30</sup> Uwara sega wene ehweh irera iwíahéra, We táhtoranéhe uwe. Sísa pukú tanahráq íre surio púara sega peh áwé tagowe.

<sup>31</sup> Áhnte míó kega, Sísansabé aiq pútare atówe atera mahraréra, Sísaga áhnte otáq sánsá mirai puana Manikánka omaq ato anínká sínaraq wega miraína sansánká Sísaga miraurai otáq sánsá kiotaikinabo uwe.

### *Sísa táhtoranehééra párísiwarí eqmaq súó ehwehne.*

<sup>32</sup> Soruparió kega Sísane arambehriyabé ehmuniq éhmúníruwara Péhrasi kegá írówe. Manikáne ehweh mibeq mahbeq arítah kereq Péhrasi kereqka Sísa táhtoranehééra sene párísiwarí eqmaq súówe.

<sup>33</sup> Sísaga mahraréna, Iteba wahto tanahráq ména anehe íné eqmaq núwéh ánípá pokinie.

<sup>34</sup> Itega íné ninebahrirataqmé íre taganeheqmóe. Íné pokonarabeq ite íre kioráhowe úwe.

<sup>35</sup> Úwara Asiu kegá seye mahraréra, We eheq pokinabo? Ite anebahréq we íre tagahrahúnarabeq eheqpo? Mó nahnsó suwahpeqte Asiu kébá pokinabo? Káríki ehwéhno ke suwahpeq pokue síwáhnorinabo?

<sup>36</sup> Ite íné ninebahrirataqmé íre taganeheqmóe ire. Wega irarime íre iahtebóna ehwéhne. Íné pokonarabeq ite íre kioráhowe ire. Wega irarime íre iahtebóna ehwéhne. Mi ehwéhmé aneq ehwéhpómo uwe.

### *Oga mía mía aráhnónsábé éhwéhne.*

<sup>37</sup> Mi tahutáhúré tanáhráq anehete wehekáh tánáhráq anotah tanáhráre. Mi wehekáh Sísaga iriwe ména anotahtaq mahraréna, Ite tahbobóínaraq ínéba sure sewe nahro.

<sup>38</sup> Ínésabe aiq pútare aintáh kéné sirupipeq oga mía mía aráhnó tueruenawire. Manikáne ehwehnka irarinserah sirupipeq oga mía mía aráhnó tueruenawire úwe.

<sup>39</sup> Mah ehwéhnúmé Sísaga Manikáne Awansabé irarúwe. Sísaga Maniká míorabeq íre kirio púana Manikáne Awa íre eqmarowe. Sísaga iwíahéra, Nániboba pokonaraq ínésabe aiq pútare aintáh kébá Manikáne Awa kieqmaranie iwíahúwe.

### *Sísansabé íre peh morá iwíahunsabé éhwéhne.*

<sup>40</sup> Míó kega wene ehweh irera táhmaroga mahraréra, Manikánka naho néne ehweh irarína aní eqmaraníe ú anímé we wire uwe.

<sup>41</sup> Mó kegá mahraréra, Manikánka ite meirena kaweraitankeheéna peh morá ání omaq atowe. We mi aní míre uwara mó táhmaroga mahraréra, Manikánka omaq ato aní íre Kehrari marákórápéqté ání míre.

<sup>42</sup> Manikáne ehwehnka mahraréna, Manikánka omaq ato anímé Tébítí kahnáh ání míre. We Tébítine marakórapeqté Pétáriéma suwahpeqte ání míre ire. (*Buk Song 132.11; Maika 5.2*)

Manikáne sehiranka aiq mahrari mino uwe.

<sup>43</sup> Sísansabé mó kegá mó iwíáhuwara mó kegá mó iwíáhuwe.

<sup>44</sup> Táhmaro kegá táhtoranéhe iwíahéra íre táhtosa pehragowe.

### *Wahnah kereqka íre aiq pútare atáh éhwéhne.*

<sup>45</sup> Eqmaq súó parísíwárínká Manikáne ehweh mibeq mahbeq arítáh kéréq Péhrasi kereqpa kouwekuwe. Kouwekuwara sega sensabé, Aneqsabé Sísa íre meqmeq seo uwe.

<sup>46</sup> Uwara párísiwarínká sensabé, Wega irari éhwéhnká moke mó kené ehweh kiotaikire uwe.

<sup>47</sup> Uwara Péhrasi kegá párísiwarínsábé, Itega moq wene péhe éhwéhnsábé aiq pútare ataho?

<sup>48</sup> Wahnah kereq ite Péhrasi kereqka wensabé íre aiq pútare atona wino.

<sup>49</sup> Manikáne sansá íre írátíáh kégá sebataq Sísansabé aiq pútare atáhwe. Mi ke iraipéq pokoneherao ke wóe uwe.

<sup>50</sup> Níkóríma, menah tanahráq Sísaba sú aninká we Péhrasi anínéna wenawahrah Péhrasi keyábé mahraréna,

<sup>51</sup> Manikánka sehgóro ú ehwehnká anereiro? Wehukení pehipi ehweh ato iro? Írakaumo. Ebeqme wehukeníné ehweh ireq wene arambehri tagariáhro. We ahbabárínarao anehemé ehweh ato ire úwe.

<sup>52</sup> Úwara sega wensabé, Are moq Kehrari marákórápéqté ánipo? Manikáne ehweh púkuipéq kabarue tagáhno. Manikáne ehweh irare kegá Kehrari marákórápéqté íre séyéowe

<sup>53</sup> [éra sene nahtapeq abae aguwe.

## 8

### *Ahbabáq ini Sísaba meqme ku ehwéhne.*

<sup>1</sup> Sísaga Óríwi sawéhrápéq pokúwe.

<sup>2</sup> Ahbiahipeq Sísaga Manikánsabe iwíáh iwíáh atáh náhúpéq kibekúwe. Kibekúwara ómi míó kega weba suwana wega tútuue ména síwáhnorúwe.

<sup>3</sup> Mósísga sehgóro ú ehweh síwáhnoro kereq Péhrasi kereqka ahbabáq ini sabiruera meqmera wehekeq ákahpi móátowe.

<sup>4</sup> Móátéra Sísansabé, Íwáhnoraníno, mah iní mó wehgá abariiraq tagéq táhtoqme meqme súne.

<sup>5</sup> Mósísga sehgóro ú ehwehnká mina tahnsa ahbabáq ininsó ebahtaté tuparuqme subiq súáhro ire. Arewe aneq iwíáhono uwe.

<sup>6</sup> Sísaga íre tábúsoqme irarinaraqmé wensabé ehweh ataneheéra áhwárawe tagéra kasenuwe.

Kasenuwana Sísaga taebewe ayahnkaratáté obe marákóráq sehiranúwe.

<sup>7</sup> Segá mó kasenaq mó kasenaruwana Sísaga iriwe ména sensabé, Íre ahbabári anínká ebeqte ébáh mewe tuparuankéhe

<sup>8</sup> éna mó taebewe ayahnkaratáté marakóraq sehiranúwe.

<sup>9</sup> Mitaq míó kega wene ehweh irera aboawah weh ebeq mótaq mótarue pokuwe. Ómiga Sísa auwera pokuwana Sísaga tútuue míorabeq peh morá mi inínká iriwe míowe.

<sup>10</sup> Sísaga iriwe ména mi inínsábé, Are meqmera se ke eheq míaho? Segá íre ehweh ataho úwana,

<sup>11</sup> Írakaumo úwe. Írakaumo úwana Sísaga wensabé, Ínéga moq íre ehweh ataníe. Pokéwahno. Mó ahbabárinehboq kaweqtáq míahno úwe.]

### *Sísa téhrehnka inserahni anínsábé éhwéhne.*

<sup>12</sup> Sísaga sensabé mó mahraréna, Mah kehiná kékíná míáhrabeq téhrehnka inserahnu aní muge. Íné séníréh ánínká íre sunkíkírirabeq nogena peh kaweqtapéq téhrehrabeq noginkéhe úwe.

<sup>13</sup> Úwara Péhrasi kegá wene ehweh irera wensabé, Arerensabé iraréne. Arene ehweh íre aiq pútaq ehwéhne uwana

<sup>14</sup> Sísaga sensabé, Néne sánsánsábé irarume aiq pútaq ehwéhnuge. Íné tutaurabeqkakáq íné pokinieurabeqkakáq tagarió púana aiq pútaq ehwéhnuge. Íné tutaurabeqkakáq íné pokinieurabeqkakáq íre tagariáhwe.

<sup>15</sup> Wehukenínká iwíáhinserah iwíáhqué ehwéh aintáhwe. Ínéga amahnága moke we-hukeyabé íre ehwéh aitóge.

<sup>16</sup> Ínéga ehwéh aítáhnaraq tábúsoqme ehwéh aitaníe. Nánibo íné eqmaq núwéh áninká ínéba mía míai puana íné íre ahbabáq iwíáhorahéna peh tábúsoqme ehwéh aitaníe.

<sup>17</sup> Itega, Manikáne ehwéh sehgiune eme mi ehwéhnká mahraréna, Téhranítégá morá éhwéhnóyana sene ehwéh aiq pútaq ehwéhne ire.

<sup>18</sup> Néne sánsánsábé teiúgana Nánibo, íné eqmaq núwéh áninká moq néne sánsánsábé teíre úwe.

<sup>19</sup> Úwara sega wensabé, Arenabo eheq míehro uwana Sísaga sensabé, Ínéreq Nániboreq íre tagariáhwe. Íné tagariáhtáq tahirímé Nánibonkakáq tagariáh irino úwe.

<sup>20</sup> Mi ehwéh Manikánsabe iwíáh iwíáh atáh náhtápéq sene móne maqmaru paqnáh wahtotaq Sísaga síwáhnorúwe. Íre we puké tanahráq púara mó kegá we íre táhtoqmera móátówe.

### *Sísaga, Íné pokinieurabeq ite íre kioráhowe ú ehwéhne.*

<sup>21</sup> Sísaga Péhrasi keyábé mó mahraréna, Íné pokinie. Itega íné ninebahréq itene ahbabáqkakaq pukoneheqmóe. Íné pokinieurabeq itega íre kioráhowe úwe.

<sup>22</sup> Úwara Asiu kegá seye náhenéra, Íné pokinieurabeq itega íre kioráhowe ire. Árahinsabé mi ehwéh irariro? Wewega wewe subiqmena pukinabirapómo uwe.

<sup>23</sup> Uwana Sísaga sensabé, Ite mahtaqté ké wóe. Íné iópeqté ání múge. Ite mah marákóípéqté ké wóe. Íné íre mah marákóípéqté ání múge.

<sup>24</sup> Itene ahbabáqkakaq pukoneheqmóe teiúge. Ínénabe áwahe aní míreue íre aiq pútare aintéhrataq itene ahbabáqkakaq pukoneheqmóe úwe.

<sup>25</sup> Úwara sega wensabé, Are insebo uwe. Are insebo uwana Sísaga sensabé, Íné tei teinu aní múge.

<sup>26</sup> Itega miraonsabé áhnte ehwéh kékre. Áhnte ehwéh aitahráhige. Íné eqmaq núwéh ání aiq pútaq aní mía míai puana mah kehiná kékina wega teni tenini ehwéh teiúge úwe.

<sup>27</sup> Sísaga Maniká Wenabonsabé teriuwara mío ke íre írówe.

<sup>28</sup> Sísaga sensabé, Itega íné wehukení úku aní awankátaq tähpawe pankeréhrataq íné wenahni míre éq ahtebagehe. Íre ínénega iwíáhéna iraruge. Peh Nániboga teninsábé teiúge. Minaakaq ahtebagehe.

<sup>29</sup> Íné eqmaq núwéh áninká ínéba mía míaire. Ínéga we awahbeh arámbéhrí kawerue mira aruqarurunsabé wega íre nuwena pokire úwe.

<sup>30</sup> Mi ehwéh irarúnsabe áhnte mío kega wensabé aiq pútare atówe.

### *Aiq pútaq ehwéhnká soraq iuwankéhe i ehwéhne.*

<sup>31</sup> Wene ehwehnsabé, Aiqa pútaq ehwéhne atówana Sísaga sensabé, Itega néne ehwéh págegeue ambubu atiéhrataqmé peh mi tanáhráq aiq pútaq íné séníráh ké míagehe.

<sup>32</sup> Íné séníréhrataq aiq pútaq ehwéh ahtebehrana mi ehwéhnká soraq iuwankéhe úwe.

<sup>33</sup> Úwara sega wensabé, Ite Ébáráhma kahnáh míonara mó kegá náhgáqtate íre iyarówe. Minayabe ite soraq iuwankéhe irarenawe árahinsabé irareno uwe.

<sup>34</sup> Uwana Sísaga sensabé, Kawerue írátiáhro. Ahbabáq aruqaruro ke sene ahbabáqka iyaréhre.

<sup>35</sup> Ahbabáqka iyaréh kégá Nánibone nahtapeq íre míahrahowe. Írakaumo. Peh morá wene animárinká mía míawewe.

<sup>36</sup> Íné Manikáne ahninkáwágá pugeq iuwáhnaraq ahbabáqka mó íre iyarahráhire.

<sup>37</sup> Íné tagaríomé ite Ébáráhma kahnáh míáhwe. We kahnáh méq itene irupipeq néne ehwehnka íre kagai puaq itega íné nubonehe íwíáhowe.

<sup>38</sup> Nániboga íné sokigi anínsábé teiúge. Itewe iteriboga íwáhnori sansá mira aruqarurowe úwe.

### *Owainawane sánsásábé éhwéhne.*

<sup>39</sup> Péhrasi kegá Sísansabé, Ébáráhma iteribo wire uwe. Uwana Sísaga sensabé, Ite Ébáráhmane animárí míáhtáq tahirí wene sánsá mirao irino.

<sup>40</sup> Aiq pútaq ehwéh Nániboga teni tenini ehwéh teiúgaq itega íné nubonehe íwíáhowe. Itega mira onserah Ébáráhmaga íre miraúwe.

<sup>41</sup> Iteriboga mira aruqarurinserah miraowe úwara sega wensabé, Iteinoréh ahbabáq ininsó míáhwe íwíáhono? Iteribo íre áhnte, peh morá Manikáne uwana

<sup>42</sup> Sísaga sensabé, Maniká Iteribo iraq tahirímé ínénabe irutaboiraintáh irino. Maniká míéhrabeqte tumióge. Íre néne iwíáhga tumióge. Manikánka eqmaq núwátáirana tumióge.

<sup>43</sup> Néne ehweh árahinsabé íre iraho? Itega néne ehweh iuwahrieh puaq íre íráhwe.

<sup>44</sup> Ite owainawane animárí móe. Owainawanka ahbabáq sansansábé awahbehnserah itega wene sánsá miraéyabe iuwahbehre. Áawahewé we mó ke subiq suo ani míowe. We íre aiq pútari ani míéh púana péhe ehwéh tei teinire. Wega péhe ání ména péhe sánsá áhwáró púana péhe ehwéh tei teinire. Wene sánsáne.

<sup>45</sup> Íné aiq pútaq ehwéh teiúnsábé itewe íre aiq pútare aintáhwe.

<sup>46</sup> Íné ahbabáq ani míre irarénawe insega irariro? Íné aiq pútaq ehwéh teiúmé aneqsabé íre aiq pútare aintaho?

<sup>47</sup> Manikáne animárínká wene ehweh íráhwe. Ite íre wene animárí míáh púaq wene ehweh íre íráhwe úwe.

### *Sísaga, Ébáráhma íre míotaq míáhwa aní múde ú ehwehne.*

<sup>48</sup> Asiu kegá wensabé, Are Sámária marákórápéqté ání míahnana owainawanka arene arupipeq míéhre. Aiq pútaq ehwéh irarúne uwana

<sup>49</sup> Sísaga sensabé, Nirupipeq owainawa íre míéhre. Nánibonsabé iwíáh íwíáhugaq itega ínénabe íre kaweq ehwéh aintáhwe.

<sup>50</sup> Anotah aní míómé íre ínénéne iwíáhe. Nánibo mah kehíná kékíná saraqmarahna aninká wewega anotah aní míahno aintéhre.

<sup>51</sup> Kawerue írátíáhro. Néne ehweh irera néne sánsá sehgíra kewé íre pukigehe úwe.

<sup>52</sup> Úwara Asiu kegá wensabé, Owainawanka arene arupipeq míéhraq amahnága aiq tagarione. Néne ehweh irera néne sánsá sehgíra kewé íre pukigehe eno? Ébáráhmareq Manikáne ehweh iraru kereq ómi puku mino.

<sup>53</sup> Ébáráhma iteribo pukúnsabe arega, Íné Ébáráhma kiotaiqme aní míóge íwíáhono? Are iwíáhónawe inseúge íwíáhono uwe.

<sup>54</sup> Uwana Sísaga sensabé, Ínéga ínénénsabe iwíáh íwíáhutaq tahirímé mina abehq náneq úki irino. Nániboga ínénabe iwíáh íwíáh aintéhre. Nánibo itene Manikáne eme

<sup>55</sup> itega we íre tagaríáhwe. Ínéga we tagaríóge. Ínéga we íre tagaríóge teiútáq tahirímé íné ite tahnsá péhe ání míó irino. Ínéwe we aiq tagaríóge. Wene ehweh irena wene sánsá mira aruqaruruge.

<sup>56</sup> Iteinahbú Ébáráhmaga íné tanáhráqsábé iwíáhue níwénunéna iwíáh íwíáhúwe. Anehe íné tagéna wene arupipeq eyoyóúwe úwara

<sup>57</sup> Asiu kegá wensabé, Are íre aboawah weh míahna puah Ébáráhmawe árahue tagari-ahno uwe.

<sup>58</sup> Uwana Sísaga sensabé, Kawerue írátíáhro. Ébáráhmawe íre míotaq míáhwa aní múde úwe.

<sup>59</sup> Mi ehwéh irera sega ebahtaté tuparuqme subiq suaneheéra mi ebáh kabarue meyówe. Meyówana Sísaga taqnobague Manikánsabe iwíáh íwíáh atáh náhtápéqté tueyokúwe.

## 9

### *Aura pira ání kawerato ehwehne.*

<sup>1</sup> Sísaga ah nogutaq aura pira ání, ítaq mahbí tagówe.

<sup>2</sup> Wenanoga maqmiotaq aura pira ání maqmarowe. Ite we kéráhwána kegá Sísansabé, Íwáhnoraníno, wenanoga aura pira ání maqmaronsabe insega ahbabárúo? Aura pira áninká ahbabárúo? Wenanoiboga ahbabáruyao? Insega ahbabárúo kasenowane.

<sup>3</sup> Kasenowanana Sísaga itensabé, Íre wereq wenanoiboreqne ahbabáqsabe aura pira ání míehre. Itega Manikáne arambehri tagageheéna we aura pira ání míehre.

<sup>4</sup> Íné eqmaq núwéh áníné arambehri téhrehtaq miraonehe. Penkínaraq ómiga íre arambehriorahúne.

<sup>5</sup> Ínéwé mah marákó márákó mé tanahráqmé mah kehiná kékíná míáhrabeq téhrehnka inserahnu ání mûge úwe.

<sup>6</sup> Miraréna marakóraq tehqniarena wene ayahnkaratáté marakó abirotuwana seraweh úkúwe. Mi seráwéhráté aura pira áníné aurátaq abaq marena

<sup>7</sup> wensabé, Síróáma kawéhúpípéq móbabeq paberúno úwe. Sene ehwehme Síróámawe eqmaréh ání míre. Móbabeq paberúno úwana wega pokue móbabeq paberúwana wene aura kaweragúwana kouwekúwe.

<sup>8</sup> We aura pira ání míotaq ineh inehúwara wenawahrahreq mó kerekka taga tagauwe. Wega kouwekútaq mi kegá aura kaweragú ání tagéra mahraréra, Mi anímé tútuue ména ineh inehi anímé webo kasenuwe.

<sup>9</sup> Mó kegá, We wire uwara mó kegá, Irakaumo. Peh we tahnsá ání míre uwe. Uwana mi aninká mahraréna, Ite irare anímé íné úge úwe.

<sup>10</sup> Úwara sega wensabé, Arene aura árahue kaweragiro uwana

<sup>11</sup> wega sensabé, Sísae ue áwírató aninká serawehraté niurapi abaq intena ínésabe, Síróáma kawéhúpípéq móbabeq paberúno tenírana móbabeq paberugana niura kawera-gire úwe.

<sup>12</sup> Úwara sega wensabé, We eheq míehro uwana, Íné íre tagaríóge úwe.

### *Sísaga kaweratonsabe Péhrasi kegá ehwehu ehwéhne.*

<sup>13</sup> Segá aura kaweragú ání meqmera Péhrasi kebá móátówe.

<sup>14</sup> Sísaga seraweh mirarena wene aura kawerato tanáhráq ahrena ahrena wehekáhne.

<sup>15</sup> Péhrasi kegá aura kaweragú anínsábé kasenéra, Arene aura árahue kawera-giro uwana wega sensabé, Serawehraté niurapi abaq intéhrana pabeq paberugana amahnága niura kaweragire úwe.

<sup>16</sup> Úwara mó Péhrasi kegá mahraréra, We ahrena ahrena wehekáhté sásá anetaníbo íwíáhi puana we íre Manikánka eqmaréh ání míre uwe. Uwara mó kegá mahraréra, We ahbabáq ani tahirímé mina tahnása ótág sásá árahue mirai iripo uwe. Mó kegá mó íwíáhuwara mó kegá mó íwíáhuwe.

<sup>17</sup> Segá aura kaweragú anínsábé mó kasenéra, Arene aura kaweratéh anínsábé, Arega aneq íwíáhono uwana, We Manikáne ehweh irari ání míre úwe.

<sup>18</sup> Sísaga aura pira ání kaweratonsabe Asiu kegá íre aiq pútare ató púara wenanoibo akéqsábé síáhrabue kasenuwe.

<sup>19</sup> Kasenéra, Mah aní itenahnipo? Maqmíónaraq aura pigúo? Amahnága wene aura árahue kaweragiro uwe.

<sup>20</sup> Uwara wenanoiboga sensabé, We itenahni míre. Teh maqmarahwáyataq aura pira ání maqatahwáye. Mina aiq tagarioye.

<sup>21</sup> Amahnága we tagahrahinsabé íre tagarioye. Wene aura kaweratéh ání íre tagarioye. Wensabé kaseniranao. We anonani púana irarerahire uye.

<sup>22</sup> Wenanoibo akéqká Asiu keyábé áhreuya puara mi ehwéh iraruye. Wene aura íre kaweragútaq Asiu kegá sío sóéra, Sísawe aiq pútaq ite meirena kaweraitankeheéna Manikánka omaq ato aní míre atáh ké momiwí nahtápéqté kaqsuanéhe uwe.

<sup>23</sup> Minayabe wenanoibo akéqká Asiu keyábé, We anonani míre. Kaseniranao uye.

<sup>24</sup> Asiu kegá aura kawerato anínsabé mó áhrabéra wensabé, Peh morá Manikánsabe iwíáh íwíáh ato. Ite tagarionawe arega iraréna anímé ahbabáq ani míre uwe.

<sup>25</sup> Uwana wega sensabé, We ahbabáq anipómo. Íné íre tagarióge. Íné aura pira ání mía míaugana amahnága néne niura kaweraintéhre. Peh mina aiq tagarióge úwe.

<sup>26</sup> Úwara sega wensabé, Wega aneq miratehro? Arene aura árahue kaweratehro uwe.

<sup>27</sup> Uwana wega sensabé, Métáq teiúgaqme íre íráhwe. Mónkakáq aneqsabé teinínkono? Ite moq we kéránéhbo úwe.

<sup>28</sup> Úwara wensabé ehweh atera, Are we kéráhna aní míahnaq ite Mósísi kéróna anímári múné.

<sup>29</sup> Manikánka Mósísi ehweh teawuwaq aiq írátíone. Arega iraréna anímé eheqte anípómo. Ite íre tagarione uwe.

<sup>30</sup> Uwana wega sensabé, Wenawahpeq íre tagariáh áninká niura kaweraintéhnsabé áhthené sansane.

<sup>31</sup> Manikánka ahbabáq kene ehweh íre íréhre. Manikánsabe iwíáh íwíáh atáh kewé Maniká awahbeh arámbéhri sehgó kewé Manikánka mi kené ehweh íréhre. Mina aiq tagarione.

<sup>32</sup> Naho mó kegá aura pira áníné aura íre kaweratowe.

<sup>33</sup> Néne niura kaweraintéh ání Manikánka eqmaréh áníne. We peh wehukení tahirímé niura íre kaweraintahráhi irino úwe.

<sup>34</sup> Úwana sega wensabé, Are ahbabárorabeqte ání móne. Árahue íwáhnorinibo éra we momiwí nahtápéqté kaqsúowe.

### *Kaweragú anínká Sísansabé aiq pútare ato ehwehne.*

<sup>35</sup> Sísaga we kaqsue ehweh irena mi aní tagéna wensabé, Wehukení úku anínsabé aiq pútare aintahno úwana

<sup>36</sup> wega Sísansabé, Are wehukení úkóna anípo? Arensabé aiq pútare ataníboq tenio úwe.

<sup>37</sup> Úwana Sísaga wensabé, Arega íné wehukení úkurau aní aiq tagáhne. Amahnága ehweh teawú ání íné úge úwe.

<sup>38</sup> Íné úge úwana wega Sísansabé, Néne Wahnah mone. Arensabé aiq pútare atóge éna iwíáh íwíáh atowe.

<sup>39</sup> Sísaga mahraréna, Wehuke saraqmaranieéna marakóipeq tumíarauge. Tumíaraunsabé aura pira kégá tagariagehe. Ite aiq tagarione íwíáho ke íre tagariahraho ke úkigehe úwe.

<sup>40</sup> Úwara Sísareq mío Péhrasi kegá wene ehweh irera wensabé, Ite moq íre tagari-ahrahúna keabuno uwe.

<sup>41</sup> Úwana Sísaga sensabé ite aura pira ké míáhtáq tahirímé itene ahbabáq íre kaga irino. Itega tagarione ensabé itene ahbabáq peh kagaire úwe.

## 10

### *Sipisípiqsabé pabeqme ehwéhne.*

<sup>1</sup> Sísaga mó mahraréna, Kawerue írátíáhro. Sipisípiqmarí kaegaeorabeqte ónsárápéq íre ségia móbeq séorgesáhago kewé se aebó kééra subónehboq náio e ke wóe.

<sup>2</sup> Onsarapéq séyéi anímé we sipisípiqmaríné wahnah mire.

<sup>3</sup> Sipisípiqmaríná wene ehweh íráhwana méhpchte wáhnáhnká onsa siaréhre. Sene wahnahnka wene sipisípiqmarínsabé sensíwírue síáhrabéna ebeq túírara anehe tueráhwe.

<sup>4</sup> Wene sipisípiqmarí máhpeq moke tuegue we ebeq pokirara wene ehweh íráh púara anehe kaqme kéráhwe.

<sup>5</sup> Se mó aní íre kéráhwe. Wene ehweh íre íráh púara áhreéra kobeq séberowe úwe.

<sup>6</sup> Sísaga mi pabéqmé éhwéh síwáhnorúwara míó kega mi ehwéhnsábé íre ahtebowe.

<sup>7</sup> Sísaga mó mahraréna, Kawerue írátíáhro. Íné sipisípiqmarí kagaeorabeqte ónsá uge.

<sup>8</sup> Íné mahtaq íre míáhwataq su kewé se aebó ké éra subónehboq náio e ke wóe. Sipisípiqmarínká sene ehweh íre írówe.

<sup>9</sup> Íné onsa uge. Manikánka ínélbansabé kira ke kaweraritankéhe. Kaweraritahnara méhpehpeq kierueue táhutahuq nagehe.

<sup>10</sup> Aebó kégá aebóoneheéra sewe. Subiq suaneheéra sewe. Moke íre kaweraruaneheéra sewe. Ínélwé ite oga mía míageheéna tumíarauge. Oga mía mía sansánká itene irupipeq obenkítiankeheéna tumíarauge.

<sup>11</sup> Íné sipisípiqmaríné kaweq Wahnáh múge. Kaweq wahnáhniká sipisípiqmarí séhréh aritankehéna pukorahire.

<sup>12</sup> Mó anínká íre sene wahnahnurá peh arambehri aní púana sipisípiqmarítáq íre kaweq wahnáhnarítéhre. Wega wahnahnirana úrinsi iá sirana tagéna we péhnehoéna áhre pehbeheráh pokire. Íre wene sipisípiqmarí púana suena pokire. Pokirana úrinsi iánká sipisípiqmarí subipáhqnahpahrirara kobeq séberowe.

<sup>13</sup> We peh arambehri ání míéh púana sipisípiqmarínsábé anetaníbo íwíáhéra suena pokire úwe.

<sup>14-15</sup> Sísaga mó mahraréna, Ínéga Nánibo tagariógana wega íné tagariéhre. Itega tagariyanserah néne sipisípiqmarí tagariógara sega íné tagariáhwe. Íné sipisípiqmaríné kaweq Wahnáh múge. Sipisípiqmarí oga mía míageheéna pukinie.

<sup>16</sup> Íre peh morá mahtaqté sípísípíq wahnahnatióge. Mó sipísípíkákáq wahnahninauge. Segá néne ehweh iragéhe. Mi tanáhráq sipisípiqmarí moke peh morá sípísípíq nansó tahnsa míagehe. Ínélbataq sene Wahnah míanauge.

<sup>17</sup> Íné mó oga úkinieéna pukinie. Minayabe Nániboga ínénabe arutaboíraintéhre.

<sup>18</sup> Íre mó kegá iwiáhue nubiq suagéhe. Peh ínénega iwiáhue pukinie. Íné iwiáhu tanáhráq pukéna mó oga úkinauge. Minayabe Nániboga, miraúno aintaráire úwe.

<sup>19</sup> Sísane ehwehnsabé mó Asiu kegá mó iwiáhuwara mó Asiu kegá mó iwiáhuwe.

<sup>20</sup> Íregáritaq míó kega iraréra, Owainawanka wene arupipeq míéhnsábé we uwoyansa aní úkire. Wene ehweh aneqsabé iraho uwe.

<sup>21</sup> Uwara mó kegá iraréra, Owainawanka wene arupipeq míéh ánínká mahna tahnsa éhwéh íre íwáhnororahi mino. Owainawanka aura pira ání íre kaweratahráhi mino uwe.

### *Mó kegá ite Manikáne ayahpíte íre meirahráhowe i ehwéhne.*

<sup>22</sup> Manikánsabe iwiáh íwíáh atáh náhtápéq onsa sie iahreraq ko táhútáhúq tánáhráq Sísa Sarúsarama suwahpeq míowe. Mi tanáhráq ehbiehbeq tanáhráre.

<sup>23</sup> Sísaga Manikánsabe iwiáh íwíáh atáh náhtápéqté wíráípéq noguwe. Mi mapéq Sórómóni, anotah wahnáh ánínká pearowe. Sísaga mitaq noguwara

<sup>24</sup> Asiu kegá weba sáhatawéra wensabé, Págege ehwéh iuwahriehre. Árahtaq pahsuaníbo? Ite meirena kaweraitankeheéna Manikánka omaq ato anímé arewe webo? Pahsuqme teio uwe.

<sup>25</sup> Uwana Sísaga sensabé, Teiátáugaqme ite íre aiq pútare aintáhwe. Nánibo awahbeh arámbéhríunka néne sánsá tei teinire.

<sup>26</sup> Ite íre néne sipisípiqmarí míáh púaq ínénabe íre aiq pútare aintáhwe.

<sup>27</sup> Néne sipisípiqmarínká néne ehweh irera séníráhwe. Séníráhwana se tagarawéna organúq sítóge.

**28** Oganúq sítogara se ahriahri íre taqnobagia niuráq matíó púara mó kegá se néne niyahpíte íre merirahráhowe.

**29** Nániboga ínéba sewiáhro arítéhrara ínéba sewiáhwe. Nániboga moke kiotaqme aní míeh púana wega auráq matiéh púara mó kegá se wene ayahpíte íre merirahráhowe.

**30** Nániboreq ínéreq monseráh ánité úye úwe.

### *Sísaga Asiu ke teriu ehwehne.*

**31** Asiu kegá Sísa subiq suaneheéra ebahmarí móñkakáq sirówe.

**32** Sísaga sensabé, Nániboga kaweq arámbéhríuno tenínsábé, Wehuke kawerinieéna kaweq arámbéhríugaq tagahwe. Ah arámbéhríunsabé ebahtsatate nubonehe ewo úwe.

**33** Úwara Asiu kegá wensabé, Are kaweq arámbéhríónayabé íre subiq suanéhe. Arega Manikánsabe éhruruónayabé subiq suanéhe. Are peh wehukení méwé Maniká múde énayabé suboneheqmúne uwe.

**34** Uwana wega sensabé, Manikáne ehwehnka mahraréna,  
Ínéga itensabé, Ite manikámari móe atoge ire.

(Buk Song 82.6)

**35** Wene ehweh író keyabé, manikámari móe aritowe. Ite tagarionawe Manikáne ehweh ahriahri aiq pútaq ehwéhne.

**36** Manikánka omaq intena mah marákó márakóípéq eqmaq núwátáire. Íné Manikáne ah-ninkáwá úge irarunsabé aneqsabé abiahnsa ainteq Manikánsabe éhruru atahne irareo?

**37** Íné Nánibone arambehri íre mirautaq tahirímé néne ehwehnsabé anetaníbo íwíahonsabé aiq kaweri irino.

**38** Ínénsabe íre aiq pútare aintáhwe. Kaweq arámbéhríu puaq mi arámbéhríyábé aiq pútare atáhro. Nániboga ínéba mía míairana ínéga Nániboba mía míauge. Minayabe itega kawerue iragéhboq néne arambehriyabé aiq pútare aintáhro úwe.

**39** Segá we mó táhtoraneheéra uwana Sísaga se suena pokúwe.

**40** Sísaga Sorana aroipéq seberaebéq Sóniga wání meriurabeq mó pokue kowíowe.

**41** Kowíowara áhnte kegá weba séra seye náhenéra, Sóniga ótaq sansá íre miraire. Minayabe anetaníbo. Mah anínsábé Sóniga moke irarurai ehwéh aiq pútaq ehwéhne uwe.

**42** Mitaq áhnte kegá Sísansabé aiq pútare atówe.

## 11

### *Árásárúsi pukú ehwehne.*

**1** Wehukení wenawíq Árásárúsi awahreúwe. Wene anahnowáraráre sensíwíq Máhríareq Máhtarere. Se Pétáni su wahpeqte se ayobioqnáhnahne.

**2** Mó tanáhráq Máhríawe Sísame aigárátáq wéri abaq marena wene ayahrataté abaearowe. Weniyooq Árásárúsi awahreúwe.

**3** Árásárúsi awahreú púara wenanahnorarégá mó aní Sísa eqmaróye. Eqmaróya anínká Sísansabé, Arega arutaboiratahna anímé anotah awáhréire teawuwe.

**4** Sísaga mi ehwéh irena mahraréna, Íre puké awáhré wíre. Mókake Manikánseq íné wenahninseqsabé iwíah aitachehééna amahnága we awahreire úwe.

**5** Sísaga se ayobioqnáhnahnsabé arutaboiraritená

**6** Árásárúsi awahreire ú irena téhtaréráq mitaq míowe.

**7** Téhtaréráq ména ite we kérähwána keyábé, Súria marákórápéq mó pokonehe úwe.

**8** Úwaq itega wensabé, Íwáhnoraníno, menah Asiu kegá ebahtsatate are subonehe íwíahurowe. Arega mitaq mó pokinibo ewane.

**9** Ewanana Sísaga itensabé, Pópoqnah kiembogi tanáhráqmé, wéhékáh tanahráqmé, tun-sorerí tánáhráqmé, mina moke térehre tanáhráre. Mi tanáhráq nogó ké íre inahnsubówe. Térehre puara ah nogómé íre inahnsubówe.

<sup>10</sup> Inokáhpeq tanáhráqmé sunkíkíri puara ah nogómé inahnsubówe úwe.

<sup>11</sup> Sísaga itensabé mó mahraréna, Itene iyahnabo aní Árásárúsi aiq sugéhre. Sugéh púana koiri auwaníe úwaq

<sup>12</sup> itega wensabé, Itene Wahnahno, amahnága we sugéhnsábé mókake kaweraginæ ewane.

<sup>13</sup> Sísaga wewene arupipeq tagariomé Árásárúsi aiq pukire íwíahúwe. Iwíahéna Árásárúsi sugéhre teiuwe. Ite we kérahwána kegá mi ehwéh ireq Árásárúsi peh sugéhre íwíahowane.

<sup>14</sup> Sísaga itensabé pahsuqme teiena, Árásárúsiwe aiq pukire.

<sup>15</sup> Itega aiq pútare aintageheéna íné íre míónsábé pukime aiq kawerire. Puki aní koraganehboq máhoro úwe.

<sup>16</sup> Tómáhsí wene wéhuwehu áwíqmé Tírimásie. Wega itensabé, Sísa subiq súéhrataq ite moq subiq suagéhboq kéranéhe úwe.

### *Sísaga, Oganúq sitahráhu aní múge ú ehwehne.*

<sup>17</sup> Sísaga Pétáni suwahpeq áhníbórá súwana mó anínká weba séna wensabé, Árásárúsi maisatówana itaréitaréráq kéhre úwe.

<sup>18</sup> Pétáni suwahpeq Sarúsarama suwahpeq wahto kowara

<sup>19</sup> áhnte Asiu kegá Máhtareq Máhríareqne siyoqkawa aiq pukire u irera se ónanahne siru ukiq sitaneheéra Pétáni suwahpeq seba suwe.

<sup>20</sup> Máhriawe nahtapeq míowana Máhtaga Sísa áhníbórá sire u irena Máhría auwena Sísa koweranieéna ahtapeq pokúwe.

<sup>21</sup> Pokéna Sísaba séna wensabé, Néne Wahnahno, are mahtaq míaronaraq tahirímé iteriyoq íre pukurai irino.

<sup>22</sup> Íné iwíahume amahnágaákáq arega Manikánsabe miraúno inaraqmé mirainkehe úwe.

<sup>23</sup> Úwana Sísaga Máhtansabé, Iteriyoq mó kieiriginkehe úwana

<sup>24</sup> Máhtaga wensabé, Íné iwíahume anehe tanahráq we mó kie iriginkehe úwana

<sup>25</sup> Sísaga wensabé, Íné pusa ké irigoro aritahráhu aní múge. Íné organúq sitahráhu aní múge. Ínénabe aiq pútare aintáh kégá pukéra mó oga úkuwe mía míagehe.

<sup>26</sup> Ínénabe aiq pútare aintáh kégá oga méra íre airaiq pukigehe. Minayabe aiq pútare aintahno úwe.

<sup>27</sup> Úwana Máhtaga Sísansabé kowe atena, Are Manikáne ahninkáwá wóne. Arewe ite meirena kaweraitankeheéna Manikánka omaq ato aní móne. Minayabe aiq pútare atóge úwe.

### *Sísaga Árásárúsinabé arutaboiréna ibisó ehwéhne.*

<sup>28</sup> Aiq pútare atóge éna Máhtaga pokue Máhríaba kéna epéráhpéréna, Íwáhnori aní séna arensabé áhrabire úwe.

<sup>29</sup> Arensabé áhrabire ú irena Máhríaga apubúue kie irigue Sísaba pokúwe.

<sup>30</sup> Sísaga se ónanahne nahtapeq íre séna Máhtaga kowerorabeq míowe.

<sup>31</sup> Asiu kegá Máhríane aru ukiq ataneheéra wene nahtapeq míowe. Míowana Máhríaga apubúue kieirigue pokúwara tagéra kérówe. Árásárúsi maisarórabeq ibisanieéna pokire íwíahéra kérówe.

<sup>32</sup> Máhríaga Sísa míorabeq séna we tagéna wene aigárátáq arehunseraráq sewéna wensabé, Are mahtaq míaronaraq tahirímé iteriyoq íre pukurai irino úwe.

<sup>33</sup> Máhríareq we kéró Asiu kerekka ibisowana Sísaga tagéna sensabé anotah arútábóíraritena wene arupipeq págegeúwe.

<sup>34</sup> Sísaga sensabé, Eheq maisatoo úwara sega wensabé, Itene Wahnahno, seragáhno uwé.

<sup>35</sup> Uwana Sísaga ibisówe.

**36** Wega ibisónsabe Asiu kegá iraréra, Tagahro. Pukurai anínsábé anotah arútábóiratéhre uwe.

**37** Táhmaro mío kega mahraréra, Aura pira ání kaweratárái puana Árásárúsi pukinauritaq wega aneqsabé íre segaweratáráiro uwe.

### *Sísaga Árásárúsi organúq ato ehwehne.*

**38** Sísane arupipeq anotahtaq umeh aguwana maisarórabeq pokéna Árásárúsi maisia máíqtáq ebah kowana tagéna

**39** sensabé, Ebah meruáhro úwe. Úwana Máhta pukú aníné anahnowágá wensabé, Itene Wahnhaho, itaréitaré wéhékáh kék púana amahnága anotah karésá kúnkúninawire úwe.

**40** Úwana Sísaga wensabé, Arega aiq pútare ainte Maniká míéhrabeqte ótáq sánsá tagankehe teawú mino úwe.

**41** Úwara sega ebah merúówana Sísaga íópeq tagéna Manikánsabe, Nániboo, néne ehweh irahnayabé kaweróne atóge.

**42** Íné írátiómé néne ehweh ahriahri aiq irahne. Arega eqmaq núwátónayabé moke mahtaq iriwe míáh kégá aiq pútare atageheéna mah ehwéh teawúge úwe.

**43** Teawúge éna Sísaga anotahtaq áhrabéna, Árásárúsio, máhpeq tueyokúno úwe.

**44** Úwana pukú anínká tueyokúwe. Maisarówana wene aigará ayahnkara úbíqmáró ambántánkákáq tueyokúwe. Moke wene auranabiahnkakaq ambantataté úbíqmé maisarówana minawarininkákáq tueyokúwe. Sísaga sensabé, Ambantamarí pugeq áuwáhro úwe.

### *Wahnah kegá Sísá subiq suaneheéra moraénu ehwéhne.*

(Mátíyu 26.1-5; Mákha 14.1-2; Árúka 22.1-2)

**45** Áhnte Asiu kegá Máhríareq siru ukiqsitaneheéra organúq atonsabe tagéra Sísansabé aiq pútare atówe.

**46** Peh táhmaro tago kegá Péhrasi kebá pokue Sísaga miraúnsabe teríúwe.

**47** Manikáne ehweh mibeq mahbeq arítáh kéreq Péhrasi kereqka mó kaunsírí ké síáhrabéra momiwíue sío síoéra, Aneronehnkono? Mi anínká áhnte otáq sánsá mira aruqarurire.

**48** Itega pehragahnaraq wega mó mina inserahninawire. Minayabe ómiga wensabé aiq pútare atagéhe. Mirairataq Aroma kegá séra itega Manikánsabe iwiáh iwiáh atona nah sokoruera itereq iteruwahrahreq íre kaweraitagéhe.

**49** Mi tanáhráq Manikáne ehweh mibeq mahbeq arítáh kéné wahnah wenawíq Káiyápásaga sensabé, Ite íre íráh ké wóe.

**50** Iteruwahrah ómi pukiyehboq peh morá ánínká iteruwahrah kaweraitanieéna pukinkehe. Mina aiq kawerire. Árahinsabé íre iraho úwe.

**51** Káiyápásaga wewega íre iwiáhue irarúwe. Mi tanáhráq we Manikáne ehweh mibeq mahbeq arítáh kéné wahnah mío púana Manikáne Awanka wene arupipeq iwiáh atowana mi ehwéh irarúwe.

**52** Íre peh morá Asiu ke kaweraritanieéna pukinkehe. Moke Manikáne animári peh mahnnana míáhnsábé morábí míageheéna pukinkehe.

**53** Mi tanáhráqté sío síoéra, Sísawe árahue subiq suanéhnkono iwiáhuwe.

**54** Minayabe Sísaga Asiu ke míórabeq íre ábóraq noguwe. Wega mitaq suena Épáráíma suwahpeq anotah uwórápéq wahto kowana mitaq pokúwe. Werek ite we kérähwána kereqka mitaq kowíahwane.

**55** Ite Asiu kené sótaikú iahreraq ko tánáhráq wahtotarútaq áhnte Asiu kegá Sarúsarama suwahpeq mósosuaneheéra pokuwe.

**56** Sega Sísansabé anebahréra Manikánsabe iwiáh iwiáh atáh náhtápéq míótaq seyensabé, Aneq iwiáho? Mah tahutáhúrnarabeq Sísá íre sinawire iwiáho uwe.

<sup>57</sup> Manikáne ehweh mibeq mahbeq arítáh kéréq Péhrasi kerekka ómiyabé, Sísa karábúsi aranéhboq tagehrataq sereíero uwe.

## 12

*Máhríaga Sísane aigárátáq wéri abaq ato ehwehne.*

(Mátíyu 26.6-13; Mákha 14.3-9)

<sup>1</sup> Ite Asiu kené sótaikú iahreraq ko tánáhráq áhnibóránútaq abapete morá wéhékáh kotaq Sísaga Pétáni suwahpeq Árásárúsi, iriato ani nawahpeq kúwe.

<sup>2</sup> Segá penahnarabeqsabé táchútahúq áwúwe. Máhtaga tíwe náriuwara Árásárúsireq mó kerekq Sísarerue moráráq táchutahuruwe.

<sup>3</sup> Máhríaga kaweq werí áhnte moné tahnsa wéri Sísane aigárátáq antiarena wene íre wahto ayáhrátaté sobarúq auwowe. Mi werí kaweq kunkúni werí púana nahupeq moke kaweq kungúnúwe.

<sup>4</sup> Sísa kéro aní, wene naruo koweriranaú aní wenawíq Súrásae. We mó awíq Ísíkáriótie.

<sup>5</sup> Wega Sísansabé, Mi werí áhnte moné tahnsa wéríe. Aneqsabé mi werí 300 móne paiqmarena mi moné tabonah ke íre náriro úwe.

<sup>6</sup> Mi ehwéhmé Súrásaga tabonah keyabé íre arutaboiraritasa pehipi irarúwe. We aebó aní púana irarúwe. Itene morábí móne únáhtáq wahnahnéna mi moné aebó mewe paiqna paiqnaúwe.

<sup>7</sup> Sísaga sensabé, Mi iní pehragatáhro. Íné maisaréhrataqsabé mi werí abaq intéhre.

<sup>8</sup> Tabonah kewe ahriahri iteba mía míowe. Ínédé ahriahri iteba íre mía míainie úwe.

*Árásárúsi subiq suanehe u ehwéhne.*

<sup>9</sup> Áhnte Asiu kegá Pétáni suwahpeq Sísa míéhre u irera mitaq suwe. Íre peh morá Sísa tagéyabe suwe. Árásárúsi Sísaga organúq ato aninseq taganeheéra suwe.

<sup>10</sup> Manikáne ehweh mibeq mahbeq arítáh kégá Árásárúsi moq subiq suanehe éra sío síouwe.

<sup>11</sup> Árásárúsi organúq atonsabe tagéra áhnte Asiu kegá Manikáne ehweh mibeq mahbeq arítáh kék suera Sísansabé aiq pútare ató púara Árásárúsi moq subiq suanehe íwíáhuwe.

*Sísaga Sarúsarama suwahpeq kú ehwéhne.*

(Mátíyu 21.1-11; Mákha 11.1-11; Áruká 19.28-40)

<sup>12</sup> Ahbiah tahnsá táchutahurabeqsabé su ke áhnte kegá Sísa Sarúsarama suwahpeq sinawire u irera

<sup>13</sup> ahtapeq koáwénunuwe. Áwénunéra awanká ayahnawe mewera anotahtaq mahraréra, Manikánsabe iwíáh iwíáh atone. Maniká áwírue si anínsabé iwíáh iwíáh atone. Ísara kené Wahnahnsabé iwíáh iwíáh atone uwe.

<sup>14</sup> Manikáne ehwehnka irarinserah Sísaga tónki meqme mi kane abobiahtaq kierútu agúwe.

<sup>15</sup> Mi ehwéhnká mahraréna,

Sáíóna\* suwahpeqte kéo, íre áhreéq tagaríáhro. Itene Wahnahnsabé iteba sirana tónki áráhqka áhkókóuwena sire ire. (Sekaraia 9.9)

<sup>16</sup> Minayabe mi tanáhráq ite we kéráhwána kegá íre iahtebahwane. Sísa organukéna Maniká móorabeq pokútaq ite mi ehwéh iahreraq matawéq iwíáhéq, Mi ehwéhnká irarinserah aiq miraurowe ewane.

<sup>17</sup> Menah tahnsa Sísaga Árásárúsi maisarórabeqte áhrabue organúq atowara tago kegá mitaq teri mahtaq terinuwe.

\* **12:15:** Sáíónawe Sarúsarama suwahpeqsabé mó awíre.

**18** Tago kegá mi otáq sánsá mitaq teri mahtaq terinu puara áhnte kegá irera ahtapeq Sísa koáwénunuwe.

**19** Péhrasi kegá abiahnsanéra seye náhenéra, Aiq tagaho? Ite iuwahbeh arámbéhrí íre miraorahúne. Ómi mah kehinánká we kéráhwe uwe.

### *Oga mérapeq awaq meyabe ehwéhne.*

**20** Káríki ehwéhnkákáq kéreq Manikánsabe iwíáh iwíáh ataneheéra táhutahururabeq kowiówe.

**21** Segá Pírípi, we Pétásáira suwahpeq Kehrari marákórápéqté ánípá séra wensabé, Ite Sísa taganeheéq súne uwana

**22** Píripiga Ehntaru koreawuwe. Mi anítégá Sísa teawúyana

**23** Sísaga sensabé, Íné wehukení úku anímé anotah aní úké tanáhráq avehraq tanáhráre.

**24** Kauerue írátiáhtao. Ayu pehipi kahnaraq íre iyanae. Mi ayú marakóipeq megue mugurúqme kirahnaraq áhnte mó será iyanae.

**25** Seyene iwíáhyabe sirutaboiro kewé oga mérapeq íre awaq míáhwe. Mah marákóípéq mé tanáhráq seyene iwíáhyabe suwahrieh kewé oga mérapeq awaq míáhwe.

**26** Néne arambehri miraéyabe inaraqmé séníráhro. Íné míáhnarabeq néne arambehrira kereq mía míaonehe. Néne arambehrira keyábé Nániboga kauerowe aritankéhe úwe.

### *Sísa pukínayabé ehwéhne.*

**27** Sísaga mó mahraréna, Nirupipeq anotah uméhínsábé Nánibonsabé aneq ehwéh teaw-iníkkono? Nániboo, mi tanáhráq sineho teawiníkkono? Írakaumo. Wehukene ahbabáqsabe pukinieéna tumírauge.

**28** Nániboo, áhnte kegá arenáwíq pankeráhro arito úwe. Úwana íópeqté éhwéhnká mahraréna, Néníwíq aiq pankeráhro arítoge. Mónkakákáq mirainauge úwe.

**29** Soruparió kega mi ehwéh írówe. Mó kegá, Puruburuire uwara mó kegá, Íópeqté áníkká ehweh teawíre uwe.

**30** Uwana Sísaga sensabé, Íre ínénabe peh itega irageheéna mi ehwéh irarire.

**31** Ahbabáq kehiná kékínánsábé ehweh arite tanáhráq amahnága awehrarire. Ahbabáq kehiná kékínáné wahnah kaqsue tanáhráq amahnága awehrarire.

**32** Segá íné marakóipeqté pankeréhrataq ómi ínéba sabirinie úwe.

**33** We pukína sansá sokigi ariena we pankeréhransabé irarúwe.

**34** Soruparió kega Sísansabé, Ite írátionawe Manikáne ehwehnka mahraréna, Ite meirena kaueraitankeheéna Manikánka omaq ato aní ahriahri mía míainkehe ire. Minayabe sega wehukení úki aní awankátaq táhparera pankerageheénawe árahinsabé irareno? Wehukení úki anímé insebo uwe.

**35** Uwana Sísaga sensabé, Íné téhrehnka inserahnu aní iteba wahto tanáhráq míanie. Sunkíkírirabeq míáh kégá ah íre tagahrahéra aiq nogunapómo iwíáhowe. Minayabe amahnága íné téhrehnka inserahnu anípá míáhro. Sunkíkírirabeq míehboq ínéba míáhro.

**36** Iteba míótáq téhrehnka inserahninkehboq íné téhrehnka inserahnu anínsábé aiq pútare aintáhro úwe. Sísaga mah ehwéh iraréna mitaq suena kopéragúwe. (*Buk Song 89.4, 36; Aisaia 9.7; Daniel 2.44, 7.14*)

### *Sísansabé íre aiq pútare atónsabe éhwéhne.*

**37** Sísaga áhnte otáq sánsámárinúwara tago kegá wensabé íre aiq pútare atera peh anetaníbo uwe.

**38** Minayabe Manikáne ehweh irarú ani Áísáíaga irarú ehwehmé aiq pútaragúwe. Wega mahraréna,

Itene Wahnahno, itega teriuna ehwéhmé sega íre aiq pútare aitáh mino. Itene Wahnahne ótaq sansámárimé tagéq anetaníbo iwíáho mino úwe. (*Aisaia 53.1*)

**39** Minayabe sega íre aiq pútare atahráhowe ire. Áísáíaga mó mahraréna,

<sup>40</sup> Manikánka siura mútúritena sirupipeq págege arítéhre. Minayabe sene siura íre ebioráhowe. Peh mútúrawéra sirupipeq íre ahtebowe. Segá ínéba íre sewe. Minayabe sene ahbabáq íre kawerarítóge úwe. *(Aisaia 6.10)*

<sup>41</sup> Áísáíaga Sísansabé iwíáhéné anotah aní míéhre éna ahtebéna mi ehwéh irarúwe.

<sup>42</sup> Áísáíaga irarúnserah áhnte Asiu kegá Sísansabé íre aiq pútare atówara mó áhnte Asiu kereq sene wahnahmarínseqka Sísansabé aiq pútare atera Péhrasi keyábé áhreu puara mó ke íre teríúwe. Momiwíu nahtápéq Péhrasi kegá kaqíuwéhoéra mó ke íre teríúwe.

<sup>43</sup> Manikánka kawerowe aritonsabe peh ákáhtaq sirútábóíréra wehukega kawerowe arítónsabe anotah sirútábóírúnsabe mó ke íre teríúwe.

### *Sísaga wehuke ehweh arite ehwehne.*

<sup>44</sup> Sísaga anotahtaq mahraréna, Ínénabe aiq pútare aintáh ké íre ínébataq ínénabe aiq pútare aintáhwe. Íné eqmaq núwéh ánínsábéákáq aiq pútare atáhwe.

<sup>45</sup> Íné tagah kewé íné eqmaq núwéh áninkákáq tagahwe.

<sup>46</sup> Mah kehiná kékhná míáhrabeq téhrehnka inserahnuge. Ínénabe aiq pútare aintáh kégá sunkíkírirabeq íre mía míageheéna tumíarauge.

<sup>47</sup> Néne ehweh siahrega irera anetaníbo iwíáho keyábé íre ehweh aritoge. Mah kehiná kékhnánsábé ehweh aritanieéna íre tumíarauge. Peh sene ahbabáqsabe kaweraritanieéna tumíarauge.

<sup>48</sup> Ínénabe suwahrieh kewé néne ehweh íre íráh kewé néne ehwehnka anehe tanahráq ehweh aritankéhe.

<sup>49</sup> Íre ínénéne iwíáh ehweh irare irareuge. Nánibo íné eqmaq núwéh áninká iwíáh aintena mahrarúno éna niahreraq intéh éhwéh teiteinuge.

<sup>50</sup> Íné íratíómé wene ehweh sehgironka organúq sitankéhe. Minayabe Nániboga terio i ehweh teiteinuge úwe.

## 13

### *Sísaga we kéró kene sigárá pabeq pabeq arito ehwehne.*

<sup>1</sup> Ite Asiu kené sótaikú iahreraq ko tánáhráq ahbiah tahnsá Sísaga iwíáhéné, Amahnága íné mah marákó suena Nániboba poké tanáhráq awehrarire úwe. Sísaga mah marákó márakóípéqté we tagariáh keyábé ahriahri arutaboiraitena pukinaú tanahráqkákáq anotahtaq arutaboiraitowe.

<sup>2</sup> Owainawanka Sáímóni, Ísikáriótine ahninkáwá Súrásane arupipeq Sísane naruo koweriyo iwíáh atowe. Iwíáh atowaq ite we kérähwána kegá penorabeq Sísareq moráráq táchutahurowane.

<sup>3</sup> Sísaga iwíáhéné, Íné niyahtebome Nániboga moke nánire éna Maniká míéhrabeqte tuena mébeq tuekinauge éna

<sup>4</sup> táchutahururabeqte irigéna wene káhq ambántá akairuena táchuri úbíqmiowe.

<sup>5</sup> Táchuri úbíqmema wání antehyapípéq ahkiwena peh nahupeqte árámbéhrí ání tahn-sanéna ite we kérähwána kené igárátáq pabeq paberaitena úbíqmatio táchuriyaté sobarúq iuwowe.

<sup>6</sup> Sobarúq iuwena Pítaba súwana Pítaga wensabé, Néne Wahnahno, nigará pabeq paberaintaníbo úwe.

<sup>7</sup> Úwana Sísaga wensabé, Amahnága miraunsabé are íre tagariahne. Mókake tagari-ankehe úwe.

<sup>8</sup> Úwana Pítaga wensabé, Amahnágaákáq mókakeakáq arega nigará pabeq paberaintanie énawe ahqáho ataníe úwana Sísaga wensabé, Ínéga íre pabeq paberatáhnaraqme arega íné íre sénirahráhóne úwe.

**9** Úwana Pítaga wensabé, Néne Wahnahno, minayabe íre peh morá nigará pabeq paberainto. Moke niyahnkakaq niyahqnonkakaq pabeq paberainto úwe.

**10** Úwana Sísaga wensabé, Sinonka pabeq pabero ke peh morá náwíbagi sigará pabeq paberowe. Sinonka íre náwíbagi puara mó íre pabeq paberigehe. Ite íre náwíbagiraq míáhwanawe peh morá ání náwíbagire úwe.

**11** Sísaga wene naruo koweriranaú aní tagario púana mahraréna, Ite íre náwíbagiraq míáhwanawe peh morá ání náwíbagire úwe.

### *Séhréh atéhoro ú ehwehne.*

**12** Sísaga sigará pabeq paberarito parabagúwana wene káhq ambántá abaqme tútuue ména sensabé, Ínéga miraitónsábé iahtebaho?

**13** Itega ínénabe, Íwáhnoraníne aintáhwe. Itega moq itene Wahnahne aintáhwe. Itega irare intáhwana aiq míóge.

**14** Íné itene Wahnah, ite íwáhnoru anínká itene igará pabeq paberaitónsábé itega wene wene aigará pabeq paberatéhoro.

**15** Ínéga sokigi aiú serahnoro.

**16** Kawerue írátíáhro. Arambehri anínká wene wahnah íre kiotaikire. Poki anínká we eqmaq áuwéh ánime íre kiotaikire.

**17** Minayabe ite tagariáh púaq irupipeq eyoyóinkehboq we séhréh atéhoro.

**18** Íre ite ómiyabé mi ehwéh iraruge. Ínéga omaq itáráu anímári tagarióge. Manikáne ehwehnka mahraréna,

Moráráq táhutahururaya anínká néne naruo aní úkire ire.

(Buk Song 41.9)

Mi sehirá aiq pútaraginawire.

**19** Mirainie insabé teiúge. Mótaq mirainkehe. Mi tanáhráq sehiranka ínénabe irarime aiq pútare atageheéna amahnága teiúge.

**20** Kawerue írátíáhro. Mó kegá ínéga eqmaq sutau ke mehweh arítáhtáq ínénakaq mehweh aintáhwe. Íné mehweh aintáh kegá íné eqmaq núwéh ánínkákáq mehweh atáhwe úwe.

### *Sísane naruo koweriranaú ani éhwehne.*

(Mátíyu 26.20-25; Mákha 14.17-21; Árúka 22.21-23)

**21** Sísaga mi ehwéh iraréna wene arupipeq págegeúnsabe mahraréna, Teiníboq írátíáhro. Ite míáhrabeqte ánínká néne naruo kowerirankéhe úwe.

**22** Kowerirankéhe únsabe ite we kérähwána kegá wenku ebiqsúéheéq irupipeq iwíahéq insensabebómo ewane.

**23** Íné Sísaga arutaboiraintéh ánime wereq ínereq moráráq tútuue míahwaye.

**24** Pítaga ínénabe aonáh sabiq suena, Wega irari aní insensabebó kaseninanao úwana

**25** ínéga Sísane anepeq mósaqmaqme ména, Néne Wahnahno, we inseboue kasenowae.

**26** Kasenowana Sísaga ínénabe, Ínéga táhutahuq pámbáhue náwéna aní we wire éna táhutahuq pámbáhue Súrásawe, Sáimóni Ísíkáríótine ahninkáwá náwuwe.

**27** Súrásaga mi tahutáhúq moyotaq owainawanka wene arupipeq ahbabáq iwiáh atowe. Sísaga Súrásansabé, Arega mirainie inaraq amahnága komíraúno úwe.

**28** Úwaq ómi ite táhutahurowanarabeqte kegá mi ehwéh ireq iwíahéq, Árahinsabé irariro ewane.

**29** Súrásaga itene morábí matiahwana moné únáhtáq wahnahnú púaq táhmaro ite iwíahéq mó tahutáhúq kobaiqmaro íwíahénabopoq eqmaréhre. Tabonah ke nário íwíahénabopoq eqmaréhre íwíahowane.

**30** Súrásaga mi tahutáhúq mewena máhpeq tueyokúwe. Mákha tueyokúmá inokáhpere.

### *Wensabé wensabé irutaboiratéhoro ú ehwehne.*

<sup>31</sup> Súrásaga máhpeq tueyokúwana Sísaga mahraréna, Amahnága íné wehukení úku aní néniwíq pankeragéhe. Ínésabe iwiáhéra Maniká áwíq pankeragéhe.

<sup>32</sup> Maniká áwíq pankeráhwana wega néniwíq pankerankéhe. Wega amahnága pankerankéhe.

<sup>33</sup> Néne animárino, Pehgáriq tanáhráq iteba míanie. Pokonaraq itega íné ninebahrigéhe. Ínéga Asiu ke teríátáunserah teiníe. Ínéga pokonarabeq itega amahnága íre kioráhowe.

<sup>34</sup> Néne o sansa miraigehboq teiníe. Itega wensabé wensabé irutaboiratéhoro. Ínéga itensabé nirutaboirunserah itega wensabé wensabé irutaboiratéhoro.

<sup>35</sup> Itega wensabé wensabé irutaboiratéhoro itaqmé ómi kegá íné séniráh ké wóe aitagéhe úwe.

### *Sísaga Pítansabé, Íné nuwaniewóne ú ehwehne.*

(Mátíyu 26.31-35; Mákha 14.27-31; Árúka 22.31-34)

<sup>36</sup> Sáimóni Pítaga Sísansabé, Néne Wahnahno, eheq kinibo úwana Sísaga wensabé, Íné pokinieurabeq amahnága íre sénirankéhe. Mókake sénirankéhe úwe.

<sup>37</sup> Úwana Pítaga wensabé, Néne Wahnahno, amahnága aneqsabé íre kéranínkono? Segu nubiq suaneherabomo. Anetaníbo. Are éhnehinauge úwe.

<sup>38</sup> Úwana Sísaga wensabé, Arega níehnehinkehboq ínéreq pukoyehe íwiáhono? Teawiníboq írátiáhno. Kokórega ehwehnina ínaraq arega íné íre tagarióge apahtáróráq irariniewóne úwe.

## 14

### *Sísaga, Íné Maniká míéhrabeqte áhne ú éhwehne.*

<sup>1</sup> Sísaga mó mahraréna, Itene irupipeq iwiáh kikiriyeho. Manikánsabe aiq pútare ateq ínésabeákáq aiq pútare aintáhro.

<sup>2</sup> Nánibone nahtapeq áhnte paqnáh kéhre. Íre kéhtáq tahirímé métáq teiú irino. Itene máhriq kigawerinieéna pokinauge.

<sup>3</sup> Kawerarena kiwekue tumeiranauge. Íné mírabeq mía míaigeheéna tumeiranauge.

<sup>4</sup> Íné pokinieurabeqte áh tagariáhwe úwe.

<sup>5</sup> Úwana Tómáhsiga wensabé, Itene Wahnahno, are pokinie énarabeqme íre tagarione. Mi ah árahue tagarianehnkono úwe.

<sup>6</sup> Úwana Sísaga wensabé, Íné Maniká míéhrabeqte áhne. Íné aiq pútaq ehwéh áwahe aní mûge. Íné organúq itahráhu aní mûge. Nánibo míéhrabeqte áh mûge. Íre mó ahnkákáq ínébataq ah mûge.

<sup>7</sup> Itega íné tagariáhmé Nánibonkakáq tagariáhwe. Amahnágaákáq mókakeakáq Nánibonsabé itene irupipeq iwiáhue tagarawéq itene iuranka tagahwe úwe.

### *Sísaga íné tagah kegá Nánibo moq tagahwe ú ehwehne.*

<sup>8</sup> Úwana Píripiga Sísansabé, Itene Wahnahno, Iteribo taganehboq sokigi aio. Sokigi aínaraq aiq awehraq kanae úwe.

<sup>9</sup> Úwana Sísaga wensabé, Píripio, ínéga itereq íre wahto tanáhráq míarauge. Árahinsabé íné íre tagariahno? Íné tagah kegá Nánibo moq tagahwe. Iteribo taganehboq sokigi aio énawe árahinsabé irareno?

<sup>10</sup> Ínéga Nániboba mía míaugana wega ínéba mía míaire. Minayabe íre aiq pútare aintahno? Íné teiú éhwéh íre ínénéga iwiáhugana Nániboga ínéba mía míáéna wewega arambehrire.

**11** Ínéga Nániboba mía míaugana wega ínéba mía míaire teienaq mi ehwéhnsábé aiq pútare aintáhro. Mi ehwéhnsábé itega íre aiq pútare atéhramé ínéga sokigiona arámbéhríyábé aiq pútare aintáhro.

**12** Kawerue írátíáhro. Ínénabe aiq pútare aintáh kégá ínéga miraona arámbéhrí mি-  
raigehe. Nániboba pokinau puana sene arambehriga néne arambehri kiotaqme kanae.

**13** Néníwírue tenírataq mirainie. Íné wenahninká mirau arámbéhrí Nánibo áwíq pankera-  
geheéna mirainie.

**14** Néníwírue teníra ehwéhmé moke mirainie úwe.

### *Sísaga Manikáne Awa eqmarinie ú ehwehne.*

**15** Sísaga mó mahraréna, Itega ínénabe iuwahbáhnaraqmé néne sánsá sehgigéhe.

**16** Nánibo teawenana wega mó séhréhína aní iteba mía míainkehééna eqmarankéhe.

**17** Aiq pútari aní Manikáne Awa iteba mía míainkehééna eqmarankéhe. Ahbabáq ke-  
hinánká Manikáne Awa íre tagéra sirupipeq íre tagariáh púara wereq íre mía míorahowe.  
Itega we tagariáhwana iteba mía míáena irupipeq mía míainkehe.

**18** Ite íre airaiq iuwaníe. Ite íre ehneranimári tahnsa míageheéna mókake iteba kiwe-  
inauge.

**19** Mótaq ahbabáq kehinánká íné mó íre tagagehe. Itega íné tagagehe. Íné oga mía míau  
puaq ite moq oga mía míagehe.

**20** Mi tanáhráq sínaraqmé ínéga Nániboba mía míionaq tagariagehe. Itega ínéba mía  
míairana ínéga iteba mía míonaq tagariagehe.

**21** Néne ehweh irena kawerue sehgi ánime ínénabe awahbehre. Ínénabe awahbeh  
aníme Nániboga wensabé arutaboiratankéhe. Ínéga wensabé nirutaboiratena néne sánsá  
sokigi awinauge úwe.

**22** Íre Súrása Ísíkáriótí peh mó Suráságá Sísansabé, Itene Wahnahno, árahinsabé ahbabáq  
ke íre sokigi ariasa peh morá ite arene sánsá sokigi aieno úwe.

**23** Úwana Sísaga wensabé, Ínénabe awahbeh anínká néne sánsá mirainkehe. Néne sánsá  
miraínaraq Nániboga wensabé arutaboiratankéhe. Nániboreq ínéreqka weba séta wereq  
mía míaojehetauye.

**24** Ínénabe suwahrieh kegá néne ehweh íre sehgigéhe. Ínéga teiú éhwéhmé íre ínébataq  
néne ehwehne. Minawé Nánibo íné eqmaq núwéh áníné ehwehne.

**25** Iteba mía míautaq mah ehwéh teiúge.

**26** Nániboga séhréhi aní Manikáne Awa néníwírue eqmarahnana ite moke íwáhnorinkehe.  
Ínéga moke teiéna ehwéh Manikáne Awanka ahreraq itankéhe.

**27** Íné niru ukiqme míónserah ite moq iru ukiqme míáhro aítóge. Ínéga aítónserah  
ahbabáq kehinánká íre mirorahowe. Itene irupipeq iwiáh kikiréq áhreiyeho.

**28** Iuwena pokéna iteba kiwekinie teiewógaq íráh mino. Itega ínénabe  
irutaboiraintáhmé itene irupipeq eyoyóire. Nániboga íné kiotaqme míéh ání míre.  
Ínéga weba pokinaunsabé itene irupipeq eyoyóoro.

**29** Mótaq sína tanáhráqsábé teiúge. Mi tanáhráq sínaraq itega néne ehwehnsabé aiq  
pútare aintageheéna amahnága teiúge.

**30** Amahnága ahbabáq kehiná kéhínáné wahnhahnka sínana íre áhntetaq teiníe. Wega íné  
íre saiqnariéhre.

**31** Nánibonsabé nirutaboirume mah kehiná kéhínánká tagariageheéna wega tení  
árámbéhrí mirauge éna ite we kéráhwána keyábé, Pokonehboq irigoro úwe.

<sup>1</sup> Sísaga mó mahraréna, Íné náhníáq tahnsanugana Nániboga náhníáq sera sotaq wah-nahni aní míéhre.

<sup>2</sup> Néne niyahnwé sera íre íyéhmé Nániboga apirúéhre. Sera íyéh níyahnwéwé áhnte mó sera iyankeheéna apiruqme kaweq kaweraréhrana áhnte sera íyéhre.

<sup>3</sup> Mina inserah ínéga teiú éhwéhká itene irupipeq kaweraitéhre.

<sup>4</sup> Itega ínéba mía míairana ínéga iteba mía míaono. Pehipí kék ayáhnawéwé sera íre iyahráhire. Mina inserah itega móbeq míéhrataqmé íre serankakáq míaneheqmóe.

<sup>5</sup> Íné náhníáq tahnsanugaq ite náhníáq ayahnawé tahnsá móe. Itega ínéba mía míairana ínéga iteba mía míainie. Ínéba mía míaira kewé áhnte serankakáq mía míaneheqmóe. Peh itebataq mía míairataq iteriahríah mó naneq íre miraorahowe.

<sup>6</sup> Antegi ayáhnawé súéhrana ehyataginserah ínéba íre mía míao kewé mina tahnsanowe. Mi ayáhnawé sorupawe mewena iraipéq móruahnana taginawire.

<sup>7</sup> Itega ínéba mía míaeq ínéga teiú éhwéh íréhrataqmé iwíáhue teníero. Tenirana mirainie.

<sup>8</sup> Ite áhnte sera íyéhrara tagah kegá Maniká áwíq pankeráhwe. Áhnte sera íyéh púaq ite íné séníráh ké míáhwe.

<sup>9</sup> Nániboga ínésabe arutaboirinserah ínéwé itensabé nirutaboiruge. Ínéga itensabé nirutaboiru puaq ínéba mía míaoro.

<sup>10</sup> Ínéga Nánibone sánsá sehgiúnsábé wega ínésabe arutaboiraintéhrana weba mía míauge. Weba mía míaunderah itega néne ehweh sehgrataq ínéga itensabé nirutaboiraitahnaq itega ínéba mía míagehe.

<sup>11</sup> Irupipeq eyoyó aitanieéna mah ehwéh teiúge. Peh irupipeq anotah eyoyóinkeheéna mah ehwéh teiúge úwe.

<sup>12</sup> Sísaga mó mahraréna, Néne sánsámé ínéga itensabé nirutaboirunserah itega wensabé wensabé irutaboiratéhoro.

<sup>13</sup> Wene iyahnabo kaweraritanieéna minayabe pukinaína anímé anotah arútábóíri aní míre. Moke mó sirutaboiro kegá mi aní íre kiotaikorahowe.

<sup>14</sup> Néne ehweh sehgió kewé néne iyahnabo woe.

<sup>15</sup> Arambehri animári íre úqitanie. Arambehri aní wene wahnahne náneq íre ahtebeh púana itensabé arambehri animári íre úqitanie. Nániboga tení éhwéh moke teiú púana néne iyahnabo animári úqítóge.

<sup>16</sup> Itega íné íre omaq intárówana ínéga ite omaq itáráuge. Náhníáq ayahnawé áhnte sera íyéhnserah ite néne niyahnwé méq áhnte sera iwe kagainkeheéna omaq itáráuge. Áhnte sera kékhsábé itega néníwírue Nánibonsabé teawírataqmé wega mirainkehe.

<sup>17</sup> Ínéga teiúmé wensabé wensabé irutaboiratéhoro úwe.

### Sísa kéráh ké moq íwíoqnagehe i ehwéhne.

<sup>18</sup> Sísaga mó mahraréna, Ahbabáq kehiná kékhnánká itensabé suwahriáhnaraq téhwe ínésabe suwahriehre iwíáhoro.

<sup>19</sup> Ite ahbabáq kehiná míáhtáq tahirímé mó ahbabáq kékhnánká sensuwahrahyabé sirutaboironserah itensabé moq sirutaboiro irino. Ínéga ite omaq itáráugaq ahbabáq sansa sueq kaweq ke úkuro puara ahbabáq kega itensabé suwahriehre.

<sup>20</sup> Arambehri animák wene wahnah íre kiotaikire teiewónsábé ahreraq matíáhro. Ahbabáq kega íné níwíqnah puara itenkakáq moq íwíoqnagehe. Segá néne ehweh íráhtáq tahirímé itene ehwehnkakáq íráh irino.

<sup>21</sup> Ite néne animári míáh puara segá ite íwíoqnagehe. Segá íné eqmaq núwéh ání íre tagariáhnsábé íwíoqnagehe.

<sup>22</sup> Íné íre sena ehweh íre teríútáq tahirímé sene ahbabáq peh kopípéq kék irino. Ínéga teríúnsábé sene ahbabáq amahnága ábóraq kékhrara segá, Itega árahue ahbabáruno íre irarerahowe.

<sup>23</sup> Ínésabe suwahrieh kegá Nánibonsabé moq suwahriehre.

<sup>24</sup> Néne ótaq sansámári se íre sokigi aríútáq tahirímé sene ahbabáq peh kopípéq kék irino. Néne ótaq sansámári tagahnsabé sene ahbabáq ábóraq kékhrara ínéreq Nániboreqsabé suwahriehre.

<sup>25</sup> Manikáne ehwehnka mahraréna,  
Sega ínésabe pehipi suwahriehre ire.  
Mi sehiránká aiq pútaragire.

(Buk Song 35.19)

<sup>26</sup> Ínéga Nánibo míéhrabeqte séhréhi aní, aiq pútari aní, Manikáne Awa iteba eqmaraníe. Wega tuinaraq néne arambehriakáq néne sánsánkákáq pahsuankéhe.

<sup>27</sup> Téhwe itega séníráh púaq itega moq néne ehweh terigéhe úwe.

## 16

### *Sísaga, Íwíoqnéra iubiq suaneherawoe ú ehwehne.*

<sup>1</sup> Sísaga mó mahraréna, Mókake itega ínésabe anetaníbo éq nuwanéhe íwíáhiyeho éna amahnága mah ehwéh teiúge.

<sup>2</sup> Segá ite momiwío nahtápéqté kaqiuwagéhe. Mó tanáhráq ite iubiq suaneherao kegá iwiáhéra, Ínésabe aiq pútare atáh kék subiq suonawe mina Manikáne arambehrie igehe.

<sup>3</sup> Segá Nániboreq ínéreq íre tagaríah púara mina tahnsa oneherawoe.

<sup>4</sup> Segá miraira tanáhráq sínaraq itega néne ehweh ahreraq matiageheéna mah ehwéh teiúge úwe.

### *Sísaga Manikáne Awane arambehriyabé irarú ehwehne.*

Sísaga mó mahraréna, Iteba mía míau puana mah ehwéh íre teiátáuge.

<sup>5</sup> Íné eqmaq núwéh ánípá pokinieu puana amahnága teiúge. Itebaté mó morá áninká ínésabe, Eheq pokono ue íre kasenire.

<sup>6</sup> Ínéga mah ehwéh teiúnká itene irupipeq anotah uméhire.

<sup>7</sup> Teiníboq íratiáhro. Íné pokinie ume aiq kawerire. Ite séhréh aitanieéna pokinie. Íné mahtaq míáhnaraqmé ite séhréhína anínká iteba íre tuoráhire. Íné pokonaraq iteba we eqmaq auwaníe.

<sup>8</sup> Eqmaq auwáhnaraq Manikáne Awanka iteba tuinagake ite mah kehiná kékhnáné ahbabáqsabe kaweqtaq méyabe íwáhnorinkehe. Manikánka ehweh aritahnayabé moq íwáhnorinkehe.

<sup>9</sup> Segá ínésabe íre aiq pútare aintáhnsábé minawé ahbabáq míre éna íwáhnorinkehe.

<sup>10</sup> Nániboba pokonaq íné íre tagehra puana kaweqtaq méyabe íwáhnorinkehe.

<sup>11</sup> Manikánka ahbabáq kehiná kékhnáné wahnah aiq ehweh atéh púana ehweh aritahnayabé íwáhnorinkehe.

<sup>12</sup> Ehweh teiénawe áhnte kékraqme ite amahnága íre irahráhowe.

<sup>13</sup> Aiq pútari aní Manikáne Awanka tuinaraq ite moke íwáhnorinkehe. Íre wewene iwiáh iraréna peh wega íratiéh ehwéh teinkéhe. Mókake sína tanáhráqkákáqsábé teinkéhe.

<sup>14</sup> Néne ehweh íwáhnorína puara áhnte kegá néníwíq pankeragéhe.

<sup>15</sup> Moke Nánibone sánsámárimé wereq ínereqne sánsáne. Minayabe ínéga teiú éhwéhmé Manikáne Awanka íwáhnorinkehe teiúge úwe.

### *Itene irupipeq umehúna naneq mótaq iwiáh íwíáh naneq ukina ehwehne.*

<sup>16</sup> Sísaga mó mahraréna, Pehgáriq tanáhráqmé itega íné mó íre tagagehe. Anehe pehgáriq mó tanáhráqmé itega íné tagagehe úwe.

<sup>17</sup> Úwara táhmaro we kéró kega seye náhenéra, Mi ehwéhmé íre irone. Aneq ehwéhpo? Wega teiena, Pehgáriq mó tanáhráqmé itega íné mó íre tagagehe. Anehe pehgáriq mó tanáhráqmé itega íné tagagehe ire. Wega mó teiena, Nániboba pokinieu puaq itega íné íre tagagehe ire.

<sup>18</sup> Anehe pehgáriq tanáhráre ime aneq ehwéhpómo? Minawé ite íre ironé éra seye náhenuwe.

<sup>19</sup> Seye náhenuwana Sísaga iwíahéna, Segá ínénabe kasenonehe éna wega sensabé, Ínéga métáq mahraréwóge. Pehgáriq tanáhráqmé itega íné mó íre tagagehe. Anehe pehgáriq mó tanáhráqmé itega íné mó tagagehe éwóge. Minayabe itene irupipeq iwíahéq kasenoo?

<sup>20</sup> Teiníboq írátíáhro. Itene irupipeq anotah uméhínaq ibisagehe. Ibisehrara ahbabáq kega sene sirupipeq eyoyónara wíréh wíréhigehe. Ebeqme itene irupipeq umehue págege ínana anehepeqme itene irupipeq eyoyó aginawire.

<sup>21</sup> Ani maqmianaitaq uwo uwoinsabé mi iníné arupipeq éri puana anotah uméhire. Maqsuena wene ani míéh púana wene arupipeq eyoyórana éréwéhnsábé mó íre iwíahire.

<sup>22</sup> Mina inserah amahnága itene irupipeq umehirana ínéga ite mó tagahnagake itene irupipeq eyoyóninkehe. Itene irupipeq eyoyónara mó kegá mina íre kaqiuwahráhowe.

<sup>23</sup> Mi tanáhráqmé itega ínénabe mó ehwéh íre tenigéhe. Teiníboq írátíáhro. Nánibonsabé néníwírue iwíahue teawírataq wega mirainkehe.

<sup>24</sup> Menahmé itega íre néníwírue teawatówe. Itene irupipeq anotah eyoyónkehboq Manikánsabe teawéro. Teawírataq wega mirainkehe úwe.

### *Sísaga íre kaweq sunúq kiotaikuge ú ehwehne.*

<sup>25</sup> Sísaga mó mahraréna, Pabeqme ehwéhnue tei teinurauge. Mi tanáhráq pabeqme ehwéh mó íre teiasa peh Nánibo éhwéh pahsuqme teiníe.

<sup>26</sup> Mi tanáhráq itega néníwírue wensabé teawigéhe. Nánibonsabé, Ite séhréh arito ue íre teawiníe.

<sup>27</sup> Ahqáho. Iteitega we teawigéhe. Maniká wewega itensabé arutaboiraitéhre. Itega ínénabe irutaboiraintáh púana Nániboga itensabé arutaboiraitéhre. Maniká míéhrabeqte tumíaraunsabé aiq pútare ainteq ínénabe irutaboiraintáh púana Nániboga itensabé arutaboiraitéhre.

<sup>28</sup> Nánibo míéhrabeqte mah marákó márakkóípéq tumíarauge. Tuména amahnága mah marakkóípéq suena Nániboba tuekinie úwe.

<sup>29</sup> Úwaq ite we kérähwána kegá Sísansabé, Aiq ironé. Arega amahnága íre pabeqme ehwéhnia peh tábúsoqme pahsuqme teiene.

<sup>30</sup> Itega amahnága tagónawe arega moke ahtebawe tagariahne. Minayabe arega Maniká míéhrabeqte túnayabé aiq pútare atone. Arensabé mó kasenéyabe anetaníbo. Aiq pútare atone ewane.

<sup>31</sup> Ewanana Sísaga itensabé, Amahnága aiq pútare aintaho?

<sup>32</sup> Aiq pútare aintáhmé mótaqmé amahnága itega íné nuweq iteruwahpeq kobeq séberoneheqmóe. Íné nuwehrana ínébataq míanie. Nániboga ínéba mía míai puana íre ínébataq míanie.

<sup>33</sup> Ite ínéba mía míaconsabé iru ukiq itanieéna mah ehwéh teiúge. Mah marakkóípéqmé mó tanáhráq mó tanáhrárue íre kaweq sunúq sinæ. Ínéwé íre kaweq sunúqmé aiq kiotaiqme mío púaq iwíáh iwíáhoro úwe.

## 17

### *Sísaga we kéró ke séhréh aritanieéna púrerú ehwehne.*

<sup>1</sup> Sísaga mi ehwéh irareruena íópeq tagéna Manikánsabe, Nániboo, íné pukona tanáhráq aiq awehrarire. Íné arenahninká arenáwíq pankerañíboq arega néníwíq pankero.

<sup>2</sup> Arega moke mah kehiná kékéhíná wahnahnúno aintáróne. Arega ínéba eqmaq suahna ke organúq sito aintahne.

<sup>3</sup> Arebataq aiq pútaq Manikáne. Arega íné Sísa Karáhé eqmaq núwátóne. Arereq ínéreqsabé aiq pútare aitáh kégá oga mérapeq aiq awaq míáhwe.

<sup>4</sup> Arega teniena arámbéhrí miraue parabarúónsábé are págege aní mé anotah aní míahnara mah marákóípéqté kégá tagahwe.

<sup>5</sup> Naho mah marákó mårákó íre kotaq ínéga areba míáhwataq arereq ínéreq anotah aníté míahwaye. Nániboo, naho ite míahwayanserah amahnága mirainto.

<sup>6</sup> Arega mah marákóípéqté ké ínéba eqmaq suahne. Mi kewé arene sásá sokigi arítóge. Téhwe mi ke arene animári mé ínéba eqmaq súátóne. Sega arene ehweh irera sehgiówe.

<sup>7</sup> Arega moke niátóna naneqme peh arerenee. Minawé ínéba eqmaq suahna kegá aiq tagariáhwe.

<sup>8</sup> Arega teniátóna ehwéhmé moke teríatáugara íráhwe. Ínéwé are míahnarabeqte ánínugara aiq pútaq tagariáhwe. Arega íné eqmaq núwátónayabé aiq pútare atáhwe.

<sup>9</sup> Arega eqmaq suahna keyábé púrerarítóge. Amahnága moke mah marákóípéqté keyábé íre púrerarítóge. Peh ínéba eqmaq suahna keyábé arene animári púana púrerarítóge.

<sup>10</sup> Moke arene animárimé néne animáríne. Moke néne animárimé arene animáríne. Mó kegá eqmaq suahna ke tagéra néníwíq pankeráhwe.

<sup>11</sup> Amahnága areba kiníe. Íné mah marákó mårákóípéq íre míáhnaraq eqmaq suahna kegá mahtaq míagehe. Nániboo, kaweqlaq mía míáone. Arene págege awíq niátónne. Arega ínéba eqmaq suahna ke arene págege awíqlaq wahnahnarito. Arereq ínéreqka moraráq mía míáuyanserahnigboq kawerue wahnahnarito.

<sup>12</sup> Ínéba eqmaq suahna kebá mía míaurautaq arenáwírue kawerue wahnahnarítáuge. Kawerue wahnahnarítáugara se íre taqnobagowe. Peh morá ání iraipéq tabikinai aní taqnobagire. Manikáne ehweh aiq pútaraginkehéena taqnobagire.

<sup>13</sup> Amahnága areba kiníe. Ínéba eqmaq suahna kené sirupipeq eyoyó aritanieéna mah marákóípéq ména mah ehwéh iraruge.

<sup>14</sup> Arene ehweh aiq teríúge. Ahbabáq kehiná kékhnánká ínéba eqmaq suahna keyábé suwahriehre. Íné ahbabáq kene sásá íre miraunserah ínéba mía míao kegá moq peh míahwe. Minayabe ahbabáq kega sensabé suwahriehre.

<sup>15</sup> Se mah marákó mårákóípéqté meriqme móritáhro íre teawúge. Peh owainawanka se ahbabáq aritehnehboq kawerue wahnahnarito teawúge.

<sup>16</sup> Íné ahbabáq kene sásá íre miraugara ínéba eqmaq suahna kegá moq ínéga unserahnéra ahbabáq sansansábé suwahriehre.

<sup>17</sup> Arene ehwehme aiq pútaq ehwéhne. Se kaweqlaq mía míagehboq arene aiq pútaq ehwéhtáté sirupipeq págege arito.

<sup>18</sup> Arega íné mah marákóípéq eqmaq núwátónanserah ínéga se mah kehiná kékhnánká suwahpeq eqmaq suaníe.

<sup>19</sup> Sega aiq pútaq arene animári mía míageheéna íné arereq mía míainauge.

<sup>20</sup> Ínéba eqmaq suahna kewé íre sebataqsabé púrerarítóge. Sega mó ke terirara irera ínénabe aiq pútare aintageheéna mi keyábéákáq púrerarítóge.

<sup>21</sup> Sereq ínéba eqmaq suahna kereq peh morá íwíahigeheéna púrerarítóge. Nániboo, arereq ínéreqka moráénuyanserah se ómi peh morá íwíahigeheéna púrerarítóge. Arega íné eqmaq núwátónayabé mah kehiná kékhnánká aiq pútare atagéhboq peh morá íwíah arito.

<sup>22</sup> Arega íné págege ainte néníwíq pankernanserah ínéga se págege aritena sensíwíq pankeroğe. Arereq ínéreqka moráénuyanserah sega morá íwíahigeheéna sensíwíq pankeroğe.

<sup>23</sup> Eqmaq suahna ke moráénigeheéna sereq míóge. Are ínéreq míahne. Minayabe sega peh moráénirataq mah kehiná kékhnánká arega íné eqmaq nuwahna ehwéhnsábé aiq pútare atagéhe. Arega ínénabe arutaboiraintahnanserah sensabé moq arutaboirari-tahne. Wega peh morá íwíahirataq mah kehiná kékhnánká mina tagéra arega arutaboirar-itahna ehwéhnsábé aiq pútare atagéhe.

<sup>24</sup> Nániboo, ínéba eqmaq suahna kegá íné míáhnarabeq ínéreq sereq méyabe nuwah-behre. Mah marákó márakó íre kotaq ínésabe arutaboiré néníwíq pankerón. Are néníwíq pankerónayabé sega minaakaq anotahtaq téreh naneqkakáq tagageheéna ínéreq méyabe nuwahbehre.

<sup>25</sup> Naniboo, ínéga are aiq tagarióge. Kaweqtaq mía míaóne. Ahbabáq kehiná kékínánká are íre tagariáhwe. Arega íné eqmaq nuwahnana sunsabé eqmaq suahna kegá aiq tagariáhwe.

<sup>26</sup> Ínéga arene sánsánsábé se sokigi arítóge. Mó sokigi arita aritainie. Arega ínésabe arutaboiraintahnanserah sega mó keyábé sirutaboirigeheéna sokigi arítóge. Íné sereq mía míainieéna sokigi arita aritauge úwe.

## 18

*Súrásaga Sísane naruo koweriro ehwehne.*

(Mátíyu 26.47-56; Mákha 14.43-50; Árúka 22.47-53)

<sup>1</sup> Sísaga Manikánsabe mi ehwéh teawena pokúwe. Werek ite we kéráhwána kerekka Kirona aroipéq seberaebeq pokowane. Mitaq kaweq matábú kowaq itega mitaq kowíahwane.

<sup>2</sup> Súrása, Sísane naruo koweriranaú anínká moq mi matábú tagariowe. Sísareq ite we kéráhwána kerekka mitaq áhnte tanáhráq momiwíowanayabé tagariowe.

<sup>3</sup> Manikáne ehweh mibeq mahbeq arítáh kerek Péhrasi kerekka Manikánsabe iwíáh iwíáh atáh náhtápéqté párisíwárínseq sóntia kerek eqmaq súowe. Eqmaq súo kerek Súrásaga meriqmena mi matábúrág súwe. Segá sahmárinkákáq áráhmuakáq kánéqkakaq mewera suwe.

<sup>4</sup> Sísaga sega miraoneherau naneq wene arupipeq moke tagarawéna su ke taganieéna pehráapeq kowíowe. Kowéna sensabé, Insensabe anebahroo úwe.

<sup>5</sup> Insensabe anebahroo úwara sega wensabé, Sísa Néhsara suwahpeqte áninsábé anebahrúne uwana Sísaga sensabé, Íné we uge úwe. Súrása, Sísane naruo koweriro anínseq mitaq iriwe míowe.

<sup>6</sup> Iriwe míowana Sísaga, Íné we uge teriutaq sega sinehepeqte atárue inahsubúwe.

<sup>7</sup> Sísaga móñkakákáq kasenéna, Insensabe anebahroo úwara sega, Sísa Néhsara suwahpeqte áninsábé anebahrúne uwe.

<sup>8</sup> Uwana Sísaga sensabé, Íné we uge teiú mino. Ínésabe ninebahrirataq mah anímári pehragariteq pokoro arítáhro úwe.

<sup>9</sup> Sísaga métáq tahnsa Manikánsabe mahraréna, Kawerue wahnahnarítáugara se íre taqnobagowe úwe. Mi ehwéh aiq pútaraginkeheéna mah anímári pehragariteq pokoro arítáhro úwe.

<sup>10</sup> Sáimóni Pítaga wene poka matawéna Manikáne ehweh mibeq mahbeq arítáh kéné wahnahne arambehri aní wenáwíq Mákusa apiwe wene púpeqte áhré kiraq auwowe.

<sup>11</sup> Kiraq auwowana Sísaga Pítansabé, Poka unahpí úsaro éna, Nánibone níerorahi arámbéhrí nirupipeq umehorahi arámbéhrí mirainaú mino úwe.

*Sísa Ánásaba móátó ehwehne.*

<sup>12</sup> Úwara sóntia kerek sene wahnah anínseq párisíwarínseqka Sísa táhtoqme táchru táhruwe.

<sup>13</sup> Téhwe sega Sísa meqmera wehukení áwíq Ánásaba móátówe. Ánásawe Káiyápásane awarénawae. Sísa pukinaú opéq Káiyápásawe Manikáne ehweh mibeq mahbeq arítáh kéné wahnah míowe.

<sup>14</sup> Káiyápásaga menah tahnsa Asiu ke teriena, Iteruwahrah ómi pukiyehboq peh morá áninká kaweraitankéhboq pukinkehe. Mina aiq kawerire úwe.

*Pítaga Sísa íre tagarióge ú ehwehne.*

(Mátíyu 26.69-70; Mákha 14.66-68; Árúka 22.55-57)

**15** Ite Sísa kérhwáya aníté Sáimóni Pítareq ínéreqka Sísa kérhwáye. Manikáne ehweh mibeq mahbeq arítáh kéné wahnahnka íné tagariowe. Wega íné tagarionsabe wene nahtapeqté mátábúrapéq Sísa kérhwae.

**16** Pítaga méhpéhpeqté ónsaráq kowíowe. Manikáne ehweh mibeq mahbeq arítáh kéné wahnahnka íné tagario púana ínéga onsarapéqté wáhnáh áhráryábé, Onsa sio koreawéwae. Onsa sio teawena Pítá meqmena mátaburaq móátáhwae.

**17** Mi ahrárígá Pítansabé, Are moq mah aní kérhna anípo úwana, Írakaumo. We íre kéróge úwe.

**18** Titirúnsabe arambehri kereq párlísiwarínseqka ira parewe tutorue míowana Pítá moq iriwe ména tutorúwe.

*Wahnah anínká Sísansabé ehweh ato ehwéhne.*

(Mátíyu 26.59-66; Mákha 14.55-64; Árúka 22.66-71)

**19** Manikáne ehweh mibeq mahbeq arítáh kéné wahnahnka Sísansabé we kéró keakáq wega síwáhnorú ehwehnkákáqsábé kasenúwe.

**20** Sísaga wensabé, Íné íre epéráhpéria ahriahri peh ábóraq áhnte wehekéq míáhrabeq teri terinuge. Itene momiwío nahtápéqkákáq Manikánsabe iwiáh iwiáh atáh náhtápéqté wíráipéqkákáq síwáhnoruge. Íre epéráhpéria síwáhnoruge.

**21** Ínénsabe aneqsabé kasenaintaho? Néne ehweh teríú ké írátíahwe. Seba kogaseninanao úwe.

**22** Úwana mibeqté iriwe mío anínká ayahpóra Sísa subiqmarena wensabé, Manikáne ehweh mibeq mahbeq arítáh kéné wahnahnsabé mina tahnsa éhwéh atéhneho úwe.

**23** Úwana Sísaga wensabé, Íné ahhbabáq ehweh teawénaraqmé tenio. Íre ahhbabáq ehweh teawúge. Árahinsabé nubono úwe.

**24** Úwana Ánásaga Sísa íre pugeq auwasa Manikáne ehweh mibeq mahbeq arítáh kéné wahnah Káiyápásaba eqmaq auwowe.

*Pítaga móñkakáq Sísansabé ahqáho ato ehwehne.*

(Mátíyu 26.71-75; Mákha 14.69-72; Árúka 22.58-62)

**25** Pítaga iraraq ména pabesuq tehesurue tutoruwara mío kega wensabé, Are moq we kérhna anípo uwana Pítaga sensabé, Ahqáho. We íre kéróge úwe.

**26** Manikáne ehweh mibeq mahbeq arítáh kéné wahnahne arambehri anínká Pítansabé, Sísareq arereq mátaburapeq míehyana tagewó mino úwe. Mi ehwéh irarú animé we Pítaga ahre apiaro aní awahrah aníne.

**27** Tagewó mino úwana Pítaga móñkakáq ahqáho úwana kokórega ehwehnúwe.

*Páhírátiga Sísansabé kasenú ehwehne.*

(Mátíyu 27.1-2,11-14; Mákha 15.1-5; Árúka 23.1-5)

**28** Ahbiahiperura sega Sísa meqmera Káiyápásane nahtapeq suera anotah nahtápéq ehweh aruqaruro nahtápéq Sísa móátówe. Sótaikú tanahráq no tahutáhúq wéhékáh mi nahtápéq kiewé órira púara Asiu kegá íre kíúwe.

**29** Mibeqté wáhnáh ání áwíq Páhírátiga máhpeq tueyokéna sensabé, Itega méáuwáh ánímé aneq ahhbabáriro úwe.

**30** Úwara sega wensabé, Mah ání íre ahhbabáq ani tahirí túbáh agúna irino uwe.

<sup>31</sup> Uwana Páhírtiga sensabé, Iteitega we meqmeq iteitene sásánue iwíáhue ehweh atáhro úwe. Úwara sega wensabé, Wehukení subiq sueyabe ite Aroma kegá ahqáho aitárówe uwe.\*

<sup>32</sup> Menah Sísaga, Segá íné pankeragéhe irarúmé amahnága aiq pútaq aginkehéera mi ehwéh teawúwe.

<sup>33</sup> Páhírtiga nahupeq kibekéna Sísa meqme seroue wensabé, Arewe Asiu kené wahnahpo úwana

<sup>34</sup> Sísaga wensabé, Arega irarénawe arerene iwíáhbo? Íné éhweh mó anínká teawiro úwana

<sup>35</sup> Páhírtiga wensabé, Íné Asiu anínabugo? Arenawahrahreq itene wahnahmarínseqka are meqmera ínéba méáuwáhwe. Aneq ahbabárurono úwe.

<sup>36</sup> Úwana Sísaga wensabé, Íné wahnah wahnahnurabeqme íre mah marákó márakóípére. Mah marákó márakóípéq wahnahnutaq tahirímé Asiu kegá íné táhtoráhtáq íné séníráh kégá ebeho irino. Íné wahnah wahnahnurabeqme íre mah marákó márakóípére úwana

<sup>37</sup> Páhírtiga Sísansabé, Are anotah Wahnáh ání míahno kasenúwana Sísaga wensabé, Arega aiq iraréne. Aiq pútaq ehwéhnsábé síwáhnorinieéna mah marákóípéq tuména wehukení úkurauge. Aiq pútaq ehwéhnsábé suwahbeh kegá néne ehweh íráhwe úwana

<sup>38</sup> Páhírtiga wensabé, Aiq pútaq ehwéhmé aneqpomo úwe.

*Páhírtiga, Sísa awankátaq táhparáhro ú ehwehne.*

*(Mátíyu 27.15-31; Mákha 15.6-20; Árúka 23.13-25)*

Páhírtiga wensabé, Aiq pútaq ehwéhmé aneqpomo éna máhpeq tueyokéna Asiu keyábé, Íné iwíáhume we íre ahbabáq ani míre.

<sup>39</sup> Sótaikú iahreraq ko tanáhráq ahriahri peh morá karábúsiipéqté ání pugeq íuwóge. Mi sansá mira aruqaruruge. Minayabe Asiu ke itene Wahnah pugeqíníkono úwe.

<sup>40</sup> Úwara sega anotah ehwéhnabaéra, Mi anímé pehragé Páréhba pugeqio uwe. Páréhbawé wehukení subena aebó ání míowe.

## 19

<sup>1</sup> Páhírtiga sóntia keyábé, Sísa meqmeq áréti sahtáté subóro aritowara sega meqmera mósubúwe.

<sup>2</sup> Mósubera ógaratáté keborarera wene ayahqnotaq suki atera peh morá táútáúq kórósí abaq atówe.

<sup>3</sup> Mó anínká mó anínkáue Sísaba séra wensabé, Are Asiu kené wahnahpo éra awiréh atera siyahpóra subúwe.

<sup>4</sup> Páhírtiga máhpeq mó tueyokéna soruparió keyabé, Írátíáhro. Íné iwíáhume we íre ahbabáq anine. Minayabe tagariageheéna iteba máhpeq ataníe úwe.

<sup>5</sup> Úwana Sísaga ógaratáté keboria nánekkakáq tautáúq korósíákáq máhpeq tueyokúwe. Tueyokúwana Páhírtiga sensabé, Mah ání tagahro úwe.

<sup>6</sup> Manikáne ehweh mibeq mahbeq arítáh kéreq wahnah kereqka Sísa tagéra áhnte ehwéh kíkíréra, Awankátaq táhpawé subiq súáhro éra pagu pagunuwe. Pagu pagunuwaná Páhírtiga sensabé, We íre ahbabáq anine íwíáhúnsabe iteitega meqmeq awankátaq táhpawé subiq súáhro úwe.

<sup>7</sup> Úwara Asiu kegá wensabé mahraréra, Wega, Íné Manikáne ahninkáwá úge urainsabé itene sásá sabiúéhre. Sabiúéhmé puko nanere uwe.

<sup>8</sup> Uwana Páhírtiga mi ehwéh irena anotah ahré agúwe.

\* **18:31:** Mi tanáhráq Aroma kegá Asiu kené marákó págegeue wahnahnéra Asiu keyábé, Ite wehukení ehwehotaq we subiq súáhro arite ehweh órirane éra peh morá ite Aroma kegá mi sansánoneheqmúne uwe. Wehukení awankátaq táhpawé sansamé Aroma kené sásáne.

<sup>9</sup> Wega koti nahtápéq mó kibekéna Sísansabé, Arewe eheqte anípo úwana Sísaga ehweh íre iraria peh ehiya míowe.

<sup>10</sup> Páhírátiga Sísansabé, Aneqsabé ehweh íre tenieno? Ínéga are soraq auwahráhugé. Ínéga are awankátaq táhparahráhugé. Mahnawé aiq irahno úwe.

<sup>11</sup> Úwana Sísaga wensabé, Peh morá Manikánka arega wahnahnúno atáráinsabé arega íné awankátaq táhparahráhóne. Minayabe areba móíntéh áníné ahbabáqka arene ahbabáq kiotaikire úwe.

<sup>12</sup> Páhírátiga mi ehwéh irena, Pugeq auwanie íwíahúwe. Iwíahúwara Asiu kegá anotah-taqaq mahraréra, Arega we pugeq auwéhnaraqme are íre Sísáhri, Aroma kené wahnahne iyahnabo aní móne. Íné Asiu kené Wahnah mugé iraréna anímé Sísáhrine naruuo aní míre uwe.

<sup>13</sup> Páhírátiga mi ehwéh irena Sísa máhpeq márunatena wahnah anínká ehweh atorabeq tútuue míowe. Mibeq áwíq Ebah Ahtápére. Íbaru ehwéhmé mitaq Kábátae ue áwíratówe.

<sup>14</sup> Ahbiah tahnsá ite Asiu kené sótaikú iahreraq ko tánáhráre. Ibora tahnsa wéhékáhnabubu wahtotarútaq Páhírátiga Asiu keyábé, Itene Wahnah tagahro úwe.

<sup>15</sup> Úwara sega ehwehnabaéra, We meqme mósubiq suo. Awankátaq táhpawé subiq suo pagu pagunuwe. Pagu pagunuwana Páhírátiga sensabé, Itene anotah Wahnáh awankátaq táhparáhro ininkono úwe. Úwara Manikáne ehweh mibeq mahbeq arítáh kégá wensabé, Aroma kené wahnahme webataq itene wahnahne uwe.

<sup>16</sup> Uwana Sísa awankátaq táhparageheéna Páhírátiga móatowara sega Sísa meqmera pokuwe.

### *Sísa awankátaq níriraté táhparó ehwehne.*

(Mátíyu 27.32-44; Mákha 15.21-32; Árúka 23.26-43)

<sup>17</sup> Segá Sísa meqmera pokuwana Sísaga wewe táhparéhra awánká abaqmena kúwe. Kire kire sáwéh áwíq Ayahqno Tánúnsutapéq pokuwe. Íbaru ehwéhmé mi sawéh áwíq Kógótae ue áwíratówe.

<sup>18</sup> Segá Sísa awankátaq níriraté wene ayahnkaratáq subiqmaq aigárátáq subiqmarue táhparera awanká pankeqme marakóipeq pearówe. Pearera mó aníté mó awánkátáréráq táhparera pankeqme pearówe. Sísa ákáhpi pearera mi aníté ayehré ayehré pearówe.

<sup>19</sup> Páhírátiga, Kanehraq sehiranue táhparáh áwánkátáq táhparáhro aritowara táhparówe. Kanehraté séhíránká mahraréna, Néhsara su wahpeqte ání Sísawe Asiu kené Wahnahne úwe.

<sup>20</sup> Mi kanéhráq sehirania apahtáró kékíhánáne ehwehtaq sehiranéna Íbaru ehwéh Asiu kené ehwehnakákáq Aroma kené ehwehnakákáq Káríki kené ehwehnakákáq sehiranúwe. Sísa táhparótaq Sarúsarama su wahpeq wahtotaq puara áhnte Asiu kegá tagéra mi sehirá sáhnsáhúwe.

<sup>21</sup> Asiu kené Manikáne ehweh mibeq mahbeq arítáh kégá Páhírátinsabé, Asiu kené wahnahne íre sehiranúno. Peh mi anínká, Íné Asiu kené Wahnah mugé ire. Minawé sehiranúno uwe.

<sup>22</sup> Uwana Páhírátiga sensabé, Íné sehiranéwó náneq aiq sehiranue parabarúóge úwe.

<sup>23</sup> Sóntia kegá Sísa awankátaq táhparera wene korósi mewera itaréitaréráq saraqmarera meyówe. Wene káhq ambántá anehe mewera íre parura peh táránkaq kowe.

<sup>24</sup> Peh táránkaq konsabe subansúéhneho íwíahéra, Insegá meyanabomo éra káhsiuwana peh morá ánínká meyowe. Miraunsabé Manikáne ehwehme aiq pútaragúwe. Mi ehwehnáká mahraréna,

Segá néne korósi saraqmera káhq ambántá káhsue meagehe ire. (Buk Song 22.18)

<sup>25</sup> Kárópane ahre áwíq Máhríae. Mágára su wahpeqte mó iní wenáwíq moq Máhríae. Sereq Sísane anowareq wene ónánahwáreq awankátaq táhparórabeq wahtotaq kowíówe.

<sup>26</sup> Kowiówana Sísaga íné, we kéráhwa anínsábé arutaboiraintéh ánínseq wenanoreq míahwayana wega ite tagéna wenanonsabe, Areba míéh ání arenahni míankehe éna

<sup>27</sup> wega ínésabe, Náinowé arenano míankehe úwe. Teniunsabe wenanoga néne natapeq kaegaeúwana kirabo atáhwae.

### *Sísa pukú ehwehne.*

(Mátíyu 27.45-46; Mákha 15.33-41; Árúka 23.44-49)

<sup>28</sup> Sísaga iwiáhéna, Néne arambehri aiq moke parabagire éna Manikáne ehwehnka aiq pútaraginkehéna wega, Íné tahbobóire úwe.

<sup>29</sup> Kítabeh nahniáq sérá ano obenkisa ántéhyá mitaq kowara sehenáh tahná náneqtaté antehyapípéq pámbáhue sehikaratáq marera wene áwéhipeq atówe.

<sup>30</sup> Atówana Sísaga néna, Aiq parabagire úwe. Aiq parabagire éna wene anuo píntéráhena wenawa soraq suena putiowe.

### *Sísa sehsabio ehwehne.*

<sup>31</sup> Ahbiah tahná ite Asiu kené ahrena ahrena wehekáhne. Mi tanáhráq itene sótaikú iahreraq kék tánáhráq púara Asiu wahnáh kégá iwiáhéra, Putianeherao kené sinonka ahrena ahrena wehekáh awankátaq kehneho uwe. Minayabe sega Páhírátiba pokéra wensabé, Putianeherao ke apubúue pukigeheeé siwiah anteruo úno. Putiéhrataq awanká soriwe mewe maisaragéhe uwe.

<sup>32</sup> Sóntia kegá pokue Sísareq awankátaq táhparó aníténé siwiah anterúowe.

<sup>33</sup> Segá Sísaba séra tagowana aiq putio púara sega wene awiah íre anterúowe.

<sup>34</sup> Peh morá sóntiá áninká wene sehsabe karatáté Sísane aroganabí sehsabiowe. Sehsabiotaq korahqkakáq wáninkakaq súwe.

<sup>35</sup> Nénéne niuranka tagahwae. Íné aiq pútarahnsanuge. Itega aiq pútare atageheéna teiúge.

<sup>36</sup> Manikáne ehwehnka mahraréna,  
Wene ayahnsa íre anterigéhe ire.

(Buk Song 34.20)

<sup>37</sup> Manikáne ehwehnka mó mahraréna,  
Sehsabearáh ání tagagehe ire.  
Miraue mi ewhéhtáre aiq pútaragúwe.

(Sekaraia 12.10)

### *Sísane anonka másé onápípéq másaró ehwehne.*

(Mátíyu 27.57-61; Mákha 15.42-47; Árúka 23.50-56)

<sup>38</sup> Árimátéa su wahpeqte ání Sósépaga Sísansabé aiq pútare atena Asiu keyábé áhreú púana Sísa oga míotaqme we íre ábóraq kérowe. Sósépaga Páhírátinsabé, Sísane anonka mewena mómaisaraníkono úwana Páhírátiga wensabé kowe atowana máhpeq tueyokue Níkórímareqka tumeyóye.

<sup>39</sup> Níkórímawé menah tahná Sísaba inokáhpeq sena niginka tahná kaweq kunkúni naneqmarí áhnte 30 kíro mewena súwe.

<sup>40</sup> Sósépareq Níkórímareqka Sísane anonka mewera kaweq kunkúni naneqmaríkákáq wene anonkankakáq kaweq íre wahto ambántátáté úbíq máróye. Mi sansámé Asiu kené wehukení másare sansane.

<sup>41</sup> Sísa táhparówana másaró matábú wahto kowe. Mi matábúráq o ubuqmaró oná kowe. Mipéq mó aní íre másarówe.

<sup>42</sup> Ahbiah tahná Asiu kené ahrena ahrena wehekáh púara mó oná kabareyabe íre miraorahuye. Minayabe mi oná wahto ko púara sega Sísa mitaq másaróye.

### *Sísa oga úkú ehwehne.*

(Mátíyu 28.1-8; Mákha 16.1-8; Árúka 24.1-12)

<sup>1</sup> Mó wikíné ebeqte wéhékáh tanahráq tuekinaútaq Máhría, Mágára suwahpeqte ínínká Sísa maisarórabeq súwe. Méhpehtaq paiqmáró ebáh íre paisa peh móbeq kowana tagówe.

<sup>2</sup> Tagéna we Sámóni Pítareq íné, Sísaga arutaboiraintéh ánínseqpa pehbeheráh séna itensabé, Itene Wahnahne anonka ónapipéqté mewera eheqpopoq márahwe úwe.

<sup>3</sup> Úwata Pítareq ínereqka Sísa maisaróyarabeq koragayeheéta pehbeheráh pokowaye.

<sup>4</sup> Pehbeheráh ínéga Pítá kótaikue Sísa maisaróyarabeq ebeq kowae.

<sup>5</sup> Mitaq ebeq kéna taebewe maisia ónápípéq tagahwana Sísane anonka úbíqme maisaróya ambántá mitaq kowana tagahwae. Íné mibeq íre tueagia peh taebewe tagahwae.

<sup>6</sup> Peh tagahwana Sámóni Pítaga mitaq séna maisaróyarabeq kobekue tagówe. Taberábe maisaróya ambántá mitaq kowana tagówe.

<sup>7</sup> Sísane ayahqno úbíq máróya ambántá mobeq kowe. Ayahqno úbíq máróya ambántámé maisia ámbántá korabeq íre kowe. Peh sabaráwe móbeq kowana tagówe.

<sup>8</sup> Tagówana íné maisaróyarabeq ebeq kowa anínká moq kobekue tagahwae. Tagéna, Sísa aiq irigire éna aiq pútare atáhwae.

<sup>9</sup> Manikáne ehwehme, We pukéna iriginkehe séhírá kowata mi tanáhráq mah sehirá íre iahtebahwaye.

<sup>10</sup> Tagéta ite kaegaeowayarabeq kouwekowaye.

*Máhría, Mágára suwahpeqte ínínká Sísa tagó ehwehne.*

*(Mátíyu 28.9-10; Mákha 16.9-11)*

<sup>11</sup> Kouwekowayana Máhríaga maisaróyarabeq mó séna máhpeq iriwe ména ibisówe. Ibiséna wega maisia ónápípéq taebewe tagówe.

<sup>12</sup> Íre wahto taberábe ambántánkákáq áníté íópeqté áníté Sísane anonka keworabeq tútuue míoyana Máhríaga tagówe. Mó aní Sísane ayahqno keworabeq mó aní wene aigará keworaberue tútuue míoyana tagówe.

<sup>13</sup> Tagówara sega mi inínsábé, Aneqsabé ibisahno uye. Uyana wega sensabé, Néne Wahnah ínéga íre tagariórabeq móruáhnsábé ibisoge éna

<sup>14</sup> wega pabeqme tagówana Sísa iriwe míowe. Míowana mi iníné arupipeq Sísa wire ue íre iwíáhue tagówe.

<sup>15</sup> Íre iwíáhue tagówana Sísaga wensabé, Are aneqsabé ibisahno? Insensabe anebahrono úwana mi inínká iwíáhéna, Kaseni aní we mah matábúráq wahnahni aníne iwíáhéna wensabé, Wene anonka mearáhnawe eheq marahno? Kowaníboq tenio úwana

<sup>16</sup> Sísaga wensabé, Máhríao úwana mi inínká weba pabeqme tagéna Asiu kené ehwehtaq, Árábónáio úwe. Mi ewhéh áwahewé Íwáhnoraníno úwe.

<sup>17</sup> Úwana Sísaga wensabé, Nániboba íre pokurio puah ninonkataq táhtoréhnehboq néne iyahnabo korerio. Maniká Nániboba tuekinauge. Mí ewhéh korerio úwe.

<sup>18</sup> Úwana Máhría, Mágára suwahpeqte ínínká ite Sísa kérähwána kebá séna itensabé, Ínéga Sísa aiq tagoge éna Sísaga teawu ewhéh teiuwe.

*Sísa kéró kega we tago ewhéhne.*

*(Mátíyu 28.16-20; Mákha 16.14-18; Árúka 24.36-49)*

<sup>19</sup> Penorabeqte mó wikíné ebeqte wéhékáh tanahráq ite Sísa kérähwána kegá soruparawéq Asiu keyábé áhreowana puaq itene nahupeqte ónsá paiqmareq míahwane. Míahwanana Sísaga ákáhpi seiriwe ména itensabé, Pehwehrue iru ukiqme míáhro úwe.

<sup>20</sup> Iru ukiqme míáhro éna wene ayahnkarankákáq wene aroganabínkákáq sokigi aiuwaq itega we tagéq itene irupipeq anotah eyóyóúwe.

<sup>21</sup> Sísaga móñkakákáq itensabé, Pehwehrue iru ukiqme míáhro. Nániboga eqmaq núwátainserah ínéga moq ite eqmaq iúwóge úwe.

<sup>22</sup> Eqmaq iúwóge éna wene euq ahusaiena, Manikáne Awa iúge úwe.

<sup>23</sup> Manikáne Awa íúge éna wehukeníné ahbabáq soraq súéhrataq íre kagainae. Wehukeníné ahbabáq íre soraq súéhrataq sene ahbabáq seba kagainae úwe.

### *Tómáhsiga Sísaga tagó ehwehne.*

<sup>24</sup> Sísaga iteba sú tanahráq peh morá we kéro aní, Tómáhsiga íre míowe. Tómáhsine wéhuwehu áwíq Tírimásie.

<sup>25</sup> Sísaga mó kérhwána kegá Tómáhsinsabé, Itene Wahnah oga míéhraq tagóne teawewáne. Teawewánana Tómáhsiga itensabé, Pehipi íre aiq pútare aitaníe. Sísane ayahnawarutaq níri subisa ábí tagéna niyahnkaratátē wene aroganabí sehsaberapí táhtoráhnaraqmé aiq pútare aitaníe úwe.

<sup>26</sup> Abapete téhtaré wéhékáh sótaikúwaq Tómáhsireq ite Sísaga kérhwána kereq nahupeq míahwane. Onsawári áróki pareq míahwanana Sísaga ákáhpi seiriwe ména itensabé, Pehwehrue iru ukiqme míáhro úwe.

<sup>27</sup> Iru ukiqme míáhro éna Tómáhsinsabé, Néne niyahnkara sosanue tagáhno. Ayahnkahkahrue néne niroganabí táhtoro. Íre aiq pútare aintéhnehboq aiq pútare ainto úwana.

<sup>28</sup> Tómáhsiga Sísansabé, Néne Wahnah mone. Néne Maniká móne atowe.

<sup>29</sup> Atowana Sísaga wensabé, Arega íné tagáhnayabé aiq pútare aintahno? Sene siuratate íné íre tagéra pehipi ínénabe aiq pútare aintáh kégá iwiáh íwíahigehe úwe.

### *Sóniga Áwáhe ehwéh teí éhwéhne.*

<sup>30</sup> Mah pukúípéqté séhírá moke Sísane ótaq sansánsábé íre teiúge. Wega áhnte mó miraúwaq ite we kérhwána kegá tagahwane.

<sup>31</sup> Sísawe ite meirena kaweraitankeheéna Manikánka omaq ato aninéna we Manikáne ahninkáwá wíre. Minayabe aiq pútare atageheéna mah ehwéh sehiranue teiúge. Sísansabé aiq pútare atéhrataqmé wenáwírue oga mía míaigehe.

## 21

### *Sísaga we kéró kebá ábóraru ehwehne.*

<sup>1</sup> Peh morá kawéhúnsábé téhtaré áwíq kéhre. Kehrari kawéhúne. Mó awíqmé Tálbéría kawéhúne. Mó tanahráq mi kawéhú ayehráq Sísaga ite we kérhwána kebá ábóraruwe. Wega mahraue ábóraruwe.

<sup>2</sup> Ite abapete téhraníté kérhwána ke sesorupawe míahwane. Tómáhsive wene wéhuwehu áwíq Tírimásie. Wereh Sáimóni Pítareh Kéána suwahpeq Kehrari marákórápéqté ání Nátáníérirreh ite Sébérine ahninkáwáraráreq téhraníté mó keroya anítáreq sesorupawe míahwane.

<sup>3</sup> Sáimóni Pítaga itensabé, Íné pah sábátáhrinauge úwaq itega wensabé, Ite moq are kéránéhe ewane. Itega sípi kewewe pokue moke penkútaq uwe taga tagaowane. Pah íre maqmera pehipi uwe taga tagaowane.

<sup>4</sup> Ahbiahipeq Sísaga káwehu áhnopeq súwaq itega we íre tagariahwane.

<sup>5</sup> Sísaga itensabé, Nanuwahraho, pahmé aiq maqmiaho úwaq, Írakaumo ewane.

<sup>6</sup> Ewanana Sísaga itensabé, Sípiipéqté éberiopéq uwe tagéq meyagéhe úwaq itega itene kahwe éberiopéq uwe tagéq áhnte pah meyahwáne. Áhnte pah meyahwánayabé kahwe íre pankerahráhowane.

<sup>7</sup> Íné, Sísaga arutaboiraintéh áninká Pítansabé, Áhnopeq míéh ání itene Wahnahne teawewae. Sáimóni Pítaga pehrákora ména arambehriúnsabe, Itene Wahnahne teawewana apubúue wene ambanta úbíq mena káwehupípéq ahkuagúwe.

<sup>8</sup> Pah kahweipéq kowaq mó ite Sísaga kérhwána kegá kahwe sabirue meweq sípi kewewe pokowane. Áhnopeq wahtotaq ko púaq itega kahwe sabirue meweq pokowane.

<sup>9</sup> Ite áhnopeq kowanaraq ira paríowana taigowaq tagahwane. Tairáq pahnkákáq párétiakáq kowe.

<sup>10</sup> Sísaga itensabé, Ite matiáh pág táhmaro mewe sero úwana

<sup>11</sup> Sáimóni Pítaga síipiipéq kire pahnkákáq káhwé sabirue áhnopeq méarowe. Kahweipéq anotah pahmári íregáritaq 153 pahmári míowana kahwe íre surakúwe.

<sup>12</sup> Sísaga itensabé, Sewe nahro úwe. Itene Wahnah tagariahwanayabé itega, Are inseboue íre kasenowane.

<sup>13</sup> Sísaga párétiakáq pahnkákáq mewena ménáiuwe.

<sup>14</sup> Sísa organúq atowana wega ite we kéráhwána kebá apahtáróráq ábórarúwe. Teiúmé apahtáró tánáhráre.

*Néne sipisípiqmarí kirabo ainto ú pabéqmé éhwéhne.*

<sup>15</sup> Táhutahuq nahwanana parabagútaq Sísaga Sáimóni Pítansabé kasenéna, Sáimóni, Sónine ahninkáwáo, Arega mah keyábé ákáhtaq arutaboirarite ínénabe anotah arútábóíraintahno úwe. Úwana Pítaga wensabé, Kowe. Are tagariahnawe arensabé nirutaboiruge úwana Sísaga wensabé, Néne sipisípiq áráhqmarí kirabo ainto úwe.

<sup>16</sup> Sísaga we mó kasenéna, Sáimóni, Sónine ahninkáwáo, ínénabe arutaboiraintahno úwana Pítaga wensabé, Kowe. Are tagariahnawe arensabé nirutaboiruge úwana Sísaga wensabé, Néne sipisípiqmarímé wahnahnainto úwe.

<sup>17</sup> Sísaga anehe mó kasenéna, Sáimóni, Sónine ahninkáwáo, ínénabe arutaboiraintahno úwe. Apahtáróráq kasenú púana Pítane arupipeq umeh agúwana Pítaga wensabé, Néne Wahnahno, arega moke tagariahne. Are tagariahnawe ínéga arensabé nirutaboiruge úwana Sísaga wensabé, Néne sipisípiq kirabo ainto.

<sup>18</sup> Kawerue írátíahno. Are mahbi míaronaraq arene áréti sabirare arega awahbarairabeq pokurone. Are ore úkínaraq arene ayahnkara pankeréhnaraq mó kegá ahmboqme meqmera are íre awahbáhnarabeq móatagéhe úwe.

<sup>19</sup> Mah ehwéhmé Sísaga Píta pukína ehwéh teawuwe. We pukína tanáhráq Píta íre áhreínayabé tagehra kegá Maniká áwíq pankeragéhe. Mah ehwéh teawena Sísaga Pítansabé, Séniro úwe.

<sup>20</sup> Pítaga pabeqme íné, Sísaga arutaboirainto aní tagówe. Sísa pukinaúwara táhutahurowanaraq ínéga Sísame anepeq mósaqmaqme ména wensabé, Néne Wahnahno, arene naruo kowerirahna anímé insebo kasenowae.

<sup>21</sup> Pítaga íné tagéna Sísansabé, Néne wahnahno, mah aní anerinkehbo úwana

<sup>22</sup> Sísaga wensabé, Íné nuwahbéhnaraqmé kiwekona tanáhráq we peh oga míanawire íwíáhinabugamo. Arereq wehgaqpo? Arerega séniro únsabe

<sup>23</sup> mi ehwéh író kega mó Sísa kéró keyabé, Íné Sóni íre pukinkehé mitaq teri mahtaq terinuwe. Sísaga Pítansabé, Íné Sóni peh mía míankehe íre irarúwe. Wega Pítansabé peh miraue teawena, Íné kiwekonaraq we peh oga míanae íwíáhinabugamo. Arereq wehgaqpo úwe.

*Sísame áhnte mó arámbéhríwárínsábé éhwéhne.*

<sup>24</sup> Íné Sísa kéráhwa anínká mah ehwéh iraruge. Mah ehwéh aiq pútaq ehwéh púana sehiranue teiúge.

<sup>25</sup> Sísaga íre peh morá teiú árámbéhrí mirauwe. Wega áhnte mó arámbéhríúwe. Wehukega wene ehwehnkakáq wene arambehriakáq moke sáhnsahwe sehiranutaq tahirímé púkuwarínká mah marákó márákó kígí agirana marakó íre awehraq kék irino.

## Eqmaro Ke Ebeq sáhnsahwe ahbebé ehwehne.

Árúkaga ebeq sóteh arámbéhriéna anehe wega Pora kéréná séhréh atena púku áwíq Árúkae ue sehiranúwe. Anehenura mah pukú Eqmaro Ke pukúue ue sehiranúwe. Sísaga miraéna irarú ehwehnsábé ebeqte pukúgá teíre. Manikáne Awanka miraú arámbéhri Eqmaro Ke pukúgá teíre. Sísaga eqmaro kega pokue mó kehiná suwahpeq mó kehiná suwahperue Sísa éhweh koreríúwe. Teríútaq Manikáne Awanka se págege aritena séhréh aritowara áhnte kegá sene ehweh irera Sísansabé aiq pútare atówe. Mi éhwéhnká abae agúwara Sísa tagariáh ké áhnte úkuwe. Mah pukúipéqté éhwéhnká minayabeákáq eqmaro kega mirau arámbéhriákáqsábé teíre.

### Eqmaro kega miraunsabé éhwéhne.

*Sísaga, Manikáne Awa eqmaraníe ú ehwehne.*

<sup>1</sup> Tíópírásao, néne sehiramé kawerue sáhnsahwe iro. Menah tanáhráq mó pahtí sehiranue áwátáuge. Mi pahtíipéq moke Sísaga miraúnsabe sehiranue teawena wega íwáhnorúnsabeakáq teawátáuge.

<sup>2</sup> Wene arambehri áhwárótaqkakáq íópeq kiu tanáhráqsábéakáq teawátáuge. Wega marakóipeq míotaq wehuke eqmaq suanieéna omaq sitowe. Manikáne Awanka Sísa iwíáh atowana wega íópeq kinaútaq omaq sito ke síwáhnorúwe.

<sup>3</sup> Téhwe Sísa awankátaq táhpague pukéna anehe oga úkéna mó wehekáh mó wehekáhnue omaq sito keba sényéna wewe sokigi aritowara tagowe. Tagowana 40 wehekáh miraéna Manikánka wahnah wahnahnirabeqte éhwéh teriuwe.

<sup>4</sup> Mi tanáhráq sega momiwíuriótaq Sísaga mahraréna, Sarúsarama suwahpeq apubúue sueq pokiyehboq Nániboga eqmarahna aní tuinayabé wensabé áwénunoro. Menah Nániboga eqmarahna aní éhweh teiyátáuge.\*

<sup>5</sup> Naho Sóniga wání meriuwana Manikáne Awanka áhníborá tunse iteba mía míainkehe úwe.

<sup>6</sup> Mó tanáhráq eqmaro kega momiwíuriótaq sega Sísansabé kasenéra, Ísara ke iteitene marakóraq amahnága wahnahnoro aitaníbo uwe.†

<sup>7</sup> Uwana Sísaga sensabé, Nániboga moke mi tanáhráqkákáq wéhékáhnkakaq wahnahnire. Minawé íre iteitene arambehri puaq itega mi tanáhráqkákáq wéhékáhnkakaq íre tagariáhwe.

<sup>8</sup> Minawé íre tagarawéq mahraue tagariagehe. Manikáne Awanka iteba tuinaraq ite págege aitahnaq itega íné éhweh mah kehiná kékíná korerigéhe. Sarúsarama suwahpeqte kereq moke mó Súria marákórápéqté kereq Sámária marákórápéqté kereq moke mah kehiná kékíná korerigéhe úwe.

*Sísa íópeq kibekú ehwehne.*

*(Máhka 16.19-20; Árúka 24.50-53)*

<sup>9</sup> Mah kehiná kékíná korerigéhe úwana eqmaro kega tagotaq Sísa tumerowana íópeq kire írabúyápipeq kibekúwe.

<sup>10</sup> Kibekúwara sega íópeq awahnkanue tagariówara taberábe korósíákáq ánítégá iriwe míoye.

---

\* **1:4:** Sísaga eqmarahna anímé Manikáne Awa mire. Árúka 24.49, Sóni 14.16-17, Eqmaro 2.33 tagáhno. † **1:6:** Sísaga marakóipeq tutaq Aroma kegá Ísara kené marakó págegeue wahnahnuwara áhnte kegá iwíáhéra, Wega Aroma ke kaqsuena iteitensabé, Wahnahnoro aitankéhe iwíáhuwe.

<sup>11</sup> Iriwe méra sensabé, Kehrari marákórápéqté kéo, aneqsabé iriwe méq íópeq ebiti-aho? Sísaga ite iuwena íópeq pokiraq tagahwe. We amahnága pokinserah mókake tuinawire uye.

### *Súrásane arambehri awaq mio ehwehne.*

<sup>12</sup> Uyara eqmaro kega Óríwi sawéhrápéqté tunse Sarúsarama suwahpeq wahtotaq tueaguwe.

<sup>13</sup> Tueagéra sega kaegaeu nah abobórähpeq kíúwe. Sensíwíqmárimé mahraue Píta, Sóni, Sémisi, Ehntaru, Píripí, Tómáhsí, Pátórómíyu, Mátíyu, Ápiásane ahninkáwá wenawíq Sémisi, ebeh ehwéh iriaréh ání wenawíq Sáímóni, mó Sémísine ani wenawíq Súrása mirauega kíúwe.

<sup>14</sup> Sereq Sísane ábákawaréhreq wenanoreq mó inínsónseqka sirupipeq peh morá íwíahue moráráq púreq aruqaruruwe.

<sup>15</sup> Mó wehekáh sega mirautaq 120 ke áhnte Sísa tagaríah kégá momiwíuriówe. Pítaga iriwe ména mahraréna,

<sup>16</sup> Nánuwahraho, naho Manikáne Awanka Tébíti iwíáh atowana Súrása éhwéh sehiranúwe. Súrásaga Sísane naruo kowerironsabe mi sehirá aiq pútaraguraire.

<sup>17</sup> Sísaga Súrása omaq atowaq Súrásareq itereqka moráráq arambehriuraune úwe.

<sup>18</sup> Súrásaga Sísane naruo kowerironsabe móne meyowara mi monéráté marakó paiqmárówe. Súrásaga sáwéhrapeqté ayahqno maraipérue surahúwana wene ayahba tapoagúwe. Wene ayahba tapoague wene ayamári pehrápeq sahagúwe.

<sup>19</sup> Wega miraúnsabe moke Sarúsarama suwahpeqte kégá irera mi marákoyábé áwírumé sene ehweh Ákérámae atówe. Mi awíqmé Korahq Marakóe atówe.

<sup>20</sup> Pítaga Súrása éhwéh mó mahraréna, Buk Songipeqté éhwéhnká aiq mahraréna, Wene mátabu susa matábú kanae. Mó kegá mitaq íre míáhro arito ire. (*Buk Song 69.25*) Mi ehwéhnká mó mahraréna,  
Mó anínká wene arambehri awaq miankéhe ire. *(Buk Song 109.8)*

<sup>21-22</sup> Sóniga Sísa wání meawátáitaq táhmaro kegá Sísa kétówe. Segá kékérue Sísaga oga úkuraitaqkákáq íópeq kiraitaqkákáq tagarowe. Mó ke Sísa éhwéh terigeheéq mina tahnza Sísa kékéri aní iwíáhue omaq atanéhe úwe.

<sup>23</sup> Pítaga mi ehwéh teriuwara sega téhraníté omaq sitówe. Mó aní wenawíq Máhtiásae. Mó aní wenawíq Sósépae. Sósépawe we mó awíq Pásábae. We mó awíq Sásátae.

<sup>24-25</sup> Segá mahrarue púreréra, Itene Wahnahno, arega ómi kehináné sirupipeqté íwíáhwé aiq tagariahne. Arega eqmatona arámbéhrí Súrásaga aiq suena ahbabarorabeq pokuraire. Wene arambehri mirainkeheé arega omaq atahna aní sokigi aio éra púreruwe.

<sup>26</sup> Manikánka omaq ato aní taganeheéra sega káriq ebáh tuparuqme tagéra Máhtiásawe Súrásane arambehri mirainkehe atówara we Sísa kéró ke, airápété morá kéreq arambehriúno átówe.

## 2

### *Manikáne Awanka tu ehwehne.*

<sup>1</sup> Asiu kené sihreraq ko tanahráq áwíq Péntíkósie.\* Ebeqte wehekáh sutaq Sísa tagaríah kégá moke peh morábí sáhuriówe.

<sup>2</sup> Sáhuriówana íópeqté éhwéhnká anotah soíríqká uu inserahnúwara ómi nahupeq tútuue míó kega apubúue írówana

<sup>3</sup> anehbí irobina tahnsá náneqmarí ábóraragúwara tagowe. Tagowara irobina abae ague mó anípá mó anípáne abae agúwe.

\* **2:1:** Péntíkósiyabé éhwéhmé púku anehepeqte séhíramé “Manikáne Púkuipéq Kéh Áwahe Éhwéhne” ue kéhrabeq tagáhno.

<sup>4</sup> Manikáne Awanka sirupipeq tuména iwíáh arito púara sega mó kehináné kambare ehweh iraruwe.

<sup>5</sup> Mi tanáhráq áhnte Asiu ke mó kehiná mó kehiná suwahpeqte Sarúsarama suwahpeq sewiówe. Mi ke Manikánsabe iwíáh íwíáh atáh ké wóe.

<sup>6</sup> Segá mi ehwéh irera sega morábí sáhurawéra írówarawé Sísa tagariáh kégá mó kehiná mó kehináné ehweh iraruwe.

<sup>7</sup> Iraruwara seyene ehweh irarunsabé író kega áhtenéra, Árahue irareo éra iwíáhue tagowe. Segá áhtenéra mahraréra, Iteitene ehweh irare kewé se peh morá Kehrari marákórápéqté ké wóe.

<sup>8</sup> Segá iteitene ehwehmarí irarewaq irone. Segá itene ehweh árahue irareo?

<sup>9</sup> Ite Pátia kewé Míría kewé Érámi kewé Mésópótémia marákórápéqté kewé Súria marákórápéqté kewé Kápárósia marákórápéqté kewé Póntusa marákórápéqté kewé Esia marákórápéqté kewé itene ehweh irarewaq irone.

<sup>10</sup> Párígía marákórápéqté kewé Pámbíria marákórápéqté kewé Ísípi marákórápéqté kewé Áribia marákórápéqté kewé Sáíríni suwahpeq wahtotaq mi kewé Aroma suwahpeqte náhnsó kewé itene ehweh irarewaq irone.

<sup>11</sup> Mi kewé Aroma suwahpeqte náhnsó kewé táhmaro Asiu keúrá míáhwe. Mó mitaqté ké Asiu kené sánsá mero ke míáhwe. Kíriti marákórápéqté kewé Árébia marákórápéqté kewé moke mi kegá itene ehweh irarewaq irone. Manikánka págege arámbéhríinsabé sega irarewaq irone. Moke iteruwahrahga irarewanserah itene ehwehmarí irarewaq irone uwe.

<sup>12</sup> Segá áhtenéra sene sirupipeq iwíáh kikiréra, Itene ehwehmarí árahue irarewapómo? Aneq sansápómo uwara

<sup>13</sup> mó kegá siwiréh aritera, Segá peh píah nah puara múgu wahgu ehwéh irarewe uwe.

### Pítaga pahsuo ehwehne.

<sup>14</sup> Uwara Pítareq airápété moráue eqmaro kerekka iriwe míówe. Pítaga mipi sáhurió keyabé anotahtaq teriena, Sarúsarama suwahpeq kaegaeo kereq moke mó Asiu kerero, ehweh teiníboq írátiáhro.

<sup>15</sup> Abehq wání nah puara múgu wahgu ehwéh irarewe eme írakaumo. Amahnága pópoqnah peh ákáhtaq kéhrana íre píah né tanahráre.

<sup>16</sup> Mó kené ehweh irarensabé Manikáne ehweh irarú ani, Sóériga mahraréna,

<sup>17</sup> Manikánka iraréna, Anehe tanahráq Néniwa mah kehiná kékínápá eqmaq auwaníe. Néniwanka néne ehweh iwiáh aritahnara itenahnimáhqsonseq iteriyahumáhqsonseqa ehwéh irarigehe. Itene mahbigauné siwanka tagagehe. Orerónká áónáh tagagehe.

<sup>18</sup> Mi tanáhráq néne arambehri mirao weh áhrébá néniwa eqmaq auwaníe. Néniwanka néne ehweh iwiáh aritahnara ehweh irarigehe.

<sup>19</sup> Íopeqté íre tagariáh náneq sokigi ainíe. Marakóipeqté moq págege sansá sokigi ainíe. Korahqkakáq iraakáq áúnínaakáq tagagehe.

<sup>20</sup> Pópoqnah sunkíkíraginae. Íotaq korahq tahnsa tautáúraginae. Miraínagake anotah Wahnáh áninka págegeue wahnahnína tanáhráq áhníbóránire.

<sup>21</sup> Are néne Wahnhá miahno ue níáhrabira kewé kaweraritanauge ire úwe. (*Joel 2.28-32*)

<sup>22</sup> Pítaga mó mahraréna, Ísara keo, mó ehwéh kawerue írátiáhro. Sísa Néhsara suwahpeqte ání ehweh teiúge. Wega Manikáne arambehri mirainkeheéna Manikánka Sísa omaq atowe. Minayabe tagariageheéna Manikánka págege atáráire. Págege atáráirana wega íre tagariáh náneqkakáq págege arámbéhríákáq sokigi aitáráire. Itene iuranka tagahnsabé aiq ahtebahwe.

<sup>23</sup> Naho Manikánka iwíáhue tagarionserah menah itega Sísa táhtoqme ahbabáq ke móriátowara sega awankátaq táhpatowana putiaraire.

<sup>24</sup> Sísa íre airaiq pusa ání míahrahurai puana Manikánka érorahirabeqte iriatena organúq atáráire.

<sup>25</sup> Naho naho Tébíti, Sísane aigaqnaga íre wewensabé irarena peh Sísansabé teiena, Néne Wahnahnka ínéreq mía míame tagarióge. We néne niyah púpeq mía míai puana íre áhreúge.

<sup>26</sup> Minayabe nirupipeq eyoyóire. Néne níwéhrate iwíáh iwíáh atóge. Íné pukonaraq arega organúq intaniewóne iwíáhuge.

<sup>27</sup> Íné pukonarabeq arega néniwa íre nuwankéhe. Peh organúq intankéhe. Arene kaweq aníné ninonka íre karekinawire.

<sup>28</sup> Arega oga mía mía ahtápéq sokigi aníátóne. Arereq mía míauya puana nirupipeq eyoyóinawire úwe. *(Buk Song 16.8-11)*

Mi ewhéhmé Tébítiga teiuwe.

<sup>29</sup> Pítaga mó mahraréna, Nánuwahraho, itene igaqna Tébíti éhweh pahsuqme teiníe. We naho putiowara maisarówana wene kárékú anónká amahnága másia máiq mahtaq kékre. Minayabe íre wewensabé iraréna peh Sísansabé irarúwe.

<sup>30</sup> Tébítive Manikáne ehweh irarú ani ména Manikánka mirainaúge ú ehweh írátíowe. Manikánka naho Tébíti teawena, Amahnága arega wahnahnónanserah mókake arenahga wahnahninkehe. Peh ainq pútariahnsanuge únsabe

<sup>31</sup> Manikánka mirainaú arámbéhríyábé Tébítiga ahrebówe. Ahrebéna we ainq tagariomé Manikánka ite meirena kaweraitankeheéna omaq ato aní organúq atanawire. We pukirabeq íre auwanawire. Wene anonka íre karekinawire. Peh organúq atanawire tagariowe úwe.

<sup>32</sup> Pítaga mó mahraréna, Manikánka Sísa iriatena organúq atowaq ite moke tagarawéq teiune.

<sup>33</sup> Manikánka Sísa wene ayah púpeq atowana anotah Wahnáh ání míaraire. Míarairana Manikánka teawátainserah Wenawa Sísaba eqmatairana Sísaga Manikáne Awa iteba eqmaréhre. Minayabe itega amahnága ainq tagariáhwe. Itega íráh éhwéhmé Manikáne Awanka iwíáh aítéh éhwéhmé.

<sup>34</sup> Tébíti pukútaq wene anonka íopeq íre kiuwe. Minayabe íre wewene anonkansabé peh Sísa íopeq kiunsabe irarúwe. Wega mahraréna, Itene anotah Wahnáhnká néne Wahnahnásabé, Niyah púpeq kiwíahno.

<sup>35</sup> Mókake arene naruoakáq wahnahnarito ataníe irarire úwe. *(Buk Song 110.1)*

<sup>36</sup> Pítaga mó mahraréna, Ísara keo, ite ómi kawerue iragéhboq írátíahro. Itega Sísa awankátaq táhpáreq subiq sutowe. Manikánka mi anínsábé, Are ínéga omaq ató ání móne. Anotah Wahnáh ání míahno ataráuge úwe.

### *Áhnte wehekéqká Manikánsabe ainq pútare atera wání meyó ehwehne.*

<sup>37</sup> Morábí kiranéhnurió kega írówana mi ewhéhká sirupipeq pówara sega Pítareq mó eqmáro kereqsabé kasenéra, Iteruwahraho, aneq miraonehnkono

<sup>38</sup> úwana Pítaga sensabé, Itene ahbabáq kaqiuwankéhboq itene ahbabáq sansa sueq Sísansabé áhraboro. Sísansabé áhrabéq wání meyáhro. Mirairataq Manikánka itene ahbabáq kaweraitena Wenawa iteba eqmarankéhe.

<sup>39</sup> Itereq itene animárínseq íre wahtopeqte kéreq ómi mirairataq Wenawa iteba eqmarankéhe. Maniká itene Wahnahnka ómi omaq sito kega mirairataq Manikánka Wenawa iteba eqmarankéhe úwe.

<sup>40</sup> Pítaga mi keyábé áhnte mó págege ewhéhká sirupipeq pówara, Manikánka kaweraitankéhboq mó kegá ahbabárorabeq sueq kaweqtaq míáhro úwe.

<sup>41</sup> Áhnte író kega wene ewhehnásabé ainq pútare atówara wání meríúwe. Wání meríúwara mi wehekáh sega Pítarehba kobaritawé míówe. Peh íregáritaq wehekéq 3 táchuséni (3,000) wehekéqká kobaritawé míówe.

### *Peh morá íwíáhuíó ehwehne.*

<sup>42</sup> Seba méra Pítareq mó eqmaro kereqka síwáhnoru ehwéh irera peh morá íwíáhuwe. Peh morá íwíáhéra sene tópah mewe moráráq néra moráráq púreq aruqaruruwe.

<sup>43</sup> Manikánka págege aritowara Pítarehga áhnte otáq sánsá mirauwe. Mirauwara moke tago kegá áhtenuwe.

<sup>44</sup> Moke Sísansabé aiq pútare ató kega moráráq méra sene ménsámehnsánsabe peh morá íwíáhuíówe.

<sup>45</sup> Segá sene ménsámehnsátate méyó moné mewera Sísa tagariáh tábónáh ké náriúwe.

<sup>46</sup> Mó wehekáh mó wehekáhnue sega Manikánsabe iwiáh íwíáh atáh náhtápéq séyéuve. Séyééra pokue sene nahmarítápéq táchutahuq moráráq naruq naruruwe. Sirupipeq eyoyóúwara táchutahuq moráráq naruq naruruwe.

<sup>47</sup> Segá Manikánsabe iwiáh íwíáhuwara moke tago kegá iwiáhéra, Kaweq kee uwe. Mó wehekáh mó wehekáhnue áhnte mó kegá Sísansabé aiq pútare atówe. Aiq pútare atówana Manikánka se kaweraritowara Sísansabé aiq pútare ató ke áhnte aguwe.

## 3

### *Soriqnah ani kawerato ehwehne.*

<sup>1</sup> Tunsorerutaq Asiu kegá púreq aruqarurotaq Pítareq Sónireq Manikánsabe iwiáh íwíáh atáh náhtápéq seyeherauye.

<sup>2</sup> Mi nah méhpéh áwíq Kaweq Mehpéhne. Mitaq soriqnah ani tútuue míowe. Wenanoga maqmarotaq soriqnah ani maqmarowe. Mó wehekáh mó wehekáhnue wene iyahnabo anímárínká meqmera mi mehpéh móata móatauwe. Nahupeq kíra keyábé ineh inehinkehéera meqmera móatówe.

<sup>3</sup> Wega Pítareq Sónireq nahupeq kibekoyehera uyataq tagéna, Náníétao úwe.

<sup>4</sup> Náníétao úwana Pítaga we ebitáwéna wensabé, Ite tagáhno úwe.

<sup>5</sup> Úwana wega se tagéna iwiáhéna, Aneqpopoq nánigéhe íwíáhuwe.

<sup>6</sup> Iwiáhúwana Pítaga wensabé, Íné íre móneakáq ání múge. Mirainieu naneq teawiníe. Néhsara suwahpeqte ání Sísa Karáhé áwírue teawúge. Iriwe nogo atóge úwe.

<sup>7</sup> Miraréna wene púpeqte áyáhkárátáq táchtoqme iriatowe. Iriatowana wene aiaurankakaq aigáránkákáq apubúue págege agúwe.

<sup>8</sup> Págege agúwana mi anínká suansúá keirigue nogena nahupeq kierirowe. Kierirena wega nogena ahkuagu ahkuaguéna Manikánsabe iwiáh íwíáh atowe.

<sup>9</sup> Manikánsabe iwiáh íwíáh atowara ómi nahupeq míó kega we tagéra,

<sup>10</sup> we Kaweq Mehpéhtáq tútuue ineh inehéwéh ání míre uwe. Wene aigará kaweragúnsabe, Éhneh. Aiq kaweragire éra áhtenuwe.

### *Pítaga mitaq míó ke teriu ehwehne.*

<sup>11</sup> Kaweragú aninká Pítareq Sónireq táhtorowara ómi tago kegá áhtenéra pehbeheráh seba suwe. Anotah wahnáh wenawíq Sórómóni Asiu kené wahnah míotaq pearó owewéhpéhtápéq suwe.

<sup>12</sup> Suwana Pítaga tagéna sensabé, Ísara keo, we kaweraginsabé aneqsabé áhtenoo? Itewe aneqsabé ebitiaho? Ite págege aníté méta kaweratehye íwíáho? Manikánka itensabé, Kaweq aníté wóye aitéhnsábé kaweratehye íwíáho? Írakaumo. Íre itegae.

<sup>13</sup> Manikámé we Ébáráhmareh Áhísáhkireh Sékópareh itene igaqnaréhne Maniká ména wewega mah aní kaweratéhre. Áhnte kegá wene arambehri awahbeh ani Sísawe, Anotah aní míéhre atageheéna kaweratéhre. Sísa marakóipeq míaraitaq sega we subigeheéq itega táchtoqme naruq kebá meqmeq móátárówe. Wahnah aní wenawíq Páhírátiga, Sísa íre ahhbabáq ani púana pugeq auwanie íwíáhurairaqtáq itega ahqáho atárówe.

<sup>14</sup> Manikánsabe arutaboiri anímé kaweqtaq míá míaurai anímé itega ahqáho atárówe. Peh mó ke subiq sutai aní pugeqio urowe.

<sup>15</sup> Oganúq itahráhi aní subiq sutowe. Itega Sísá subiq sutowana Manikánka iriatáráire. Minayabe Sónireq ínéreqka itene iuranka tagéta teiuye.

<sup>16</sup> Sísansabé aiq pútare ateta wenawírue áhrabúya puana wega mi aní kaweratéhre. We awaho ani míéhraq tagahwe. Sísansabé aiq pútare atoyanka mi aní kaweratéhraq tagahwe úwe.

<sup>17</sup> Pítaga mó mahraréna, Nánuwahraho, itereq itene wahnahmarínseqka Sísá subiq sutotaq we Manikáne ahninkáwá míéhnsábé itega íre ahtebarowe. Íre ahtebéq pehipi subiq sutowe. Minayabe aiq tagaríóge.

<sup>18</sup> Manikánka wene ehweh iraru ke iwíáh aritowara ómiga mahraréra, Manikánka omaq ato anínká pukina ínaraq anotah érinawire uwe. (*Aisaia 50.6, 53.5*)

<sup>19</sup> Minayabe Manikánka itene ahbabáq kaqiuwankéhboq itene ahbabáq sansa sueq wensabé áhraboro.

<sup>20</sup> Mirairataq Manikánka itene irupipeq eyoyó aitankéhe. Sísá Karáhé itene Wahnah míánkeheéna Manikánka omaq atowe.

<sup>21</sup> Amahnága Sísá íópeq mía míaire. Manikánka wene ehweh iraru ke iwíáh aritowara naho mahraréra, Mókake Manikánka moke kawerinkehe uwe. Amahnága Sísá íópeq ména mi tanáhráqsábé áwénunire.

<sup>22</sup> Mósísiga itene igaqnansabe naho mahraréna, Maniká itene Wahnahnka wene ehweh irarinkeheéna itereq míonarabeqte ání eqmarankéhe. Ínéga mirauraunserah eqmarahna anínká mirainkehe. We sínaraq irarína ehwéh moke kawerue íráhro.

<sup>23</sup> Wega irarína ehwéh íre íréhra kewé pukigehe. Manikáne animári míéhrarabeqte kaqsuahnaraq pukigehe úwe. (*Lo 18.15-19*)

<sup>24</sup> Manikáne ehweh irarú ani Sáhmúériga Sísá tutai tanáhráqsábé irarúwe. Moke we anehe su anímári, Manikáne ehweh iraru anímárínseqka moq amahnága tánáhráq, Sísá tutai tanáhráqsábé iraruve.

<sup>25</sup> Manikáne ehweh iraru kewé itene igaqnaréh wóe. Íre peh morá itene igaqnaréhyabe iraruve. Moke itensabéákáq iraruve.

Manikánka itene igaqna Ébárhámansabé naho teawena, Arenahninká mah marákó mårákóípéq mó kahnáh mó kahnáhnue kaweraritankéhe teawuwe éna

<sup>26</sup> Manikánka wenahni wene arambehri awahbeh aní iriatena ebeq ite Asiu keba eqmataire. Itene ahbabáq kaqiuwankeheéna wenahni eqmataire úwe.

## 4

### Pítararé karábúsiipéq móritó ehwehne.

<sup>1</sup> Pítareq Sónireqka Manikánsabe iwíáh íwíáh atáh náhúpéq míó keyabé síwáhnoruye. Síwáhnoruyataq Manikáne ehweh mibeq mahbeq arítáh kéreq Manikánsabe iwíáh íwíáh atáh náhtápéqté wáhnáh párisíreq Sáyúsi kéreqka suwe.

<sup>2</sup> Pítararégá síwáhnoréra, Sísá oga úkurainsabé mókake pukira ke mó oga úkoneherawoe uyara mina su kegá írówe.

Irera sene ehwehnsabé anotah abiáhnsánéra

<sup>3</sup> Pítararébá sure táhtoqme meriqmera karábúsiipéq móritówe. Ío tupekútaq puara ahbiahipeq kotiigeheéra móritówe.

<sup>4</sup> Mi wehékáh áhnte író kega Sísansabé aiq pútare atówe. Peh íregáritaq wéh 5 táchuséni (5,000) wehgá aiq pútare atówe.

### Sega Pítararéyábé ehweh arító ehwehne.

<sup>5</sup> Ahbiahipeq Asiu wahnáh kéreq Asiu kené aboawah wehreq Mósísine ehweh síwáhnoru kereq Sarúsarama suwahipeq sáhuriówe.

<sup>6</sup> Sáhuriówana Manikáne ehweh mibeq mahbeq arítáh kéné wahnah wenáwíq Ánasa míowe. Ánasa wenawahrah sensíwíq Káiyápásareh Sónireh Árekásántareh mó wenáwáhráhreqka moráráq sáhuriówe.

<sup>7</sup> Mitaq sáhurawéra, Meriqme sero uwana Pítareq Sónireq meriqmera seba móritówe. Mórítowara mipi sáhurió kega kasenéra, Insegá págege aitáráiraq mi soríqnáh ání kaweratáróyo? Inse áwírue kaweratáróyo uwe.

<sup>8</sup> Uwana Manikáne Awanka Píta págege atena iwíáh atowana Pítaga sensabé, Wahnah kereq aboawah wehrero, Írátiáhro.

<sup>9</sup> Soríqnah ani séhréh atáráuyansabé inse áwírue kaweratáróyo kasenoo?

<sup>10</sup> Itereq moke Ísara kereq iragéhboq írátiáhro. Itega Sísá Karáhé Néhsara suwahpeqte ání awankátaq táhpatowana putiaraire. Putiarairana Manikánka iriwe organúq atáráire. Sísá Karáhé págege ání míeh púana wénáwíq áhraburauyangsabé soríqnah ani kaweratáráire. Kaweratáráirana ite míáhrabeq we amahnága awaho ani míéhre.

<sup>11</sup> Nah pearáh kégá wahq awanká tagéra, Iroke awankáne éra sutowana anehe mi wahq anotah kawéq wáhq úkire.\* *(Buk Song 118.22; Aisaia 28.16)*

Mina inserah itega Sísansabé ahqáho atárówana we anotah Wahnáh ání úkuraire.

<sup>12</sup> Peh morá Sísaga webataq itene ahbabáq kaweraitahráhire. Peh morá Sísá áwírue ahrabo ke wega kaweraritankéhe. Mah marákó márakóípéqmé mó morá áninká itene ahbabáq íre kaweraitahráhire úwe.

<sup>13</sup> Pítareq Sónireqka míó keyabé íre áhreia ehweh pahtsúoyansabé wahnah kereq aboawah wehreqka író kega áhtenuwe. Áhtenéra iwíáhéra, Se íre sigaruuroya anité peh wahba arámbéhríráté ánité wóye iwíáhuwe. Iwíáhéra, Sewe Sísá kétóya anité wóye uwe.

<sup>14</sup> Wene aigará kawerato aninká Pítararébá míowara tagéra mó ehwéh mi tanáhráq íre irarerahuwe.

<sup>15</sup> Íre irarerahunsabe wahnah kereq aboawah wehreqka Pítararé kaunsíri kegá momiwíurabeqte máhpeq sitera sío siouwe.

<sup>16</sup> Sío síoéra, Mi anité aneraruanéhnkono? Segá ótaq sansá aiq pútaq mirauroyara moke Sarúsarama suwahpeqte kégá tagariáhwe. Segá kaweratóya ehwéh itega íre epéq suahráhúne.

<sup>17</sup> Mi ehwéh abae agínehboq págegeue ehiya míáhtao aritanéhe. Mó ke Sísá áwírue síwáhnoriyeho ue terianéhe uwe.

<sup>18</sup> Terianeheéra Pítararé síáhrabéra sensabé, Sísá áwírue mónkakáq síwáhnoréta teríyehboq túbah agotao ue teríúwe.

<sup>19</sup> Teríuwara Pítareq Sónireqka sensabé, Manikáne ehweh sueta itene ehweh íréhyataq Manikánka itensabé kaweróye aitankéhbo? Írakaumo. Minayabe iteitega iwíáhue tagahro.

<sup>20</sup> Itega tagéta íratáuya ehwéh íre ehiya míáhrahúye. Peh teri terinoyehetauye uye.

<sup>21</sup> Soríqnah ani kaweratonsabe ómi kegá Manikánsabe iwíáh iwíáh atówe. Minayabe wahnah kegá iwíáhéra, Mó kegá itensabé sibiahnsa aitehboq Pítararé pehragaritanehe uwe. Segá Pítararéyábé, Subónehboq Sísane ehweh mónkakáq íre teríetao éra kaqsúówe.

<sup>22</sup> Kaweragú aní 40 opéq peh soríqnah ani míowe.

*Sísá éhweh terigeheéra págege aito ue púreru ehwéhne.*

<sup>23</sup> Kaqsúowara Pítararégá sensuwahrahba pokuye. Pokéra Manikáne ehweh mibeq mahbeq arítáh kéné wahnahnseq Asiu kené aboawah wehreqne ehweh teríuye.

<sup>24</sup> Teríuyara irera Manikánsabe moráráq púreréra mahraréra, Itene anotah Wahnáhno, arega íopeqkákáq mah marákó márakóákáq sóreq wanínkákáq miraróne. Moke mahnana kék náneqkákáq miraróne.

<sup>25</sup> Arene arambehriú ani, itene igaqna Tébíti Arenawanka iwíáh atowana sehiranue mahraréna,

\* <sup>4:11:</sup> Mátíyu 21.42 aigárápéqté éhwéh tagáhno.

Nahnso kewé aneqsabé anotah abíáhnsánoo? Aneqsabé ehweh pehipi moraenoo?

<sup>26</sup> Mah marákó mårákóípéqté wáhnáhmárínseq anotah anímárínseq ebehoneheéra sokah sokahowe. Manikánseq wega wehuke merinkeheéna omaq ato anínseqsabé kotioneheéra morábí sáhuriáhwe úwe éra púreruwe. *(Buk Song 2.1-2)*

<sup>27</sup> Segá mó púreréra, Tébitiga naho sehiranúmē amahnága iteruwahpeq Sísa suboneheéra sorupariarowe. Kaweq arénahní arega eqmarahna aní Sísa suboneheéra sorupariarowe. Érotireq Póntíasa Páhíratireq wáhnaupéqté kéreq Ísara kerekka Sísa suboneheéra sorupariarowe.

<sup>28</sup> Arega naho págege iwíáhue miraóna iwíáh anehe kaqme miraurowe. Arerega mina íwíáhóna puara sega menah miraurowe.

<sup>29</sup> Anotah aníno, amahnága sega itensabé, Subónehboq túbáh agotao eme aiq irahne. Ite arene arambehriúna anímári múne. Minayabe ite íre áhreia peh arene ehweh págegeue irarenehboq séhréh aito.

<sup>30</sup> Arene ehweh irarenaraq awahre ke kaweragigehboq arene ayahtate táhtoro. Sísa arene arambehriyabé awahbeh aní áwírue áhrabonaraq ótaq sansámári miraúno éra púreruwe.

<sup>31</sup> Púreruwana momiwí nah míu míuúwana Manikáne Awanka sene sirupipeq tunse séhréh arito púara moke sega íre áhreia Manikáne ehweh págegeue iraruwe.

### *Ménsámehsá morábí matawéra tabonah ke náriú ehwehne.*

<sup>32</sup> Moke Sísansabé aiq pútare atáh kégá peh morá íwiáhéra sene ménsámehsá morábí matíowe. Mahna peh morá néne wíre íre iraria peh morábí matíowe.

<sup>33</sup> Eqmaro kega Sísa oga úkú ehweh anotah pagégéue irare irareuwana Manikánka séhréh aritowe.

<sup>34</sup> Sísa tagaríah kékáté mó morá tabonah ani íre míowe. Segá iwíáhutaq sene ménsámehsá paimaq paiqmaréra meyó moné mewera

<sup>35</sup> eqmaro ke náriúwara eqmaro kega tabonah ke saraqme náriúwe. Minayabe tabonah ke íre míowe.

<sup>36</sup> Wehukení wenáwíq Sósépa míowara eqmaro kega mó awíq Páhnábásae átówe. Mi awíq Páhnábásawe áwahewé séhréhi aníne áwíq míre. We Sáipára marákórápéqté ánínéna Áriwái káhnáh áníne.

<sup>37</sup> Wene marakó peh ákáhtaq éberiopéq paiqmarena meyó moné mewe eqmaro ke siuwe. Segá tabonah ke saraq miageheéna Páhnábásaga siuwe.

## 5

### *Ánániásireq wene ahrerekka Manikáne Awa áhwárawe tagoya ehwéhne.*

<sup>1</sup> Mó akéqká iwíáhue mó sansánuye. Wehukení wenáwíq Ánániásí wene ahre áwíq Sapairae. Sene marakó peh ákáhtaq éberiopéq paiqmarera móne meyóye.

<sup>2</sup> Ánániásiga mi moné saime ebeqtaq kopéqmarowana wene ahrega tagówe. Tagówana wega mó akáhtaq mewe eqmaro keyabé péhenue peh ákáhtaq moné náriuwe.

<sup>3</sup> Náriuwana Pítaga wensabé, Ánániásio, owainawanka iwíáh atéhrah aneqsabé mira íwíáhono? Arene marakó paiqmarahna moné ákáhtaq kopéqsuahnayabé Manikáne Awansabé péhe éhwéh teawene.

<sup>4</sup> Arene marakó íre paiqmarahnaraq tahirí peh arerene kagai iripo? Arene marakórate paiqmatona moné peh arerene matiarona wino. Arega, Móne ákáhtaq kopéqsue péhe éhwéh teriníe íwíáhóna wino. Arene arupipeq aneqsabé ahbabáq iwiáhono? Íre peh wehukeyabé Manikánsabe moq péhe éhwéh teawene úwe.

<sup>5</sup> Úwana Ánániásiga mi ehwéh irena aunúnkaq mårunsurahue putiowe. Putionsabe író kega anotah ahténéra áhre aguwe.

<sup>6</sup> Mibeqté máhbígáúnká séra pukú aniné anonka ambantataté úbíqme sehgiwera mómaisarówe.

<sup>7</sup> Ánáhkawagá wenawehq putiéhre u ehwéh íre irena apahtáró áhwáh sótaikúwana suwana

<sup>8</sup> Pítaga wensabé, Marakó paiqmarehyame mahraue moné meyehyo úwana kowe miraue moyoye úwe.

<sup>9</sup> Úwana Pítaga wensabé, Itega iwíahétawe Manikáne Awa áhwárawe tagayehe íwíahewoyo? Arenawehq maisaráh máhbígáúnká amahnága kouwekue méhpehnsah seuríahwe. Sega arenkakáq sehgiwera pokigehe úwe.

<sup>10</sup> Sehgiwera pokigehe útaq mi iní aunúnkaq Pítane aigárátáq márunsurahue putiowe. Putiowara mahbigaunká nahupeq kire putio iní tagéra sehgiwera awehkawa maisarórabeq mómaisarówe.

<sup>11</sup> Moke Sísa tagariáh kéreq mó kereqka putíoya ehwéh irera anotah ahténéra áhreuwe.

### *Ótaq sansámárínunsabe éhwéhne.*

<sup>12</sup> Eqmaro kega wehuke míópi áhnte otáq sánsámári mirauwe. Asiu kené wahnah aní Sórómóni míotaq pearó oewéhpéhpéq Sísa tagariáh kégá mitaq sáhuria uriauwe.

<sup>13</sup> Sáhuriówara mó kegá iwíahéra, Sísa tagariáh kewé peh kaweqtaq míah ké wíre íwíahéra áhtenéra mibeq seba íre suwe.

<sup>14</sup> Áhnte weh áhrégá mó wehekáh mó wehekáhnue Sísansabé aiq pútare atera mó Sísa tagariáh kóbá sáharuqaruwe.

<sup>15</sup> Eqmaro kega áhnte otáq sánsá miraunsabé awahre kegá iwíahéra, Pítane mánkáhnka iteba sótaikínaraq itene awahre kaweraginkehé íwíahuwe. Mira íwíahunsabé sene iyahnaboga meriqméra ahtapeq máhriqtaq móritówe.

<sup>16</sup> Sarúsarama suwahpeq wahtote kereqka awahre kereq owainawanka síwioqnó kereq meriqméra móritówaro moke kaweragúwe.

### *Íopeqté áninká karábúsiipéq míó ke máhpeq sito ehwehne.*

<sup>17</sup> Manikáne ehweh mibeq mahbeq arítáh kéné wahnahnseq wereq míó ke, Sáyúsi kereqka iwiáhéra, Ótaq sansá mirao kegá ite kiotaikiyehboq aneraritanéhnkono uwe. Aneraritanéhnkono éra eqmaro keyabé anotah abíáhnsánéra

<sup>18</sup> se táhtoqme wahba karábúsiipéq móritówe.

<sup>19</sup> Inokáhpeq Maniká míéhrabeqte íopeqté áninká karábúsiipéqté ónsá siwe eqmaro ke máhpeq sitowe.

<sup>20</sup> Máhpeq sitena sensabé, Manikánsabe iwíáh iwíáh atáh náhtápéq kowéq moke náneqmarí oga mía mía ehwéh koreríero úwe.

<sup>21</sup> Úwara sega ahbiahiperura pokue íopeqté áninká inokáhpeq koreríero aritonserah Manikánsabe iwíáh iwíáh atáh náhtápéq kosíwáhnoruwe.

Kosíwáhnoruwaro Manikáne ehweh mibeq mahbeq arítáh kéné wahnahnseq wereq míó kereqka Asiu kené aboawah wehreq mó kaunsírí kereqsabé síáhrabuwe. Síáhrabuwaro sure morábi méra párisiwarínsábé, Karábúsiipéq móritáráu ke koweriráhro uwe.

<sup>22</sup> Uwara párisiwarínká pokue karábúsiipéq koragowara eqmaro ke íre míówe. Íre míowara kouwekue sene wahnahnseq.

<sup>23</sup> Itega tagónawé karábúsiipéqté ónsá paisa tagóne. Karábúsiipéqté wáhnáhmárínká onsarapéq máhpeq iriwe wahnahnatiáhwaq tagóne. Sega wahnahnatiáhwaq onsa siunaraq kabarúna ke íre míáhwe uwe.

<sup>24</sup> Uwara Manikánsabe iwíáh iwíáh atáh náhtápéqté párisiwaríne wahnahnseq Manikáne ehweh mibeq mahbeq arítáh kéné wahnahnmarínseqka mi ehwéh irera áhtenéra, Árahiro? Se eheragowamo iwíahuwe.

<sup>25</sup> Se eheragowamo iwíáhuwana sú aninká sensabé, Itega karábúsiipéq sítáró kegá Manikánsabe iwíáh iwíáh atáh náhtápéq amahnága iriwe síwáhnorowe teriuwe.

**26** Teriuwara Manikánsabe iwíáh íwíáh atáh náhtápéqté párísíwárínseq sene wah-nahnseqka pokue Pítareh kowerirera áhreéra, Mó kegá ebahtaté subíyeho éra pehwehrue kowerirówe.

### *Pítarehga sene ehweh ayahqme teríú ehwehne.*

**27** Koweriqmera kaunsíri kebá móritówe. Mórítowana Manikáne ehweh mibeq mahbeq arítáh kéné wahnahnka Pítarehyabe ehweh aritowe.

**28** Ehweh aritena, Sísane ehweh móñkakáq síwáhnoriyeho teiátáu mino. Teiátáume íre ireq síwáhnoronsabé áhnte Sarúsarama suwahpeqte kégá Sísane ehweh íráhwe. Itega Sísa subitáúna ewhéh aneqsabé teri terinoo úwe.

**29** Aneqsabé teri terinoo úwara Pítarehga mahraréra, Manikáne ehweh anterúéhnehboq wehukene ehwehme árahue iranéhnkono?

**30** Itega Sísa awankátaq táhpáreq subiq sutowe. Subiq sutowana itereq itene igaq-naréhne Manikánka iriatena organúq atáráire.

**31** Organúq atena wensabé, Niyah púpeq míahno atena wehuke kawerarito urairana Sísa mitaq ména ite Ísara ke kaweraitéh ání míéhre. Itene ahbabáq súéhrataq wega kaweraitankéhe.

**32** Manikánka miraurai naneq tagarionayabé teiune. Íre itebataq teiasa Manikáne Awanka mó teíre. Manikáne sansá mirao kebá Wenawa eqmaréhre uwe.

### *Pítarehyabe pehragarítáhro ú ehwehne.*

**33** Uwara anotah Asíú wéhwárinká Pítarehne ehweh irera sensabé anotah abíáhnsánéra, Subiq suanehe íwíáhuwe.

**34** Iwíáhuwana mibeqté káúnsíri ání wenáwíq Kámária we Péhrasi ání míowe. We Mósísiga sehgóro ú ehweh síwáhnorú ani móowara mó kegá, We ahtebia ání míre íwíáhuwe. Wega iriwe ména, Mi ke wéhuwa máhpeq sito úwara máhpeq sítówe.

**35** Máhpeq sítowana wega momiwíu keyábé, Ísara keo, mi kegá miraira naneq irarene-heqmé kawerue iwíáh atawéq irarero.

**36** Menah wehukeni wenáwíq Téúrása ména, Íné anotah ání múge urairara áhnte wehuké 400 wehuké we kétówe. Kétowara mó kegá we subiq sutowara we kétó kega wene arambehri auwera abae ague sene nahtapeq sáh poké agurowe. Poké agurowana wene arambehri parabaguraire.

**37** We subiq sutowara anehe Kehrari marákórápéqté ání wenáwíq Súrása míaraire. Wahnah kegá wehuke síwíq merotaq mi tanáhráq Súrásareq we kétó kereqka kámáhni wahnáh ké subiq suanehe éra ite kámáhni wahnáh ké míaneheqmúne urowara kámáhni wahnáh kégá Súrása subiq sutowana pukuraire. Pukurairara we kétó kegá moq abae ague sene nahtapeq sáh poké agurowe.

**38** Minayabe teiníboq írátiáhro. Pehwehrue míáhro. Máhpeq míáh ké pehragarítáhro. Mi ehwéh peh seyene iwíáhwé pehipi túbah agoneherawoe.

**39** Manikánka sene sirupipeq mi iwíáh arítéhmé itega íre ahqáho aritahráhúne. Manikánka itene naruo ání úkínehboq pehwehrue míáhro úwe.

**40** Úwara momiwíu kegá Kámáriane ehweh irera Pítareh síáhrabuwara suwe. Suwara sega subiqmaro atowara wiahnó karatáté subiqmarowara, Sísane ehweh móñkakáq síwáhnoriyeho teriera kaqsúówe.

**41** Kaqsúówara Pítarehga kaunsíri ke suera máhpeq pokuwe. Sísane arambehri miraunsabé wahnah kegá subiqmáró púara sene sirupipeq eyoyóuwara pokuwe.

**42** Segá mó wehekáh mó wehekáhnue Manikánsabe iwíáh íwíáh atáh náhtápéqkákáq wehukene nahtapeqkákáq mahrarue síwáhnoréra, Manikánka eqmaraníe ú ání, ite kaweraitahráhi anímé we Sísa wire ue síwáhno aruqaruruwe.

## 6

*Sítibénireh omaq sitó ehwehne.*

<sup>1</sup> Mi tanáhráq Sísansabé aiq pútare ató ke áhnte úkuwe. Káríki ehwéh iraru Asiu kegá peh morá Asiu kené ehweh író keyabé abiahnsanuwe. Abiahnsanéra ehmuniq éhmúníréra, Wahnah kegá táchutahuq mó wehekáhnue saraqmaráhtáq peh morá Asiu kené ehweh író kene kéweinínsó áhnte náriera itene kéweinínsó pehgáriq nári nárinowe uwe.

<sup>2</sup> Úwara mi airápété téhraníté eqmaro kega mó Sísa tagaríah kékáyé momiwíoneheqmúne ue síáhrabuwara suwe. Suwara sensabé, Táchutahuq kawerue sararaneheéq ite Manikáne ehweh síwáhnoré arámbéhrí suewé anotah íre kawerire.

<sup>3</sup> Minayabe íráhro. Iteruwahraho, mi arámbéhrí miraigehboq itega ite míonarabeqte abapete téhraníté omaq sítáhro. Mó kegá, Kaweqtaq mía míowe e ke omaq sítáhro. Manikáne Awanka sereq mía míai ke méra kaweq iwíáho ke omaq sítáhro.

<sup>4</sup> Ite eqmaq íuwátái kegá peh púrerue Manikáne ehweh íwáhnoroneheqmúne uwe.

<sup>5</sup> Uwara moke író kega, Mi ehwéhmé kaweq ehwéhne íwíáhéra wehukení wenawíq Sítibéni omaq atówe. Sítibéniga Sísansabé kawerue aiq pútare ato aní míowana Manikáne Awanka wene arupipeq mía míáéna séhréh atówe. Mó ke sensíwíq Pírípi, Pókóra, Níkánóri, Tímóni, Páménásá, Níkóra miraue omaq sitowe. Níkórawe we Ántióka suwahpeqte ánine. Téhwe we wáhnaupéqté ání ména anehemé we Asiu kené sánsá miraúwe.

<sup>6</sup> Mi ke omaq sitera eqmaro kene siuranabiahtapeq móritówe. Móritówara táchutahuq saraqme arámbéhrí miraigeheéra eqmaro kega siyahnkaratáté táhtoqme púrerarítówe.

<sup>7</sup> Manikáne ehweh áhnte síwáhnoru puara Sarúsarama suwahpeq íregáritaq kegá irera Sísansabé aiq pútare atówe. Áhnte Manikáne ehweh mibeq mahbeq arítáh kerekka mi ehwéh irera Sísansabé aiq pútare atówana Manikáne ehwehnka abae agúwe.

*Sítibéninsabé ehweh ató ehwehne.*

<sup>8</sup> Manikánka Sítibéni séhréh atena págege ato púana wehuke míórabeq anotah otáq sánsámári miraúwe.

<sup>9</sup> Miraúwara Sáírini suwahpeqte Asiu kereq Árékásántáriá suwahpeqte Asiu kerekka Sarúsarama suwahpeq momiwíwe. Sene momiwí nahtápéqsábé Pugeq Súó Kene Nahne ue áwíratówe. Mi kereq Sírisá marákórápéqté kerekka Esia marákórápéqté kerekka Sítibéniba pokue ehwehuwe.

<sup>10</sup> Ehwehuwana Manikáne Awanka Sítibéni págege ato púana wega ahtebia éhwéh irarúnsabe mi kegá íre ehweh atahráhuwe.

<sup>11</sup> Íre ehweh atahráhunsabé sega mó keyabé epéráhpérára, Sítibéni péhe éhwéh átéhrataq móne náienéhe. Péhe éhwéh mahrarero. Sítibéniga Mósísireq Manikánseqsabé síehruru arítárairaq írátáune ero uwara sega móne mewera mi pehe éhwéh teriúwe.

<sup>12</sup> Mi pehe éhwéh teriúnsabe író kereq Asiu kené aboawah wehreq Asiu kené sánsá síwáhnoru kerekne sirupipeq págegeue abiahnsanuwe. Segá Sítibéniba pokue táhtoqme kaunsíri kebá móátówe.

<sup>13</sup> Móatera péhe kégá mahraréra, Mi anínká Manikánsabe iwíáh íwíáh atáh nahtápéqkákáq Mósísine sánsánkákáqsábé abehq éhwéhne arítáraire.

<sup>14</sup> Sísa Néhsara suwahpeqte áninká Manikánsabe iwíáh íwíáh atáh náh sokoruankéhe uraire. Mósísiga teiu sansamé Sísga sabi iuaníe urairaq írátáune uwe.

<sup>15</sup> Uwara moke kaunsíri ke tútuue méra Sítibéni tagowana wene aru ukiqme míonsabe wene auranabiah íópeqté áníné auranabiah tahnsa ágúwe.

## 7

*Sítibéniga teriu ehwehne.*

<sup>1</sup> Manikáne ehweh mibeq mahbeq arító kene wahnahnka Sítibéninsabé kasenéna, Segá irare ehwéhmé aiq pútaqpo úwe.

<sup>2</sup> Úwana Sítibéniga mahraréna, Nánuwahraho, kawerue írátiáhro. Naho naho itene igaqna Ébáráhmaga Áráni suwahpeq íre pokútaq Mésópótémia marákórápéq míowana Maniká anotah pagégé áninká íópeq auwena Ébáráhmaba séna

<sup>3</sup> wensabé ehweh teawena, Arene marakówé arenawahrahwe sue teawéna marakórápéq pokúno teawuwe.

<sup>4</sup> Teawuwana Ébáráhmaga Káría kené marakórapeq suena pokue Áráni suwahpeq kowíowana mitaq wenabo pukúwe. Pukúwana Manikánka ite amahnága míona marákórápéq Ébáráhma eqmarowe.

<sup>5</sup> Eqmarowana súwana Manikánka Ébáráhma mahtaqté márakó íre eqatowe. Pehgáriq marákó íre eqatasa peh teawena, Mókake arereq arenanahréhreq iníe úwe. Mi ehwéh teawu tanahráq Ébáráhma íre wenahninkákáq ání míowe.

<sup>6</sup> Manikánka we mó teawena, Arenanahréh mókake wáhnaupéqté kéné marakórapeq míagehe. Mi kegá arambehrriraq saiqnaritera subiqmarera áhnte opéq 400 opéq síwioqnagehe.

<sup>7</sup> Síwioqnrehra ke kamah arinauge. Kamah ariénaraq arenanahréhga mitaq suera mahtaqté márakóráq ínénsabe iwíáh iwíáh aintagéhe teawuwe.

<sup>8</sup> Teawu ehwéh ahreraq kankeheéna Manikánka Ébáráhmansabé, Áú amurúrue sansa miraúno úwe. Úwana Ébáráhmaga animai wenawíq Áhísáhki maqatowana abapete apahtáró wéhékáh ména wenahniné áú amurú auwowe. Áhísáhki weh úkéna animai wenawíq Sékópa maqatowe. Maqatowana Sékópaga airápété téhtaré anímái masitowara wene ahninkáwáréh itene igaqnaréh úkuwe úwe.

<sup>9</sup> Sítibéniga mó mahraréna, Sékópane ahninkáwáréh airápété téhraníté méra se ábárahnahnahnka sensíbáq Sósépa abiahnsanéra wáhnaupéqté ké eqsitera móne meyówe. Wáhnaupéqté kégá Sósépa meqmera Ísípi marákórápéq móátowana Manikánka wereq mía míáéna

<sup>10</sup> mó kegá we íre kawerató tanahráq séhréh atowe. Ísípi marákórápéqté wáhnáhnká Sósépa áhrabútaq Manikánka kaweq iwíáh atowana Sósépaga ahtebia éhwéh irarúwe. Ahtebia éhwéh irarúwana Ísípi wahnáhnká, Mah anímé kaweq iwíáhire éna Sósépansabé, Arega moke Ísípi marákóákáq néne nahtapeqté ménsáméhnsánkákáq wahnahnúno atowe.

<sup>11</sup> Mi tanáhráq Ísípi marákórápéqkákáq Kénáni marákórápéqkákáq anotah ehwéhrótaq áhnte kene sirupipeq umeh aguwara moq itene igaqnaréh táchutahuq íre kowe.

<sup>12</sup> Íre kowana Sékópaga Ísípi marákórápéq táchutahuq kéhre u ehwéh irena wenahnimáhq táchutahuq sabatáhq Ísípi marákórápéq téh eqmaq suowe.

<sup>13</sup> Eqmaq suowara Ísípi marákórápéq pokéra táchutahuq mewera sene nahtapeq kouwekuwe. Mi táchutáhúq parabagúwara se Ísípi marákórápéq mó pokutaq Sósépaga wenawahrehyabe, Íné iteríbáq múge ue pahsuqme teriuwe. Pahsuqme teriuwana Ísípi wahnáhnká moq Sósépane awahwáréh ahtebówe.

<sup>14</sup> Ahtebówana Sósépaga wene awahwáréhyabe, Nánibo Sékópa meqmeq sero éna eqmaq suowe. Eqmaq suowara awahwáréhga sensibo koweqmera áhnte wehekéq 75 wehekéq weba suwe.

<sup>15</sup> Sékópaga Ísípi marákórápéq tuména mitaq pukúwara anehe itene igaqnaréh moq mibeq pukuwe.

<sup>16</sup> Ébáráhmaga naho maisaró marakó áwíq Sékéma ebah monéráté paiqmarowe. Ámórine ahninkáwáréhga, Maisia marákó meyo atówana paiqmarowe. Itene igaqnaréhga

pukuwara sene animárinká sene ayahnsa mewera mina maisaró marakórápéq ónapipéq móárówe úwe.

**17** Sítibéniga mó mahraréna, Itene igaqnaréhga Ísípi marákórápéq mía míáéra peh íregáritaq aguwe. Manikánka Ébáráhmansabé marakó iníe teawu ehwéh áhníbórá mi-rainauítäq itene igaqnaréhga íregáritaq aguwe. *(Stat 15.5; Buk Song 105.24)*

**18** Íregáritaq aguwana Sósépa pukúwana Ísípi marákórápéq we íre tagario anínká wah-nah aní úkúwe.

**19** Mi anínká wahnahnéna itene igaqnaréhyabe péhe aritena síwíoqnówe. Sene animárinká pukigeheéna wega sensabé, Ani maqmaréhrataq mewe máhpeq súáhro aritowe.

**20** Mi tanáhráq wenanoga Mósísi maqmarowana Manikánka, Aiç kaweç aníne íwíah atowe. Apahtáró ío sega wenabone nahtapeq kopípéq kirabo atowe.

**21** Apahtáró ío parabagútaq subiyeho éra máhpeq kopípéq áuwówana Ísípi marákórápéqté wáhnáhné ayahunkawagá we tagéna, Kaweç aníne íwíahéna meq-mena wewene ani tahnsa kirabo atowe.

**22** Kirabo atowara Ísípi kegá Mósísi áwáhnoruwaná we moke Ísípi kené sánsá ahtebówe. Ahtebéna we págege ahtébiá aní úkéna wene ehwehnkakáq wene arambehriakáq págegeue miraúwe úwe.

**23** Sítibéniga mó mahraréna, Mósísi 40 opéq ména, Nánuwahrah Ísara kebá koraganie íwíahéna koragówe.

**24** Peh morá Ísípi anínká Ísara aní subutaq Mósísiga tagéna wenawahrah aní éhnehéna mi Isípi aní subiq suowe.

**25** Subiq suena iwíahéna, Manikánka ínénabe, Arenawahrah séhréh arito éna omaq intowe. Omaq intonsabé nánuwahrahga aiç tagariáhwe íwíahúwara wenawahrahga íre tagariówe.

**26** Mó wehekáh wenawahrah aníté tobehuyataq Mósísiga tagéna ayositanieéna sens-abé, Ite morá káhnáh móye. Aneqsabé tobehoyo úwe.

**27** Úwana ahbabárato aninká Mósísi pagunsuena wensabé, Insegá wahnahnarito teawátáiro?

**28** Inokáh Ísípi aní subiq sutonanserah íné moq nubiç suaníbo úwe.

**29** Úwana Mósísiga mitaq suena pehbeheráh pokue wáhnaupéqté kéné marakó áwíq Míriána marákórápéq kowíowe. Nahnsó aní kowéna mibeqté áhré meyowana téhtaré ánímáíráré maqmarowe úwe.

**30** Sítibéniga mó mahraréna, Mósísiga mitaq 40 opéq míowe. Sáwéh áwíq Sáínái wega mitaq wahtotaq abataq marákórápéq noguwe. Mitaq noguwana káriq awánká irarówana íopeqté áninká mi iráípéqté ábóraragúwe.

**31** Ábóraragúwana Mósísiga tagéna áhtenéna, Wahtotaq koraganie íwíahéna sútaq Manikánka teawena,

**32** Íné arene aigaqnaréhne Maniká múge. Íné Ébáráhmareh Áhísáhkireh Sékóparehne Maniká múge úwe. Úwana Mósísiga iransánéna áhreú púana aura íre pankeqme tagówe.

**33** Íre pankeqme tagówana Manikánka wensabé, Íné míó púah arega órira marákórápéq iriwe míahne. Minayabe arene súu ugurúruqme pehipi iriwe míahno.

**34** Ísípi marákórápéqté kégá Ísara ke néne animári síwíoqnahtaq tagarióge. Segá uwo uwo aruqarurotaq íróge. Ínéga mibeqté meriqmena móbeq móritanieéna tumíóge. Mósísio, are Ísípi marákórápéq eqmaróge. Pokúno teawuwe úwe.

**35** Sítibéniga mó mahraréna, Mósísi ítaq mahbí míotaq Ísara kegá wensabé ahqáho atera, Insegá wahnahnarito teawátáiro uwe. Mina ahqáho ató ánímé Manikánka arenawahrah amahnága Ísípi marakóráq míowah kowahnahnue meriqme mérito atena eqmarowe.

Mósísi abatapi míowana káriq awánká irarowana íopeqté áninká mi iráípéqté áboraragútaq Manikánka Mósísi eqmarowe.

**36** Eqmarowana Mósísiga Ísípi marákórápéq ótaq sansá miraéna mi marákó suena wání aroipéq áwíq Káhtore Waní ayehrág móritowe. Móritena mitaq mó otáq sánsá miraéna abatapi móritena mitaq mó otáq sánsá miraúwara 40 opéq míowe.

**37** Mósísiga Ísara keyábé, Manikánka ínénsabe, Néne ehweh korerio éna eqmaq nuwon-serah mókake mó wene ehweh terí ání iteruwahrahní eqmarankéhe teniátáire úwe.

**38** Mirarena mi tanáhráq Ísara ke abatapi míowana Mósísi seba míowana íopeqté áninká Sáinái sawéhráq Mósísi ehweh teawuwe. Teawuwaná Mósísiga itene igaqnareh mi ogá mé ehweh teriuwe úwe.

**39** Sítibéniga mó mahraréna, Itene igaqnarehga Mósísine ehweh anteruera wensabé íre iuwahbehre éra Ísípi marákórápéqsábé sirutaboiruwe.

**40** Ísara kegá Mósísine awahwá Áróninsábé, Arenábáq Mósísi ite Ísípi marákórápéqté meitái aní aiq taqnobagire. We eheq míehrapómo. Ite ebeq itáh máníkámári míagehboq arene ayahnkaratáté maniká tahnsa náneqmarí miraúno uwe.

**41** Miraúno éra itene igaqnarehga káho áráhq tahnsa náneq mirarówe. Mirarera minayabe titirarera sene siyahtate miraró naneqsabé iwíáh iwíáh atówe.

**42** Iwíáh iwíáh atówana minayabe Manikánka se suowara sega íopeqté náneqmarínsábé iwíáh iwíáh atówe. Minayabe Manikáne ehweh irarú aninká nahoh sehiranúwana wene ehwehnka mahraréna,

Ísara keo, itega 40 opéq abatapi méq itega ménkámehnká subiqmareq titirurowe. Íre ínénsabe iwíáhéo subiqme titiraintárówe.

**43** Péhepehe maníká Móríkine sériraté pearó wehuwéhú nahtapéq móateq mi nahnkákáq sehgieq poku pokuurowe. Itega wehyoq tahnsá náneq mirareq wenawíq Árépánie ateq itene manikáne atarówe. Iwíáh iwíáhoneheéq itega mi pehepéhé máníkámári mirarurowe. Miraruronsabé Pábíróni marákórápéq seberaebéq eqmaq iuwanauge ire úwe. *(Amos 5.25-27)*

**44** Sítibéniga mó mahraréna, Itene igaqnarehga abatapi míotaq Manikánka Mósísinsabé, Ínénsabe iwíáh iwíáh aintéhna sériraté wéhuwehu nah mahraue pearo úwe. Manikánka Mósísi sokigiúnserah itene igaqnarehga mirarówe.

**45** Itene igaqnareh pukuwara sene animárínká mi seríraté pearó wehuwéhú náh sehgiwera wehukení wenawíq Sósúa kérówe.

Manikánka itene igaqnareh séhréh aritená sene naruo kaqsuowe. Kaqsuowara itene igaqnarehga sene naruone marakó meyówe. Mewera mi seríraté pearó wehuwéhú náh sehgiwera kowíowe. Mi nah áhnte opéq kagaúwana Tébítí Asiu kené wahnh úkéna

**46** kaweptaq mía míáünsabe Manikánka wensabé arutaboirúwe. Arutaboirúwana Tébítiga iwíáhéna, Nigaqna Sékópane Maniká kaweq nahupéq míankehboq pearaníe iwíáhéna Manikánsabe, Arene nah pearaníe úwana Manikánka ahqáho atowe.

**47** Ahqáho atowana wenahni Sórómóniga Manikáne nahtapeq pearowe.

**48** Pearowana Manikánka anotah aní mía míai puana wega íre peh morá wehukega pearáh náhtapéq mía míaire. Minayabe wene ehweh irarú aninká mahraréna,

**49** Itene Wahnahnka mahraréna, Íopeqmé néne wahnahnú síah tahnsane. Mah marákó mårákowé néne nigúnúbá tahnsane. Minayabe íné moke íopeqkákáq mah marákó mårákóákáq wahnh wahnahnuge. Minayabe aneq nah peintanéhbo? Íné íre ahreno aní múge.

**50** Ínélataq ínéga moke mah marákó mårákórápéqté náneq miraráhwa mino ire úwe teriuwe. *(Aisaia 66.1-2)*

<sup>51</sup> Teriena Sítibéniga mó mahraréna, Ite saiyoue píribahri ke wóe. Itene irupipeq íre irasa, ahre parosa ké wóe. Ite Manikáne Awansabé ahqáho atáh ké wóe. Itene igaqnaréhga miraunserah itega amahnága miraowe.

<sup>52</sup> Itene igaqnaréhga Manikáne ehweh iraru ke moke síwíoqno mino. Íre áwíoqno aní insebo? Naho Manikáne ehweh iraru kegá mahraréra, Mókakewe kaweqlaq mía míai aní mahtaq tumianawire uwara itene igaqnaréhga mina iraru ke subiq súowe. Segá miraunserah itega moq miraurowe. Kaweqtaq míeh ání tumíowaq itega táhtoqmeq móateq subiq sutowe.

<sup>53</sup> Íopeqté kégá Manikánka sehgóro ú ehweh teiéwaq itega íre ireq mi ehwéh anteruq anteruro mino úwana wene ehweh aiq parabagúwe.

### *Sítibéni subiq súó ehwehne.*

<sup>54</sup> Sítibénine ehweh parabagúwara író kega anotah abiáhnsánéra sirupipeq págege aguwe. Segá Sítibéninsabé anotah abiáhnsá atówana

<sup>55</sup> Manikáne Awanka wene arupipeq ména séhréhue págege atowe. Séhréhue págege atowana Sítibéniga íopeq ebitáwéna Manikáne téreh naneqkakáq tagówe. Sísawe Manikáne ayah púpeq íriwe míowana tagéna

<sup>56</sup> mahraréna, Tagahro. Íopeq sawekirana wehukení úkurai anínká Manikáne ayah púpeq íriwe míehrana tagoge úwe.

<sup>57</sup> Uwara sega kareéra ahre parotáwéra moráráq peheráh kure Sítibéni táhtoqme

<sup>58</sup> panantáwera ahnansahrapeq móatera sene káhq ambántámári mitaq marówe. Mitaq marówana wehukení wenawíq Soraga mi ambántámáritáq wahnahnúwara ebahnsa tuparuqme subiq súowe.

<sup>59</sup> Segá ebahnsa tuparuqme subiq súotaq Sítibéniga púrerue mahraréna, Sísao, are néne Wahnah mone. Néniwa meyo éna

<sup>60</sup> arehunseraráq ména anotah ehwéhnue púreréna, Néne Wahnahno, sene ahbabáqsabe íre ayahqmaro ue púreréna putiowe.

## 8

<sup>1</sup> Putiowana Soraga iwíáhéna, We pukime aiq kawerire úwe.

### *Sorarehga Sísa tagariáh ké síwíoqnówara pokue abae agu ehwéhne.*

Mi wehekáh mó kegá Sarúsarama suwahpeq Sísa tagariáh ké anotahtaq síwíoqnowe. Síwíoqnowara sega pokue Súria marákórápéqkákáq Sámária marákórápéqkákáq abae aguwe. Ómi Sísa tagariáh kégá abae aguwara peh morá Manikánka eqmaro kega Sarúsarama suwahpeq mitaq míowe.

<sup>2</sup> Táhmaro kaweq kegá Sítibéni mómaisarera wensabé sirutaboirera anotahtaq ibisowe.

<sup>3</sup> Ibisowana Soraga Sísa tagariáh ké anotahtaq síwíoqnéna mó nahtápéq mó nahtápérue kiená weh ahre táhtoqme panantáwena karábúsiipéq móritowe.

### *Píripiga Ótaq sansánú ehwehne.*

<sup>4</sup> Abae agu kegá pokuurabeq Sísane ehweh teri terinuwe.

<sup>5</sup> Píripiga Sámária ke suwahpeq mó anotah matábúrápéq tunse, Sísawe Manikánka omaq ato aní míre éna Sísa Karáhéné ehweh teriuwe.

<sup>6</sup> Áhnte kegá wene ehweh irera ótaq sansámári tagéra wene ehweh kawerue írówe.

<sup>7</sup> Mi otáq sánsámé Píripiga owainawamarí áhnte wehukéné sirupipeqté kaqsuwara íre kaweq karéaruera poké aguwe. Wega sinonka mareqmareragú kereq soriqnah kereq kaweraritowe. Minayabe ómiga tagéra wene ehweh kawerue írówe.

<sup>8</sup> Minayabe Sámária kené sirupipeq eyoyóúwe.

### *Ahgora anínká miraú ehwehne.*

<sup>9</sup> Peh morá áhgórá ání wenawíq Sáimóni mitaq míowara ómi Sámária kegá anotahtaq áhtenuwe. Sáimóniga menahmé págege sansánéna, Íné anotah ání mûge íwiahúwara

<sup>10</sup> ómi anotah kereq íre síwíkakaq kerekwa wene ehweh kawerue irera wensabé, Maniká págege anínéna wega mi aní págege atéhnsábé we anotah pagégé áníne atówe.

<sup>11</sup> Mi ahgórá áninká íre wahto tanáhráq ótaq sansá mira aruqaruru púara moke áhtenéra wene ehweh kawerue irera we kérówe.

<sup>12</sup> We kérówana Píripiga Sísa Karahé áwíqsabe teriena mó kawéq éhwéh Manikánka wahnah wahnahni ehwéh teriuwara weh ahrega mi ehwéhnsábé aiq pútare atówe. Aiq pútare atówana wání meriuwana

<sup>13</sup> mi ahgórá ání Sáimóniga moq aiq pútare atowana wání meawuwe. Píripiga ótaq sansámári miraútaq Sáimóniga anotahtaq áhtenéra kérówe.

### *Manikáne Awanka Sámária kebá tu ehwehne.*

<sup>14</sup> Sámária suwahpeqte kégá Manikáne ehwehnsabé aiq pútare atáhwe teríuwara Sarúsarama suwahpeq eqmaro kega írówe. Írótak sega Pítareq Sónireq Sámária marákórápéq eqmaq súówe.

<sup>15</sup> Eqmaq súówaru mitaq séra Manikáne Awanka mi kené sirupipeq tumiankeheéra siyahnkaratáté táhtoqme púreruye.

<sup>16</sup> Pítararégá íre suyataq mó kegá itene Wahnah Sísa áwírue wání meriútaq Manikáne Awanka sene sirupipeq íre tumíowe.

<sup>17</sup> Minayabe Pítararégá siyahnkaratáté táhtorera púreruyana Manikáne Awanka Sámária kené sirupipeq tumíowana

<sup>18</sup> Sáimóniga mina tagówe. Tagéna móne mewe séna Pítararéyábé,

<sup>19</sup> Niyahnkaratáté mó ke táhtoráhnaraqmé Manikáne Awanka sene sirupipeq tumiankehboq págege aintáhtao úwe.

<sup>20</sup> Úwana Pítaga wensabé, Arene móneakáq arenkakáq toráh aginiewóne. Manikánka pehipi awina naneq íre paiqmarahráhóne. Arega mira íwiahóna puah iraipéq toráh aginiewóne.

<sup>21</sup> Itega miraúya arámbéhrí arereq wehgaqpo? Manikánka arene arupipeq tagariéhre. Arene arupipeq íre kaweq íwiahóna puah arega itene arambehri íre miraorahóne.

<sup>22</sup> Arene ahbabáq iwiáh sue mahraue púreré, Nirupipeqté áhbábáq íwiah kawerainto úno.

<sup>23</sup> Arene arupipeq tagome ahbabáqka kíragírá atiéhre úwe.

<sup>24</sup> Úwana Sáimóniga Pítansabé, Arega iraréna ehwéh aiq pútaragínehboq púrerainto úwe.

<sup>25</sup> Pítareq Sónireqka mi ke suwahpeq méra, Sísaga ite anotahtaq séhréh aitáráire éra Sísane ehweh teriye. Teriera mitaq suera Sámária marákórápéq mó mapéq mó mapérue kaweq ehwéh teriera Sarúsarama suwahpeq kouwekuye.

### *Píripiga Ítíópia marákórápéqté ánínsábé teawu ehwehne.*

<sup>26</sup> Manikáne íópeqté áninká Píripinsabé, Sokah sokahue Sarúsarama suwahpeqte Kásá suwahpeq kuriéh áh abatapité áhtápéq pokúno úwe.

<sup>27</sup> Pokúno úwana sokah sokahuena pokúwe. Pokéna mi ahtápéq kútaq Ítíópia aní tagówe. Naho mó kegá sene íre kaweq sansá miraéra mi Ítíópia áníné awahnta pirúowe. Mi anímé Ítíópia marákórápéqté wáhnáh íní wenawíq Kántásine móneraq wahnah wahnahnu aníne. We Sarúsarama suwahpeq Manikánsabe íwiah íwiah atórabeq kéné kouwekúwe.

<sup>28</sup> Kouwekéné we óserarégá sabirue nogí káhréipéq tútuue ména Manikáne ehweh irarú ani Áisáíaga sehiranaro ehwéh sáhnsahuwe.

<sup>29</sup> Sáhnsahuwana Manikáne Awanka Píripinsabé, Mi aníné káhreraq wahtotaq kowíahno úwe.

**30** Úwana Píripiga pehbeheráh weba kútaq Áísáíaga sehiranú ehwéh sáhnsahuwana irowe. Irena wega kasenéna, Arega sáhnsahona ehwéh aiq ahtebahno úwe.

**31** Úwana, Mó anínká íre níwáhnorinsabé árahue ahtebaninkono? Arega mah kahréípéq ínéba mahbeq kieague kirútuúno úwe.

**32** Ítíópía anínká sáhnsahu ehweh, Manikáne ehwehnka mahraréna, Sipisípiq suboneheéra meráhtáq sipisípiqka ehiya míéhre. Mina inserah wega ehiya míéhre. Sipisípiq áyó kiraqsúéhtáq sipisípiqka íre kureq kurerire. Mina inserah wega íre ehwehnire.

**33** Segá we ehweh atáhtáq íre aiq pútaq ehwéh irarewe. Subiq súáhnsábé we mah marákóípéq íre míéhre. Segá wene oga mé tanahráq parabarúáhwe. Wene animári íre míáh púara wehukega se éhweh íre terieráhwe ire. *(Aisaia 53.7-8)*

### *Ítíópía marákórápéqté ání wání meawu ehwehne.*

**34** Ítíópía anínká Píripinsabé, Iraníboq tenio. Manikáne ehweh irarú aninká insensabe irarúwo? Wewensabé irarúwo? Mó anínsabé irarúwo kasenúwe.

**35** Kasenúwana Píripiga mi ehwéhtárue Sísane kaweq ehwéh teawuwe.

**36** Segá wání aroipéq suyataq mi anínká Píripinsabé, Tagáhno. Wání mahtaq kéhre. Arega wání meniníbo kasenúwe.

**37** Kasenúwana, Arene arupipeq Sísansabé aiq pútare atéhnaraq wání meawiníe úwe. Úwana mi anínká, Sísá Karáhé Manikáne ahninkáwáe. Minayabe aiq pútare atóge úwe. Aiq pútare atóge éna

**38** Óseraréyábé, Túbáh agotao aritowe. Segá wání aroipéq túyana Píripiga wání meawuwe.

**39** Wání aroipéq suera kíúyataq Manikáne Awanka Pírípi meawuwana Ítíópía anínká we móñkakáq íre tagéna ahtapeq pokútaq wene arupipeq anotah eyoyóúwe.

**40** Eyoyóúwana Píripiga Ásáróta suwahpeq ábóraq kéné mó natáq mó natárue wega Sísane ehweh teri terinúwe. Teri terinéna Sésáriá suwahpeq kúwe.

## 9

### *Soraga Sísá kéro ehwehne.*

*(Eqmaro 22.4-16, 26.9-18)*

**1** Soraga Sísá tagariáh kékéyáh anotah ehwéh aritena, Mi ke síwíognéna subiq suaníe íwíahéna Manikáne ehweh mibeq mahbeq arítah kéné wahnahpa pokúwe.

**2** Pokéna wensabé, Sísá tagariáh kékéyáh anotah ehwéh aritena, Mi ke síwíognéna subiq suaníe íwíahéna Manikáne ehweh mibeq mahbeq arítah kéné wahnahpa pokúwe.

**3** Úwana mi anínká páhsíwarí sehiranue awuwana Soraga mewena Támákása suwahpeq pokue wahtotaq kútaq apubúue íópeqté Manikáne téhrehnka anotahtaq téhrówe.

**4** Téhrówana wega marákóipeq mûrunsurahúwana íópeqté éhwéhnká iraréna, Sorao, Sorao, aneqsabé níwíognahno úwe.

**5** Úwana Soraga iraréna, Anotah aníno, are insebo úwana, Íné Sísá uge. Íné arega níwíognahna aní múge.

**6** Irigue mi ke suwahpeq pokúno. Mitaq arega mirainieóna arámbéhrí éhwéh peh morá anínká teawinkéhe úwe.

**7** Úwara Sorareq nogú kega mi ehwéh irera wehuke íre tago puara peh ehiyansá síwéh panantágúwara míówe.

**8** Soraga irigue aura pankeqme ebiena tagótaq íre tagahrahúwana. Íre tagahrahúwana wereq nogú kega wene ayahtaq panantáwera Támákása suwahpeq móátówe.

**9** Móátowana apahtáróráq wene aura íre tagahrahéna wáníkakaq táchutahuqkakáq awehriúwe.

<sup>10</sup> Awehriúwana Támákása suwahpeqte ání Sísa tagariéh ánínéna wenáwíq Ánáníásie. Ánáníásine awanka tagówana Manikánka áhrabéna, Ánáníásio úwe. Ánáníásio úwana, Mahna míoge úwana

<sup>11</sup> Manikánka wensabé, Wehukení wenáwíq Súrásae. Irigue wene nahtápéqté áh áwíq Obarisa áhtápéq pokúno. Wene nahtapeq Tahsa suwahpeqte ání wenáwíq Sora ména amahnága púrerire.

<sup>12</sup> Métáq wenawanka tagéwéhtáq wene aura ebieyabe arega weba sure táhtorahnana wene auranka tagehre. Weba koragáhno úwe.

<sup>13</sup> Úwana Ánáníásiga mahraréna, Áhnte kegá arega iraréna aníné ahbabáqsabe teníátowe. Sarúsarama suwahpeqte Sísa tagariáh ké wega íre kawerarítáráire.

<sup>14</sup> Moke arenáwírue áhrabo ke karábúsiipéq móritanieéna sire. Manikáne ehweh mibeq mahbeq arítáh kéné wahnahmarínká páhsí awera pokue komiraúno átárówe úwe.

<sup>15</sup> Úwana Manikánka wensabé, Pokurio. Néne arambehri mirainkeheéna omaq atáráuge. Wega Ísara kereq wáhnaupéqté kereq sene wahnahmarínseq néne ehweh korerinkéhe.

<sup>16</sup> Néne arambehri miraínayabé mó kegá we anotahtaq áwíoqnagehe. Minayabe sokigi awinauge úwe.

<sup>17</sup> Úwana Ánáníásiga pokue Sora mío nahupéq kibekéna wene ayahtate táhtorena wensabé, Sorao, are nánibáq móne. Arega ahtapeq séwaronaraq itene Wahnah areba séwíarai ani wenáwíq Sísaga eqmaq núwéhre. Arega mó tagehnana Manikáne Awanka arene arupipeq sewíankeheéna eqmaq núwéhre úwe.

<sup>18</sup> Úwana Sorane aura ahra tahnsá akariatio naneq apubúue megúwana tagéna irigúwana wání meawuwe.

<sup>19</sup> Wání meawuwaná táchutahuq nówana wene anonka págege agúwe.

### *Soraga Sísa éhweh pahsuo ehwehne.*

Táhmaro wehekáh Soraga Sísa tagariáh kéká Támákása suwahpeq ména

<sup>20</sup> apubúue Asiu kené momiwí nahtápéq kiwéna Sísa éhweh teriena, Sísawe Manikáne ahninkáwáe úwe.

<sup>21</sup> Úwara wene ehweh író kega moke áhtenéra mahraréra, Irari anínká Sarúsarama suwahpeq ména Sísa áhrabo ke síwíqnéna karábúsiipéq sitárái mino. Mahtaqkákáq mirainieéna surai mino. Wega Sísa áhrabo ke táhtoqme táhruue Manikáne ehweh mibeq mahbeq arítáh kéné wahnahpa móritanieéna surai mino uwe.

<sup>22</sup> Uwana Soraga págege ehwéh irarú ani úkue kaweq tábúsoqme ehweh teriena, Mah marákó márakóípéq sína aní, Manikánka omaq ato anímé Sísa wire ue tábúsoqme síwáhnorúwe. Tábúsoqme síwáhnorú púara Támákása suwahpeqte Asiu kegá mó íre irarerahowé.

### *Áhnte Asiu kegá Sora subiq suonehera unsabe pokú ehwehne.*

<sup>23</sup> Áhnte wehekáh sótaikúwara Asiu kegá momiwíue sío síoéra, Sora subiq suanéhe íwíáhuwe.

<sup>24</sup> Subiq suanéhe íwíáhéra moráénuwana mó anínká sene ehweh irena Sora koreawuwe. Koreawuwará sega suboneheéra Támákása suwahpeqte áhnánsáhrápéqté áhtápéq wéhékáhnkakaq inokáhpeqkakáq wahnah wahnahnuwe.

<sup>25</sup> Wahnahnuwará inokáhpeq Soraga anotah pahsíkétíípéq tútuue míowara we kéró kega méatera náhníáqtate páhsíkétiraq iwe panantáwe tunse ebah kuri pera máhpeq márunátówe.

### *Soraga Sarúsarama suwahpeq síwáhnorú ehwehne.*

<sup>26</sup> Soraga Sarúsarama suwahpeq pokéna, Sísa tagariáh kéká kowíanauge íwíáhúwara sega wensabé áhreéra, We íre aiq pútaq Sísa tagariéh ání míre íwíáhuwe.

<sup>27</sup> Iwíáhuwana Páhnábásaga Sora meqmena eqmaro keba móatowe. Móatena sensabé, Mah anínká ahtapeq itene Wahnah tagarairana wega ehweh teawátáire. Teawátáirana wega Támákása su wahpeq Sísa éhweh págegeue síwáhnoruraire úwe.

<sup>28</sup> Úwana Soraga Sísa tagariáh kóbá mía míáéna Sarúsarama su wahpeq íre áhreia peh mó minatáq mó mahnatárue Sísa éhweh págegeue síwáhnorúwe.

<sup>29</sup> Síwáhnorúnsabe wereq Káríki ehwéh iraru Asíú kéréqka ehwehuwe. Mi kegá, Sora subiq suaneheqmúne íwíáhuwara

<sup>30</sup> Sísa tagariáh kégá mina irera Sora meqmera Sésária su wahpeq márúnatera mibeqté Tahsa su wahpeq eqmarówe.

<sup>31</sup> Eqmarówara mi tanáhráq mó kegá Súría marákóákáq Kehrari marákóákáq Sámária marákóákáq Sísa tagariáh ké íre síwíoqnia peh míowe. Peh míowara sirupipeq Sísane sánsá ahtebéra kawerue mirauwe. Manikáne Awanka págege aritena sirupipeq kaweq iwíáh aritowara íregáritaq mó wehekéqká Sísansabé aiq pútare atera kawerue kérówe.

### *Pítaga Áínía kawerato ehwehne.*

<sup>32</sup> Pítaga Sísa tagariáh ké mío nahmárítápéq poku pokuúwe. Pokéna Áríra su wahpeqte Sísa tagariáh kéréqpa tuwe.

<sup>33</sup> Mi ke su wahpeq mío aní wenáwíq Áíníae. Wega abapete apahtáró ópéq wene máhriqtaq ména ah íre nogoráhúwe.

<sup>34</sup> Ah íre nogoráhúwana Pítaga we tagéna wensabé, Áíníao, Sísa Karáhéga amahnága kaweratéhre. Irigue arene máhriq sabaráwe sokah sokahúno úwana wega apubúue irigúwe.

<sup>35</sup> We kaweragúnsabe moke Áríra su wahpeqte kéréq Sáróna su wahpeqte kéréqka tagéra Sísansabé aiq pútare atera, Wene sánsá sehgióngéhe íwíáhuwe.

### *Tókási pukú ehwehne.*

<sup>36</sup> Sópa su wahpeq mío iní wenáwíq Tábítæ. We Sísa tagariéh ání míowara Káríki ehwéh iraru kegá Tókásie ue áwíratowe. We kaweq arámbéhrí iní ména íre arambehrioraho ke séhréh aruqarurúwe.

<sup>37</sup> Píta Áríra su wahpeq míotaq mi iní anotahtaq awahreue pukúwe. Pukúwara wene anonka pabeq paberue abobórähpeqte náhtápéq átowe.

<sup>38</sup> Sópa su wahpeq Áríra su wahpeq wahtotaq kowara Sísa tagariáh kégá Pítawe Áríra su wahpeq míéhre u írówe. Irera téhraníté Pítaba eqmaq suera, Pehbeheráh súno koreawétao éra eqmaq súówe.

### *Tókási oga úkú ehwehne.*

<sup>39</sup> Eqmaq súowara pokue koreawúye. Koreawúyana Pítaga se kériowe. Eqmaq súó keba su wara sega meqmera abobórähpeqte nahtapéq móatówara mibeqté kewéínínsónká Pítaba iriwe méra ibisowe. Ibiséra Tókási oga míotaq miraro korósí Píta sokigiue teawúwe.

<sup>40</sup> Pítaga se moke máhpeq kaqsuena arehunseraráq ména púrerúwe. Púreréna pabeqme putio anínsábé, Tábítao, irigúno úwe. Irigúno úwana wene auranka tagéna Píta tagótaq máhriqtaq kirútuue míowe.

<sup>41</sup> Míowana Pítaga wene ayahnkara táhtoqme pankeq auwowe. Pankeq auwena keweinínsónseq mó Sísa tagariáh kéréqsabé síáhrabéna sensabé, Seragahro. Oga úki aní tagahro éna sokigi ariuwe.

<sup>42</sup> Moke Sópa su wahpeqte kégá oga úkú ehweh irera áhnte kégá Sísansabé aiq pútare atowe.

<sup>43</sup> Pítaga áhnte wehekáh Sópa su wahpeq ména ménkámehnkáne áú kaweraqari aní wenáwíq Sáímónine nahtapeq kaegaeúwe.

**10***Íópeqté áninká Kóníria teawu ehwehne.*

<sup>1</sup> Sésária suwahpeq mío weh wenawíq Kóníriæ. We áhnte Aroma sontiá ké 100 Ítári marákórápéqté sóntiá kéné kiápéténí míowe.

<sup>2</sup> We Maniká awahbeh sansa sehgiu aníne. Mi karíronáninká Manikánsabe iwíah iwíahéra wene sánsá sehgíúwe. We íre arambehrioraho ke nári nárinena Manikánsabe púreq aruqarurúwe.

<sup>3</sup> Ío tunsorerutaq wenawanka tagówana Manikáne íópeqté áninká weba súwana kawerue togówana wensabé, Kóníriao úwe.

<sup>4</sup> Úwana we ebitawéna áhreéna wensabé, Árahono úwe.

Árahono úwana íópeqté áninká wensabé, Arega púreq aruqarurónawe Manikánka irena arega tabonah ke nári nárinónawe wega tagéna arensabé kaweróne atéhre.

<sup>5</sup> Wehukení wenawíq Sáimóni we mó awíq Pítæ. We Sópa suwahpeqte koweragéhboq wehuke eqmaq suo.

<sup>6</sup> Pítaga ménkámehnkáne áú kaweraqari aníné nah sóreq waní áhkórapeq kék náhpípéq kaegaeire.

<sup>7</sup> We koweragéhboq wehuke amahnága eqmaq suo éna pokúwe. Pokúwana Kóníriaga wene arambehriuya anítéreq peh morá sóntiá ánínseq síáhrabúwe. Mi sontiá ání Maniká awahbeh sansa sehgí ání ména Kóníría séhréhú ani míowe.

<sup>8</sup> Síáhrabéna su ke íópeqté áníné ehweh moke teriena Sópa suwahpeq eqmaq suowe.

*Pítane awanka tagó ehwehne.*

<sup>9</sup> Mó wehekáh se ahtapeq Sópa suwahpeq áhnibórá kutaq Pítaga nah abogéhrapeq wehekáhnabubu púrerinieéna kiuwe.

<sup>10</sup> Púreréna arupibiúwana, Tópahnsabé níre úwe. Mó kegá táhutahuq tíátótaq wenawanka tagówe.

<sup>11</sup> Tagówana íópeq sawekúwana mipeqte anotah paráhnkéq tahnsa náneq tuwe. Ébeq ayéhráq ébeq ayéhrárue pagume we míorabeq mewerúwe.

<sup>12</sup> Mi paráhnkéqpípéq áhnte menkáméhnkánkákáq karahrabahnkakáq kabrankakáq míowe.

<sup>13</sup> Míowana íópeqté éhwéhnká mahraréna, Pítao, irigue mi kamári subiqme tíwe náhno úwe.

<sup>14</sup> Subiqme tíwe náhno úwana Pítaga anotah ahqáho éna, Anotah Wahnáh ánino, ite Asiu kegá íre nona naneq kamári púana órirane. Naho íre narauge. Amahnága moq íre nanauge úwe.

<sup>15</sup> Úwana íópeqté éhwéhnká mó mahraréna, Manikánka kaweraréh náneqsabé órirane atéhneho úwe.

<sup>16</sup> Apahtáróráq ménkámehnká parahnkeqpipeq sáhue mewena márumarena tuekéna úwana íópeqté éhwéhnká mó apahtáróráq irarúwana íópipeq tumeyowe.

<sup>17</sup> Wenawanka tagónsabe Pítaga áhtenéna, Néniwanka aneq tagehramo iwíahúwe. Mira iwíahútaq Kóníriaga eqmaq suo kega Sáimónine nah kabarue ábóraq marera ogesáh ogesáhrapeq iriwe míowe.

<sup>18</sup> Iriwe méra anotahtaq kasenéra, Sáimóni mó awíq Pítæ mahtaq kaegaeiro kasenuwe.

<sup>19</sup> Wenawanka tagónsabe Pítaga iwíahútaq Manikáne Awanka wensabé, Sáimónio, íratíahno. Apahránítogá arensabé anebahrowe.

<sup>20</sup> Iriwe tutagáhno. Ínéga se eqmaró púa iwíah kikirinehboq pehipi kériro úwe.

<sup>21</sup> Úwana Pítaga seba tutagéna sensabé, Itega kabaro anímé íné úge. Aneqsabé seo úwara

<sup>22</sup> sega wensabé, Sóntiá kené kiápéténí wenawíq Kóníriaga eqmaq iúwátáire. We kaweqtaq mía míai aní ména Manikánsabe áhtenuwe. Moke Asiu kegá iwíahéra, Kóníriawe peh

kaweqtaq tabasíwe míéh ánine íwíáhuwe. Maniká míéhrabeqte íopeqté áninká wensabé, Pítaga ehweh teinkéhboq siqmarehnara arene nahtapeq koweráhro uraire uwe.

<sup>23</sup> Uwana Pítaga sensabé, Nahupeq kíoro éna inokáhpeq kirabo aritowe. Ahbiahipeq Pítareq we seweró kereqka pokuwara mó mibeqté Sísa tagariáh kégá kérówe.

### *Pítaga Kóníriane nahtapeq kú ehwehne.*

<sup>24</sup> Mó wehekáh Pítarehga Sésária suwahpeq kuwe. Kóníriaga wenawahrahreq wene iyahnabo anímárínseq síáhrabúwara sega wene nahtapeq sure momiwíue Píta áwénunuwe.

<sup>25</sup> Pítaga nahupeq kinautaq Kóníriaga weba séna wene aigárátáq arehunseraráq ména wensabé iwíáh íwíáh atowe.

<sup>26</sup> Iwíáh íwíáh atowana Pítaga wensabé, Irigúno. Íné moq peh wehukení múge úwe.

<sup>27</sup> Pítareq wereq ehwehnéra nahupeq kíuyara áhnte wehuké mitaq sáhuriówe.

<sup>28</sup> Mitaq sáhuriówana Pítaga sensabé, Asiu kené sánsámé nahnsó ke momiwíotaqmé Asiu kegá mibeq pokéyabe órira míre éq íre pokorahúne. Minayabe tagariáhwe. Manikánka sokigüe teniena, Mó ke peh abehq ké wóe íwíáhineho uraire.

<sup>29</sup> Minayabe itega níáhraburowana pehipi surauge. Aneqsabé níáhraburoo? Teniéro úwe.

### *Kóníriaga Píta teawu ehwéhne.*

<sup>30</sup> Kóníriaga Pítansabé, Mó mahsenahrí amahnága tahnsa tanáhráq tunsoreráitaq nahtapeq púrerurauge. Púreruraugana patahga inserah téreh ambántankákáq áninká íné mírautaq ábórarurauraire.

<sup>31</sup> Ábóraréna ínénabe, Kóníriao, Manikánka arega púreróna ehwéh íréhre. Arega nári nárinóna sansá tagariéhre.

<sup>32</sup> Minayabe wehukení wenawíq Sáimóni we mó awíq Píta kowero. We Sópa suwahpeqte kiweragéhboq wehuke eqmaq suo. Mó aní wenawíq Sáimóni ménkámehnkáne áú kaweraqari aníne nah sóreq waní áhkórapeq kék náh Pítaga kaegaeire uraire.

<sup>33</sup> Urainsabé are kiverageheéna apubúue wehuke eqmaq súátáuge. Eqmaq súátáugah arega suronawe kaweróne. Ite ómiga Manikáne aurátaq sewíone. Minayabe Manikánka kororio urai ehwéh amahnága moke teio úwe.

### *Pítaga Sísa éhweh Kóníriareh teriu ehwéhne.*

<sup>34</sup> Kóníriaga, Moke teio úwana Pítaga sensabé mahraréna, Íné amahnága tagariómé Manikánka aiq pútaq moke mah kehiná kékínánsábé monseráhnue arutaboirire.

<sup>35</sup> Wensabé áhtenéra kaweqtaq mía míao keyábé arutaboirire. Íre peh morá Asiu keyábé moke mah kehiná kékínánsábé arutaboirire.

<sup>36</sup> Manikánka ite Ísara ke teiu ehwéhmé itega írátiáhwe. Mi ehwéhmé Sísa Karahéwé mah kehiná kékíná wahnahnaritéhre. Wene kaweq ehwéhnsábé aiq pútare atáh ké peh morá ké tahnsa úkowe.

<sup>37</sup> Sóniga Kehrari marákórápéq kaweq arámbéhrí áhwáréna ehweh teriena wání meri-ewe. Anehe ite moke Ísara kehiná suwahpeq mirauro sansá aiq tagariáhwe.

<sup>38</sup> Manikánka Sísa Néhsara suwahpeqte ánípá Wenawa eqmatairana Wenawanka Sísa séhréh atena págege atáráire. Sísga mó ke suwahpeq mó ke suwahperue pokue kaweq arámbéhrí arítáráire. Manikánka Sísaba mía míai puana owainawanka síwíoqneh ke kawerarítáráire. Ínéga teiú ehwéhmé aiq íráhwe úwe.

<sup>39</sup> Pítaga mó mahraréna, Asiu kené marakórápéqkákáq Sarúsarama suwahpeqkakáq Sísga moke mirarurai arámbéhrí ínéreq mó we kéró kereqka tagaraune. Ísara kegá Sísa awankátaq táhparera subiq sutowe.

<sup>40</sup> Subiq sutowana pukuwana apahtáró wéhékáhtáq Manikánka Sísa iriwe organúq atáráirana wega iteba suraire.

<sup>41</sup> Íre ómi kehinápá peh iteba surairaq tagaraune. We organúq kuraitaq tagéq itereq wereq moráráq táhutahururaune.

<sup>42</sup> Manikánka ítemsabé, Mah kehiná kékíná koreríero. Sísa ínéga omaq ató áninká mókake moke oga míah kéréq pusa kéréq ehweh aritankéhe. Mi ehweh tábúsoqme koreríero uraire.

<sup>43</sup> Moke Manikáne ehweh iraru kegá mahraréra,  
Mi aní áwíq áhrabéra wensabé aiq pútare atáh kewé Manikánka sene ahbabáq kawerari-  
tankéhe uwe teriuwe. (*Aisaia 33.24, 53.5,6; Jeremaia 31.34; Maika 7.18; Sekaraia  
13.1; Aroma 10.11; Kárétia 3.22*)

### *Manikáne Awanka nahsó kebá tumío ehwéhne.*

<sup>44</sup> Pítaga mi ehweh teriutaq Manikáne Awanka író kene sirupipeq tumíowara

<sup>45-46</sup> sega kambare ehweh iraréra Manikánsabe iwíah iwíah atówara. Iwíah iwíah atówara Sísansabé aiq pútare atáh Ásiú ké Pítareq su Asiu kegá irera áhtenuwe. Áhtenéra irarera, Manikáne Awanka íre peh morá iteba tumiéhre. Nahnso keba moq tumiéhre uwe.

<sup>47</sup> Uwana Pítaga mahraréna, Manikáne Awanka itene irupipeq tumíarainserah mah kené sirupipeq moq tumiéhre. Minayabe wání merieyabe insega ahqáho aitahráhiro úwe.

<sup>48</sup> Insegá ahqáho aitahráhiro éna Sísa Karáhé áwíqtaq wání meriéro úwara mi ke wání meriúwe. Wání meriúwara sega Pítansabé, Táhmaro wehekáh mahtaq míahno uwe.

## 11

### *Pítaga Sarúsarama suwahpeqte Asiu ke teriu ehwehne.*

<sup>1</sup> Nahnso kegá Manikáne ehwehnsabé aiq pútare atárówe uwara Súria marákórápéqté eqmáro kereq mó Sísa tagariáh kéréqka írówe.

<sup>2</sup> Írówana Pítaga Sarúsarama suwahpeq kiutaq mibeqté síú amurúruó kegá ehweh atówwe.

<sup>3</sup> Ehweh atera, Íre Asiu kené nahtapeq árahinsabé pokue táhutahururono uwe.

<sup>4</sup> Uwana Pítaga Kóníriane nahtapeq pokú ehweh mahraréna,

<sup>5</sup> Íné Sópa suwahpeq púrerurautaq néniwanka tagaraire. Tagarairana íopeqté anotah paráhnkéq tahnsa náneq tutaire. Ébeq ayéhráq ébeq ayéhrárule íné míaraurabeq mewe tutaire.

<sup>6</sup> Íné ebitawéna ménkámehnkánkakaq karahrabahnkakáq kabarankakáq mi paráhnkéqpípqué míaraire.

<sup>7</sup> Míarairana íopeqté éhwéhnká iraréna, Pítao, irigue mi kamári subiqme tiwe náhno uraire.

<sup>8</sup> Urairana ínéga anotah ahqáho éna, Íre nóna naneq kamári púana naho íre narauge. Amahnága moq íre nanauge urauge.

<sup>9</sup> Uraugana íopeqté éhwéhnká mó mahraréna, Manikánka kaweraréh náneqme íre no naneq kane atéhneho uraire.

<sup>10</sup> Mi ehweh apahtáróráq irarurairana mi paráhnkéqkákáq íopeq tuekuraire.

<sup>11</sup> Tuekuraiitaq Sésária suwahpeqte áninká, Íné koweniro únsabe apahránítogá íné koweniraneheéra kaeurau nahtápqué suwe.

<sup>12</sup> Suwana Manikáne Awanka ínénabe, Iwíah kikirinehboq pehipi kéríro urairaq ínéreq abapete morá mó Sísa tagariáh kéréqka se kérítáune. Kéríreq itega mi wehné nahtapeq kure kiraune.

<sup>13</sup> Kiraunana wene nahtapeq íopeqté tutai aníné ehweh teiátáire. Teiena, Íopeqté tutai aninká ínénabe mahraréna, Wehukení wenawíq Sáimóni we mó awíq Pítá Sópa suwahpeq míehre. We kiweragéhboq wehuke eqmaq suo.

<sup>14</sup> We sínaraq arereq arenawahrahreqsabé oga úké ehweh teinkéhe ire uraire.

<sup>15</sup> Kóníriaga mi ehweh teniátáirana ínéga Sísa éhweh áwaheue teriátáuge. Sísa éhweh áwaheue teriátáutaq Manikáne Awanka sene sirupipeq tumíaraire. Téhwe itene irupipeq tumíarainserahnue tumíaraire.

**16** We marakóipeq míaraitaq Sísaga mahraréna, Sóniga wání meri merinínana Manikáne Awanka itene irupipeq tumíankehe uraire.

**17** Manikáne Awanka sene sirupipeq tumíairairana mi ehwéh niahreraq káráire. Itega Sísá Karáhénabe aiq pútare atárówana Manikáne Awanka itene irupipeq tumíaraire. Itene irupipeq tumíarainserah sene sirupipeq moq tumíaraire. Manikánka wewega miraru-raise. Íné peh wehukení mío púana Manikánsabe árahue ahqáho ataníkono úwe.

**18** Úwara sega Pítane ehweh irera túbáh aguwe. Túbáh agéra Manikánsabe iwíáh iwíáh atera, Nahnso keakáq sene ahbabáq súáhnsábé Manikánka organúq sítéhre uwe.

*Sísá Karáhé tagariáh kewé Ántíóka su wahpeq téhwe Kárísítíni kee ue síwírarító ehwehne.*

**19** Sítibéni subiq súó tanahráq sega Sísá tagariáh ké síwíqnowe. Síwíqno puara sega Sarúsarama su wahpeq suera abae aguwe. Abae ague mó kegá Pónisia marákórápéq pokuwara mó kegá Sáípára marákórápéq pokuwara mó kegá Ántíóka su wahpeq pokuwe. Poké agurabetaq peh morá Asiu ke Sísá éhweh teríuwe.

**20** Táhmaro Sísá tagariáh kewé Sáípára marákórápéqté kéreq Sáírini marákórápéqté kerekka Ántíóka su wahpeq pokue Káríki ke Sísá itene Wahnah éhweh teríuwe.

**21** Wene ehweh teríu ke Manikánka séhréh arito púara áhnte kegá Sísansabé aiq pútare atera, Wene sánsá sehgiónehe iwíáhuwe.

**22** Sarúsarama su wahpeqte Sísá tagariáh kégá irera Páhnábása Ántíóka su wahpeq eq-marówe.

**23** Eqmarówana Ántíóka su wahpeq séna Manikánka wehuke séhréh arito tagéna wene arupipeq eyoyóúwe. Eyoyóéna sensabé túbáh agiyehboq Sísane sánsá kawerue sehgióro úwe.

**24** Páhnábása kaweqtaq mía míau aní ména Sísansabé kawerue aiq pútare atowana Manikáne Awanka séhréh atowe. Séhréh atowara áhnte kegá Sísansabé aiq pútare atera, Sísane sánsá sehgióneheqmúne iwíáhuwe.

**25** Páhnábásaga Sora anebahrinieéna Tahsa su wahpeq pokúwe.

**26** Pokéna Sora tagéna koweqmena Ántíóka su wahpeq kouwekúwe. Segá peh morá ópéq mitaq méra Sísá tagariáh kérerue momiwíue áhnte ke síwáhnoruye. Mitaq mó kegá Sísá tagariáh kékabé Kárísítíni kee ue téh síwírarítówe.\*

*Morábí soruparó monéyábé éhwéhne.*

**27** Mi tanáhráq Manikáne ehweh iraru kegá Sarúsarama su wahpeq suera Ántíóka su wahpeq túwe.

**28** Peh morá sú ani wenáwíq Ágábúsaga iriwe míowana Manikáne Awanka iwíáh atowana irarúwe. Iraréna, Anotah ehwéhráhna tanáhráq mah marákó mårákó sinae úwe. Wehukení wenáwíqtare Káróríusa Sísáhri anotah wahnah aní míotaq mi ehwéh aiq pútaragúwe.

**29** Aiq pútaragúwara Ántíóka su wahpeqte Sísá tagariáh kégá iwíáhéra, Súria marákórápéqté Sísá tagariáh ké táhutahuq paiqmarageheéq móne nárienéhe. Náriníe ú aninká wewega iwíáhue náriuwe.

**30** Mina tahnsa sene móne morábí soruparówara Páhnábásareq Sorareqka mi moné mewera Súria marákórápéq pokuye. Mitaq Sísá tagariáh ábóáwáh wéhgá nárigheheéra móriúye.

## 12

*Píta karábúsiipéq móátó ehwehne.*

\* **11:26:** Mi awíq áwahewé Karáhéné animáríne áwíre.

<sup>1</sup> Mi tanáhráq Asiu kené anotah wahnáh ání wenawíq Érótiga Sísa tagaríah kék sítwíognówe.

<sup>2</sup> Sítwíognéna, Sónine awahwá wenawíq Sémisi subóro aritowara pokatate kiraqme subiq súówe.

<sup>3</sup> Subiq súónsabe Asiu kegá Érótinsabé kaweróne atówe. Kaweróne atówana Érótiga Pítá karábúsiipéq móátáhro úwara táhtoqme móátówe. Sótaikú siahreraq ko tánáhráq karábúsiipéq móátówe.

<sup>4</sup> Móátówana Érótiga áhnte sontiá kék yábe wahnahnatiáhro aritowe. Mó sontiá kék itaréitaré kék mipy sorupawe mía mó sontiá kék itaréitaré kék mipy sorupawe míaue 16 sontiá kék míówe. Érótiga iwíahéna, Sótaikú siahreraq kék tánáhráq parabagínaraq wehuke míáhpí kottiinie iwíahúwe.

<sup>5</sup> Iwíahúwara Pítá karábúsiipéq míotaq Sísa tagaríah kégá Pítá pugeq auwageheéra púrerata atauwe.

### *Íopeqté áninká Pítá séhréh ato ehwehne.*

<sup>6</sup> Érótiga Pítá Asiu kebá móatanaútaq Pítaga inokáhpeq karábúsiipéq sugowe. Pítá taqnobagineho éra téhtaré séniráté táhrarera sontiá anítárégá ébeq ayéhráq ébeq ayéhráue wahnahnuyara mó sontiá anítárégá méhpehtapéq wahnahnatióyana sugowe.

<sup>7</sup> Sugowana Maniká míéhrabeqte áninká ábóraragútaq karábúsiipéq téhragúwe. Téhragúwana íopeqté áninká Pítane ahwíraq subiq subirue iriatena wensabé, Apubúue irigúno úwe. Úwana wene ayahpite séniráré megúwe.

<sup>8</sup> Megúwana íopeqté áninká wensabé, Arene ambanta sábirue úbíqme arene súu sukio úwana Pítaga wene ehweh irena miraúwana, Arene korósi aneranerue íné séniro úwe.

<sup>9</sup> Íné séniro úwana Pítaga we kérina iwíahéna, Íopeqté áninká tumeniréhnsabé aiq pútaqpomo peh néniwanka tagehrapómo iwíahúwe.

<sup>10</sup> Sontiá áninká wahnahnúrabeq sótaikéra mó sontiá áninká wahnahnúrabeq sótaikéra wahba áhtápéq séagoyeheéra anotah kahpáh ónsá korabeq suye. Mi onsá pehipi sigúwara sega máhpeq séaguye. Séagéra ahnanahq sótaikuyataq íopeqté áninká Pítá auwena taqnobagúwe.

<sup>11</sup> Taqnobagúwana Pítaga iwíahéna, Íre néniwanka tagehrana amahnága aiq niahteboge. Érótireq Asiu kereqka nubíyehoéna Manikánka íopeqté ání eqmaréhre. Íné tumeniranke-heéna eqmaréhre iwíahéna

<sup>12</sup> Máhkane anowa Máhríane nahtapeq pokúwe. Máhkawe mó awíq Sónie. Mi nahtápéq áhnte Sísa tagaríah kégá momiwíue méra púreruwana

<sup>13</sup> Pítaga máhpeqte ónsáráq pakobakoúwana ahrari wenawíq Áróraga onsarapéq tuirowe.

<sup>14</sup> Tuirena, Ehweh irari aní Pítae iwíahéna wene arupipeq eyoyóúwe. Eyoyóúnsabe wega onsa íre siatasá peh nahupeq pehbeheráh kibekue, Pítá méhpehtapéq iriwe míéhre teriuwe.

<sup>15</sup> Teriuwara sega wensabé, Are uwoyansa ani úkóne uwana mi ahrárígá, We míéhre. Peh aiq pútariahnsanuge úwara sega wensabé, Peh íopeqté ání Pítá wahnahnatéh ánípómo uwe.

<sup>16</sup> Úwana Pítaga mó pakobakoúwara sega onsa siatera Pítá tagéra áhtenuwe.

<sup>17</sup> Áhtenuwana se túbáh agigeheéna Pítaga ayanika saiqnéna Manikánka karábúsiipéqté tumero ewhéh teriuwe. Teriena sensabé, Sémisireq mó Sísa tagaríah kéréq koreríéro éna mitaq suena móbeq pokúwe.

<sup>18</sup> Ahbiahipeq Pítá karábúsiipéqté taqnobagúnsabe sontiá kegá, Eheragiro éra sirupipeq iwíah kikiruwe.

<sup>19</sup> Érótiga sontiá keyábé, Pítá koanebahroro úwara koanebahruwe. Anebahruwana Pítá íre ábóraq míonsabe Érótiga Pítá wahnahnuro sontiá kék ehweh aritená mó sontiá

kéyábé, Mi ke subiq súáhro aritowe. Subiq súáhro aritená Érótiga Súría marákórápéq suena Sésáría suwahpeq kowíowe.

### *Éróti pukú ehwehne.*

<sup>20</sup> Érótiga Táíya suwahpeqte kéreq Sáírona suwahpeqte kéreqsabé abiahnsanúwe. Abiansanúwara Érótiga wahnahnú marákórápéqté táchútahúq paiqmaq paiqmaru puara sega weba suwe. Érótine arambehri kené wahnahnú ani wenawíq Párásátae. Moraráq su kegá wensabé, Érótiga itensabé ahqáho aitehnehboq are itene ehweh mibeq mahbeq aní míahno uwe. Insahwé oneheéra Érótiba suwe.

<sup>21</sup> Érótiga iwíahú wehekáh wene wahnah awáhríq náneqmarí sukiwena wahnah siáhráq tútuue ména ehweh teriuwe.

<sup>22</sup> Teriuwara író kega anotah ewhéhnabaéra, Teí ání íre wehukení míre. We Maniká míre uwana

<sup>23</sup> Érótiga, Ahqáho. Íné íre Maniká múge. Peh wehukení múge íre iraria peh ehiya míowe. Minayabe íopeqté ání Maniká míéhrabeqte áninká apubúue, Awahreúno atowana wene arupipeq awiria sóagúwana putiowe.

<sup>24</sup> Putiowara mó ke suwahpeq mó ke suwahperue áhnte kegá Manikáne ehweh irera Sísansabé aiq pútare átówe.

<sup>25</sup> Páhnábásareq Sorareqka sene mibeqté árámbéhrí parabaruera Mákha mó awíq Sóni meqmera Sarúsarama suwahpeq suera Ántíóka suwahpeq kouwekuye. *(Eqmaro 11.29,30, 12.1)*

## 13

### *Porareq Páhnábásareq eqmaq súó ehwehne.*

<sup>1</sup> Ántíóka suwahpeq Sísa tagaríah ké mírábeq Manikáne ehweh iraru kereq síwáhnoru kereq míowe. Mi anímári síwíqmé Páhnábása, Símíoni we mó awíq Naisa, Sáírini marákórápéqté ání Árúsía, Sora, Mánái miraue míowe. Mánáireq anotah wahnah ání Érótireq animairare míýataq motakakiah áníté míoye.

<sup>2</sup> Segá kawerue púreroneheéra táchutahuq awehriuwe. Mi tanáhráq sega Manikánsabe iwíah íwíah atótaq Manikáne Awanka sensabé, Páhnábásareq Sorareqka teriena arámbéhrí miraigehboq eqmaq súáhro úwe.

<sup>3</sup> Úwara sega táchutahuq awehriéra púreréra mi aniténé sinonka táhtoqme púreraritera eqmaq súówe.

### *Ahgora aníné aura pigú ehwehne.*

<sup>4</sup> Manikáne Awanka siqmarowara Sorareq Páhnábásareqka pokue Sérúsía suwahpeq túye. Mitaq suera sípi kewewera kure Sáípára marákórápéq pokuye.

<sup>5</sup> Pokéra Sáramísi suwahpeq sutaq sega Asiu kené momiwí nahmárítápéq Manikáne ehweh teri terinuyana Máhkaga seba ména séhréh aritowe. Máhkawe mó awíq Sónie.

<sup>6</sup> Segá moke Sáípára marákórápéq nogera Pápósa suwahpeq suwe. Mitaqté ání wenawíq Páhsísa. We Asiu ání ména ahgora ání míowe. Wega, Íné Manikáne ehweh iraru ání múge úmé péhepehenúwe.

<sup>7</sup> Wega Pápósa suwahpeqte wáhnah ánibá míowe. Mi wahnáhné áwíqtare Ségia Pórásae. We áhnte ahtébíá ání ména Manikáne ehweh irankeheéna Sorararéyábe mahbeq sewéta Manikáne ehweh teniétao úwe.

<sup>8</sup> Mi ahgorá ání áwíq mó awíqmé Erimae. Erimaga Sorararéné ehwehme abehq éhwéhne aritowe. Mitaqté wáhnah áninká Síane ehwehnsabé aiq pútare inehoéna wega Sorararéné ehwehnsabé abehq éhwéhne aritowe.

<sup>9</sup> Sorawe we mó awíq Porae. Manikáne Awanka we págege atena séhréh atowana wega Erima págegeue ebitáwéna wensabé,

<sup>10</sup> Are owainawane ani móne. Are kaweqtaq méyabe awahrieh aní móne. Are péhe ánime ahbabáqsabe áwí ání móne. Arega Manikáne ehweh íre tábúsoqme teriasa aeqme síwáhnoróne.

<sup>11</sup> Írátíahno. Manikánka amahnága kamah awinah are aura pira ání míankehe. Áhnte wehekáh térehre íre tagahrahóne úwana wene aura apubúue pigúwana we íre tagahrahúwe. Íre tagahrahúnsabe mó anínká wene ayahnkaratáq ahmboqme ah sokigi aninkeheéna kabaq kabarúwe.

<sup>12</sup> Wahnah anínká mina tagéna Sísane ehwehnsabé áhtenu puana aiq pútare atowe.

*Porareq Páhnábásareqka Ántíóka su wahpeq teríuya ehwehne.*

<sup>13</sup> Porarehga Pápósa su wahpeq suera sípi kewewera kure Péríga su wahpeq Pámbíria marákórápéq kuwe. Mitaq Máhkaga Porareh suena wenawahpeq Sarúsarama su wahpeq seuwékúwe.

<sup>14</sup> Seuwékúwara Porarehga Péríga su wahpeq suera Ántíóka su wahpeq Písíria marákórápéq kuwe. Mitaq kéra ahrena ahrena wehekáh Asiu kené momiwí nahtápéq kire tútuue míówe.

<sup>15</sup> Tútuue míowara mibeqté wáhnáh kégá Mósísga sehgóro ú sehirankákáq Manikáne ehweh iraru kené sehirankakaq sáhnsahera sega Porarehyabe, Itene irupipeq séhréhorahi ewhéh kahnaraqmé teiéro uwe.

<sup>16</sup> Uwana Poraga irigéna se túbáh agigeheéna ayahnka saiqnéna mahraréna, Ísara kereq Manikánsabe áhteno kerero, írátíahro.

<sup>17</sup> Maniká Iteribo ite Ísara kené Manikáne. Wega itene igaqnáréh omaq sitena séhréhúnsabe sega Ísípi marákórápéq íregárítáq aguwe. Manikánka págegeue séhréh aritena Ísípi marákórápéqté meriqmena móbeq móritowe.

<sup>18</sup> Segá 40 opéq abataq marákórápéq míówe. Míowana mi tanáhráq Manikánka se peh áwérágówe.

<sup>19</sup> We abapete téhtaré Kénáni marákóráq míó kehiná kaqsuowe. Kaqsuo kene marakó itene igaqnáréh eqsitowe.

<sup>20</sup> Mi arámbéhrí miraúmé peh íregárítáq opéq 450 opéq sótaikúwe. Sotaikúwana wega ehweh kaweraritágeheéna wahnah ke omaq sitowe. Anehe Sáhmúéri wene ehweh irari aní omaq atowe úwe.

<sup>21</sup> Poraga mó mahraréna, Itene igaqnáréhga Manikánsabe, Íregárítáq wahnáh kékabé iuwahriehre. Peh morá anotah págege wahnáh ánínká ite wahnahnaitankeheé omaq ato uwe. Uwana Manikánka Pénsámíni kahnáh ání Kisine ahninkáwá wenawíq Sora omaq atena itene igaqnáréh wahnahnarito atowe. Soraga 40 opéq wahnahnúwe.

<sup>22</sup> Wahnahnúwana Manikánka Soransabé, Arega wahnahnurona tanáhráq aiq parabagire éna Tébítí sene anotah wahnáh ání míankeheéna omaq atowe. Omaq atena mahraréna, Sésine ahninkáwá tagaríóge. We niruní ání míre. Wega moke nuwahbeh sánsá mirainkehe úwe.

<sup>23</sup> Manikánka irarúnserah Tébítine anahwagá ite Ísara ke kaweraitankeheéna Manikánka omaq atowana aiq tutaire. Tutai ani wenawíq Sísae.

<sup>24</sup> Sísaga tuina uraitaq Sóniga Ísara keyábé mahraréna, Itene ahbabáq sansa sueq kaweqtaq míehrataqmé wání meiníe uraire.

<sup>25</sup> Sóniga wene arambehri parabaruana uraitaq wega mó mahraréna, Íné in se wíre íwíáhoo? Íné ite áwénunúna anímé íre we úge. Írátíahro. Íné inehe si aníné súu nahníáq pugereyabe íre awehrari aní múge uraire úwe.\*

<sup>26</sup> Poraga mó mahraréna, Nánuwahraho, Ébáráhma kahnáhné animárínseq Manikánsabe áhteno kerero, írátíahro. Itega oga mía míaonayabé mi ewhéh Manikánka aiq teíre.

\* **13:25:** Mákha 1.7 aigárapéqté éhwéh tagáhno.

<sup>27</sup> Sarúsarama suwahpeqte kéreq sene wahnah anímárínseqka Sísa tunsabe we íre siahtabarowe. Sega ahrena ahrena wehekáh Manikáne ehweh iraru kené sehira sáhnsahwe taga tagáéra mi ewhéhnsábé íre kawerue iwíáhurowe. Íre kawerue iwíáhéra Manikáne ehweh iraru kegá sehiranunserah sega Sísa ehweh atera subiq suanéhe atówe.

<sup>28</sup> Sega, Sísa áhnte ahbabáruraire íre irarerahéra sega pehipi Páhírátinsabé, Subiq suo ato ue teawátówe.

<sup>29</sup> Manikáne sehiranka irarúnserah sega subiq sutowe. Subiq sutowara awanká soriwe táhparó ani sehgiwera maisé onápípéq mómaisarówe.

<sup>30</sup> Mómaisarówana Manikánka iriatena organúq atáráire.

<sup>31</sup> Oganúq atáráirana Kehrari marákórápéqté Sarúsarama suwahpeq we kétó keba suraire. Surairara sega áhnte wehekáh we taga tagauronsabé sega amahnága mó ke teri terinowe úwe.

<sup>32</sup> Poraga mó mahraréna, Anotah kawéq éhwéh mahrarue teiune. Manikánka itene igaqnáréhyabe, Kaweraitahna aní iteba eqmaraníe aiq irarúwe.

<sup>33</sup> Eqmaraníe aiq iraréna Sísa iriatena organúq atáráinsabé wega irarú ehweh aiq pútaraguraire. Itene igaqnáréhne animárínká aiq tagariaraune. Wega iriatena organúq atáráinsabé Buk Songipeqté éhwéhnká mahraréna,

Are nénahni móne.

Íné Arenabo uge ire.

(Buk Song 2.7)

<sup>34</sup> Manikánka iriatena organúq ato puana wene anonka mókake marakóipeq íre karekorahire. Minayabe Manikáne ehwehnka mahraréna,

Ínéga Tébítí omasa éhwéh teawúnserah mókake ite kawerarena áhnte kaweq naneq iníe ire.

(Aisaia 55.3)

<sup>35</sup> Manikáne ehweh mó mahraréna,

Arega miraónayabé arene arambehri miraéyabe omaq ato aníné anonka íre karekinawire ire.

(Buk Song 16.10)

<sup>36</sup> Tébítiga oga mío tanáhráq Manikáne arambehri kawerue miraéna wene arambehri parabaruotaq putiowara itene igaqnáréh maisarórabeq maisarówe. Maisarówana Tébítine anonka kárékúwana

<sup>37</sup> Manikánka iriatena organúq atárái aníné anonka íre kárékuraire.

<sup>38</sup> Minayabe teiníboq írátíáhro. Sísaga miraurainsabé itene ahbabáq kaqiuwahráhire.

<sup>39</sup> Mósísiga sehgóro ú ehwehnká itene ahbabáq íre kaqiuwahráhire. Sísansabé aiq pútare atonayabé itene ahbabáq moke kaqiuwahráhire úwe.

<sup>40</sup> Poraga mó mahraréna, Naho sáiyó ké tahná míyehboq néne ehweh kawerue írátíáhro. Mi keyábé Manikáne ehweh irarú aninká naho sehiranue mahraréna,

<sup>41</sup> Íre aiq pútare ainteq peh niwirého keo, tagariáhro. Ite áhtenéq pukoneheqmóe. Ite míéhra tanáhráq anotah pagégé árámbéhrí mirainauge. Wehukega mi arámbéhrí teiétáq tahirímé itega sensabé íre aiq pútare arítáh irino úwe teriuwe.

<sup>42</sup> Porane ehweh parabagútaq wereq Páhnábásareqka Asiu kené momiwí nahtápéqté tueyokuye. Tueyokuyara mibeqté kégá sensabé, Mó ahrena ahrena wehekáh arega teiená ehweh mahtaq móñkakáq sereyo uwe.

<sup>43</sup> Momiwí nahtápéqté kégá abae agutaq áhnte Asiu kereq Asiu kené sánsá mirau kereqka Porareq Páhnábásareq kérírówe. Kérírówara Porararégá ehweh teriera, Manikánka ite séhréh aitankeheéq wene sánsá kawerue sehgóro uye.

### *Asiu ke suera nahnsó ke koreríúya ehwehne.*

<sup>44</sup> Mó ahrena ahrena wehekáh mi ke suwahpeqte ké peh íregáritaq kegá Manikáne ehweh iraneheéra momiwíuriówe.

**45** Sísansabé íre aiq pútare atáh Ásíú kégá áhnte wehekéq momiwíuríowara tagotaq sene sirupipeq págegeéra abiahnsanuwe. Minayabe sega Poransabé awiréh atera, Arega iraréna ewhéh íre aiq pútak ewhéhne atówe.

**46** Atówara Porareq Páhnábásareqka íre áhreia peh pahsuqme teríuye. Teriera, Itega Asiu ke míah púata téh itega teiuye. Itega, Manikáne ehwehnsabé iuwahriehre éq oga mérapeqsábé íre iuwahbehnsabé ite iwueta mó ke nahnsó ke korerieyéhe.

**47** Manikáne ehwehnka irarinserahnue mahraréna, Nahnsó ke sunkíkírirabeq kawerue nogigéhboq kánéq keráhnserahnue itega kaweq ewhéh koreríero. Mah kehiná kékíná irageheéna eqmaróge ire uye.

**48** Uyara nahnsó kegá mi ewhéh írótaq iwíáh íwíáhera, Manikáne ehweh aiq kaweq ewhéhne íwíáhuwe. Oga mía míageheéna Manikánka omaq sito kega Sísansabé aiq pútare atówe.

**49** Sísansabé aiq pútare ató kega mitaq teri mahtaq terinuwara áhnte mibeqté kégá írówe.

**50** Mibeqté Asiu kegá Porararéyábé abiahnsanéra kaweq abóawáh ínínseq mi ke suwahpeqte ábóawáh wéhreq eqmaq súowe. Eqmaq súowara sega Porareq Páhnábásareq síwíognéra sensuwahpeqte káqsúowara

**51** Porararégá sene sigárátaté tánahúq aiyápóranirue poruaruóye. Itega aiq teriuyansabé amahnága mirao sansá seyene ahhbabáre íwíáhera sene sigárátaté tánahúq poruaruera Áíkónía suwahpeq pokuye.

**52** Pokuyana Manikáne Awanka mitaq Sísa tagariáh kéné sirupipeq ména séhréh aritowara sega iwíáh íwíáhuwe.

## 14

### *Áíkónía suwahpeq ótaq sansámári mirauya ewhéhne.*

**1** Porareq Páhnábásareqka Áíkónía suwahpeq pokuyataq sene sánsánéra Asiu kené momiwí nahtápéq kibekuye. Kibekéra Sísane ehweh tábúsoqme síwáhnoruyansabé áhnte Asiu kereq Káríki kereqka Sísansabé aiq pútare atówe.

**2** Íre aiq pútare ató Asíú kégá nahnsó keyábé, Porararéné ehwehme peh abehq éhwéhne uwara mi nahnsó kégá aiq pútare arító keyabé abiahnsanarítówe.

**3** Porararégá íre wahto tanáhráq mitaq méra íre áhreia Manikáne ehweh síwáhnoruye. Mi ewhéh págegeue síwáhnoruyataq Manikánka sirupipeq págege aritowara sega ótaq sansámári mirauya.

**4** Mi ke suwahpeqte kégá íre morá íwíáhuwe. Mó kegá Porararéné ehweh aiq pútak ewhéhne íwíáhuwara mó kegá, Írakaumo. Peh Asiu kené sánsá aiq pútak sansáne uwe.

**5** Asiu kereq nahnsó kereq sene wahnhnseqka momiwíéra, Porararé síwíognéra ebahnsatate tuparuqme subonéhe íwíáhuwe.

**6** Iwíáhuwara Porararégá mi ewhéh íróyataq apubúue mitaq suera Áríkiónía marákórápéq Árísáta suwahpeq Tébi suwahpeq pokuye. Mitaqkákáq mó ayéhrápéqté ké suwahpeqkakáq teriáqme nogúye.

**7** Mi marákórápéqté ké Sísane kaweq ewhéh teriáqme nogúye.

### *Soriqnah ani kaweragú ehwehne.*

**8** Peh morá soriqnah ani Árísáta suwahpeq tútuue míowana wenanoga soriqnah ani maqmaronsabe íre nogoráhúwe.

**9** Poraga síwáhnorútaq mi anínká kawerue irowe. Irena, Sísaga íné kaweraintahráhire íwíáhúwana Poraga we ebitáwéna wene iwíáh tagéna anotahtaq teawena,

**10** Irigue nogo úwana wega apubúue iriwe noguwe.

<sup>11</sup> Noguwará mibeqté kégá Poraga miraú tagéra anotah ehwéhnabaéra Árikónía marákórápéqté kéné ehweh mahraréra, Manikátaregá wehukeníté úkéra iteba tumíehye uwe.

<sup>12</sup> Tumíehye éra Páhnábásansabé sene maniká áwíq Súsie ue áwíratówe. Poransabé sene maniká áwíq Érémísie ue áwíratówe. Poraga áhnte ehwéhnúnsabe, We Érémísi tahnsá áníne éra Érémísie ue áwíratówe.

<sup>13</sup> Sene maniká Súsinsabé iwíah íwíah ató nah sensuwahpeq ahnansahrapeq kowe. Súsine ehweh mibeq mahbeq arítéh áninká káhoakáq awanká aramarínkákáq ogesáh ogesáhrapeq mewena súwe. Sega, Porareq Páhnábásareqsabé manikátare wóye íwíahéra titironeherauwe.

<sup>14</sup> Titironehera uwara íre mirao sansá miraonehera unsabé mi kegá túbáh agigeheéra Porararégá sene ambanta subansúoye. Subansuera wehuke míorabeq pehbeheráh pokue anotahtaq ehwehnéra,

<sup>15</sup> Aneqsabé miraoo? Peh ite tahnsá wéhuké míoye. Íre miraoro. Itega kaweq ehwéh teieyheéta súye. Íratíahro. Maniká we oga mía míai aní míre. Wega íopeqkákáq mah marákó márákóákáq sóreq wanínkákáq moke kék náneqmarínkákáq mirarowe. Péhepehe maníkánsabé iwíah íwíáho sansá sueq Manikánsabe áhraboro.

<sup>16</sup> Naho wehukega seyene mirau sansánuwana Manikánka pehragaritowe.

<sup>17</sup> Íopeqté ibonsúno atéhrana ibonsirana ménsámehsná kawerue kíréhre. Kawerue kíréhrana iyahbankirehraq itene irupipeq eyoyóire. Minayabe wega ite kaweraitena aiq pútaq míoge éna aiq sokigi aíre uye.

<sup>18</sup> Mi ehwéh iraruyara titironehe íwíáhu ke ebeq sene ehweh íre írówe. Íre írówara Porararégá anotahtaq págegeue ahqáho aritoyara mi kegá, Aiq mire. Itene titironehe íwíah suanehe éra súowe.

### *Ebahnsatate Pora subú ehwehne.*

<sup>19</sup> Ántióka suwahpeqte Asiu kereq Áikónía suwahpeqte Asiu kereqka mitaq séra mó ehwéh teríunsabe mitaqté kégá sene ehweh meyówe. Mewera ebahnsatate tuparuqme Pora subúwana we marakóipeq aunúnkaq surahúwara sega, Aiq putiéhre íwíahéra abariue ahnansahrapeq márówe.

<sup>20</sup> Márówara Sísa tagariáh kégá weba sáhuríótaq Poraga irigéna mi ke suwahpeq kouwekúwe. Ahbiah tahnsá Porareq Páhnábásareqka mitaq suera Tébi suwahpeq pokuye.

### *Sísa tagariáh ké págegeue míageheéra síwáhnoréra aboawah weh omaq sitóya ehwéhne.*

<sup>21</sup> Sega Sísane kaweq ehwéh Tébi suwahpeqte ké teríúyara áhnte kegá Sísansabé aiq pútare atówe. Aiq pútare atówara Porararégá mitaq suera Árlsáta suwahpeqkakáq Áikónía suwahpeqkakáq Ántióka suwahpeqkakáq kouwekuye.

<sup>22</sup> Kouwekéra Sísa tagariáh ké págegeue míageheéra síwáhnoruye. Síwáhnoréra, Túbáh agiehboq Sísa kawerue kéráhro éra Sísane ah íre mareqmareq ahne. Ebeq mó kegá íwíoqnehraq anehe Manikánka wahnah wahnahmirabeq pokoneheqmúne uye.

<sup>23</sup> Sísa tagariáh kéráq wahnahnigeheéra Porararégá mó mapéq mó mapérue aboawah weh omaq sitóye. Omaq sitera táhutahuq awehriue mahraue púreréra, Maniká Iteriboo, síósirapéq wahnahnira kegá arensabé aiq pútare atáhwe. Arega se págege arite wahnahnarito ue púreruye.

### *Písíria marákó Ántióka suwahpeq seuwekuya ehwéhne.*

<sup>24</sup> Porararégá mitaq suera Písíria marákórápéq kotaikue Pámbíria marákórápéq pokuye.

<sup>25</sup> Mitaq Périga suwahpeq Sísane ehweh teriera suera Átáría suwahpeq pokuye.

<sup>26</sup> Mitaq suera sípi kékewera kure Ántíóka suwahpeq kouwekuye. Mitaqté Sísá tagariáh kégá eqmaq suanehe ívíáhéra púreruwe. Manikánka Porararé séhréh aritankeheéra púreréra eqmaq súowe. Eqmaq súowara sega Sísane ehweh kawerue teriera sene arambehri parabariúyansabé Ántíóka suwahpeq seuwekuye.

<sup>27</sup> Seuwekuyataq sega Sísá tagariáh ké momiwí arítóye. Momiwí aritera Manikánka séhréh arito ehwehnkákáq áhnte nahnsónká Sísansabé aiq pútare ató ehwehnkákáq teríúye.

<sup>28</sup> Teriera sega íre wahto tanáhráq mi ke suwahpeq Sísá tagariáh kéká míauya.

## 15

### *Tábúsoq marageheéra eqmaq súó ehwehne.*

<sup>1</sup> Táhmaro Súria marákórápéqté kégá Ántíóka suwahpeq tuera Sísá tagariáh ké síwáhnoruwe. Síwáhnoréra, Peh morá Mósísine sánsá sehgó kéké sene síú amurúráh kégá oga mérapeq awaq miahráhowe uwe.

<sup>2</sup> Uwara Porareq Páhnábásareqka mi ehwéhnsábé anotah ahqáho arítóye. Minayabe sereq tú kerekka anotah ehwéhuwe. Anotah ehwéhuwara Ántíóka suwahpeqte Sísá tagariáh kégá Porareq Páhnábásareq táhmaro mó kerek omaq sitera Sarúsarama suwahpeq pokoro arítówe. Sarúsarama suwahpeq Manikánka eqmaro kerek Sísá tagariáh ábóawáh wéhreqsabé mi ehwéh tábúsoq marageheéra Porareh pokewáhro arítówe.

<sup>3</sup> Sísá tagariáh kégá pokewáhro arítówara sega Pónisia marákóákáq Sámária marákóákáq kótaikuwe. Kótaikutaq mitaqté Sísá tagariáh kéké teriera, Nahnso ke Sísansabé aiq pútare atówe ue teríúwe. Teríúwara moke sirupipeq ívíáh ívíáhéra eyoyówe.

<sup>4</sup> Porarehga Sarúsarama suwahpeq sutaq mibeqté eqmaro kerek Sísá tagariáh ábóawáh wéhreq moke Sísá tagariáh kerekka mehwéh arítówe. Mehweh arítówara Porarehga Manikánka séhréh aritená moke miraú naneqkakaq teríúwe.

<sup>5</sup> Teríúwara táhmaro Sísansabé aiq pútare ató ke Péhrasi kené sánsá mirao kegá irigéra mahraruwé. Mahraréra, Nahnso kegá oga mérapeq awaq miagéhboq Mósísine áú amurúruto sansá miraoro terio. Mósísiga sehgó ú ehweh anteruéhboq kawerue sehgó terio uwe.

<sup>6</sup> Eqmaro kerek Sísá tagariáh ábóawáh wéhreqka mi ehwéhnsábé ívíáhoneheéra momiwíéra só síouwana

<sup>7</sup> Pítaga irigéna sensabé, Nanuwahraho, ite tagariarome naho nahnso kegá kaweq ehwéh irera aiq pútare atageheéna Manikánka ite míaraunarabeq omaq intaráire. Omaq intena, Korerio aintaráire.

<sup>8</sup> Manikánka wehukene sirupipeq tagariéhre. Wenawa iteba eqmaq áuwátáinserah nahnso keba moq eqmaq áuwátáire.

<sup>9</sup> Wega íre peh morá ite Asiu keyábé arutaboirire. Wega nahnso keyábé moq arutaboirire. Segá Sísansabé aiq pútare atáró puara sene sirupipeq kawerarítáirai.

<sup>10</sup> Aneqsabé Maniká áwíoqnahó? Mósísiga sehgó ú ehweh sehgie sansa anotah pagége sánsáne. Itene igaqnaréhreq itereqka mi sansá íre tábúsoqme sehgoráhúne. Minayabe itega aneqsabé nahnso ke mi pagége sánsá sehgó terieo?

<sup>11</sup> Íre mi sansá sehgianaga oga mérapeq awaq miahráhúne. Peh morá itereq nahnso kerek Sísansabé aiq pútare atonaga oga mérapeq awaq miahráhúne úwe.

<sup>12</sup> Pítaga mi ehwéh irarue parabariuwara Porareq Páhnábásareqka momiwíurió ke ehweh teríúyara ehiya míowe. Porararégá nahnso ke míópi Manikánka séhréh aritená ótaq sansámári miraurai ehwéh teríúye.

<sup>13</sup> Teríúyana sene ehweh parabagútaq Sémísiga mahraréna, Nánuwahraho, néne ehweh íráhro.

<sup>14</sup> Manikánka nahnsó ke we kahnáh míageheéna omaq sitáráire. Wega téh miraurains-abé Sáimóniga aiq teíre.\*

<sup>15</sup> Manikáne ehweh iraru kegá minayabe aiq monseráh éhwéh teiúwana Manikáne ehwehnka aiq mahraréna,

<sup>16</sup> Itene anotah Wahnáhnká mahraréna, Nah sokogi inserah Tébítí kahnáhmé ahbabárowe. Íné kouwekutaq sokogi nah pankeráhnserah íné Tébítí kahnáh kaweritaníe. Sokogi nah pankeráhwana o nah tahná kéhnsérah íné we kahnáh kaweraritaníe.

<sup>17</sup> Mó kegá íné sene Wahnahnsabé ninebahrigéheéna kaweraritaníe. Ómi ínéga omaq sitó náhnsó kégá ínésabe ninebahréra iwíáh iwíáh aintagéhé ire.

<sup>18</sup> Naho itene anotah Wahnáhnká áwahewé sína naneq aiq teiuwe úwe.

#### *Awehrio naneqsabé éhwéhne.*

<sup>19</sup> Sémísiga mó mahraréna, Íné iwíáhume Manikánsabe áhrabo nahnsó kégá Maniká kéráh sásá sene sirupipeq umeh aginehboq ahqáho ariteho.

<sup>20</sup> Peh mahrarue páhsí sehiranue terienéhe. Terieq,

Péhepehe maníkánsabe iwíáh iwíáhoneheéra titirirataq náira naneq íre nahro. Mó kené ahrewe ahrariwe wehwe mahbiwe íre abarioro. Wehukenínká awio páríkí náneq ka íre nahro. Korahq íre nahro.

Mahraue páhsíipéq sehiranue terienéhe.

<sup>21</sup> Mósí sine ehweh ahrena ahrena wehekáh Asiu kené momiwí nahmárítápéq ahri-ahri sáhnsáhówe. Wene ehweh moke mi kehiná suwahpeq síwáhnorowe. Minayabe wene ehweh író kega abiahsaniyeho éra peh morá teiú náneqmarínsabé awehrioro ue páhsíipéq sehiranue terienéhe úwe.

#### *Páhsíipéqté éhwéhnsábé éhwéhne.*

<sup>22</sup> Eqmaro kereq Sísa tagaríah ábóawáh wéhreq moke mó Sísa tagaríah kéreqka Ántíóka suwahpeqte ké korerigeheéra kaweq ke omaq sitanéhe iwíáhuwe. Segá itebaté téhtaré ánité Sáírasareq Súrása we mó awíq Pásábareq omaq sitowe.

<sup>23</sup> Omaq sitera mi anítéreq Porareq Páhnábásareq mi pahsí siera eqmaq súówe. Páhsíipéqté éhwéhnská mahraréna,

Síria marákórápéqté kéreq Sírsía marákórápéqté kéreq Ántíóka suwahpeqte kérero, ite nahnsó ke owanawé Sísa tagaríah púaq iteruwahrah úkowe. Ite eqmaro kereq aboawah wehreqka mah pahsí sehiranue teiune.

<sup>24</sup> Ite írátáúnawe menah táhmaro mahtaqté kégá iteba kure iwáhnoruwe. Mi ke íre eqmaq súátáunara peh seyega iwíáhue iteba pokue iwáhnoruwe. Itega sene ehweh aiq pútaq ehwehpómo éq iwíáh kikiruwe.

<sup>25</sup> Minayabe itega só síoéq iteba Porararé moraráq iteba eqmaq súáhna aníté omaq sitone. Porareq Páhnábásareq itene kaweq iyáhnábó ánité méq sensabé irutaboirúne.

<sup>26</sup> Sereq itene Wahnah Sísa Karáhé ehweh terieyeheéra wehuke suboráho ke suwahpeq poku pokuóye.

<sup>27</sup> Mó aníté síwíq Súrásareq Sáírasareq míhye. Segá sehiranu ehweh moq teigéhe.

<sup>28</sup> Manikáne Awanka iwíáh aitéhraq itega págege sansámári íre teieq peh mahraue miraoro teiune.

<sup>29</sup> Péhepehe maníkámárlínsabé iwíáh iwíáhoneheéra titré náriu naneq íre nahro. Korahq íre nahro. Wehukenínká awio páríkí náneq ka íre nahro. Mó kené ahrewe ahrariwe wehwe mahbiwe íre abarioro.

Itega mahna irarúna ehweh íréhrataqmé kaweqtaq míagehe. Pehénáe. Mah pahsí aiq parabagire. Iroro uwe.

\* **15:14:** Árúkaga Pítane mó awíqmé Sáímónie áwíratowe.

30 Eqmaq suowara sega pokue Ántíóka su wahpeq tuera sega Sísa tagariáh kéké momiwí aritera páhsí.

31 Náriúwara sáhnsahera mi pa hsíípquéte éhwéhnká sirupipeq eyoyó aritowe.

32 Súrásareq Sáirásareq Manikáne ehweh iraruya aníté méra Sísa tagariáh kéké págegeue míageheéra sega áhnte ehwéhnue síwáhnoruye.

33 Síwáhnoréra táhmaro wehekáh mitaq méra seuwekoyehe íwíáhuyara pehwehrue pokewáhtao éra eqmaq súówe. [

34 Sáirásaga mó iwiáhéná íre pokia peh mitaq míowe.]

35 Porareq Páhnábásareqka Ántíóka su wahpeq kauye. Sereq áhnte mó kerekka Sísane ehweh teriera síwáhnoruye.

### *Porararégá Mákansabé ehwehuya ehwéhne.*

36 Táhmaro wehekáh sótaikútaq Poraga Páhnábásansabé, Sísane ehweh síwáhnoruraya ke su wahpeqtaq seuwekoyehe. Sísa tagariáh kéké kaweqtaq míahwapómo moke sensuwahpeq koragayehe úwe.

37 Úwana Páhnábásaga, Sóni we mó awíq Mákaga sénirahnata pokoyehe úwe.

38 Úwana Poraga ahqáho atena, Itéga Pámbírla marákórápéq pokurauyataq Mákaga mitaq ite iuwena tabanaguraire. Mi tanáhráq wene arambehri íre parabarusa pehipi taqnobagurainsabé wega mó íre séirankéhe úwe.

39 Mira íwíáhuyansabé sega ehwehuye. Minayabe Páhnábásaga Pora auwena Mákka meqmena sípi kewewena Sáipára marákórápéq pokúwe.

40 Pokúwana Poraga Sáirásá omaq atowara Sísa tagariáh kégá monseráh íwíáhéra, Pokewáhtao éra mahrarue púrerewe. Púreréra, Maniká Iteriboo, arega mah anítéyábe arutaboiróna puah kawerue págege arite séhréh arito uwe.

41 Uwara Porareq Sáirásareqka pokue Síria marákóákáq Sírisia marákóákáq Sísa tagariáh kéké momiwíurabeq págege aritayeheéra síwáhnoruye.

## 16

### *Tímótiga Porarehreq poku ehwéhne.*

1 Porararégá Tébi su wahpeq kótaikéra Árísáta su wahpeq suyana mibeqté Sísa tagariéh ání wenawíq Tímoti míowe. Wenano Sísa tagariéh Asiu iní míowana wenabo Káríki ání míowe.

2 Árísáta su wahpeqte Sísa tagariáh kégá Tímoti kaweq aníne uwara Álkónia su wahpeqte Sísa tagariáh kerekka moq monseráh íwíáhuwe.

3 Poraga iwiáhéná, Tímoti ite séirankéhe íwíáhuwe. Ómi mibeqté Asiu kegá tagariómé Tímótine abowá peh Káríki ání míowe. Káríki ání mó púana Poraga iwiáhéná, Tímoti ite séreyabe Asiu kegá abiahnsa aitého éna Tímoti meqmena wene áú amurú auwowe.

4 Porareq Sáirásareq Tímótireqka mó ke su wahpeq mó ke su wahperue pokue Sísa tagariáh kéké síwáhnoruye. Síwáhnoréra Sarúsarama su wahpeqte eqmaro kerekka Sísa tagariáh áboáwáh wéhreqne páhsí teri terinuwe. Teriera, Mah ehwéh kawerue iwiáhéná sehgíoro uwe.

5 Minayabe Sísa tagariáh kégá Sísane sánsá kawerue ahtebéra sehgíowe. Mó wehekáh mó wehekáhnue mó kegá Sísansabé aiq pútare atera Sísane sánsá sehgíowe.

### *Porane awanka Másérónia marákórápéqté ání tagó ehwehne.*

6 Porarehga, Itéga Esia marákórápéq Sísa éhweh korerienéhe íwíáhuwana Manikáne Awanka ahqáho aritowe. Ahqáho aritowara sega Párlíglia marákóákáq Kárétia marákóákáq kótaikuwe.

7 Kótaikéra Mísia marákórápéq wahtotaq kéra, Pítínia marákórápéq Sísa éhweh korerienéhe íwíáhuwe. Iwiáhuwana Sísane Awanka mó ahqáho aritowara

<sup>8</sup> Mísia marákórápéq kótaikuwe. Kótaikéra Tóása suwahpeq sóreq waní ayehrápéq túwe.

<sup>9</sup> Mitaq inokáhpeq Porane awanka tagówana Másérónía marákórápéqté áninká ábóraragúwe. Ábóraragéna iriwe ména Poransabé, Másérónía marákórápéq séhréh aitagéhboq máhoro éna pahibahirúwe.

<sup>10</sup> Porane awanka tagónsabe itega iwíáhowame\* Manikánka mitaq Sísa éhweh koreríero aitéhre. Aiq teiátáinsabé ireq ite Másérónía marákórápéq pokoneheqmúne íwíáhéq apubúue sokah sokahowane.

### *Árírlaga Sísa kéro ehwehne.*

<sup>11</sup> Itega Tóása suwahpeq sueq sípi kewewe Sámótési marákórápéq pokowane. Mitaq séq mó wehekáh sueq sípi kewewe Neápórísi suwahpeq kowane.

<sup>12</sup> Mitaq sípi sueq Píripái suwahpeq kiowáne. Aroma kegá Píripái suwahpeq téh nah aborisowe. Mitaq anotah matábú kéné moke Másérónía marákórápéqté matábú kiotaiqme matabu kowe. Itega táhmaro wehekáh mitaq kowíahwane.

<sup>13</sup> Ahrena ahrena wehekáh itega ahnansahrapeq wání aroipéq pokowane. Ite iwíáhowanawe, Mahtaq ibora wehukega púrerowe íwíáhéq tunse áhnopeq tútuue míahwane. Mibeqté momiwíuríó ininsó Sísa éhweh teriewáne.

<sup>14</sup> Peh morá íní wenawíq Árírlaga itene ehweh irena we Táiyátáíra suwahpeqte íní ména wene arambehriwe tautáuq ámbántámári paiqmaq paiqmarúwe. We Manikánsabe iwíáh íwíáh ato iníne. Poraga ehweh irarútaq we kawerue irankeheéna Manikánka mi iní séhréh atowe.

<sup>15</sup> Séhréh atowana irowaq itega wereq wene nahtapeq kaegaeu kereq wání meriewáne. Meriewánana mi inínká itensabé, Íné Sísansabé aiq pútare atóge íwíáhirataq néne nahtapeq segaegaeoro úwe. Segaegeoro únsabe itega wene nahtapeq kogaegaeowane.

### *Poraga owainawa kaqauwo ehwehne.*

<sup>16</sup> Itega wehuke púrerorabeq pokowanaraq mó kené arambehri ahráríreq ahtapeq piehgiowáne. Wene arupipeq mío owáinawánká mókake aiq pútaragína ehwéh iwíáh atowana mi ahrárígá irarúwe. Irarúnsabe mó kegá móne náwa náwanuwana wene wahnah anímári nári nárinúwe.

<sup>17</sup> Wega Porareq itereq séirena sawai sawaiéna, Mah kewé Manikáne arambehri ke wóe. Manikámé anotah págege aní míre. Segaegeoro ogá mía mía ehwéh teri terinowe úwe.

<sup>18</sup> Áhnte wehekáh mi ahrárígá ite séirena mi ehwéh irare irareúwe. Minayabe Poraga iwíáh kikiréna wega pabeqme owainawansabé, Sísa Karáhé áhrabu puah mi ahrári auwe pokúno atoge úwe. Úwana mi tanáhráq owainawanka mi ahrári apubúue auwena pokúwe.

### *Píripái suwahpeq Porararé karábúsiipéq móritó ehwehne.*

<sup>19</sup> Mi ahráríné wahnahmarínká iwíáhéra, Owainawa kaqauwéhrana poki puaq ite mókake mó moné íre meyahráhune éra abiahnsanuwe. Abiahnsanéra sega Porareq Sáírasareq táhtoqme abariuera mi ke suwahpeqte wáhnáhmáripá máhkétirapéq móritówe.

<sup>20</sup> Móritera wahnah keyábé, Mi aníté Asiu aníté méra iteruwahpeq ahbabáq sansanóye. Seyene sánsá miraoro éyame íre kaweróye.

<sup>21</sup> Ite Aroma ke míona puaq sene sánsá íre miraúna sansáne uwe.

<sup>22</sup> Uwara mitaq momiwíu kereqka ehweh arítowara wahnah kegá Porararéné korósi keqsúwe. Keqsuera, Morahri sahtáté subóro arítowara subúwe.

<sup>23</sup> Anotahtaq subera karábúsiipéq móritera mibeqté wáhnáhnsabé, Kawerue wahnahnuño atówe.

\* **16:10:** Mó kegá iwíáhéra, Árúka mah pukú sehiranú anínká táhmaro tanáhráq Porareh kériowe íwíáhowe.

<sup>24</sup> Kawerue wahnahnúno atówana wega se meriqmena karábúsi nahtápéq ákáhpite máhrípípquéq móritowe. Móritera sene sigárátáré awanká abahrabahriapipéq sukiwe táhparówe.

<sup>25</sup> Táhparówara inokáhnabubu Porareq Sáírásareqka púreréra igonkónéra Manikánsabe iwíáh íwíáh atóyara mó karábúsiípquéq mío kega tótuméra írówe.

<sup>26</sup> Írówana anotah mariúwana karábúsi nah míu míuúwana moke onsawári apubúue pehipi siraragúwe. Siraragúwana ómi karábúsi kené séniwarí wewega pugetara agúwe.

<sup>27</sup> Karábúsi wahnáhnká sugarabeqte irigéna onsawári siraragú tagówe. Tagéna, Karábúsi ke moke taqnobagowe íwíáhúwe. Mira íwíáhú púana wene poka mewena apubúue pukinieéna néne ninonka sehsabianíe íwíáhúwe.

<sup>28</sup> Sehsabianaútaq Poraga anotahtaq áhrabéna, Arene anonka sehsabíehnehboq túbáh agúno. Íte moke míone úwe.

<sup>29</sup> Úwana karábúsi wahnáhnká wene arambehri anínsábé, Kánéq keqme súno éna pehbeheráh karábúsiípquéq kibekúwe. Kibekéna áhreú púana Porararéné paqnahipeq pokue iransánéna arehunseraráq míowe.

<sup>30</sup> Wega Porararé máhpeq máruntitena sensabé, Árahonaga oga mía míaininkono ue kasenúwe.

<sup>31</sup> Kasenúwara sega wensabé, Sísansabé aiq pútare atéhnaraqmé oga mía míainkehe. Arenawahrahreq moq oga mía míagehe uye.

<sup>32</sup> Porararégá wereq wene nahtapeq kaegaeu kereqsabé itene Wahnah Sísa éhwéh teríuye.

<sup>33</sup> Teríúyana mi tanáhráq karábúsiípquéte wáhnáh Porararé meriqmena puramburanagú pabeq paberaritowe. Pabeq paberaritowara Porararégá wereq wene kárironanínseq wání náriúye.

<sup>34</sup> Wání náriúyana mi wahnáhnká Porararé wene nahupeq meriqmena táhutahuq náriuwe. Wereq wene kárironanínseqka Sísansabé aiq pútare atónsabe sene sirupipeq eyoyóúwe.

<sup>35</sup> Ahbiahipeq mi ke su wahapeqte wáhnáhmárínká párísireh síáhrabéra sensabé, Karábúsiípquéq móritáró anité pugeq suo koreawéro uwe.

<sup>36</sup> Koreawéro uwara karábúsiípquéte wáhnáh koreawuwana Pora mi ehwéh teawuwe. Teawena wensabé, Wahnah kegá siqmaráh párísíwárínká, Ite pageqsoo aiq teniéwe. Minayabe tueyokue pehwehrue pokewáhtao úwe.

<sup>37</sup> Úwana Poraga párísiwarínsábé, Ite íre peh Asiu anité úye. Ite moq Aroma marákórápquéte ánité úye. Segá íre tábúsoqme ehwéh aitasa pehipi iubiq marera karábúsiípquéq móítárówe. Segá amahnága kopípéq kaqiuwagéhbo? Ahqáho. Seyega séra ite pugeqme máhpeq iuwagéhe uye.

<sup>38</sup> Uyara párísiwarínká wahnah keba kouwekue mi ehwéh teríúwe. Teríúwara wahnah kegá ite Aroma marákórápquéte ánité úya ehwéh írónsabe áhreuwe.

<sup>39</sup> Áhreéra Porararébá sure sensabé, Ite Aroma marákórápquéte ánité míehyame íre íratíaraune. Minayabe íre kaweruraune éra máhpeq máruntitera sensabé, Mahtaq sueta pokotao uwe.

<sup>40</sup> Uwara Porararégá karábúsiípquéq suera Áríríane nahtapeq pokuye. Pokéra mitaq Sísa tagariáh kékabé kaweq ehwéh iraréra sensabé, Sísane sánsá kawerue sehgóro aritera pokuye.

## 17

### Tésárónáíka kega, Porararé subonéhe u ehwéhne.

<sup>1</sup> Porarehga pokue Ámbípóri su wahapeq sótaikéra Ápórónía su wahapeq sótaikéra Tésárónáíka su wahapeq kéra mitaq Asiu kené momiwí nahtápquéq kuwe.

<sup>2</sup> Ahrena ahrena wehekáh Poraga wene sánsánéna mi nahpípéq kibekue síwáhnorúwe. Asiu kené ahrené wehekáh apahtáró áhréná áhréná wéhékáh kibekue Manikáne púkuipéqté séhirá síwáhnorúwe.

<sup>3</sup> Síwáhnoréna, Mó kegá Manikánka omaq ato aní áwíoqnéra subiq sutowana pukéna mó oga úkuraire. Manikáne ehwehnka minayabe aiq irarire. Manikánka omaq ato anímé íné teiú ání wenawíq Sísa wire úwe.

<sup>4</sup> Úwara táhmaro Asiu kegá mi ehwéhnsábé aiq pútare atera Porareq Sáírásareq kobaritawe míowe. Manikánsabe áhteno Káríkí kereq áhnte aboawah inínsónseqka moq kobaritawe míowe.

<sup>5</sup> Minayabe íre aiq pútare ató Asiu kegá abiahnsanuwe. Abiahnsanéra ahbabáq ke pehipi máhkétirapéq nogó ké meriqmera momiwíue anotahtaq ehwehuwe. Porararé wehuke momiwíurabeq móritankeheéra wehukení wenawíq Sésónine nahtapeq pehbeheráhnue pokuwe. Pokue wene nahtapeqté ónsá subiqme sueruera Porararéyábé sinebahruwara íre míoye.

<sup>6</sup> Íre míoyansabé sega Sésónireq mó Sísa tagariáh kereq abariuera mi ke suwahpeqte wáhnáh kóbá móritówe. Móritera ehwehéra, Moke mah nahnsó ke ahbabárarítóya anítégá suroyataq

<sup>7</sup> Sésóniga wene nahtapeq mehweh aritowe. Mi anítégá itene anotah wahnáh ání Sísáhrine sánsá íre mirauroye. Íre miraia peh iraréra, Mó Wahnáh ání Sísa iraruye uwe.

<sup>8</sup> Uwara mi ke suwahpeqte kereq sene wahnah kereqka mi ehwéh írótaq kurináhnéra abiahnsanuwe.

<sup>9</sup> Segá Sésónirehyabe, Kotiyabé ite móne paiqmáráhro éra sene móne mewera kaqsúowe.

### *Porareq Sáírásareqka Péría suwahpeq arambehriuya ehwéhne.*

<sup>10</sup> Ío penkúwara mibeqté Sísa tagariáh kégá Porareq Sáírásareq Péría suwahpeq eqmaq súowe. Eqmaq súowara Péría suwahpeq suyataq Asiu kené momiwí nahtápéq kibekéra síwáhnorye.

<sup>11</sup> Síwáhnoruyara mibeqté Asiu kegá irera Manikáne ehwehnsabé kawerue iwíáhue tagowe. Sene iwíáhgá Tésárónáika suwahpeqte kéné iwíáh kiotaikúwe. Segá Porane ehweh írótaq sirupipeq eyoyóue Manikáne sehira mó wehekáh mó wehekáhnue sáhnsahwe iwíáhue tagéra, Porane ehweh aiq pútaqpomo éra iwíáhue tagowe.

<sup>12</sup> Minayabe áhnte Asiu kegá aiq pútare atówe. Sereq mó áhnte ke, Káríki anotah weh áhrégá moq aiq pútare atówe.

<sup>13</sup> Poraga Manikáne ehweh Péría suwahpeqkakáq teríre uwara Tésárónáika suwahpeqte Asiu kegá írówe. Irera Péría suwahpeq séra mibeqté kékabé, Porane ehwehnsabé aiq pútare atehboq íre íráhro ue pagu pagunuwe.

<sup>14</sup> Pagu pagunuwaro mibeqté Sísa tagariáh kégá Pora apubúue sóreq waní ayehrápéq eqmaq áuwówe. Eqmaq áuwówara Sáírásareq Tímótireqka peh mitaq míoye.

<sup>15</sup> Míoyara ah tagariáh kégá Pora meqmera Áténi suwahpeq márúnátówe. Márunátówana wega sensabé, Sáírásareq Tímótireqsabé, Peheráh setao teríero úwara pokuwe.

### *Poraga Áténi suwahpeqte kékteriu ehwéhne.*

<sup>16</sup> Poraga Áténi suwahpeq síwénunútaq mibeqté kégá áhnte péhepehe maníkáne atah naneq kowana tagéna wene arupipeq págege agúwe.

<sup>17</sup> Minayabe Poraga Asiu kené momiwí nahtápéqté kereq Manikánsabe iwíáh íwíáh ató kereqsabé ehwehnuwe. Máhkétirapéq mó wehekáh mó wehekáhnue su kereq moq ehwehnuwe.

<sup>18</sup> Táhmaro mibeqté síwáhnoru kegá Porareq piehgiera áhnte ehwéh kíkírue ehwehnuwe. Mibeqté su kegá táhmaro Épíkúriane sánsá ahtebowara mó tahmáró kégá Sítóíkine sánsá ahtebowe. Táhmaro kegá seye náhenéra, Áhnte ehwéhnikákáq ání

aneq ehwéhnkákáq ánipo uwe. Poraga Sísa oga úkú ehweh teriunsabe mó kegá, We wáhnaupéqté máníkámári éhweh tei teinire uwe.

**19** Segá Pora meqmera Áréópágúsa sawéhráq ahtebia kégá momiwíurabeq móátowe. Móatera wensabé, Arega síwáhnoróna ehwéh peh o ehwéh míre. Mi ehwéh teio.

**20** Arega iraréna ehwéh áwánah éhwéh míre. Mi ehwéhmé áwahe ahtebanehboq kawerue teio uwe.

**21** Áténi suwahpeqte kéreq mibeq wáhnaupéqté sewió kereqka ahriahri o ehwéh irera mi ehwéhnsábé irare irareuwe. Seyene sánsáne.

**22** Poraga Áréópágúsa sawéhráq ahtebia kégá momiwíurabeq iriwe ména mahraréna, Áténi suwahpeqte wého, ínéga iwíáhume itene manikámarinsabé áhnte iwíáh iwíáho ke wóe.

**23** Iteruwahpeq nogewótáq itega iwíáh iwíáhorabeq tagéwómé peh morá táhbérápéq kék séhíramé sáhnsahwe tagéwóge. Mi sehiránká mahraréna, Mah tahbé íre tagariona manikáné tahbe wire ire. Itega íre tagarawéq pehipi iwíáh iwíáh atáhnsábé minawé teiúge.

**24** Teiúge éna mó mahraréna, Manikánka moke mah marákó márakóípéq kék náneqkakákáq mah marákó márakóákáq mirarowe. We mah marákó márakóákáq íópeqkákáq wahnahnatiéh ání míre. Minayabe wega wehukega pearáh náhúpéq íre kaegaei ání míre.

**25** We íre akahrákáhri ání míre. Wewega moke wehukene irupipeqté éúqkákáq moke kék náneqkakákáq nái náinire. Minayabe wehukega we íre séhréh atáhráhowe.

**26** Mah kehiná kékhnáné igaqna peh morá ánine. Manikánka mi ání téh mirarena itene ogamé tanahráq iwíáh aitéhre. Mah marákó márakórápéq mó kehiná mó kehinánsábé, Míáhro aitéhre.

**27** Itega Manikánsabe kabarigeheéna mira iwíáh aitéhre. We tagarianeheéq kabarúne. Ite ómi kehiná míonarabeq we wahtotaq míéhre.

**28** Maniká ména mira aruqaruri puaq itega oga míahrahúne. Iteba sehira tagariéh áninká aiq mahraréna, Ite moke wene animáríne íre.

**29** Ite Manikáne animári míona puaq we peh wehukega iwíáhue mirao naneq mire iwíáhiyeho. We íre ebahtaté miraia ánine. We íre móneraté miraia ánine.

**30** Naho wehukega Maniká íre tagariówe. We íre tagariarera, We peh wehukega iwíáhue mirao naneq mire iwíáhuwe. Mi tanáhráq Manikánka mi kewé peh áwé tagówe. Amahnága wega mah kehiná kékhnánsábé, Itene ahbabáq sansa súáhro íre.

**31** Manikánka peh morá ání omaq atena wega iwíáhína tanáhráq mi áninká mah kehiná kékhná tábúsoqme ehweh aritankéhe. Minayabe mah kehiná kékhnánká tagariageheéna Manikánka mi ání iriatena organúq atáráire úwe.

**32** Míó kega organúq atárái ehwéh írówe. Táhmaro kegá awiréh atówara mó kegá Poransabé, Arene ehweh mókake móñkakákáq iranéhe uwe.

**33** Uwana Poraga mitaq suena pokúwe.

**34** Pokúwara táhmaro wehwárínká we kerera wene ehwehnsabé aiq pútare atówe. Peh morá ání aiq pútare ato ání wenawíq Tíónísíae. Wereq mó ahtebia kékreq Áréópágúsa sawéhráq momiwíue aruqaruruwe. Peh morá íní wenawíq Támárisíae. Wereq mó kerekka Pora kerera wene ehwehnsabé aiq pútare atówe.

## 18

### *Poraga Kórína suwahpeqte kék teriu ehwehne.*

**1** Poraga Áténi suwahpeq suena Kórína suwahpeq pokúwe.

**2** Póntusa marákórápéqté ání wenawíq Ákúíra míowana wene ahre awíq Párisírae. Se Asiu akéq menah Ítári marákórápéq móýana mibeqté wáhnáh áníné áwíqtare Káróríúsa

Sísáhrie. Mi wahnáhnká moke Aroma suwahpeq míó Asiu keyábé, Pokoro aritená kaqsuowara Ákúíra akéqká Aroma suwahpeq suera Kórína suwahpeq kowíóye.

<sup>4</sup> Poraga mitaq se tagéna sene iyahnabo aní úkúwe.

<sup>3</sup> Werek sereq peh morá árámbéhriúwe. Sene arambehriwe wéhuwehu nahmári piageheéra sériwarí kogahnue kawerarówe. Werek sereqne arambehri peh monseráh púana seba kobaritawe míowe. Werek sereqka morárág arambehriúwe.

<sup>4</sup> Moke ahrena ahrena wehekáh Poraga Asiu kené momiwí nahtápéq Asiu kereq Káríki kereqsabé Sísa éhweh terinieéna poku pokuúwe.

<sup>5</sup> Sáirásareq Tímótireqka Másérónía marákórápéq suera Pora míorabeq suye. Segá suyataq Poraga Manikáne ehweh Asiu ke teri terinéna, Manikánka omaq ato anímé Sísaé úwe,

<sup>6</sup> Úwara író kega mi ehwéhnsábé ahqáho atera íre kaweq ehwéh atówana wega sensabé, Aiq mire. Ínéga aiq teiúge éna wene ambanta suruparuena teriuwe. Itega iraipéq pokirame iteitene irupipeqté íwíahgáe. Íné aiq pútaq ehwéh aiq teiúge. Itega ahqáho aintáhnsábé nahnsó ke korerinauge úwe.

<sup>7</sup> Manikánsabe iwíáh iwíáh ato aní wenawíqtare Títia Sásátae. Wene nah Asiu kené momiwí nahtápéq wahtotaruwana Poraga momiwí nahtápéq suena mi aníné nahtapeq kowíowe.

<sup>8</sup> Asiu kené momiwí nahtápéqté wáhnáh ání wenawíq Káríspae. Werek mi karíónánínseqka Sísansabé aiq pútare atówe. Áhnte mó Kórína suwahpeqte kégá Porane ehweh irera aiq pútare atera wání meyówe.

### *Porane awanka tagó ehwehne.*

<sup>9</sup> Inokáhpeq Porane awanka tagówana Sísaga wensabé, Íre áhreúno. Túbáh aginehboq néne ehweh pahsuo.

<sup>10</sup> Ínéga areba míó púara mó kegá are íre subigéhe. Kórína suwahpeqte kewé áhnte kegá ínénabe aiq pútare aintagéhe úwe.

<sup>11</sup> Minayabe Poraga Kórína suwahpeq peh morá ópéq mó opéq ákáhtaq ména Manikáne ehweh síwáhnorúwe.

<sup>12</sup> Wehukení wenawíq Káríoe. We Ákáía marákórápéqté wáhnáh mótaq Asiu kegá momiwíéra Pora táhtoqme ehwehurabeq móátówe.

<sup>13</sup> Segá Káríonsabe, Mah anínká itega Manikánsabe iwíáh iwíáh atona sansá sueq mó sansánoro tei teinire úwe. Wega o teí sánsámé Mósísiga íre miraoro ú sansáne uwe.

<sup>14</sup> Uwana Poraga ehweh irarinaútaq Káríoga Asiu keyábé mahrrárena, Asiu keo, mi anínká ahkaragáraéna anotah ahbábárítatq tahirímé ínégá itene ehweh kawerue író irino.

<sup>15</sup> Peh iteitene ehwehnakákáq wehukene síwíqkakaqsabé iteitene sánsánkákáqsábé iteitega iwíáhue miraoro. Íre néne arambehri puana túbháh aginauge éna

<sup>16</sup> se moke ehwehurabeqte kaqsúáhro aritowe.

<sup>17</sup> Kaqsúáhro aritowara Asiu kené momiwíurabeqte náhtápéqté wáhnáh wenawíq Sósáténi táhtoqme máhpeq subúwe. Subútaq Káríoga se peh áwé tagowe.

### *Poraga Ántióka suwahpeq kouwekú ehwehne.*

<sup>18</sup> Poraga Kórína suwahpeq áhnte mó wehekáh ména Sénkáriá suwahpeq pokúwana wene ayahra káúqauwowe. Pehipi íre káúqauwana Asiu kené sánsánéna Poraga Manikánsabe ehweh teawunsabe káúqauwowe. Káúqauwana Sísa tagariáh ké mitaq suena Párísírareq wenawehq Ákúírareq meriqmena sípi kewewena Síriá marákórápéq pokúwe.

<sup>19</sup> Segá sípi kewewera Épésa suwahpeq kuwe. Mitaq Poraga Párísírareq Ákúírareq suena Asiu kené momiwí nahtápéq kibekéna wereq Asiu kereqka ehwehnuwe.

<sup>20</sup> Mi kegá Poransabé, Mahtaq míahno uwana ahqáho éna

**21** Épésá sensuwahpeq suanieútaq sensabé, Manikánka kouwekúno íwíáh aintahnaraq kouwekinie úwe. Kouwekinie éna Épésá su wahpeq suena sípi kewewena pokúwe.

**22** Sípiga Sésária su wahpeq sútaq Poraga sípi suena kire Sísa tagariáh ké mehweh aritanieéna Sarúsarama su wahpeq kiuwe. Mehweh aritena Sarúsarama suena Ántióka su wahpeq tuwe.

**23** Táhmaro ió Ántióka su wahpeq ména mitaq suena pokúwe. Wega Sísa tagariáh kéné sirupipeq kaweq iwíáh aritanieéna Kárétia marákóákáq Párígía marákóákáq mó mapéq mó mapérue nogena pokue teriáqme noguwe.

### *Ápóroga Épésá su wahpeqte ké ehweh teriú ehwehne.*

**24** Peh morá ání, Árekásántaría su wahpeqte áninká Épésá su wahpeq séna wenawíq Ápóroe. We Manikáne sehira ahtebia ání ména kawerue teri terinú ani míowe.

**25** Mó kegá we Manikáne sansá áwáhnoruwaná wega mó ke págegeue síwáhnorúwe. Peh morá Sísa éhweh ákáhtaq ahtebéna tábúsoqme teri terinéna Sóniga wání meriu ehweh moke ahtebówe.

**26** Épésá su wahpeq Asiu kené momiwí nahtápéq págegeue síwáhnorúwe. Wega síwáhnorútaq Párisírareq Ákúírareqka wene ehweh irera móbeq meqmera we íre ahtebó ehweh, Manikáne sansá tábúsoqme áwáhnoruye.

**27** Ápóroga, Íné Ákáía marákórápéqté ké kosíwáhnorinie íwíáhúwara Épésá su wahpeq Sísa tagariáh kégá wensabé, Kaweróne. Kosíwáhnorúno éra mibeqté Sísa tagariáh kégá we mehweh atageheéra páhsí sehiranue áwúwe. Manikánka áhnte Ákáía marákórápéqté ké séhréh aritowara Sísansabé aiq pútare atówe. Anehe Ápóroga mitaq séna mi ke anotahtaq séhréh aritowe.

**28** Wega Manikáne sehira sáhnsahena, Manikánka omaq ato anímé Sísae teriuwe. Wehuke míópi págegeue teri terinúnsabe wene ehweh Asiu kené ehweh kiotaikúwe. Minayabe wega Sísansabé aiq pútare atáh ké anotahtaq séhréh aritowe.

## 19

### *Poraga Manikáne Awansabé Épésá ke teriu ehwehne.*

**1** Ápóro Kórína marákórápéq míotaq Poraga sáwéhrapeq kótaikéna Épésá su wahpeq tuwara táhmaro Sísa tagariáh ké míowe.

**2** Míowana Poraga sensabé, Itega Sísansabé aiq pútare atárótaq Manikáne Awanka itene irupipeq aiq tutairo ue kasenúwe. Kasenúwara sega wensabé, Ahqáho. Manikáne Awa ehweh íre írátáúne uwana

**3** Poraga sensabé, Aneq waní meroo ue kasenúwe. Kasenúwara sega wensabé, Sóniga wání meriátainserah mó kegá mina tahnsa wání meraune uwe.

**4** Uwana Poraga sensabé, Sene ahbabáq sansa sutonsabé Sóniga wání meriátáire. Meriena mahraréna, Inehe sína anínsabé aiq pútare atáhro. Wenawíq Sísae uraire úwe. Sóniga irarú ehweh Poraga teriuwe.

**5** Teriuwara írówana itene Wahnah Sísa áwírue wání náriuwe.

**6** Poraga sensinetaba wene ayahnkaratáté táhtorotaq Manikáne Awanka sene sirupipeq tuwara sega kambare ehwéh iraréra Manikáne Awanka iwíáh arito ehweh iraruwe.

**7** Mirau kewé airápétá téhranítée.

**8** Poraga Asiu kené momiwí nahtápéq kibekéna Manikánka wahnah wahnahnirabeqte éhwéh págegeue teriuwe. Teriuwara Asiu kegá wene ehwehnsabé áhntetaq kasenéra iwíáhuwe. Iwíáhuwana apahtáró íótáq miraúwara

**9** táhmaro író kega wene ehwehnsabé íre aiq pútare atera saiyouwe.

Saiyoéra momiwíurabeq Sísane sánsánsábé íre kaweq ehwéh atówana Poraga se suena Sísansabé aiq pútare atáh ké meriqmena pokúwe. Sigarurapéqté wáhnáh ání wenawíq Tíránsae. Poraga Sísansabé aiq pútare atáh ké meriqmena Tíránsane sigaru nahpípéq mó wehekáh mó wehekáhnue síwáhnoréna ehwehnúwe.

<sup>10</sup> Poraga téhtaré ópéq mi sigárúráq síwáhnorúwara moke Esia marákórápéqté Asiu kereq Káríki kereqka Manikáne ehweh írówe.

### *Owainawa íre kaqsuahráhu ehwéhne.*

<sup>11</sup> Manikánka págegeue séhréh atowana Poraga anotah otáq sánsámári miraúwe.

<sup>12</sup> Minayabe mó kegá Poraga táhtoro ambántámári meyówe. Mi ambántámári awahre kebá móriúwara sene su wahre kaweragúwara owainawamarínká se suera pokuwe.

<sup>13</sup> Táhmaro Asiu ahgórá kewé nahnsu wahpeqtaq kégaeayaq tuegaeyaréu anímári méra owainawa kaqsuq kaqsurowe. Mi kegá itene Wahnah Sísa áwírue owainawamarí kaqsuanéhe íwíáhera Poraga kaqsuonserah itega moq kaqsuanéhe íwíáhuwe. Minayabe sega mahraréra, Owainawano, Poraga teri terini ání, Sísa áwírue wehukení auwe pokúno teawune uwe.

<sup>14</sup> Abapete téhtaré Asiu anímárinká owainawamarínsábé mina tahnsa éhwéhnuwe.

Manikáne ehweh mibeq mahbeq arítéh ání wenawíq Síkéba sibowá míowe. Wene anahwaréhga mó wehekáh mi ehwéhnuwana

<sup>15</sup> owainawanka sensabé, Sísa aiq tagarióge. Pora moq aiq tagarióge. Itewe inseréhbo úwe.

<sup>16</sup> Úwana owainawa wene arupipeq mío anínká seba ahkuagéna sene korósi moke subansuena subiqmaq subiqmarúwara korahq tabagu tabaguúwara se pehrákora méra nahupeq suera máhpeq pehbeheráhnue pokuwe.

<sup>17</sup> Asiu kereq Káríki kereq peh moke Épésa su wahpeqte kereqka mi ehwéh irera áhtenuwe. Minayabe mi kegá itene Wahnah Sísa áwíq pankerera iwiáh íwíáh atowe.

<sup>18</sup> Mi tanáhráq áhnte Sísa tagariáh kégá sure sene ahbabáq sansa pahsuqme teríwe.

<sup>19</sup> Ahgora tagarió kega sene ahbabáq pukuwári mewera ómi wehukega tagariótaq ira paríwe. Segá mi irá paríó pukuwári árahue kehramo éra sáhnsáhúwe. Sáhnsahera, Peh íregáritaq 50 táchuseni (50,000) moné tahnsa pukuwári ira parione íwíáhuwe.

<sup>20</sup> Púku ira parearónsabe Manikáne ehwehnka áhnte kene sirupipeq pówara sega págege anímári úkéra wene ehweh mitaq teri mahtaq terinuwana mi ehwéhniká abae agúwe.

### *Épésa kegá Pora ehweho ehwéhne.*

<sup>21</sup> Anehe Poraga iwíáhéna, Másérónía marákórápéqkákáq Ákáia marákórápéqkákáq pokinie. Mibeq Sísa tagariáh ké koragéna sótaikue Sarúsarama su wahpeq pokinie. Mibeq Sísa tagariáh ké koragéna sótaikue Aroma su wahpeq pokinie íwíáhuwe.

<sup>22</sup> We kéróya aníté Tímótireq Érásátireq míoye. Poraga mi aníté Másérónía marákórápéq eqmaq suena we Esia marákórápéq pehgáriq tanáhráq míowe.

<sup>23</sup> Mi tanáhráq áhnte kegá Sísansabé aiq pútare atónsabe mó kegá áhnte abíáhnsánéra ehwehuwe.

<sup>24</sup> Wehukaní wenawíq Témítíúsie. Wene arambehriwe káhpah tahnsa náneqtaté pehgáriq píksah tahnsá náneq mira aruqarurúwe. Mi ke su wahpeqte kéné péhepehe maníká wenawíq Átémísie. Témítíúsireq mó kereqka Átémísine píksah tahnsá náneq miraera paimqe áhnte moné meyówe.

<sup>25</sup> Témítíúsiga moke mi arámbéhrí mirau ke momiwí aritowe. Wega sensabé, Itega maníká tahnsa náneq miraonsabé áhnte moné meweúne.

<sup>26</sup> Itega Porane sansá aiq tagarawéq wene ehweh aiq írátíáhwe. Wehukega mirao naneq íre aiq pútaq Manikáne tei teinire. Minayabe áhnte kegá itega mirao naneqsabé anetaníbo íwíáhowe. Íre peh morá Épésa su wahpeqte kégá áhnte Esia marákórápéqté kereqka moq mira íwíáhuwe.

<sup>27</sup> Minayabe anotah íre kawerire. Itene arambehri íre kaweragíneho. Mó kegá itene maniká Átémísine nahnsabe, Peh abehq náneq nahne íwíáhiyeho. Esia marákórápéqté kereq mah kehiná kékínánseqka amahnága Átémísinsabé, Ano iní míáhne éra iwíáh íwíáh atáhwe. Poraga wene ehweh síwáhnorinsabé mó kegá Átémísinsabé íre iwíáh íwíáh atera peh anetaníbo íwíáhiyeho úwe.

<sup>28</sup> Úwara moke arambehriu kega mi ehwéh írótaq anotah abiáhnsánéra ehwehn-abauwe. Ehwehnabaéra, Átémisiwe Épésa su wahpeqte kéné maniká anotah iníne uwe.

<sup>29</sup> Minayabe mi kegá anotahtaq ehwehnéra kényéuwe. Téhraníté Másérónía marákórápéqté ánité sensíwíq Káiúsireq Árísátákirere. Poraga ahpeq nogutaq sega we kéróye. Kényéu kegá mi aníté táhtoqme koti matábúrápqué abariuera mórítówe.

<sup>30</sup> Poraga, Íné wehuke momiwíorabeq pokinie úwara Sísa tagariáh kégá ahqáho atówe.

<sup>31</sup> Táhmaro Esia marákórápéqté wáhnáh kégá Porane iyahnabo anímári míówe. Segá mó anínsabé, Pora ehweh koreawo. Mahraue koreawe, Wehuke momiwíorabeq pokínehboq mitaq míahno ato éra eqmarówana koreawuwe.

<sup>32</sup> Momiwíurabeqte kégá áhnte ehwehnéra íre peh morá íwíáhuwe. Mó kegá mó ehwéhnuwara mó kegá mó ehwéhnuwe. Áhnte kegá iwíáhéra, Aneqsabé momiwíuno uwe.

<sup>33</sup> Wehukeni wenawíq Árékásántae. Asiu kegá we pagunera, Irigue ehweh terio uwana wega ehwéh terinieéna ayahnka saiqnówe.

<sup>34</sup> Saiqnówara sega we tagéra, We Asiu aní míre éra ehwehnabauwe. Segá íre wahto tanáhráq téhtaré áhwáh moráráq ehwehnue mahraréra, Átémisi ite Épésa su wahpeqte kéné maniká anotah iní míre uwe.

<sup>35</sup> Mibeqté kúsíkúsíqká momiwíurabeqte kényabé ehweh saiqnaruwe. Saiqnaritená sensabé, Épésa su wahpeqte wého, áraho? Írátíáhro. Itene anotah maniká Átémísie. Itewe Épésa su wahpeqte kégá wensabé iwíáh íwíáh atona nahtápqué wahnah wahnahnúne. Wene iópeqté ébáh tahnsa píkísáh wahnah wahnahnúne. Minayabe ómi kehinánká aiq tagariáh mino.

<sup>36</sup> Mó kegá péhenóne íre irarerahowe. Minayabe ahbabáriyehboq tabasíwe míáhro.

<sup>37</sup> Itega abariue mórítáh ánítégá Átémisiwe íre ahbabáratehye. Segá wensabé íre abehq ehwéh atehye.

<sup>38</sup> Témítíúsireq wene arambehrio kereqka ehweh kahnaraq sega koti orabeq koreriuwara mitaq kamahni kegá ehweh aritagéhe.

<sup>39</sup> Itega mó ehwéh kahnaraq wahba kégá koti orabeq korériero. Segá iwíáhue teigéhe.

<sup>40</sup> Anotah wahnáh kégá itensabé, Ibora aneqsabé tobego kasenirataq itega aneq ehwéh terianéhnkono? Írakaumo, Ite ehweh íre kékhe.

<sup>41</sup> Minayabe pehwehrue pokewáhro éna kúsíkúsíqka se kaqsuowe.

## 20

### *Poraga Másérónía marákórápqué pokú ehwehne.*

<sup>1</sup> Momiwíurabeqte éhwéh parabagútaq Poraga Sísa tagariáh ké síáhrabéna, Ínéba sero úwara suwe. Suwana sirupipeq kaweq iwíáh aritanieéna Poraga ehweh teriuwe. Teriena mehwéh aritená mitaq suena Másérónía marákórápqué pokúwe.

<sup>2</sup> Poraga Másérónía marákórápqué pokue mó mapéq mó mapérue Sísa tagariáh kégá págegeue kéránéhe íwíáhigeheéna ehweh teriuwe. Teriena Másérónía marákórápqué suena Káríki marákórápqué pokúwe.

<sup>3</sup> Káríki marákórápqué kiená apahtáró ío mitaq ména sípi kewewena Síria marákórápqué pokinaútaq Asiu kegá, Pora suboneheqmúne uwe. Uwana Poraga mó iwiáhéná, Másérónía marákórápqué kouwekinie úwe.

<sup>4</sup> Másérónia marákórápéq kouwekinie úwara mó kegá, Are kéranéhe íwíáhuwe. Pírusine ahninkawá Péría suwahpeqte ánínéna wenawíq Sópátae. Tésárónáika suwahpeqte áníté sensiwíq Árísátákireq Sékúntareq míoye. Tébi suwahpeqte ání wenawíq Káiúsi míéhre. Esia marákórápéqté áníté sensiwíq Tíkikúsireq Tárópímareq míoye. Moke mi kereq Tímótireqka

<sup>5</sup> Tóasa suwahpeq pokue mitaq itensabé íwénunuwe.

<sup>6</sup> Íre muoráhi parétí né tanahráq parabagútaq íné Árükareq Porareqka Píripái suwahpeq sueta sípi keweweta pokowaye. Itaréitaréráq sípiipéq méta moberíáhtáq Tóasa suwahpeq íwénunu kebá sewaye. Seba séta abapete téhtaréráq mitaq míahwaye.

### *Pukú mahbí oga úkú ehwehne.*

<sup>7</sup> Mó wikí ebeqte wéhékáh itega táhutahuq keqme moráráq naneheéq momiwíue míahwane. Mi tanáhráq Poraga ehweh teriuwe. Ahbiah pokinie íwíáhéna inokáhnabubu wene ehweh íre parabarusa peh irarúwe.

<sup>8</sup> Abobórähpeqte náhúpéq momiwíue míahwanana áhnte aráhmúgá mitaq téhrówe.

<sup>9</sup> Peh morá máhbí wenawíq Íyútíkae. Wega abobórähpeqte náh áwáhnkúráq tútuue míowe. Poraga íre wahto ehwéh teriu púana mi mahbí sugekúwe. Sugekú púana mágpeq inahnsubuvara tueyokue tagowe. Tagéra tuiriatómé putiowe.

<sup>10</sup> Putiowana Poraga moq tueyokue tagéna tutaebewe mi mahbí saiqnawe káhkoue míoye. Poraga míó keyabé, Íre ibisahro. We amahnága oga míéhre úwe.

<sup>11</sup> Poraga tuekue kiutaq itega táhutahuq keqme moráráq nahwane. Poraga áhnte mó ehwéh teriena tuekutaq ahbiahipeq mitaq suena pokúwe.

<sup>12</sup> Oga úkú mahbíné awahrahga we meqmera awaho ani mío púara sirupipeq eyoyóéra sene nahtapeq pokuwe.

### *Poraga Tóasa suwahpeq suena Mírétsísi suwahpeq pokú ehwehne.*

<sup>13</sup> Poraga pokinaútaq itensabé, Ásósa suwahpeq íwénuninauge éna iuwena ahtapeq pokúwe. Pokúwaq itega sípi kewewe sípi kewewe Ásósa suwahpeq Pora sípiipéq koweraneheéq pokowane.

<sup>14</sup> Itega Ásósa suwahpeq Porareq piehgiowánaraq sípi kewewe Mítíríni suwahpeq pokowane.

<sup>15</sup> Itega mitaq sueq sípi kewewe mó wehekáh Kíosa suwahpeq marakó kowaq kótaikowane. Mó wehekáh Sámósa suwahpeq sewane. Mitaq sueq mó wehekáh Mírétsísi suwahpeq sewane.

<sup>16</sup> Asiu kené siahrreraq ko tanahráq áwíq Péntíkósie. Poraga iwiáhéna, Péntíkósie tanahráq íné Sarúsarama suwahpeq méyabe nuwahbehre. Minayabe amahnága Esia marákórápéq suena sípi kewewena apubúue Sarúsarama suwahpeq pokinieéna Épésa suwahpeq íre kowíanauge. Peh kótaikinie íwíáhúwe.

### *Épésa suwahpeqte kékabé iroro arito ehwehne.*

<sup>17</sup> Poraga Mírétsísi suwahpeq míotaq Épésa suwahpeq Sísa tagariáh ábóawáh wéh kiwerirankeheéna eqmarowe.

<sup>18</sup> Épésa suwahpeqte Sísa tagariáh ábóawáh wéhwé Poraba sutaq wega sensabé mahraréna, Íné Esia marákórápéq téh surautaqkákáq amahnágaákáq itereq mía míaugaq néne sánsá tagariáhwe.

<sup>19</sup> Anotah aní méyabe nuwahriarairana peh Manikáne arambehriéyabe nuwahbarairana mira aruqaruruge. Ite tagariáhmé Asiu kegá áhntetaq moraénue níwíoqnarutowana áhnte tanáhráq ibisarauge.

<sup>20</sup> Wehuke momiwíurotaqkákáq mó natáq mó natáruue ite séhréhorahi ehwéh pahsuqme tei teinurauge.

<sup>21</sup> Asiu kereq Káríki kereqsabé, Itene ahbabáq sansa sueq Manikánsabe áhraboro. Itene Wahnah Sísá Karáhénasabe aiq pútare atáhro tei teinuraugaq tagariáhwe úwe.

<sup>22</sup> Poraga mó mahraréna, Manikáne Awanka pokúno aintaráinsabé íné amahnága Sarúsarama suwahpeq pokinie. Mitaq sega nubiq suaneherabowamo. Árahoneherabowapómo. Íné íre tagarióge.

<sup>23</sup> Peh morá íné niahtebome Sarúsarama suwahpeqte kégá níwíoqnéra karábúsiipéq móintagéhe. Mó mapéq mó mapérue séyéurautaq Manikáne Awanka mó ke iwíáh aritowara mira éhwéh teni teninowe.

<sup>24</sup> Segá nubiq súéhransabé íre áhreuge. Minayabe anetaníbo. Itene Wahnah Sísá Karáhégá teniátái arámbéhrí parabarueyabe nuwahbehre. Manikánka ite séhréh aitená kaweraitéh éhwéh teri terinéyabe nuwahbehre úwe.

<sup>25</sup> Poraga mó mahraréna, Manikánka wahnahni ehwéh ite míáhrabeq tei teinurauge. Íné tagariómé amahnága pokonaraq mókake íné mó íre tagagehe.

<sup>26</sup> Ibora pahsuqme teiníboq írátiáhro. Iraipéq pokira kegá ínénsabe íre abiahnsa aintahráhowe.

<sup>27</sup> Íné íre túbah agia Manikáne sansá moke pahsuqme íwáhnorurau puara íre abiahnsa aintahráhowe.

<sup>28</sup> Manikáne Awanka ite omaq itena, Wahnahnúno aitáráire. Wahnahnúno aitárái puaq sipisípiq wahnáhnká wene kamarí wahnahninserah itega moke Sísá tagariáh ké moq kawerue wahnahnarítáhro. Kawerue wahnahnariteq Sísaga mi kené ahbabáqsabe wene korahqtaté paiqmataire íwíáhoro.

<sup>29</sup> Sísane sánsá íre tábúsoqme miraéra peh mó sansá miraigeheéra íné pokona tanáhráq mó kegá séra péhe éhwéh íwáhnorigehe. Úrinsi iánká sipisípiq subínserah sega ite morábí méra íre kaweraitagéhe.

<sup>30</sup> Sísá tagariáh kégá wehukene sánsá miraigeheéra ite míáhrabeqte kégá moq péhe éhwéh íwáhnorigehe.

<sup>31</sup> Minayabe íwéh panatágínaq uqmatiáhro. Apahtáró ópéq wéhékáhnkakaq inokáhpeqkakáq itensabé nirutaboiréna kawerue íwáhno aruqaruruge. Minayabe iahreraq matiáhro úwe.

<sup>32</sup> Poraga mó mahraréna, Manikánka séhréh aitéh éhwéh anotah pagégé éhwéhne. Mi ehwéh íréhrataq itega kaweqtaq míahrahewe. Mi ehwéh íréhrataq itega kaweqtaq méq oga míá míaira kereq moráráq míagehe. Minayabe Manikáne ehweh kawerue ireq wene sánsá miraoro.

<sup>33</sup> Iteba míarau tanáhráq mó aníné korósiakáq móneakáqsabé íre nirutaboirurauge.

<sup>34</sup> Ínéreq séhréh aintáh kéreq táhutahuroneheéna ínénéga arambehriurauge. Minayabe tagariáhwe.

<sup>35</sup> Itega mareqmarero ke séhréh aritaneheéq kawerue arambehrioro. Ínéga aiq mira aruqarunserah arambehrioro. Itene Wahnah Sísaga mahraréna, Mó anínká are náwi tánáhráq are iwíáh íwíáhóne. Arega mó aní náwena tanáhráq anotah íwíáh íwíáhóne uraire. Mi ehwéhnsabé iahreraq matiáhro úwe.

<sup>36</sup> Poraga mi ehwéh aiq teriutaq wereq aboawah wehreqka sirenhareráq méra púreruwe.

<sup>37</sup> Púreq ehwéh parabagútaq sega Pora káhkoue mehwehéra ibisowe.

<sup>38</sup> Poraga, Mókake íné mó íre tagagehe únsabe sirutaboiréa ibiséra we sípiipéq meqmera móauwera kowekuwe.

<sup>1</sup> Itega Épésa suwahpeqte ábóawáh wéh sueq sípi kewewe q obaríqme kure Kósá marákórápéq pokowane. Mó wehekáh itega Árórésa marákórápéq kék mitaq sueq Pátára suwahpeq pokowane.

<sup>2</sup> Mitaq séq Pónisia marákórápéq pokína sipí kabarue tagéq mi sipí kewewe q pokowane.

<sup>3</sup> Sáipára marákórápéq ábóraq kowanaraq tagéq marakó ayehrápéq kótaikowane. Kótaikéq Síria marákórápéq tagéq Táiya suwahpeq korahowane. Mó kegá sípiipéqté ménsáméhnsá mewe marakóipeq sáharótaq

<sup>4</sup> Itega Táiya suwahpeqte Sísa tagariáh kóbá kowíahwane. Kowéq abapete téhtaré wéhékáh seba kowíahwane. Seba míahwanaraq Manikáne Awanka se iwíah aritowara sega Pora teawera, Wehukega are subiq súéhboq Sarúsarama suwahpeq pokineho uwe.

<sup>5</sup> Mi tanáhráq parabagútaq itega pokonehe íwíahéq kaegaeowanarabeq suahwáne. Suahwánaraq moke mibeqté kéréq sene kárironanínseqka meiqmera ahnansahrapeq méíuwówe.

<sup>6</sup> Itega arahwéraq irehunseraráq méq púreréq iriwe mehwéhowane. Mehweh ariteq sípiipéq kiasagowanara tagéra sene nahtapeq seuwekuwe.

### *Ágábúsaga Sésária suwahpeq Pora ehweh teawuwe.*

<sup>7</sup> Itega Táiya suwahpeq sueq sípi kewewe q pokue Tórémési suwahpeq pokowane. Mibeqté Sísa tagariáh kéréq mehwéhéq peh morá wéhékáh seba kowíahwane.

<sup>8</sup> Mó wehekáh itega mitaq sueq Sésária suwahpeq pokowane. Mitaq Píripine nahtapeq kaegaeowane. Eqmaro kega abapete téhtaré wéhuké omaq sitótaq Píripi omaq atówe.\* Píripi Sísa éhweh teri terinu aní míowe.

<sup>9</sup> Wene ayahunkawaréh itaréitaré ítaq ahrárígáu míowe. Manikáne Awanka iwíah aritowara se wene ehweh irarú ahrárígáu míowe.

<sup>10</sup> Itega Sésária suwahpeq kaegaeowanaraq táchmaro wehekáh parabagútaq wehukení wenáwíq Ágábúsaga Súria marákórápéqté tuwe. Manikáne Awanka iwíah atowana wega wene ehweh irarerahúwe.

<sup>11</sup> Wega iteba séna Porane áréti pugeqme mewena minarate wewene aigará ayahnkara táchru táchruúwe. Táchru táchruéna mahraréna, Ínéga táchru táchruunserah Sarúsarama suwahpeqte Asiu kegá mah aréti abo moq táchru táchruigehe. Táchru táchruera nahnsó kebá móatagéhe. Mah ewhéhmé Manikáne Awanka aíq irarire úwe.

<sup>12</sup> Mi ewhéh irahwánaraq itereq mitaq míó kerekka Poransabé, Sarúsarama suwahpeq íre pokúno éq saiqnahwane.

<sup>13</sup> Saiqnahwanana Poraga itensabé, Nirupipeq umehínehboq aneqsabé saiqnéq ibisaho? Karábúsiyabé íre áhreuge. Itene Wahnah Sísane arambehri miraunsabé Sarúsarama suwahpeq nubiq suaneherabowapómo. Anetaníbo úwe.

<sup>14</sup> Anetaníbo úwaq wega itene ehweh íre ironsabe túbah agéq, Maniká awabeh sansá mirainkehe ewane.

### *Poraga Sarúsarama suwahpeq pokú ehwehne.*

<sup>15</sup> Mi tanáhráq parabagúwaq ménsámehnsá sokahueq Sarúsarama suwahpeq pokowane.

<sup>16</sup> Sésária suwahpeqte Sísa tagariáh kék táchmaro kegá ite kie irówe. Wehukení wenáwíq Násónie. We Sáipára marákórápéqté ánínéna íre wahto tanáhráq Sísa tagariowe. Kie iró kega Násónine nahtapeq kaigeheéra móítowe.

<sup>17</sup> Itega Sarúsarama suwahpeq kowanaraq mibeqté Sísa tagariáh kék sirupipeq eyoyóéra mehwéh aitówe.

<sup>18</sup> Mó wehekáh Porareq itereqka Sémísiba pokowanara ómi Sísa tagariáh ábóawáh wéh míowe.

\* <sup>21:8:</sup> Píripinsabé éhwéhmé Eqmaro 6.1-5, 8.5-6,26,40 tagáhno.

**19** Poraga sereq mehwéhéná Sísa éhwéh nahnsó ke moke teriunsabe Manikánka miraú arámbéhri sáhnsahwe teriuwe.

*Aboawah wehwárinká Poransabé, Manikánsabe iwíáh íwíáho nahtápéq pokúno ato ehwehne.*

**20** Poraga miraú arámbéhri sáhnsahwe teriuwara aboawah wehgá írótaq Manikánsabe iwíáh íwíáh atera we anotah aní míre íwíáhuwe. Sega Poransabé, Iteribáq móne. Áhnte, peh íregáritaq Asiu kegá Sísansabé aiq pútare atáhwe. Sega Mósísiga sehgióro ú ehwehnsábé iwíáh íwíáh atáhwe.

**21** Wene ehweh iwíáh íwíáh atáhwara arega miraurona sansámé mó kegá se péhepehe ehwéh teriátowara aiq írátowe.

Mi pehe éhwéh mahraréra, Areaga nahnsó ke míáhrabeqte Asiu keyábé, Mósísiga sehgióro ú ehwehnsábé anetaníbo. Itene aniné áú amurúráhro ú sansánkákáq mó Asiu kené sánsánkákáq íre miraoro teri terinire ewe.

**22** Itega tagarionawe arega aiq sire u ehwéh Asiu kegá iraneherawoe. Minayabe amahnága aneronehnkono?

**23** Aneronehnkono éra sega mó mahraréra, Asiu kega túbáh agigehboq itega teawéna ehwéh miraúno. Mahbeqté itaréitaré wéhükégá Manikánsabe, Itene omasa éhwéh mi-raoneheqmúne teawéwe.

**24** Arereq móso-suagéhboq mi anímári meriqme Manikánsabe iwíáh íwíáh atáh náhtápéq mórito. Titíroneherau ka paiqmaro. Anehe sene siyahra káúqsuagéhe. Mirairataq ómi kegá tagarianeheéra Mósísiga sehgióro ú ehweh anteruahnayabé íre aiq pútare atagéhe. Peh Mósísine ehweh kawerue sehgióne íwíáhigehe uwe.

**25** Sísa tagariáh ábóáwáh wéhgá mó mahraréra, Sísansabé aiq pútare atáh náhnsó ké páhsí iwíáhue sehiranue síátóne. Mi pahsígá mahraréra,

Péhepehe maníkánsábé iwíáh íwíáhoneheéra titirirataq náíra naneq íre nahro. Korahq íre nahro. Wehukenínká awio páríkí náneq ka íre nahro. Mó kené ahrewe ahrariwe wehwe mahbiwe íre abarioiro ire.

Peh miraue iwíáhue sehiranue teriátáune uwe.

**26** Uwana Poraga kowe éna omasa éhwéh miraoneheqmúne u animári móritowe. Mó wehekáh wereq sereqka sosúó sansa áhwárera Manikánsabe iwíáh íwíáh atáh náhúpéq kibekuwe. Sosúó sansa parabagína tanáhráq mibeq mahbeq arítáh ké terieneheéra kibekuwe. Teriera, Mi tanáhráq parabagínaraq itega Manikánsabe iwíáh ateq titironehe uwe.

*Asiu kegá Pora saiqnaruó ehwehne.*

**27** Sosúó sansamé abapete téhtaré wéhékáh parabaginaútaq Esia marákórápéqté Asiu kegá Pora tagowe. We Manikánsabe iwíáh íwíáh atáh náhúpéq míowara tagéra abiahnsanuwe. Sega Pora táhtoqme

**28** nahtapeq míó kega ehwehnabaéra mahraréra, Ísara keo, séhréh aitáhro. Mah anínká ómi mah kehiná kékínánsábé ite Asiu ke íre kaweq ke wóe síwáhnoréna Mósísiga sehgióro ú ehweh anterúáhro ue síwáhnorire. Mah nahnsábé anetaníbo ue síwáhnorire. Wega mó ahababáritéhmé Káríki ke Manikánsabe iwíáh íwíáh atáh náhúpéq móárítéhre. Móárítéh púana wega mah kawéq náhnsábé íre kaweratéhre uwe.

**29** Épésa su wahpeqte ání wenáwíq Tárópímae. Menah Asiu kegá wereq Porareq Sarúsarama su wahpeqte áhtápéq noguyataq tagowe. Mitaq tagonsabe sega péhe íwíáhéra, Poraga Manikánsabe iwíáh íwíáh atáh náhúpéq nahnsó ání meqme surainsabe órira mire uwe. Meqme móátaráire ume péhe éhwéhne.

**30** Minayabe ehwehnabaéra ómiga abiahnsanéra pehbeheráh seyeue sorupera Pora Manikánsabe iwíáh íwíáh atáh náhúpéqté táhtoqme abariuera máhpeq márunatera on-sawári paiqsúówe.

*Aroma sontiá kégá Pora táhtoró ehwehne.*

<sup>31</sup> Segá Pora suboneherautaq Aroma sontiá kéné anotah wahnáhnká ómi Sarúsarama suwahpeqte kégá aiq tobewewe u irowe.

<sup>32</sup> Irena wega apubúue sóntia keákáq sene wahnah animárínkákáq meriqmena pehbeheráh túwe. Túwara Pora subu kegá mi ke tagéra túbáh aguwe.

<sup>33</sup> Sóntia kené wahnahnka Poraba tuena táhtoqme téhtaré séníráté táhraráhro úwe. Táhraráhro éna, We insebo? Aneq ahbábáriro kasenúwe.

<sup>34</sup> Kasenúwara áhnte kegá mío púara ehwehnabaéra mó kegá mó ehwéhnuwara mó kegá mó ehwéhnuwe. Áhnte ehwéhnu puara wega íre kawerue irahráhúnsabe sóntia keyábé, Ite kaegaeo nahupéq móátáhro úwe.

<sup>35-36</sup> Kaegaeo nahupéq kibekoneherautaq se kéró kega paentáwe kéra ehwehnabaéra, Subiq súáhro. Subiq súáhro uwe. Subiq súáhro unsabe Pora subíyehoéra sóntia kegá we sawiwera nogúwe.

*Poraga Asiu ke we éhweh teriu ehwehne.*

<sup>37</sup> Segá we nahupeq móataneherautaq Poraga Káríki ehwéhtáq sóntia kené wahnahnsabé, Ehweh teawinínkono kasenúwe. Kasenúwana mi anínká éhnehéna, Are Káríki ehwéhmé aiq írátiahne éna,

<sup>38</sup> Menah peh morá Ísípi marákórápéqté áninká kámáhni ke ebehinkeheéna áhnte ke 400 subiq suahráhro ke meriqmena uworapeq pokuraire. Íné iwíáhume, Arewe we wone íwíáhuge úwe.

<sup>39</sup> Úwana Poraga, Íné Asiu aní múge. Íné Sírisía marákórápéq Tahsa suwahpeqte ání múge. Tahsa suwahpeq áhnte nahnsó ké míáhwe. Íné mahtaq míáh ké ehweh terinie úwe.

<sup>40</sup> Úwana, Terio únsabe Poraga awahsahniataq méwotate irigéna mío kega ehiyansá agigeheéna ayahnkaratáté saiqnówe. Saiqnówara túbáh aguwana Poraga Asiu kené ehwehtaq mahraréna,

## 22

<sup>1</sup> Nánibáqmari móe. Nániboreh wóe. Nánuwahraho, néne ehweh íráhro. Íné íre ahbabáq anine ue iahtebagehboq néne ehweh íráhro úwe.

<sup>2</sup> Wega Asiu kené ehweh irarúwara irera ehiyansá aguwe.

Ehiyansá aguwana Poraga mahraréna,

<sup>3</sup> Íné Asiu aní múge. Nánoga Sírisía marákórápéq Tahsa suwahpeq maqinténa Sarúsarama suwahpeq méintowana mahtaq anonúkowae. Anotah síwáhnori aní Kámáriaga iteriborehne sansá irankeheéna kawerue níwáhnoruraire. Ibora itega Manikáne arambéhri mira onserah ínéga moq mira aruqarururauge.

<sup>4</sup> Menah ínéga Sísansabé aiq pútare atáh ké pukigeheéna síwíognarauge. Weh ahre táhtoqme táhru táhruena karábúsiipéq móritárauge.

<sup>5</sup> Manikáne ehweh mibeq mahbeq arítáh kéné wahnahnseq aboawah wehreqka minayabe tagéra teieráhowe. Segá Támákása suwahpeqte Asiu ke páhsí sinkeheéra sehiranue níátówe. Íné Támákása suwahpeq pokurauge. Mibeqté Sísa tagariáh ké táhru táhruue Sarúsarama suwahpeq móritanieéna pokurauge. Se kamah ariníe íwíáhurauge úwe.

*Poraga íópeqté téreh naneq tagónsabe teriu ehwehne.*

(Eqmaro 9.3-19, 26.12-18)

<sup>6</sup> Poraga mó mahraréna, Íné ahtapeq pokue Támákása suwahpeq kinaurauge. Kinaurugana wéhékáhnabubu íné kuraurabeq apubúue íópeqté anotahtaq téhraguraire.

<sup>7</sup> Téhragurairana marakóipeq márunsurahéna ehweh írátáuge. Mi ehwéhnká mahraréna, Sorao, Sorao, aneqsabé níwíognahno uraire.

<sup>8</sup> Urairana ínéga, Anotah aníno, are insebo urauge. Uraugana wega ínénabe, Íné Sísá Néhsara suwahpeqte ání arega níwíoqnáhna aní múge uraire.

<sup>9</sup> Íné sénító kegá téhragurai tagéra peh teniátái ehwéh íre írátówe.

<sup>10</sup> Ínéga, Néne Wahnahno, anerininkono kasenurauge. Kasenuraugana wega ínénabe, Irigue Támákása suwahpeq pokúno. Mitaq arega moke miraina arámbéhrí teawiníe uraire.

<sup>11</sup> Anotah téhrarainsabé íné íre tagahrahurauge. Íre tagahrahurau puara íné sénító kegá niyahtaq ahmboqmera Támákása suwahpeq móíntárówe úwe.

<sup>12</sup> Poraga mó mahrrárena, Mibeqté ání wenawíq Ánáníásie. We Mósísiga sehgóro ú ehweh kawerue írátái aníne. Moke wenawahrah Asiu kegá, We aiq kaweque aníne íwíáhuwe.

<sup>13</sup> Ánáníásiga ínéba séna iriwe ména ínénabe, Sorao, nánibáq móne. Arege tagahrahóne urairana niura apubúue kaweragurairana we tagarauge.

<sup>14</sup> We tagaraugana wega ínénabe, Itene igaqnarehne Manikánka wene sánsá ahtebankeheéna are omaq atéhre. Wene kaweque ahnínkáwá tagé wene ehweh irankeheéna are omaq atéhre.

<sup>15</sup> Arege wene ehweh ómi kehinánsábé terinkéhe. Arege tagé írátóna ehwéh terinkéhe.

<sup>16</sup> Amahnága túbáh aginehboq iriwe mé wání meyo. Arene ahbabáq kaqauwankéhboq Sísansabé áhrabúno uraire úwe.

### *Manikánka Poransabé, Nahnsó ke néne ehweh koreroio ú ehwehne.*

<sup>17</sup> Poraga mó mahrrárena, Íné Sarúsarama suwahpeq seuwekurauge. Mibeqté Manikánsabe iwiáh iwiáh atáh náhúpéq púrerurautaq néniwanka

<sup>18</sup> Sísá tagarauge. Tagaraugana wega ínénabe, Mahtaqté kégá arene ehweh íre aiq pútare atéhra puah Sarúsarama suwahpeq apubúue sue móbeq pokúno uraire.

<sup>19</sup> Urairana ínéga wensabé, Néne Wahnahno, Asiu kené momiwí nahmárítápéq arensabé aiq pútare atáro ke subiqme karábúsiipéq sítaráuge. Minayabe mahtaqté kégá tagariáhwe.

<sup>20</sup> Sítibéni arene ehweh teríátái anímé Asiu kegá ebahnsatate subítotaq ínéga wahtotaq iriwe ména we pukime aiq kawerire éna subító kené káhq ambántámárítáq wahnahnurage teawátáuge.

<sup>21</sup> Teawátáugana wega ínénabe, Nahnsó suwahpeq íre wahto marákórápéq eqmaraníe. Arege nahnsó ke néne ehweh korérinkéhboq pokúno teniátáire úwe.

### *Aroma wahnáh áninká Poransabé kasenú ehwehne.*

<sup>22</sup> Poraga teriu ehwéh sega kawerue írówe. Írówana Poraga nahnsó keyábé irarútaq sega ehwehnabaéra mahrrára, We oga míéhmé anotah íre kawerire. Subiq súáhro uwe.

<sup>23</sup> Porane ehweh íre suwahbó púara sega ehwehnabaéra sene ambantamarí ugurue tuperúpeéra tanahuqkakaq mewe tuperúpeuwe.

<sup>24</sup> Segá mirauwana sóntia kené wahnahnka, Mi aní nahupeq móátáhro úwe. Móátáhro éna, Asiu kegá aneqsabé abiahnsanéra áhnte ehwéhnoo iwiáhúwe. Iwiáhéna, Teninkéhboq mah aní áréti sahtáté subóro aritowe.

<sup>25</sup> Segá we subiqmaraneheéra wene aiayah táhru táhruuwana Poraga weba wahtotaq iriwe mío wahnáh áninsábé, Íné Aroma aní múge. Aneqsabé ehweh íre aintasa pehipi nuboneheo? Mi sansá aiq mirao sansánoo úwe.

<sup>26</sup> Úwana kíápéténiga irotaq anotah wahnáh ánípá pokue wensabé, Itega suboneheú aní Aroma aní míéhnsábé anerinibo úwe.

<sup>27</sup> Úwana wega Poraba séna wensabé, Are Aroma anípo? Tenio úwana, Kowe úwe.

<sup>28</sup> Kowe úwana anotah wahnáh áninká wensabé, Íné áhnte moné paiqmataunsabé Aroma aní úkurauge úwe. Úwana Poraga wensabé, Nánoga maqintotaq Aroma aní maqintowe úwe.

**29** Úwara Pora suboneherau kegá irera apubúue auwera peh tagowe. Anotah wahnáh áninká iwíáhena, Mah aní Aroma aní míéhrana táhru táhruéwómé íre kaweruge. Íre kaweruge éna wega moq áhreúwe.

*Poraga momiwíurió ke teriu ehwehne.*

**30** Áhreéna arupipeq iwíáhena, Asiu kegá aneqsabébópoq we ehweh atáhwe. Iraníe iwíáhena mó wehekáh wega, Pora táhraró nahgáq pugeq áuwáhro aritena, Manikáne ehweh mibeq mahbeq arítáh kéréq mó kaunsíri kéreqsabé, Momiwíoro aritowe. Momiwíoro aritena, Pora meqme momiwíurabeq móátáhro aritowe.

## 23

**1** Poraga kaunsíri ke ebitáwéna mahraréna, Nánuwahraho, Manikánka nirupipeq tagariéhre. Menahnkákáq amahnágaákáq kaweqtaq mía míauge úwe.

**2** Peh morá wáhnáh ání Ánáníásiga Manikáne ehweh mibeq mahbeq arítáh ké wah-nahnúwe. Wega Poraba iriwe mío keyabé, Wene áwéh suranóro aritowe.

**3** Aritowana Poraga wensabé, Awisúitagi wirá áwánká taberábe pentí abaq máráhwara awisúitagi awánká íre tagahrahewe. Mina inserah are kaweq ambántá úbíq miahnawe arene arupipeq peh awisúitagi wirá áwánká tahnsane. Arega íné áwéh suranóro aritah-naga Manikánka are mina tahnsaninkehe. Arega mitaq tútue Mósísiga sehgóro ú ehweh iwíáhé ehweh aintahne. Minayabe aneqsabé níwéh suranóro aritahno? Miraónaga Mósísine ehweh aiq anteruahne úwe.

**4** Úwara Poraba iriwe mío kega wensabé, Manikáne ehweh mibeq mahbeq aitáh kéné wahnahnsabé aneqsabé ehweh atahno uwe.

**5** Uwana Poraga sensabé, Manikáne ehwehnka mahraréna, Itene wahnahnsabé abehq éhwéh atéhneho ire. *(Kisim Bek 22.28)*  
We Manikáne ehweh mibeq mahbeq aitáh kéné wahnah tagariótáq tahirímé mi ehwéh íre iraru irino úwe.

**6** Kaunsíri kewé mó akáhtáq Sáyúsi ke míowara mó akáhtáq Péhrasi ke míowe. Minayabe Poraga se tagéna iwíáhue momiwíuriabeqte kékabé anotahtaq mahraréna, Nánuwahraho, íné Péhrasi aní múge. Nániboreh Péhrasi kené sásá mirau ke míowe. Manikáne omasa éhwéhnsabé aiq pútare atena wega mókake pusa ké organúq sitankéhe iraruraunsabé ehweh aintahwe úwe.

**7** Péhrasi kegá mó iwíáhuwara Sáyúsi kegá mó iwíáhuwe. Íre morá íwíáhunsabé seye ehwehuwe.

**8** Péhrasi kegá iwíáhéra, Mókake Manikánka pusa ké organúq sitankéhe. Segá íopeqté kéréq Maniká míéhrabeqte kéréqsabé aiq pútak míáhwe iwíáhuwe. Sáyúsi kegá minayabe íre aiq pútare arítówe. Segá iwíáhéra, Manikánka pusa ké íre organúq sitanawire iwíáhuwe. Minayabe se mó iwíáh mó iwíáhu puara seye ehwehuwe.

**9** Anotah ehwéhutaq táhmaro Péhrasi sansá síwáhnoro kegá iriwe méra mahraréra, Itega iwíáhúnawe mah anímé íre ahbabáq anine. Íopeqté ké, Maniká míéhrabeqte kégá ehweh teawátowapómo. Itewe íre tagariahrahúne uwe.

**10** Unsabe seye áhnte ehwéhnaunsabe sóntia kené wahnahnka, Asiu kegá Pora abariwe subiyeho iwíáhena, Sóntia keyabé, Mi aní tutáhtoqme sabiwe meqmeq itega kaegaeorabeq móátáhro aritowe.

**11** Mó penórábéq Sísaga Poraba sebatawe ména wensabé, Íre áhreúno. Íné éhweh arega Sarúsarama suwahpeq teríátónanserah mókake Aroma suwahpeq moq terinkéhe úwe.

*Asiu kegá, Pora subiq suaneheqmúne u ehwéhne.*

**12** Mó wehekáh Asiu kegá sío síoéra moráénéra, Manikánka tagariéhre. Wáninkakaq táhutahuqkakáq pehipí íre naneheqmúne. Ebeq Pora subiq sueq anehe táhutahuq nanehe uwe.

**13** Áhnte weh 40 wehgá miraue sío síoéra moráénue iwíáhuwe.

**14** Segá Manikáne ehwéh mibeq mahbeq arítáh kéréq Asiu kené aboawah wehreqpa pokue sensabé teriera, Manikánka tagariéhre. Itega wánínkakaq táchutahuqkakáq pehipi íre naneheqmúne. Ebeq Pora subiq sueq anehe táchutahuq nanehe.

**15** Minayabe itereq mó kaunsíri kéréqka sóntia kené wahnahnsabé péhe éhwéh mahrarero. Mahraréq, Itega Pora éhwéh tábúsoqme iranéhboq iteba meqme súno ero. Itega ahtapeq wahnhnurawéq wega sinaraq suboneheqmúne uwe.

**16** Uwana Porane anahnowáné ahninkáwágá mina mehwaró ehwéh irowe. Irena sóntia kegá kaegaeurabeq kibekue Pora teawuwe.

**17** Teawuwana Poraga kíápéténinsabé áhrabéna mahraréna, Mah mahbígá arene wahnah aní ehwéh teawinkéhboq meqme móato úwe.

**18** Úwana wega meqmena anotah wahnáhpá móatena wensabé mahraréna, Mah mahbígá ehwéh teawinkehéna meqmena suge. Karábúsiipéqté aní wenawíq Poraga níáhrabue we meqme areba móato teníre úwe.

**19** Úwana anotah wahnáh áninká mahbine ayahtaq panantáwe meqmena kopípéq mógasenúwe. Kasenéna, Aneq éhwéh teniníbo úwana

**20** mahbiga wensabé, Asiu kegá moráénewáhwe. Segá arensabé, Ahbiah Porawe kaunsíri kebá meqme súno teawigéhe. Pora éhwéh tábúsoqme iranéhboq iteba meqme súno teawigéhe.

**21** Minayabe aiq pútare arítéhnehboq 40 kegá mehwatíáhwe. Segá aiq mahraréra, Manikánka tagariéhre. Itega wánínkakaq táchutahuqkakáq pehipi íre naneheqmúne. Ebeq Pora subiq sueq anehe táchutahuq nanehe ewe. Segá amahnága sokah sokahue míáhwe. Peh arene ehwehnsabé áwénunowe úwe.

**22** Úwana anotah wahnáhnká mi mahbíyábé, Arega tenienawe mó ke teríneho. Pe-hwehrue pokéwahno éna eqmaq auwowe.

### *Pora kámáhni wahnáh aní wenawíq Péríkiba móato u ehwéhne.*

**23** Eqmaq auwena téhtaré kíápéténi síáhrabúwe. Síáhrabéna sensabé, Inokáhpeq wehuke sugé tanahráq Pora Sésária suwahpeq meqmeta móátáhtao. Áhnte sontía ké 200 sontía kéréq 70 oségá káhkóawíah sóntia kéréq mó áhnte 200 sehsabekara matiáh sóntia kéréq sokah sokah arítáhtao.

**24** Pora moq óseraq tútuue míahnaraq anotah wahnáh aní Péríkiba kawerue meqmeta móátáhtao úwe.

**25** Móátáhtao éna Péríkine páhsí sehiranue mahraréna,

**26** Péríkio, are anotah kawéq wáhnáh aní móne. Íné Káróríúsa uge. Mó niwíqmé Árísíasa uge. Néne páhsí sáhnsahwe tagáhno.

**27** Asiu kegá mah aní táhtoqme subítotaq we Aroma aníne urairana írátáuge. Írátáútaq ínéreq sóntia kerekka pehbeheráh tueq tumetáune.\*

**28** Wega aneq ahbabárapómo éna iranieéna sene kaunsíri kebá móátaráuge.

**29** Segá seyene sánsánsabé ehwéh atówana wega íre anotah ahbabárire. Mi ahbabáqmé íre suboráhi ahbabáq míre. Íre karábúsiipéq móatahráhi ahbabáq míre.

**30** Asiu kegá mah aní suboneheqmúne uro irena apubúue areba eqmaq áuwóge. Wensabé ehwéh atáh kékabé areba pokue mi éhwéh koreawéro atóge úwe. Páhsíipéqté éhwéhniká aiq irarúwe.

**31** Sene wahnhnka teriunserah sóntia kegá Pora meqmera inokáhpeq Ántípáti suwahpeq móátówe.

**32** Mó wehekáh óseakáq kégá Pora meqmera Sésária suwahpeq pokuwe. Pokuwara mó sóntia kégá sene nahtapeq tuekuwe.

\* **23:27:** Eqmaro 21.30-33, 22.25-27, 24.7 tagáhno.

<sup>33</sup> Tuekuwara óseakáq sóntiá kégá pokue Sésária su wahpeq kéra anotah wahnáh ání Péríkiba Pora móatera páhsikáq móátówe.

<sup>34</sup> Móátowana wega páhsí sáhnsahena Poransabé, Are eheqte ánipo kasenúwana, Íné Sírisía marákórápéqté ání múge úwe.

<sup>35</sup> Úwana, Arensabé ehweh atéhra ke túírataq arene ehweh iraníe úwe. Wega sóntia keyábé, Érotine anotah nahtápéq ateq mitaq wahnahnoro aritowe.

## 24

### *Asiu kegá Pora ehweh ató ehwehne.*

<sup>1</sup> Manikáne ehweh mibeq mahbeq arítáh kéné wahnah wenawíq Ánáníasie. Moberiáh wéhékáh parabagútaq wereq táhmaro Asiu kené aboawah wehreqka peh morá págegeue ehweh aritahráhi ání wenawíq Tétúra meqmera túwe. Sega Aroma kené anotah kamáhní ání Péríki Pora éhweh teawanehe úwe.

<sup>2</sup> Péríkiga, Pora meqmeq sero úwara meqmera móátówe. Móátowana Tétúraga mahraréna, Péríkio, are anotah kawéq wáhnáh ání móne. Arega wahnahnónayabé ite Asiu ke pehwehrue mía míorahúne. Arega kawerue iwíahónawe séhréh aitaníe é itene marakó kaweraitahne.

<sup>3</sup> Minayabe itega iwíah íwíah ateq kaweróne atone úwe.

<sup>4</sup> Tétúraga mó mahraréna, Áhnte ehwéh íre irarinie. Pehgáriq ehwéh teawiníboq iro.

<sup>5</sup> Ite iwíahúnawe mah anímé ahbabáq aruqaruri aníne. Wega mah marakó mårákóípéq mó ke su wahpeq mó ke su wahperue Asiu keyábé pagu pagunurairara áhnte kegá tobéhéra ebehowe. Wega itene sánsá suena Néhsara su wahpeqte áníné sánsá meyáh ké wahnahnire.

<sup>6</sup> Wahnahnéna wega Manikánsabe iwíah íwíah atáh náhtápéq íre kawerina uraitaq itega táhtotiarau. Itene sánsá anterutainsabé ehweh ateq parabaruanehe íwíahuraune.

<sup>7</sup> Iwíahuraunaraq itega Pora ehweh atanéhe uraunaraq sóntia kené wahnah wenawíq Árísásarehga tuera ite págegeue iubera Pora meqmera móbeq móátárówe. Árísásaga itensabé, Pora ehweh atagéhboq anotah ání míéhrabeq pokue mitaq ehweh atáhro uraire.

<sup>8</sup> Moke ehweh atéhra ehwéhnsábé wewega teawinkéhboq kaseninanao úwe.

<sup>9</sup> Úwara moke wereq su Asíú kégá wega irarú ehwéhnsábé kowe atera mi ehwéh aiq pútaq ehwéhne atówe.

### *Poraga Péríkinsabé we éhweh teawu ehwehne.*

<sup>10</sup> Poraga ehwehninkeheéna anotah kamáhní áninká ayahnkaratáté saiqnówe. Saiqnówana Poraga wensabé, Itene marakórapeq arega áhnte opéq wahnahnurone. Mina tagaríónsábé pahsuqme teawiníe.

<sup>11</sup> Ínéga Sarúsarama su wahpeq Manikánsabe iwíah íwíah ataníeána kowíaraugana peh airápété téhtaré wéhékáh parabaguraire. Mó kegá mi ehwéh aiq pútaq ehwéhne teawigéhboq kaseninanao.

<sup>12</sup> Mi ke su wahpeq íné íre ehwehéná mó ke íre pagu pagunurauge. Manikánsabe iwíah íwíah atáh náhúpéqkákáq Asiu kené momiwí nahtápéqkákáq máhpeqkakáq peh túbáh agurauge.

<sup>13</sup> Segá ehweh aintáhnsábé íre sokigi aintahráhowe.

<sup>14</sup> Pahsuqme teawiníboq írátíahno. Segá Sísane sánsámé íre su wahbeh puara áwáhnáh sánsáne ewe. Mi sansámé ínéga sehígíuge. Miraunsabé itereq itene igaqnáréhreqne Manikánsabe iwíah íwíah atóge. Mósísine ehwehnkakáq Manikáne ehweh iraru kené ehwehnkakáqsábé aiq pútare arítóge.

<sup>15</sup> Mókake Manikánka moke pusa kewé kaweq kereq ahbabáq kereq iriritankéhe. Ehweh aintáh kereq ínéreqka minayabe iwíahue áwénunúne.

**16** Íné kaweqtaq méyabe nuwahbehre. Manikánseq ómi wehukéreqsabé íné íre ahbabárarítónsábé nirupipeq eyoyóire úwe.

**17** Poraga mó mahraréna, Táhmaro opéq nahnsó kené marakórapeq ména nánuwahrahba seuwekurauge. Tabonah Asiu ke móne nárinieéna seuwekéna Manikánsabe iwíáh iwíáhue nawinieéna seuwekurauge.

**18** Itega sosueq mirauraunaraq sega Manikánsabe iwíáh iwíáh atáh náhtápéq ite tagarowe. Íre áhnite ke ínéba míarowana pehwehribeq míaraugara

**19** Esia marákórápéqté Asiu kegá tagarowe. Tagarowana ínéga ahbabárurautaq tahirí sega aneqsabé areba íre séra ehweh aintáh iripo?

**20** Ínéga kaunsíri ke ehwéh teriátáugara areba suro kegá íratíarowe. Ahbabárurautaq tahirí sega teawé irino.

**21** Se momiwúrorabeq peh morá éhwéh iraruraunsabé sega, Íné ahbabáruraire iwíáhurowamo. Mi tanáhráq ínéga anotah ehwéhnue mahraréna, Manikánka pusa ké iriritankéhe. Ínéga mira iwíáhunsabé ibora itega ehweh aintáhwe urauge úwe.

**22** Úwana Péríkiga irena Sísansabé aiq pútare atáh kéné sánsá ahrebonsabé, Pehitare aritowe. Pehitare aritená sensabé, Anotah sontiá kéné wahnah aní Árísásaga mahtaq tuinaraq itene koti ehwéhnsábé iwíáhue teiníe úwe.

**23** Teiníe éna wene kíapéténinsabé, Pora kawerue wahnahnato. Pehwehrue wahnúnno. Wene iyahnabo anímárinká séhréh ataneheéra ménsámehnsánkakaq túírataq íre ahqáho arito úwe.

### *Pora téhtaré ópéq karábúsiipéq mío ehwéhne.*

**24** Táhmaro mó wehekáh parabagúwana Péríkiga wene ahre wenáwíq Tárúsíra meqmena súwe. Wene ahre Asiu iní míowe. Wega, Pora meqme súno atowana móatowana Poraga Sísansabé aiq pútare ate ehwéh teriuwe.

**25** Poraga kaweqtaq méyabewé tabasíwe méyabewé Manikánka mókake ómi kehinánsábé ehweh aritahnayabewé irarúwe. Irarútaq Péríkiga áhre agéna mahraréna, Pehitare. Amahnágá pokúno. Mókake ahwimi íre kahnaraq mó áhrabinie úwe.

**26** Péríkiga iwíáhéna, Pugeq auwahnana Poraga móne náninabomo iwíáhúwe. Mira iwíáhúnsabé wega mó wehekáh mó wehekáhnue Pora meqme súno atowana Pora weba súwe. Wereq Porareqka ehwehnaruqaruruye.

**27** Asiu kegá wensabé kaweróne atageheéna Péríkiga Pora íre pugeq auwowana peh téhtaré ópéq karábúsiipéq míowe. Mi tanáhráq parabagúwana mó anínká Péríkine wahnah árámbéhrí meyowe. Mi aní wenáwíqtare Pósíúsa Pésátae.

## 25

### *Poraga, Anotah wahnáh ání Sísáhriba pokinie ú ehwehne.*

**1** Pésátaga Sésária suwahpeq wahnahné arámbéhrí awaq mianieéna mitaq súwe. Apahtáróráq mitaq ména suena Sarúsarama suwahpeq pokúwe.

**2** Mibeqté Manikáne ehweh mibeq mahbeq arítáh kéné wahnahnseq mó anotah Asiu kereqka Pésáta Poraga ahbabarurai ehwéh teawúwe.

**3** Segá moráénéwéra, Pora subonéhboq ahtapeq mehwaranéhe iwíáhuwe. Mira iwíáhunsabé sega Pésátansabé, Pora mahtaq Sarúsarama suwahpeq ehweh atanéhboq meqmeq sero arito uwe.

**4** Uwana Pésátaga sensabé, Pora Sésária suwahpeq karábúsiipéq míéhre. Mibeq áhníbórá pokinie.

**5** Minayabe ite míonarabeqte anotah kegá séniragéhe. We ahbabáq kahnaraq mitaq ehweh atagéhe úwe.

<sup>6</sup> Wega sensuwahpeq abapete apahtáró wéhékáhpópoq nayáhnkú wéhékáhpópoq mitaq ména suena Sésária suwahpeq pokúwe. Pokéra mó wehekáh wega wahnahnúrabeqte náhúpéq tútuue ména, Pora koweqme sero aritowe.

<sup>7</sup> Poraga sútaq Sarúsarama suwahpeqte su Asíú kégá seabugéqnáhnue iriwe míowe. Iriwe méra, Wega mira ahbabárire éra áhnte ehwéh atówe. Sene ehwehme aiq pútaq ehwéh íre sokigi aweráhuwe.

<sup>8</sup> Ehweh attówana Poraga mahraréna, Mósísiga sehgíoro ú ehwehnkákáq Manikánsabe iwíáh íwíáh atáh náhtápéqkákáq íre ahbabárarítáráuge. Itene anotah wahnáh Sísáhri moq íre ahbabáratáráuge úwe.

<sup>9</sup> Úwana Pésátaga Poransabé, Asiu kegá ehweh aintagéhboq Sarúsarama suwahpeq ínereq arereq pokéyabe awahbehro úwe. Pésátaga Asiu kené sirupipeq eyoyó aritanieéna mi ehwéh irarúwe.

<sup>10</sup> Úwana Poraga wensabé, Ahqáho. Íné Asiu keyábé íre ahbabárarítáráume tagariahne. Minayabe ite Aroma kené anotah wahnáhné koti arítáh náhtápéq míoge. Mahtaq ehweh parabaruo.

<sup>11</sup> Íné pukorahu sansá íre miraurauge. Miraurautaq tahirímé íné nubiq suo teawú irino. Segá ehweh aintáhmé íre aiq pútarowe. Minayabe arega íné Asiu kebá íre móintahráhóne. Aroma wahnáh ání Sísáhri íné éhweh teawenana wewega iwíáhue tagankehe úwe.

<sup>12</sup> Úwara Pésátareq weba mía míau ahtébíá kéreqka só síoéra iwíáhuwe. Pésátaga Poransabé, Sísáhri íné éhweh teawenana iwíáhue tagankehe énayabé weba pokinkehe úwe.

### *Ágárípaga Pora éhweh iro ehwéhne.*

<sup>13</sup> Táhmaro mó wehekáh parabagútaq mó marákórápéqté wáhnáh ánínseq wenanah-noreqka Sésária suwahpeq suye. Wahnah aní wenáwíq Ágárípae. Anahnowá áwíq Pénáisie. Segá Pésáta mehweh atayeheéra suye.

<sup>14</sup> Segá táhmaro wehekáh weba míoyana Pésátaga Pora éhweh Ágárípa teawuwe. Teawena Ágárípansabe mahraréna, Péríkine arambehri merautaq wehukení karábúsiipéq míáraire.

<sup>15</sup> Íné Sarúsarama suwahpeq míarautaq Manikáne ehweh mibeq mahbeq arítáh kéné wahnahmarínseq Asiu abóáwáh wéhreqka we éhweh teniátówe. Teniera mahraréra, Itega we naho aiq ehweh ataráúnayabé itene ehweh iro. We subiq suo teniátówe.

<sup>16</sup> Teniátowana ínéga ahqáho aritená sensabé, Ite Aroma kegá wehuke pehipi íre subiq suahráhúne. Ebeqme we ehweh átah ké míáhrabeq wene ahbabáqsabe ehwehninkehe urauge.

<sup>17</sup> Asiu kegá we ehweh ataneheéra ínéba tutotaq íné íre túbáh agurauge. Mó wehekáhtaq mi ehwéh iranieéna wahnahnuraubeqte náhúpéq tútuue ména, Pora koweqme sero arítáráugara koweqme surowe.

<sup>18</sup> Wega aneq ahkárágárá urairo íwíáhuraugara wensabé ehweh atáró kegá irigéra íre mi ehwéhnia peh mó ehwéh irare atárówe.

<sup>19</sup> Peh seyene sánsásábé ehwehurowe. Poraga, Putiarai aní wenáwíq Sísa oga míéhre urainsabé wereq sereq ehwehuwe.

<sup>20</sup> Mi ehwéhmé íre niahteboge. Aneq ehwéhpómo? Árahue kaweraritaníkono íwíáhuraugae. Iwíáhuraunsabé ínéga Pora kasenéna, Sarúsarama suwahpeq pokue mitaq mah ehwéh kobarabuaranéhkono urauge.

<sup>21</sup> Uraugana Poraga, Ahqáho. Aroma wahnáh ání Sísáhri íné éhweh teawenana wega iwíáhue tagéna teinkéhe ureaire. Urainsabé, Ínéga eqmaq auwahráhonaraq Sísáhriba pokinkehe. Amahnága karábúsiipéq míahno atáráuge úwe.

**22** Úwana Ágárípaga Pésátansabé, Ínénéga mi aníné ehweh iraníe úwana, Ahbiah arega irankéhe úwe.

**23** Mó wehekáh Ágárípareq wenanahno Pénáísireqka wahnah aníté táchnsá siwahriruera suye. Sereq sóntía kené wahnahnseq anotah wehwárínseqka momiwí nahtápéq kibekuwe. Kibekuwana Pésátaga, Pora koweqme sero úwana koweqme suwe.

**24** Pésátaga mahraréna, Ágárípareq ómi itereq momiwíúna kerero, mah aní tagahro. Moke Asiu kegá Sarúsarama suwahpeqkakáq mahtaqkákáq mah anínsábé teni teninurowe. Segá ínénsabe, Mi aní anotah ahbabáq ání púah subiq suo ato éra pagu pagu-naintárówe.

**25** Ínéga we kasenue tagéna pukorahi ahbabáq íre tagarauge. Wega, Aroma wahnáh ání Sísáhri íné ehweh teawenana wewega iwiáhue tagankehe uraire. Urainsabé ínéga weba eqmaraníe iwiáhurauge.

**26** Mah anínsábé kasenue tagéna wene ahbabáq íre tagaraunsabé Sísáhrinsabé aneq ehweh páhsipéq sehiranue teawinínkono? Minayabe wene ehweh irageheéna iteba móátóge. Ágárípao, wene ehweh iro. Itene anotah wahnáh Sísáhri wene ahbabáqsabe páhsí sehiraniniboq itega mah aní kasenoro.

**27** Karábúsiipéqté ání mó wahnáh ánípá pehipi eqmaq áuwéhnayabé íre kaweq sansáne. Minayabe wene ahbabáqmari sehiraninie úwe.

## 26

### *Poraga we éhweh Ágárípa teawu ehwehne.*

**1** Ágárípaga Poransabé, Are éhweh teio úwe. Úwana Poraga ayah pankeqme mahraréna,

**2** Ágárípao, are anotah wahnáh ání móne. Íné ehweh teawenayabé nirupipeq eyoyóire. Asiu kegá áhnte ehweh aintárónsabé amahnága tábúsoqme teawiníe.

**3** Arega moke Asiu kené sánsánkákáq sene ehwehnkakáq aiq ahtebáhne. Minayabe arega néne ehweh irahnayabé nirupipeq eyoyóire. Kawerue iwiáhinkehboq pehwehrue mé iro úwe.

**4** Poraga mó mahraréna, Ómi Asiu kegá Sarúsarama suwahpeq miraurau sansá tagaríáhwe. Íné animai míáhwataq nánuwahrah míórabeq miraowa sansá tagaríáhwe.

**5** Péhrasi kegá mirau sansá anotah pagégé sánsáne. Íné Péhrasi aní ména mi sansá kawerue miraurauge. Minayabe Asiu kegá tagaríáhwe. Mi ehweh teaweyabe suwahbehtaq tahirímé sega aiq teawé irino.

**6** Naho naho Manikánka itene igaqnaráhyabe áhnte kawéq éhwéh teriuwe. Ínéga mi ehwéhnsábé aiq pútare atóge. Aiq pútare atena áwénunuraunsabé mó kegá ehweh aintárówana amahnága mahtaq míóge.

**7** Airápété téhtaré iteruwahrah kahnáhnká inokáhpeqkakáq wéhékáhnkakaq Manikánsabe iwiáh iwiáh atáhwe. Segá kawerue iwiáh iwiáh atera, Manikánka omasa éhwéh sehginawire éra áwénunuwe. Ínéga moq miraue áwénururauge. Minayabe Asiu kegá ehweh aintárówe.

**8** Manikánka pusa ké iriritéhnsábé aneqsabé íre aiq pútare ataho úwe.

**9** Poraga mó mahraréna, Ínéga menah Sísa, Néhsara suwahpeqte ánínsábé aiq pútare atáh ké síwíognanauge iwiáhurauge.

**10** Iwiáhéná Sarúsarama suwahpeqte Sísa tagaríáh ké síwíognarauge. Manikáne ehweh mibeq mahbeq arítáh kéné wahnah kegá, Miraúno aintárówana Sísa tagaríáh ké karábúsiipéq sitáráuge. Se subiq suanéhe iwiáhurowana miraoro arítáráuge.

**11** Sísa tagaríáh kegá sene sánsá suera Sísanabé íre kaweq ehweh atageheéna ínéga moke Asiu kené momiwí nahmáritápéq anotahtaq kamah ariena síwíognarauge. Anotah abiáhnsá aritena wáhnaupéqté ké suwahpeqkakáq pokue síwíognarauge úwe.

*Poraga Sísá tagó ehweh Ágárípa teawu ehwéhne.  
(Eqmaro 9.3-19, 22.6-16)*

**12** Poraga mó mahraréna, Ínéga mirauraunsabé Támákása su wahpeq pokinie íwíahurauge. Iwíahuraugara Manikáne ehweh mibeq mahbeq arítáh kéné wahnah anímárinká, Kaweróne éra, Komiraúno aintárówe. Komiraúno aintárówana ahtapeq pokurauge.

**13** Pokuraugana wéhékáhnabubu íópeqté anotahtaq téhraguraire. Mi tehrehme pópoqnah kiotaqme téhrarairana tagarauge. Ínéreq ahtapeq sénító kereq míaraunarabeq téhraguraire.

**14** Anotah téhraguraitaq moke itega marakóipeq márunsurahuraune. Íbaru ehwéh, Asiu kené ehwehnka iraréna, Sorao, Sorao, aneqsabé níwíoqnahno? Kirusa séhíkárátáq are peraq míáhnana érinserah amahnága arere érire uraire.

**15** Urairana ínéga, Anotah aníno, are insebo uraugana wega, Íné Sísá arega níwíoqnáhna aní mûge.

**16** Iriwe míahno. Arega néne arambehri mirainkeheéna areba tuena omaq atóge. Amahnága tagáhna naneqkakáq mókake sokigi awéna naneqkakáq teri terininkehe.

**17** Nahnso kebá eqmaraníe. Mókake ínéga are séhréh atáhnaraq sereq Asiu kereqka íre subiq suagéhe.

**18** Nahnso kegá sirupipeqté síúrá ebiqme tagéra sunkíkírabeqte sánsá suera téhrehrabeqte sánsá miraigehboq kosíwáhnorúno. Owainawane págege sansá suera Manikáne ahtapeq nogigéhboq kosíwáhnorúno. Segá arene ehweh íréhrataqmé sene ahbabáq kaweraritaníe. Kaweraritena sensabé, Ite ínénabe aiq pútare aintáh púana ínéga omaq itó ánímári míáhwe aitaníe urairana íratáuge úwe.

*Poraga Ágárípa wene arambehriyabé teawu ehwehne.*

**19** Poraga mó mahraréna, Ágárípao, are anotah wahnáh ání míahna puah néne ehweh iro. Sísaga íópeqté teniátái ehwéh íre anterúóge. Írakaumo.

**20** Téhwe Támákása su wahpeq síwáhnorurauge. Síwáhnoréna mitaqté kényábé, Itene ahbabáq sansa sueq Manikánsabe áhraboro. Áhrabirataq mó ahbabáq pehragéq peh kaweetaq méq wene arambehri miraoro. Mirairataq mó kegá itene ahbabáq sansa aiq pútaq sutowe íwíahigehe urauge. Anehemé Sarúsarama su wahpeqkakáq moke Súria marákórápéqkakáq naruo ke míarorabeqkakáq mah ehwéh síwáhnorurauge.

**21** Mah ehwéh síwáhnoruraunsabé Asiu kegá Manikánsabe íwíah íwíah atáh náhtápéq íné tagéra táhtoqme, Subiq suanéhe íwíáhurowe.

**22** Manikánka menahnkákáq amahnágaákáq aiq séhréh aintéhre. Séhréh aintéh púana iriwe ména anotah kereq íre síwíqkakáq kereqsabé ehweh teiúge. Manikáne ehweh iraru kereq Mósísireqka iraru ehwéhmé teiúge. Ínéga mó ehwéh íre teiasa peh mi ehwéh teiúge.

**23** Segá mahraréra,  
Mókakewe Manikánka omaq ato aní, ite meirena kaweraitéh ani anotah erínana pukinkehé. Pukéna pusa ké míáhrarabeqte ebeq iriginkehé. Wega irigena Asiu kereq nahnsa kereq téhrorahi ehwéh terinkéhe uwe. *(Aisaia 42.6, 49.6)*  
Mó ehwéh íre teiasa peh mi ehwéh teiúge úwe.

*Poraga Ágárípansabé, Aiq pútare ato ú ehwehne.*

**24** Pésátaga Porane ehweh saiqnaruena anotah ehwéhnéna, wensabé, Porao, are múguwahgu aní úkurone. Áhnte sehirania pükú sáhnsah sáhnsahuronaga múguwahgu aní úkurone úwe.

**25** Úwana Poraga wensabé, Pésátao, are anotah wahnáh ání móne. Íné íre múguwahgu aní ména peh aiq pútariahnsanuge. Íre pehipi irarúge. Peh tábúsoqme íwíahéna iraruge.

**26** Ínéga teiú éhwéhmé Ágárípaga tagaríeh púana wensabé pahsuqme teawúge. Sísaga mirauraime íre epéráhpéria peh wehuke míaropi miraurai puana Ágárípaga aiq moke írátiéhre.

**27** Ágárípao, arega Manikáne ehweh iraru kené ehweh aiq pútare aritahno? Íné tagaríomé arega aiq pútare aritahne úwe.

**28** Úwana Ágárípaga Poransabé, Arega tenienayabé ínéga mótaq Sísa kéraníe íwíáhono úwe.

**29** Úwana Poraga wensabé, Mótaqpópoq mókakebopoq íné íre tagaríóge. Íre arebataq ómi amahnága néne ehweh írah kékabé nirutaboirarítóge. Ite ómi íné tahnsa aní úkigeheéna púreraitóge. Íre íné tahnsa karábúsiipéq míageheéna peh Sísansabé aiq pútare atageheéna púreraitóge úwe.

**30** Úwara Ágárípareh Pésátareh Pénáísireh sereq tútuue míó kerekka irigue

**31** máhpeq tueyokuwe. Tueyokéra sebataq ehwehnéra, Mi anínká pukorahi ahbábáq íre mirauraire. Wega karábúsiipéq mía míaorahi ahbábáq íre mirauraire uwe.

**32** Ágárípaga Pésátansabé, Mi anínká, Aroma wahnáh ání Sísáhriga íné ehweh iranawire íre iraruraitaq tahirímé soraq auwo ató irino úwe.

## 27

### *Pora Aroma suwahpeq pokinkeheéra sípiipéq móató éhwéhne.*

**1** Pora Ítári marákórápéq eqmarankeheéra sega wereq mó karábúsiipéq míó kerek wehukení wenawíq Súriásaba móritówe. Súriásawe we sóntia kené kiápétéri ména 100 sontia ké wahnahnéna anotah wahnáh ání Sísáhrine arambehri aní míowe.

**2** Áramítíami suwahpeqte sípígá mó ke suwahpeq mó ke suwahperue Esia marákórápéq pokinaútaq Súriásaga Porareq mó karábúsiipéqté kerek sípiipéq móritówe. Mó aní wenawíq Árísátáki sípiipéq míowe. We Tésárónáika suwahpeq Másérónia marákórápéqté áníne. Itega sípi kewewe q pokowane.\*

**3** Pokéq mó wehekáh Sáírona suwahpeq sewane. Súriásaga Pora kaweratena wensabé, Arega mahtaq sewiéhnaraq arene iyahnaboga kirabo atagéhe úwe.

**4** Mó wehekáh itega sípi kewewe q pokowane. Iuranabiahtapeq anotah soirírúnsabe marakó áwíq Sáípára ogehpeqtáq sótaikowane.

**5** Sótaikéq Sírisía marákórápéqkákáq Pámbíría marákórápéqkákáq anotah wanítábá sótaikéq Árísía marákórápéq Máíra suwahpeq kowane.

**6** Sóntia kené kiápéténiga mitaq mó sipí Ítári marákórápéq pokína sipí kabaruwe. Kabaréna wega Árékásántaría suwahpeqte sípi Ítári marákórápéq pokína sipí ábóraq marena ite meiqmena sípiipéq móítowe.

**7** Mitaq sípi kewewe q anotah soirírúnsabe táhmaro wehekáh pehwehrue pokowane. Pehwehrue kúwaq itega Níra suwahpeq kótaikowane. Mitaq anotah soirírúnsabe itega obaríqme íre korahowane. Itega Sáramóni marákórápéq kótaikéq Kíriti marákórápéqté áyéhrápéq kótaikéq mi marakó ogehpeq kowanæ.

**8** Sípiwarí segagairabeq áwíq Kaweqtapére. Mitaq Áráséa suwahpeq wahtotare. Sípiipéq pehwehrue mitaq kowane.

**9** Anotah soirírúnsabe koyabo seyabonue áhnte wehekáh sótaikúwe. Ópeq tanáhráq súwana anotah soirírúnsabe wáninka áhnte nonaburóróúwe. Minayabe Poraga sensabé,

**10** Sípiakáq itenkakáq wáninkoneho. Íné iwiáhume pokonaraq íre peh sípiakáq kahgoakáq ite moq wáninkoneheqmúne úwe.

**11** Úwana sóntia kené kiápéténiga Porane ehweh íre irena peh sípi soberú anínseq sípi abowáreqne ehweh irowe.

\* **27:2:** Árúka mah pahsí sehiranú aní moq mi sípiipéq kiwíowe.

<sup>12</sup> Sipwari segagairabeq ópeq tanáhráq méyabe íre kaweqtapéq púara áhnte kegá, Sípi kewewe q pokoneheqmúne uwe. Kíriti marákórápéq mó sipí kagairabeq áwíq Píníkie. Segá iwíahéra, Píníkiwe íre anotah soiríri marákóe. Minayabe sípi kewewe q pokue ópeq tanáhráq mitaq kowíanehe uwe.

*Anotah soirírúnsabe wáninka anotah nonaburóróúwe.*

<sup>13</sup> Pehgáriq soirírúnsabe sega iwíahéra, Aiq kawerire íwíahuwaq sípi kewewe q Kíriti marákórápéqté áyéhrápéq wahtotaq pokowane.

<sup>14</sup> Pokowanana marakóipeqté anotah soiríqká paentowe.

<sup>15</sup> Anotah soirírúnsabe sípi sóirirúrabeq íre korahúwe. Íre korahúnsabe sípi soberú anínká sípi keyabonkúwana sóiriqka anehepeq pagume meqmena kúwe.

<sup>16</sup> Itega Káúra marákó sótaikowanaraq pehgáriq sípi abarie pankeqme sípirapéq marahwáne. Anotah soirírú púana mi arámbéhrí anotah pagégé árámbéhríe.

<sup>17</sup> Sípi pitegíneho éra págege nahgáqtáté ákáhnabubu táhru táhruuwe. Ápáríka marákórág sóiriqka sípi paentáwena arahwéraq móitehneho éra sega séri pugeq súówana sípiga pehipi pokúwe.

<sup>18</sup> Mó wehekáh peh anotah soirírúwana sípi umehúnsabe wáninkíneho éra sega kah-gowarí mewe wánípipeq súówe.

<sup>19</sup> Súówana mó wehekáh móñkakáq anotah soirírúwara mó wehekáh anotahtaq áhreu puara sípi soberé mensáméhnsámári mewe wánípipeq súówe.

<sup>20</sup> Áhnte wehekáh iónkakaq pópoqnahakáq wehyoqkakáq íre ábóraq kowana peh anotah ibónsúwana sóirirúwe. Minayabe sega wáninkoneheqmúne íwíahuwe.

<sup>21</sup> Wáninkoneheqmúne íwíahéra áhnte wehekáh táchutahuq awehriuwana Poraga se míorabeq séna sensabé mahraréna, Wehukeo, néne ehweh ireq Kíriti marákórápéq íre súotaq tahirímé sípiipéqté ménsáméhnsá peh kék irino.

<sup>22</sup> Amahnága íre áhreoro. Moke itega íre pukoneheqmúne. Peh morá sípi airaiq piteginawire.

<sup>23</sup> Íné Manikáne aní ména wensabé iwíah íwíahata atauge. Inokáhpeq wene íopeqté ánínká ínéba iriwe ména

<sup>24</sup> mahrarue teniena, Porao, íre áhreúno. Aroma kené wahnah Sísáhriga arene ehweh irankéhboq weba pokiniewóne. Minayabe Manikánka arereq moke sípiipéq míah kéreq amahnága íre pukia peh oga míáhro aítéhre.

<sup>25</sup> Manikánka tení éhwéhnsábé aiq pútare atóge. Wega teninsábé aiq pútaraginawire íwíahuge. Minayabe íre áhreoro.

<sup>26</sup> Peh morá sóiriqka paentáwe sípi marakóipeq surahue piteginkehe úwe.

<sup>27</sup> Inokáhpeq 14 wehekáh parabagútaq anotah soiríqká íre parabagia peh sípi anotah soréq wání áwíq Mérítérénia paentowe. Paentowara inokáhnabubu sípiipéq arambehrio kegá, Marákó peh wahtotare íwíahuwe.

<sup>28</sup> Iwíahéra sega náhgáqtate wání agehga marówana peh ákáhtaq wahtótáq 40 míta kowe. Konsabe sípiga mó kúwara sega mótaq mó agehga marówana peh wahtotaq 30 míta agúwe.

<sup>29</sup> Peh wahtotaq agú púara sípi marakóipeqté ébáhmári paentáwe súnsabe pitegíneho éra áhreewe. Áhreéra itaréitaré náhgáqtáq áhéni sarira mewe wánípipeq márówe. Mi ahénigá wánípipeq tuegáwagiwe ambubu aginkeheéra inokáhpeq sípi anehepeqte tuparuúwe. Tuparuera apubúue ahyahbikerankeheéra púreruwe.

<sup>30</sup> Sípiipéq arambehrio kegá seye náhenéra, Mahtaq pukonehboq sípiakáq karábusi keákáq sueq káriq sípi kewewe q marakóipeq pokoneheqmúne uwe. Mira íwíahunsabé sega mó ke péhe éhwéh teriera, Itega mó ahéní sípi abiahtapeq sariwe tuparuanéhe uwe. Tuparuanéhe éra káriq sípi wánípipeq márumárówe. Mi káriq sípi kewewera pokonehe éra márumárówe.

<sup>31</sup> Márumárótaq Poraga sóntia kené kíápéténireq wene sóntia kereqsabé, Sípiipéq arambehriu kegá ite iuwera pokirataq wáninkoneheqmóe úwe.

<sup>32</sup> Úwara sóntia kegá káriq sipí táhraró nahníáq kiraq súówana mi sipí sóreq wanítáq mårunsurahéna pehipi pokúwe.

<sup>33</sup> Ahyahbinkiranotaq Poraga ómi míó keyabé, Táhutahuq nahro éna pagu pagunéna sensabé, Itega téhtaré wíkí iwíáh kikiréq táhutahuq íre narutówe.

<sup>34</sup> Irupi pukiyehboq amahnága nahro. Ite íre wáninkoneheqmúne. Peh ite ómi áhkórapeq kéagorahúne úwe.

<sup>35</sup> Mi ewhéh iraréna se tagotaq táhutahuq mewena Manikánsabe kaweróne atena keqme nówe.

<sup>36</sup> Keqme nówara sirupipeq moke eyoyóéra táhutahuq nowe.

<sup>37</sup> Peh íregáritaq 276 wehuké mi sipíipéq míahwane.

<sup>38</sup> Se táhutahuq nowana siyahbankirowara sípi umehíneho éra moke tahutáhúq wánípipeq súowe.

### *Sípi pitegú ehwehne.*

<sup>39</sup> Ahbiahipeq marakó ábóraq kowara sípiipéq arambehriu kegá tagéra eheqte marákóbo iwíáhuwe. Iwíáhéra kaweq arahwé tagéra sípi korahonaraq mitaq kowíanehe iwíáhuwe.

<sup>40</sup> Mira íwíáhunsabé sega áhéni nahníáq kiraqme sóreq wanípípéq súowe. Sípi soberinkeheéra sega soberé kara pugeq súowe. Sóiriqka sípi paentáwe áhnopeq méitankeheéra sega séri pankeqmárówe.

<sup>41</sup> Moke mirau puana sípiga peheráh kéna wánípipeqté arahwéraq móbegue kowíowe. Arahwéraq móbegúnsabe íre pokorahúwana anehepeq wánínka mésubiqmaq subiqmarúwe. Mésubiqmaq subiqmarúnsabe sípi piteginaúwe.

<sup>42</sup> Sóntia kegá iwíáhéra, Karábúsi kegá wánípipeq súbímiue áhkórapeq keague taqnobagiyeho éq amahnága se subiq suanehe iwíáhuwe.

<sup>43</sup> Iwíáhuwana sene kíápéténiga, Pora subiq súeho íwíáhéra ahqáho aritowe. Wega wánípipeq súbími tagariáh kékabé, Ebeqme itega wánípipeq ahkuague súwímiue áhkórapeq pokoro.

<sup>44</sup> Anehe mó kegá sípi pitegia áyéhráqpópoq abaraqpópoq táhtoqme áhkórapeq kéagigehe úwe. Úwaq itega moke wega teiunserahnue kaweqtaq áhkórapeq kéagowane.

## 28

### *Wehenka Pora pó ehwehne.*

<sup>1</sup> Áhkórapeq kowéq mi marákó áwíq Márátae irahwáne.

<sup>2</sup> Mibeqté kégá ite mehwéh aitera kaweraitówe. Ibonsúwana titirúnsabe sega ira pariówe.

<sup>3</sup> Poraga irawarí kosiqme sesiqmeue ira pariowe. Ira pariotaq osoronsabe mipi mío wehenka ira kunkúnuwana tueyokéna Porane ayahnkara pówe.

<sup>4</sup> Wehenka wene ayah péna pahtiwara mibeqté kégá tagéra seye náhenéra, Mi anímé wehuke subiq suo anípómo. Íre wáninkinsabé we ahhbabáq ani púana amahnága pukinkehe uwe.

<sup>5</sup> Uwana wene ayahnkara kóbiq kóbirúwana wehenka iraipéq megúwana Pora peh míowe.

<sup>6</sup> Peh míowara sega áwénunéra iwíáhéra, Wene ayahnkara muinabomo. Aunúnkaq mårunsurahéna pukinabirapómo íwíáhuwe. Íre wahto tanáhráq áwénunuwana sene iwiáh íre aiq pútaragúnsabe sega mó iwíáhéra, We manikápómo íwíáhuwe.

### *Awahre koré kaweragú ehwehne.*

<sup>7</sup> Mi marákórápéqté wáhnáh ání wenáwíq Púbíúsa. Mitaq wene marakó wahtotare. Wega ite mehwéh aintena wene nahtapeq apahtáróráq kawerue kirabo aitowe.

<sup>8</sup> Wenabo osorosorú awahrééna puriq puriqkakarúwe. Awahreúwana Poraga weba séna púreréna wene ayahnkaratáté táhtorowana kaweragúwe.

<sup>9</sup> Kaweragúwara moke mi marákórápéqté kégá minayabe írówara moke awahre kegá Poraba suwana púreraritowana kaweragúwe.

<sup>10</sup> Mibeqté kégá ménsámehnsá pehipi nái náinuwe. Itega mi marákóráq apahtáró íó méq suanehe owanaraq moke iuwahbeh naneq ménsámehnsá sípiipéq sáharageheéra náíúwe.

### *Poraga Aroma suwahpeq pokú ehwehne.*

<sup>11</sup> Árékásántaría suwahpeqte sípi ópeq tanáhráq mitaq sípi kagairabeq kowe. Sípi abiahtapeq se ábárahréné siyahqno tahnsa náneq píkisah kowe. Mi abaráhréwé péhe máníká áwíq Súsine ahnínkáwárárée. Apahtáró íó itega mi marákóípéq méq mi sípi kewewequeq pokowane.

<sup>12</sup> Mó marákórápéq pokue Sírákíúsa suwahpeq apahtáróráq kowíahwane.

<sup>13</sup> Mitaq sueq sípi kewewequeq pokue Árégíúma suwahpeq pokowane. Mó wehekáh sípi anehepeqte sóírírúnsabe mitaq sueq apahtáróráq sípiipéq Pútéóri suwahpeq kowíahwane.

<sup>14</sup> Mitaq Sísa tagaríah ké méra, Iteba kaegaeoro unsabe abapete téhtaréráq seba kowíahwane. Mitaq sueq ahtapeq pokue Aroma suwahpeq konehe íwíahowane.

<sup>15</sup> Aroma suwahpeqte Sísa tagaríah kégá, Porarehga áhníbórá seneherawoe u ehwéh irera táhmaro kega ahtapeq sure máhkétirapéq áwíq Ápíúsa séra mitaq íwénunuwe. Mitaq kaegaeo nah apahtáró korabeq íwénunuwe. Poraga sutaq se tagéna wene arupipeq eyoyóéna Manikánsabe iwíáh iwíáh atowe.

<sup>16</sup> Itega Aroma suwahpeq kowíahwanaraq sega Pora íre karábúsiipéq móatera peh wewene nahtapeq móatówe. Wereq peh morá we wahnahnú sontiá ánínseqka kae-gaeuye.

### *Poraga Aroma ke kaweq ehwéh teriu ehwéhne.*

<sup>17</sup> Wega mitaq ména apahtáróráq mibeqté Asiu kené wahnah keyábé síáhrabúwara suwe. Weba suwana sensabé, Nánuwahraho, Asiu ke íre ahbabáq arítáráuge. Iteriborehne sansá íre anterutauge. Se íre ahbabárarítáráugarawé Sarúsarama suwahpeqte Asiu kegá íné táhtoqme Aroma kebá móíntárówe.

<sup>18</sup> Aroma kegá néne ahbabáqsabe kabaréra kasenaintárówe. Kasenainterá se ahtebome íné íre pukorahi ahbabáruraunsabé sega, Soraq auwanéhe urowe.

<sup>19</sup> Soraq auwanéhe urowara Asiu kegá anotah ahqáho arítárówe. Anotah ahqáho arítárónsabé ínéga mahraréna, Aroma wahnáh ání Sísáhri íné éhwéh teawenana iwíáhue tagéna teinkéhe urauge. Minayabe surauge. Séna nánuwahrah Asíú kékabé ehweh aritanieéna íre surauge.

<sup>20</sup> Ite tagéna mah ehwéh teinieéna íáhrabuge. Marakóipeq tuina anímé ite Asiu kegá áwénunona anímé wensabé aiq pútare atóge. Minayabe karábúsiipéq míóge úwe.

<sup>21</sup> Úwara sega wensabé, Súría marákórápéqté kégá are éhwéh pahsí íre sehiranue íátówe. Mahtaq suro Asiu kegá arega ahbabárire íre teíatówe.

<sup>22</sup> Mah marákó mårákórápéqté kégá Sísane sánsá íre kaweq sansáne tei teinurowe. Minayabe arega teiena ehwéh iraneheqmúne uwe.

<sup>23</sup> Seyega iwíáhu wehekáh Porane nahtapeq áhnte kegá weba suwe. Suwana wega moke mi wehekáh Manikánka wahnah wahnahnirabeqte éhwéh teriuwe. Segá Sísa éhwéh irageheéna wega Mósísiga sehgóro ú ehwehnkákáq Manikáne ehweh iraru kené sehirankakaq sáhnsahwe síwáhnorúwe.

<sup>24</sup> Síwáhnorúwara táhmaro író kega wene ehwehnsabé aiq pútare atówara mó kegá íre aiq pútare atówe.

**25** Segá íre peh morá íwíáhuwana pokonehera utaq Poraga mahraréna, Manikáne Awanka wene ehweh irarú ani wenawíq Áísáía iwíáh atowana wega itene igaqnaréhyabe mahraréna,

**26** Mah ke korerio. Korerie, Itene iahrega áhnte tanáhráq ireqmé íre kawerue iahtebahwe. Itene iuranka áhnte tanáhráq tagéqmé íre kawerue iahtebahwe korerio.

**27** Sene iwíáh págege agirara sene siahrrerate ireyabe suwahrieh puara sene siahre parokirara sene siura aiq pigire. Segá ireyabe íre suwahriehtaq tahirímé sene siahre iréra siura tagéra kawerue siahtebah irino. Iahtebahtaq tahirímé ínéba surowana kawerarító irino. Íné Manikánka aiq iraruge úwe teriuwe. *(Aisaiá 6.9-10)*

**28** Poraga Áísáíane ehweh teriena mó mahraréna, Ite mina tahnsano puana Manikáne Awanka iwíáh ato ehwéhká aiq pútaragire. Minayabe Manikánka Sísansabé aiq pútare atáh ké kawerarite ehwéh nahnsó ke korerio aintéhre. Nahnsó kegá kawerue iratiagehe. Minayabe ahtebahro úwe.

**29** Poraga Aroma suwahpeqte Asiu ke mi ehwéh aiq teriuwe. Teriuwara Asiu kegá seye ehwehéra pokuwe.

**30** Poraga mitaq téhtaré ópéq ména wewega mó iotáq mó iotárue paiqma paiqmaru nahtápéq míowe. Wene nahtapeq su keyábé kawerue mehwéh aritena

**31** Manikánka wahnahni ehwéh teri terinúwe. Teriena itene Wahnah Sísa Karáhé éhwéh pahsuqme síwáhnorúwe. Síwáhnorúnsabe Aroma wahnáh kégá íre ahqáho atówe.

## Aroma Ebeq sáhnsahwe ahbebé ehwehne.

Poraga mah pahsí sehiranue mó aní awuwana wega Aroma suwahpeq mewena mibeq Sísa tagaríah ké móriewe. Mah pahsí áwahewé mahraréna, Ite moke ahbabáq ke míone. Mósísiga miraoro ú ehweh sehgiunaga ite íre kaweraitahráhire. Itega kaweq arámbéhríúnaga moq íre kaweraitahráhire. Peh morá Sísansabé aiq pútare atonaga wega ite kaweraitena organúq itahráhire. Manikáne Awanka Sísansabé aiq pútare atáh ké séhréh aritena kaweq sansá miraoneheqmúne iwíah aritena ahriahri sereq mía míaire. Poraga mah ehwéh Aroma suwahpeq Sísa tagaríah ké náriu pahsípéq sehiranúwe.

### Aroma suwahpeqte ké siu pahsíe.

#### *Poraga wene arambehriyabé teriu ehwéhne.*

<sup>1</sup> Íné, Pora Sísa Karáhéne arambehriu aní múge. Manikáne ehweh korerinkeheéna omaq intena eqmaq núwátáire.

<sup>2</sup> Naho naho Manikánka omasa éhwéh wene ehweh iraru ke iwíah aritowara áwahe pukúpéq sehiranuwe.

<sup>3</sup> Omasa éhwéhmé wenahni, itene Wahnah Sísa Karáhé éhwehne. Sísawe wehukení úkúnsabe anotah wahnáh ání, Tébítí kahnáh ánínéna

<sup>4</sup> we pukútaq Manikánka págege sansánue iriwe organúq atowe. Organúq atonsabe Manikáne Awanka ite sokigi aitéhmé we Manikáne ahninkáwá wíre. We Sísa Karáhé itene Wahnahne.

<sup>5</sup> We nahnsó kereqne Wahnah míankeheéna Manikánka ite meiqme Sísa Karáhéne ayahpi itena anotahtaq séhréh aitéhre. Wega íné nahnsó kebá eqmaq núwátáire. Mó kehiná mó kehinánká Sísansabé aiq pútare atera wene ehweh sehgiheéna kosíwáhnorúno éna eqmaq núwátáire.

<sup>6</sup> Ite moq Sísa Karáhéne animári míageheéna omaq itena íáhraburairaq ite Sísa kéráhwe.

<sup>7</sup> Aroma suwahpeqte Manikáne animáríno, íné Porane ehweh íráhro. Manikánka itensabé arutaboiraitena wene animári míageheéna íáhraburairaq. Maniká Iteriboreq itene Wahnah Sísa Karáhéreqka ite séhréh aitera itene iru ukiq itagéhe.

#### *Poraga Aroma ke ehweh korerieyabe awahbo ehwéhne.*

<sup>8</sup> Téhwe teiéna ehwéh íráhro. Itega Sísa Karáhéne ehweh kawerue sehgiómé áhnte kegá íráhwe. Minayabe ínéga ite ómi niahreraq matawéna Sísa Karáhé áwírue Manikánsabe iwíah iwíah atóge.

<sup>9</sup> Sísa Karáhé éhweh teri terinéna Manikáne arambehriyabé iwíah iwíahéna mirauge. Manikánka tagaríehmé íné íre túbah agia

<sup>10</sup> itensabé ahriahri püreraitóge. Ite tagéyabe nuwahbehre. Minayabe Manikánsabe págegeue püreruge. Püreréna mahraréna, Aroma kebá pokiniboq pokúno ainte séhréh ainto ue püreruge.

<sup>11</sup> Itene irupipeq págegeinkeheéna Manikáne Awanka séhréh aitahráhire. Wega mi-rainkeheéna iteba sure séhréh aiteyabe nuwahbehre.

<sup>12</sup> Ínéga Sísane ehweh kawerue sehgiúnsábé itega íné tagehrataq itene iru kawerinae. Itega moq Sísane ehweh kawerue sehgiónsábé tagahnaraq nirume kawerinae. Minayabe moke irupipeq eyoyóinae.

<sup>13</sup> Néne iyahnabo anímáríno, teiéna ehwéh iahtebagehboq íráhro. Áhntetaq iteba pokinieurautaq íre pokorahurauge. Sísane ehweh teriátáutaq mó nahnsó kégá aiq pútare atera sehgiówe. Ite moq aiq pútare ateq sehgiheéna teiedyabe nuwahbehre.

<sup>14</sup> Manikánka ómi korerio urainsabé Káríki kereq íre Káríki kereq ahtebah kereq múguwahgu kereq teri terinirie.

<sup>15</sup> Itega moq Sísá éhwéh irageheéna ite Aroma su wahpeq míáh ké koreiyeyabe nu wah-behre.

### *Kaweq ehwéhmé Manikáne págegeorahi sansánsábé teí éhwéhne.*

<sup>16</sup> Manikánka Sísane kaweq ehwéhnsábé ómi aiq pútare atáh ké kawerarítéhre. Minayabe mi ehwéh terieyabe íre niyehitehre. Maniká págege aní púana séhréh aitahráhinsabé ite koreiyeyabe nu wahbehre. Téhwe Asiu kegá mi ehwéh írówara anehe nahsonka írówe.

<sup>17</sup> Wehukega Sísane ehwehnsabé aiq pútare atáhtáq Manikánka kaweraritená sensabé, Ite kaweqtaq míáhwe arítéhre. Íre wehukega arambehrionka peh morá wensabé aiq pútare atáhnká kawerarítéhre. Mi kawérarítéh sánsámé Manikánka aiq sokigi aitéhre. Minayabe Manikáne ehwehnka aiq mahraréna, Manikánka wensabé aiq pútare atáh kékabé, Kaweqtaq míáhwe arítéh púara se oga míá míaoneherawoe ire. *(Habakuk 2.4)*

### *Maniká auwera múguwahgu ke úko ehwéhne.*

<sup>18</sup> Manikánka íópeq ména wene áyáteh naneq sansá sokigi aíre. Ahbarera ahkaragára kené ahkaragáraga Manikáne aiq pútaq sansánsábé ahqáho atáhwe. Ahqáho atáh púana Manikánka anotahtaq abiahnsanéna kamah arinkéhe.

<sup>19</sup> Maniká wewega wene sánsá tábúsoqme sokigi ariátái puara wehukega tagariahrawe. Tagariahrahonsabé wene sánsánsábé ahqáho atáh púana Manikánka anotahtaq kamah arinawire.

<sup>20</sup> Naho naho Manikánka mah marákó márakkó mirarowe. Wega kaweqtaq míá míáéna moke miraro mensáméhnsá ábóraq marowe. Amahnága minawari kéhrara wehukega taga tagao puara wene sánsá tagariahrawe. Tagéra iwíáhorahome Maniká webataq Manikánéna ahriahri págege aní míá míaire. Minayabe mi ahbabáq kégá Manikánsabe, Arene sánsá peh kopípéq kékre íre irarerahrawe. Írakaumo.

<sup>21</sup> Segá Maniká tagarawéra wensabé, Are Maniká Iteribo wóne íre owe. Arensabé iwíáh iwíáhonehqmune íre owe. Wensabé kaweróne íre atáhwe. Minayabe se múguwahgu agéra tábúsoqme iwíáh íre iwíáhia peh sunkíkrirabeq míáhwe.

<sup>22</sup> Ite ahtebia ké úne éra saiyoéra múguwahgu ke úkowe.

<sup>23</sup> Manikánka anotah aní ména ahriahri míá míairara wehuke íre míá míawo. Maniká auwera abehq náneq wehukéní awankátate kuruqme mirarera minawarinsabé iwíáh iwíáh atáhwe. Kabarame ménkámehnkámé karahrabahme abehq náneq awankátate kuruqme mirarera, Itene manikáne éra minawarinsabé iwíáh iwíáh atáhwe.

### *Ómiga ahbabáq aruqaruro ke wóe i ehwéhne.*

<sup>24</sup> Segá mirao puana Manikánka se suena áwé tagehrara sene sirupipeq sirutaboiro ahbabáq mira aruqarurowe. Wahba sobaruqnahbaruronsabé ahbabárowe.

<sup>25</sup> Manikáne aiq pútaq sansá suera péhepehe iwíáhéra wene sánsá íre sehgówe. Maniká moke náneq miraro anínsabé íre iwíáh iwíáhia peh Manikánka miraro naneqmarinsabé iwíáh iwíáhowe. Manikánka moke náneq miraro puaq wensabé iwíáh iwíáh atonawe kaweq sansáne. Aiq pútaq míre.

<sup>26</sup> Segá mira áhbábáronsabé Manikánka se suena áwé tagehre. Áwé tagehrara segá áhnte íre mirao naneq miraéra ahbabáq aruqarurowe. Ahreronká sensuwehqso suera síwáhu ahréróné sinonka sobaruqnahbarurowe.

<sup>27</sup> Wehga moq sene ahrero suera síwáhu wehné sinonkansabé sirutaboiréra sobaruqnahbarurowe. Mi sansámé anotah siyehiteh sansánirara pehipi mira aruqarurowe. Segá mira áhbábáq aruqaruro puana sene iwíáhwé sene sinonkame íre kaweragire.

<sup>28</sup> Segá Manikánsabe iuwahriehre íwíáho puana Manikánka se suena áwé tagehrara sega ahbabáq iwiáhéra íre mirao naneq miraowe.

<sup>29</sup> Sene sirupipeq áhnte ahkaragáraakáq ahbabáqkakaq kéhre. Áhnte mensáméhnsánsábé sirutaboiro ke wóe. Íre tábúsoqme sánsáno ke wóe. Ebehyabé suwahbeh ke wóe. Mó kené ménsámehnsánsabe aigará pabeki ke wóe. Wehuke subiq sueyabe suwahbeh ke wóe. Se tobek aruqaruro ke wóe. Se péhe éhwéhnue mó kené ménsámehnsá mewe mewe ke wóe. Mó ke íre kawerarítáh ké wóe. Síehruru aruqaruro ke wóe.

<sup>30</sup> Mó keyábé péhe éhwéh arítáh ké wóe. Manikánsabe suwahrieh ke wóe. Aboawah weh áhréyábé abehq éhwéh arítáh ké wóe. Se saiyoéra seye síwíq pankeráh ké wóe. Ahbabáq áhwárah ke wóe. Sinoibone ehweh anterúáh ké wóe.

<sup>31</sup> Se múgu wahgu ke wóe. Itega miraoneheqmúne e éhwéh anterúáh ké wóe. Sen-suwa hrahyabé íre suwahbeh ke wóe. Mó keyábé iuwahriehre éra íre séhréh arítáh ké wóe.

<sup>32</sup> Manikánka mina tahnsa pukorahi ahbabáq aruqaruro ke kamah arinawire. Segá minayabe irera anetaníbo íwíáhowe. Anetaníbo íwíáhéra mira ahbabáq aruqaruréra mina tahnsa áhbábáro keyábé kawerowe aritera íwíáh íwíáh arítáhwe. Manikánka moke mina tahnsa áhbábáq ké anotahtaq kamah arinawire.

## 2

### *Manikánka ómi kené arambehri tagéna sainsuahna ehwéhne.*

<sup>1</sup> Néne iyahnabo anímáríno, ite íwíáhome mi ahbabáq ké íre kaweq ke wóe éq peh ite kaweqtaq mía míaúne íwíáhowe. Aneqsabé mira íwíáhoo? Itega moq mi ahbabáq mira aruqarurowe. Se ahbabáq ke woe eme iteitensabéákáq mirarewe. Itega moq mi ahbabáq mirao puaq iteitensabéákáq mirarewe. Minayabe, Ómi itega kaweqtaq mía míaúne íre irarerahowé.

<sup>2</sup> Ite tagarionawe Manikánka tábúsoqme íwíáhéra mina tahnsa áhbábáq ké ehweh aritená kamah arinawire.

<sup>3</sup> Se ahbabáq ke woe íwíáhqué itega moq mi ahbabáq mirao mino? Néne iyahnabo anímáríno, Manikánka ite íre kamah ainawire íwíáhoo? Ahqáho. Wega moke ahbabáq ke monseráhnue kamah ainawire.

<sup>4</sup> Manikánka itensabé arutaboiraitena íwénunire. Íwénunéna íre apubúue kamah aíre. Minayabe, Anetaníbo. Pehipi ahbabáronehe íwíáhoo? Itene ahbabáq sansa sueq wene sánsá sehgihehéna Manikánka itensabé arutaboiraitena íwénunire. Minawé íre ahtebaho?

<sup>5</sup> Itene ahbabáq sansa íre sueq peh píribahriéq, Ite iuwahbeh sansá miraoneheqmúne íwíáhonsabé itene ahbabáq áhnte aginae. Áhnte agirana Manikánka ehweh aitahna tanáhráq tábúsoqme íwíáhéra anotah kamáh ainawire.

<sup>6</sup> Wega wehukene arambehri agehmarena ehweh aritená sainsuanawire.

<sup>7</sup> Mó kegá Maniká míéhrabeq téhrehrabeq pokéra we tahnsá méyabe suwahbehre. Manikánka sensabé, Kawerowe ariteyabe suwahbehre. Ahriahri oga mérapeq pokéyabe suwahbehre. Mina tahnsa suwahbeh kegá kaweq sansá mira aruqarurirataq Manikánka organúq sitankéhe.

<sup>8</sup> Mó kegá peh seyene íwíáh mira aruqarurowe. Segá aiq pútaq sansá íre sehgiра peh ahbabáq aruqaruro puana Manikánka mi keyábé anotah abiáhnsá aritená kamah arinawire.

<sup>9</sup> Manikánka moke ahbabáq ke kamah arinara síérinayabé uwo uwo oneherawoe. Téhwe Manikánka ahbabáq Asiú ké kamah ariena anehe ahbabáq nahnsó kéákáq kamah arinawire.

<sup>10</sup> Manikánka kaweq sansá mira aruqaruro keyábé, Kawerowe aritená siru ukiq sitena, Néne téhrehabeq kíoro. Anotah anímári míagehe aritankéhe. Téhwe wega kaweqtaq míah Ásíú kékabé mirareritena anehe kaweqtaq míah náhnsó kékabé mirareritankéhe.

<sup>11</sup> Manikánka moke mi kené arambehri agehmarena tábúsoqme iwíáhéra saraqmarena sainsuanawire.

<sup>12</sup> Nahnso kegá Mósísiga sehgóro ú ehweh siahrrate íre irera sega ahbabáronsabé iraipéq pokigehe. Asiu kegá Mósísine ehweh irera ahbabáronsabé Manikánka Mósísiga sehgóro ú ehwehnká irarúnserahnue ehweh aritená kamah arinawire.

<sup>13</sup> Asiu kegá Mósísine ehweh sene siahrrate írálwe. Minayabe Manikánka mi keyábé, Ite kaweqtaq míahwe pehipi irareritankého? Ahqáho. Írakaumo. Peh morá moke mi ehweh sehgó kékabé, Ite kaweqtaq míahwe irareritankéhe.

<sup>14</sup> Nahnso kegá mi ehweh siahrrate íre irera pehipi sehgónsabé sirupipeq kaweq sansá ahtebahwe.

<sup>15-16</sup> Mi ehweh íráhnsabé sehgioo? Ahqáho. Manikánka sirupipeq kaweq sansá arítéhnsabé sehgówe. Segá ahbabárotaq sirupipeq umeh agirara kaweqtaq míahtáq sirupipeq eyoyó agire. Ínéga kaweq ehweh teiúmá Manikánka Sísa Karáhénzabe, Wehukene sirupipeqté épéráhpéro sansánsabé sainsuo atéhre. Minayabe Sísa tuina tanáhráq wehukene sirupipeqté sánsánká seye sainsuankéhe.

### *Asiu kegá Mósísine ehwehnka séhréh aitankéhe íwíáho ehwéhne.*

<sup>17</sup> Itewe árahoo? Ite Asiu anímári mune éq Mósísine ehweh sehgiune éq ite Manikáne animári mune irare irareowe.

<sup>18</sup> Maniká awahbeh sansá tagarione éq Mósísine ehweh aiq irone éq minayabe ite tábúsoqme iwíáhorahúne ewe.

<sup>19</sup> Ite iwíáhome itewe Manikáne ah íre tagariáh ké sokigiúna anímári mune iwíáhowe. Sunkíkírabeq míah ké kawerue nogigeheeq ite sene kánéq tahnsa míone iwíáhowe.

<sup>20</sup> Áhwára áhwára ke kaweraritone íwíáhéq káriq anímárínseq íre írál kíreq síváhnorúne iwíáhowe. Mósísine ehweh matawéq aiq moke iahtebóna puaq mi arámbéhrí miraorahúne iwíáhowe.

<sup>21</sup> Itega mó ke síváhnoréq mina síváhnoro ehweh aneqsabé itewe íre sehgioo? Itega mó keyábé, Aebóiyeho eme aneqsabé itewe aebóo?

<sup>22</sup> Itega mó keyábé, Mó kené ahre abariiyeho eme aneqsabé itewe mó kené ahre abarioo? Itega mó keyábé, Abehq náneqsabé manikáne ateq iwíáh íwíáh atého eme itewe aneqsabé péhepehe maníkáné árótu nahtápéq kék náneqmarí aebóo?

<sup>23</sup> Itega iteitene íwíq pankereq Manikánka sehgóro i ehweh teri terinome itewe aneqsabé mi ehweh anteruaho? Mirairataqmé Manikánsabe éhruru atáhwe.

<sup>24</sup> Manikáne ehwehnka mahraréna,  
Itega ahbabárirataq nahnso kegá tagéra Manikánsabe éhruruorahowe ire. *(Aisaia 52.2; Esekiel 36.20-23)*  
Mina onserah itega Manikáne ehweh anterúáhnsabé tagah kegá wensabé éhruruowe.

### *Íre síu amurúráhnsabé Asiu keúrá míahwe i ehwéhne.*

<sup>25</sup> Ite Asiu kegá íú amurúrueq Manikánka sehgóro i ehweh sehgiónaraq aiq kawerire. Wene ehweh anterúáh Ásíú kéké nahnsó ke síu íre amurúráh ké tahnsa úkowe.

<sup>26</sup> Síu íre amurúráh kéká Manikáne ehweh sehgiótáq wega sensabé, Ite Asiu keúrá tahnsa míahwe arítáhwe.

<sup>27</sup> Ite Asiu kewé íú amurúruona kewé Manikáne ehweh kékraq íre sehgówe. Minayabe nahnsó ke síu íre amurúráh kéká wene ehweh sehgiótáq ite Asiu kegá minayabe tagéq íre kawerurone iwíáhigehe.

<sup>28</sup> Asiu anínurame insebo? Peh morá wene áú amurúrutai aní Asiu anínura mire iwíáhoo? Írakaumo. Íre minayabe Asiu anínura míéhre.

<sup>29</sup> Íre peh síú amurúráh sánsá miraonka Asiu keúrá úkowe. Íre púkuipéqté éhwéh íráhnká peh morá Manikáne Awanka wehukene sirupipeq sogiqtaté tahnsa amurúréhnká sirupipeqkáqkáq sene iwíáhipeqkáqkáq kawerarítéh ké Asiu keúrá úku úkuowe. Íre wehukega peh Manikánka mina tahnsa kékabé, Kawerowe arítéhre.

### 3

#### *Manikáne sansá peh kaweq sansáne i ehwéhne.*

<sup>1</sup> Ite Asiu kené sánsánká nahnsa kené sánsá kiotaikiro? Íú amurúrue sansa miraonsabé aneq kaweq naneq kanabo?

<sup>2</sup> Manikánka áhnte kawéq náneq ite Asiu ke nái náinúwe. Téhwe Manikánka wene ehweh ite Asiu ke teiena, Néne sánsá auráq matíahro aitowe.

<sup>3</sup> Mó Asíú kégá Manikáne ehwehnsabé íre aiq pútare atówe. Íre aiq pútare atónsabe Manikáne ehweh abehq úkiro?

<sup>4</sup> Írakaumo. Peh aiq pútaq ehwéh kagaire. Minayabe Manikáne ehwehnka irarinserahnéna,

Arega iraréna ehwéh aiq pútaraginkehe. Aiq pútaragínara wehukega tagagehe. Wehukega ehweh atéhrataq arega se kiotaikinkehe ire. *(Buk Song 51.4)*

<sup>5</sup> Wehukega iwíáhue iraréra, Itega ahbabárúnaga Manikáne tábúsoréh sánsá ábóraq máréhre íwíáhowe. Mira íwíáhéra, Minayabe Manikánka kamah ainawe we áhwára áhwára iwíáhéna íre kawerire ewe. Mah iwíáhwé peh wehukene iwíáh wíre. Ite mina tahnsa íwíáhonehnkono?

<sup>6</sup> Ahqáho. Írakaumo. Mi iwíáhwé peh abehq íwíáhe. Manikámé áhwára áhwára iwíáhi aní tahirímé wega mah kehiná kékíná íre tábúsoqme ehweh aitéh irino.

<sup>7</sup> Wehukeníká mó iwíáhue iraréna, Ínéga péhe ehwéh irarunka peh Maniká aiq pútari aní míre ue ábóraq máréhre íwíáhire. Iwíáhéna, Minayabe néne péhe ehwéh íráh kégá Manikánsabe iwíáh íwíáhigehe ewe. Mira íwíáhéna, Wega néne ahbabáqsabe ehweh aintahnawe árahinsabébo? Ehweh aintéhmé we áhwára áhwára iwíáhéna íre kawerire ewe.

<sup>8</sup> Mina tahnsa íwíáho kegá, Pehipi ahbabáronehe ewe. Ahqáho. Manikánka mina tahnsa íwíáho keyábé ehweh aritena kamah arinawire. Kamah arinawe ábéranawire. Mó kegá péhenéra, Íné Poraga mahraréna, Itene ahbabáqka kaweq sansá ábóraragire éna minayabe pehipi ahbabároneheqmúne síwáhnorire ewe. Írakaumo. Mi kewé péhe ehwéh aintáhwe.

#### *Mó morá kaweqtaq mía míai aní íre míéhre i ehwéhne.*

<sup>9</sup> Aneq iwíáhonehnkono? Nahnsa kegá ahbabárowaqme peh morá ite Asiu ke kaweqtaq míone íwíáhoo? Ahqáho. Írakaumo. Ahbabáqka ite Asiu kereq nahnsa kereq ite ómi saiqnariéhre teiú mino?

<sup>10</sup> Minayabe Manikáne ehwehnka aiq mahraréna, Kweqtaq mía míao ke míaho?

Írakaumo. Íre míáhwe.

Mó morá kaweqtaq mía míai aní írakaunuránowe.

<sup>11</sup> Maniká awahbeh sansá sega íre ahtebahwe.

Wensabé iuwahriehre éra we íre anebahrowe.

<sup>12</sup> Ómiga Manikáne ahme aiq súáhwe.

Suera moke abehq ke úkowe.

Kaweq sansá mirai anímé mó morá írakaunuránowe.

<sup>13</sup> Sirupipeqté ehwéh íre kaweq ehwéh púara

pusa ké karesa kúnkúninserah ke wóe.

Sene áwéhipeqté péhe ehwéh kisuq kisurowe.

Wehenka wehuke pehtaq pukorahi naneq wehukene sinonkapipéq sítéhnserah sene péhe éhwéhnká wehuke íre kawerarítéhre. (*Saveman 7.20; Buk Song 5.9, 14.1-3, 140.3*)

<sup>14</sup> Segá ehbo ehwéhnkákáq tobéh ehwéhnkákáq irare irareowara mó kené sirupipeq umeh arítáhwe.

(*Buk Song 10.7*)

<sup>15</sup> Segá mó ke peheráhnu subiq suq subiq surowe.

<sup>16</sup> Pokorabeq mibeqté ké ahbabáq aritera íre kawerarítáhwe.

<sup>17</sup> Mó kereq morá íwíáhue mé sansa íre miraowe.

<sup>18</sup> Manikánsabe íre áhreowe ire.

(*Buk Song 36.1; Aisaia 59.7-8*)

<sup>19</sup> Mósísine ehwehme ite Asiu kegá moke sehgigehéna Manikánka mi ehwéh iuwe. Iuwaqme íre sehgioráhúne. Minayabe ite tábúsoqme sehgíjune íre irarerahúne. Ite tagarionawe Manikánka itereq mah kehiná kékínánseqne ahbabáqsabe ehweh aitanawire.

<sup>20</sup> Mósísine ehweh anteruonayabé Manikánka, Ite kaweqtaq míáhwe íre aitankéhe. Minayabe wehukenínká, Íné Manikáne ehweh aiq tábúsoqme sehgíúge irarerahiro? Ahqáho. Írakaumo. Moke mah kehiná kékínánká mi ehwéh anteruona puaq ite ahbabáq animári múne tagarawéq mi ehwéh íre irarerahúne.

*Sísa Karáhénzabe aiq pútare atéh ánime peh kaweqtaq míéh áníne i ehwéhne.*

<sup>21</sup> Manikánka Mósísine ehweh sehgíó kékínánká, Ite aiq kaweqtaq míáhwe teriro? Írakaumo. We mó sansánire. Amahnága mi sansá ábóraragirana wega itensabé, Aiq kaweqtaq míáhwe irarerahire. Mi sansánsábé Mósísireq Manikáne ehweh iraru kereqka aiq iraruwe.

<sup>22</sup> Mi sansámé mahraréna, Manikánka moke Sísa kaweqtaq míáhwe arítéhre. Asiu kené mó ah, nahnsó kené mó ah Írakaumo. Manikánka Asiu kereq nahnsó kereqsabé peh morá íwíáhena peh aiq pútare atáh kékínánká kaweraritená kaweqtaq míáhwe ire.

<sup>23</sup> Ite moke mah kehiná kékínánká ahbabárurauna puaq Manikánka kaweqtaq míáhwe aitena kaweqtaq íre míáhwe aitena.

<sup>24</sup> Sísa Karáhénzabe aitene ahbabáq paiqmaro púana Manikánka séhréh aitena wáh insahwé aitena itensabé, Ite kaweqtaq míáhwe aiténhre.

<sup>25</sup> Naho naho Sísa íre tutaq Manikánka ahbabáq ke síwénunéna mi tanáhráq íre apubúue kamah ariuwe. Wega wenahni eqmarowana Sísa pukútaq wene korahqtaté wehukene ahbabáqsabe paiqmarowe. Minayabe Manikánka Sísa kaweqtaq míáhwe aiténhre. Mina ireq Maniká anotah kawéq áníne íwíáhune.

<sup>26</sup> Manikánka miraúnsabe amahnága itega, Maniká tábúsuréh áníne tagarione. Wega moke Sísa kaweqtaq míáhwe aiténhre.

<sup>27</sup> Minayabe iteitensabé íwíáhnehnkono? Írakaumo. Iteitega Mósísine ehweh tábúsoqme miraúnsabé Manikánka itensabé, Ite kaweqtaq míáhwe aiténhro? Írakaumo. Peh morá Sísa kaweqtaq míáhwe aiténhre.

<sup>28</sup> Manikánka Mósísine ehweh tábúsoqme sehgí ánínsábé, Are kaweqtaq míáhne aiténhro? Írakaumo. Ite tagarionawe peh wenahninsabé aiq pútare atéh ánínsábé, Are kaweqtaq míáhne aiténhre.

<sup>29</sup> Manikámé peh morá ite Asiu kené Manikápo? Írakaumo. We moke ite Asiu kereq nahnsó kereqne Maniká míre.

<sup>30</sup> Maniká peh morá ánínéna ite Asiu kereq nahnsó kereqsabé peh morá íwíáhire. Ite Asiu kereq nahnsó kereqka wensabé aiq pútare atonayabé Manikánka itensabé, Ite kaweqtaq míáhwe aiténhre.

<sup>31</sup> Minayabe Mósísine ehwehnsabé abehq éhwéh míre éq anetaníbo enehnkono? Ahqáho. Írakaumo. Manikáne ahninkáwánsábé aiq pútare atona puaq Mósísine ehweh kaweq ehwéhne págegeue irarúne.

## 4

*Manikánka Ébáráhma kaweqtaq míéh áníne ú ehwehne.*

<sup>1</sup> Ébáráhmawe ite Asiu kené igaqna míowe. Wensabé aneq iwíáhonehnkono?

<sup>2</sup> Ébáráhmaga kaweq arámbéhríúnsabe Manikánka, Are kaweqtaq míahne atoo? Írakaumo. Wene arambehriyabé Ébáráhma kaweqtaq míahne atotaq tahirímé wewensabé iwíáh íwíáhú irino. Íre wega arambehriúnsabe peh morá Manikánka miraúnsabe Ébáráhmaga wewensabé íre iwíáh íwíáhorahúwe.

<sup>3</sup> Manikáne ehwehnka mahraréna,

Manikánka teawu ehwehnsabé Ébáráhmaga aiq pútare atonsabe Manikánka wensabé,  
Are kaweqtaq míahne atowe ire. (*Stat 15.6; Jeremaia 2.23*)

<sup>4</sup> Arambehri anínká ápeq pehipi íre meyéhre. Wega arambehrii puana wene wahnhahnka ápeq áwíre.

<sup>5</sup> Wehukenínká wewene arambehriyabé íre iwíáh íwíáhia peh ahbabáq ke kaweraritahráhi anínsábé aiq pútare atéhrana Manikánka mi anínsábé, Are kaweqtaq míahne atéhre.

<sup>6</sup> Manikánka, Ite kaweqtaq míahwe arito keyabé Tébítiga naho naho iraréna iwíáh íwíáhúwe. Íre sene kaweq arámbéhríyábé kaweraritowana iwíáh íwíáhúwe.

<sup>7</sup> Minayabe Tébítiga Manikáne púkuipéq naho aiq sehiranue mahraréna,  
Manikánka sene ahbabáq kaqsuena kawerarítéh kewé  
sirupipeq eyoyói ke méra iwíáh íwíáhowe.

<sup>8</sup> Itene Wahnahnka sene ahbabáqsabe íre ehweh arítéh kewé sirupipeq eyoyói ke méra  
iwíáh íwíáhowe úwe. (*Buk Song 32.1-2*)

<sup>9</sup> Manikánka kawerarítéhrara sirupipeq eyoyói kewe peh morá síú amurúruáh Ásíú  
kébo? Ahqáho. Íre sebatare. Manikánka síú íre amurúruó nahnsó kéréq moq kawerarítéhrara sirupipeq eyoyóire. Ébáráhmaga Manikánsabe aiq pútare atonsabe Manikánka  
wensabé, Are kaweqtaq míahne atowe teiewóge.

<sup>10</sup> Ébáráhmane áú íre amurúruotaq kaweqtaq míahne atoo? Wene áú amurúruotaq  
kaweqtaq míahne atoo? Árahtaq kaweqtaq míahne atoo? Wene áú íre amurúruotaq  
kaweqtaq míahne atowe.

<sup>11</sup> Wene áú íre amurúruotaq Ébáráhmaga Manikáne ehwehnsabé aiq pútare ato púana  
wensabé, Are kaweqtaq míahne atowe. Kaweqtaq míahne atonsabe mó ke sokigi arinke-  
heéna anehe Manikánka Ébáráhmansabé, Áú amurúruo atowe. Minayabe Ébáráhmaga  
Manikánsabe téh aiq pútare ato púana síú íre amurúrusa peh moke aiq pútare atáh kéné  
sinahbúwá úkirana Manikánka sensabé, Ite kaweqtaq míahwe arítéhre.

<sup>12</sup> Asiu kegá pehipi síú amurúruáhmé Ébáráhmawe sinahbúwábo? Írakaumo.  
Ébáráhmane áú íre amurúruótaq wega Manikáne ehwehnsabé aiq pútare atowe. Aiq  
pútare atowara wega aiq pútare atáhnserahno kewé Ébáráhmawe sinahbúwá míéhre.

*Manikáne ehwehnsabé aiq pútare atéh éhwéhne.*

<sup>13</sup> Manikánka Ébáráhmareq wene anahwaréhreqsabé, Mókakewe itega mah marákó  
márákó awaq miagéhe teriuwe. Segá Mósísine ehweh kawerue sehgiúnsabe teriuwo?  
Írakaumo. Segá Manikáne ehwehnsabé aiq pútare ató púana wega sensabé, Ite kaweqtaq  
míahwe aritená awaq miagéhe teriuwe.

<sup>14</sup> Peh Mósísine ehweh kawerue sehgó kégá awaq míáhtáq tahirímé Manikáne ehwehnsabé aiq pútare atáh ké íre awaq míowana Manikánka mirainauge ú ehwehmé abehrúki irino.

<sup>15</sup> Manikánka Mósísine ehweh anterúáh ké kamah arinkéhe. Nahnso kegá Mósísine ehweh sene siahrerate íre írátíáhwe. Minayabe itega mi keyabé íre ehweh aritahráhúne.

<sup>16</sup> Manikánka Ébáráhmareq moke wene anahwaréhreqsabé iwíahéna, Séhréh ariteyabe níre éna ínéga mirainauge úwe. Mirainauge ú púana wensabé aiq pútare atáh ké kaweraritankéhe. Manikánka peh morá Mósísine ehweh sehgó kégá awaq míáhtáq tahirímé Manikáne ehwehnsabé aiq pútare atáh ké kaweraritankéhe. Ébáráhmawé ite Manikánsabe aiq pútare atona kené iteinahbúe.

<sup>17</sup> Minayabe Manikáne ehwehnka aiq mahraréna, Ínéga miraunka arewe áhnte nahnsó náhnsóné sigaqna míankehe ire. (*Stat 17.5; Aisaia 48.13*)

Ébáráhmaga wensabé aiq pútare atotaq Manikánka tagéna wensabé aiq pútare atáh kéné sigaqna míankehe atowe. Ébáráhmaga aiq pútare ato anímé we Manikánéna pusa ké organúq sitena íre kék náneq ábóraq kahno atéhrana ábóragire.

### *Ébáráhmaga Manikánsabe kawerue aiq pútare ato ehwéhne.*

<sup>18</sup> Manikánka wensabé, Arewe áhnte nahnsó náhnsóné sigaqna míankehe úwana Ébáráhmaga aiq pútare atena áwénunúwe. Manikánka, Arenanahréh áhnte míagehe atonsabe Ébáráhmaga mi ehwéhnsabé aiq pútare atena áwénu aruqarurúwe.

<sup>19</sup> Aiq pútare atena áwénu aruqaruréna peh íregáritaq ópéq 100 opéq míonsabe naho korééna wene anonka taropagúwe. Wene ahre Sárahwe orení úkúnsabe wega ani íre maqmiahrahúwe. Minawé Ébáráhmaga tagéna, Manikánka tení éhwéh péhe éhwéhpómo íre iwíahúwe. Írakaumo. Mira íwíáh íre iwíáhia peh aiq pútaq aginawire éna áwénunúwe.

<sup>20</sup> Áwénunéna árahinabomo íwíáh íre iwíáhia peh teawu ehwéhnsabé aiq pútare ato puana págegeue ambubu atawéna Manikánsabe íwíáh íwíáh atowe.

<sup>21</sup> Iwíáh íwíáh atena, Manikánka moke miraorahi aní púana wega teniátái ehwéh aiq pútaraginawire íwíahéna áwénunúwe.

<sup>22</sup> Ébáráhmaga Manikáne ehwehnsabé aiq pútare atonsabe Manikánka wensabé, Are kaweptaq míahne atowe.

<sup>23</sup> Manikánka wensabé, Are kaweptaq míahne ato ehwéhmé íre peh morá Ébáráhmansabé sehiranúwe. Írakaumo.

<sup>24</sup> Itensabéákáq teíre. Sísa itene Wahnah pukúwana Manikánka we iriwe organúq atowe. Itega organúq ato anínsabé aiq pútare atáhnaraq wega itensabé, Kaweptaq míahwe aitankéhe.

<sup>25</sup> Segá Sísa subiq suaneherauta Manikánka mi ke íre saiqnaritowara subiq súówana itene ahbabáqsabe putiowe. Ite kaweraitankeheéna Manikánka we iriwe organúq atowe.

## 5

### *Manikánka itensabé, Ite kaweptaq míah ké wóe ú ehwehne.*

<sup>1</sup> Sísansabé aiq pútare atáráuna puana Manikánka kaweraitena, Kaweptaq míahwe aitáráire. Wega kaweraitáráinsabé ite insahwé aitena irunukiq ita itaire. Itene Wahnah Sísa Karáhénsabe miraurainka Manikánka irunikiq ita itaire.

<sup>2</sup> Sísansabé aiq pútare atáráuna puana Manikánka itensabé, Ínéba sero éna séhréh aita aitaires. Séhréh aitéhraq Manikánka kaweptaq míahwe aitaires. Itene Wahnah Sísa Karáhénsabe miraurainka Manikánka irunikiq ita itaire.

<sup>3</sup> Íre peh morá minayabe iru eyoyóire. Íre kaweragi tanáhráq ebeqme itene iru umeh agire. Mi tanáhráq íwíahéq, Sísane sánsá íre sueq peh ambubu atione íwíahúne. Mira íwíahúnayabé itene iru eyoyóire.

<sup>4</sup> Manikáne sansá ambubu atiáhnaga ahbabáqsabe ahqáho atahráhúne. Ahqáho atáhnaraq wega séhréh aitanawire íwíahéq wega ite kaweraitanawire éq áwénunúne.

<sup>5</sup> Áwénunúnaraq íre pehipi áwénunúne. Írakaumo. Manikánka Wenawa iteba eqmaq áuwátáiraq ite mó keyábé irutaboirigeheéna wenawanka séhréh arite sansa sokigi aíraq ite íre pehipi áwénunúne.

<sup>6</sup> Ite ahbabáq aruqaruréq kaweptaq íre míahrahúnana awehraq tanáhráq Sísa Karáhéga ite meirena kaweraitanieéna putiowe.

<sup>7</sup> Tábúsuréh ání séhréh atanieéna mó anínká pukinabo? Írakaumo. Minawé íre wehukene sánsáne. Anotah kawéq ání séhréh atanieéna mó anínká pukinabomo.

<sup>8</sup> Ite ahbabáq animári míaraunaraq Sísa Karáhéga ite kaweraitanieéna putiowe. Miraú púana Manikánka itensabé anotahtaq arutaboirire ue aiq sokigi aíre.

<sup>9</sup> Sísa Karáhé putiotaq wene korahq tunsabe Manikánka itensabé, Kaweptaq míahwe aitéhre. Kaweptaq míahwe aitená ite anotah sehréh aita aitaéna mókake mó ke ehweh aríténa ite íre ehweh aitanawire.

<sup>10</sup> Ite Manikáne naruo anímári míaraunaraq wenahni putionsabe Manikánka insahwé aitáráire. Amahnága Sísa oga míai anínká ite insahwé aitárái kebá ména séhréh aita aitaire.

<sup>11</sup> Minawé aiq pútaq ehwéhnsábé iwíah íwíahúne. Maniká Iteribonsabé moq iwíah íwíahúne. Itene Wahnah Sísa Karáhéga insahwé aitéhnsábé Maniká Iteribonsabé anotah iwíah íwíahúne.

*Éhrámaga miraúnka puké sansa áhwárówana Sísaga miraúnka oga mé sansa áhwáró ehwehne.*

<sup>12</sup> Itega tagarionawe naho naho mah marákó márákó ahbabáq íre kotaq peh morá anínká ahbabáq áhwárówe. Wega ahbabárunka puké sansa áhwárówe. Moke anehe piah ké moq ahbabáruronsabé puku pukuowe.

<sup>13</sup> Mósísiga sehgóro ú ehweh íre irarútaq mah marákó márákóípéqté kégá ahbabárowe. Sehgíro ú ehweh íre irarú púana Manikánka mó aníné ahbabáq mó aníné ahbabárule íre íwíahúwe.

<sup>14</sup> Ahbabáq íre íwíahúwara Éhrámareq wene animárínseq puku pukuwe. Mósisi mío tanahráqkákáq pukuwe. Éhrámaga Manikánka pehragáhno ú ehweh anteruwara anehe piah kégá moq ahbabárera pukuwe.

Éhrámawe anehe sú aníné píkísah tahnsáne.

<sup>15</sup> Éhráma peh morá ání ména o sansa áhwárówana we anehe sú anímé peh morá anínká moq o sansa áhwárówana íre monseráh sánsátáré wíre. Ahqáho. Írakaumo. Sísane sánsánká Éhrámane sánsá kiotaikire. Éhrámaga ahbabárünsabe wereq moke mó kereq puku pukuowe. Sísa Karáhéga áhnte ke séhréh atanieéna itene ahbabáqsabe putiowe. Putionsabe Manikánka itensabé arutaboiréna séhréh aitená organúq ítéhre.

<sup>16</sup> Organúq ítéh sánsámé Éhrámaga ahbabáru sansámé íre peh morá sánsáne. Ahqáho. Írakaumo. Organúq ítéh sánsánká ite kaweraitehrana Éhrámaga ahbabárú sansanká ite anotahtaq íre kaweraitéhre. Éhrámaga peh morá ání ména ahbabárünsabe Manikánka ite ómi kamah aiuwaq pukorahúne. Áhnte ahbabárrowana Manikánka o sansanue organúq itena itensabé, Kaweptaq míahwe aitéhre.

<sup>17</sup> Peh morá ánínká ahbabárünsabe ahbabáqka áhnte wehuké saiqnariéhrara puku pukuowe. Puku pukuowana organúq ítéh sánsánká Éhrámaga ahbabárú sansa kiotaikire. Sísa Karáhéwé peh morá ánínká miraúnka Manikánka íné eqmaq núwátairana iteba

míarautaq págege arámbéhríéna ótaq sansá, itega íre tagariaro sansánurautaq pehwehrue míaraugaq tagarowe. Itega mina tagéq ahrebahme Manikánka íné eqmaq núwátái aní ména wene arambehri tábúsoqme mira aruqaruruge.

**18** Kawerue írátíahro. Éhrámaga ahbabárunka moke ahbabáronsabé Manikánka ómi mah kehiná kéhíná ehweh aritahráhire. Sísa Karáhéga kaweq sansánúnka Manikánka ómi mah kehiná kéhínánsábé, Kaweqtaq míáhwe aitená organúq itahráhire.

**19** Éhráma peh morá ání ména wega Manikánka ehweh anteruonsabe áhnte wehuké ahbabáq ke úkowe. Sísaga peh morá ání ména Wenabone ehweh tábúsoqme sehgjunsabe áhnte wehuké kaweraito púaq kaweqtaq míáhwe aitená organúq itahráhire.

**20** Wehukega ahbabáq áhnte kéhre siahtebageheéna Manikánka sehgíoro ú ehweh náriuwe. Ahbabáq áhnte agúwana Manikánka séhréh aitéh sánsanká ahbabáq sansa kiotaikire.

**21** Ahbabáqka wehuke saiqnariéhrara puku pukuowe. Itene Wahnah Sísa Karáhéga miraúnsabe Manikánka itensabé, Kaweqtaq míáhwe aitená organúq itena áhntetaq séhréh aitená itensabé, Oga míá míaoro aitéhre.

## 6

### *Sísa pukútaq ite moq pukowana ehwéhne.*

**1** Minayabe aneq iwíáhonehnkono? Mahra iwíáhonehnkono? Manikánka ite áhntetaq peh íregáritaq séhréh aitankéhboq ahbabáq aruqaruroneheqmúne iwíáhonehnkono?

**2** Ahqáho. Írakaumo. Pusa ké ahbabáq sansa súáhnserah ite moq pusa ké tahnsa méq ahbabáq suone. Minayabe árahue ahbabáq aruqaruronehnkono?

**3** Ite pusa ké tahnsa úkuna tanáhráq íre ahtebaho? Ite wání meraunaraq itereq Sísa Karáhéreq morá ání tahnsa úkuraunana we pukútaq ite moq pukowane.

**4** Ite wání meraunawe itereq Sísa Karáhéreq pukuraune. Pukuraunara we maisarótaq itenkakáq maisarówe. Maniká Iteribo págege ání ména Sísa Karáhé iriwe organúq atotaq itenkakáq iriwe organúq itowe. Ite o sansanigeheéna iriwe organúq itowe.

### *Ite Sísareq oga míá míáune i ehwéhne.*

**5** Sísa Karáhé pukúwaq ite moraráq pukéq wereq itereq morá ání tahnsa úkowane. Mina únserah Manikánka Sísa iriwe organúq atotaq itereq moraráq iriwe organúq itowaq wereq itereq morá ání tahnsa míá míaune.

**6** Ite tagarionawe Manikánka itene irupipeqté áhbábáq iwíáh awankátaq táhparowe. Itene ahbabáq iwíáh parabaruanieéna Sísa awankátaq táhparótaq Manikánka itene ahbabáqkakaq mitaq táhparowe. Minayabe amahnága ahbabáqka ite íre saiqnariahrahire.

**7** Itene ahbabáqka árahinsabé ite íre saiqnariahrahiro? Ahbabáqka pusa ké íre saiqnariahrahire. Ite pusa ké tahnsa úkúna puana íre saiqnariahrahire.

**8** Sísa Karáhé pukútaq itereq pukowanayabé itereq wereq moraráq míá míáoneheqmúne. Mina aiq pútaq ehwéhne iwíáhúne.

**9** Ite írátionawe Sísa Karáhé mó íre pukinae. We pukúwana iriwe organúq ato púana we mó íre pukinae. Mó íre pukorahi puana peh oga míá míainawire.

**10** We peh morá tánáhráq pukú púana mó íre pukinae. Pukúnka ahbabáq sansa aiq saiqnariehre. Amahnága we oga míá míáime Maniká awahbeh sansá miraire.

**11** Mina inserahnoro. Itene naho áhbábáq sánsá aiq suto puaq mó íre ahbabáronhehe iwíáhoro. Itereq Sísa Karáhéreq moraráq oga méq Maniká awahbeh sansá míraoneheqmúne iwíáhoro.

**12** Ahbabáqka itene pukorahi inónká saiqnariehnehboq ahbabáq apubúue súáhro. Itene irupipeqté iwíáhgá ite áúgi ínehboq ahbabáq iwiáh apubúue súáhro.

**13** Itega irutaboiro naneq meyanheéq itene aiayahnka ahbabáriyeho. Ahbabáriyehboq ite mó anínká mó anínkáue Manikánsabe, Néne ninonka are áwúge. Wahnahnainto

teawéro. Itega pusa ké tahnса míarotaq Manikánka organúq ítárái puaq wensabé áhrabéq, Arene kaweq sansá miraoneheqmúne teawéro.

<sup>14</sup> Manikánka séhréh aitéh púana Mósísiga sehgóro ú ehwehnká íre ehweh aitéhre. Minayabe ahbabáqka ite íre saiqnariéhre.

### *Sehgíra sansánká ite saiqnarawé ehwehne.*

<sup>15</sup> Minayabe aneq iwíáhonehnkono? Manikánka séhréh aitéhraq Mósísine ehwehnka íre ehweh aitéhnsábé ahbabáq aruqaruronehnkono? Írakaumo.

<sup>16</sup> Sehgíra sansánká saiqnariéhmé íre iahtebaho? Ite ahbabáq aruqarurirataq ahbabáqka saiqnariahnaraq pukoneheqmóe. Ite Manikáne sansá sehgrataq kaweq sansánká ite saiqnariahnaraq kaweqtaq mía míaoneheqmóe.

<sup>17</sup> Menah itega ahbabáq aruqarururotaq ahbabáqka ite saiqnariaraire. Saiqnariaritaq mó kegá aiq pútaq ehwéh íwáhnoruwaq ireq iwíáh íwíáhéq sehgírowana ahbabáqka saiqnariaraime Manikánka sabi iuwátáire. Minayabe Manikánsabe iwíáh íwíáh atone.

<sup>18</sup> Kweq sansánká ite saiqnariéhnsábé iwíáh íwíáh atone.

<sup>19</sup> Íre irasa ké míéhboq kawerue irageheéna pahsuqme teiúge. Menah itega ahbabáqsabe irutaboiréq mira aruqaruronserah amahnága peh kweq sansánsábé irutaboiréq kaweqtaq míáhro.

<sup>20</sup> Ahbabáqka ite saiqnariaraitaq itega kaweqtaq íre míahrahurowe.

<sup>21</sup> Itega ahbabáruro sansánsábé amahnága iyehitehre. Itega ahbabárurotaqmé kweq apéq meroo? Írakaumo. Mina onserahno kewé pukoneherawoe.

<sup>22</sup> Ahbabáqka ite saiqnariarairana Manikánka sabirutairaq wene arambehri anímári úkurowe. Minayabe ite kaweqtaq méyabe iwíáh íwíáhéq oga mérapeq mía míaoneheqmóe.

<sup>23</sup> Ahbabáqka saiqnariéhká aneq apéq wehuke siro? Ahbabáqka saiqnariéh ké pukoneherawoe. Itene Wahnah Sísa Karáhénabe aiq pútare atona kewé Manikánka wáh kaweraitena organúq itena, Sísareq ahriahri mía míaoro aitéhre.

## 7

### *Oganúq itonsabe kweq sansánonehe i ehwéhne.*

<sup>1</sup> Néne iyahnabo anímárino, itega Mósísiga miraoro ú ehweh aiq ahtebahwe. Wehukene oga mé tanahráq mah ehwéhmé anterúéhrataq mi ehwéhká ehweh aritahráhire. Se pukirataq mi ehwéhká se íre ehweh aritahráhire. Minawé aiq írátíah mino.

<sup>2</sup> Mi ehwéhká, Arenawehqpa mía míáuno únsabe wenawehq oga míéh tánáhráq áuwéh áhréwé mi ehwéh aiq anterúéhre. Wenawehq aiq pukirana mó weh kéréhmé mi ehwéh íre anterúéhre. We puki puana mi ehwéh íre anterúéhre.

<sup>3</sup> Wenawehq oga míéhtáq mó weh kéréhrana mi ehwéhká, Are ahbabáq ini móne atéhre. Wenawehq pukínaraqmé we mó weh kéráhráhire. Wenawehq puki puana mó wehkinsabé mi ehwéhká, Are ahbabáq ini móne íre atahráhire.

<sup>4</sup> Néne iyahnabo anímárino, ite mi iní tahnса móe. Sísa Karáhé pukútaq ite moq pukunsabé Mósísine ehwehnka amahnága íre ehweh aitéhre. Manikánka wenahni iriwe organúq atowaq Síane animári ukéq wene arambehri miraoneheqmúne.

<sup>5</sup> Iteitene ahbabáq iwiáhgá saiqnariarai puaq Mósísine ehweh ireq mi ehwéhnsábé iuwahriehre éq pukorahúna ahbabáq aruqarurúne.

<sup>6</sup> Sísareq moráráq pukowanayabé ite saiqnariarai naneq soraq iuwena Mósísine ehweh moq soraq sueq amahnága Manikáne Awanka sokigi aí ó sánsánúne. Íre Mósísiga sehgóro ú sansa peh Manikáne Awanka sokigi aí ó sánsá sehgrioneheqmúne.

### *Ahbabáq sansanká ite ahbabáraitehre i ehwéhne.*

<sup>7</sup> Ite ahbabáronaraqmé aneq iwíáhonehnkono? Mósísine ehwehme ahbabáq ehwehne íwíáhonehnkono? Írakaumo. Peh morá mi ehwéh íratáunsabé ahbabáq ani múde íwíáhurauge. Mi sehiránká mahraréna, Mó aníné ménsámehnsánsabe aigará pabekíneho ire. Mi ehwéh íratáunsabé íné tagaríomé mó aníné ménsámehnsánsabe nigará pabekime ahbabáq míre.

<sup>8</sup> Mi ehwéh irena íre sehgoráhuraunsabé ahbabáqka íné saiqnariarairana áhnte íre kaweq sansá néne nirupipeq áhwararaire. Mósísine ehweh íre kéhtáq tahirí ahbabáq árahue ahtebóna iripo?

<sup>9</sup> Mósísine ehweh íre íratáutaq, Íné kaweq aní múde íwíáhurauge. Anehe mi ehwéh kawerue irena, Ahqáho. Íné ahbabáq ani

<sup>10</sup> púana pukorahuge íwíáhurauge. Wehukega oga míageheéna Mósísiga mi ehwéh irarúwe. Mi ehwéh irena, Íné íre oga míahrahuge éna peh pukorahuge íwíáhurauge.

<sup>11</sup> Mi ehwéh irena íre sehgoráhuraunsabé ahbabáqka péhe sásá aintena saiqnariarairana, Íné pukorahuge íwíáhurauge.

<sup>12</sup> Minayabe anere enehnkono? Manikánka iwíáh atowana Mósísiga irarú ehwehmé Manikáne ehwehnéna tábúSORÉH éhwéhnéna kaweq ehwéh míre.

<sup>13</sup> Mi kawéq éhwéhnká íné íre kaweraintaráiro? Írakaumo. Mi ehwéh íratáugana ahbabáqka saiqnarawéna íre kaweraitaráire. Íné áhnte ahbabáq ání ména pukorahuge íwíáhinkeheéna mi ehwéhnká sokigi aníatáire.

### *Ahbabáqka ite saiqnariéh éhwéhne.*

<sup>14</sup> Ite íratíonawe Manikánka iwíáh atowana Mósísiga mi ehwéh irarúwe. Minayabe mi ehwéh kaweq ehwéhnirana ahbabáqka íné saiqnariéhrana Maniká awahbeh sansá íre sehgoráhéná peh ahbabáq aruqaruruge.

<sup>15</sup> Íné nuwahbeh kawéq sásá mirainie íwíáhume íre mira aruqaruruge. Peh íre nuwahbeh ahbabáq sásá mira aruqaruruge. Aneqsabé mira aruqarurugo? Minawé íre niahteboge.

<sup>16</sup> Íné nuwahrieh ahbabáq sásá mira aruqarurugana Mósísine ehwehnka néne ahbabáq sokigi anírana mi ehwéhmé peh kaweq ehwéhne íwíáhuge.

<sup>17</sup> Minayabe íre ínénéga peh nirupipeqté áhbábáq íwíáhgá saiqnariéhnká ahbabáq aruqaruruge.

<sup>18</sup> Kaweq sansá mirainaige uganawe íre miraorahuge. Íre miraorahunsabé íné tagaríomé nirupipeq kaweq iwíáh íre kékhe.

<sup>19</sup> Íné nuwahbeh kawéq sásá mirainie íwíáhume íre mira aruqaruruge. Peh nuwahrieh ahbabáq sásá mira aruqaruruge.

<sup>20</sup> Íné nuwahrieh ahbabáq sásá mira aruqarurunsabé íre ínénéga peh nirupipeqté áhbábáq íwíáhgá saiqnariéhnká ahbabáq aruqaruruge.

<sup>21</sup> Íné mahraue tagaríóge. Íné nuwahbeh kawéq sásánsábé iwíáhutaq ahbabáqka saiqnariéhsábé íre miraorahuge.

<sup>22</sup> Manikáne sansá peh kaweq sansáne íwíáhéná mi sansánsábé iwíáh íwíáh.

<sup>23</sup> Mirainaige íwíáhugana nirupipeq mó iwíáh kékhe. Ahbabáq iwiáhgá kaweq iwíáh kiotaiki puana ninonka nirutaboiru ahbabáqka saiqnariéhrana ahbabáq aruqaruruge.

<sup>24</sup> Íné ahbabáq ani mío púana nirupipeq áhnte umehire. Insegá séhréh aintena sabi nuwankéhbo?

<sup>25</sup> Ahbabáqka saiqnariéhsábé pukorahuge. Manikáne sansá sehgieyabe nírana peh nirutaboiru íwíáhgá saiqnariéhrana ahbabáruge. Minayabe insegá séhréh aintena sabi nuwankéhbo uge. Sísa Karáhé itene Wahnahnka miraúnka Manikánka séhréh aintena sabi nuwahráhire. Minayabe wensabé iwíáh íwíáh atóge.

## 8

*Sísa Karáhéga itene ahbabáq kaqiuwena Manikáne Awa iteba eqmaro ehwehne.*

<sup>1</sup> Sehgíoro ú ehwehnká Sísa Karáhéreq mía míauña ke íre ehweh aitéhre.

<sup>2</sup> Aneqsabé íre ehweh aitehro? Ahbabáqka ite saiqnariéhnsábé pukorahúnaraq Manikáne Awanka organúq itena sabi íuwéhre. Sabi íuwéhrana Sísa Karáhéreq mía míauñayabé íre ehweh aitéhre.

<sup>3</sup> Mósísiga sehgíoro ú ehwehnká itene ahbabáq íre kaqiuwahráhire. Árahinsabébo? Itega mi ehwéh íre sehgoráhúne. Minayabe mi ehwéhnká íre kaweraitahráhire. Íre kaweraitahráhinsabé Manikánka webataq wewega itene irupipeqté áhbábáq íwíáh kaqiuwankeheéna wenahni eqmarowe. Eqmarowana ite tahnsá wéhükéní úkéna itene ahbabáqsabe putiowe.

Itene ahbabáqsabe putiotaq Manikánka mi ahbábáq kaqsuonsabe amahnága itene ahbabáq iwiáhgá ite íre saiqnariahrahire.

<sup>4</sup> Íre iteite iuwahbeh ahbabáq iwiáh peh Manikáne Awanka iwiáh aitehraq we awahbeh iwiáh miraonsabé kaweq sansá Mósísine ehwehnka irari sansá mira aruqarurúne.

<sup>5</sup> Sene sirupipeqté áhbábáq iwiáh mirao kegá ahbabáq sansansábé iwiáh íwíáhowe. Manikáne Awanka iwiáh arítéh árámbéhrí mirao kegá wene sánsásábé iwiáh íwíáhowe.

<sup>6</sup> Sene sirupipeqté áhbábáq sánsásábé iwiáh íwíáho kegá pukoneherawoe. Manikáne Awanka awahbeh sansásábé iwiáh íwíáh atáh kégá oga mía míawana sirunukiq sítéhre.

<sup>7</sup> Sene sirupipeqté áhbábáqsábé suwahbeh kegá Manikáne ehweh íre sehgira peh anteruera Manikáne naruo míáhwe.

<sup>8</sup> Sene sirupipeqté áhbábáq iwiáh sehgíó kegá Maniká awahbeh sansá íre sehgoráhwe.

<sup>9</sup> Manikáne Awanka itene irupipeq mía míairaq itene irupipeqté áhbábáq iwiáh íre miraia peh Manikáne Awanka iwiáh aitéh íwíáh miraowe. Sísa Karáhéne Awanka wene arupipeq íre mía míai anímé we íre Sísa Karáhéne ani míre.

<sup>10</sup> Itega ahbabáruronsabé itene inonka pukorahi naneq mire. Sísa Karáhéga itene irupipeq míéhraq kaweptaq míárahéq iteiuywame oga mía míawwe.

<sup>11</sup> Manikáne Awanka itene irupipeq mía míainaraq wega Sísa Karáhé iriwe organúq atonserah itene pukorahi inónká moq mókake iriwe organúq itankéhe. Manikáne Awanka itene irupipeq mía míai puana mirainawire.

*Manikáne Awanka séhréh aitéhraq ite Manikáne animári úkorahúna ehwéhne.*

<sup>12</sup> Minayabe ite anotah arámbéhrí kékre. Mi arámbéhríwé íre itene irupipeqté áhbábáq sánsá miraé arámbéhrí wíre. Ahqáho. Írakaumo. Néne iyahnabo animáriño,

<sup>13</sup> itene irupipeqté áhbábáq iwiáh mirairataqmé pukoneheqmóe. Manikáne Awanka séhréh aitéhnsábé itene irupipeqté áhbábáq iwiáh kaqsueq íre mirairataq oga mía míaoneheqmóe.

<sup>14</sup> Manikáne Awanka iwiáh arítéh íwíáh sehgíó kewé Manikáne animáriñe.

<sup>15</sup> Manikánka Wenawa iteba eqmarowana Wenawanka ite saiqnarawéna áhre aitanabo? Írakaumo. Wene animári míageheéna eqmarowana Wenawanka ite págege aitéh púaq ite Manikánsabe, Iteriboe atone.

<sup>16</sup> Manikáne Awanka itene irupipeq ména, Néne animári móe tei teininsabé ite tagarionawe ite Manikáne animári múne.

<sup>17</sup> Ite Manikáne animári míona puaq ite mókake wega ina naneq kaweq naneq awaq mianeheqmúne. Sísa Karáhé, iteruwahga aiq awaq mionserah itega mókake moke kaweq naneq awaq mianeheqmúne. Segá Sísa áwíoqnonserah ite moq íwíoqnagehe. Íwíoqnegrataq Síane sánsá kawerue sehgiónaraq mókake we tahnsá méq wereq mía míaoneheqmúne.

*Kaweqtapéq awaq me ehwéhne.*

**18** Mah marákóípéq míona tanáhráq íérinka irupipeq umehire. Mókake téhrehrabeq míahnaraq áhnte kawéqtápéq púana irupipeq anotah eyóyóinae. Anotah eyóyi naneqka umehi naneq kiotaikína puana umehinsabé anetaníbo íwíahhéq kaweq-tapéqsábé áwénunonehe.

**19** Ite Manikáne animári púana wega mibeqté kaweraitahna sansá sokigi ainaraq ahtebanehe. Mi tanáhráq sínaraqsábé moke Manikánka miraú naneqka arutaboiréna áwénunire.

**20** Téhwe moke miraú naneq anotah kawerarowana anehe abehrúkúwe. Íre wewega abehrúkúwe. Írakaumo. Peh Manikánka abehrúkuno atowana mira agúwe. (*Stat 3.17-19*)

Amahnága mi naneqka Manikánka kawerarahna tanáhráqsábé áwénunire.

**21** Mókakewe moke miraú naneq mó íre kárékinae. Manikánka omasa tánáhráq moke mi naneq kawerarankéhe. Ahbabáqka ite wene animári íre saiqnariahrah inserah kareki sansánká moke miraú naneq íre saiqnariahrahire.

**22** Ahre inínká ani maqmianaitaq érinsabé uwo uwoire. Ite tagarionawe uwo uwoin-serah moke miraú naneqka naho naho uwo uwoéna amahnágaákáq uwo uwoéna kaweq tanáhráq sínaraqsábé áwénunire.

**23** Uwo uwoéna kaweq tanáhráq sínaraqsábé áwénuniraq ite wehukega moq uwo uwoéq áwénunúne. Manikánka Wenawa téh iteba eqmarowana iteba mía míáéna séhréh aitéhre. Minayabe anehe wega itene inonkansabé, Kaweq inónká úkúno aitena néne animári móe aitanawire. Mi tanáhráqsábé arutaboiréq áwénunúne.

**24** Manikánka ite kaweraitena organuq itáráirana amahnága inonka kaweraitahna tanáhráqsábé áwénunúne. Áwénunúna naneq tagónaraq tahirí íre áwénunúna irino. Aiq tageh anínká mó íre áwénunire. Wega aiq tageh puana aneqsabé mó áwénuninkehbo?

**25** Itene iuranka íre tagóna naneqsabé áwénunúne. Manikánka aiq mirainawire íwíahhéq pehwehrue áwénunúne.

**26** Íre págege ke míonana Manikáne Awanka séhréh aitéhre. Manikánsabe, Aneq ehwéh púrerue teawenéhnkono únana Manikáne Awanka séhréh aitéhre. Wega itene irupipeq míéhraq itega íre ehwehnorahúna tanáhráq peh mukaq mukaqsúnana ite séhréh aítanieéna wene iwiáh Maniká teawena iteitene umehi naneqsabé púreraitéhre.

**27** Manikánka itene irupipeqté íwíah tagariéhre. Wenawanka Maniká awahbeh sansá tagariéh púana ite wene animáriñsábé púreraitéhrana Manikánka wene púreq ehwéh íréhre.

**28** Wenahni táhnsá míageheéna Manikánka omaq itowaq wensabé irutaboirúne. Ite tagarionawe ite meirena kaweraitanieéna Manikánka moke kaweq tanáhráqkákáq moke íre kaweq tanáhráqkákáq séhréh aitéhre.

**29** Téhwe Manikánka ite tagariowe. Tagarawéna wenahni táhnsá míageheéna ite omaq itowe. Sísa iteruwah ebeq kéna míowaq ite wenábáqmari míone.

**30** Manikánka ite omaq ito ke íáhrabéna itensabé, Kaweqtaq míáhwe aitéhre. Kaweqtaq míáhwe aitéhnsábé wega itensabé, Ínéba méq kaweqtaq mía míaunderah míagehe aitowe.

### *Manikánka itensabé ahriahri arutaboiraitéh éhwéhne.*

**31** Manikánka itensabé, Ínéba méq kawetaq mía míaunderah míagehe aitonsabe aneq iwiáhonehnkono? Wega ite íéhneh aitéhnsábé itene naruoga íre saiqnariahrahó mino.

**32** Manikánka wenahni íre saiqnatasta peh moke itene ahbabáqsabe pukinkeheéna eqmarowe. Wega íre saiqnato puana moke kaweq naneq náiená séhréh aitanawire.

**33** Wene animári míageheéna Manikánka ite omaq ito púana insega ite ehweh aitankéhbo? Írakaumo. Maniká wewega itensabé, Kaweqtaq míáhwe aitéhre.

**34** Manikánka kaweraito púara inseréhga itene ahbabáqsabe ehweh aitera kamahigéhbo? Írakaumo. Sísa Karáhéga itene ahbabáqsabe putiowana iriwe organúq atowana wega amahnága Maniká Iteribone ayah púpeq ména itensabé púreraitéhre.

<sup>35</sup> Sísa Karáhéga itensabé arutaboiraitéhre. Íre kaweq tanáhráq sínawe, íeri tanáhráq sínawe, íwioqné tanahráq sínawe, ehwehráhna tanáhráq sínawe, tabonah tanahráq sínawe, pukorahúna tanáhráq sínawe, ite subiqme kamah áira tanáhráq sínawe Sísaga itensabé íre arutaboiria peh iuwankéhbo? Írakaumo. Moke mi tanáhráq moq arutaboiraitena iteba mía míainawire.

<sup>36</sup> Minayabe Manikáne ehwehnka mahraréna, Arene animári miónayabé sega ahkakebopoq iubiq suaneherawoe. Wehukega sipisípiq subiq súáhnserah ite moq iubiq suanehe íwíáhowe ire *(Buk Song 44.22)*

<sup>37</sup> Moke teiyú tánáhráqsábé áhreonehnkono? Írakaumo. Sísaga itensabé mi tanáhráqkákáq arutaboiraitena íehnehi puaq itene naruo kiotaikorahúne.

<sup>38</sup> Mó kegá miraonsabé wega itensabé íre arutaboiria peh túbáh aginabo? Írakaumo. Ite pukonaraqmé oga miónaraqmé Manikánka itensabé íre arutaboiria peh túbáh aginabo? Írakaumo. Íopeqté kewé owainawamarímé anotah wahnáh kewé sega miraonsabé Manikánka itensabé íre arutaboiria peh túbáh aginabo? Írakaumo. Amahnága íre kaweq tanáhráq kékhsábé mókake íre kaweq tanáhráq sínaraqsábé Manikánka itensabé íre arutaboria peh túbáh aginabo? Írakaumo.

<sup>39</sup> Sehwerapeqté náneq kékhsábewé, maraipéqté náneq kékhsábewé, Manikánka moke miraro náneq kékhsábewé Manikánka itensabé íre arutaboria peh túbáh aginabo? Írakaumo. Itene Wahnh Sísa Karáhé kérónayabé Maniká Iteriboga íre túbáh agia peh ahriahri itensabé arutaboiraitanawire. Minawé aiq tagarióge.

## 9

### *Poraga Ísara keyábé arutaboirú ehwehne.*

<sup>1</sup> Íné Sísa Karáhéne ani mío púana péhe éhwéh íre teiasa peh aiq pútariahnsanuge. Manikáne Awanka nirupipeq ména aiq pútaróne aintéhre.

<sup>2</sup> Nánuwahrah Isárá ké Sísa Karáhé íre tagaríahnsábé nirupipeq umeh agu aguire.

<sup>3</sup> Nánuwahrah Isárá kégá Sísa kérera oga míáhtáq tahirímé íné iraipéq pokéyabe íre ahqáho u irino.

<sup>4</sup> Ísara ke Manikáne animári míageheéna Manikánka naho omaq itowe. Omaq itowara igaqnaréhga Manikáne págege tehreh náneq tagowana wega omasa éhwéh teriuwe. Wega Mósisi iwíáh atowana sehgióro ú ehweh teriuwe. Manikánsabe iwíáh iwíáh ató sansa sokigi ariena mókake awinauge ú ehweh teriuwe.

<sup>5</sup> Itene igaqnaréh anotah ke míowe. Sísa Karáhéga mah marákóípéq tutaq wenano Ísara iní míowe. Sísa Maniká ména moke miraú naneqkakáq wahnahniraq wensabé ahriahri iwíáh iwíáh atone. Aiq míre.

### *Manikánka Ísara kebá miraú sansansábé éhwéhne.*

<sup>6</sup> Naho naho Manikánka Ísara keyábé, Néne animári míageheéna omaq itóge úwe. Amahnága áhnte Ísara kegá Manikánsabe suwahriehre éra íre wene animári míáhwe. Minayabe Manikánka teriu ehweh abehq úkiro? Írakaumo. Manikánka Ísara kené sinahwaréh wene animári míageheéna ómi íre omaq sitowe.

<sup>7</sup> Minayabe wega íre moke Ébáráhmane animári omaq sitowe. Peh morá wenahni Áhísáhkine animári Ísara kené sigaqnaréh míowe. Manikánka Ébáráhma naho teawena, Arenahni Áhísáhkiwe itene igaqna míankehe úwe. *(Stat 21.12)*

<sup>8</sup> Mah éhwéh áwahewé íre Ébáráhmane ahrega maqmaro animárínká Manikáne animári úkowe. Írakaumo. Peh Manikáne ehwehnsabé aiq pútare ata atao kegá Ébáráhma kahnáh kée ue síwírarítáhwe.

<sup>9</sup> Mi éhwéhnúmé Manikánka Ébáráhmansabé naho mahraréna,

Mó opéq kouwekinaraq Sárah arene ahrega animai maqmarankéhe úwe. (*Stat 18.10,14*)

<sup>10</sup> Mó ehwéhnsábé iwíáhoro. Áhísáhkine ahre wenawíq Árébékaga morágáké téhraníté maqmiowe. Sibowáwé peh morá itene igaqna Áhísáhkie.

<sup>11</sup> Sinowagá maqmianaútaq sega kaweq sansankákáq ahbabáq sansankákáq íre mirorahuye. Minayabe íre seyene arambehriyabé peh morá Maniká awahbeh iwíáhgá aiq pútaraginkeheéna omaq sitowe.

<sup>12</sup> Mi tanáhráq Manikánka sinowansábé,  
Ebeq piah anínká anehe piah aní awahbeh arámbéhrí mirainkehe úwe. (*Stat 25.23*)

<sup>13</sup> Minayabe Manikáne ehwehnka aiq mahraréna,

Anehe piah aní Sékópansabé nirutaboiréna ebeq piah aní Ísonsabé nuwahriehre ire. (*Lo 21.15*)

<sup>14</sup> Manikánka aiq irarúnsabe aneq iwíáhonehnkono? Wega íre tábúsoq sitéhre iwíáhonehnkono? Ahqáho. Mira iwíáh íre orahúne.

<sup>15</sup> Manikánka Mósínsabé nahoh mahraréna,  
Ínénéga iwíáhu aní séhréh ataníe. Ínénéga niruní ánínsábé nirutaboirataníe úwe. (*Kisim Bek 33.19*)

<sup>16</sup> Manikánka wehukení omaq atáhnsábé íre mi aníné iwíáh wíre. Íre wene arambehriga séhréh atéhrana peh Manikánka wehukenínsábé arutaboiréna séhréh atéhre.

<sup>17</sup> Mósísi Ísípi marárórápéq míotaq Manikáne ehwehnka mibeqté wáhnáhnsábé mahraréna,

Néne págege sansá sokigi arinieéna wahnahnúno ataráuge. Minayabe mah kehiná  
kéhínánká néne págege sansá ahtebagehe ire. (*Kisim Bek 9.16*)

<sup>18</sup> Minayabe Manikánka wehuke tagéna iwíáhéna mó keyábé arutaboiréna séhréh aritena mó keyábé, Saiyo animári méq mitaq míáhro arítéhre.

<sup>19</sup> Ite míáhrabeqte áninká ínénabe, Maniká wewe awahbeh iwíáh mirainsabé árahinsabé itene ahbabáqsabe ehweh aitehro kasenire. Kasenéna, We awahbeh iwíáh mirainsabé wehukenínká we awahbeh iwíáh íre miraorahi mino ire.

<sup>20</sup> Itewe peh wehuke puaq Manikánsabe abehq éhwéh kaseniyeho. Kunubaga ehwehnitaq tahirímé miraréh ánínsábé, Aneqsabé mahna tahnsa miraintahno iripo? Írakaumo.

<sup>21</sup> Kunuba miraréh áninká peh morá áwánkátaté kawerue mirai kunúbáákáq íroke kunúbáákáq miraime ehweh atanabo? Írakaumo. Kunuba miraréh áninká wewene arambehri puana we awahbeh iwíáhue miraréhre.

<sup>22</sup> Manikánka moq we awahbeh iwíáhue miraréhre. Wehukega wene págege sansá tagageheeéna Manikánka kamah arie sansa sokigi arítéhre. Wega ahbabáq keyabé síwénunéna peh mótaq mótarue ehweh aritena anotahtaq kamah arinkéhe.

<sup>23</sup> Wega wewe anotah aní mé sansankákáq wewe págegeue séhréh aite sansankákáq sokiginieéna ite wene animári arutaboiraitena iwíáhéna, Mókake ite néne téhrehrabeq kaweqtaq míagehe úwe. Mi iwíáhwé peh wewene iwíáhe.

<sup>24</sup> Manikánka íre peh morá ite Ísara keyábé arutaboiraitena omaq itowe. Wega nahnsó keyábé moq arutaboiraritena omaq sitowe.

<sup>25</sup> Minayabe Manikáne ehweh irarú ani wenawíq Óséaga púkuipéq sehiranéna Manikáne ehweh mahraréna,

Nahnsó keyábé, Menah ite íre nánuwahrah ke woe. Itensabé, Nánuwahrah kee aritaníe. Íre  
nirutaboirurau keyábé, Nirutaboiruge aritaníe úwe ire. (*Hosea 2.23*)

<sup>26</sup> Mi ehwéhnsáká mó mahraréna,

Wega mi keyábé, Ite íre néne animári móe arítáráurabeq, Ite íné oga mía míau Manikáne  
animári móe aitaníe úwe ire. (*Hosea 1.10*)

<sup>27</sup> Manikáne ehweh irarú ani wenáwíq Áísáíaga naho Ísara keyábé iwíáhéra anotahtaq mahraréna,

Nahmbísibeq arahwé áhnte kére. Ísarane anahwaréh mina tahnsa áhnte agirana  
Manikánka peh táhmaro kaweraritankéhe.

<sup>28</sup> Wega mó mah kehiná kéhínánsábé ehweh aritena apubúue kamah arinawire úwe.  
*(Aisaia 10.22,23)*

<sup>29</sup> Minayabe Áísáíaga mó mahraréna,  
Itene moke miraorahi Wahnáhnká anotahtaq kamah aiená íre túbáh agútaq tahirímé  
wega Sóróma suwahpeqte kéreq Kómóra suwahpeqte kéreq subipáhrarutonserah  
iteinahréh moq subipáhrarúeh irino úwe.  
*(Aisaia 1.9)*

### *Ísara kegá íre aiq pútare ató ehwehne.*

<sup>30</sup> Mi ehwéh ireq aneq iwíáhonehnkono? Téhwe nahnsó kegá kaweqtaq méyabe íre sirutaboiruwe. Amahnága sega Manikáne ehweh irera aiq pútare atáhnsábé Manikánka sensabé, Ite kaweqtaq míáhwe arítéhre.

<sup>31</sup> Ísara kegá Mósísiga sehgóro ú ehweh sehgiioneheqmúne éra mi ehwéh íre sehgoráhowe. Minayabe se kaweqtaq íre míáhrahewe.

<sup>32</sup> Aneqsabébo? Segá íre aiq pútare atera peh seyene arambehriyabé iwíáhowe. Minayabe wehukega ahtate ebáh íre tagéra siyobetaq pegue inahnsubónserah sega íre aiq pútare atera peh áhwára áhwáraowe.

<sup>33</sup> Minayabe Manikáne ehwehnka aiq mahraréna,  
Tagariáhro. Íné Sáióna sawéhrápéq\* Ísara kené ahtapeq siyobetaq pegue inahnsuboráhi ebáh máróge. Mitaq kékhsábé wehukega surahoneherawoe. Wensabé aiq pútare atáh ké íre siyehitanawire ire.  
*(Aisaia 8.14, 28.16)*

## 10

### *Ísara kegá Manikáne sansa íre írátiáh éhwéhne.*

<sup>1</sup> Néne iyahnabo anímáríno, íné anotahtaq nuwahbehme Manikánka Ísara ke nánuwahrah merirena kaweraritankeheéna púreq aruqaruruge.

<sup>2</sup> Íné teiúmé sega Manikáne sansá sehgiyeabe sírara peh mi sansá íre ahtebah puara áhwára áhwáraowe.

<sup>3</sup> Manikánka wehuke kaweraitéh sánsá íre ahtebahwe. Peh seyene iwíáho sansá mira aruqaruronsabé Manikánka kaweraitéh sánsá íre sehgiówe.

<sup>4</sup> Mósísine ehwehnka itensabé, Kaweqtaq míáhwe íre aitahráhirana peh morá Sísa Karáhéga itensabé, Kaweqtaq míáhwe aitahráhire. Minayabe Manikánka moke Sísansabé aiq pútare atáh kékabé, Ite kaweqtaq míáhwe aitéhre.

<sup>5</sup> Mósísiga sehgóro ú ehweh sehgó kékabé wega naho sehiranue mahraréna,  
Néne ehweh kawerue sehgiá kegá oga mía míaigehe úwe.  
*(Wok Pris 18.5)*

<sup>6</sup> Manikánka Sísansabé aiq pútare atéh áninsábé, Are kaweqtaq míahne atéhrana Manikáne ehweh sehgié. Mi anínká iraréna, Insegá íópeq pokinabo itene irupipeq iwíáhiyeho ire. Sísa Karáhé íópeqté kiweranehe iwíáho? Mira iwíáh íre oro.

<sup>7</sup> Mi anínká mó mahraréna, Insegá pusa ké míáhrabeq pokinabo kaseniyeho ire. Sísa Karáhé pusa ké míáhrabeqte tumeranéhe iwíáho? Mira iwíáh íre oro.

<sup>8</sup> Mi kasé éhwéhnsábé Manikáne ehwehnka mahraréna,  
Néne ehweh peh wahtotaq kéné itene irupipeq kékraq íwéhrate irarewe ire.  
*(Lo 30.12-14)*

Mi ehwéhmé aiq pútare atona ehwéhnsábé íwáhnorúne.

\* <sup>9:33:</sup> Sáióna sawéh Sarúsarama suwahpeq kére. Mó kegá Sarúsarama suwahpeqsabé Sáiónae ue áwíratówe.

<sup>9</sup> Íwáhnoréq mahraue teiune. Sísa néne Wahnah mire íwéhrate iraréq wega pukútaq Manikánka iriwe organúq atonsabe irupipeq iwíáhirataq wega meirena kaweraitankéhe.

<sup>10</sup> Manikánka irupipeq aiq pútare atáh ké insahwé aitena íwéhrate, Sísa néne Wahnah mire irare ke kaweraitéhre.

<sup>11</sup> Minayabe Manikáne ehwehnka aiq mahraréna,  
Wensabé aiq pútare atáh ké íre siyehitanawire ire.

(Aisaia 28.16)

<sup>12</sup> Manikánka Ísara kereq nahnsó kereqsabé peh morá íwíáhire. Itene Wahnahnka Ísara kereq nahnsó kereq wahnahnaitena wensabé áhrabo kené ehweh irena kaweraitena séhréh aitéhre.

<sup>13</sup> Minayabe Manikáne ehwehnka aiq mahraréna,  
Are néne Wahnah míahno. Íné séhréh ainto ue áhrabira kewé Manikánka kawerari-tanawire ire. (Joel 2.32)

<sup>14</sup> Wehukega Sísansabé íre aiq pútare atéhrataqmé árahue néne Wahnah mé íné séhréh ainto ue áhrabigehbo? Sísa éhweh íre íréhrataqmé árahue aiq pútare atagéhbo? Sísa éhweh terí ání íre míahnaraqmé árahue iragéhbo?

<sup>15</sup> Sísa éhweh terié ké íre eqmaq súéhrataqmé árahue korerigéhbo? Minayabe Manikáne ehwehnka aiq mahraréna,  
Kaweq ewhéh teríra ke sirara tagehrataq sene sirupipeq eyoyóinae ire. (Aisaia 52.7)

### *Áhnte Ísara kegá kaweq ehwéhnsábé íre aiq pútare ató ehwehne.*

<sup>16</sup> Moke kaweq ehwéh íráh kégá mi ehwéh sehgioo? Írakaumo. Minayabe Áísáíaga naho mahraréna,  
Itene Wahnahno, itega teriuna ehwéhnsábé inseréhga aiq pútare aitaho úwe. (Aisaia 53.1)

<sup>17</sup> Ite tagarionawe ite Manikáne ehweh ironaraq aiq pútare atone. Mah ehwéhmé Sísa Karáhégá téh irarúwe.

<sup>18</sup> Minayabe kasenuge. Ísara ke mi ehwéh íre írátóo? Sene ahrerate mi ehwéh aiq írátowe. Minayabe Manikáne ehwehnka aiq mahraréna,  
Se míáhrabeq mi ehwéh aiq teriatowara íráhwe. Mi ehwéhká mah marákó márakóípéq aiq abae agire ire. (Buk Song 19.4)

<sup>19</sup> Mó kasenuge. Ísara kegá mi ehwéh áwahe íre ahteboo? Ahqáho. Segá aiq ahtebowe. Minayabe Mósísiga sehiranéna Manikánka irarú ehweh mahraréna,  
Nahnsó ke íre áwíqkakaq ké míáhwe. Se íre anotah ke míáhwe. Se íre ahtebah ke míáhwana ínéga mi ke kaweraritahnaraq itega abiahnsa ariteq taonsahoneheqmóe úwe ire. (Lo 32.21)

<sup>20</sup> Áísáíaga íre áhreia Manikánka irarú ehweh pahsuqme mahraréna,  
Ínénabe íre ninebahruro kegá ínéba sewe. Ínénabe íre kabaruro kebá ábóraragurauge úwe.  
<sup>21</sup> Ísara keyábé Áísáíaga mó sehiranue Manikánka irarú ehweh mahraréna,  
Ahriahri mi ke séhréh ariteyabe nírara se saiyoéra néne ehweh anteruq anterurowe úwe. (Aisaia 65.1-2)

## 11

### *Manikánka Ísara keyabé arutaboirarito ehwehne.*

<sup>1</sup> Ísara kewe saiyo ke míáhnsábé kase ehweh kékre. Manikánka sensabé anetaníbo éna kaqsuehro? Írakaumo. Ínéwé Ísara aní múge. Íné Ébáráhmane anahwa úge. Íné Pénsámíni kahnáh ání múge.

<sup>2</sup> Manikánka naho íwíáhue omaq sito ke amahnága íre kaqsúéhre. Manikáne ehwehnka Éráísa ehweh irarime aiq ahtebaho? Éráísa Ísara kené ahbabáqsabe Maniká teawena,

<sup>3</sup> Néne Wahnahno, sega arene ehweh irare ke aiq subiq sutowe. Arensabé iwíáh íwíáh atonarabeqte táhbé aiq sokorúáhwe. Ínébataq míónsábé sega íné ninebahru nubiq suaneherawoe úwe. *(1 King 19.10,14)*

<sup>4</sup> Mi ehwéh mirarúnsabe Manikánka aneq ehwéh teawuwo? Wega mahraréna, Ínéga se omaq sitó púara áhnte wehuké 7 táchuséni (7,000) wehuké íné íre nuwera péhe máníká wenawíq Páhrinsabé íre káuqmunue iwíáh íwíáh atáhwe úwe. *(1 King 19.18)*

<sup>5</sup> Mina inserah ibora táhmaro ke Manikáne sansá íre susa peh kaweqtaq míáhwe. Manikánka ite arutaboirue séhréh aitena, Néne animári móe ue omaq itéhre.

<sup>6</sup> Íre itega arambehriúnayabé peh wewega arutaboirue séhréh aitena omaq itéhre. Manikánka itene arambehriúnayabé omaq itéhtáq tahirímé séhréh aite sansa íre kékirino.

<sup>7</sup> Minayabe aneq iwíáhonehnkono? Áhnte Ísara kegá, Kaweqtaq mé sansa sehgiñehemíne éra íre miraorahowe. Peh morá Manikánka omaq sito kega ahtebowara mó kegá sirupipeq íre irahráhuwe.

<sup>8</sup> Minayabe Manikáne ehwehnka aiq mahraréna,  
Manikánka múguwahgu iwíáh aritowara se súgó ke tahnsa úkéra pusa ké tahnsa úkuwe.  
Sene siuranka íre tagia sene siahrega íre irahráhuwe. Amahnágáákáq se mina tahnsa míáhwe ire. *(Lo 29.4; Aisaia 29.10)*

<sup>9</sup> Tébítiga minayabe aiq mahraréna,  
Kahnkapi wah pariéhrana tahkapi póérähq subitiéhrana ebahnka wehukeníné aigará subínserah sega wahba táchutáhúrorabeq anotah kamáh ariena subipáharuanawire.

<sup>10</sup> Sene siuranka íre tagahrahéra múguwahguigehe.  
Se sibobiah antera ké tahnsa ahriahri nogigéhe úwe. *(Buk Song 69.22-23)*

### *Manikánka nahnsó ke kawerarito ehwéhne.*

<sup>11</sup> Íné kase ehweh kékirino. Ísara kegá Manikánka kawerarítéh sánsá íre ahtebahnsabé ahriahri peh ahhbabáq ke míaneherabo? Ahqáho. Írakaumo. Segá Manikáne sansánsábé, Iuwahriehre ensabé we awahbeh sansánue nahnsó ke kawerarítéhre. Ísara kegá mina tagéra iwíáhéra, Ite minayabe iuwahbehre. Ite moq kaweraito igeheéna nahnsó ke kawerarítéhre.

<sup>12</sup> Ísara kegá Manikánka kawerarítéh sánsánsábé iuwahriehre ensabé Manikánka mah kehiná kékíná séhréh arítéhre. Ísara kegá Manikáne sansá sinehepeq súónsabe wega nahnsó ke séhréh arítéhre. Mókake áhnte Ísara kegá Manikáne awahbeh sansánsábé suwahbáhnaraq ite tagarionawe mi kereq mó kereq áhnte kaweraritankéhe.

<sup>13</sup> Nahnsó keo, amahnágá ite ehweh teiúge. Manikánka ínénabe, Néne ehweh nahnsó ke korero éna eqmaq núwátái puana néne arambehri áhnte kaweq arámbéhri wíre iwíáhuge.

<sup>14</sup> Mira iwíáhunsabé táhmaro nánuwahrah Isárá kégá néne arambehri tagéra iwíáhéra, Manikánka ite moq meirena kaweraiteyabe iuwahbehre éra Manikápa kouwekirataq kaweraritankéhe.

<sup>15</sup> Manikánka Ísara keyábé ahqáho aritonsabe nahnsó ke insahwé aritena kawerarítéhre. Wega Ísara keyábé kowe aritahnaraq se pusa ké oga úkonserahnue míagehe.

<sup>16</sup> Asiu kegá sene sánsánéra ákáhtaq wíti paráwáh mewe páréti tírotáq peh morá páréti Manikáne áwéwe. Manikáne áwé puara mó ákáhtaq wíti paráwáh mewe tírotáq páréti moke Manikáne wire. Manikánka awanká ánúq matiahnaraq moke ayahnawéakáq wewene úkire.

<sup>17</sup> Ísara kewé kaweq oríwí awánká tahnsa míáhwaq ite nahnsó kewé abehq óríwí awánká tahnsa míáhwe. Manikánka kaweq oríwí awánká ayahnawé apiruena ite abehq óríwí

awánká ayahnawe mitaq táhparená táhrarowana kaweq awánká ano kékhsábé kawerue kíréhre.\*

<sup>18</sup> Ite amahnága kaweqtaq míáhnsábé Ísara ke kiotaikúne íwíáhiyehboq peh tábúsoqme iwiáhoro. Ite awanká ayahnawe tahnsá míáhwe. Awanká ayahnawe anonka ánúqtaq íre tuire. Írakaumo. Awanká ánúq anonka ayahnawerapeq kíre.

<sup>19</sup> Itega mahraréq, Manikánka ite awanká ayahnawe ákáhnababí táhparanieéna mibeqté áyáhnawé apirutaire eme

<sup>20</sup> aiq pútaq ehwéhnowe. Ísara ke Sísansabé íre aiq pútare atáhnsábé apiruéhre. Ite nahnsó ke Sísansabé aiq pútare atáhnsábé Manikánka ite kaweq awánká ákáhnababí táhparéhre. Minayabe ite píribahriyehboq áhreue míáhro.

<sup>21</sup> Manikánka téh kárái ayáhnawé apirutainserah ite píribahri ke míéhrataq ite moq apiruankéhe.

<sup>22</sup> Kawerue iwiáhoro. Manikámé arutaboiri aní ména kamah aieráhi aní míéhre. Wega wene sánsánsábé suwahrieh ke kamah ariena ite wene ehwehnsabé suwahbeh keyabé arutaboirire. Wene ehweh íre sehgírataq ite moq apiruena kamah ainkéhe.

<sup>23</sup> Manikánka apiruo ayáhnawé táhparená táhrawe kawerarahráhire. Ísara kegá sene píribahri sansá suera aiq pútare atéhrataq wehukenínká apiruéh áyáhnawé kaweraréhnserah Manikánka Ísara ke kaweraritahráhire.

<sup>24</sup> Wehukenínká abehq óríwí awánká ayahnawe mewe kaweq oríwí awánká ákáhnababí táhparená táhrawe kaweraréhre. Mina inserah Manikánka ite nahnsó ke kaweraitáráire. Kaweq oríwí awánká ayahnawe mewe seyene kaweq oríwí awánká ákáhnababí táhparená táhrué kaweraréh sánsámé íre págege sansáne. Mina inserah Manikánka Ísara ke mókake kaweraritankéhe.

### *Manikánka nahnsó kereq Ísara kereqsabé arutaboiri ehwéhne.*

<sup>25</sup> Néne iyahnabo anímáríno, itega kawerue ahtebageheéna menah Manikánka íre pahsutai ehwéh amahnága teiníe. Ite ahtebehrataqmé píribahri anímárí íre míagehe. Amahnága Ísara kene sirupipeq págegeéra Manikáne sansá íre íráhwe. Mókake nahnsó kegá awehraq wene sánsá sehgírataqmé Ísara kegá iragéhe.

<sup>26</sup> Mi tanáhráqmé Manikánka moke Ísara ke merirena kaweraritankéhe. Minayabe Manikáne ehwehnka aiq mahraréna,  
Kaweraritahna anínká Sarúsarama suwahpeq sínaraq wega Sékópane anahwaréhne ahbabáq kaqsuankéhe ire.

<sup>27</sup> Manikáne ehwehnka mó mahraréna,  
Sigaqnaréh teriunserah sene anahwaréhne ahbabáq kaqsuaníe ire. (Aisaia 59.20-21;

### *Jeremaia 31.33)*

<sup>28</sup> Ísara kegá Sísa éhweh irera iuwahriehre ensabé Manikáne naruo úkurowaq ite nahnsó kegá mi ehwéh ireq sehgówe. Manikánka Ísara ke téh omaq sitena sigaqnaréhyabe naho arutaboirú púana amahnága sinahwaréhyabe moq arutaboirire.

<sup>29</sup> Manikámé íre mó iwiáh mó iwiáhi aní míre. Wega náwinie iwiáhínaraqmé náwinawire. Wega aiq omaq sitóge ínaraqmé anehemé íre kaqsuankéhe.

<sup>30</sup> Menah ite nahnsó kegá Manikáne ehweh anterutowara amahnága Ísara kegá wene ehweh anterúáhnsábé wega itensabé arutaboiréna séhréh aitéhre.

<sup>31</sup> Ísara kegá Manikáne ehweh anterúáhwana Manikánka itensabé arutaboiréna séhréh aitéhnserah mókake sensabé arutaboiréna séhréh aritankéhe.

<sup>32</sup> Ómi kegá wene ehweh anterúónsabe Manikánka, Ahbabáqka ite saiqnariankehe arítéhre. Anehe wega mah kehiná kékhsábé arutaboiréna séhréh aritankéhe.

\* <sup>11:17:</sup> Ísara kegá sene sánsánéra óríwi awanká íre kaweq ayáhnawé apiruera mó kaweq awánkátápéqté áyáhnawé apiruqme mitaq táhparera táhraráhwana kirena kaweq oríwí sérá íyéhre.

*Manikánsabe iwíáh iwíáh atanéhe i ehwéhne.*

<sup>33</sup> Manikámé áhnte séhréh aitéh ání ména moke tagarawéna anotah ahtébíá ání míre. Ite peh wehuke míona puaq wega tábúsoqme iwíáhi sansámé itega íre ahtebahrahúne. Wega mirai sansámé itega íre ahtebahrahúne.

<sup>34</sup> Minayabe Manikáne ehwehnka mahraréna, Wehukenínká itene Wahnahne iwíáhwé ahtebahrahiro? Írakaumo. Wehukenínká we áwáhnororahiro? Írakaumo. ire. (*Aisaia 40.13*)

<sup>35</sup> Wene ehwehnka mó mahraréna, Wehukenínká Maniká ebeq náwinana Manikánka íné nánino iwíáhono? Írakaumo ire. (*Jop 35.7, 41.11*)

<sup>36</sup> Manikánka wewega moke kék néaneq mirarowe. We moke kék néaneq áwahe wíre. Minayabe moke kék néaneq peh wewene wíre. We anotah aní púaq ahriahri wensabé iwíáh iwíáh atone. Aiq míre.

## 12

*Itene inónká Maniká awe ehwéhne.*

<sup>1</sup> Néne iyahnabo anímáríno, néne ehweh kawerue íráhro. Manikánka ite kaweraitená séhréh aitéh púaq itene inonka we áwero. Ite oga míáhtáq itene inonka we náwíransabé kaweqlaq méq we awahbeh sansánoro. Minawé Manikánsabe iwíáh iwíáh atáh sánsáne.

<sup>2</sup> Itega Maniká awahbeh sansánigeheéna wega itene irupipeq o iwíáh aitéhre. Mah marákó mårákóípéqté sánsá sehgíehboq peh Manikánka iwíáh aitéh sánsánor. Mirairataq Maniká awahbeh arámbéhrí miraéq wene kaweqlaq tábúsoqme iwíáhore.

*Manikánka náíátái pagégérátē wene arambehri sehgóro i ehwéhne.*

<sup>3</sup> Manikánka íné séhréh aintéhnsabé ínéga teiéna ehwéh íráhro. Itega, Íné anotah aní múge éq arerensabé iwíáh iwíáhiyeho. Írakaumo. Arerensabé peh tábúsoqme iwíáhoro. Manikánka aiq pútaq iwíáh aitéhnserah tábúsoqme iwíáhoro.

<sup>4</sup> Wehukeníne anonka peh morá ánónkánirana áhnte naneq kékre. Mi naneqmarínká ire peh morá árámbéhrí miraorahowe.

<sup>5</sup> Mina inserah moke ite Sísá Karáhé tagariona kewé áhnte méq Sísane anonka tahnsá míone. Ite íre peh morá árámbéhrí miraúne. Íre itebataq itebatarue mía ite peh morá ánónká tahnsa míone.

<sup>6</sup> Manikánka séhréh aitena wewega mó arámbéhrí mó arámbéhríue íátáire. Minayabe ite íre peh morá árámbéhrí kékre. Manikánka arensabé, Ínéga iwíáh atahna ehwéh irarúno atahnaraqmé arega aiq pútare atahnanserahnue pahsuo.

<sup>7</sup> Séhréh arito atahnaraqmé kawerue séhréh arito. Síwáhnorúno atahnaraqmé tábúsoqme síwáhnorúno.

<sup>8</sup> Mó kené iwíáh kawerarito atahnaraqmé tábúsoqme miraúno. Wehwehúno atahnaraqmé eyoyóue wehwehúno. Wahnahnuño atahnaraqmé tábúsoqme iwíáhue wahnahnarito. Mó keyábé arutaboirarite séhréh arito atahnaraqmé eyoyóue séhréh arito.

*Mó Sísá tagariáh kékabé arutaboirarito i ehwéhne.*

<sup>9</sup> Mó keyábé aiq pútaq irutaboirarítáhro. Moke ahbabáqsabe anotahtaq ahqáho ato. Ahbabáq sansa pehragéq peh kaweqlaq sansá ambubuuue sehgóro.

<sup>10</sup> Iteruwahrahyabé irutaboironserah moke Sísá tagariáh kékabé moq irutaboiréq sensabé iwíáh iwíáhéq sensíwíq pankeráhro. Íre arene áwíq peh mó ke síwíq pankeráhro.

<sup>11</sup> Manikáne arambehriyabé taorahoiyehboq tauntahunue arambehriyabé. Manikáne Awanka iwíáh aitéhnserah itene wahnahnsabé iwíáh iwíáh ateq wene arambehri kawerue sehgóro.

<sup>12</sup> Manikánka mirainawire íwíáhéo itene irupipeq eyoyóue míáhro. Íre kaweq sunúq sinaraq uwaresa ké méq kaweqtaq míáhro. Púreré sansa taorahoiyehboq ahriahri púreq aruqaruroro.

<sup>13</sup> Sísá tagariáh ké tabonahirataq náríero. Nahnso ke sirataq mehwéhue kawerariteq kirabo arítáhro.

<sup>14</sup> Mó kegá ite íwíoqnehrataq Manikánsabe, Mi ke kamah ario íre oro peh kaweraritoue púrerarítáhro.

<sup>15</sup> Mó kegá eyoyóue iwíáh íwíáhirataq ite moq eyoyóue iwíáh íwíáhoro. Sirupipeq umehínaraq ibisehrataq ite moq irutaboirariteq ibisahro.

<sup>16</sup> Ómi keyábé peh monseráh sánsánoro. Ite anotah ke úne éq píribahriyeho. Írakaumo. Ite anotah ke púaq íre áwíqkakaq kékabé iuwahriehre iyeho. Sereq méyabe iwíáh íwíáhoro. Íre áwíqkakaq árámbéhríyábé iuwahriehre iyeho. Itebataq ahtebone éq iteitensabé iwíáh íwíáhiyeho.

### *Ite ahbabáraitéhra ke séhréh arítáhro i ehwéhne.*

<sup>17</sup> Mó kegá itensabé íwíoqnéra ahbabáraitéhrataq itega moq sensabé mina tahnsaniye-hboq peh uwaresa ánímári míáhro. Ómi ite tagah kegá, Kaweq sansáne íwíáhigeheéq peh kaweq sansánoro.

<sup>18</sup> Taonsah iwíáh tobéh iwíáh iyehboq uwaresa ké míáhro. Árahue mó kereq iru ukiqme míanehnkono éq mina tahnsanue sereq iru ukiqme míáhro.

<sup>19</sup> Néne iyahnabo anímáriño, mó kegá ite ahbabáraitéhrataq se íre ahbabárarítáhro. Manikánka se kamah arieráhire. Wene ehwehnka aiq mahraréna,

Ínénéne arambehri puana ínénéga kamah arinauge ire.

(Lo 32.35)

<sup>20</sup> Wene ehwehnka mó mahraréna,

Are ahbabáratáhna anímé, arene naruo anímé arupinsabe ínaraq kirabo ato. We wání tahbobóire ínaraq wání náwo. Arega mirainaraq we ayehitanawire ire. (Sindaun 25.21-22)

<sup>21</sup> Ahbabáqka are saiqnariehnehboq kaweq sansánúno. Arega mirainaraq arene kaweq sansánka ahbabáq sansa kiotaikinae.

## 13

### *Kámáhni kené ehweh sehgóro i ehwéhne.*

<sup>1</sup> Ite moke kámáhni kené ehweh kawerue sehgóro. Ite tagarionawe wahnah kegá pehipi íre wahnahnowe. Írakaumo. Manikánka wahnah sansá áhwárówe. Áhwárarowara amahñága kámáhni kegá wahnahname webaqtaq Manikánka, Wahnahnoro arítéhre.

<sup>2</sup> Minayabe kámáhni kené ehweh anteruahnaraqmé se Manikánka wahnahnoro arítéh kéné ehweh anterúáhwe. Anterúáhnsábé ehweh aritená kamah arinkéhe.

<sup>3</sup> Kaweqlaq mía míao kegá sene wahnah keyábé íre áhreowara peh ahbabáq kega sene wahnah keyábé áhreowe. Ite íre áhreigehboq peh kaweqtaq méq itene wahnah kené ehweh sehgóro. Mirairataqmé wahnah kegá itensabé, Kawerowe aitagéhe.

<sup>4</sup> Itega kaweqtaq míageheéna Manikánka wahnah keyabé, Néne arambehri miraige-hboq wahnahnoro arítéhre. Ite ahbabáritataq wahnah kegá kamah aieráho puaq sensabé áhreoro. Se ahbabáq ke kamah arirana Manikánka kawerowe aritankéhe.

<sup>5</sup> Itene wahnah kené ehweh anteruahnaraqmé kamah aíyehboq sehgonéhe íwíáhoo? Íre peh morá mi iwíáhiransabé sehgóro. Wahnah kené ehweh irona sansámé kaweq sansáne iwíáhéq irupipeq eyoyóue sehgóro.

<sup>6</sup> Manikánka wahnah keyabé, Wahnahnoro arítéhnsábé tákisi moné síero. Segá sene wahnah árámbéhrí kawerue miraige-hboq síero.

<sup>7</sup> Minayabe seyene arambehri kahna naneq síero. Táhkísi moné meyáh ké táhkísi moné síero. Áráhísínísi moné meyáh ké áráhínísi moné síero. Wahnah keyábé siwiréh arítéhboq peh sensabé iwíáh iwíáhqué ayahmaq síero.

### *Mó keyábé arutaboiroro i ehwéhne.*

<sup>8</sup> Arega mó anínsábé mónebopoq aneqpopoq, Nánio. Mótaq náwiníe inaraqmé arene tínáhu túbah aginehboq apubúue náwo. Itene tínáhu ahriahri apubúue parabarúáhro. Peh morá tínáhú ahriahri kagaire. Mi tináhúwé mó keyábé ahriahri irutaboiroro. Mó keyábé sirutaboiro kegá Manikáne ehweh moke sehgówe.

<sup>9</sup> Manikáne ehwehnka mahraréna,

Mó kené ahre weh abariiyeho. Mó aní subiq súeho. Aebóiyeho. Mó aníné ménsámehsánsabe aigará pabekíneho ire. *(Kisim Bek 20.13-17; Lo 5.17-21)*

Anehe Manikáne ehwehnka mó mahraréna,

Arerensabé arutaboirónanserah mó keyábé moq arutaboirúno ire. *(Wok Pris 19.18)*

Mó keyábé arutaboiré ehweh sehgówe ebeq teí éhwéhnikákáq moke mó miraoro ú ehwehnkákáq aiq sehgówe.

<sup>10</sup> Mó anínsábé arutaboiri anínká mi aní íre ahbabáratéhre. Minayabe mó keyábé aiq pútaq sirutaboiro kegá moke Manikáne ehweh sehgówe.

### *Tábúsoqme méq peh kaweq sansá tauntahunue sehgóro i ehwéhne.*

<sup>11</sup> Mah tanáhráq tagariona puaq kaweqtaq méq Manikáne ehweh sehgóro. Ite kaweraiteh aní tuina tanáhráq áhníbóráni puaq sugéhboq peh áwénunéq kawerue auráq matíáhro. Itega Sísansabé aiq pútare atárótaq we tue tanáhráq ákáhtaq wahto káráire. Amahnága we tuina tanáhráq peh wahtonagire.

<sup>12</sup> Inokáhpeq parabagina irana tuekína tanáhráq sinare. Mina inserah mah tanáhráq áhníbórá parabagina irana Sísaga tuinaire. Minayabe itega sunkíkírirabeqte áhbábáq sánsá sueq téhrehrabeqte kaweq sansánoro.

<sup>13</sup> Uwoyansamé, píah néra muguwahgu agéwé, mó aníné ahre weh abariéwé, ahkaragárawe, tobehwé, mó keyábé aru págege atewé, mina tahnsa áhbábáq súáhro. Peh morá téhrehrabeqte kaweq sansá miraoro.

<sup>14</sup> Ahbabáq iwíáhiyehboq peh morá itene Wahnah Sísá Karáhéba wahtotaq méq wene sansánsábé iwíáh iwíáhue sehgóro.

## 14

### *Mó Sísá tagaríah kéné sánsá íre saraqme tagahro i ehwéhne.*

<sup>1</sup> Sísansabé aiq pútare atéh áninká Sísane sánsá íre kawerue ahtebéna iteba sínaraq mehwéh ateq séhréh atáhro. We íre ahtebéhnsabé ehweh atého.

<sup>2</sup> Mó Sísá tagaríah áninká moke táhutahuq nah nanere iwíáhéná pehipi nehrana mó Sísá tagaríah ání íre págegeue aiq pútare atéh áninká nah naneqpomo éna we awehrii naneq íre nehre.

<sup>3</sup> Neh áninká íre neh anínsábé awiréh atéhneho. Awehri áninká neh anínsábé ehweh atéhneho. Írakaumo. Manikánka moke táhutahuq neh anínsábé, We moq néne ani míre atéh púaq wega táhutahuq nehnsábé ehweh atéhneho.

<sup>4</sup> Mó aníné arambehri anínsábé aneqsabé ehweh ataho? Minawé íre itene arambehri wire. Wewene wahnahnka wene sánsá tagéna tábúsoq atahráhire. Maniká itene Wahnahnka arambehri aní séhréh atéh púana wene wahnahnka arambehri kawerue mirainawire.

<sup>5</sup> Mó áninká ahrena ahrena wehekáhnká moke mó wehekáhnká kiotaikire iwíáhirana mó áninká moke wéhékáhnká peh monseráhnire iwíáhire. Minayabe itene irupipeq iwíáhue tagéq peh kaweq sansá miraoro.

<sup>6</sup> Ahrena ahrena wehekáhmé Manikánsabe iwíáh iwíáh tanahráre iwíáhi anínká Manikánsabe iwíáhi puana mira iwíáhire. Moke táhutahuq neh anínká Manikánsabe iwíáh

íwíahéna moke táchutahuq nehnsabé Maniká awahbeh sansáne íwíahire. Íre neh anínká awehrime Maniká awahbeh sansáne íwíahéna we moq Manikánsabe iwíah íwíahire.

<sup>7</sup> Iteitene iwíahúna sansá miraúnayabé oga míono? Írakaumo. Ite pukonaraq iteitene mátaburapeq kowíanehnkono? Írakaumo.

<sup>8</sup> Peh Maniká itene Wahnah awahbeh sansá miraoneheéq oga míone. Ite pukonaraq itene Wahnahne kaweq matábúrapéq kowíanehe. Ite oga miónaraqkákáq pukonaraqkákáq ite Maniká Iteribone animári míaneheqmúne.

<sup>9</sup> Sísá Karáhéga oga míona kereq puko kereq wahnahnaitanieéna pukéna iriwe organukúwe.

<sup>10</sup> Mókake ite moke Manikánka wahnahnirabeq iriwe perehnehnuue míahnana wega itene oga mé sansamé itene arambehriwe tagéna saraqmaranawire. Minayabe mó Sísá tagariéh áninsábé, Are abehq sansánóna aní móne atéhneho. Wega mirai sansansábé awiréh atéhneho.

<sup>11</sup> Manikánka saraqmarahna tanáhráqsábé wene ehwehnka aiq mahraréna, Íné oga mía míau Wahnáh ání míogara moke mah kehiná kékhnánká ínéba séra srehunseraráq méra ínénabe, Are aiq pútaq Maniká móne aintanehrawoe ire. (*Aisaia 45.23*)

<sup>12</sup> Minayabe mi tanáhráq itega miraurauna sansánsábé morá áninká morá áninkáue Maniká teaweneheqmúne.

### *Ahbabáq salsa mó aní insoq atéhnehboq suaníe i ehwéhne.*

<sup>13</sup> Mó Sísá tagariéh áninká miraínsabe, Abehq sásánire atého. Ínéga mirau sansámé wega tagéna ahbabárinehboq mi sansá suena mó íre mirainie íwíahoro.

<sup>14</sup> Sísá itene Wahnahnka néne íwíah aiq kaweraintéhnsábé íné tagariómé Manikánka moke táchutahuq nah nanere ire. Minayabe moke táchutahuq noge. Mó áninká mó naneq tahutáhúqsábé, Íre nah nanere ínaraq mina awehrinkehe.

<sup>15</sup> Itega nahwana mó Sísá tagariéh ánime íwíah kikiritaq wega itene táchutahuqsabé, Órira míre atéhnaraqmé mi tahutáhúq mó neho. Iwíah kikiri anínsábé, Anetaníbo pehipi nanie i anínká we íre arutaboiratéh ání míre. Sísá Karáhéga íwíah kikiri aníne ahbabáqsabe putionsabe itega nehranka ahbabáratého.

<sup>16</sup> Itega, Kaweq sansáne íwíahéq mirairara mó kegá tagéra, Íre kaweq sansáne íyehboq mi sansá mó íre miraoro.

<sup>17</sup> Manikánka ite wahnahnaitéhnsábé itega táchutahuqsabé íre íwíah íwíahúne. Írakaumo. Peh kaweqtaq méyabewé, iru ukiq iteyabewé, iru eyoyó aiteyabewé íwíah íwíahúne. Manikáne Awanka minawari íwíah aitéhre.

<sup>18</sup> Manikánka Sísá Karáhéne arambehri miraue sehgó kékabé, Kawerowe aritowara tagah kegá, Se kaweq ke wóe íwíahigehe.

<sup>19</sup> Minayabe moráénue Sísane sásá miraoneheéq we séhréh atéhonehe íwíahoro.

<sup>20</sup> Moke táchutahuqme nah nanere aiq pútaq ehwéhne. Peh táchutahuqsabé íwíah íwíahónaga Manikáne arambehri íre kawerarúehneho. Arega náhna tahutáhúqmé mó anínká tagéna, Órirane íwíahéna wene órira sansámári suena ahbabárínaqmé arega we aiq ahbabáratahne.

<sup>21</sup> Sísá tagariéh áninká are tagéna arega miraónaga ahbabáratehnehboq mina íre miraúno. Minayabe órira tahutáhúqkákáq píahakákáq náhnaga mó Sísá tagariéh ání ahbabáratehnehboq íre náhno.

<sup>22</sup> Arega miraóna sansámé, Kaweq sansáne íwíahé mó anínsábé, Ínéga mirau serahnúno ue teawíneho. Arega miraóna sansá peh Maniká teawo. Kaweq sansánuge íwíáhi anímé wene arupipeq íre umeh agínana wega íwíah íwíahinkehe.

<sup>23</sup> Mó anínká iwíáhéra, Mah tahutáhúq nonka kaweq sansánugapómo éna náhnaraqmé wega ahbabárinae. Aiq pútaq kaweq sansáne íwíáh íre kahnaraq wega ahbabárinae. Moke itene sánsámé aiq kaweq sansáne íwíáh íre kéhtáq mi sansánúnawe itega aiq ahbabárúne.

## 15

*Sísa Karáhéne sansá sehgioneheqmúne i ehwéhne.*

<sup>1</sup> Ite Sísane sánsá ahtebóna kewé séhréh arite arámbéhri kékre. Sísane sánsá peh ákáhtaq ahtebah kegá tábúsoqme sehgigeheéq séhréh aritanéhe. Íre peh iteitensabé iwíáhia peh séhréh arite iwíáhonehe.

<sup>2</sup> Itene iyahnabo anímári Sísane sánsá ahtebéra kawerue sehgigeheéq íre ite iuwahbeh iwíáh peh se séhréh arite iwíáhonehe.

<sup>3</sup> Sísa Karáhéga Wenabone arambehri mirainieéna we awahbeh iwíáh suowe. Minayabe Manikáne ehwehnka irarinserah mó kegá Sísa awiréh atowe. Mi ehwéhniká mahraréna,

Sega arenasabé awiréh atáhtáq ínénasabe moq niwiréh aintáhwe ire. *(Buk Song 69.9)*

<sup>4</sup> Manikána iwíáh arito kegá wene ehweh pehipi íre sehiranuwe. Itega sáhnsahwe ahtebageheéra naho sehiranuwe. Itega Manikáne sansá kawerue ambubu atawéq sehgigeheéra sehiranuwe. Itega Manikáne sansá íre sueq peh ite meirena kaweraitahna tanáhráqsábé áwénunigeheéra sehiranuwe.

<sup>5</sup> Itega Manikáne sansá ambubu atawéq kawerue sehgigeheéna séhréh aitéhre. Ite Sísa Karáhéne sansá sehgieq moráénue peh morá íwíáhigeheéna wega séhréh aitéhre.

<sup>6</sup> Moráénue peh morá íwíáhirataq itene Wahnah Sísa Karáhéne Abowá Manikánsabe iwíáh iwíáh atagéhe.

*Sísa Karáhéga Asiu kereq nahnsó kereq séhréh arítéh éhwéhne.*

<sup>7</sup> Itega Sísa Karáhénasabe aiq pútare atárótaq wega íre ahqáho aitasá peh séhréh aítaráire. Mina urainserah Sísa tagariéh áninká iteba sínaraq mehwéh ateq séhréh atáhro. Mirairame Manikánsabe iwíáh iwíáh atáh sánsá míre.

<sup>8</sup> Teiníboq írátíáhro. Naho Manikána ite Asiu kené igaqnansabe omasa éhwéh teriuwe. Sísa Karáhéga mah marákóípéq míotaq we Asiu aní ména ite Asiu ke séhréh aítowe. Séhréh aitonka sokigi aitomé omasa éhwéh aiq pútaragire.

<sup>9</sup> Moke nahnsó ke moq séhréh ariteyabe áwíre. Segá wensabé iwíáh iwíáh aintageheéna séhréh ariteyabe áwíre. Minayabe Manikáne ehwehnka aiq mahraréna, Nahnsó ke míéhrarabeq arenasabé iwíáh iwíáh ataníe. Arenáwíq pankerónsábé igonkónue iwíáh iwíáh ataníe ire. *(Buk Song 18.49)*

<sup>10</sup> Wene ehwehnka mó mahraréna,  
Nahnsó keo, Asiu kereq itereqka moráráq iwíáh iwíáhoro ire. *(Lo 32.43)*

<sup>11</sup> Mi ehwéhniká mó mahraréna,  
Nahnsó keo, ite ómiga itene Wahnahnsabé iwíáh iwíáh atáhro. Mah kehiná kékhnánká wensabé iwíáh iwíáh atáhro ire. *(Buk Song 117.1)*

<sup>12</sup> Áísáíaga mó mahraréna,  
Sésine anahwa anotah aní míanawire. We anotah aní úkéna Asiu kereq nahnsó kereq wahnah aritankéhe. Mi tanáhráq nahnsó kegá iwíáhéra, Wega ite kaweraitankéhe éra áwénunigehe úwe. *(Aisaia 11.10)*

<sup>13</sup> Manikána omasa éhwéhne, Áhnte kawéq náneq iníe únsabe ite amahnága áwénunúne. Wensabé aiq pútare atáh púana wega itene iru ukiq itena eyoyó aitankéhe. Manikáne Awanka kawerue séhréh aitéhnsábé ite iwíáhéra, Wene ehweh aiq pútaq ehwéhne. Wega aiq náina puaq áwénunúne ewe.

*Poraga nahnsó ke Sísa éhwéh teri terinúnsabe éhwéhne.*

**14** Néne iyahnabo anímáríno, Íné tagaríómé ite kaweq sansá mira aruqaruroro ke wóe. Ite Sísane sánsá aiq ahtebah puaq wensabé wensabé íwáhnoraréh orahowe.

**15** Ite ibitarúeho éna mah pahsí sehiranue iahreraq ítóge. Manikánka séhréh aintéh púana págegeue teiena pagu pagunuge.

**16** Nahnso kegá Manikáne sansá kawerue ahrebéra sehgigeheéna ehweh mibeq mahbeq arítéh ání tahnsanéna wene kaweq ewhéh teri terinuge. Nahnso ke séhréh aitanieéna Sísa Karáhéne arambehri mira aruqaruruge. Nahnso kegá Maniká awahbeh sansá sehgiéra kaweqtaq mía míageheéna Manikáne Awanka séhréh aritená kawerarítéhre.

**17** Sísa Karáhéba mía míáéna Manikáne arambehri kawerue miraunsabé iwíáh iwíáhugé.

**18** Mó kené arambehri íre teiúge. Peh morá Sísa Karáhéga séhréh aintaráirana miraurau arámbéhrí teiúge. Nahnso kegá mina tagéra Manikáne ehweh sehgiówe.

**19** Manikáne Awanka séhréh aintaráinsabé ótaq sansá miraéna ehweh teriátáuge. Nahnso kegá tagéra teriu ewhéh sehgirówe. Sarúsarama suwahpeqkakáq Írírikúma marákórápéqkákáq moke ákáhpeqte ké suwahpeqkakáq Sísa Karáhé éhweh teri terinurauge.

**20** Peh Sísa Karáhé éhweh íre írátíáhrabeq korerieyabe nuwahbehre. Mó anínká nahwiahnsanse pearahnaraq ínémé wene nahwiahnsanseraq abogéhue nah peyabe nuwahriehre.

**21** Írakaumo. Minayabe Manikáne ehwehnka mahraréna, We éhweh íre teriu ke tagariagehe. We éhweh íre írátíáh ké siahtebagehe ire. *(Aisaia*

**52.15)**

Mi ewhéhká irarinserah íre írátíáh ké korerieyabe nuwahbehre.

### *Poraga Aroma suwahpeq pokéyabe awahbó ehwehne.*

**22** Nahnso ke teri terinurau arámbéhrígá saiqnariarairana iteba íre korahurauge.

**23** Ínémé áhnte opéq ite tagéyabe nuwahbaraire. Amahnága mahtaqté árámbéhrí aiq parabarúó púana ite koraganie iwíáhugé.

**24** Sípení marákórápéq pokonaraq iteruwahpeq kéraganie. Iteba pehgáriq tanáhráq kowéna iuwena pokinieonaraq itega séhréh aintagéhe.

**25** Téhwe Sarúsarama suwahpeq Manikáne animári nárinieéna pokinie.

**26** Táhmaro mibeqté ánímári tabonah ke míáhnsábé Másérónía marákórápéqté kéreq Ákáia marákórápéqté kéreqka nárieneheéra móne soruparera níátówe.

**27** Seyega nárienehe iwíáhuronka sirupipeq eyoyóuraire. Sarúsarama suwahpeqte kégá Sísa éhweh téh írátówe. Segá irera nahnso ke teriátówe. Minayabe amahnága nahnso kegá nárienehe iwíáhuronsabé aiq kawerurowe.

**28** Níátáo moné Sarúsarama suwahpeqte ké aiq náriénaraq Sípení marákórápéq pokonaraq iteba kérágéna kótaikinie.

**29** Iteba konaraq Sísa Karáhéga iwíáh aintahna ewhéh teiníe. Wega iwíáh aintanawire iwíáhugé.

### *Poraga, Púreraintáhro ú ehwehne.*

**30** Néne iyahnabo anímáríno, itene Wahnah Sísa Karáhénabe iwíáhoro. Manikáne Awanka ite iwíáh aitáráiraq itega mó keyábé irutaboirune iwíáhoro. Mira iwíáhotaq págege arámbéhrí ínérreq miraoro. Mi pagégé árámbéhríwé púreq arámbéhrí wíre. Púreréq ínénabeákáq púreraintáhro.

**31** Sarúsarama suwahpeqte Sísa éhwhehsabé suwahrieh kegá nubíyehboq púreraintáhro. Ínéga mibeqté Manikáne animári kawerue séhréh aritankeheéq púreraintáhro. Segá néne arambehri aiq ábérehre iwíáhigeheéq púreraintáhro.

<sup>32</sup> Mi ke séhréh arítáhnaraq Manikánka kowe aintahnaraq iwíáh iwíáhue iteba kinie. Mi tanáhráq itereq ínéreqka ehwehnonaraq irupipeq eyoyóínaq iwíáh iwíáhonehe.

<sup>33</sup> Manikánka ómi itene iru ukiq itena iteba mía míaire. Aiq míre.

## 16

### *Poraga áhnte keyábé iroro ú ehwehne.*

<sup>1</sup> Íné nuwahbehme Sísa tagariéh íní wenawíq Píbi séhréh atáhro. We Sénkáría suwahpe-  
kte íní ména mibeqté Sísa tagariáh ké séhréh aritéhre.

<sup>2</sup> Áhnte ke séhréh aritena íné moq séhréh aintaráire. Minayabe wega iteba kínaraq  
mehweh ateq we tabonah ína naneq séhréh atáhro. Ite moke Manikáne animárinká itene  
Wahnahnsabé iwíáhéq mó ke séhréh aritonanserah mi iní séhréh atáhro.

<sup>3</sup> Sísa Karáhéne arambehriurautaq Ákúírareq Párísírareq mi akéqká moq moraráq  
arambehriuraune. Sensabé iraotao arítáhro.

<sup>4</sup> Segá íné séhréh aintáróyame pukorahuroye. Íre ínélataq moke Sísa tagariáh náhnsó  
kégá moq mi anítéyábe iwíáh iwíáh arítáhwe.

<sup>5</sup> Mi akéqseq sene nahtapeq momiwío ke Sísa tagariáh kéreqsabé iroro arítáhro.

Esia marákórápéq Sísa Karáhé éhwel teríátautaq mi ewhéhnsábé Épáinétúsaga téh aiq  
pútare atena sehgiraire. We niruní ání míre. Iraúno atáhro.

<sup>6</sup> Mähriaga ite séhréh aitanieéna anotah arámbéhriuraire. Wensabé iraúno atáhro.

<sup>7</sup> Nánuwahrah Asíú áníté Ántáróníkureq Súníásareq míéhye. Íné karábúsiipéq míarautaq  
sega moq mitaq míaroye. Íné Sísa Karáhé íre tagariurautaq sega we tagariaroyara eqmaro  
kega sensabé iwíáh iwíáh arítárówe. Sensabé iraotao arítáhro.

<sup>8</sup> Itene Wahnahne sánsá kawerue sehgi ání wenawíq Ámbíátu míéhre. We niruní ání  
míre. Wensabé iraúno atáhro.

<sup>9</sup> Sísa Karáhéne arambehri miraurautaq Úrabánureq moq moraráq arambehriurauye.  
Wensabé iraúno atáhro. Mó niruní ání Sítákísansabé iraúno atáhro.

<sup>10</sup> Sísa Karáhéne sansá tábúsoqme sehgi ání wenawíq Ápérie. Wensabé iraúno atáhro.  
Áritóbúru karíónánínseqsabé iroro arítáhro.

<sup>11</sup> Nánuwahrah Asíú ání Éróriónansabé iraúno atáhro. Náhsísune nahtapeq kaegaeo Sísa  
tagariáh kékabé iroro arítáhro.

<sup>12</sup> Itene Wahnahne arambehri kawerue miraoya aníté sensíwíq Tárípínareq  
Tárípósareqsabé iraotao arítáhro. Itene Wahnahne arambehri áhnte miraurai inímé  
Pérísie. We niruní iní míre. Iraúno atáhro.

<sup>13</sup> Itene Wahnahne sánsá tábúsoqme sehgi ání wenawíq Árupansabé iraúno atáhro.  
Wenanowé náino tahnsa ání úkurainsabé mi inínsabé moq iraúno atáhro.

<sup>14</sup> Mó kewé Ásínkárítureq Pégónireq Érémisireq Pátóbareq Érémasareq sereq moraráq Sísa  
tagariáh kékabé iroro arítáhro.

<sup>15</sup> Mó kewé Pírórogureq Súriahreq Néréúsareq wene anahnowáreq Órímbareq sereq míáh  
Sísa tagariáh kékabé iroro arítáhro.

<sup>16</sup> Iteite we mehweh atéhoro. Moke mahtaqté Sísa tagariáh kégá itensabé iroro ewe.

### *Ahbabáq aitahráho keyábé éhwéhne.*

<sup>17</sup> Néne iyahnabo anímárino, ehgarogaro anímárínseq ahbabáq aitahráho anímárínseq  
tagariáhro. Íwáhnoruro ehwehnsabé ahqáho aitáh ké tagariáhro. Segá míéhrarabeq  
míehboq peh móbeq míáhro.

<sup>18</sup> Mina tahnsa kégá itene Wahnah Sísa Karáhéne arambehri íre miraéra peh seyene  
sirupipeqté iwíáh mira aruqaruwore. Segá áhnte ehwehnéra ehnenehne arítéhrataq íre  
ahtebah kegá mi ehweh irera kaweq ehwehne iwíáhowe.

<sup>19</sup> Itega Sísane ehweh kawerue sehgiónsábé ómiga íráhwe. Minayabe iwíáh íwíáhéná nirupipeq eyoyóire. Ahbabáq sansa ahtebehboq pehragéq peh kaweq sansá ahtebahro.

<sup>20</sup> Maniká iru ukiq itéh áninká owainawa saiqnarianaire. Itene igaranka noginairabeq saiqnarianaire.

Itene Wahnah Sísa Karáhégá séhréh aitéhre.

*Porareq mío kega Aroma keyábé iroro u ehwehne.*

<sup>21</sup> Tímóti ínéreq arambehrii anínká itensabé iroro ire. Nánuwahrah Asíú kewé Árúsíareq Sésónireq Sósípáttereqlka itensabé moq iroro ewe.

<sup>22</sup> Mah ehwéh páhsipéq sehiranu aní néníwíq Tétiae. Poraga tenínserahnué pépahqtaq sehiranuge. Íné moq Sísane aninéna itensabé iroro uge.

<sup>23-24</sup> Mahtaqté Sísa tagaríah kégá Káiúsine nahtapeq momiwíowana wega íné Pora kirabo aintéhre. Wega itensabé iroro ire.

Mah ke suwahpeqte táhkísi moné wahnahni aní wenáwíq Érásátie. Wereq itene iyahnabo aní wenáwíq Kúátúsareqlka itensabé iroro éye.

*Manikánsabe iwíáh íwíáh atanéhe i ehwéhne.*

<sup>25</sup> Manikánsabe iwíáh íwíáh atone. Ínéwé kaweq ehwéh Sísa Karáhé éhwéh teri terinuge. Itega mi ehwéh ireq sehgeheéna Manikánka págege aitéhre. Naho mi ehwéh íre ábóraragia peh kopípéq kowe.

<sup>26</sup> Kopípéq kowana Manikáne ehweh iraru kegá aiq sehiranuro puana amahnágawe ábóraq kéhre. Mah kehiná kéhínánká mi ehwéhnsábé aiq pútare atera sehgeheéna Manikánka koreríero aitáráire.

<sup>27</sup> Manikánka webataq mía míáéna aiq moke ahtebehre. Sísa Karáhégá miraúnsabe itega Maniká Iteribonsabé ahriahri iwíáh íwíáh atanéhe. Aiq míre.

## 1 Kórína Ebeq sáhnsahwe ahbebé ehwehne.

Kórína suwahpeqme nahnsó kene anotah matábú Káríki marákóráqpéq kowe. Poraga peh morá ópéq mó opéq ákáhtaq mitaq kowéna Sísa éhweh pahsuowe. Pahsuowara wehukega Sísansabé aíq pútare atówana wega mitaq suena mó ke suwahpeq Sísa éhweh pahsuanieéna pokúwe. Pora Kórína suwahpeq íre míotaq Sísa tagariáh kégá sainkue táhmaroga íre kaweq sansánurowe. Mi tanáhráq wega mah pahsí sehiranue mó aní awuwana wega Kórína suwahpeqte Sísa tagariáh ké móriewe. Mibeqté Sísa tagariáh kégá peh kaweq sansánigeheéna Poraga mah pahsí sehiranúwe.

### *Kórína suwahpeqte ké ebeq siu pahsíe.*

<sup>1</sup> Sísa Karáhé éhweh korerinkeheéna Manikánka íné Pora omaq intena eqmaq nuwowe. Ínereq itene iyahnabo aní Sósáténireqka

<sup>2</sup> mah pahsí sehiranúye. Ite Kórína suahpeqte Sísa tagariáh kéo, itega sehiranúya pahsí sáhnsahwe tagahro.

Wene kaweq anímári míageheéna Manikánka ite omaq itowaq wene sánsá sehgíowe. Itereq moke mó kehiná suwahpeqte ké itene Wahnah Sísa Karáhé tagariáh kéréq omaq itowaq itega wensabé iwíáh iwíáhqué púrerúne. Púrerúnana ite kawerue wahnahnaitéhre.

<sup>3</sup> Maniká Iteriboreq Sísa Karáhé itene Wahnahnseqka ite séhréh aitera itene iru ukiq itehye.

### *Poraga Manikánsabe iwíáh iwíáhú ehwehne.*

<sup>4</sup> Manikánka ite meiqme Sísa Karáhéne ayahpi itena anotahtaq séhréh aitéhre. Wega ite kaweraitena séhréh aita aitainsabé ahriahri wensabé iwíáh iwíáh atóge.

<sup>5</sup> Wega séhréh aitéh púaq wene ehweh kawerue iraréq iahtebia ké úkowe.

<sup>6</sup> Sísa Karáhé éhweh iwáhnoruraugaq kawerue írátó puana Manikáne Awanka págegeue séhréh aitéhre.

<sup>7</sup> Págegeue séhréh aitéhnsabé itega Sísa Karáhé itene Wahnah tuina tanáhráq áwénunotaq Manikáne Awanka náina naneqsabé íre tabonahowe.

<sup>8</sup> Wega ite págege aitená séhréh aitéh púaq ite oga mé tanahráq kaweqtaq míahrahowe. Kaweqtaq míéhrataqmé itene Wahnah Sísa Karáhé tuinagake íre ehweh aitankéhe.

<sup>9</sup> Wenahni itene Wahnah Sísa Karáhéreq mía míageheéna Manikánka ite omaq itéhre. Omaq itena ite íre iuwasa peh mirainie i naneq aíq pútak mirainawire.

### *Poraga, Peh morá iwíáhoro ú ehwehne.*

<sup>10</sup> Néne iyahnabo anímáriño, itene Wahnah Sísa Karáhéga síwáhnorúno aintaráinsabé págegeue teiníboq írátíáhro. Ite mó iwíáh mó iwíáhiyehboq peh morá iwíáhoro. Sío síoue peh morá sánsánonehe iwíáhoro.

<sup>11</sup> Néne iyahnabo anímáriño, ite tagariáh ání wenáwíq Karoe. Karone awahrahga teniera, Itewe wensabé abiahnsanéq íre insahwéue míáhwe teníátówe.

<sup>12</sup> Itega mahna tahnsanue mó ewhéh mó ewhéhnowe. Ite mó anítogá, Porane sánsánúne ewara ite mó anítogá, Ápórone sánsánúne ewara ite mó anítogá, Pítane sánsánúne ewara ite mó anítogá, Karáhéne sansánúne ewe.

<sup>13</sup> Aneqsabé mina tahnsa irareo? Sísa Karáhéne anímári mó aní mó anínue míone iwíáhoo? Írakaumo. Itene abbabáq kaweraitanieéna íné Pora awankátaq táhpague putia-raugo? Írakaumo. Itega wání merotaq néníwírue meroo? Írakaumo.

<sup>14</sup> Iteba míarautaq peh morá Kárísápareq Káiúsireq wání meríatáuge.

**15** Minayabe mó kegá, Íné Pora néníwírue wání meríátóne iyehoéna mó ke wání íre meríátáunsabé iwíáh iwíáhuge.

**16** Mó ke wání íre meríátáuge ume Sítépána karírnánínsábé nibitagire. Se moq wání meríátáuge. Mó kewé wání meríátáugamo íre niahreraq kéhre.

**17** Íre wání merieyabe peh, Néne kaweq ehwéh koreri terinúno éna Sísa Karáhéga eqmaq núwátáire. Wega awankátaq táhpawé putio ehwehmé págege ehwéhne. Mi ehwéh abehq éhwéh úkínehoéna ahtebia áninká teínsarah ehwéh íre teiasa peh pahsuqme tei teinuge.

### *Sísa pukúmé Manikánka págege aitahráhi ehwéhne.*

**18** Sísaga itene ahbabáqsabe awankátaq pukú ehwehmé iraipéq pokoneherao kegá iwíáhéra, Múguwahgu ehwéhne ewe. Maniká Iteriboga ite kaweraitéh kégá Sísa awankátaq pukú ehweh iwíáhég, Íre wehukene iwíáh peh Manikánka págegeue mirorahi ehwéhne úne.

**19** Minayabe Manikáne ehwehnka aiq mahraréna,

Íné ahtebia ání múge íwíáhi anímé ínéga mi iwíáh kaqsuaníe. Íné tábúsoqme íwíáhu aní múge íwíáhi anímé mi iwíáh parabaruaníe ire. *(Aisaia 29.14; Jeremaia 8.9)*

**20** Mah marákó márakóípéq míáh áhtébíá keyábé anere enehnkono? Púku sáhnsahoráho keyábé anere enehnkono? Tobehue ehweho keyábé anere enehnkono? Manikánka mirainka ite iwíáhúnawe mi ahtébíá kéné ehwehme peh múguwahgu ehwéh úkire.

### *Manikáne sansánká wehukene sásá kiotaiki ehwéhne.*

**21** Maniká áhnte ahtébíá ání míre. Mah marákóípéq míáh kégá íre seyene ahtebahnka we tagariahrahewe. Itega teri terinúna ehwéhmé mi kegá, Múguwahgu ehwéhne ewana Manikánka mi ehwéhnsábé aiq pútare atáh ké kaweraritéhre.

**22** Asiu kegá itensabé, Itene ehwehnsabé aiq pútare aitanéhboq ótaq sansá miraoro tei teinowara Káríki kegá itensabé, Ahtebia éhwéh teíero tei teinowe.

**23** Tei teinowaq itegawé peh Sísa Karáhé awankátaq táhpawé pukú ehweh teri terinúne. Asiu kegá mi ehwéhnsábé, Iuwahrieh ehwéhne aitáhwara Káríki kegá mi ehwéhnsábé, Múguwahgu ehwéhne aitáhwe.

**24** Manikánka omaq itéh kégá pukú ehwehnsábé aiq pútare atone. Ite Asiu kereq nahnso kereqka mi ehwéhnsábé aiq pútare atone. Aiq pútare ateq Sísa Karáhé pukú ehwehmé Manikáne págege sansáne éq wene ahtebia sásáne aiq tagarione.

**25** Mó kegá, Manikáne sansámé peh múguwahgu mareqmareq sansáne atáhwana Manikáne sansánká wehukene ahtebia sásá sene págege sansá aiq moke kiotaikire.

### *Wene animári míageheéna Manikánka omaq ito ehwéhne.*

**26** Néne iyahnabo anímáriño, Manikánka ite iáhrabéna omaq itáráitaq aneq tahnsá anímári míaroo? Minayabe iwíáhoro. Ahtebia kewé, tauntahu kewé, anotah kewé, ite íre áhnte míarowe. Mó kegá ite tagéra, Múguwahgu ke wóe aitáhwe.

**27** Ahtebia ké siyehitarinkeheéna Manikánka ite múguwahgu aitáh ké wene animári míageheéna ite omaq itowe. Tauntahu ke siyehitarinkeheéna Manikánka ite mareqmareq aitáh ké wene animári míageheéna omaq itowe.

**28** Mah kehiná kékínánká iwíáh íwíáho naneqsabé abehq úkinkeheéna Manikánka íre anotah anímárinseq mó kegá siwiréh arítáh kéréq omaq itowe.

**29** Minayabe wehukenínká Manikánsabe, Íné anotah ání míó púa omáq intáróne íre irarerahewe.

**30** Wega ite aiq omaq itárái puaq Sísa Karáhéreq mía míowe. Sísa Karáhéga kaweq iwíáh aitéh púaq tábúsoqme íwíáhorahúne. Wega itene ahbabáqsabe pukú púana kaweraitena insahwé aitena Manikánka wene kaweq anímári mía míageheéna Sísaga séhréh aitéhre.

**31** Minayabe Manikáne ehwehnka aiq mahraréna,

Iwíáh íwíáhi aninká peh morá itene Wahnahnsabé iwíáh íwíáh atankéhe ire. (*Jeremaia 9.23-24*)

## 2

### *Kórína suwahpeqte kégá aiq pútare atówe ú ehwehne.*

<sup>1</sup> Néne iyahnabo anímáríno, iteba séna Manikáne kaweq ehwéh teiátautaq mó ehwéh mó ehwéhnue ahtebia áninká teínserah íre teiasa peh pahsuqme teiátáuge.

<sup>2</sup> Iteba míarautaq ínéga iwíáhéna, Mó aní éhweh íre teiníe. Írakaumo. Peh morá Sísá Karáhéga pukurai ehwéh teiníe íwíáhurauge.

<sup>3</sup> Iteba míarautaq néne ninonka íre págegeuraire. Írakaumo. Ninonka mareqmareréna áhreéna iransánurauge.

<sup>4</sup> Manikáne ehweh teiátautaq ahtebia áninká ehnenehne aitena teínserah íre teiasa Manikáne Awanka séhréh aintarái puana págegeue tei teinurauge.

<sup>5</sup> Peh íné wehukenínká irarurau ehwéhká íre awehraq káráirana Manikáne Awanka séhréh aintarái puana págegeue tei teinuraugeq aíq pútare aintárówe.

### *Manikáne Awanka ite kaweq iwíáh aitéhraq ahtebia ké úkúne i ehwéhne.*

<sup>6</sup> Peh morá Sísane sánsá kawerue sehgó kékabé ahtebia éhwéh síwáhno aruqarurúne. Mi ahtébiá éhwéhmé íre mah marákóráq wahnahno kené ahtebia éhwéh tahnsane. Wahnah ke pukirataq sene ahtebia éhwéh parabaginae.

<sup>7</sup> Itega íwáhnorúna ehwéhmé íre ínénéne iwíáh peh Manikáne iwíáh púana ahtebia éhwéh íwáhnorúne. Mah marákó mårákó íre mirarotaq Manikánka iwíáhéna, Mókakewe wehuke ínéba íópeq kigeheéna kaweraritaníe íwíáhúwe. Iwíáhéna ite kaweraite ah sabarankeheéna omaq atowe. Naho naho mina omaq ato ahnsábé éhwéh íre pahsuqme teiuwana peh kopípéq kagaúwe.

<sup>8</sup> Kopípéq kagaúwara mah marákóráq wahnahno kegá mi ehwéh íre írátíarowe. Írakaumo. Segá írátíarotaq tahirímé itene íópeqté Wáhnáh aní íre subiqme awankátaq táhpato irino.

<sup>9</sup> Manikáne ahtebia íwíáhyábé wene ehwehnka aíq mahraréna, Naho naho wehukene siuranka íre tagah naneq, sene siahrega íre íráh náneq, sene sirupipeq íre iwíáho naneqme, moke minawari Manikánka wensabé sirutaboiró keyábé kawerarowe ire. (*Aisaia 64.6*)

<sup>10</sup> Minayabe mi ehwéh kopípéq kowana Manikánka Wenawa iteba eqmatairana aíq sokigi aíre. Manikáne Awanka moke tagéna Manikánka ite íre teí íwíáh aíq tagariéhre.

<sup>11</sup> Wehukeníne arupipeqté íwíáhwé mó aninká tagariahraphiro? Írakaumo. Peh morá wehukení wewene awanka tagariéhre. Mina inserah Manikáne arupipeqté íwíáhwé wehukenínká íre tagariéhrana peh morá Manikáne Awanka tagariéhre. Minayabe wega Manikáne íwíáh aíq sokogi aíre.

<sup>12</sup> Itega mah marákóípéqté kégá iwíáh onserah íre úne. Írakaumo. Manikánka Wenawa iteba eqmaq áuwátáirana itereq mía míaire. Wega nái náini naneqmarí ahtebageheéna Wenawa iteba eqmaq áuwéhre.

<sup>13</sup> Manikáne Awanka iwíáh aitena wega nái náini naneq teiúge. Peh ahtebia wéhükégá teiénserah íre íwáhnoruge. Írakaumo. Manikáne Awanka iwíáh aintéh éhwéh íwáhnorugaq ahtebahrahowe.

<sup>14</sup> Manikáne Awansabé awahrieh aninká wene ehweh íre ahtebéna wega nái náini naneqsabé, Peh múgu wahgu ehwéhne éna nuwahriehre íwíáhire. Mira íwíáhinsabé Manikáne Awanka mi aní peh áwé tagehrana wega mi ehwéhnsábé íre ahtebahrahire. Peh morá Manikáne Awanka weba mía míai aninká mi ehwéh íwíáhue tagéna ahtebehre.

**15** Manikáne Awanka wene arupipeq mía míai anínká mó kené ehweh íréhtáq iwíáhue tagéna aiq pútaq ewhéhkákáq péhe éhwéhkákáq iwíáhue saraqme tagahráhire. Manikáne Awanka mía míai puana mó anínká mi aníné sánsá íre saraqme tagahráhire.

**16** Manikáne ehwehnka aiq mahraréna, Itene Wahnahné iwíáh tagarawéna wensabé áwáhnori anímé íre míéh mino ire. (*Aisaia 40.13*)

Íre míéhrana Manikáne Awanka séhréh aitéh púana Sísa Karáhéga iwíáhinserah iwíáhorahúne.

### 3

#### *Sísa tagariáh kéké Manikáne arambehri ke wóe i ewhéhne.*

**1** Néne iyahnabo anímáríno, iteba míarautaq itega mah kehiná kéhínánká iwíáh onserahnurowe. Mira iwíáh onserahnuro puaq ite pehgáriq anímárinká tahnsa iwíáhurowe. Minayabe Manikáne Awanka iwíáh arítéh ké síwáhnoruraunserah ite íre iwáhnorurauge. Írakaumo.

**2** Pehgáriq anímárinká tahnsa iwíáhuro puaq ite peh náh néq awaq íre nahrahewe. Minayabe mi tanáhráq págege ewhéh íre iwáhnorurauge. Amahnága moq íre iwáhnoruge.

**3** Amahnágaákáq itene irupipeqté áhbábáq sánsánsábé irutaboiro puaq págege ewhéh íre iwáhnonorahuge. Itewe abiahnsanéq tobéh ehweh aruqaruwé. Miraonsabé iteite iuwahbeh iwíáh miraéq peh wehukene sánsá sehgió mino.

**4** Mó anínká, Íné Porane sánsánu aní múge irana mó aninká, Íné Ápórone sánsánu aní múge ire. Mira iwíáhonsabé peh wehukene sánsá sehgió.

#### *Sotápéq arambehrioya anítéyábé pabeqme ewhéhne.*

**5** Kauerue iwíáhoro. Ápórowe insebo? Íné Porawe insebugo? Ite peh Manikáne arambehri aníté úye. Maniká itene Wahnahnka íné mó arámbéhrí niená Ápóro mó arámbéhrí awena urairata mi arámbéhríurauyaq itega Sísansabé aiq pútare atárówe.

**6** Wehukenínká ayu sotápéq uqmaréhnserah ínéga Sísa néhweh teiátáuge. Mó anínká wání sotápéq tuinkeheéna ubenah kíqmaréhnserah Ápóroga inehe iwáhnoruraire. Manikánka sotápéqté ménsáméhnsánsábé kiro atéhnserah wega ítensabé, Aiq pútare ainteq néne sánsá sehgió aitáráire.

**7** Íné ayu uqmatau anínseq ubenah kíqmaréh ánínseqsabé íre iwíáh iwíáh aitáhro. Írakaumo. Peh morá kiro atéh ání Manikánsabe iwíáh iwíáh atáhro.

**8** Ayu uqmaréh ánínseq ubenah kíqmaréh ánínseqka monseráhnue arambehrioya. Manikánka sene arambehri agehgamarena ápeq nárinkéhe.

**9** Itewe Manikáne so tahnsa móe. Ínéreq Ápóroreq moraráq Manikáne arambehriúya aníté úye.

#### *Nah peyabe pabeqme ewhéhne.*

Itewe Manikáne nah tahnsa móe.

**10** Íné Manikáne nah pe ani míankeheéna séhréh aintena omaq intáráire. Minayabe nah pe sansa tagaríeh ání tahnsanéna nahwiahnsanse pearógana abogéh tagaríeh ánínká abogéhire. Mi arámbéhrí Manikáne arambehri puaq ite mi arámbéhrí mirao ke tábúsoqme arambehrioro.

**11** Manikáne arambehriwe nah pe arámbéhrí tahnsane. Manikánka Sísa Karáhéwé nahwiahnsansee úwe. Mó aní nahwiahnsanse íre míahrahirana Sísa webataq awehrare.

**12** Manikáne arambehrio kegá abogéhotaq íre monseráh árámbehríowe. Wehukega pearáh náneqme itene arambehri tahnsáne. Kauerue arambehrio kegá kóraraté pearáhwara mó kegá págege moné tahnsa náneqtaté pearáhwara mó kegá kaweq ebáhtaté pearáhwara mó kegá awankátate pearáhwara mó kegá onerate pearáhwara mó kegá námúqtate pearáhwe.

<sup>13</sup> Sísa tuinagake Manikánka ehweh aritahnaraq kaweq arámbéhríowamo éna mó aníné arambbehri mó aníné arambbehriue agehmarena íre kaweq arámbéhrí moke kekiruankéhe. Kekiruhnaraqmé uworapeqté náneq moke taginserah íre kaweq arámbéhrí moke taginawire.

<sup>14</sup> Sano ebáh íre tagia peh kagainserah kaweq arámbéhrí aníné arambbehri íre toráh agia peh kagainawire. Wene arambbehri íre toráh agia peh kahnaraq mi arámbéhríyábé ápeq meyanae. Mó aníné arambbehri moke tagínaraqmé mi anímé ápeq íre meyanae.

<sup>15</sup> Ápeq íre meyéh ánímé nahperehrabeqté ání tahnsane. Wehukeníné nah irarehtaq mó anínká mi aní nahupeqte koweqme máhpeq atahnana wene nahnkakaq wene ménssámehnsánkakaq moke taginawire. Mina inserah Sísansabé aiq pútare atéh áninká íre ábéreh arámbéhríínaraq Manikánka we íópeq tumeiranae. Peh morá wene arambbehri moke tagína puana ápeq íre meyanae.

### *Itene inonka Manikáne nahne i ehwehne.*

<sup>16</sup> Manikáne Awanka itene irupipeq míai puaq itewe Manikáne nah moe. Minayabe aiq ahtebaho?

<sup>17</sup> Itene inonka Manikáne nah mire. Wega, Néne nahne éna we míai míairabeq ahbabáq íre kéhre. Minayabe wene nah ahbabáratéh ánímé kamah awinawire.

### *Itega peh wehuke síwíq pankerého i ehwéhne.*

<sup>18</sup> Itene irupipeqté péhé éhwéhká iteite péhe éhwéh nuwiyého. Peh morá mah marákóípéqté sásá ahtebeh anínká iwíáhena, Íné anotah ahtébiá ání múge íwíáhínaraq íre kawerire. Wehukenínká iwíáhena, Íné íre ahtebia ání múge íwíáhínaraq mókake ahtebia ání úkorahire.

<sup>19</sup> Aneqsabé mira íwíáhinkehbo? Manikánka mah marákóípéqté áhtébiá íwíáhyábé múguwahgu iwíáh wíre arítéhre. Minayabe ahtebia kékabéwé wene ehwehnka mahraréna,

Táhmaro kegá mó ke ahbabárarite sansansábé iwíáhéra mó ahbabáq sásá mó ahbabáq sásá miraonehe íwíáhowe. Iwíáhowana Manikánka peh áwé tagehrana seyene ahbabáq sansanká seye saiqnaríehre ire. *(Jop 5.13)*

<sup>20</sup> Manikáne ehwehnka mó mahraréna,

Itene Wahnhahnka ahtebia kéné iwíáh aiq tagehre.

Sega miraoneheqmúne iwíáh aiq tagehre.

Tagéna abehq íwíáhe arítéhrara íre miraorahowe ire.

*(Buk Song 94.11)*

<sup>21</sup> Abehq íwíáh arítéhnsábé wehukega miraoraho arámbéhríyábé íre iwíáh íwíáhoro. Manikánka séhréh aitéhnsábé ite moke wega í náneq matíáhwe.

<sup>22</sup> Íné Porareq Ápóroreq Pítareqka ite séhréh aitaneheéq míone. Manikánka moke mah marákó márakó náiena itene oga mé tanahráqkákáq itene puké tanáhráqkákáq omaq itéhre. Manikánka séhréh aitanieéna amahnága kék náneqkakáq mókake kahna naneqkakáq matíáhro aitéhre.

<sup>23</sup> Ite Sísa Karáhé kahnáh míáhwana we Maniká Iteribone ahninkáwá míéhre.

## 4

### *Maniká wewega wene arambbehri anímári agehmarena sainsue ehwéhne.*

<sup>1</sup> Itensabé íwíáhirataq, Ite Sísa Karáhéne arambbehri miraúna kee íwíáhoro. Ite Manikáne kopípéqté éhwéh wahnhahnúne íwíáhoro.

<sup>2</sup> Kaweq arámbéhrío kegá se arambbehri arítéh aníné ehweh kawerue sehgówe.

<sup>3</sup> Íné kaweq arámbéhríu aní míogamo. Itereq mó kereqka néne arambbehri iwíáhue tagéq tenírataq nirupipeq íre iwíáh kikirinie. Mó kegá néne arampehriyabé koti irataq nirupipeq íre iwíáh kikirinie. Íné moq ínénéne arambbehri íre agehgaqme tagaríóge.

**4** Ínéga arambehriurautaq áhwára áhwára arámbéhríuraume íre niahreraq kékhe. Íre niahreraq kékhsábé peh kawerue arambehriuraugamo? Árahuraugamo? Íre ínéga iwíahunka peh morá Manikánka agehgaqme sainuwankéhe.

**5** Amahnága íre ehweh arite tanahráq púaq mó kené arambehri agehmareq ehweh arítého. Sísa itene Wahnahnka tuinagake moke sunkíkírirabeq kopéqsúah náneqkakáq itene irupipeqté iwíahkákáq wene téhrehrabeq marahnana ábóraginae. Mi tanáhráq Manikánka mah kehiná kékhná agehmarena sainsuankéhe.

### *Anotah anímári múné iwíáhiyeho i ehwéhne.*

**6** Néne iyahnabo anímáriño, Manikáne sansá ahtebageheéna ínéreq Ápóroreqsabé teiewóge. Ite anítéyábé iwíáhqué Manikáne pükuga irarinserah tábúsoqme sehgióro. Manikáne anítéyábé peh morá ánínsábé iwíáh ateq mó aní peh áwé tagahwe. Íre kawerowe. Manikáne ehweh anteruéhboq mina tahnsa íre oro.

**7** Ite anotah anímári múné iwíáhoo? Manikánka íre náiátaitaq tahirímé ite peh tabonahqué mareqmareq ke míáh iripo? Manikánka aiq náiená séhréh aitáráinsabé aneqsabé iteitensabé iwíáh iwíáhoo?

**8** Itewe, Manikáne sansá aiq moke ahtebóne iwíáhowe. Itega íné, Pora kiotaikéq anotah anímári múné iwíáhoo? Itega aiq pútaq ahtebahtaq tahirí ínéga moq iwíáhu irino.

**9** Íné iwíáhume Manikánka ite, wega eqmaro keyabé, Moke mó ke ebeq nogirara ite sinehe sigehe ire. Wehukega wehukení subiq suaneheraotaq áhnte kegá taganeheéra sewe. Ite eqmaro kewe mina subiq suaneherao wehukení tahnsa múné. Íre peh wehukega ite iwahlkanowara íopeqté kéréqka moq iuwahlkanowe.

**10** Ite eqmaro kega Sísa Karáhéne arambehri miraúnayabé áhnte tagah kegá iwiréh aitera múguwahgu mareqmareq ke wóe aitáhwe. Itega iwíáhqué, Sísa Karáhéne sansá aiq ahtebóne éq págege animári míone éq mó kegá itensabé iwíáh iwíáh aitáhwe ewe.

**11** Ite eqmaro ke menahnkákáq amahnágaákáq irupibiire. Tahbobóire. Itene korósi peh subankire. Mó kegá ite subiq måráhwaq íre nahnkakaq ké wéq ahtapeq áhnte nogune.

**12** Itene iyahnkaratáté págegeue arambehriúne. Mó kegá ite íre kaweq ehwéh aitáhtáq itega kaweq ehwéh ayahqme teriune. Mó kegá íwíoqnahtaq peh míone.

**13** Mó kegá ite íehruruotaq se insahwé aritone. Mó kegá ite eqmaro keyabé, Ite atutu tahnsanéq abehq ké wóe aitáhwe.

### *Poraga, Ínéga iwíáhue mira aruqaruru serahnoro i ehwéhne.*

**14** Iyehitankeheéna mah ehwéh sehiranue teiugo? Írakaumo. Itensabé nirutaboiru anímári míáh púana kaweq iwíáhigeheéna mah ehwéh sehiranue teiúge.

**15** Peh íregáritaq ke 10 táhúséni (10,000) íwáhnoro ke míáhtáq tahirí íre áhnte itéríboréh míáh iripo? Írakaumo. Téh koreiatáu anímé peh morá ínébatare. Itega Sísa Karáhénabe aiq pútare atárotaq we éhweh ínélataq teiátáunsabé iteribo úkurauge.

**16** Iteribo úkuraunsabé ínéga iwíáhue mira aruqaruru serahnoro éna tei teinuge.

**17** Ínéga mira aruqaruru serahnigheheéna Tímóti iteba eqmaq áuwóge. Tímótiwe Sísa itene Wahnahnne aninéna wene sánsá kawerue sehgiéna nirutaboiru anínéna nénahni tahnsa míéhre. Sísa Karáhéne sansámé mó ke suwahpeq mó ke suwahperue momiwíuriáhtáq síwáhno aruqaruruge. Mi sansá iahreraq itena íwáhnorinkeheéna Tímóti iteba eqmaq áuwóge.

**18** Táhmaro itega píribahriéq, Poraga iteba íre sinkehe iwíáhowe.

**19** Itene anotah Wahnahnká kowe aintahnaraq iteba apubúue kinie. Konaraq píribahri kené ehweh anetaníbo éna sene sánsá págege sansápómo éna taganie.

**20** Manikánka wahnah wahnahnirabeqte sánsámé íre peh ehwehne. Mi sansámé págege aitahráhi sansá míre.

<sup>21</sup> Iteba konaraq abowágá wene ani kamah awínserahnue págegeue kininkono? Iteba konaraq nirutaboirue pehwehrue kininkono? Aneq sansánue kininkono? Teníero.

## 5

### *Wenabone ahre abarii ehwéhne.*

<sup>1</sup> Ite míáhrabeqte áninká anotah íre kaweq ahbabárire uro ehwéh írátáuge. Mi ahbabáqmé ahkaragára sansanéna anotah oríráne. Wehukega íre mirao sansá mi aninká mirauraire. Wenabone ahre abariuraire urowe.

<sup>2</sup> Itewe anotah ke úne iwíahéq mó ke kiotaikúne iwíahoo? Aneqsabé itene irupipeq íre umehiro? Iyehitáhnaq mi ahbabáq ání móbeq kaqsúáhro.

<sup>3</sup> Íné iteba míotaq tahirí itene iuranabiahtapeq mi ahbabáq ání ehweh ató irino. Ninonka mahtaq míogana peh morá néniwa iteba míehnsábé mi anínsábé aiq ehweh atóge.

<sup>4</sup> Itega momiwíeq Sísa áwíq áhrabirataq néniwa moq míanae.

Itene Wahnah Sísaga págege aitahnaq

<sup>5</sup> mi anínsábé ehweh atanéhe. Ahbabáq aniné anonka kamah awinkéhboq owainawapa kaqsúáhro. Itega miraonaraq wega iwíahue wene ahbabáq suahnaraqmé Sísa itene Wahnah tuina tanáhráq íre kamah awinkéhe.

### *Ahbabáq ani móbeq kaqsúáhro i ehwéhne.*

<sup>6</sup> Ite anotah ke úne irareme íre kawerowe. Ite míáhtáq anotah ahbabáq ání míéh mino. Páréti agiéh áninká pehgáriq muoráhi naneq marahnaraq moke páréti mugue anotah úkinae. Mina inserah ite míáhrabeq ahbabáq íúgi ínehoéq mi ahbabáq ání kaqsúáhro.

<sup>7</sup> Muoráhi naneq párawahipéq íre kahnaraqmé párawah peh kanae. Íre muinae. Minayabe naho muoráhi naneq súáhro. Ite o paréti íre muoráhi paréti tahnsa míagehboq ahbabáq ani kaqsúáhro. Kaqsúéhrataqmé wene ahbabáqka ite íre íúgi ínaq peh kaweqtaq míagehe. Sótaikú iahreraq ko tánáhráq sokah sokahéra\* sipisípiq áráhq subiq márónserah Sísa Karáhé subiq súowe.

<sup>8</sup> Iwíah iwíahé tanahráqsábé sokah sokahonehe. Sokah sokahéra Asiu kegá sene nahtapeqté nahonáh muoráhi naneq súónserah ite Sísa tagariona animárinká itene ahbabáqkakaq moke íroke sansánkákáq suaneheqmúne. Wehukega o paréti íre muoráhi naneq kék páréti tirúnserah itega peh tábúsuréh sánsámé aiq pútaq sansámé sehgonehemqúne.

<sup>9</sup> Mó anímáríné ahre abari aruqaruro kereq íre mía míoaro éna sehiranue teiewóge.

<sup>10</sup> Moke ahbabáq kék sueq móbeq míáhro íre uge. Se mah marákóípéqté kékéra mó kené ahre weh abariéra mó kené ménsámehsá meyaneheéra subiqme sabiwíáhwe. Segá Manikánsabe íre iwíah iwíahia peh mó naneqsabé iwíah iwíah aruqarurowe. Itega moke mina tahnsa kék súáhtáq tahirímé mah marákóráq íre míáhraho irino.

<sup>11</sup> Peh morá, Ite Sísa tagarione e kegá ahbabáriransabé sehiranue teiewóge. Mó kené ahre weh abariome, mó kené ménsámehsánsabe aigárá pabekime, Manikánsabe íre iwíah iwíahia peh mó naneqsabé iwíah iwíah atáhmé, mó keyábé péhe ehwéh aritewé, píah néra muguwahgu aruqarurome, aebówé mina tahnsano ke sueq móbeq míáhro. Ite Sísa tagarione e kegá mina tahnsa áhbábárirataq moráráq táhutahuriyehboq móbeq míáhro.

<sup>12</sup> Sísa íre tagariáh kékabé ehweh aritanínkono? Ahqáho. Írakaumo. Minawé íre néne arambehri wire. Sísa tagariáh kék ite momiwíuríah kéká ahbabárirataq ehweh ariteyabe iteitene arambehri wire.

<sup>13</sup> Sísa íre tagariáh kékabé ehweh aritewé peh Maniká wewene arambehri wire. Ahbabáq aninsábé Manikáne ehwehnka mahraréna, Ite míáhrabeqte ahbabáq aruqaruri ání kaqsúáhro ire. (Lo 13.5, 17.7, 21.21, 22.21-24)

\* 5:7: Kisim Bek 12.3-21, 13.6-7 tagáhno.

## 6

*Sísa tagariáh ké kota arítéhneho i ehwéhne.*

<sup>1</sup> Sísa tagariéh áninká miraínayabé arega abiahnsa atéhnaraqmé anerinabo? Sísa íre tagariéh wáhnáh ánipá meqme móate kota atéhneho. Minawé ayehiteh sansáne. Peh Sísa tagariáh kéká meqme kure kota ato.

<sup>2</sup> Mókakewé itega Sísa tagariáh kégá mah kehiná kékínáné sánsánsábé iwíáhue tagéq sararaneheqmúne. Minawé aiq ahtebaho? Itega mókake mah kehiná kékíná ehweh arítáhnayabé amahnága aneqsabé pehgáriq ahbabáq naneq íre kaweraritahráho?

<sup>3</sup> Mókake itega íopeqté kéné sánsá moq saraqmaráhnawé íre ahtebaho? Minawé anotah arámbéhrie. Amahnága ahbabáq naneq kaweraritewé pehgáriq arámbéhrie.

<sup>4</sup> Minayabe ite Sísa tagariáh kégá kota ehweh kahnaraq Sísa íre tagariáh kégá kaweraitageheéq aneqsabé seba pokoo?

<sup>5</sup> Seba pokonsabé aneqsabé íre iyehitehro? Ité Sísa tagariáh kék míáhrabeq ahtebia ánime mi arámbéhri miraorahi aní míéh mino?

<sup>6</sup> Sísa tagariéh áninká mó Sísa tagariéh aní ehweh atankeheéna Sísa íre tagariáh kégá tagahtaq meqmena móátéhmé íre kaweq sansáne.

<sup>7</sup> Sísa íre tagariáh kék míáhrabeq itega Sísa tagariáh kékabé ehweh arítéhrame ahbabáq sansanéq Sísa Karáhene salsa íre sehgiowe. Sísa tagariáh kégá ite ahbabáraitéhrataqmé itega túbáh agirataqmé íre ahbabárowe. Minayabe túbáh agina sansánká ehweh atahna sansá kiotaikire. Sísa tagariáh kégá arene ménsámehnsá aebóínaraqmé arega túbáh aginawe mi sansánká ehweh atahna sansá kiotaikire.

<sup>8</sup> Kiotaikiraq peh itewe íre túbáh agowe. Írakaumo. Íre túbáh agia peh mó Sísa tagariáh kék ahbabárariteq sene ménsámehnsá aebóowé.

<sup>9</sup> Ahbabáq kega Manikánka wahnah wahnahnirabeq íre awaq míáhmé aiq ahtebah mino. Péhe éhwéhnká itene irupipeq péhe nuwiyéhboq íráhro. Ahrari mahbi abario kewé, Manikánsabe íre iwíáh iwíáhia peh mó naneqsabé iwíáh iwíáh atáh kéké, mó aníne ahre weh abario kewé, wehga áwáhu weh sobaruqnabaruro kewé Manikánka wahnah wahnahnirabeq íre awaq mianeherawoe.

<sup>10</sup> Aebó kéké, mó kené ménsámehnsásabe sigará pabeki kewé, píah néra múguwahgu aruqaruro kewé, mó keyabé péhe éhwéh arítáh kéké, mó kené ménsámehnsá pehipi meyáh kéké, mina tahnsa áhbábáq aruqaruro kewé Manikánka wahnah wahnahnirabeq íre awaq mianeherawoe.

<sup>11</sup> Menahmé ite táhmaro mina tahnsa kék míarowe. Míarowana Manikánka ite pabeq paberaitena, Néne animári míáhwe aitáráire. Itega itene Wahnah Sísa Karáhénnsabe aiq pútare atárótaq Manikáne Awanka itene ahbabáq kaqiuwena itene irupipeq kaweraitáráitaq Manikánka itensabé, Kaweqtaq míáhwe aitáráire.

*Itene inonkame Manikáne Awane nah puaq mó kené ahre weh abariiyeho i ehwéhne.*

<sup>12</sup> Manikánka íre ahqáho aitárái sansá aiq miraorahuge irareme aiq pútaq iwíáhowe. Peh moke miraorahúna sansánká íre séhréh aitahráhire. Minayabe mó sansánká íné saiqnariehnehoéna pehwehrue míanie.

<sup>13</sup> Itega pabeqme ehwéh irareme, Táhutahuqme itene irupipeq iyahbankire nanere éq minayabe Manikánka itene ayahba mirarowe ewe. Itene ayahbame tópah mewe nanere éq minayabe Manikánka tópah kirahno atéhre ewe. Mi ehwéh aiq pútaq éhwéhniraná peh mókake Manikánka táhutahuqkakáq itene inonkankakáq parabaruankéhe. Mina inserah mó kené ahre weh abariigeheéna Manikánka itene inonka miraroo? Írakaumo. Itene inonkame itene Wahnahne anonka mire. Wene sánsá miraigeheéna itene inonka mirarowe.

<sup>14</sup> Maniká págege aní púana itene Wahnah Sísa iriwe organúq atonserah ite moq iriwe organúq itankéhe.

<sup>15</sup> Itene inonkataq moke kék náneqmarí Sís Karáhéne naneq mire. Minawé aiq ahtebaho? Itene inonkame moke inonkataq kék náneqme Sísane naneq púaq árahue itene inonka ahbabáq ininsó sienéhnkono? Írakaumo. Anotahtaq ahqáho uge.

<sup>16</sup> Manikáne ehwehnka aiq mahraréna,  
Weh ahre peh morá áú tahnsa úkigehe ire.

(Stat 2.14)

Minayabe arega ahbabáq ini abariónaga wereq arereqne íú peh morá áú tahnsa úkire.  
Minawé aiq ahtebaho?

<sup>17</sup> Itene Wahnah Sísareq mía míaonaraq arereq Sísareqne iwa peh morá áwá tahnsa úkire.

<sup>18</sup> Mó kené ahre weh abarié sansa pehragahro. Ahriahri mi sansánirarabeq móbeq míahro. Moke mó ahbábáqmé íre wewene anonka ahbabáruwiähráhire. Mó kené ahre weh abarii anímé wewene anonka ahbabáruwíéhre.

<sup>19</sup> Manikánka Wenawa iteba eqmatairana iteba mía míainsabé amahnága arene anonka wene nah mire. Minawé aiq ahtebaho? Arene anonkame íre arebataq arene wíre. Írakaumo.

<sup>20</sup> Insahwé aitanieéna Manikánka anotah apéqtáté paiqmarowe. Aiq paiqmaronsabe itene inonkankakáq Manikánsabe iwíáh iwíáhoro.

## 7

### *Poraga wehké sansánsábé irarú ehwehne.*

<sup>1</sup> Itega sehiranue kasenuro ehwéh teiníboq írátíáhro. Ahre íre mera peh míéh ánime aiq kawerire.

<sup>2</sup> Íre ahreakáq áninká mó kené ahre abariínehboq we ahre meyankéhe. Ahrari wehkinkehe.

<sup>3</sup> Wehne anonkame íre webataq wene anonka mire. Minayabe arene ahrega, Máho ínah íre ahqáho ato. Ahrene anonka moq íre webataq wene anonka mire. Minayabe arenawehqka, Máho ínah íre ahqáho ato.

<sup>4</sup> Ahrega wewene anonka íre wahnahnire. Írakaumo. Peh wenawehqka wahnhannatéhre. Mina inserah awehkawagá wewene anonka íre wahnahnire. Írakaumo. Peh wene ahrega wahnah atéhre. Minayabe arene ahreyabé arenawehqsabe íre ahqáho ato.

<sup>5</sup> Ite weh ahre morá iwíáhéta kawerue púreroyehe iwíáhéta awehriéta peh míayehe irataqmé aiq kawerire. Púrerira tanáhráq parabagínaraq mó íre ahqáho ato. Owainawanka mó aní abarié iwíáh atehnehboq íre ahqáho ato.

<sup>6</sup> Ahre meyo éhwéh íre teiúge. Ahreyabé awina aninká iwíáhue meyankéhe. Séhréh aiteyabe mah ehwéh teiúge.

<sup>7</sup> Moke mó ke íné tahnsanue míáhtáq tahirí aiq kaweri irino. Peh Manikánka ahre meweyabe mó aní mó iwíáh atena mó aní mó iwíáh atena aruqarurire.

### *Íre túbáh agorahotaq ahre meyáhro i ehwéhne.*

<sup>8</sup> Mahbigaunseq ahrarigaunseq kékweinínsónseqsabé mahraruge. Íné íre ahreakáq ání múge. Ite íné tahnsa míehrataqmé aiq kawerire.

<sup>9</sup> Ite íre peh míahrahirataqmé ahre weh meyáhro. Mahbiga, Ahreyabé níre irana ahrariga, Weh kéreyabe níre ire. Mó kené ahre weh abariiyehboq arerene ahre weh airaiq meyáhro.

### *Arenawehq auwéhneho i ehwéhne.*

<sup>10</sup> Ahreakáq wehakaq kékabé mahraruge. Ánáhkawagá awehkawa íre auwo atóge. Mahnawé íre ínénéne ehwehne. Írakaumo. Itene Wahnahnka aiq irarire.

<sup>11</sup> Ánáhkawagá wenawehq auwahnaraq mó wehkínehboq peh míankehe. Áuwátái wehbá kouwekue insahwé atahnaraq aiq kawerire. Awehkawagá wene ahre airaiq áuwéhneho.

*Nánuwehq kéranié ínaraq avehkawagá áuwéhneho i ehwéhne.*

<sup>12</sup> Mó keyábé peh ínénéne iwíáhu ehwéh teínie. Íre itene Wahnahnka tení éhwéh peh ínénéga iwíáhéra mahraruge. Avehkawawé Sísa tagaríeh ánínirana ánáhkawa Sísa íre tagaríeh ínínká, Nánuwehq kéranié ínaraq avehkawagá áuwéhneho.

<sup>13</sup> Ánáhkawa Sísa tagaríeh ánínirana avehkawa Sísa íre tagaríeh wéhgá, Néne ahrereq míanie ínaraq ánáhkawagá áuwéhneho.

<sup>14</sup> Ánáhkawagá Sísame sánsá sehgieyabe Sísa íre tagaríeh áwéhkawágá wene ahre íre auwena wene sánsá tagéna kaweqtaq míahrahire. Avehkawagá Sísame sánsá sehgieyabe Sísa íre tagaríeh ánáhkawágá wene weh íre auwena wene sánsá tagéna kaweqtaq míahrahire. Minayabe arene ahrega, Arereq míanie ínaraq áuwéhneho. Arenawehqka arereq míanie ínaraq áuwéhneho. Íre áuwéhrataq itene animári moq kaweqtaq míahrahewe. Kaweqtaq míahrahi ehwéh péhe éhwéh tahirímé itene animári Sísa íre tagariáh ké miáh irino.

<sup>15</sup> Wehgabópoq ahregabópoq Sísa íre tagaríeh ánínéna wensabé nuwahriehre éna pokinie ínaraqmé peh áwé tagahro. Manikánka itensabé, Pehwehrue míáhro aitéhnsábé itene iru ukiq itankeheeéq mi anínká pokinie ínaraqmé peh áwé tagehrataqmé aiq kawerinae.

<sup>16</sup> Arenawehqka arereq míéhnsábé mókake wega Sísame sánsá sehginabirapómo. Arega íre tagariahne. Arene ahrega arereq míéhnsábé mókake wega Sísame sánsá sehginabirapómo. Arega íre tagariahne.

*Manikánka ite saraq iátái arámbéhrí sehgóro i ehwéhne.*

<sup>17</sup> Maniká itene Wahnahnka ite omaq itena wene arambehri saraq iátáire. Saraq iátái arámbéhrí kawerue sehgóro. Sísa tagariáh ké íwáhnorutaq mah ehwéh tei teinuge.

<sup>18</sup> Manikánka are íre áhraburai tanáhráq mó kegá arene áú amurúrutonsabé ayehitéhnehboq anetaníbo íwíáhúno. Manikánka are áhraburaitaq arene áú íre amurúrutonsabé amahnága mi sansánsábé arutaboirinehboq pehfragáhno.

<sup>19</sup> Arene áú amurúrutonsabé peh abehq míre. Anetaníbo íwíáhúno. Arene áú íre amurúrutonsabéákáq anetaníbo íwíáhúno. Peh Manikánka sehgóro ú ehweh sehgiónsábé anotah sansá míre.

<sup>20</sup> Manikánka áhraburaitaq miraurona arámbéhrí miraúno.

<sup>21</sup> Manikánka áhraburaitaq mó aníné arambehriga are saiqnariarairo? Minayabe iwíáh kikirineho. Arene marakóipeqté wáhnáhnká soraq auwena pokúno atahnaraq pokinkehe.

<sup>22</sup> Maniká itene Wahnahnka are áhraburai tanáhráq mó aníné arambehriga are saiqnariarairana Sísa itene Wahnahnka arene ahbabáq kaqauwátáinsabé wega soraq áuwéh ání tahnsa míahne.

Wega áhraburaitaq pehipi míaronana Sísa Karáhéne arambehriga amahnága are aiq saiqnariéhre.

<sup>23</sup> Wene animári míageheéna Sísga anotah apéqtáté paiqmarowe. Paiqmaronsabe peh wehuke suwahbeh sansá miraiyeho. Peh Maniká awahbeh sansá miraoro.

<sup>24</sup> Néne iyahnabo anímáríno, Manikánka ite íáhraburaitaq mirauro arámbéhrí miraéq Maniká Iteriboreq mía míaoro.

*Poraga mahbigaunseq ahrarigaunseqsabé teriu ehwéhne.*

<sup>25</sup> Mahbigaunseq ahrarigaunseqsabé mahraruge. Itene Wahnahnka mah ehwéh terio íre tenírana peh ínénéga aiq pútaq ehwéhneána iwíáhue teiúge. Wega íné séhréh aintéhrana wene arambehri mira aruqarurge. Minayabe néne ehweh íráhro.

<sup>26</sup> Íre kaweq sunúq áhníbórá sinainsabé ahre meyaníe íwíáh, wehkinie íwíáh súáhro. Mi iwíáh súéhrataqmé aiq kawerire íwíáhuge.

<sup>27</sup> Ahreakáq míéhnaraqmé áuwéhneho. Íre ahreakáq míéhnaraqmé ahre meyaníe íwíáhineho.

<sup>28</sup> Arega ahre meyéhnaraq minawé íre ahhbabáriniewóne. Arega wehkinaraq minawé íre ahhbabáriniewóne. Ahre meyéhra kegá mah marákóráq mé tanahráq sirupipeq umeh aginawire. Itene irupipeq umeh agínehoéna teiúge.

<sup>29</sup> Néne iyahnabo anímáríno, mah marákóípéq mé tanahráq aiq parabaginaire. Sísa tuina tanáhráq áhnibórá sinare. Minayabe ahre mero keo, íre ahreakáq ké tahnsa míáhro.

<sup>30</sup> Ibisah keo, íre ibisah ke tahnsa míáhro. Iru eyoyóo keo, iru íre eyoyóo ke tahnsa míáhro. Ménsámehsnsá paiqmaq paiqmaro keo, íre ménsámehsánkakaq ké tahnsa míáhro.

<sup>31</sup> Mah marákóípéqté sásá parabaginai puaq áhnte mensáméhnsánkákáq kéro, itene ménsámehsánsabe irutaboiriyeho.

### *Iwíáh kikiriyeho i ehwéhne.*

<sup>32</sup> Ite iwíáh kikiriyeho éna mah ehwéh teiúge. Íre ahre merai áninká Maniká wene Wahnahne arambehri kawerue sehgieyabe iwíáhire.

<sup>33</sup> Wene ahrega kaweróne atankeheéna ahre merai áninká mah marákóípéqté náneqsabé iwíáh iwíáhire.

<sup>34</sup> Minayabe we mó iwíáh mó iwíáhire. Sísa tagariéh áhrarígá iwíáhéna, Néne nínonkakakaq néniwankakaqmé kaweqlaq míanieéna Maniká áwúge éna Maniká wene Wahnahne arambehriyabé iwíáh iwíáhire. Wenawehqka kaweróne atankeheéna wehakaq íninká mah marákóípéqté náneqsabé iwíáhire.

<sup>35</sup> Págege sansánká saiqnariankeheéna íre teiúge. Írakaumo. Peh séhréh aitanieéna mah ehwéh sehiranue teiúge. Maniká itene Wahnahnsabé webataq iwíáh iwíáh ateq wene sásá kawerue sehgiheéna sehiranue teiúge.

### *Wene ahre aráriyábé éhwéhne.*

<sup>36</sup> Wene ahre aráriyábé arutaboiréna abariinie íwíáh aruqaruri anímé ahhbabáratehnehboq airaiq meyankéhe. Wega airaiq meyahnwé íre ahhbabárinae.

<sup>37</sup> Wewene anonkataq kawerue wahnahnorahi mahbígá, Ahre íre meyaníe íwíáhínaq aq kawerire.

<sup>38</sup> Wene ahre arári meyéh ánímé kawerire. Ahre íre meyéh ánímé anotah kawérire.

<sup>39</sup> Wenawehq oga míahnaraqmé mi inínká awehkawareq mía míaigehe. Sísa tagariéh íníné awehkawa pukínaraq we mó Sísa tagariéh ání kérankéhe.

<sup>40</sup> We mó Sísa tagariéh ání kérahnaraqmé aq kawerire. We peh keweiní míahnaraqmé anotah kawérire. Mahnawé ínénéga iwíáhugé. Manikáne Awanka mah iwíáh aintehrámo. Wega mah iwíáh aintéhre iwíáhugé.

## 8

### *Poraga titirue nárie naneqsabé irarú ehwehne.*

<sup>1</sup> Péhepehe maníkánsabé titiro naneq nanehnkono éq ínénabe kasenurowe. Mó aní mó anínkáue minayabe íné aq ahtebóge eme aq pútaq ehwéhnowe. Aq ahteboge íwíáhome saiyo sansane. Peh morá mó anínsabé irutaboirúnaga séhréh aitahráhi sansáne.

<sup>2</sup> Íné moke ahteboge íwíáhi anínká íre anotahtaq ahtebehrana wene ahtebeh sansa íre awehrare.

<sup>3</sup> Maníkánsabe arutaboiri anímé Maníkánka we tagariéhre.

<sup>4</sup> Péhepehe maníkánsabé titiro naneq nanehnkono ue kasenuronsabé teiúge. Ite tagarionawe péhepehe maníkámé íre aq pútaq nanere. Peh abeq píkísáh tahnsane. Íre áhnte maníkámári míáhwe. Írakaumo. Ite tagarionawe Maníkámé peh morá ánínéna webataq Maníká míre.

<sup>5</sup> Mó kegá mahraréra, Íópeqkákáq mah marákó márákóípéqkákáq áhnte maníkámárínseq wahnah anímárínseq míáhwé ewe. Ite tagarionawe mi ehwéhmé íre aiq pútaq ehwéhne.

<sup>6</sup> Maniká Iteribo peh morá ánínéna webataq Maniká míre. We moke mirarena wene animári míagehééna ite moq mirarowe. Sísa Karahéwé we peh morá ánínéna itene Wahnah mire. We moke mirarowaq amahnága séhréh aitéhnsábé oga míone.

<sup>7</sup> Mó kegá Maniká éhwéh íre ahtebahwe. Sega Sísa íre tagariarotaq péhepehe maníkáné sánsá aiq sehgirowe. Aiq sehgirowsabé amahnága mi naneqsabé titiro tahutáhúqmé íre nah nanere éra áhwára áhwára iwiáhowe. Mina tahnsa iwiáho kegá mi tahutáhúq nehrataq. Mi tahutáhúqká ite ahbabáraitéhre iwiáhowe.

<sup>8</sup> Itega táhutahuq nahnayabé Manikánka kaweraitankéhbo? Írakaumo. Wega awehrio keyábé íre ehwéh arítéhre. Nah keyábé kawerowe íre arítéhre.

<sup>9</sup> Ite iuwahbeh tahutáhúq naneheqmúne irataqmé áhwára áhwára iwiáho kegá ite tagéra ahbabáriyeho. Itega nehrataq mó ke ahbabáriyehboq kawerurero.

<sup>10</sup> Are ahtebáhna anínká péhepehe maníkánsábé árótu nahtápéq míéhnaraq titiro tahutáhúq nehnana áhwára áhwára iwiáhi anínká are tagéna íné moq nanie iwiáhinabomo.

<sup>11</sup> Wega aiq pútaq sansá peh ákáhtaq ahtebehnsabé náhnaraq wene arupipeq íre kaweraginæ. Are ahtebia anínká miraónaga mina áhwára áhwára iwiáhi aní anotahtaq íre kaweratanae. Sísa Karahéga mi aníné ahbabáqsabeákáq pukúwe.

<sup>12</sup> Áhwára áhwára iwiáhi aní ahbabáratahna puah Sísa Karahé moq ahbabáq atahne.

<sup>13</sup> Ínéga nahnayabé mó Sísa tagariéh anínká íné tagéna ahbabárinaraq mina íre kawerinae. Minayabe mó Sísa tagariéh aní ahbabáq atéhnehoéna mi tahutáhúq ahriahri awehrinie.

## 9

### *Poraga wene arambehriyabé móne íre meyonsabe iwiáh iwiáhú ehwehne.*

<sup>1</sup> Itega néne sansa aiq tagariáhwe. Mó naneqka íné íre saignariéhre. Írakaumo. Wene arambehri mirainkehééna Manikánka eqmaq núwátái mino. Sísa itene Wahnah aiq tagarau mino. Sísa itene Wahnah éhwéh teiátáutaq wensabé aiq pútare atáró mino.

<sup>2</sup> Mó kegá iwiáhome, Manikánka íné íre eqmaq áuwátáire iwiáhowe. Peh itene Wahnah éhwéh teiátáugaq aiq pútare atárónsabé ite tagariáhmé Manikánka íné eqmaq núwátáire.

<sup>3</sup> Mó kegá ehwéh aintéhrataq mahrarinie.

<sup>4</sup> Manikáne arambehri miraunsabé wehukega íné kirabo aintáhmé íre kaweq sansápo? Írakaumo. Kaweq sansáne.

<sup>5</sup> Manikáne arambehri miraoneheéra Sísa ábáqmarinseq Pítareq mó eqmaro kereqka ahtapeq nogótáq sene ahreronká se kérírahwe. Ínéga moq mi sansá mirautaq tahirímé kaweq sansáne iwiáho irino.

<sup>6</sup> Mó kegá Manikáne arambehri miraome pehipi kiraboowe. Peh morá ínéreq Páhnábásareqka itene tópah paiqmarayehééta arambehriúye.

<sup>7</sup> Sene kiápéténine arambehri miraoneheéra sóntía kegá ahtapeq nogótáq íre seyene móneraté peh wahba monéráté tópah paiqmaq paiqmaro mino. So uqmatai anínká táhutahuq nera kéhtáq mewe naruq naruri mino. Sipisípiq wahnahni anínká mi kané náhnano naruq naruri mino.

### *Ite séhréh aitera iwáhnoro ke kirabooro i ehwéhne.*

<sup>8</sup> Ínéga peh wehukene sansá iwiáhéra mi ehwéh mirarire iwiáhiyeho. Írakaumo. Naho Manikánka Mósísi iwiáh atowana wega minayabe sehiranue mahraréna,

<sup>9</sup> Káhoga arambehriitaq wene áwéhipeq náhgáq táhrareho. Mi kanká arambehrii puana arupibiínaraqmé pehipi táhutahurinkehe úwe. (Lo 25.4)

Manikánka peh káhoyabé arutaboiréna mi ehwéh irarúwo? Írakaumo.

<sup>10</sup> Itensabé iwiáhéra irurú mino. Itega mina tahnsanigehééna irarúwe.

Sonsoréh áninká, Mókake sotápéqté táchútahúq mewe nanieéna arambehriire. Wereq we séhréh atéh ánínseqka nayeherawoye.

<sup>11</sup> Wehukega ayu uqmarera anehe mi sotápéqté tópáh nahnsarah itega Manikáne ehweh tei teinúye. Tei teinúyansabé itene ehweh íráh kégá kirabo aitéhrataqmé kaweq sansánoneheqmóe.

<sup>12</sup> Itega mó ke kirabouro puaq itenkakáq kirabourotaq tahirímé anotahtaq kawerowe urauya irino.

Kirabo aitáhro íre teiátáuye. Iteba pehipi míarauye. Itensabé abiahnsanéq Sísá Karáhéne kaweq ehwéhnsábé anetaníbo íwíáhiyeho éta kirabo aitáhro íre teiátáuye.

<sup>13</sup> Manikánsabe iwiáh íwíáh atáh náhtápéq arambehrio kegá mibeqté táchútahúq mewe nahwe. Minawé tagariáh mino. Mitaq titiro tahberaq arambehrio kegá mi naneq pehgáriq mewe nah mino.

<sup>14</sup> Mina inserah Sísá itene Wahnahnka mahraréna, Kaweq ehwéh íráh kégá se síwáhnoro kené sinonka séhréhorahi naneq nárigéhe ire.

<sup>15</sup> Ínéga itene táchutahuq pehipi íre merauge. Mókake íné pehipi kirabo aintageheéna sehiranue teiugo? Írakaumo. Nirupinsabé pukonaraq íre ineh inehinie. Íné ineh inehutaq tahirímé ínéga pehipi íwáhnoru sansánsábé íre iwiáh íwíáhorahu irino. Mó kegá néne iwiáh íwíáhu sansá sabi núwého.

<sup>16</sup> Manikáne kaweq ehwéh tei teinunsabé kaweq aní múge éna iwiáh íwíáhininkono? Írakaumo. Manikánka koreri terinúno aintáráinsabé íné kaweq aní múge ue íre iwiáh íwíáhorahuge. Mi kawéq ehwéh íre terisa ehiya míótáq tahirímé anotahtaq íre kaweru irino. Kaweq ehwéh teri terinu arámbéhrí íre suaníe.

<sup>17</sup> Ínénéga iwiáhue miraurautaq tahirímé ápeq meyó irino. Íre ínénéga iwiáhurauge. Manikánka koreri terinúno aintáráinsabé pehipi mira aruqaruruge.

<sup>18</sup> Minayabe aneq apéq meyaninkono? Mó teri terino kegá ápeq meyáhnserah íre uge. Kaweq ehwéh pehipi tei teinunsabé niru eyoyóue nirutaboirume néne ápeq míre.

### *Porawe áhnte ke séhréh arítéh áníne i ehwéhne.*

<sup>19</sup> Mó kegá íné íre saiqnariáhwe. Áhnte kegá Sísane sánsá sehgigeheéna sene arambehri aní tahná míóge.

<sup>20</sup> Asiu kegá Sísane ehweh kawerue irera sehgigeheéna seba míarautaq sene sánsánurauge. Mósísiga sehgóro ú ehwehnká íné íre saiqnariéhre. Íre saiqnariéhrara Asiu ke mi ehwéhnsábé iwiáh íwíáho puana seba míarautaq mi ehwéh íre anterutauge. Asiu kegá Sísane ehweh kawerue irera sehgigeheéna mi ehwéh íre anterutauge.

<sup>21</sup> Nahnso ke Mósísine ehweh íre sehgóro ké wóe. Minayabe nahnso kereq míarautaq se tahná ména íné moq íre sehgoruge. Írakaumo. Manikáne ehweh íre susa Sísá Karáhéne ehweh sehgóuge. Nahnso kebá míarautaq sega Sísane ehweh kawerue irera sehgigeheéna Manikáne ehweh íre anteruena peh mi kené sánsánurauge.

<sup>22</sup> Sísane sánsá áhwára áhwáraue sehgóro kébá míarautaq sega órirane iwiáho sansá pehipi íre anterutauge. Segá Sísane ehweh irera kawerue sehgigeheéna sene órira sansa pehipi íre anterutauge. Mah kehiná kékíná suwahpeq míarautaq mi sansá mirauruge. Segá Sísansabé aiq pútare atageheéna mirauruge. Manikáne kaweq ehwéh sehgigeheéna mi sansá mira aruqaruruge.

<sup>23</sup> Mira aruqarurunsabé Sísansabé aiq pútare atáh kéréq ínereqne irupipeq eyoyóire.

### *Kagai apéq náinkeheéq Manikáne sansá tauntahunue sehgioneheqmúne i ehwéhne.*

<sup>24</sup> Ábáhro tanahráq áhnte kegá árésisiue peheráhnataq peh morá kótaiki anínká ápeq meyéhre. Mina inserah Manikánka ápeq náinkeheéq wene sánsá tauntahunue sehgóro.

<sup>25</sup> Kótaikoneheqmúne íwíáho kegá sene sinonka págegeinkeheéra túbáh aginie íwíáh suera peh ahriahri tauntahunue arambehri aruqarurowe. Peh kambaréki apéq meyaneheéra tauntahunowana Manikánka náina apéqmé peh ahriahri kagainawire.

<sup>26</sup> Ínédé Manikáne sansá íre múgu wahguue sehgiúge. Árésisi kiotaiki anínká íre mibeq tagia móbeq tagéna pehbeheráh pokinserah tauntahunue sehgiúge. Tobehi anínká wene ayahnkara íre mobeq subisa peh tábúsoqme wehukéniné anonka subínsarah Sísane arambehri tábúsoqme arambehriuge.

<sup>27</sup> Ínéga mó keyábé, Sísane sánsá tauntahunue sehgióro uraunsabé Manikánka íné nuwehnehboq íre túbáh aginie. Peh kaweq sansá tábúsoqme sehginiééna néne ninonka kawerue wahnah wahnahnuge. Néne ninonka págegeinieéna tauntahunue arambehriuge. Ínéga kagai apéq meanieéna tauntahunue arambehriuge.

## 10

### *Íre kaweq sunúq sínaraq ite Sísane sánsá súého i ehwéhne.*

<sup>1</sup> Naho itene igaqnaréhga Mósisi kérówe. Segá miraunsabé iahreraq kankeheéra teiúge. Segá abatapi nogútaq írabúyá akariuriowe. Segá írabúyá anehe karageheéra Manikánka mi írabúyá omaq atowe. Manikánka íwíáh aritowara segá Káhtore Waní kéráwégue seberaebéq pokuwe. *(Kisim Bek 13.21-22, 14.21-29)*

<sup>2</sup> Segá írabúyá akariuriotaq nogútaqkakáq Káhtore Waní kéráwégue seberaebéq poku- taqkákáq segá wání meyónserahnéra mitaq nogera Mósisi kérera wenkahnáh úkuwe.

<sup>3</sup> Manikáne Awanka íopeqté tópáh náriuwara ómiga nowe.

<sup>4</sup> Wega ótaq sansánútaq wání arahno ebahpipéqté súwana náriuwara nowe. Mi ebáhmé Sísá Karáhée. Segá pokutaq mi Ebáhnká sereq moráráq pokúwe.

<sup>5</sup> Pokúwara Maníká sene sánsánsábé íre awahbó púara abatapi nogútaq puku pukuéra sene sinonka abatapinue mibeq móbeq kowe.

<sup>6</sup> Segá ahbabárurserah itega miraiyeho éna Manikáne ehwehnka tei teinire. Segá ahbabáq naneqsabé sirutaboiru serahniyeho.

<sup>7</sup> Táhmaro mi kegá péhepehe maníkánsábé íwíáh íwíáh atónserahniyeho. Segá miraunsabé Manikáne ehwehnka mahraréna,

Ísara kegá tútuue méra táhutahuréra irigéra ábáhréra nahnsó kené sansanéra mó kené weh ahre abariuwe ire. *(Kisim Bek 32.6)*

<sup>8</sup> Segá mó tanáhráq ahbabárera áhnte kegá mó kené ahre ahrari abariunsabe Manikánka abiahnsa aritená kamah ariuwara peh íregáritaq wehuké 23 táhúséni (23,000) wehuké peh morá wéhékáh pukuwe. Segá mirau serahniyeho. *(Namba 25.1-9)*

<sup>9</sup> Mó tanáhráq táhmaro Ísara kegá sene wahnahnsabé, Árahono éra wensabé éhruruunsabe Manikánka wehe omaq atowana éhruruu ke pówara pukuwe. Segá éhruruu serahniyeho. *(Namba 21.4-8)*

<sup>10</sup> Mó tanáhráq táhmaroga Manikánsabe abiahnsa atera ehmuniq éhmúníruwana Manikánka íopeqté ánínsábé, Márunkubiq suo atowana mi ke márunkubiq suowe. Segá ahbabáru serahniyeho. *(Kisim Bek 16.2)*

<sup>11</sup> Manikáne ehwehnka sene ahbabáq teíre. Segá ahbabárurserah itega moq miraiyeho éna teíre. Amahnága anehe tanahráq sinainsabé itega kaweqtaq mía míageheéra teíre.

<sup>12</sup> Íné kaweqtaq ména págegeue iriwe míoge íwíáhóna aníno, inahsubínehboq áwéh panantagínah págegeue iriwe míahno.

<sup>13</sup> Áhwáré naneqka íre arebataq areba sire. Írakaumo. Mah kehiná kékéhápá sire. Áhwáré naneqka ite íre saiqnariankeheéra Manikánka wene omasa éhwéh ahreraq matawéna ite séhréh aitankéhe. Wega séhréh aitená kaweq ah sokogi ainkéhe. Wega ite págegeue míageheéra séhréh aitowana áhwáré naneqka ite íre saiqnarianawire. Ahbabáqka moq ite íre saiqnarianawire.

*Owainawansabé titirue nárié náneqme pehragahro i ehwéhne.*

<sup>14</sup> Néne iyahnabo anímáríno, péhepehe maníkánsábé iwíáh iwíáh ate sansa pehragahro.

<sup>15</sup> Itewe ahtebia ké míáhnsábé teiú éhwéhnsábé iwíáhue tagahro.

<sup>16</sup> Sísa itene ahbabáqsabe pukúnsabe iahreraq kék tánáhráq itega káhpuipté wánínsábé meyone. Mewe nahnayabé itene Wahnahnsabé kaweróne ateq Sísa Karáhéne korahq tunsabe itene ahbabáq kaweraitéhre iwíáhúne. Mi tanáhráq itega tópah\* keqme nahnayabé Sísane anonka kamahúnsabe itene ahbabáq kaweraitéhre iwíáhúne.

<sup>17</sup> Mira iwíáhíg morá ké tahnsa míone. Itega keqme nóna topáhmé peh morá tópah púaq ite áhnte wehuké méq morá ké tahnsa míone.

<sup>18</sup> Asiu kené sánsánsábé iwíáhoro. Segá tahberapeqté titirue nárié náneq nahtaq Manikáne tahbe puara mi tanáhráq segá wensabé aiq pútaq iwíáh iwíáh atáhwe.

<sup>19</sup> Teiú éhwéhnsábé aneq iwíáhonehnkono ewo? Péhepehe maníkámári íre oga míáh náneqmaríne. Mi naneqmarí titirue nárié náneq íre Maniká náwé náneq tahnsáne.

<sup>20</sup> Írakaumo. Nahnsó kegá titirue nárié náneq Maniká íre náwasa peh owainawamarí náriéwe. Owainawansabé iwíáh iwíáh atéhboq sensabé titirue nárié náneq pehragahro.

<sup>21</sup> Itene Wahnah pukú tanahráq iahreraq kék káhpúipéqté wánínkákáq owainawansabé iwíáh iwíáh atáh káhpúipéqté wánínkákáq moráráq neho. Itene Wahnah pukú tanahráq iahreraq kék tópáhnkákáq owainawansabé iwíáh iwíáh atáh tópáhnkákáq moráráq neho.

<sup>22</sup> Mirairataq Sísa itene Wahnahnka, Aneqsabé íné nuweq owainawansabé iwíáh iwíáh ataho éna abiahnsa aitanawire. We anotah pagégé ání púaq itega we íre kiotaikorahúna mino.

*Ahriahri itega Maniká áwíq pankeraneheqmúne i ehwéhne.*

<sup>23</sup> Mó kegá, Ite moke miraona naneq aiq kawerire ewe. Peh moke miraona naneqka ite kaweqtaq méyabe íre séhréh aitahráhire. Moke miraona naneqka ite Sísa kawerue kereyabe íre págege aitahráhire.

<sup>24</sup> Ite iuwahbeh sansá pehipi miraiyeho. Peh itene iyahnabo séhréh aritahráhi sansáñoro.

<sup>25</sup> Mákétipéqté táchutahúq paiqmaréhrataq mah tahutahúq aneq sansánia táchutahúqpo ue íre kasenoro.<sup>†</sup>

<sup>26</sup> Minayabe Manikáne ehwehnka mahraréna,  
Moke mah marákó mårákóákáq mahtaq kék náneqkakáq itene Wahnahne náneq mire ire.

(*Lo 10.14; Buk Song 24.1*)

<sup>27</sup> Sísa íre tagariéh áninká itensabé, Táhutahuronehboq máhoro ínaraqmé ite iuwahbáhnaraq kowe nahro. Wensabé, Mah tahutahúq eheqtepo ue íre kasenoro. Wega náwí náneq pehipi nahro.

<sup>28</sup> Mó áninká itensabé, Mah awáq owainawansabé titirúna naneq náwúge ínaraq íre nahro. Mi awáqkáwé ite íre ahbabáq aitahráhire. Peh ite teí ání ahbabáq atéhboq íre nahro.

<sup>29</sup> Itega ahbabáq iwiáhowe íre iraruge. Írakaumo. Peh teí áninká, Itega aiq ahbabárowe iwiáhineho.

Mina tahnsa iwiáhi aní íre míahnaraq íné nuwahbeh naneq nahrahuge. Peh móbeq míéh áníné avehrii sansánká íné íre saiqnariahrai mino.

<sup>30</sup> Manikánsabe, Kaweróne atena mi tahutahúq nahnsa tagehra kegá árahue ehweh aintagéhbo?

<sup>31</sup> Itega tópahnkakáq wánínkakaq nehrataq mó naneq arámbéhrí mirairataq Maniká áwíq pankeraneheéq wensabé iwiáhue kawerue miraoro.

\* **10:16:** Kárikí ehwéhmé tópahme íre kékre. Páréti kékre. † **10:25:** Mó tanáhráq mó tanáhrárue mó kegá ménkámehnkáne awaq titirue péhepehe maníká náwúwe. Náwera anehe máhkétipéq mi awáq kobaiqmarówe. Mi awáqsábé Poraga Sísa tagariáh kékabé, íre kasenéq pehipi paiqme nahro úwe.

<sup>32</sup> Itega miraonka Asiu kereq nahnsó kereq Sísa tagaríáh kéreq ahbabáq arítéhboq iwiáhue peh kaweq sansánoro.

<sup>33</sup> Ómi mó kegá moke ínéga mirau sansá kaweq sansáne íwíáhigeheéna mirauge. Íné nuwahbeh sansámé íre mira aruqaruruge. Íné tagah ke séhréh aritanieéna sensabé iwiáhéná peh kaweq sansá mirauge. Sega Sísane ehweh irera kawerue sehgigeheéna sensabé iwiáhéná mirauge.

## 11

<sup>1</sup> Ínéga Sísa Karáhéne sansá sehgiúnsarah ite moq néne sansá sehgióro.

### *Poraga ayahq nonsabe irarú ehwehne.*

<sup>2</sup> Itega íné iahreraq matawéq moke íwáhnorurau ehwéh kawerue sehgió púana itensabé iwiáh iwiáh aitóge.

<sup>3</sup> Mó ehwéh kawerue ahtebagehboq írátíáhro. Wehga wene ahre wahnahnirana Sísa Karáhéga moke weh wahnahnirana Maniká Iteriboga Sísa Karáhé wahnahnire.\*

<sup>4</sup> Sísa Karáhé wene Wahnah puana wehga púrerínaraq wene ayahqno íre akari atiankehe. Manikáne Awanka iwiáh atahna ehweh irarínaraq wene ayahqno íre akari atiankehe. Mi tanáhráq wene ayahqno akariaráhnaraq Sísa Karáhé ayehitawinawire.

<sup>5</sup> Wenawehq wene wahnah puana ahrega púrerínaraq wene ayahqno akari atiankehe. Manikáne Awanka mi ahré iwiáh atahna ehweh irarínaraq wene ayahqno akari atiankehe. Mi tanáhráq wene ayahqno íre akariaráhnaraq wega wenawehq ayehitawinawire. Mi tanáhráq wene ayahqno íre akariaráh áhréwé ayahra káuqsúéh áhré tahnsane.

<sup>6</sup> Wene ayahqno íre akariaráhnaraq wene ayahra káuqsuankéhe. Ayahra moke káuqsue sansa ayehtihé sansáne íwíáhirataq ayahra pehragéq ayahqno akariaráhro.

<sup>7</sup> Manikánka weh mirarotaq wewe tahnsá mirarowara wehga Manikáne anotah awíqkákáq Manikáne págege sansánkákáq sokigiowe. Minayabe wehga púrerínaraq wene ayahqno íre akariinkehe. Manikánka ahre mirarotaq wenawehqne áwíqkakaq wene págege sansánkákáq sokiginieéna akariinkehe.

<sup>8</sup> Manikánka wehuke mirarotaq wega ahrene ayahnsatate weh miraroo? Írakaumo. Wega wehne ahwígara píruqme ahre mirarowe.

<sup>9</sup> Manikánka ahreyabé iwiáhéná wehga séhréh atankeheéna miraroo? Írakaumo. Wega wehyábé iwiáhéná ahrega wenawehq séhréh atankeheéna mirarowe.

<sup>10</sup> Ahreronká sensuwehqsone ehweh kawerue sehgiónsábé íópeqté kégá tagagehboq mi inínsónká púrerirataq sene siyahqno akari atiagehe.

<sup>11</sup> Manikáne animárimé weh sebataq ahre sebatarue mía míao sansámé Maniká íre awahbeh sansáne. Írakaumo. Ahrega wenawehq séhréh atahnana wehga moq wene ahre séhréh ato aitéhre.

<sup>12</sup> Téhwe Manikánka wehne ahwígara mewe ahre mirarowara amahnága ahreronká ani maqmaq maqmarowara áhnte weh míáhwe. Manikánka moke kék náneq áhwárarowe.

<sup>13</sup> Ahrega wene ayahqno íre akaria Manikánsabe pehipi púrerínaraqmé kaweq sansápo? Iteitega mi sansámé iwiáhue tagahro.

<sup>14</sup> Weh íre wahto ayáhrá kahnaraq minaga we ayehtanae. Itene sánsánká minayabe aiq sokigi aí mino.

<sup>15</sup> Ahrene íre wahto ayáhrá kahnaraqmé wene ayahrame wene awahriq nanere. Wene ayahqno akariinkeheéna Manikánka ayahra áwíre.

<sup>16</sup> Ayahqno akariare ehwéhnsábé suwahrieh keyábé mó íre teriníe. Mó sansá írakaunire. Itereq mó Sísa tagaríáh kéreqsabé peh morá mahna teiú sánsá kékhe.

\* <sup>11:3:</sup> Písni ehwéh wahnahninsabéwé “het” kékhe. Písni ehwéh “het” téhtaré áwáhén kékhe. Mó morá áwáhén itene ehwehme ayahqnone. Mó morá áwáhewé itene ehwehme wahnahne.

*Kórína kegá siahreraq ko táchútáhúq notaq íre kaweq sansánu ehwéhne.*

<sup>17</sup> Amahnága mó ehwéh teiníboq írátíahro. Itega momiwíotaq mó ke séhréh arítéh sánsá íre miraia peh ahbabárowe. Minayabe itensabé íre iwíáh iwíáh aitóge. Írakaumo.

<sup>18</sup> Mó anínká tenímé itega Manikánsabe iwíáh iwíáh ataneheeéq momiwíotaq íre morá iwíáhia peh mó iwíáh mó iwíáhqué mó keyábé abiahnsa arítáhwe teníre. Tení éhwéhmé aiq pútaq ehwéhpómo. Peh aiq pútaq ehwéhne iwíáhuge.

<sup>19</sup> Íre morá iwíáhirataq kaweq sansá ábórarinkeheéq só síoéq iwíáhue tagéq, Insegá aiq pútaq sansá sehgoramo éq ahtebahrahowe.

<sup>20</sup> Itega momiwíotaq itene Wahnah pukúnsabe iahreraq kék táchútáhúq íre tábúsoqme nahwe.

<sup>21</sup> Itega mó ke íre síwénunia peh apubúue wewene wewene táchutahuq nahwe. Miraons-abé pehgáriq tahutáhúq kék kégá sirupibiirara mó kegá píah áhnte nahnsabé muguwahgu agowe.

<sup>22</sup> Itene nahtapeq táchutahuréq naraho mino. Manikáne nahmá peh abehq nánere iwíáhoo? Itega mitaq séq tópah tabonah ke íre náriénsabé se siyehiteh mino. Aneq ehwéh teinínkono? Itega miraonsabé kawerowe aitaníkono? Ahqáho. Írakaumo. Itega mirao sansá íre kaweq sansáne.

*Sísaga párétiakák sera anonkakaq we kéró ke náriu ehwéhne.*

(Mátíyu 26.26-29; Mákha 14.22-25; Árúka 22.14-20)

<sup>23</sup> Itene Wahnahnka níwáhnorurai ehwéh iwáhnoréna teiátáuge. Mahraue teiátáume Súrasaga Sísane naruuo koweriro inókáhpéq itene Wahnahnka páréti mewena<sup>†</sup>

<sup>24</sup> Manikánsabe kaweróne atena keqme mahraréna, Mahnawé ninonka mire. Ite kaweraitanieéna ninonka Maníka awena pukinie. Íné iahreraq matiagehboq amahnága mirau sansánoro úwe.

<sup>25</sup> Úwara sega páréti nowana Sísaga káhpu mewena monseráh sánsánéna mahraréna, Mah nahniáq sérá anome néne korahq mire. Néne korahq tuinaga o sansa áhwárankehe. Itega nehrataq ahriahri íné iahreraq matiáhro úwe.

<sup>26</sup> Itega mah ehwéh sehgóinká Sísa itene Wahnahnka itene ahbabáqsabe pukumé pahsúéhre. Itega mi parétiakák sera anonkakaq nahnka we pukumé pahsúéhre. Wega tuina tanáhráq mah sansá parabaginæ.

*Itene irupipeqté iwíáh ebeq iwíáhue tagéq anehe nanehe i ehwéhne.*

<sup>27</sup> Sísa itene Wahnah pukúnsabe iahreraq kék táchútáhúq neh anínká íre iwíáhue tagéna pehipi náhnaraqmé íre kawerinae. Mina tahnsa neh anínká itene Wahnahne anonkankakák korahqkakáqsabé íre kaweratéh púana wega aiq mirainsabé anotahtaq kamah awinkéhe.

<sup>28</sup> Náhna anínká wene arupipeqté iwíáh ebeq iwíáhue tagéna anehe párétiakák sera anonkakaq nankehe.

<sup>29</sup> Náhna anínká itene Wahnahne anonkansabé kawerue íre iwíáhéna pehipi náhnaraq wega mirainsabé kamah awinkéhe.

<sup>30</sup> Ite áhnte kegá mina tahnsa narutonsabé amahnága mareqmarerue awahreowe. Mó táchmaroga itene Wahnahne anonkansabé kawerue íre iwíáhia pehipi narutonsabé aiq pukurowe.

<sup>31</sup> Minayabe itega miraira sansá ebeq kawerue iwíáhue tagéq anehe nahnaraq Manikánka ite íre kamah ainkéhe.

<sup>32</sup> Manikánka mah marákóipéqté sansá sehgió kék ehweh aritená íre kaweqtapéq suankéhe. Itene Wahnahnka itene sansá tagéna íre ábéreh sansáne iwíáhéna kamah ainkéhe. Mókake íre kaweqtapéq eqmaq iuwéhnehoéna itega ahbabáro tanáhráq kamah ainainire.

<sup>†</sup> 11:23: Párétiwe Asiu kené tópahne.

<sup>33</sup> Néne iyahnabo anímáriño, momiwíue méq Sísa pukúnsabe iahreraq kék tákutahúq nehrataq mó naneheraira keyábé iwíáhue síwénunue moráráq nahro.

<sup>34</sup> Manikánka kamah awinehboq arupibii anínká ebeq wene nahtapeq tákutahuraruena anehe momiwíorabeq pokinkehe.

Íné mó ehweh kékre. Iteba konaraq mó áhwára áhwárao sansá kaweraitaníe.

## 12

### *Poraga Manikáne Awanka náina naneqsabé teí éhwéhne.*

<sup>1</sup> Néne iyahnabo anímáriño, Manikáne Awanka náina naneqsabé múgu wahguéq áhwára áhwára iyehboq íwáhnorinie.

<sup>2</sup> Ite tagariáhmé itega Sísane sánsá íre tagariarotaq péhepehe maníká íre ehwehnorahi naneqsabé iwíáhue mi sansá sehgirowe.

<sup>3</sup> Teiníboq kawerue írátiáhro. Manikáne Awanka iwíáh atéh áninká Sísansabé íre éhruru atahrahire. Manikáne Awanseq íre mía míai anínká, Sísa néne Wahnah mire. We awahbeh sansá sehginíe irarerahiro? Írakaumo. Wega íre irarerahire.

<sup>4</sup> Manikáne Awame we peh morá ánínéna wega í náneqme mó naneq mó naneq náíre.

<sup>5</sup> Maniká itene Wahnah peh morá ánínéna wene arambehriwe wega sainsuéh árámbéhri mó naneq mó naneq arámbéhri sainsuéhraq miraúne.

<sup>6</sup> Manikáne arambehri miraúnayabé mó aní mó arámbéhri mó aní mó arámbéhriue miraúne. Maniká peh morá ánínéna wene arambehri kawerue miraigeheéna séhréh aitéhre.

<sup>7</sup> Itega mó Sísa tagariáh kék séhréh aritageheéna Manikáne Awanka págege naneq ite mó aní mó anínue náíre.

<sup>8</sup> Wega mó aní iwíáh atéhrana peh Manikáne iwíáh púana ahtebia iwíáh pahsuahráhire. Wega mó aní mó iwíáh atéhrana wene auranka íre tageh naneq wene arupipeq tagari-ahrahéna pahsuahráhire.

<sup>9</sup> Wega mó aní iwíáh atéhrana mi anínká Manikánsabe anotahtaq aiq pútare atéhre. Wega mó aní págegeue séhréh atéhrana awahre keyábé púreq arítéhrara kaweragowe.

<sup>10</sup> Wega mó aní págege atéhrana ótaq sansá miraorahire. Wega mó aní iwíáh atéhrana mi anínká íre wewene iwíáh peh Manikáne Awanka iwíáh atéh éhwéh irarerahire. Wega mó aní iwíáh atéhrana mi anínká owainawane awankakaq wehukene awankakaq saraqsuahráhire. Mó aní iwíáh atéhrana we kambare éhwéh irarerahire. Irarirana Manikáne Awanka mó aní iwíáh atéhrana mi kambáré éhwéh ahtebéna wewene ehwehtaq pahsuahráhire.

<sup>11</sup> Manikáne Awa peh morá ánínéna mi pagégé náneqmarí náíre. Wewega iwíáhue mó aní mó naneq awena mó aní mó naneq awena ue náíre.

### *Ite Sísane anonka tahnsá míone i éhwéhne.*

<sup>12</sup> Wehukeníné anonka peh morá ánónkánirana áhnte naneq kékre. Mi naneqmarí kékhrana peh morá ánónká kékre. Mina inserah moke ite Sísa tagariona kewé wene morá ánónká tahnsa míone.

<sup>13</sup> Ambanta wánípipeq kéhtáq wánínta moke ambantaipéq kéknerah Manikáne Awa peh morá ánínéna itene irupipeq séna mía míaire. Wega iteba mía míai puaq ite ómi Sísane morá ánónká tahnsa míone. Ite Asiu kereq nahnsó kereq arambehriraq saiqnariáh kereq arambehriyabé ápeq meyáh kereq morá ánónká tahnsa míone. Ite págege anímári míageheéq wání ahriahri nónanserah Manikáne Awanseq mía míáúne.

<sup>14</sup> Ite tagarionawe wehukeníné anonka íre peh morá náneq kékre. Írakaumo. Wene anonkataq áhnte naneq kék mino.

<sup>15</sup> Aigáránká mahraréna, Íné íre ayahnkara púana íné íre mah anónkáné aigárá mûge itaq tahirímé anonkanka wene aigárá súeh iripo? Írakaumo. Anonkanka wene aigárá íre suahráhire.

<sup>16</sup> Wehukeníné ayahqnotaq kék áhrégá mahraréna, Íné íre aura puana íné íre mah anónkáné ahre úge itaq tahirímé anonkanka wene ahre súéh iripo? Írakaumo. Anonkataq kék ahre íre suahráhire.

<sup>17</sup> Anonka íre mó naneqkakák peh aura kéhtáq tahirímé ehwehme árahue irahráh iripo? Anonka íre mó naneqkakák peh ahre kéhtáq tahirímé árahue táhutahuq kaweq kunkúnire irari iripo?

<sup>18</sup> Anonkame íre peh morá náneq kékire. Írakaumo. Manikánka wehukeníné anonka mirarotaq we awahbónserah moke náneq mirarena kawerarowe.

<sup>19</sup> Wehukeníné anonkataq peh morá náneq kéhtáq tahirímé íre anonkanurá kék irino.

<sup>20</sup> Wehukeníné anonkataq áhnte náneq kékhrana wene anonka peh moráe.

<sup>21</sup> Wehukeníné auranka wene ayahnkaransábé, Are íre míahnaraq tahirímé kaweqtaq míó irino íre irarerahire. Írakaumo. Wehukeníné ayahqnonka wene aigáránsábé, Are íre míahnaraq tahirímé kaweqtaq míó irino irarerahiro?

<sup>22</sup> Írakaumo. Wehukeníné anonkataq mó náneq págege náneq kékhrana mó náneq mareqmareq náneq kékire. Mi maréqmáréq náneq íre kéhtáq tahirímé wene anonka kaweqtaq kék iripo? Írakaumo.

<sup>23</sup> Itene inonka mareqmareq náneqme sehikaranká peraq inehoéq mi maréqmáréq náneq kawerue wahnahnúne. Itene inonka iyehiteh náneq mó kegá taghehoéq kawerue aneranerue akari atione.

<sup>24</sup> Itene inonka iwíáh íwíáhúna náneq mina tahnsanue íre akari atione. Itene inonka mareqmareq naneqkakák iyehiteh naneqkakák kawerue wahnahnigeheéna Maniká wewega iwíáhéra moke itene náneq mirarena kawerarowe.

<sup>25</sup> Kawerarowana íre webataq webatarue kékire. Írakaumo. Mina inserah ite Sísane anonka méq mó iwíáh mó iwíáhiyehboq peh morá íwíáhoro. Ite Sísane anonka míáh púaq peh morá arerensabé iwíáh íwíáhinehboq mó keyábé íwíáhue we séhréh atéhoro.

<sup>26</sup> Wehukeníné anonkataq eheqpopoq érinaraq wene anonka moke érire. Mina inserah ite Sísane anonka míona púaq mó aní éritaq ite moq ómi íerire. Mó kegá ite míonarabeqte áninsábé iwíáh íwíáh atáhwaq itega moq wensabé iwíáh íwíáhúne.

### *Manikánka mó arámbéhrí mó arámbéhríue omaq sitéh éhwéhne.*

<sup>27</sup> Ite Sísa Karáhé tagariáh kék wene morá ánónká méq mó aní mó aníne wene anonkataté náneq míáhwe.

<sup>28</sup> Sísa tagariáh kégá wene sásá kawerue sehgiheheéna Manikánka mó arámbéhrí mó arámbéhríue omaq sitéhre. Téhwe wega eqmaro ke omaq sitéhre. Anehémé Manikáne Awanka sokigi arí éhwéh pahsúáh kék omaq sitéhre. Mó anéhémé síwáhnoro ke omaq sitéhre. Ótaq sansá mirao kewé, awahre ke kawerarítáh kewé, séhréh arítáh kewé, wahnahnarítáh kewé, mó kehináné kambaré ehwéh irare kewé, minawari Manikánka moke omaq sitéhre.

<sup>29</sup> Sísa tagariáh kék eqmaro kene arambehri ómiga íre mirao mino. Manikáne Awanka sokigiarí éhwéh ómiga íre pahsúáh mino. Síwáhnoré arámbéhrí ómiga íre mirao mino. Ótaq sansá miraé arámbéhrí ómiga íre mirao mino.

<sup>30</sup> Awahre ke kawerarite arámbéhrí ómiga íre mirao mino. Kambaré ehwéh iraré arámbéhrí ómiga íre mirao mino. Kambaré ehwéh ahtebéra seyene ehwehtaq pahsue arámbéhrí ómiga íre mirao mino. Írakaumo. Ómi kegá mi arámbéhríári moke íre miraorahowe. Peh Manikánka mó arámbéhrí mó arámbéhríue omaq sitéhnserah miraorahowe.

<sup>31</sup> Manikáne Awanka nái náneq iwíáhue tagéq kiotaiki naneqmarí meyanéhe íwíáhéra minayabe irutaboiroro.

## 13

*Moke mó keyábé irutaboironehe i ehwéhne.*

Kiotaiki sansánsábé teinie.

<sup>1</sup> Íné moke mó kehináné ehwehnkakáq íópeqté kéné ehwehnkakáq irarenaraqmé mó keyábé íre nirutaboirarítáhnaraqmé íné peh abehrání míanie. Táoyankakaq pero-qkakáq subírana ehwehnirara íráh kégá anetaníbo íwíáhonserah ínéga mó keyábé íre nirutaboirarítáhnaraqmé sega néne ehwehnsabé moq anetaníbo íwíáhigehe.

<sup>2</sup> Manikáne Awanka iwíáh aintéh éhwéh irarenaraqmé mó keyábé íre nirutaboirarítáhnaraqmé íné peh abehrání míanie. Ínéga moke epéqté éhwéh ahtebahnaraqmé mó keyábé íre nirutaboirarítáhnaraqmé peh abehrání míanie. Ínéga Manikánsabe anotahtaq aiq pútare atónsábé sáwéhyabe, Móbeq agúno atáhnaraqmé mi sawéh móbeq agínaraq mó keyábé íre nirutaboirarítáhnaraqmé peh abehrání míanie.

<sup>3</sup> Moke néne ménsámehsá tabonah ke náriénaraq sensabé íre nirutaboirarítáhnaraqmé tabonah ke náriénaga íre séhréh aintankéhe. Sísane sánsá sehgiúnsábé mó kegá íné táhtoqme ninonka iraipéq nuehrana tabikonaraq sensabé íre nirutaboirarítáhnaraqmé ínéga miraonaga íre séhréh aintankéhe.

<sup>4</sup> Mó keyábé arutaboirarítéh áninká íre áyátia peh uwaresa ánine. Wega mó ke kaweraritena se matíah náneqsabé aigará íre pabekire. Írakaumo. Wega, Íné anotah aní mûge íre iwíáhire. Wega wenáwíq íre pankeréhre.

<sup>5</sup> Arutaboirarítéh áninká íre ahbabáq saiyo aníne. Wega peh morá wewensabé íre iwíáh iwíáhire. Wega íre apubúue abiahmáréh ánine. Mó kegá we ahbabáratáhnsábé íre iwíáhi aníne.

<sup>6</sup> Arutaboirarítéh áninká ahbabáqsabe íre iwíáh iwíáhia peh aiq pútaq sansá kaweq sansánsábé iwíáh iwíáhire.

<sup>7</sup> Arutaboirarítéh áninká íre kaweq sunúqkákáq kawerue arambehrire. Wega Manikáne ehwehnsabé ahriahri aiq pútare atéh ánine. Manikáne omasa éhwéhnsábé mirainawire iwíáhéna kawerue áwénunire. Wene arupipeq umehi tanáhráqkákáq íre túbahagia Manikáne sansá peh tábúsoqme ambubu atawéna sehgóre.

<sup>8</sup> Itega mó keyábé irutaboirarite sansamé íre parabagorahire. Írakaumo. Manikáne Awanka iwíáh aitéh éhwéh irare sansá parabaginawire. Manikáne Awanka iwíáh aitéhraq kambare éhwéh irare sansá parabaginawire. Kawerue ahtebé sansá parabaginawire. Peh morá mó keyábé irutaboirarite sansamé íre parabaginawire.

<sup>9</sup> Amahnága ite peh ákáhtaq ahtebóne. Manikáne Awanka iwíáh aitéh éhwéh peh ákáhtaq ireq irarerahúne.

<sup>10</sup> Aiq pútaq naneq sínaraq moke amahnága ahtebóna naneqmarí parabaginawire.

<sup>11</sup> Íné káriq aní míarautaq káriq anímárínká ehwehnéra iwíáhéra mira onserah sansánurauge. Anotah aní úkurautaq káriq aníné sánsá sutauge.

<sup>12</sup> Wehukenínká sunkíkíri nahupéqté timanopipéq tagéna awankuraq íre kawerue tagehnserah amahnága itega Manikáne naneqmarí peh ákáhtaq tagahrahúne. Wehukenínká mó aníné auranabiah tagehnserah mókake itega Manikáne naneqmarí kawerue taganeheqmúne. Manikánsabe amahnága ite moke tagariéhnserah mi tanáhráq itega we moq taganeheqmúne.

<sup>13</sup> Manikáne ehwehnsabé aiq pútare atewé, Manikánsabe ite kaweraite tanahráqsábé áwénunéwé, mó keyábé arutaboiraritewé, mi sansátáró peh kagainae. Mó keyábé arutaboirarite sansanká mó sansátáré kiotaikire.

## 14

*Manikáne Awanka iwíáh atéhrana pahsúéh éhwéhne.*

<sup>1</sup> Mó keyábé irutaboirarite sansansábé ahriahri anotahtaq irutaboiroro. Manikáne Awanka náina naneqsabé anotahtaq iuwahbehre íwíáhoro. Wega iwíáh aitéhraq Manikáne ehweh irareraho sansánsábé anotahtaq irutaboiroro.

<sup>2</sup> Manikáne Awanka iwíáh atéhrana kambare ehwéh irari anínká íre mó keyábé peh Manikánsabe irarire. Mó kegá mi kambáré éhwéh íre íráhwana peh Manikánsabe irarire. Manikáne Awanka iwíáh atéhrana kambare ehwéh irari anínká peh epéqté éhwéh Manikánsabe irarire.

<sup>3</sup> Manikáne Awanka iwíáh atéhrana Manikáne ehweh pahsúéh áninká wehukeyabé irarire. Wehuke séhréhue págege aritanieéna irarire. Íráh kégá peh kaweq sansá sehgiheéna irarire. Sirupipeq eyoyó aritanieéna irarire.

<sup>4</sup> Manikáne Awanka iwíáh atéhrana kambare ehwéh irari anímé mi ehwéh irarinka peh morá wewene arupipeq kawerire. Manikáne Awanka iwíáh atéhrana Manikáne ehweh pahsúéhnká moke mibeqté Sísá tagariáh ké séhréh arítéhre.

<sup>5</sup> Manikáne Awanka iwíáh aitéhraq kambare ehwéh irarúnaraq kaweq sansánirana moke itega mirairansabé nuwahbehre. Manikáne Awanka iwíáh aitéhraq wene ehweh pahsúáhnaraq irare sansá anotah kawéq sánsá púana itega moke mirairansabé anotah-taq nuwahbehre. Wehukéninká kambare ehwéh irarínaraq mó anínká Sísá tagariáh ké séhréh aitanieéna mi kambáré éhwéh áwahewé itene ehwehtaq pahsuankéhe. Itene ehwehtaq pahsuahna aní íre míahnaraq Manikáne ehweh irarinka kambare ehwéh kiotaikire.

### *Kambare ehwéh irari anínsábé éhwéhne.*

<sup>6</sup> Ínéga iteba senaraq Manikáne Awanka íné iwíáh aintahnana kambare ehwéh irarenaraq árahue séhréh aitaníkono? Peh kambare ehwéh irarenaga ite íre séhréh aitahráhuge. Ínéga séhréh aító iwíáh matíahnaraqmé Manikáne Awanka sokigi aní náneq teiníe. Manikáne Awanka iwíáh aintéhrana wewene ahtebia iwíáh pahsuqme teiníe. Manikáne Awanka iwíáh aintéh éhwéh pahsuaníe.

<sup>7</sup> Táoyankakaq kítahakáq íre oga míeh náneqtaré wíre. Wehukega mi naneqtaré múguwahgue subirana íre kaweq ehwéhnína íréhra kegá aneq igoñkópomo íwíáhigehe.

<sup>8</sup> Sontía anínká pembíáh íre kawerue póbiahnaraqmé áwáhu sontía kégá ebehirarabeq-sabé árahue apubúue sokah sokahigehbo?

<sup>9</sup> Mina inserah itega kambare ehwéh irarirataq mó kegá árahue iragéhbo? Kambare ehwéh púara mó kegá íre íráhwana mi ehwéhmé peh abehraginae.

<sup>10</sup> Mah marákó mårákóípéq áhnte ehwéh kékre. Moke mi ehwéhmárimé mó kegá mó kegáue íráh éhwéhne.

<sup>11</sup> Mó anínká íné íre írátíó éhwéh irarínana, Eheqte kambáré éhwéhpomo íwíáhugana wega moq ínénabe, Kambare ehwéh iraréna aní móne aintéhre.

<sup>12</sup> Mina inserah itega kambare ehwéh irarirataq mó kegá íre iragéhe. Manikáne Awanka náina naneqsabé irutaboirowe. Minayabe ite Sísá tagariáh kégá wene sánsá moraráq kawerue sehgiheéq Manikáne Awanka náina naneq mewe we séhréh atéhoro.

### *Poraga kambare ehwéh irare sansá teriu ehwehne.*

<sup>13</sup> Minayabe Manikáne Awanka iwíáh atéhrana kambare ehwéh irari anínká mi ehwéh ahtebé pahsuankéhboq púrerúno atóge.

<sup>14</sup> Kawerue iwíáhoro. Kambare ehwéhtáté púrerutaq peh morá néniwanka púrerirana nirupipeqté íwíáhwé peh túbah agire.

<sup>15</sup> Minayabe anerininkono? Néniwanka púrerirana néne nirupipeqté íwíáhgá moq púrerinie. Néniwanka igoñkónirana néne nirupipeqté íwíáhgá moq igoñkóninie.

**16** Arega mina tahnsa íre mirainaraqmé peh arenawanka Manikánsabe, Kaweróne atéhrana mó anínká mi kambáré éhwéh íre íréh púana Manikánsabe árahue moraráq kaweróne irarinkehbo? Írakaumo. Wega, Kaweróne íre irarinkehe.

**17** Mi kambáré éhwélmé íre íréhre. Minayabe arega kawerue púrerónaga we íre séhréh atéhre.

**18** Ínéga kambare ehwéh irare irareunsabé Manikánsabe iwíáh iwíáhuge. Ínéga kambare ehwéh irarunka itene kambare ehwéh irare sansá kiotaikire.

**19** Sísa tagariáh ké momiwíotaq ínéga wehuke síwáhnorinieéna pehgáriq irahráho ehwéh irarenaraq kawerire. Pehgáriq irahráho ehwéhnká áhnte kambáré éhwéh kiotaikire. Minayabe iwáhnorutaq kambare ehwéh íre iraruge.

**20** Néne iyahnabo anímáríno, káriq anímárinká iwíáho serahniyehboq peh ahtebia áboáwáh wéhgá iwíáho serahnoro. Inahunahnínká ahbabáqsabe íre iwíáhi serahnoro.

**21** Manikáne ehwehnka mahraréna,  
Wáhnaupéqté kambare ehwéhnkákáq ké iwíáh arítóvara sega mahtaqté ké néne ehweh terigéhe. Terírataq néne ehwehnsabé, Ahqáho. Iuwahriehre igehe. Maniká itene Wahnahnká aiq mahrarire ire. *(Aisaia 28.11-12)*

**22** Minayabe Manikáne Awanka iwíáh aritéhrara kambare ehwéh irare sansámé Manikánka mi sansá inseréhyabe iwíáhéra omaq sitehro? Wensabé aiq pútare atáh kéká wensabé iwíáhígehééna mi sansá omaq sitéhre. Manikáne Awanka iwíáh aritéhrara wene ehweh pahsúáh sánsá wensabé íre aiq pútare atáh kéká iwíáhéra mi sansá omaq sitehro? Írakaumo. Peh wensabé íre aiq pútare atáh kéká iwíáhéra mi sansá omaq sitehro? Írakaumo. Peh morá wensabé aiq pútare atáh ké séhréh aritagehééna mi sansá omaq sitéhre.

**23** Ite Sísa tagariáh kéká momiwíirataq ite ómi kambare ehwéh irariyeho. Irarirataq mó ke Sísa íre tagariáh kéká séra mi kambáré éhwéh íréhrataq itensabé, Uwoyansa ke móe aitagéhe.

**24** Manikáne Awanka iwíáh aitahnaraq ite ómiga Manikáne ehweh pahsuqme irarenaraq Manikánsabe íre aiq pútare atéh ánípópoq mó anípópoq sínaraq itene ehwehnka wene arupipeq pankehe. Pahnaraq, Íné ahbabáq ani múde iwíáhéra

**25** wene arupipeqté iwíáh pahsúéhnsábé Manikánsabe áhtenéna káuqmunue iwíáh iwíáh atena, Manikánka iteba aiq pútaq míéhre inkehe.

### *Ite momiwíó arámbéhrí tábúsoqme miraoro i ehwéhne.*

**26** Néne iyahnabo anímáríno, itega momiwíirataq aneq sansánonehnkono ewo? Teiníboq írátiáhro. Itega Manikánsabe iwíáh iwíáh ataneheeéq momiwíirataq Sísa tagariáh ké we séhréh atéhoro. Mó anínká itensabé, Mah igónkónonehe irarinkehe. Mó anínká iwáhnorinkehe. Mó anínká íre wega iwíáhi naneq peh Manikánka sokigi awí náneq teinkéhe. Manikáne Awanka iwíáh atéhrana mó anínká kambare ehwéh irarinkehe. Manikáne Awanka iwíáh atéhrana mó anínká kambare ehwéh áwahe itene ehwehtaq pahsuankéhe. Momiwíirataq peh morá we séhréh atéhoro aitóge.

**27** Kambare ehwéh irarirataq íre áhnte kegá irarigehe. Peh téhranítégábópoq apahránítogábópoq irarigehe. Moráráq irariyeho. Írakaumo. Peh mótaq mótarue irarero. Peh morá anínká kambare ehwéh irarínaraq anehe ahtebéh anínká mi ehwéh áwahe itene ehwehtaq pahsuankéhe.

**28** Kambare ehwéh áwahe pahsuahráhi anínká íre míahnaraq kambare ehwéh ábóraq irariyehboq peh itene irupipeq iwíáhue Maniká teawéro.

**29** Manikáne Awanka iwíáh aitahnaq pahsúéhrataqmé peh téhranítégábópoq apahránítogábópoq pahsuagéhe. Pahsúéhrataq sene ehweh íráh kéká sirupipeq kawerue iwíáhue tagagehe.

<sup>30</sup> Manikáne Awanka tútuue míéh ání iwíáh atahna wega iriginkehe. Mi iwíáh atahna ewhéh pahsuankéhboq mó ewhéh irari anínká ehiya míankehe.

<sup>31</sup> Manikáne Awanka iwíáh aitahna ewhéh ite ómiga mótaq mótarue irarigehe. Ite ómiga ahtebéq itene irupipeq eyoyónkehboq mótaq mótarue irarigehe.

<sup>32</sup> Manikáne Awanka iwiáh aritahna kegá mi ewhéh pehipi íre irarigehe. Peh sene iraré tanahráqsábé áwénunigehe.

<sup>33</sup> Manikánka moke wene arambehri tábúsoqme arambehriire. Wega íre áhwára áhwára sansánire. Minayabe itega momiwírataq ite moráénue we awahbeh sansánoro.

<sup>34</sup> Mósísiga sehgóro ú ehwehnká mahraréna, Ahreronká weh wahnahniyeho ire. Minayabe Sísa tagariáh kégá momiwírataq ahreronká ehweh irariyehboq peh ehiya méra kawerue iragéhe.

<sup>35</sup> Sísa tagariáh kégá momiwírataq ahre inínká mitaq ehweh irarínaraq íre ábéreh sansáne. Minayabe ahreronká íre kawerue íréhrataq mótaq sene nahtapeq sensuwehq-sonsabé kasenigehe.

<sup>36</sup> Teiú éhwéhnsábé ite íre iuwahbehro? Manikánka wene sánsá ite míonarabeq áhwárehre iwíáhoo? Íre itebataq wene sánsá iahtebóna wino.

<sup>37</sup> Íné Manikáne ehweh iraru aní mûge iwíáho kereq íné Manikánka iwíáh aintéhre iwíáho kerero, néne ehweh íráhro. Ínéga sehiranue teiú éhwéhmé Manikánka sehgóro i ehwéhne. Minayabe aiq pútare aintáhro.

<sup>38</sup> Néne ehwehnsabé ahqáho aintéh ánime we íre Manikáne ehweh irari aní míre atáhro.

<sup>39</sup> Néne iyahnabo anímáríno, Manikáne Awanka iwíáh aitéhraq wene ehweh pahsué sansánsábé irutaboiroro. Manikáne Awanka iwíáh atéhrana kambare ehweh irare sansánsábé íre ahqáho atáhro teríero.

<sup>40</sup> Momiwírataq moke mira sánsánirataq peh kawerue tábúsoqme miraoro.

## 15

### Sísa Karáhé pukúwana iriwe organúq ato ehwéhne.

<sup>1</sup> Néne iyahnabo anímáríno, kaweq ehweh teiátáutaq ireq aiq pútare ainteq kawerue sehgirowe. Mi kawéq éhwéhnsábé iahreraq itóge.

<sup>2</sup> Itega kawerue sehgirosabé Manikánka kaweraitéhre. Sísansabé aiq pútare atera anehe túbáh ago kewé peh abehragowe.

<sup>3</sup> Teniátái ehweh teiátáuge. Mi ehwehnká moke mó ehwéhmári kiotaikire. Teiena mahrarurauge. Manikáne ehwehnka aiq irarinserah Sísa Karáhéga itene ahbabáqsabe kaweraitanieéna pukúwe.

<sup>4</sup> Segá we maisarówana Manikáne ehwehnka aiq irarinserah Manikánka apahtáró wéhékáhtáq iriwe organúq atowana

<sup>5</sup> Sísga ebeq Pítaba kéna anehe we kéró keba kúwara tagowe.

<sup>6</sup> Anehe áhnte ke, wensabé aiq pútare ató kega momiwíuwe. Mi kewé sene náhmbahq 500 kiotaikire. Momiwíuwana Sísga seba kúwara tagowe. Áhnte tago ke oga míáhwara mó tahmáró pukurowe.

<sup>7</sup> Anehe wega Sémísiba kéna anehe moke eqmaro keba kúwe.

<sup>8</sup> Moke eqmaro keba kúwana anehe íné íre kaweq aní míaraugana wega ínéba surairana tagarauge. Anowagá wene ani íre ábéreh tanáhráq maqmaréhnserah aní míóge.

<sup>9</sup> Sísa tagariáh ké síwoqnaraunsabé niyehitehre. Miraurau puara mó kegá ínésabe, Manikánka eqmaréh ání míre íre irarerahowe. Moke mó eqmaro kega íné kiotaikowe.

<sup>10</sup> Manikánka ínésabe arutaboiraintaráinsabé amahnága wene kaweq arámbéhriú aní míóge. Wega séhréh aintaráitaq íné íre túbáh agurauge. Mó eqmaro kega kawerue arambehriuwana néne arambehriga moke sene arambehri kiotaikuraire. Ínériahríáh íre arambehriuge. Peh Manikánka séhréh aintéhniká kawerue arambehriuge.

<sup>11</sup> Sereq ínéreqne arambbehriyabé íre iwíáh íwíáhuge. Itega kaweq ehwéh teiátáúnaraq aiq pútare aitárónsabé iwíáh íwíáhuge.

*Ite moke pukonana Manikánka anehe tanahráq ite organúq itahna ehwéhne.*

<sup>12</sup> Sísa pukúwana Manikánka we iriwe organúq atonsabe tei teinuge. Minayabe táhmaro itega, Manikánka pusa ké íre iriwe organúq sitankéhe éhwéhmé aneqsabé irareo?

<sup>13</sup> Manikánka pusa ké íre iriwe organúq sítéhtáq tahirímé wega Sísa Karáhé moq íre iriwe organúq ato irino.

<sup>14</sup> Sísa Karáhé íre iriwe organúq atotaq tahirímé itega tei teinúna ehwéh abehq éhwéh úki irino. Sísansabé aiq pútare atona sansá moq abehq sánsá úki irino.

<sup>15</sup> Manikánka Sísa Karáhé iriwe organúq ato ehweh tei teinu puana Manikánka pusa ké íre iriwe organúq sítéhtáq tahirímé wene ehweh múguwahguéq péhepehenúna irino.

<sup>16</sup> Manikánka pusa ké íre iriwe organúq sítéhtáq tahirímé wega Sísa Karáhé moq íre iriwe organúq ato irino.

<sup>17</sup> Íre iriwe organúq atotaq tahirímé aiq pútare atárónka abehragirana itene ahbabáq peh kék irino.

<sup>18</sup> Íre iriwe organúq atotaq tahirímé wensabé aiq pútare atera pukuro ke iraipéq pokuro irino.

<sup>19</sup> Itega Sísansabé aiq pútare ateq wensabé áwénunúne. Ite peh marakóipeq míona tanáhráq Sísaga ite kaweraitéhre éq áwénunúnaraq tahirímé ite irupipeq umehi ke míona irino. Mó ke siru umehi ke míáhwe. Ite peh anotahtaq iru umehi ke míona irino.

<sup>20</sup> Manikánka Sísa Karáhé iriwe organúq ato ehwehmé aiq pútaq ehwéhne. Manikánka Sísa Karáhé ebeq iriwe organúq atena mó ke anehe iriwe organúq itankéhe.

<sup>21</sup> Wehukenínká puké sansa áhwárówana mó wehukénínká iriwe organúqite sansa áhwárōwe.

<sup>22</sup> Éhrámaga téh ahbabáréna pukúnsabe moke anehete ke moq pukorahowe. Manikánka Sísa Karáhé téh iriwe organúq atonserah we tagariona ke moq moke iriwe organúq itankéhe.

<sup>23</sup> Ite organúq itahna tanáhráq iriwe organúq itankéhe. Sísa Karáhé téh iriwe organúq atena wega tuina tanáhráq wensabé aiq pútare atona ke iriwe organúq itankéhe.

<sup>24</sup> Iriwe organúq itahnana moke náneqmarí parabaginae. Sísa Karáhéga moke íópeqté wáhnáh kéreq mah marákóípéqté wáhnáh kéreq págege kereq saiqnariankehe. Saiqnarawéna Wenabonsabé, Moke minawari arene ayahpi máróge irarinkehe.

<sup>25</sup> Sísa Karáhéga kawerue wahnahnéna wene naruo moke karegaráhruankéhe.

<sup>26</sup> Wega wene naruo moke saiqnaruena anehe puké sansa moq parabaruankéhe.

<sup>27</sup> Manikáne ehwehnka mahraréna,

Manikánka wensabé, Moke wahnahnúno atéhre ire.

*(Buk Song 8.6)*

Manikánka moke wahnahnúno atéh éhwéhmé wensabé, Ínénkakaq wahnah ainto íre irarire. Wega Karáhénse, Peh moke mó naneqmarínkákáq wahnahnúno atankéhe.

<sup>28</sup> Karáhéga moke wahnahnínagake wega Maniká Wenabonsabé, Ínénkakaq wahnahnainto atankéhe. Mi tanáhráq Manikánka Sísareq moke itereq wahnahnaitankéhe.

<sup>29</sup> Mó kegá pusa ké séhréh aritaneheeéra wání meyháwe. Segá mi sansá aneqsabé miraoo? Segá, Manikánka pusa ké iriwe organúq sitankéhe íwíáhowe. Mira íwíáh íre ome aneqsabé wání meyaho?

<sup>30</sup> Manikánka pusa ké íre iriwe organúq ítéhtáq tahirímé mó kegá nubiq suahráhorabeq arambbehriu iripo? Írakaumo.

<sup>31</sup> Néne iyahnabo anímáríno, ahriahri nirupipeq iwíáhéná, Ibora nubiq suaneherabowamo éna iwíáh aruqaruruge. Itega Sísa Karáhé itene Wahnahne ehweh sehgíonsabé iwíáh íwíáhéná mah ehwéh teiúge.

<sup>32</sup> Épésa suwahpeqte kégá áwéhq poeráhq tahnsa méra Sísane arambehri mitaq miraurautaq níwíoqnarowe. Manikánka pusa ké íre iriwe organúq sítéhtáq tahirímé mirau arámbéhríyábé ápeq meyo iripo? Írakaumo. Mó kegá mahraréra, Mókake pukona tanáhráqsábé íre iwiáh iwiáhia peh táhutahuréq ábáhroneheqmúne ewe. Manikánka pusa ké íre iriwe organúq sítéhtáq tahirímé sene ehweh sehgióro teiú irino.

<sup>33</sup> Mó kené péhe éhwéhnsábé aiq pútare arítého. Ahbabáq kereq mía míairataq sega itene kaweq sansá íre kaweraragéhe.

<sup>34</sup> Itene múguwahgu sansá sueq tábúsoqme iwiáhoro. Ahbabáq sansa íre oro. Táhmaro itewe Maniká íre tagariáhwe. Minayabe iyehitankeheéna teiúge.

### *Iriwe organúq ite inónkámé áwáhnáh inónká úkínae i ehwéhne.*

<sup>35</sup> Mó kegá kasenéra, Pusa ké árahue iriwe organúq sitankéhbo éra aneq tahnsá sínónká úsitankéhbo ewe.

<sup>36</sup> Mina tahnsa káseno kewé peh múguwahgu iwiáho kee. Ayu uqmaráhtáq pehipi íre kíréhre. Ebeqme mi ayú mugurúqme anehe kiapoue kíréhre.

<sup>37</sup> Ite ayu úótáq ánáhakaq íre uqmaráhwe. Peh sera uqmaráhwana kiapoue kíréhre.

<sup>38</sup> Manikánka mó ayúnsábé mó naneq kiro atena mó ayúnsábé mó naneq kiro atéhrana moke kíréh náneq íre monseráh náneq kíréhre.

<sup>39</sup> Moke oga míah náneq kamári íre monseráh sínónká kíréhre. Írakaumo. Wehukeníné anonka mó tahnsánirana ménkámehnkáne sinonka mó tahnsánirana kabarane anonka mó tahnsánirana pahné anonka mó tahnsáne.

<sup>40</sup> Íopeqté náneq mó tahnsánirana mah marákó márakóípéqté náneq mó tahnsáne. Íopeqté náneq mó awáhríq náneq kíréhre mah marákó márakóípéqté náneq mó awáhríq náneq kíréhre.

<sup>41</sup> Pópoqnahga patahirana iónka iónitehrana wehyoqmarínká moq pehgáriq téhrehre. Minawariná íre monseráh téhrehre. Mó wehyóqká ákáhtaq téhrehrana mó wehyóqká pehgáriq téhrehre.

<sup>42</sup> Mina inserah pusa ké iriwe organúq sitahnaraq mó tahnsá sínónká organúq sitankéhe. Pusa ké maisaráhtáq kárékorahi sinónká maisaráhwana iriwe organúq sitahnaraq peh kagaorahi sinónká kanae.

<sup>43</sup> Pusa ké maisaráhtáq íre kaweq mareqmareq sinónká maisaráhwana iriwe organúq sitahnaraq kaweq págege sinónká úqkinae.

<sup>44</sup> Pusa ké maisaráhtáq awaqkakaq sinónká maisaráhwana iriwe organúq sitahnaraq íre awaqkakaq sinónká peh wenawa tahnsá sínónká kanae. Amahnága awaqkakaq sinónká kíréh púana mókake peh wenawa tahnsá sínónká kanae.

<sup>45</sup> Minayabe Manikáne ehwehnka mahraréra,

Teh miraro wehukení Éhráma oga mío aní úkúwe ire.

Mó Ehrámawé anehenura súwe. Wenawanka organúq itahráhire.\*

<sup>46</sup> Organúq itahráhi wehukenínká ebeq íre súwe. Írakaumo. Peh tanahuqtate miraro wehukenínká ebeq súwana organúq itahráhi wehukenínká anehe súwe.

<sup>47</sup> Manikánka mah marákóípéqté tánáhúq mewe ebeq Éhráma mirarowana anehe sú animé íopeqté tuwe.

<sup>48</sup> Mah marákóípéqté kewé Éhráma tahnsá míáhwara íopeqsabé suwahbeh kewé íopeqté tu ani tahnsa míáhwe.

<sup>49</sup> Amahnága ite tanahuqtate miraro ani tahnsa méq mókake ite íopeqté tu ani tahnsa míanehe.

\* **15:45:** Mó Ehrámawé anehenura sú animé Sísá Karáhé wíre. Aroma 5.14-19 tagahno.

**50** Néne iyahnabo anímáríno, teiníboq írátíáhro. Mah marákóípéqté ínónkánká Manikánka wahnah wahnahnirabeq íre kioráhire. Itene kambarékorahi inónkánká kaweq naneq kagairabeq íre kioráhire.

**51** Epéqté éhwéh teiníboq írátíáhro. Ite Sísa tagariona ke pukonaq mó táhmaro íre pukigehe. Itene inonkanka moke apubúue kagaorahi inónká úkinae.

**52** Anehete pembíáhnká ehwehnína tanáhráq wehukenínká auwíkéh inserah puko kegá irigéra mó íre pukigehe. Ite íre pukira kegá apubúue irigéq kagaorahi inónká meyaneheqmúne.

**53** Itene kárékorahi inónkámé peh kagaorahi inónká úkinae. Itene pukorahúna inónkámé peh oga mía míaé inónká úkinae.

**54** Itene kárékorahi inónkámé peh kagaorahi inónká úkinae. Itene pukorahúna inónkámé peh oga mía míaé inónká úkinae. Mi tanáhráq Manikáne ehwehme aiq pútaraginawire. Mi ehwéhnká mahraréna,  
Manikánka págegeue mirainka kiotaikéna puké sansa parabarúéhre ire. *(Aisaia 25.8)*  
Mahnawé peh aiq pútaq ehwéhne.

**55** Wene ehwehnka mó mahraréna,

Puké sansanká amahnága ite íre saiqnariéh mino. Puké sansanká ite íre kamah aí mino ire. *(Hosea 13.14)*

**56** Amahnága tanáhráq Mósísiga sehgóro ú ehweh íre sehgoráhúnayabé ahbabárúne. Itega ahbabárúnayabé puké sansanká ite kamah aíre.

**57** Itene Wahnah Sísa Karáhéga miraúnka págege aitéhraq itega ebehúna naneq kiotaikorahúne. Minayabe Manikánsabe iwiáh iwiáh atone.

**58** Néne iyahnabo anímáríno, kiotaikorahúnayabé Sísane sánsá íre túbah agia peh ambubu atawéq sehgóro. Itega miraonayabé itene Wahnahnka aiq ahreraq matiéh púaq itene kaweq arámbéhrí íre abehq úkorahire. Minayabe itene Wahnahne arambehri tauntahunue miraoro.

## 16

### *Poraga, Náríra moné sorupahro ú ehwehne.*

**1** Sarúsarama suwahpeqte Sísa tagariáh ké nárigheéna teiníe. Kárétia marákórápéqté ké Sísa tagariáh ké ínéga teríatáu serahnoro.

**2** Itene arambehriyabé meyáh mónewé itega ómi mó anínká mó anínkáue iwiáhue tagahro. Náríra moné tabanagínehboq o wikí ebeqte wéhékáhtáq ebeqte wéhékáhtárue móbeq soruparáhro. Itega mirairataq ínéga iteba konaraq mi moné awehraq kanae. Awehraq kahnaraq ínéga iteba konaraq itega sorupare arámbéhrí íre kanae.

**3** Iteba konaraq itega táhmaro ke omaq sitáhro. Segá Sarúsarama suwahpeq pokue mitaqté ké sorupato moné nárigheéq omaq sitáhro. Iteba konaraq Sarúsarama suwahpeqte ké páhsí sehiranue omaq sitéhra ke siníe. Néne páhsíakáq itene móneakáq Sarúsarama suwahpeqte ké nárigheéna eqmaq suaníe.

**4** Ínéga moq pokinie iwiáhonaraq itega omaq sitéhra kegá ínéreq pokonehe.

### *Poraga Kórína suwahpeqte ké koragéyabe awahbó ehwehne.*

**5** Ínéga Másérónia marákórápéqté ké kérágéna iteba kinie iwiáhuge.

**6** Iteba konaraq ópeq tanáhráq mitaq míanabugamo. Iteba ména iuwena pokonaraq séhréh aintagéhe.

**7** Amahnága iteba wahto tanahráq méyabe íre nuwahbehre. Mókake itene Wahnahnka kowe aintahnaraqmé ákáhtaq íre wahto tanáhráq iteba míanie iwiáhuge.

**8** Amahnága ínéga mahtaq Épésá suwahpeq ména mah ke séhréh aritaníe. Itene iahreraq kék tanáhráq Péntíkosi parabagínaraq mahtaq suena iteba kinie.

<sup>9</sup> Manikánka séhréh aintéhrana mahtaq áhnte arámbéhríorahunsabé amahnága mahtaq ména Sísane arambehri mirainie. Mahtaq néne naruo moq áhnte míáhwe.

*Poraga, Tímótireq mó kereq séhréh arítáhro ú ehwehne.*

<sup>10</sup> Ínega itene Wahnahne arambehri miraunserah Tímótiga moq miraire. Minayabe wega iteba sínaraq pehwehrue ateq séhréh atáhro.

<sup>11</sup> Wensabé awiréh ateq inehapeq súého. Sísa tagaríah kégá ínéba sirataq íné iwíáhume Tímótiga moq kouwekinkehe. Minayabe kouwekina íaraq pehwehrue ateq kawerue séhréh atehrana ínéba sinkehe.

<sup>12</sup> Ínega itene iyahnabo aní Ápóronsabé, Pokúno éna iteba koneherao ke Sísa tagaríah kéreq are moq moráráq pokúno éna pagu pagunurauge. Pagu pagunuraugana wega amahnága pokéyabe íre awahbehrana mókake wega iwiáhína tanáhráq iteba sinkehe.

*Sísane sásá ambubu atawéq sehgióro i ehwéhne.*

<sup>13</sup> Aiq pútare atáh sásá ambubu atawéq sehgióro. Íre áhreia peh págegeue míáhro. Kawerurero.

<sup>14</sup> Moke arambehri mirairataq Manikánseq moke mó kereqsabé irutaboirue arambehrioro.

<sup>15</sup> Néne iyahnabo anímáríno, ite tagaríahmé Ákáía marákórápéq Sítépána karíronáninká Sísansabé téh aiq pútare atárówe. Aiq pútare atera Sísa tagaríah ké áhntetaq séhréh arítáhwe.

<sup>16</sup> Mina tahnsa kene ehweh kawerue íráhro. Moke séhréh arítáh kéné ehweh kawerue íráhro.

<sup>17</sup> Sítépánareq Pótúnátureq Ákáíkásareqka ínéba suronsabé nirupipeq eyoyóire. Itega ínéba íre serahonsabé sega íné séhréh aintáhwe.

<sup>18</sup> Mi kegá itene irupipeq eyoyó aitónserah nirupipeq moq eyoyó aintáhwe. Mina tahnsano keyábé iwiáh iwiáhoro.

*Poraga, Iroro ú ehwehne.*

<sup>19</sup> Esia marákórápéqté Sísa tagaríah kégá itensabé, Iroro ewe. Mi akéq Ákúírareq Párísírareq sene nahtapeq momiwío kereqka itene Wahnah áwírue itensabé, Iroro ewe.

<sup>20</sup> Moke mahtaqté Sísa tagaríah kégá itensabé, Iroro ewe. Itega we kawerue mehweh atéhoro.

<sup>21</sup> Íné Poraga mah anéhété séhírá ínénéne niyahnkaratáté sehiranuge.

<sup>22</sup> Itene Wahnahnsabé suwahrieh kewé íre kaweragoneherawoe. Itene Wahnahno, iteba mahbeq tuo.

<sup>23</sup> Itene Wahnah Sísaga itensabé arutaboiraitena séhréh aitéhre.

<sup>24</sup> Ite Sísa Karáhé tagaríahnsabé itensabé ahriahri nirutaboiruge.

## 2 Kórína Ebeq sáhnsahwe ahtebé ehwehne.

Poraga Kórína suwahpeqte ké wega ebeq sehiranú pahsí náriuwara tagowe. Anehe mó tanáhráq Táításaga Kórína suwahpeq suena Poraba séna Kórína ke éhweh teawuwe. Teawuwana mi tanáhráq Poraga mah pahsí 2 Kórína pahsí sehiranúwe. Wene ehweh sehgiro keyábé Poraga kawerowe aritena wene ehweh íre sehgiro keyábé, Manikánka aiq pútaq íné eqmaq núwátái puaq néne ehweh íráhro teriuwe. Sísa tagariáh ké tabonah ke nárie sansá sokigi arinieéna anehe sehiranúwe.

### *Kórína suwahpeqte ké anehe siu pahsíe.*

<sup>1</sup> Íné Porane páhsí sáhnsahwe tagahro. Maniká awahbehrana omaq intena Sísa Karáhé ehweh síwáhnorinkeheéna eqmaq nuwowe. Ite Kórína suwahpeqte kéréq moke Ákáia marákórápéqté Sísa tagariáh kéreqsabé mah pahsí sehiranuge. Iteruhrah aní Tímótiga ínereq ména itensabé, Nirutaboiruge ire.

<sup>2</sup> Maniká Iteriboreq itene Wahnah Sísa Karáhéraqka ite séhréh aitera iru ukiq itagéhe.

### *Manikánka Porareh wahnahnue séhréh arito ehwéhne.*

<sup>3</sup> Maniká Iteribo áwíq pankerone. We itene Wahnah Sísa Karáhéne abowá ména itensabé arutaboiraitena irupipeq umehi tanáhráq eyoyó aitéhre.

<sup>4</sup> Moke íre kaweq sunúq irupipeq umehi tanáhráq kaweraitena eyoyó aitéhre. Maniká Iteriboga kaweraitena eyoyó aitéhnsabé mó kené sirupipeq umehi tanáhráq itega moq mi ke séhréh ariteq eyoyó aritahráhúne.

<sup>5</sup> Mó kegá Sísa Karáhé áwíoqnonserah ite moq íwíoqnahwana Sísa Karáhéga itene iru anotahtaq ukiq itéhre.

<sup>6</sup> Sísane ehweh teiúnsabé mó kegá níwíoqnahwe. Mi ehwéh teiúnká séhréh aintéhraq aiq pútare aítahnká kaweraitéhre. Manikánka íné séhréh aintéhtáq ite moq séhréh aitéhre. Mó kegá íné níwíoqnahnserah ite moq íwíoqnagehe. Mi tanáhráq ite págegeue míageheéna Manikánka séhréh aitankéhe.

<sup>7</sup> Segá níwíoqnahnserah ite moq íwíoqnahwe. Itega aiq tagarionawe Manikánka ite séhréh aitéh púaq wene sánsá kawerue sehgiioneheqmóe.

<sup>8</sup> Néne iyahnabo anímáríno, ínereq ínéba míaro kereqka Esia marákórápéq míaraunaraq anotah íre kaweq sunúq káráire. Minayabe iragéhboq teiníe. Íre kaweq sunúqká anotah kamáh aiátáinsabé ite pukorahúne íwíáhuraune.

<sup>9</sup> Mó kegá iubiq iuwanehrawoe íwíáhuraune. Iteriahriáh íre miraorahuraune. Írakaumo. Íre miraorahuraunayabé Manikánka webataq séhréh aitankéhe íwíáhuraune. Manikánka pusa ké iriwe organúq itahráhinsabé ite moq séhréh aitahráhire íwíáhuraune.

<sup>10</sup> Ite pukorahúne íwíáhuraunaraq séhréh aitená kaweraitaráire. Mókakeakáq séhréh aitená kaweraitankéhe. Íre kaweq sunúq sínaraq wega wahnahnue séhréh aitanawire íwíáhúne.

<sup>11</sup> Itensabé púreraitáhro. Itensabé púreraitéhrataq mókakeakáq wega wahnahnue séhréh aitankéhe. Miraínayabé áhnte kegá mina tagéra wensabé kaweróne atera iwiáh íwíáh ataneherawoe.

### *Sísawe kowe aruq ahqáho aruq íre i aníne i ehwéhne.*

<sup>12</sup> Iteba míaraunaraq kaweqtaq méq Manikáne sansá tábúsoqme sehgiráúne. Ahtebia áninká íwáhnorinserah íre miraia peh Manikánka séhréh aitená iwiáh aitáráiraq íwáhnoruraune. Itene irupipeqté íwíáhgá kawerúne íwíáhúnayabé iwiáh íwíáhúne.

<sup>13</sup> Itega sáhnsahwe irahráho ehwéh sehiranue teiúge. Mó naneq tahnsá éhwéh íre sehiranue teiúge.

<sup>14</sup> Itega sehiranú ehweh peh ákáhtaq íráhwe. Íné nuwahbehme ínéga sehiranu ehwéh áwahewé iragéhe. Itene Wahnah Sísaga tuinagake itega ínénabe iwíáh iwíáh aintageheéna sehiranu ehwéh áwahewé írátiáhnsábé nuwahbehre. Íréhrataq wega tuinagake ínéga itensabé iwíáh iwíáh aitónserah itega ínénabe moq iwíáh iwíáh aintagéhe.

<sup>15</sup> Itega néne sánsá ireq iwíáh iwíáhoneheqmóe éna téhwe iteba téhtaréráq ite koragéna séhréh aitanauge iwíáhurauge.

<sup>16</sup> Mira iwíáhuraume Másérónía marákórápéq pokonaraq ite kéraganie iwíáhéra mibeqté kouwekonaraq ite mó séraganie iwíáhurauge. Mi tanáhráq Súria marákórápéq pokinie onaraq itega íné séhréh ainteq eqmaq nuwagéhe iwíáhurauge. Minayabe téhtaréráq ite koraganie iwíáhurauge.

<sup>17</sup> Mira iwíáhuraunsabé, Aneqsabé mó iwíáhé iteba íre surono ewo? Íné mó iwíáh mó iwíáhóna anípo ewo? Ínéga kowe aruq ahqáho aruróna anípo ewo? Írakaumo.

<sup>18</sup> Maniká aiq pútari anínirana ínéga moq kowe aruq ahqáho aruq íre u aní múge.

<sup>19</sup> Tímótireq Sáírareq ínéreqka Manikáne ahninkáwá Sísa Karáhéra éhwéh tei teinuraune. Tei teinurauna anímé kowe aruq ahqáho aruq íre i aníne. Wega peh morá kowe ehwéh irari aníne.

<sup>20</sup> Manikáne omasa éhwéhmé Sísa Karáhégá moke kowe éna sehgóre. Minayabe aiq míre éq Maniká wenawíq pankereq wensabé iwíáh iwíáh atone.

<sup>21</sup> Maniká Iteriboga séhréh aitéhnká itereq ínéreqka Sísa Karáhéra tagéq wene sánsá sehgoineheqmúne.

<sup>22</sup> Maniká Iteriboga ite aiq omaq itena néne arambehri miraoro aitowe. Manikáne Awanka itene irupipeq mía míáéna séhréh aitankeheéna iteba eqmataire. Wega Wenawa ebeq eqmaréh púana anehe áhnte kaweq naneq nái náininkehe.

### *Poraga Kórína suwahpeq íre apubúue pokú ehwehne.*

<sup>23</sup> Ite kamah aiénehoéna Kórína suwahpeq iteba íre surauge. Manikánka tagaríéhtáq aiq pútariahnsanuge.

<sup>24</sup> Itega aiq pútare atah náneq ambubu atíáh púana peh morá néne ehweh sehgóro éna íre pagu pagunuge. Itene irupipeq eyoyóinkeheéna ite séhréh aiteyabe nuwahbehre.

## 2

<sup>1</sup> Itene irupipeq móñkakáq umeh agínehoéna iteba íre koraganie iwíáhurauge.

<sup>2</sup> Ínéga kamah aiénaraq itene iru págegeirataq insega niru ukiq intankéhbo? Iteitega niru ukiq intahráhowe.

<sup>3</sup> Nirupipeq umeh aníyéhoéna iteba íre koragia peh páhsí sehiranue menah eqmatauge. Nirupipeq eyoyóinaraq itene irupipeq moq eyoyó aitahráhoge.

<sup>4</sup> Ebeqte páhsí sehiranurautaq nirupipeq iwíáh kikiréna nirupipeq umeh agurairana ibiséna sehiranurauge. Itene irupipeq umeh aginkeheéna mi pahsí íre sehiranurauge. Írakaumo. Peh itensabé anotahtaq arutaboiraitéhre iwíáhigeheéna sehiranurauge.

### *Ahbabáq aniné ahbabáqsabe mó íre iwíáhoro i ehwéhne.*

<sup>5</sup> Ite míáhrabeqte ahbabárurai anínká íre ínélataq néne nirupipeq umeh aníátáire. Itene irupipeq moq umeh aiátáire.

<sup>6</sup> Itebaté áhnte kegá kamah awatóme aiq avehraq káráire.

<sup>7</sup> Wene ahbabáq sansa aiq sutainsabé amahnága wene ahbabáqsabe íre iwíáhoro. Wene arupipeq mó umeh agínaga Sísane sánsá suehnehboq wene arupipeq eyoyóinkeheéq séhréh atáhro.

<sup>8</sup> Mónkakáq teiúmé mi anínká iwíáhéra, Ínénabe irutaboirowe iwíáhinkeheéq séhréh atáhro.

<sup>9</sup> Itega néne ehweh aiq moke sehgiovámo taganieéna menah mi pahsí sehiranue eqmatauge.

<sup>10</sup> Ahbabáq ani kawerateq wene ahbabáqsabe íre iwíáhirataq íné moq wene ahbabáqsabe íre iwíáhinie. Wehukene ahbabáqsabe íre iwíáhonaraq ite séhréh aitanieéna Sísá Karáhé tagehtaq mirauge.

<sup>11</sup> Owainawamaríné wahnah wenáwíq Séténie. Wene sánsá tagarió púana ite saiqnar-iehnehoéq ahbabáq ani séhréh ateq wene ahbabáqsabe mó íre iwíáhonehe.

### *Poraga Táítása tagéyabe awahbó ehwehne.*

<sup>12</sup> Sísá Karáhé éhwel teri terininieéna Tóásá suwahpeq surautaq itene Wahnahne arambehri mirainkeheéna wega koweaintena séhréh aintaráire.

<sup>13</sup> Néne iyahnabo aní wenáwíq Táítása mitaq íre míaraire. Minayabe niwa íre uk-itáinsabé mibeqté ké iroro aritenamitaq suena Másérónia marákórápéq pokurauge.

### *Manikánka págege aitéhraq págege naneq kiotaikúne i ehwéhne.*

<sup>14</sup> Manikánka ahriahri págegeue séhréh aitéhnká ite págege naneq kiotaikúne. Sóiriqka kaweckunkúni naneq abae arúehnserah Manikánka séhréh aitéhnká Sísá Karáhé éhwel mah kehiná kékhná suwahpeq abae agire. Itega teri terinúnara íráhwana abae agire. Minayabe Manikánsabe iwíáh iwíáh atóge.

<sup>15</sup> Ínéga Sísá Karáhéne arambehri miraunsabé Maniká Iteriboga ínénsabe, Kaweq kunkúni naneq tahnsá aní móne aintéhre. Kawerarítéhra kereq iraipéq pokoneherao kereqka kunkúni naneq monseráhnue aiki aikionserah kawerarítéhra kereq iraipéq pokoneherao kereq siahrega néne ehweh íráhwe.

<sup>16</sup> Iraipéq pokoneherao kegá néne ehweh irera, Pukorahi ehwéhne íwíáhowara kawerarítéhra kegá néne ehweh irera, Oga míahrahi ehwéhne íwíáhowe. Mi arámbéhríyábé iteriahriáh tábúsoqme íre miraorahune.

<sup>17</sup> Peh móne meaneheéra arambehriónserah mó kegá moq móne meaneheéra Manikáne ehweh teri terinowe. Ínéga moq mina tahnsanugo? Írakaumo. Manikánka íné eqmaq núwátái puana íné Sísá Karáhéne arambehriu anínéna tábúsoqme íwíáhena we ehweh tei teinuge.

## 3

### *Poraga, Mó kegá ite tagéra néne arambehri ahtebahrahewe ú ehwehne.*

<sup>1</sup> Néníwíq móñkakáq pankerogo? Arambehri aníné wahnahnka wene arambehriyabé páhsí sehiranue áwíraná mewe nogíre. Itereq ínéreqka mi sansá miraonehnkono? Írakaumo.

<sup>2</sup> Itewe néne arambehri pahsí tahnsa míáhwe. Mó kegá ite tagéra néne arambehri ahboeqme ahtebahrahewe.

<sup>3</sup> Néne arambehri pahsí Sísá Karáhéga itene irupipeq sehiranuraire. Mó kegá mi pahsí anereuwo éra néne sánsá tagéra mi pahsí sáhnsahoráhowe. Sísaga mi pahsí pépahqtaq íre sehiranire. Manikánka oga mía míáena Wenawa iteba eqmatairana wega itene irupipeq páhsí tahnsá sehira aruqarurire.

### *Manikánka áhnte séhréh aintéh éhwéhne.*

<sup>4</sup> Íné iwíáhume Manikánka íné omaq intena séhréh ainta aintainsabé Sísá Karáhéne arambehri miraorahuge.

<sup>5</sup> Ínériahriáh Sísane arambehri íre miraorahuge. Peh morá Manikánka séhréh aintéhnká miraorahuge.

<sup>6</sup> Wega ínénsabe o sansanúno éna séhréh aintéhnká miraorahuge. Naho sánsá sehgóro ú sehirá kékhrana o sansamé Manikáne Awanka séhréh aitéhre. Sehgíóro ú sehiránká mirainka pukorahúna sansánirana Manikáne Awanka mirainka organúq itahráhi sansánire.

### *Sirupipeqté síúrá akariuriéh náneqsabé éhwéhne.*

<sup>7</sup> Iwíáhue tagahro. Miraoro ú ehweh ebah kanéhráq sehiranútaq Manikáne térehre naneq Mósísine auranabiahtapeq ábóraragúwe. Anotahtaq térehnsabé Ísara kegá Mósísine auranabiahtapeq íre ebitiahrahuwe. Mi tehrehnka parabagina útaqkakáq íre ebitiahrahuwe.

<sup>8</sup> Miraoro ú sehiránká pukorahúna sansá áhwárótaq anotah tehrówe. Manikáne Awanka séhréh aitéh sánsá anotah kawéq sánsánéna miraoro ú sehirá sánsá anotahtaq kiotaikire.

<sup>9</sup> Miraoro ú sehirá sánsámé ehweh aitahráhi sansánirana anotahtaq téhrówe. Manikáne Awanka séhréh aitéhmé kaweqlaq míahrahúna sansánéna ehweh aitahráhi sansá kio-taikire.

<sup>10</sup> Aiq kiotaiki puaq naho téhró naneq amahnága íre téhrehre.

<sup>11</sup> Manikáne Awanka séhréh aitéh sánsánká peh kagai puana naho parabagurai sansá aiq kiotaikire.

<sup>12</sup> Manikáne Awanka séhréh aita aitai puaq itega íre áhreéq peh págegeue Sísa éhweh teri terinorahúne.

<sup>13</sup> Mósísiga miraúnserah itega íre miraoneheqmúne. Mósísine auranabiahtapeq téhró naneq parabagina únsabe mó kegá tagohoéna wene auranabiahtapeq ambantataté akariuriowe.

<sup>14</sup> Ísara kegá miraoro ú sehirá sáhnsahera sirupipeqté síúrá akarié naneq konsabe sega íre ahtebahrahuwe. Amahnágaákáq sega íre ahtebahrahewe. Wehukega Sísa Karáhénse aiq pútare atéhranka sene sirupipeqté síúrá akariuriéh naneq meruankéhe.

<sup>15</sup> Iborankákáq sega Mósísiga miraoro ú sehirá sáhnsáhótáq sirupipeqté síúrá akariuriéh naneq kékhsábé sega íre ahtebahrahewe.

<sup>16</sup> Maniká itene Wahnahnsabé áhrabirana sene siura akariuriéh naneq meruankéhe.

<sup>17</sup> Itene Wahnah Manikáne Awa míéhtáq sabirúeh naneqka ite mó íre saiqnariahrahire.

<sup>18</sup> Itene iuranabiah íre akariuriéhre. Térehnka timanotaq sokaeqsúéhrara wehukega tagahnserah Manikánka séhréh aitena kaweraitowara mó kegá ite tagéra Manikáne sansá tagahrahowe. Itene Wahnah Manikáne Awa ména we tahnsá míageheéna séhréh aitena kaweraita aitaire.

## 4

### *Owainawanka wehuke sunkíkírirabeq saiqnariéhre i ehwéhne.*

<sup>1</sup> Manikánka ínésabe arutaboiraintena mah arámbéhrí miraúno aintaráinsabé íre túbáh agia aiq mirainauge íwláhuge.

<sup>2</sup> Kopípéqté niyehiteh sansánkákáq péhepehe sansánkákáq aiq suena íre mó ehwéh peh Manikáne aiq pútare ehwéh íwáhnoruge. Peh moke tábusoqme íwáhnoréna Manikánka tagariéhtáq ómi kegá, Íné kaweq sansá mirauge tagageheéna kaweqtaq ména Manikáne ehwéh teri terinuge.

<sup>3</sup> Mi kawéq éhwéhnsábé, Íre irahráhúne irare kewé peh iraipéq pokoneherao ke wóe.

<sup>4</sup> Owainawame, mah marákóípéqté péhepehe wahnáhnká sunkíkírirabeq se saiqnariéh púara kaweraritahráhi ehwéhnsábé íre aiq pútare atahráhowe. Kaweq ehwéhnská térehnka tahnsanéna sirupipeq téhrágínehoéna owainawanka mi ke sunkíkírirabeq saiqnariéhre. Sísa Karáhewé téreh anínéna Maniká tahnsa mía míaire.

<sup>5</sup> Íratiáhro. Íné éhweh íre teiteinuge. Sísa Karáhé webataq kaweq Wahnáh ání míehrana teiteinuge. Sísame sánsá sehgienna itene arambehriu ání tahnsa móige.

<sup>6</sup> Manikánka téh mahraréna, Sunkíkírirabeq téhráhno úwe. Téhráhno únserah menah itene irupipeq téhraitáráinsabé itega Sísa Karáhé éhweh aiq pútare ateq, Manikánsabe anotah ání móne atone.

*Poraga, Ite eqmaro ke Manikáne arambehri miraéq mi arámbéhríráté pukorahúne ú ehwéhne.*

<sup>7</sup> Itene inokame peh antehya tahnsanirana Manikánka wene kaweq naneq mi antéhyápípéq máröhre. Ite íre págege anímári miónana peh morá Maniká webataq págege aní míéhre. Ite tagah kegá mina iwíahigeheéna Manikánka wene kaweq Awá itene irupipeq eqmaréhre.

<sup>8</sup> Moke mó ke suwahpeq mó ke suwahperue íwíoqnah kegá ahbabáq aitáhwaq anetaníbo íwíah íre úne. Árahiramo íwíah íre iwíahia itene arambehri suanehe íwíah íre úne.

<sup>9</sup> Íwíoqnathaq Manikánka ite íre íuwéhre. Mó kegá iubówaq marakóipeq mårunsurahéq irigue nogune.

<sup>10</sup> Sísaga ite kaweraitanieéna putiowe. Mina únserah itega mó ke séhréh aritaneheéq pukorahúne. Mó ke séhréh aritahnara ite tagah kegá iwíahéra, Mi sansá Sísane oga míéh sánsáne ewe.

<sup>11</sup> Itene oga míona tanáhráq Sísane sánsá sehgiunayabé mó kegá ite iubiq iuwahráhowe. Itega Sísane oga míéh sánsá tagageheéq wene arambehri sehgiune.

<sup>12</sup> Ite Sísa tagarawéq oga míáigeheéq pukorahúne.

<sup>13</sup> Manikáne ehwehnka mahraréna,

Íné aiq pútare ató púana iraruge ire.

(Buk Song 116.10)

Mi ehwéhká irarinserah itega moq aiq pútare atona puaq Sísa éhwel irarúne.

<sup>14</sup> Ite tagarionawe Manikánka itene Wahnah Sísa iriwe organúq ato púana ite moq iriwe organúq itena meiqmena Sísaba moraráq móitankéhe.

<sup>15</sup> Itega Sísansabé aiq pútare atageheéq we éhwel tei teinúnara mó kegá íwíoqnéra ahbabáq aitáhwe. Manikánka séhréh aitahnaga áhnte mó kegá Sísansabé aiq pútare ataneherawoe. Sega miráera Manikánsabe kaweróne éra wensabé iwíah íwíah ataneherawoe.

### *Manikánka náina naneqsabé irutaboirúne i ehwéhne.*

<sup>16</sup> Minayabe Sísane sánsá íre sueq peh sehgiunayabé. Itene inonka ore orení úkonanawe Manikánka séhréh aita aitai puaq itene irupipeq peh o animári tahnsa ahriahri míáúne.

<sup>17</sup> Mó kegá íwíoqnéra ahbabáq aitáhnsábé peh wahto tanahráq kéhrana mókake kagai apéq náinaq kaweq matábúrapéq ahriahri míanehe. Amahnága íre kaweq sunúqmé peh wahto tanahráq kék púana meáhna naneqka mi sunúq anotahtaq kiotaikinae.

<sup>18</sup> Amahnága ábóraq kék náneqmarínsábé íre irutaboiria peh Maniká míéhrabeq kopípéq kagai naneqsabé irutaboirúne. Amahnága ábóraq kék náneq mókake parabaginae. Maniká Iteribo míéhrabeqte náneqme amahnága kopípéq kék náneqme peh ahriahri kagaína puaq minayabe irutaboirúne. Minayabe amahnága íre kaweq sunúq kéhnsábé anetaníbo íwíahéq peh Sísane sánsá kawerue sehgiunayabé íwíahúne.

## 5

### *Kagai inónká awaq meyabe iuwahbeh ehwéhne.*

<sup>1</sup> Mah marákóípéq míona tanáhráq itene inonkame wéhuwehu nah tahnsane. Mi nah sokogínaraq íópeq kíonaraq Manikánka kaweraitéh náh awaq mianéhe. Mi nah wehukega íre pera peh ahriahri kagai inonká awaq mianéhe. Minayabe tagarione.

<sup>2</sup> Íópeqté náhnsábé anotahtaq irutaboirúna puaq iwehinsah aruqarurúne.

<sup>3</sup> Mi nah awaq míáhnaraq kawerue kagai nahnsábé íre tabonahoneheqmúne.

<sup>4</sup> Itega mah wehuwéhú náhtápéq míá míáúnaraq irupipeq umehinka kamah aíraq iwehinsah aruqarurúne. Itene inonka amahnága sueyabe íre iuwahbehre. Írakaumo. O korósí sukionanserah o inonká oga mérapeq awaq meyabe iuwahbehre. Mókake kagaína inónkánká amahnága kék inónká kiotaiki puaq minayabe irutaboirúne.

<sup>5</sup> Oga mérapeq awaq miageheéna Manikánka kaweraitáráire. Manikánka menah Wenawa aiq eqmaq áúwátainsabé mókake wega moke mó kaweq naneqmarí náinkéhe tagarione.

*Manikánka ite sainsuena akehraq apéq náinkéhe i ehwéhne.*

<sup>6</sup> Wega mirainawire íwiahéq íre áhreúne. Itene inonkame iteiyuwane nah tahnsáne. Ite tagarionawe iteiyuwanka inonkapipéq míehraq amahnága íópeqté itene Wahnahne nahtapeq íre míone. Írakaumo.

<sup>7</sup> Itene iuranka íre tagéq peh itene irupipeq aiq pútare ateq mira íwiahúne.

<sup>8</sup> Wega mirainawire íwiahéq íre áhreúne. Itene inonka sueyabe iuwahbehraq itene o nahtápéq itene Wahnah míéhrabeq méyabe iuwahbehre.

<sup>9</sup> Mah marákóípéq míona tanáhrákkákáq itene Wahnahba míahnarabeqkakáq we awahbeh iwíáh sehgieyabe iuwahbehre.

<sup>10</sup> Mókake ite ómi Sísá Karáhéga ehweh aitahnarabeq iriwe míahnana itega marákóipeq miraúna arámbéhrí iwíáhue tagankehe. Wega itene ahbabákkakaq itene kaweq arámbéhríakkákáq iwíáhue tagéna sainsuena akehraq apéq náinkéhe. Minayabe we awahbeh iwíáh sehgiioneheqmúne íwiahúne.

*Wensabé aiq pútare atáhro éna pagu pagunú ehwéhne.*

<sup>11</sup> Itene anotah Wahnáhsábé áhtenu puana mó keyábé, Wensabé aiq pútare atáhro éna pagu pagunuge. Manikánka néne nirupipeq tagariéhre. Ínénsabe, Aiq tábúsoqme iwíáhi aníne aintáhnsábé nuwahbehre.

<sup>12</sup> Ínéga ite íre ehnenuge. Itega ínénsabe, Tábúsoqme iwíáhi aní míehre aintageheéna mah ehwéh teiugo? Írakaumo. Peh itega néne sansansábé iwíáh íwíáhigeheéna teiúge. Íre mó kené sirupipeqté íwíáhyábé peh seyene ábóraq kék náneqsabé sirutaboiro keyábé ehweh ayahqme terigeheéna teiúge.

<sup>13</sup> Mó kegá íné uwoyansa aníne aitáhwana ínéga, Anetaníbo. Peh Manikáne arambehri mirainauge íwíáhuge. Íné peh tábúsoqme iwíáhu anínéna ite séhréh aita aitauge.

<sup>14</sup> Sísá Karáhéga itensabé anotahtaq arutaboiraitéhká ite Wahnah aitéhraq wene sánsá sehgiune. Ite tagarionawe peh morá áninká mah kehiná kékhnánsábé pukú púaq ite moke pusa kék tahnsa míone.

<sup>15</sup> Sísaga ómi itensabé putionsabe itene oga mé tanahráq peh iteite iuwahbeh iwíáh sehgiionehnkono? Írakaumo. We moke itensabé pukú púaq amahnága peh we awahbeh iwíáh sehgiioneheqmúne. We putiowana iriwe organúq atowe.

*Manikánka insahwé aitená insahwé arite arámbéhrí íátái ehwéhne.*

<sup>16</sup> Menah wehukega íwíáhuronserah itega mó kené sánsá iwíáhue agehgamatáúne. Sísá Karáhéne sansá moq menah mira íwíáhue agehgamatáúne. Amahnága itega agehgamaré sansa aiq suatauna puaq mókake mó íre miraoneheqmúne.

<sup>17</sup> Írátíáhro. Sísá Karáhé aiq pútaq tagariéh ánime o ani úkire. Wene naho sánsá aiq parabagurairana wega peh o sansanire.

<sup>18</sup> Minawé Manikánka aiq moke mirauraire. Itega wene naruo míaraunara Sísá Karáhéga miraurainka Manikánka insahwé aitená mó ke insahwé arite arámbéhrí íátáire.

<sup>19</sup> Itega mahraréq, Sísá Karáhéga miraurainka Manikánka mah kehiná kékhná insahwé aitahráhire. Wega ite insahwé aitéh kéné ahbabáq íre ahreraq matawéna mó ke insahwé arite ehwéh koreríero aitáráire teiune.

<sup>20</sup> Itewe Sísá Karáhéne ehweh mibeq mahbeq aritona anímári méq itensabé, Manikánka ite insahwé aitankeheéq Sísá Karáhénabe aiq pútare atáhro tei teinúne. Manikánka teríero aitáráinsabé itensabé, Sísansabé aiq pútare atáhro pagu pagunue tei teinúne.

<sup>21</sup> Sísá íre ahbabáq ani míotaq itene ahbabáqsabe pukinkeheéna Manikánka itene ahbabáqmári awuwe. Minayabe itega Sísareq mía míaonaraq Maniká Iteriboga kaweqtaq mía míainserahnue mía míorahúne.

## 6

*Túbáh agiyehboq Manikáne ehweh kawerue íráhro i ehwéhne.*

<sup>1</sup> Manikánka séhréh aintéhrana wene arambehri miraéna itensabé, Manikánka itensabé arutaboiraitena séhréh aitéh púaq wene ehweh sehgleyabe túbáh agiyehboq peh kawerue íráhro tei teinuge.

<sup>2</sup> Minayabe Manikánka mahraréna,

Ínéga omaq atáráu tanáhráq arene ehweh írátáuge. Kaweratáráu tanáhráq séhréh atáráuge ire. *(Aisaia 49.8)*

Teiníboq írátíahro. Amahnága awehraq tanáhrárirana iboramé Manikánka kaweraite tanáhráre.

*Poraga Sísane arambehri miraúnsabe íre mareqmareq áhne i ehwéhne.*

<sup>3</sup> Mó kegá néne arambehri tagéra, Aneqpopoq íre kawerire iyehoéna moke áhwára áhwára sansá suena peh kaweç sansánuge.

<sup>4</sup> Mó kegá ínénabe, Manikáne kaweç arámbéhríona aní móne igeheéna wene arambehri moke miraéna peh kaweç sansánuge. Néne nirupipeq moke umehi naneq si tanáhráqmé íné íre kaweraintahráhi tanáhráqmé Manikáne arambehri suaníe íwíáh íre urauge. Peh kawerue sehgiúge.

<sup>5</sup> Kawerue sehgiúnsabé mó kegá nubiç marera karábúsiipéq móintera momiwíorabeq ehweh aintárówana ínéga anotah arámbéhríona íre kawerue sugéna táchutahuq írakaunurainsabé nirupibiuraire.

<sup>6</sup> Manikáne arambehri kawerue sehginieéna íné peh kaweqtaq ména tábúsoqme íwíáhéna pehwehrue ména mó keyábé kaweç sansá aritena mó keyábé aiq pútaq nirutaboiruge. Manikáne Awanka séhréh aintéhnká mina tahnsanuge.

<sup>7</sup> Aiq pútaq ehwéh tei teinugana Manikánka págege aintéh púana kaweç arámbéhríuge. Itene igaqnaréhga sene iqstate ebehusnerah owainawansabé ahqáho atena kasuq kasuruge. Kaweçtaq mía míaéna kaqsuq kaqsuruge.

<sup>8</sup> Mó kegá ínénabe íwíáh íntáhwara mó kegá níéhruru aintáhwe. Mó kegá ínénabe, Kaweç sansánóne aintáhwara mó kegá ínénabe, Abehq sánsánóne aintáhwe. Mó kegá ínénabe, Péhenóna aní móne aintáhwana ínéga peh ahriahri Manikáne ehweh sehgiúge.

<sup>9</sup> Mah marákóípéqté sánsá mirao kegá íné íre tagariáhwara peh áhnte Sísa tagariáh kégá íné tagariáhwae. Nubiç nuwahráho sansá sehgiéna íre pukia peh oga míóge. Kamah aniera íre nubiç núáhwe.

<sup>10</sup> Niru umehi tanáhráqkákáq Manikánsabe íwíáh íwíáhugae. Íné tabonah aní ména áhnte ke kagai naneqmarí nári nárinuge. Mó kegá ínénabe, Íre matiahna aní móne aintáhwana íné moke kaweç naneq matíóge.

<sup>11</sup> Kórína suwahpeqte kéo, ínéga pahsuqme teiena itensabé anotahtaq nirutaboiruge.

<sup>12</sup> Itensabé nirutaboirume íre túbáh agia peh iteitega ínénabe íre irutaboiraintáhwe.

<sup>13</sup> Sibowaréhga sene animári síwáhnorunserah ite íwáhnoréna itensabé nirutaboiraitónserah itega moq ínénabe irutaboiraintáhro.

*Itene inonkame Manikáne nahne i ehwéhne.*

<sup>14</sup> Sísansabé awahrieh anínseq íre wahto tanáhráq moráráq arambehrinie íwíáhiyeho. Kaweçtaq míéh ánínseq ahababáq anínseq moráráq íre mía míaorahóya mino. Térehnkakákáq sunkíkírinkakákáq moráráq íre kagaorahi mino.

<sup>15</sup> Sísa Karáhéréq owainawanseqka íre morá íwíáhóya mino. Sísa tagariéh ánínseq Sísansabé awahrieh anínseqka íre morá íwíáhóya mino.

<sup>16</sup> Manikánsabe íwíáh íwíáh atáh náhnkákáq péhepehe maníkánsabé íwíáh íwíáh atáh náhnkákáq íre monseráh náh kék mino. Maniká oga mía míairana itene inonka wene nah mire. Minayabe wene ehwehnka aiq mahraréna,

Ínéga seba kéna sereq mía míainie. Ínéreq sereq ahtapeq moraráq nogonéhe. Íné sene Maniká míanauge. Se néne animárí míagehe ire. (Lo 7.2-3)

<sup>17</sup> Itene Wahnahnka mó mahraréna,

Itega íre íráh ké míáhrabeq sueq móbeq míáhro. Moke abbabáq naneq súéhrataq iteba míanie ire. (Aisaia 52.11)

<sup>18</sup> Itene Wahnahnka mó mahraréna,

Iteribo míanie. Itewe nénahni nániyahu míagehe ire.

(2 Samuel 7.14)

Itene págege Wahnáhnká aiq mahrarire.

## 7

<sup>1</sup> Manikáne omasa éhwéh aiq írátiona puaq itene inonkankakáq iteiyuwankakáq abbabáq aitéh náneq moke suaneheqmúne. Néne iyahnabo anímáríno, Manikánsabe áhtenéq kaweqtaq mía míaoneheqmúne.

*Mi kegá Porane ehweh kawerue sehgiúnsabe wega iwíáh íwíáhú ehwehne.*

<sup>2</sup> Ínénabe irutaboiraintáhro. Ínewé íre abbabáq aitáráuge. Abehq sánsá íre aitáráuge. Mó naneq meyanieéna péhe éhwéh íre teiátáuge.

<sup>3</sup> Peh ehweh aitanieéna íre teiúge. Métáqkakaq amahnágaákáq itensabé nirutaboiruge teiúge. Ite oga míéhrataqkakáq pukirataqkakáq iteba morábí méyabe nuwahbehre.

<sup>4</sup> Itega Sísane sánsá kawerue sehgihehe íwíáhéq itensabé iwíáh íwíáhugé. Nirupipeq umehi tanáhráqkakáq itensabé iwíáhugana nirupipeq eyoyóirana iwíáh íwíáhugé.

<sup>5</sup> Ínéga Másérónía marákórápéq surautaq néne nirupipeq umehi naneq áhnte káráirana íre ahrenarauge. Írakaumo. Mó kegá ehweh aintera pagu pagunurowana nirupipeq umehurairana áhreurauge.

<sup>6</sup> Itene irupipeq umehína tanáhráq Manikánka itene irupipeq eyoyó aitahráhire. Wega Táítása ínéba eqmatairana surainka niru eyoyó aintaráirana Manikánka niru ukiq intaráire.

<sup>7</sup> Íre peh morá we surainka wega teniátái ehwéhnká moq néne niru eyoyó aintaráire. Táítása iteba míaraitaq itega wene aru eyoyó atárówana wega minayabe teniátáirana nirupipeq eyoyó aguraire. Itega íné tagéyabe iuwahbarainsabé teniátáire. Ínénabe irutaboirurome teniátáire. Itereq ínéreq morá íwíáhonehe irarewe teniátáire. Moke mi ehwéh teniátáinka nirupipeq anotah eyoyóire.

<sup>8</sup> Ínéga téh sehiranue eqmatau pahsígá wahto tanahráq iru umeh aitáráire. Iru umeh aitáráinka mi tanáhráq íné moq niru umeh aguraire. Mi pahsí sehiranuraunsabé menah íre kaweruge íwíáhéna amahnága peh kawerurauge íwíáhugé. Iru umeh aitáráinka abbabáq sansa sueq sehiranuraus pahsíípéqté éhwéh sehgírowe.

<sup>9</sup> Amahnága nirupipeq eyoyóire. Itene iru págege aitáráinsabé nirupipeq eyoyóiro? Írakaumo. Itene abbabáq sansa sueq kaweq sansá sehgironsabé nirupipeq eyoyóire. Itene iru umeh aitáráinsabé Manikánka, Kamahoro aitáráire. Minayabe abbabáq íre aitáráuge. Írakaumo.

<sup>10</sup> Manikánka abbabáq ke kamah arinayabe sirupipeq umeh agire. Segá sene abbabáq suageheéna wega kamah aríre. Sene abbabáq súáhwana wega kawerarítéhre. Kawerarítérara mi kegá Irupipeq umeh kewéhmé amahnága aiq kaweragire ewe. Wega sene abbabáq suehrana kaweraritanieéna kamah aríre. Kawerarítéhrara mi kegá, Irupipeq umeh aguraime aiq kaweruraire ewe. Mah marákóípéqté náneqsabé wehukene sirupipeq umeh agínara pukorahowe.

<sup>11</sup> Manikánka kamah aiená itene irupipeq umeh aitáráire. Miraurainka ite séhréh aitáráire. Minayabe iwiáhue tagahro. Séhréh aitáráinsabé itene ehweh tábúsoqme kawerareq abbabáq aninsabé ehweh atárówe. Séhréh aitáráinsabé Manikánsabe áhtenéq

Ínén'sabe irutaboiréq ahbabáq ani kamah awátówe. Sehíranurau ahbabáq kaweratotaq itega íre ahbabária peh kawerue miraurowe.

<sup>12</sup> Téh sehíranurau pahsíwé peh morá ahbabáq aninsábé iwíáhue sehíranuraugo? Írakaumo. Íre wereq wega ahbabáratárái anínseqsabé sehíranurauge. Itega néne ehweh sehgirosabé Manikánka itensabé, Kawerowe aitáráire. Itega ínén'sabe aiq pútaq irutaboirúne iwíáhigeheéna mi pahsí sehíranue eqmatauge.

<sup>13</sup> Mira iwíáhuraunaq itega mirauronka nirupipeq pehwehrue aintaráire. Minayabe níru pehwehrue eyoyóire. Itega Táításá séhréh ateq wene aru eyoyó atárónsabé íné moq níru eyoyóire.

<sup>14</sup> Ínéga Táításá iteba eqmaq auwaníe urautaq wensabé, Mi kegá néne ehweh aiq sehgioreherawoe iwíáhugte teawátáuge. Itega aiq kawerue sehgiro puana mi ehwéhnsabé íre niyehitaraire. Írakaumo. Moke mi ehwéh aiq pútaragurairana Táításaga ahtebaraire.

<sup>15</sup> Wega iteba suraitaq itega áhreéq iransánéq mehwéh atárówe. Itega wene ehweh sehgirosabé Táításaga ahreraq matawéna itensabé anotahtaq arutaboiraitéhre. Wega itene kaweq sansá iwíáhéna itensabé anotahtaq arutaboirarítéhre.

<sup>16</sup> Itega peh moke kaweq sansá sehgioreheqmóe iwíáhunsabé nirupipeq anotahtaq eyoyóire.

## 8

### *Sísa tagariáh ké séhréh aritagéhboq móne soruparáhro i ehwéhne.*

<sup>1</sup> Néne iyahnabo anímáriño, Manikánka Másérónia marákórápéqté Sísa tagariáh kényabé sirutaboiréna séhréh arítárái ehwéh teinie.

<sup>2</sup> Anotah íre kaweq sunúq káráitaq Másérónia marákórápéqté ké áhnte tabónáhera sirupipeq íre umehia peh eyoyóéra sega mó Sísa tagariáh ké séhréh aritageheéra áhnte moné soruparowe.

<sup>3</sup> Minayabe teiníboq írátíáhro. Segá moke nárieráhi naneq náriátówe. Seyega iwíáhue áhnte móñkakáq pehipi náriátówe.

<sup>4</sup> Segá Súria marákórápéqté Sísa tagariáh ké séhréh aritaneheqmúne iwíáhéra itensabé, Ite séhréh aritanéhe éra itega sorupóna moné meyháro págegeue teiátówe.

<sup>5</sup> Teiátowana ínéga iwíáhéna, Peh móne nárigéhe iwíáhurauge. Iwíáhuraugara téhwe Maniká itene Wahnahnsabé sirutaboiréra sinonka náwéra wega awahbeh sansá sehgiere anehemé moné náwatówe. Manikánka iwíáh aritowara ite moq irutaboiraitárówe.

<sup>6</sup> Menah Táításaga náwe sansá ite Kórína ke iwáhnoruraire. Iwáhnorurainsabé ínéga wensabé, Kórína kegá moq mina irútábóri sansá kawerue sehgiheéna minayabe moke síwáhnoré séhréh arito éna teawátáuge.

<sup>7</sup> Itega moke mirao sansá aiq kawerue miraowe. Itega Manikánsabe anotahtaq aiq pútare atáhwe. Wene ehweh teriterinoneheéq kawerue arambehriurowe. Itewe ahtebia ké méq Manikáne arambehri kawerue miraowe. Ínén'sabe irutaboiraintáhwe. Itega moke mó arámbéhri kawerue mira onserah itewe iwíáhue tagéq itene móne Maniká náwenéhe iwíáhoro.

<sup>8</sup> Minayabe miraoro éhwéh íre aítóge. Másérónia kegá nárie sansansábé teiúge. Segá sirutaboiraritera náriénserah itega moq irutaboirariteq nárigéhe iwíáhugte. Mó keyábé aiq pútaq irutaboirowapómo ite taganeheéna mah ehwéh teiúge.

<sup>9</sup> Itene Wahnah Sísa Karáhégá íópeq áhnte kaweq naneq matiorabeq suena ite kawerai-tanieéna mah marákóipéq tuména tabonah ani míowe. Wega miraúnka itega áhnte kaweq naneq meyahráhúne. Meyahráhúnayabé wega séhréh aítéh sánsámé tagarione.

<sup>10</sup> Mahra iwíáhunsabé móne sorupé ehwéh teinie. Itega inokáh opéq mi arámbéhri áhwárarowe. Itega mi arámbéhri pehipi íre áhwárareq téhwe miraoneheqmúne iwíáhég áhwárarowe.

<sup>11</sup> Minayabe amahnága mi arámbéhrí parabarúáhro. Itega áhwárarotaq iwíáhuronserahnéq náweráho moné soruqparáhro.

<sup>12</sup> Wehukenínká náwiné iwíáh kahnaraqmé minawé Maniká awahbeh sansáne. Manikánka itega íre matíáh náneqsabé náníero aitehro? Írakaumo. Peh morá matíáh náneq náweráhowe. Manikánka peh morá itega náweráho naneq iwíáhéra itega náwíra naneq tagéna kawerowe aitéhre.

<sup>13</sup> Mó ke kaweqlaq míéhraq ite tabonah ke míageheéna mah ehwéh teiugo? Írakaumo. Ite ómi monseráhnue awehraq matiageheéna teiúge.

<sup>14</sup> Amahnága áhnte moné matíáh púaq móbeqte tábónáh ké séhréh aritagéhe. Mókake ite tabonahirataq se áhnte matiéhrataqmé sega ite séhréh aitagéhe. Mirairataq itewe íre tabonah ke míaneheqmóe.

<sup>15</sup> Minayabe Manikáne ehwehnka aiq mahraréna,  
Mi topáh áhnte meyáh kégá arahq íre máráhwe. Pehgáriq meyáh kégá awehraq matíáhwe ire. *(Kisim Bek 16.18)*

### *Poraga wehuke Kórína suwahpeq eqmaro ehwéhne.*

<sup>16</sup> Manikánka Táításá iwíáh atáráirana ínéga ite séhréh aitané iwíáhunserah Táításaga moq mira iwíáhire. Manikánka mi iwíáh atáráinsabé wensabé iwíáh iwíáh atóge.

<sup>17</sup> Táításaga néne ehweh irena iwíáh iwíáhuraire. Íre ínéga pagu pagunuraunsabé peh wewega ite, Koséhréh aitanauge iwíáhéra iteba sinie ire.

<sup>18</sup> Mó anínká mó kehiná suwahpeq mó kehiná suwahperue nogena Manikáne kaweq ehwéh teri terinúwara mibeqté Sísa tagariáh kégá irera, Kaweq ehwéh tei teini aní míre atáhwe. Mi aní iteba eqmarahnana wega Táításá kérankéhe.

<sup>19</sup> Sísa tagariáh kégá mi aní omaq atera ínéreq ínéba míáh kéreq moraráq nowe arambéhríinkéheéra eqmatowe. Maniká itene Wahnahnsabé iwíáh iwíáh atageheéq mah kawéq árámbéhríúne. Sísa tagariáh tábónáh ké séhréh aitanéhe iwíáhúwara mó kegá mina tagagehe.

<sup>20</sup> Mó kegá iwíáhéra, Itega náríra naneq íre kawerue wahnahnowe iwíáhiyeho éq mó aní eqmarahnana wega moq mina náríra naneq wahnahninkehe.

<sup>21</sup> Íre peh morá Maniká itene Wahnahnka tagariéhtáq kaweq sansánonehe. Wehukega tagahtaqqákáq kaweq sansánonaraq tagagehe.

<sup>22</sup> Itega kaweq sansánowe iwíáhigeheéq mó aní eqmaranéhe. Mi anínká métáq iraru aníté kérirankeheéq eqmaranéhe. Mó arámbéhrí mó arámbéhríue awena tagraugana wega aiq kawerue arambéhríuraire. Kawerue arambéhríéra, Itega Sísane sánsá kawerue sehgiioneheqmóe iwíáhinsabé ite koséhréh aitané iwíáhinsabé iteba eqmaranéhe.

<sup>23</sup> Táításawe ite tagariáhwe. Ite séhréh aitayeheéta arambéhríye. We kéróya anítewé Sísa tagariáh kégá aiq omaq sitówara mó kegá Sísa Karáhénnsabe iwíáh iwíáh atageheéra sega kawerue arambéhríigehe.

<sup>24</sup> Itega mi keyábé irutaboirariteq séhréh arítáhro. Mirairataq móbeqte Sísa tagariáh kégá mina irera néne ehweh aiq pútare aintagéhe. Itega kaweq sansáno ke wóe iraru-rauwara mi ehwéhnsabé aiq pútare aintagéhe.

## 9

### *Maniká tagariáh tábónáh ké nárie ehwéhne.*

<sup>1</sup> Maniká tagariáh ké nárie ehweh aiq ahtebahwe. Minayabe nárie ehwéhnsabé íre áhnte sehirarinie.

<sup>2</sup> Itega sorupawe nárienéhe iwíáh aiq tagarióge. Minayabe Másérónía marákórápéqté kékabé itega miraira ehwéh aiq teriena iteíwíq panketauge. Ínéga sensabé mahraréna,

Ákáía marákórápéqté kégá inokáh opéq tabonah ke nárienéhe íwíáh áhwárarowe urauge. Uraugara irera mi kegá, Itega moq miraoneheqmúne íwíáhurowe.

<sup>3</sup> Ínéga teriátáu ehwéh péhe éhwéh agínehoéq miraira arámbéhrí amahnága parabaruageheéna mah anító siqmaraníe.

<sup>4</sup> Itega moke náríra naneq aiq kawerareq íwénunowe íwíáhuge. Másérónia marákórápéqté kéreq ínereqka iteba senaraq itega miraira arámbéhrí íre parabarúéhrataq itereq ínereq iyehitanawire.

<sup>5</sup> Mira íwíáhéra itega miraira arámbéhrí parabaruageheéna mah anító iteba ebeq siqmaraníe. Segá séhréh aitehraq náríra naneq sorupawe kaweraréhrataq ínéga iteba senaraq aiq awehraq kanae. Awehraq kahnaraq tagehra kegá íwíáhéra, Íre ínéga pagu pagununsabé peh iteitega nárienéhe íwíáhuraunayabé miraowe íwíáhigehe.

<sup>6</sup> Wene sotápéq íre áhnte uqmaréh áninká pehgáriq tahutáhúq meyanae. Áhnte uqmaréh áninká áhnte meyanae. Minayabe íwíáhue tagahro.

<sup>7</sup> Mó aní mó anínue itene irupipeq íwíáhéq náriéro. Itega náríra naneqsabé itene irupipeq íwíáh kikiriyeho. Itega íwíáhéq, Mó kegá itensabé anah ke woe éra abiahnsa aitéhboq nárienéhe íwíáh íre oro. Peh Manikánka wehwehi anínsabé arutaboiri puaq aru eyoyóue náriéro.

<sup>8</sup> Manikánka ite íre mationa naneq áhnte náieráhire. Ite moke awehraq kankeheéna náinkéhe. Itega mó ke séhréh ariteq moke kaweq arámbéhrí miraigeheéna Manikánka náinkéhe.

<sup>9</sup> Minayabe wene ehwehnka aiq mahraréna, We tabonah ke áhnte sinsinire. Wene tábúsoréh sánsá ahriahri kagaire ire. *(Buk Song 112.9)*

<sup>10</sup> Manikánka sonsoráh ké ayu nárírara uqmaráhnsabé áhnte tahutáhúq nárírara nahwe. Mina inserah wega ite íre kék náneq náinaq ite awehraq naneq matawéq mó ke wehwehue séhréh ariteq itega náríransabé Manikánka náina naneq anotah úkinawire. Itene kaweq sansámári moq anotah úkinae.

<sup>11</sup> Manikánka ite áhnte náinaq itega moq tabonah ke ahriahri nárieráhowe. Itega miraúnayabé tabonah ke nárírataq meyhéra kegá minayabe Manikánsabe íwíáh íwíáh atagéhe.

<sup>12</sup> Itega Manikáne tabonah ke nárírataq se tabonah ira naneq aiq awehraraginae. Itega náríransabé mi kegá Manikánsabe anotahtaq íwíáh íwíáh atagéhe.

<sup>13</sup> Itega mó ke séhréh ariteq nárírataq sega itega Sísá Karáhéne ehweh aiq kawerue sehgiówe íwíáhéra Maniká áwíq pankerera wensabé íwíáh íwíáh atagéhe.

<sup>14</sup> Itega eyoyóue nárírataq sega itensabé, Áhnte irutaboiro ke wóe aitera Manikánsabe, Ite kaweraritoue púreraitagéhe. Manikánka ite séhréh aitena mi íwíáh aitahnara náríra kegá itensabé anotahtaq sirutaboiréra púreraitagéhe.

<sup>15</sup> Manikánka wenahni iteba eqmarowe. Anotah kawéq sánsá miraú púaq moke mó sansá kiotaikinsabé itene ehweh íre irarerahéq peh Manikánsabe íwíáh íwíáh ata ataúne.

## 10

### *Poraga wene arambehriyabé irarú ehwehne.*

<sup>1</sup> Íné Porane ehweh kawerue íráhro. Sísá Karáhé uwaresa ánínéna pehwehrue míonserahnue teinié. Iteba mío tánáhráq wehukega ínénabe, Uwaresa ání míahne ewe. Iteba íre mío tánáhráq peh móbeq ména páhsí sehiranue ehweh teiútáq ínénabe, Págege ehweh sehiranue iene aintáhwe.

<sup>2</sup> Iteba senaraq págege ehweh aiteyabe nuwahriehre. Minayabe kawerurero.

Mó kegá ínénabe, Mah marákóípéqté sánsánóne aintáhwe. Mina tahnza éhwéhno keyábé págege ehweh aritahráhüe. Íte mah marákóípéq míone eme aiq pútarowe.

<sup>3</sup> Peh mah marákóípéqté kégá íwíáhue ebehonserah íre úne.

<sup>4</sup> Manikáne arambehri miraoneheéq iqtate íre ebehúne. Owainawane arambehri saiqnareq Manikánka nái náneq, págege naneqtaté ebehúne.

<sup>5</sup> Mó kené péhe éhwéh píribahri ehwéhnká Manikáne sansá taganeherao kené ah paitiehnehoéq saiqnaruone. Sísa Karáhéne ehweh sehgigeheéq moke mó iwíáh saiqnaruúone.

<sup>6</sup> Itega néne ehweh sehgírataq itereq ínéreqka néne ehweh anterúáh ké kamah arienéhe.

<sup>7</sup> Itega tagahna naneqsabé tábúsoqme iwíáhoro. Ite Sísa Karáhéne animári múné iwíáhoo? Íné moq wene ani mío púaq minayabe iwíáhoro.

<sup>8</sup> Ite saiqnariankeheéna Manikánka omaq intáráiro? Írakaumo. Manikánka ínénsabe, Ite séhréh arite kawerarito aintena omaq intáráire. Minayabe néne arambehriyabé iwíáh iwíáhéra néníwíq pehgáriq pankerónsabé íre niyehitehre.

<sup>9</sup> Néne páhsí tagéq anotah ahréigeheéna íre sehiranuge.

<sup>10</sup> Mó kegá mahraréra, Néne páhsipéq págege ehwéh irarire éra peh iteba míaraitaq íné mareqmareq aní ména págege ehwéh íre iraruraire ewe.

<sup>11</sup> Mira íwíáho keo, íráhro. Ínéga sehiranue teiú éhwéhnkákáq iteba míahnaraq teiéna ehwéhnkákáq peh monseráh éhwéhtáré wíre mókake ahtebagehe.

<sup>12</sup> Seyensabé iwíáh íwíáhéra, Ite moke mó ke kiotaikúne íwíáho kegá mira onserah íre úne. Segá seyene arambehri tagéra wene wene arambehri agehgamarera peh seyene arambehriyabé iwíáh íwíáhowe. Mi sansámé peh múguwahgu sansáne.

<sup>13</sup> Néníwíq pehipi pankereyabe íre nuwahbehere. Írakaumo. Peh morá Manikánka omaq intárái arámbéhrí miraunsabé iwíáh éna iraruge. Wega ite séhréh arito aintarái puana mi arámbéhríyábé iwíáh íwíáhéra iraruge.

<sup>14</sup> Manikánka, Ite séhréh arito aintarái puana wene ehweh sehgienna iteba séna Sísa Karáhéne kaweq ehwéh teiátáuge.

<sup>15</sup> Mó kené arambehriyabé, Ínénéne arambehrie éna néníwíq pankeranieéna iwíáh íwíáhugo? Írakaumo. Ínéga ite séhréh aitahnaq itega Sísane sásá kawerue ambubu atawéq sehgírataq mó ite míáhrabeqte ké séhréh aritaníe íwíáhugo.

<sup>16</sup> Ínéga ite seberiopéq pokue Sísane kaweque ehwéh mitaq teri mahtaq terininie. Miraonaraq íre mó kegá arambehriorabeq peh ínébataq néne arambehriyabé iwíáh íwíáhéra irarinie.

<sup>17</sup> Minayabe Manikáne ehwehnka aiq mahraréna, Iwíáh íwíáhóna aníno, peh morá Manikánka mirainsabé iwíáh íwíáhéra irarúno ire.

<sup>18</sup> Wewensabé iwíáh íwíáhéra wenáwíq pankeréh áninká, Manikánka anotah aní móne íre atankéhe. Peh Manikánka wehukeniné áwíq pankeréh ánime webataq anotah aní míankehe.

## 11

*Porareq péhe éhwéh íwáhnoro kerekne sansá íre morá sásáne i ehwéhne.*

<sup>1</sup> Ínéga irarena ehwéhnsabé itega, Múguwahgu ehwéhne aintagéhe. Pehipi teiníboq kawerue írátíáhro.

<sup>2</sup> Manikánka itensabé arutaboiri serahnuge. Itega peh morá Sísa Karáhénabe irutaboirigeheéna ite aiq omaq itáráuge. Kaweque ahrárígá peh kaweetaq ména mó weh máhbí íre tagehre. Írakaumo. Peh morá wega kéragna anínsabé áwénunue mókake webataq kéranié íwíáhire. Mina inserah itega Sísa Karáhénabe irutaboiréq kéraneheqmúne íwíáhigeheéna séhréh aítóge.

<sup>3</sup> Éhrámane ahre wenáwíq Íwie. Mi inínká wehene péhe éhwéhnsabé aiq pútare atena ahbabárúnserah itega moq péhe éhwéhnsabé aiq pútare atého. Minayabe nirupipeq iwh kikiruge. Sísa Karáhénabe irutaboiréq wene kaweque sansá súeho.

<sup>4</sup> Mó kegá iteba séra íre ínéga Sísá Karáhéne ehweh teiúnserahnue peh mó ehwéh teiéwaq íráhwe. Segá íre Manikáne Awa ehweh peh mó ehwéh teiéwaq íráhwe. Íre Manikáne kaweq ehwéhnsábé peh mó ehwéh teiéwaq íráhwe. Itega iwíahéq, Mi ehwéhmé peh ahtebia ehwéhne éq mi ehwéhnsábé ireyabe iuwahbehre ewe.

<sup>5</sup> Irátiáhro. Mi kegá anotah ke wóe íwíahoo? Segá íné íre kiotaikowe íwíahuge.

<sup>6</sup> Ínéga ehweh teiútáq áhwára áhwáraume tagarióge. Peh morá néne iwíahwé íre áhwára áhwárauge. Ínéga tábúsoqme iwíahuraume ehweh teiátáutaqkákáq íwáhnorurautaqaqkákáq páhsí sehiranurautaqaqkákáq néne kaweq iwíah sokigi aiátáugaq írátíaro mino.

<sup>7</sup> Ínéga Manikáne kaweq ehwéh teiátáutaq ápeq náníero íre urauge. Ite anotah anímári míagehboq íné pehgáriq aní míanieéna mi sansánurauge. Mirauraume ínéga ahbabáruraone íwíáho?

<sup>8</sup> Ite séhréh aitanieéna iteba arambehriurautaq mó kehiná su wahpeqte Sísá tagariáh kégá móne náni náninurowe. Íre se séhréh aritena peh iteite séhréh aitanieéna mó kené móne mewe meweurauge.

<sup>9</sup> Iteba ména tabonahurautaq itensabé íre inehuraugara Másérónía marákórápéqté Sísá tagariáh kégá íné íre matiarau naneq mewe náni náninurowe. Iteba míarautaq irupipeq umeh agínehoéna íre inehurauge. Mókakeakáq íre inehinie.

<sup>10</sup> Sísá Karáhéne aiq pútaq ehwéh irena mókakeakáq ite íre ineh inehinie. Mi ehwéhmé ite Ákáia marákórápéq míáh kégá, Péhe ehwéhne íre aintahráhowe.

<sup>11</sup> Itensabé íre nirutaboirunsabé irarugo? Írakaumo. Manikánka tagariéhtáq itensabé anotahtaq nirutaboiruge.

<sup>12</sup> Mó kegá, ínéga arambehriunserah arámbéhríúne éra seyene arambehriyabé iwíah íwíahowe. Mó kegá sensíwíq pankerageheéra miraowe. Mó kegá mina miraigeheéna amahnága mirau sansá mókakeakáq miraéna néne arambehri tauntahunue tábúsoqme mirainauge.

<sup>13</sup> Manikánka mi ke íre siqmatai puara péhe ehwéhkákáq ké míáhwe. Sene arambehriyabé péhe ehwéh irarewe. Sísá Karáhéga se aiq pútaq siqmarowe íwíahigeheéra mó kegá tagahtaq íre sene sánsá peh mó sansánowe.

<sup>14</sup> Minayabe áhteniyehboq owainawanka moq mi pehe sánsánsábé aiq ahtebehre. Wehukega, Owainawa kaweq aníne íwíahigeheéra owainawanka téhrehrabeqte íópeqté ání tahnsa úkorahire.

<sup>15</sup> Owainawanka mi sansá aiq mirai puara wene arambehri kegá moq miraorahéra kaweqtaq mía míao ke tahnsa úkorahowe. Miraonsabé áhteniyeho. Mókake Manikánka sene arambehri sainsuena kamah arinkéhe.

### *Poraga arambehriúnsabe íre kaweq sunúq ábóraragú ehwehne.*

<sup>16</sup> Métáq teiú ehwéh móñkakákáq teiníe. Íné múguwahgu aníne íwíah aintehboq néne ehweh íráhro. Néníwíq pehgáritaq pankeraníboq íráhro.

<sup>17</sup> Néne arambehriyabé iwíah íwíahu ehwéh teiníe. Amahnága teiú ehwéhmé íre Manikáne Awanka iwíah aintéhrana iraruge. Peh ínénéga múguwahgu anínká mira inserahnéna néníwíq pehgáritaq pankeróge.

<sup>18</sup> Mó kegá mah marákóípéqté sánsánéra seyene arambehriyabé sensíwíq pankeráhwe. Ínéga moq mi sansánéra néníwíq pakeraníe.

<sup>19</sup> Itega iwíahéq, Ite ahtebia ké úne éq múguwahgu kené ehweh íráhwe.

<sup>20</sup> Mó kegá miraoro e ehwéh apubúue íráhwe. Segá itene ménsámehnsá apubúue parabaruera péhe ehwéh irarensabé ite saiqnaruera ite píribahri aitera ite ahsuehwe iubówe. Segá miraurotaq itega túbah agéq peh áwé tagahwe.

<sup>21</sup> Segá mirauronserah ínéga íre miraurauge. Minayabe niyehitanabo? Írakaumo. Minayabe íre niyehitanawire.

Mó kegá seyene arambehriyabé iwíáh íwíáhéra teírataq íné moq múgu wahgu aní tahnsanéna teiníe.

<sup>22</sup> Segá mahraréra, Ite Íbaru kahnáh múne eme íné moq Íbaru kahnáh múge. Segá mahraréra, Ite Ísara ke úne eme íné moq Ísara aní múge. Segá mahraréra, Ite Ébáráhmane animári múne eme íné moq Ébáráhmane ani múge.

<sup>23</sup> Segá mahraréra, Ite Sísá Karáhéne arambehriúna ke úne eme uwoyansa anínká irarinserahnowana néne arambehriga moke sene arambehri kiotaikire. Segá pehgáriq arámbéhríowana ínéga anotahtaq arambehri mira aruqaruruge. Sísane arambehri mi-raunsabé wensabé suwahrieh kegá karábúsiipéq móinta intaowe. Móintera nubiqmaq nubiqmarowana pukorah aruqaruruge.

<sup>24</sup> Asiu kegá moberíah tánáhráq áréti sahtáté áhntetaq 39 tanáhráq nubitowe.

<sup>25</sup> Aroma kegá mó tanáhráq mó tanáhrárue apahtáróráq sahtáté nubitowara wáhnaupéqté kégá peh morá tánáhráq ebahnса tuparuqme nubitowe. Apahtáró tánáhráq íné mírau sipí pitegue wánípiperaguraire. Peh morá wéhékáhnkákáq inokáhpeqkakáq wánípipeq mírauge.

<sup>26</sup> Mó kehiná suwahpeq mó kehiná suwahperue poku pokunsabé íre wahto ah nogúge. Wánípipeq tupekorahuge. Aebó kégá nubiq suahráhowe. Nánuwrahrah Asíú kégá nubiq suahráhowe. Nahnsó kegá moq nubiq suahráhowe. Mó ke suwahpeq míótáq abatapi míótáq sóreq wanípípéq míótáq nubiq suahráhowe. Ite néne iyahnabo animári múne e kegá moq nubiq suahráhowe.

<sup>27</sup> Íné áhnte págege arámbéhríouage. Arambehriuraunsabé mó tanáhráq mó tanáhrárue inokáhpeq íre ahrenarauge. Nirupibiuraire. Wání tahbobóuraire. Áhnte tanáhráq tópah íre narauge. Néne korósi íre awehraq káráinsabé sóiriqka kamah aníátáire.

<sup>28</sup> Íre peh morá mina teiú náneqmarínká kamah aníátáire. Sísá tagariáh kégá wene ehweh kawerue sehgiowapómo íwíáhunka mó wehekáh mó wehekáhnue nirupipeq íwíáh kikirunka nirupipeq umeh agire.

<sup>29</sup> Mó anínká, Sísane sánsá suaníe iraritaq nirupipeq págege agire. Mó anínká ahbabáritaq nirupipeq umeh agire.

<sup>30</sup> Néníwíq árahue pankeraníkono? Íné peh mareqmareq aní míónsábé néníwíq pankerena íwíáh íwíáhéra teiúge.

<sup>31</sup> Manikámé itene Wahnah Sísane abowáe. Wensabé ahriahri íwíáh íwíáh atanéhe. Wega tagariéhtáq peh aiq pútariahnsanuge.

<sup>32</sup> Anotah wahnáh ání wenawíq Árétae. Wega Támákása suwahpeqte márakóákáq wahnahnuraire. Íné Támákása suwahpeq mírautaq sóntia kené wahnahnka íné saiqnarikehéna wene sóntia keyábé moke mibeqté kúri méhpehtaq wahnahnoro aritaraire.

<sup>33</sup> Wega miraurainsabé néne iyahnabo animárinká séhréh aintera sehwerapeqté áwánkúrapéq páhsíkétiipéq íné úsawe náhníáq iwe panantáwe kuri ogesáhue máhpeq núwátowara sega íné íre saiqnariarowe.

## 12

### *Porane awanka tagó naneq ehwéhne.*

<sup>1</sup> Ínénénsabe íwíáh íwíáhéra teiú éhwéhká ite íre séhréh aitahráhire. Anetaníbo pehipi teiníe. Ínénwanka tagaraitaq Manikánka sokigi aníátái ehwéh teiníe.

<sup>2</sup> Sísá Karáhé tagariarautate sure sure 14 opéq parabaguraitaq Manikánka íné kio-taikue íópipeq wéhuwa móíntáráire. Néne ninonkankakáqpópoq peh morá néne ni-wankakáqpópoq móíntáráirana ínéga íre tagariógana peh morá Manikánka tagariéhre.

<sup>3</sup> Íópeqté mátábúráq ména néne ninonkankakáqpópoq peh morá néniwapopoq móíntáráirana ínéga íre tagariógana peh morá Manikánka mina tagariéhre.

<sup>4</sup> Kaweq iopéqté mátábúráq móíntáráirana wehukega íre irareraho ehwéh írátáugana mó ke terieyabe ahqáho aintaráire.

<sup>5</sup> Néne niwanka tagaraitaq Manikánka sokigi aníátáinsabé iwíáh íwíahéna teiúge. Peh amahnága miraunsabé néníwíq íre pankaraníe. Mareqmarerutaq Manikánka séhréh aintéhnsabé íné mareqmareq aní míónsabé iwíáh íwíahéna teiúge.

<sup>6</sup> Ínénénsabe iwíáh íwíahéna pahsúótáq tahirímé múguwahgu aní tahnsa íre míó irino. Peh aiq pútaq ehwéh teiéna puana múguwahgu aní tahnsa íre míanie. Mó kegá néne ehweh irera néne arambehrii sansá tagéra ínénénsabe tábúsoqme iwíáhorahowe. Mirairataq aiq kawerinae. Ínénénsabe iwíáh íwíahéna teiú éhwéhnsabé irera ínénénsabe íre tábúsoqme iwíáhorahowe. Minayabe ínénénsabe iwíáh íwíáhu ehwéh mó íre teiníe.

### *Pora mareqmarerútaq Manikánka págege ato ehwéhne.*

<sup>7</sup> Néniwanka tagaraitaq Manikánka áhnte kaweq naneqmarí sokigi aníátáirana tagarauge. Mina tagaraunsabé ínénénsabe iwíáh íwíahéna píribahri agonehoéna sehikaranká peraq áwírana érinserah Manikánka níéri naneq níátáire. Owainawanka eqmaréh áninká nubírana mina íéri naneq néne ninonkataq kéhre. Íné píribahri aní míéhnehoéna Manikánka náníátáire.

<sup>8</sup> Íné apahtáró tánáhráq Manikánsabe púrerue mahraréna, Néne Wahnahno, níéri naneq kaqnuo urauge.

<sup>9</sup> Kaqnuo urauganawe wega ínénénsabe, Are mareqmareq aní míéhnaraq págege ataníe. Ínéga págegeue séhréh atónká aiq awehraq kanae uraire.

Aiq awehraq kanae urainka nirupipeq eyoyóéna íné mareqmareq aní míónsabé Sísa Karáhéga págege aintéh púana iwíáh íwíahéna nirupipeq eyoyóire.

<sup>10</sup> Ínéga Sísa Karáhéne arambehri miraunsabé mareqmarerutaq mó kegá ínénénsabe abehq éhwéh aintáhtáq íroke sunúq sitaq mó kegá níwíloqnahtaq mó kegá íre kaweraintáhtáq nirupipeq pehwehrue míóge. Íné mareqmarerutaq Manikánka págege aintéhnká wene arambehri págegeue miraorahuge.

### *Poraga Kórína su wahpeqte ké séhréh ariteyabe irari ehwéhne.*

<sup>11</sup> Itega miraonka ínéga múguwahgu aníinká irarinserahnuge. Itega néne arambehriunsabé íre iwíáh íwíahonsabé mi ehwéh iraruge. Íné íre anotah aní míónsabé niahtebohge. Iteba péhe éhwéh íwáhnoro kegá íné íre kiotaikowe. Minayabe mi keyábé aneqsabé iwíáh íwíáhoo?

<sup>12</sup> Manikánka eqmaq núwátáirana iteba míarautaq págege arámbéhriéna ótaq sansá itega íre tagariaro sansánurautaq pehwehrue míaraugaq tagarowe. Itega mina tagéq Manikánka íné eqmaq núwátái aní ména wene arambehri tábúsoqme mira aruqaruruge ahtebahrahowe.

<sup>13</sup> Mó kehiná su wahpeq Sísa tagaríah kégá íné kirabo aintera íné íre kárái naneq níátówana merauge. Iteba míarautaq mi sansá íre mirauraige. Minayabe itega iwíáhéq, Ínéga íre kaweraitáráire íwíáhoo? Mira íwíáh kahnaraq mó mina tahnsa íwíáh íre oro.

<sup>14</sup> Téhtaré tánáhráq iteba míaraunsabé íre ineh ineh aitáráuge. Mónkakáq iteba koragéyabe nuwahbehrana mi tanáhráqkákáq moq íre ineh inehinie. Itene ménsámehsánsabe íre nirutaboiréna peh morá itensabé nirutaboiréna ite séhréh aiteyabe nuwahbehre. Káriq anímárínká sinoibo íre kiraboowara peh morá sinoiboga sene animári kiraboowe. Íné iteribo tahnsá míónsabé sinoiboga sene animári kawerue séhréh arítáhnserah mirainie.

<sup>15</sup> Ite séhréh aitanieéna moke matíó náneq parabaruahráhuge. Ite séhréh aitanieéna pukorahuge. Itensabé anotahtaq nirutaboiru puaq itega ínénénsabe pehgáritaq arutaboiraintaho?

<sup>16</sup> Itega mahraréq, Ínéga itene ménsámehsá ábóraq íre meraire ewe. Mó anínká mahraréna, Ínéga ehnenué péhe éhwéh teiátaitaq aneqpopoq kopípéq meraire ewe.

<sup>17</sup> Árahuraugo? Ínéga iteba eqmatau kegá itene ménsámehsá íre mero mino.

<sup>18</sup> Táításareq mó Sísá tagariéh ánínseq iteba eqmatautaq Táításaga itene ménsámehsá íre merai mino. Manikáne Awanka wereq ínéreq peh morá íwiah aitéh púata peh morá sánsánuya mino.

<sup>19</sup> Itega ínénabe, Kaweq aní móne íwiahigeheéna mah ehwéh sehiranue teiugo? Írakaumo. Néne iyahnabo anímáríno, peh morá ite séhréh aitanieéna moke mah ehwéh sehiranue teiúge. Manikánka tagariéhtáq Sísá Karáhégá iwiah aintéhnserahnue teiena itega wensabé kawerue aiq pútare ateq wene sánsá págegeue sehgigeheéna séhréh aruqaruruge.

<sup>20</sup> Ínéga itensabé, Kaweqtaq míahro aitáráuge. Aitáraunsabé iteba senaraq ite ahbabáq animári míého. Míehrataq íné abiahnsa aní úkonehoéq íre kaweróne aintagéhe. Mira íwiahunsabé nirupipeq iwiah kikiruge. Tobehwé, mó anínsabé íre kaweq iwiah atewé, mó anínsabé abiahnsa atewé, peh wewene iwiah sehgie sansamé, éhruruwe, péhe éhwéh atewé, píribahriwe, momiwíotaq íre tábuosoqme sansáname, iteba senaraq mahna tahnsa sánsá kehnehboq kawerurero.

<sup>21</sup> Menah áhnte itega mó kené weh ahre abariéq mó ahbabáq sánsánuowe. Mi sansá airaiq suaune íwiah íre urowe. Iteba kowéna mina tagahnaraq nirupipeq págege agínana ite míéhrarabeq Manikánka, Íbisáhno aintahnana niyehitanawire. Mira íwiahunsabé nirupipeq iwiah kikiruge.

## 13

*Kórína kegá Sísane sánsá kawerue sehgigeheéna Poraga séhréh arito ehwéhne.*

<sup>1</sup> Menah téhtaré tánáhráq iteba surauge. Mónkakáq ite koragéyabe nu wahbehre. Manikáne ehwehnka mahraréna, Téhranítégábópoq apahránítogábópoq wehukeniné ahbabáqsabe morá éhwéh irarirataq itega mi ehwéh kaweratahráhowe ire. (Lo 19.15)

<sup>2</sup> Menah ahbabáruro kereq ómi itereq teiníboq írátiáhro. Ite anehe koragarautaq teiátáume amahnága móbeq míónsabé mónkakáq teiníe. Mó iteba konaraq ahbabáq ke íre peh áwé taganie.

<sup>3</sup> Sísá Karáhégá íné séhréh aintehrámo íwiahéq iteba konaraq Sísaga séhréh aintéhnká miraínawe taganeheqmóe. Sísá Karáhégá ite kamah aímé mareqmareq sansápo? Írakaumo. Peh págegeue miraire.

<sup>4</sup> Segá Sísá awankátaq táhparótaq we mi tanáhráq mareqmareq aní míowana Manikánka págege atéh púana we amahnága págegeue mía míaire. Sísareq mía míauksabé mareqmareq aní míóganá Manikánka págegeue séhréh aintéhnká wereq oga mía míáena ehweh teiena págegeue séhréh aitaníe.

<sup>5</sup> Itega Sísansabé aiq pútare ateq wene sánsá kawerue sehgiowámo. Minayabe kawerue íwiahue tagahro. Sísá Karáhé itene irupipeq íre míehro? Írakaumo irataq itega wensabé íre tábuosoqme aiq pútare atáhwe. Minawé aiq ahtebahó?

<sup>6</sup> Ínémé Sísá Karáhéné arambehri miraéyabe íre túbáh agire éq tagariagehe íwiahuge.

<sup>7</sup> Itega íre ahbabárigéheéna itensabé púreraita aitauge. Ínéga kaweq arámbéhríre íwiahigeheéna itensabé púreraitogo? Írakaumo. Mó kegá, Íné kaweq arámbéhríre íwiahowamo. Anetaníbo. Peh iteitega kaweq sansáigeheéna itensabé púreraita aitauge.

<sup>8</sup> Itega aiq ahtebahme Manikáne aiq pútaq ehwéh íre saiqnariahrahúne. Írakaumo. Mi ehwéhnsabé peh kowe ateq mó keyábé mi ehwéhnsabé aiq pútare atáhro arita aritaúne.

<sup>9</sup> Ite mareqmareronaraq itewe págegeue míéhransabé iwíáh iwíáhúne. Ite kaweqtaq méq aiq pútaq sansánigeheeéq itensabé púreraita aitaúne.

<sup>10</sup> Iteba konaraq págegeue kamah aiénehoéna amahnága móbeq míótáq mah pagégé éhwéh sehiranue teiúge. Maniká Iteriboga wene arambehri mirainkeheéna págege aintéhre. Kamah ario éna íre págege aintéhre. Peh séhréh arito éna págege aintéhre.

*Poraga iroro ú ehwehne.*

<sup>11</sup> Néne iyahnabo anímáríno, iroro. Néne ehweh ireq kaweq sansánoro. Peh morá iwíáhue uwaresa ánímári míáhro. Mirairataq Manikánka itensabé arutaboiréna itene irupipeq ukiq itankéhe. We itereq mía míainkehe.

<sup>12</sup> Iteite we mehweh atéhoro. Mahtaqté Maniká tagaríáh kégá itensabé iroro ewe.

<sup>13-14</sup> Itene Wahnah Sísa Karáhéga ite séhréh aitéhrana Maniká Iteriboga itensabé arutaboiraitéhrana Manikáne Awanka ómi iteba mía míaire.

## Kárétia Ebeq sáhnsahwe ahbebé ehwehne.

Kárétíawe marakó áwíre. Poraga mitaq Sísa éhwéh síwáhnoréna mitaq suena mó ke suwahpeq pokúwe. Anehe péhe éhwéh síwáhnoro kegá Kárétia marakó séra mahraréra, Peh Sísansabé aiq pútare ate sansámé íre avehraq kékre. Mósísiga miraoro ú ehweh moq sehgóro uwana Poraga mi éhwéh irena mi pehe éhwéhnu keyabé anotahtaq abiahnsanéna mah pahsí sehiranúwe. Wega sehiranéna, Mósísiga miraoro ú ehwehnká íre séhréh aitahráhire. Peh morá Sísansabé aiq pútare atera wene sánsá sehgoró kegá oga mérapeq awaq mianeherawoe. Minayabe Sísane sánsá ambubu atawéq Manikáne Awanka iwíáh aitéh iwíáh sehgorataq peh kaweq sansánigehe úwe.

### *Poraga Kárétia marákórápéqté ké siu pahsíe.*

<sup>1</sup> Íné Pora eqmaq núwátóya aní múge. Íre wehukega omaq intera eqmaq núwátówe. Írakaumo. Sísa Karáháreq we iriwe organúq ato ani, Maniká Iteriboreqka omaq intera eqmaq núwátóye.

<sup>2</sup> Íné Porane páhsí sáhnsahwe tagahro. Ínéreq moke mahtaqté Sísa tagariáh kerekka ite Kárétia marákórápéqté Sísa tagariáh kéné páhsí eqmaq suone.

<sup>3</sup> Maniká Iteriboreq itene Wahnah Sísa Karáháreqka ite séhréh aitera itene iru ukiq itagéhe.

<sup>4</sup> Maniká Iteriboga Sísa Karáhé iwíáh atowana amahnága ahbabáq aruqaruro kegá mirao serahniyeho éna itene kaweraitanieéna itene ahbabáqsabe putiowe.

<sup>5</sup> Minayabe Manikánsabe ahriahri iwíáh atone. Aiq míre.

### *Kaweq ehwéhmé peh morá kékre i ehwéhne.*

<sup>6</sup> Wene animári míageheéna Manikánka omaq itáráirana Sísa Karáhégá séhréh aitáráiraq itega wensabé aiq pútare atárówe. Amahnága mó kené ehweh sehgoneheéq ite omaq itárái aní apubúue áuwáhwe. Miraonsabé áhtenuge.

<sup>7</sup> Kaweq ehwéhmé peh morá kékre. Mó ehwéhmé íre aiq pútaq ehwéhne. Mó kegá Sísa Karáhéne ehweh úbíráhbíq ehwehnue iwáhnoru puaq ite íre tábúsoqme iwíáhurowe.

<sup>8</sup> Ínéga kaweq ehwéh teiátáutaq aiq pútaq ehwéh iwáhnorurauge. Amahnága ínégabópoq íopeqté áninkábópoq mó ehwéh teiéyataq Manikánka, Iraipéq pokúno aitahnawe aiq kawerinae.

<sup>9</sup> Aiq teiúge. Mónkakáq teiníe. Mó anínká itega téh írátó ehwéh íre teiasa peh mó ehwéh teinaraq Manikánka, Iraipéq pokúno atahnawe aiq áberanae.

<sup>10</sup> Wehukega ínénabe iwíáh íwáhigeheéna mah ehwéh teiugo? Írakaumo. Manikánka kaweróne aintankeheéna iraruge. Wehukega ínénabe suwahbankeheéna mah arámbéhríugo? Írakaumo. Wehukega ínénabe suwahbankeheéna arambehriutaq tahirímé Sísa Karáhéne arambehriu aní íre mío irino.

### *Manikánka Pora eqmaq auwo ehwéhne.*

<sup>11</sup> Néne iyahnabo anímáriño, Teiníboq írátíáhro. Ínéga teiú kawéq ehwéhmé wehukenínká íre áhwáraraire.

<sup>12</sup> Mó kegá mi ehwéh íre teniátówe. Mó kegá mi sansá íre níwáhnoruwe. Sísa Karáhégá webataq mi sansá sokigi aintáráire.

<sup>13</sup> Ite íráhmé ínéga miraurau sansámé aiq íráhwe. Ite iwíáhome ínéga Sísa íre tagariarautaq Asiu kené sánsásabé iwíáh íwáhéná tábúsoqme sehgorauge. Mi tanáhráq Sísa tagariáh kékabé íre nirutaboiria peh anotahtaq síwíloqnéna moke mi ke subiqme parabaruanié iwíáhuraige.

**14** Íné nigaqnane sansánsábé iwíáh íwíáhéra nánuwahrah Asíú kéné sánsá kawerue sehgirauge. Ínéga sehgraunka moke néne wehgau kiotaikurauge.

**15** Nánoga íné íre maqintotaq Manikánka omaq intena séhréh aintena néne arambehri mirainkehe aintowe.

**16** Anehe wene kaweq ehwéh nahnsó ke korerinkeheéna Manikánka wenahni Sísa sokigi aníátáire. Sokigi aníátáirana minayabe mó keyábé íre kasenurauge.

**17** Ínéga Sísa íre tagahwataq mó kegá wene arambehri miraigeheéna Manikánka omaq sitena siqmarowara se Sarúsarama suwahpeq míowe. Anehe Manikánka Sísa sokigi aníátáirana mi kebá íre kiragarauge. Téhwe Árébía marákórápéq kowéna anehe Támákása suwahpeq kouwekurauge.

**18** Apahtáró ópéq parabaguraitaq Píta taganieéna Sarúsarama suwahpeq kiwéna 15 wehekáh weba míarauge.

**19** Mi tanáhráq ínéga mó ke Manikánka eqmaro kewe íre tagarauge. Peh morá Sémísi itene Wahnahne ábákawa tagarauge.

**20** Ínéga sehiranue teiúmé aiq pútariahnsanuge. Manikánka tagariéh púana péhe éhwéh íre iraruge.

**21** Anehe Síria marákórápéqkákáq Sírisía marákórápéqkákáq kowara

**22** Súria marákórápéqté Sísa tagariáh kegá ínénku íre tagarowe.

**23** Mó kegá sensabé, Íwíognarai anínká amahnága Sísane sánsá sehgóre. Sísa tagariáh ké subiqme parabaruanie urai anínká amahnága Sísa éhwéh teri terinire urowara írátówe.

**24** Manikánka íné aiq kaweraintaráinsabé sega wensabé iwíáh íwíáh atárówe.

## 2

*Sísa tagariáh kéráq wahnahno kereq Porareq monseráh íwíáhu ehwéhne.*

**1** Áhnte opéq 14 opéq parabaguraitaq Sarúsarama suwahpeq mó kirauge. Ínéreq Páhnábásareqka Táítása meqmeta móátaráúye.

**2** Ínéreq mibeqté Sísa tagariáh kéráq wahnahno kereqka momiwíuraunaraq wahnahno ke sebataq ehweh teriátáuge. Nahnsó ke teri terinurau ehwéh teriátáuge. Manikánka mi iwíáh aintena, Kirerio aintaráirana kireríátáuge. Ínéga áhwára áhwára arámbéhríoneho éna sega néne ehweh iwíáhue tagariageheéna nahnsó ke teri terinurau ehwéh teriátáuge.

**3** Íné sénítái aní wenáwíq Táításawe íre Asiu anínéna peh Káriki marákórápéqté áníne. Mibeqté kegá, Táításane áú amurúráhro ue íre pagu pagunurowe.

**4** Mó kegá ahboeraneheéra séra itensabé, Ite moq Sísa tagariona anímári múne éra péhenurowe.

Itega Sísa Karáhéne sansá sehgráúnayabé Mósísine ehwehnka ite íre saiqnariaraire. Mi ehwéhnká ite moq saiqnariankeheéra ahboeréhra kegá ite tagéra Táításane áú amurúráhro éra pagu pagunurowe.

**5** Ite nahnsó kegá aiq pútaq sansá kawerue miraigeheéq itega sensabé págegeue ahqáho arítaráúnara sega wene áú íre amurú auwahráhurowe.

**6** Manikánka wahnah kereq mó kereqsabé peh morá íwíáhi puana mibeqté wahnah keyábé íre áhtenurauge. Mi wahnáh kegá ínéga nahnsó ke teri terinurau ehwéh irera o ehwéh íre teniátówe.

**7** Segá néne ehweh irera iwíáhéra, Manikánka Pítansabé, Asiu ke kaweq ehwéh koreri terinúno atáráinserah wega ínénabe, Nahnsó ke koreri terinúno aintaráire íwíáhurowe.

**8** Manikánka Píta omaq atena Asiu kebá eqmarena págegeue séhréh atéhnserah wega íné omaq intena nahnsó kebá eqmaq nuwena págegeue séhréh aintéhre.

**9** Manikánka mi arámbéhríráq intonsabe mibeqté kéné wahnahmarí sensíwíq Pítareh Sémísireh Sónirehga ahtebéra ínéreq Páhnábásareq mehwéh aitárówe. Sereq itereq morá

íwíahéq, Ínéreq Páhnábásareq nahnsó kebá arambehri kéhrara se Asiu kebá arambehri kéhre íwíahuraune.

<sup>10</sup> Segá peh morá éhwéh teiera, Tabonah keyábé ahreraq matawéq se nárie sansa síwáhnorotao aitárówe. Íné nárie sansa aiq sokigi aritená mókakeakáq mirainie teriátáuge.

*Poraga Pítane ahbabáq pahsuo ehwehne.*

<sup>11</sup> Pítaga Ántióka suwahpeq míaráirana ehweh atáráuge. Wega miraurai sansámé íre kaweq sansáne.

<sup>12</sup> Pítaga Ántióka suwahpeq téh suraitaq Sísa tagariáh náhnsó kéreq moráráq táchutahururaire. Sémísiga eqmaq súátái Asíú kégá mitaq surowana Pítaga suro keyábé áhreéna nahnsó kebá moráráq íre táchutahururaire. Suro Asíú kégá mahra íwíahéra, Nahnsó kegá Sísansabé aiq pútare atehrara sene síú amurúrúahro íwíahurowe. Mira íwíahuronsabé abiahnsa atéhoéna Pítaga áhreéna nahnsó kebá mónkakáq moráráq íre táchutahururaire.

<sup>13</sup> Pítaga mi ahbabáq sánsá miraurainsabé mó Asiu kegá moq mina tahnsa urowe. Sene ahbabáq Páhnábása insoq atárówe.

<sup>14</sup> Segá aiq pútare ehweh íre tábúsoqme sehgirowana tagéna ómi míarotaq Pítansabé wene ahbabáqsabe ehweh atáráuge. Ínéga wensabé, Are Asiu anínéwé téh suronaraq Asiu kené sánsá íre sehgira peh nahnsó kené sánsá mirarurone. Minayabe amahnága árahinsabé nahnsó keyábé, Asiu kené sánsá sehgóro eno urauge.

*Sísansabé aiq pútare atéh ánímé Manikánka kaweqtaq míahne atéh éhwéhne.*

<sup>15</sup> Iteinoibo Asiu ke míáh púara ite maqítónsabe ite moq Asiu ke méq ahbabáq nahnsó ké íre míone, Írakaumo.

<sup>16</sup> Manikánka Mósísine ehweh sehgóriue sehgirowana puah kaweqtaq míahne atehro? Írakaumo. Ite aiq iahtebónawe peh morá Sísa Karáhénzabe aiq pútare atéh ánínsábé, Kaweqtaq míahne atéhre. Minayabe Manikánka, Kaweqtaq míahwe aitankeheéq Sísa Karáhénzabe aiq pútare atone. Mó morá áh íre kéhre. Írakaumo. Peh morá Sísa Karáhénzabe aiq pútare atonayabé Manikánka, Kaweqtaq míahwe aitéhre. Mósísine ehweh sehgóriue áninká moke mi ehweh íre sehgoráhire. Írakaumo. Minayabe Manikánka wensabé, Kaweqtaq míahne íre atéhre.

<sup>17</sup> Itega Sísa Karáhénzabe aiq pútare aitárótaq Manikánka, Kaweqtaq míahwe aitáráiraq anehemé nahnsó kegá ahbabáronserah Sísa Karáhégá ahbabáq áhwárehro? Írakaumo.

<sup>18</sup> Íné saiqnariéh sánsá súáhnaraq anehe mi sansá mó sehgióngaraqmé ahbabáq ani úkorahuge.

<sup>19</sup> Íné pusa ání tahnsa míógana Mósísine ehwehnka íné íre saiqnariéhre. Íre sehgoráhunka pusa ání tahnsa úkurauge. Manikánka, Oga míahno aintankeheéna pusa ání tahnsa úkurauge.

Sísa Karáhégá organúq intowe. Awankátaq táhpawé putiotaq íné moq wereq moráráq pukowana

<sup>20</sup> organúq intowe. Organúq intowana amahnága íné nuwahbeh iwíah íre mirauge. Írakaumo. Sísa Karáhégá nirupipeq mía míai puana we awahbeh iwíah sehgiúge. Manikánke ahninkáwágá ínénsabe arutaboiréna néne ahbabáqsabe pukú púana wensabé aiq pútare atena we awahbeh iwíah sehgiúge.

<sup>21</sup> Mósísine ehweh sehgóriue keyábé, Kaweqtaq míahwe arítéhtáq tahirímé Sísa Karáhégá pehipi pukú irino. Manikánka ínénsabe arutaboiraintéh púana inehopeq íre súóge.

<sup>1</sup> Kárétia marákórápéqté kéo, árahinsabé múguwahgu ke úkuroo? Sísa Karáhé awankátaq táhpawé putio ehwéh pahsuqme teiátáunaq írátówe. Amahnága péhe éhwéhnsábé aiq pútare atáhnsábé itega múguwahgu iwiáhowe. Inseréhga péhe éhwéh teiátóo?

<sup>2</sup> Peh morá kásé éhwéh teiníboq írátiáhro. Mósísine ehweh sehgirosabé Manikánka Wenawa iteba eqmatairo? Írakaumo. Sísa éhwéh ireq minayabe aiq pútare atárónsabé Manikánka Wenawa iteba eqmataire.

<sup>3</sup> Téh Manikáne Awanka ite séhréh aitárairaq kaweq sansánurowe. Amahnága mi sansá sueq, Iteriahríah kaweqtaq míahrahúne iwiáhoo? Mina tahnsa múguwahgu iwiáhwé árah iwiáhoo?

<sup>4</sup> Manikánka séhréh aitená sokigi aiátáime amahnága sueq anetaníbo iwiáhoo? Íné iwiáhume ite íre ibitagire.

<sup>5</sup> Manikánka Wenawa iteba eqmatairana ótaq sansá mirauraire. Mósísine ehweh sehgirosabé Manikánka Wenawa iteba eqmatairo? Írakaumo. Sísa éhwéh ireq minayabe aiq pútare atárónsabé Manikánka Wenawa iteba eqmataire.

<sup>6</sup> Minayabe Manikáne ehwehnka Ébáráhma éhwéh mahraréna,  
Wega Manikánsabe aiq pútare ato púana Manikánka wensabé, Kaweqtaq míahne atowe ire. *(Stat 15.6)*

<sup>7</sup> Manikánsabe aiq pútare atáh ké Ébáráhma kahnáh ké tahnsa úkowe. Minawé iahtebaho?

<sup>8</sup> Naho Manikánka iwiáhéna, Kaweq éhwéhnsábé aiq pútare atáh náhnsó kékéyáh, Kaweqtaq míahwe aritaníe úwe. Minayabe Manikánka Ébáráhmansabé kaweq éhwéh teawuwe. Wene ehwehnka Ébáráhmansabé mahraréna,

Arega miraónayabé moke mah marákó mårákóípéqté ké kaweraritaníe ire.\* *(Stat 12.3, 18.18, 22.18)*

<sup>9</sup> Ébáráhmaga Manikánsabe aiq pútare atowana kaweratowe. Mina únserah Manikánsabe aiq pútare atáh ké moke kawerarítéhre.

<sup>10</sup> Ínéga Mósísine ehweh sehgiúnsábé Manikánka aiq kaweraintankéhe iwiáho kewé wega kaweraritanabo? Írakaumo. Wega wene ehwehnka irarinserah mirainkehe. Wene ehwehnka mahraréna,

Mósísine ehweh sehgió ké moke mi ehwéh íre sehgiúnsábé Manikánka mi ke iraipéq eqmaq suanawire ire. *(Lo 27.26; Jeremaiá 11.3)*

<sup>11</sup> Manikáne ehwehnka mó mahraréna,  
Wensabé aiq pútare atéh ání Manikánka kaweratahnana oga mía míainkehe ire. *(Habakuk 2.4)*

Mi ehwéhká Mósísine ehweh sehgió kékéyáh aiq sokigi aiuwaq ite pahsuqme írátionawe Manikánka mi ke íre kawerarítéhre.

<sup>12</sup> Mósísine ehweh sehgie sansamé aiq pútare ate sansamé peh morá sánsápo? Írakaumo. Sehgíe sansa mó sansáne. Minayabe Manikáne ehwehnka mahraréna,  
Mósísine ehweh peh moke mi ehwéh sehgió ké kaweqtaq míahrahówe ire. *(Wok Pris 18.5; Nehemia 9.29)*

<sup>13</sup> Mósísine ehwehnka itereq moke wehukereq mi ehwéh íre sehgiúnsábé mahrarúwe. Mahraréna, Manikánka ite íre kaweraitanawire ire. Sísa Karáhéga ite séhréh aitanieéna awankátaq táhpagéna mah awíq meyomé Ahbabáq Anine. Mi awíq mewena itene ahbabáqsabe awankátaq táhpawé putawéna ite meirena kaweraitowe. Minayabe Manikáne ehwehnka mahraréna,

Awankátaq táhpawé putiéh ánímé Manikánka Ahbabáq Anine áwíratowe ire. *(Lo 21.23)*

<sup>14</sup> Manikánka Ébáráhma kaweratowe. Kaweratena wensabé, Nahnsó ke kaweraritaníe ú ehweh aiq pútaraginkeheéna Sísa Karáhéga itene ahbabáqsabe putiowe. Manikánka,

\* **3:8:** Manikánka teawu ehwehnabé Ébáráhmaga aiq pútare atena we Síane aigaqna úkúwe.

Néniwa wehukeba eqmaraníe únsabe amahnága Sísa Karáhénabe aiq pútare atáh kéká Wenawa eqmaréhre. (Esekiel 11.9; Jol 2.28-29; Sekaraia 12.10; Eqmaro 2.33)

*Mósíne ehwehnka Manikánka mirainauge ú ehweh íre meruahráhire i ehwéhne.*

<sup>15</sup> Néne iyahnabo anímáríno, itene sansánsábé iahreraq itena teiníe. Téhranítégá omaq maréhra ehwéhmé mó morá áninká mi ehwéh íre meruahráhire.

<sup>16</sup> Naho Manikánka Ébáráhmareq wenanahreqsabé omasa éhwéh irarúwe. Íre ómi wene anahwaréhyabe peh morá áninsábé irarúwe. Mi anímé Sísa Karáhée.

<sup>17</sup> Teiú éhwéh áwahe íráhro. Ebeq Manikánka Ébáráhmansabé omasa éhwéh irarúwana anehe áhnte opéq 430 opéq parabagútaq Mósíne ehweh sehiranúwe. Manikánka Ébáráhma teawu ehwéhmé Mósísiga sehiranú ehwehnká íre meruahráhire.

<sup>18</sup> Mósíne ehweh sehgironka Manikánka kaweraitéhtáq tahirímé wega Ébáráhma teawu ehweh abehrúki irino. Manikánka Ébáráhmansabé, Néne omasa éhwéh mirainauge ú púana Manikánka mi ehwéh aiq miraúwe.

<sup>19</sup> Aiq miraúnsabe Manikánka aneqsabé Mósísi iwíah atowana wega sehgóro ú ehweh sehiranú? Wehukega, Ite ahbabáq animári múne iwíahigeheéna Mósísinsabé sehiranúno iwíah atowe. Ébáráhmane anahwa íre tutaq mi ehwéhnká wahnahnaritankeheéna Manikánka Mósísinsabé sehiranúno atowe. Manikánka mi ehwéh íópeqté ké teriuwara sega mibeq mahbeq arito ání teawuwana ómi mó kegá tagageheéna sehiranúwe.

<sup>20</sup> Sehiranú anímé Mósísíéna mibeq mahbeq arito ani míowe. Maniká peh morá ánínéna Ébáráhma ehweh teawutaq mibeq mahbeq arito ání íre teawasa peh Ébáráhma webataq teawuwe.

*Mósíne ehwehnka ite íre saiqnarawéna wahnahnire i ehwéhne.*

<sup>21</sup> Mósísiga sehgóro ú ehwehnká Manikánka mirainauge ú ehweh kiotaikiro? Írakaumo. Íre kiotaikire. Sehgíro ú ehweh sehgráúnaga oga mía míáúnaraq tahirímé mi ehwéhnká ite kaweraitéh irino.

<sup>22</sup> Manikáne ehwehnka mahraréna,  
Ahhbabáqka moke mah kehiná kékíná saiqnariéhre (Aroma 3.9-19)  
ire.

Minayabe Sísa Karáhénabe aiq pútare atona ke Manikánka kaweraitena Wenawa eqmaraníe ú púana iteba eqmaréhre.

<sup>23</sup> Sísa Karáhénabe aiq pútare ate tanahráq íre surioaq Mósíne ehwehnka moke wehuke saiqnariowe. Awehraq tanáhráq Sísansabé aiq pútare atageheéna mi ehwéhnká naho wehuke saiqnariowe.

<sup>24</sup> Sísa Karáhénabe aiq pútare ate tanahráq íre surioaq Mósíne ehwehnka wahnahnúwe. Sísansabé aiq pútare atonayabé Manikánka kaweraitankeheéna Mósíne ehwehnka wahnahnúwe.

<sup>25</sup> Sísansabé aiq pútare ate tanahráq aiq awehraq kékhsábé Mósíne ehwehnka amahnága ite íre saiqnarawena wahnahnaitéhre.

*Sísansabé aiq pútare atonaga Manikáne anímári úqítéhre i ehwéhne.*

<sup>26</sup> Sísa Karáhénabe aiq pútare atonayabé Manikánka itensabé, Néne animári míáhwe aitéhre.

<sup>27</sup> Itega Sísa Karáhénabe aiq pútare ateq wání meraunaraq itereq wereq morá ání tahnsa úkuraune.

<sup>28</sup> Sísa Karáhénabe aiq pútare ateq wereq mía míáéq peh morá ání tahnsa ké úne. Asiu kereq nahnsa kereq arambehrriraq saiqnariáh kereq arambehriyabé ápeq méyah kereq wehreq ahrereq Sísa mía míáéra íre mó ke mó keéra peh morá ké úne.

<sup>29</sup> Ite Sísa Karáhénabe tagariáh ké púaq Ébáráhma kahnáh ké úkowana Manikánka Ébáráhma teawunserah ite kaweraitéhre.

## 4

*Ite Manikáne animári úkúne i ehwéhne.*

<sup>1</sup> Wenabo pukínaraq káriq anínká wenabone marakó wene ménsámehnsá awaq mena mi tanáhráq íre meyahráhire. We káriq aní púana peh arambéhri aní tahnsa míahnara mó kegá we wahnahnéra wene ménsámehnsánkaq wahnahnatáhwe.

<sup>2</sup> We anotah aní úkéna wenaboga omaq atéh tánáhráq wewega wahnahninkehe.

<sup>3</sup> Ite Sísa íre tagariaraunaraq pehgáriq animári tahnsa méq mina onserahnuraune. Owainawanseq wahnsawarinseqka ite saiqnarawéra wahnahnurowe.

<sup>4</sup> Awehraq tanáhráq Manikánka wenahni eqmarowana Asiu inínká we maqmarowana Asiu kené sánsánúwe.

<sup>5</sup> Mósísine ehwehnka saiqnario ke sabiruankeheéna Manikáne animári míageheéna tumíowe.

<sup>6</sup> Amahnága wene animári míona puana Manikánka wenahniné awa itene irupipeq eqmaréhre. Wenawanka iwíáh aitéhraq Manikánsabe, Iteriboe atone.

<sup>7</sup> Amahnága ite íre arambehrraq saiqnariáh ké tahnsa méq peh Manikáne animári míone. Ite wene animári míona puana Manikánka moke náina naneq náinkéhe.

*Poraga Kárétia keyábé iwíáh kikirú ehwéhne.*

<sup>8</sup> Menah ite Maniká íre tagariarotaq owainawanseq wahnsawarinseqka ite saiqnarawéra íre Maniká Iteriboga tahnsanue wahnahnaitárówe.

<sup>9</sup> Amahnága itega Maniká tagariáhwana wega ite tagariéhre. Tagariéh púaq aneqsabé owainawanseq wahnsawarinseqne sánsá sehgieyabe iuwahbehro? Se íre págegeowe. Segá íre séhréh aitaráhowe. Segá ite mó saiqnariéhboq aneqsabé sene sánsá sehgieyabe iuwahbehro?

<sup>10</sup> Itega mó wehekáh mó tanáhráqsábé iwíáh iwíáhqué awehriowe. Itega mó íónkakaq ópeqkakáq sínaraqsábé sánsánowe. Íre kawerowe.

<sup>11</sup> Mi sansánonsabé nirupipeq págege agire. Ínéga séhréh aító árámbéhríwé abehrúkinabo?

<sup>12</sup> Néne iyahnabo anímáríno, ínéga Asiu kené sánsánsábé iwíáhunserah iwíáhoro. Asiu kené sánsánká íné íre saiqnariéh púana ite menah míaronserahne míarauge. Iteba téh surautaq néne ehweh ireq íre ahqáho aintárówe.

<sup>13</sup> Mi tanáhráq nuwahreuraunsabé mitaq iteruwahpeq íre kótaikorahu puana kaweq ehwéh téh teiátáuge. Mina ahreraq matiaho?

<sup>14</sup> Ite iuwahrieh nuwáhréuraugaq itega íné íre kaqnúwátówe. Írakaumo. Maniká míéhrabeqte íopeqté ánínseq Sísa Karáhéreqka iteba suroyataq tahirí itega se kawerue mehwéh arítáró irino. Se kawerue mehwéh arítárónserah íné moq mehwéh aintárówe.

<sup>15</sup> Mi tanáhráq itega iwíáh iwíáhurowe. Amahnága aneqsabé túbáh agoo? Néne niura awahreuraunsabé irutaboirainteq itene iura meruqmaqme nienehe urotaq tahirímé níátó irino teniátówe. Mina iahreraq itena teiúge.

<sup>16</sup> Amahnága ite aiq pútaq ehwéh teiúnsábé íné itene naruo aní úkugo?

<sup>17</sup> Mó kegá itensabé ehnenehne aitera ite kawerue séhréh aitanéhe iwíáh íre owe. Itega néne ehweh sueq sene ehweh sehgieheéra itensabé ehnenehne aitáhwe.

<sup>18</sup> Íné iteba míótáqkákáq íre míótáqkákáq wehukega ite aiq pútaq séhréh aitanéhe iwíáhotaq tahirímé aiq kaweri irino.

<sup>19</sup> Néne iyahnabo anímáríno, kía míéh ínínká ani maqmianaitaq érinserah itensabé nirutaboirunka nirupipeq umehirana níéríre. Sísa Karáhégá iwíáhinserah itene irupipeq tábúsoqme iwíáhirataq nirupipeq eyoyóinae.

<sup>20</sup> Itega miraonsabé nirupipeq áhnte iwíáh kikiruge. Ite mó iwíáhigeheéna amahnága iteba méyabe nuwahbehre.

*Maqmio inítéyábé pabeqme ehwéhne.*

**21** Mósísine ehweh sehgieyabe iuwahbeh keo, mi ehwéhmé aiq kawerue iahtebaho?

**22** Manikáne sehiranka Ébáráhma éhweh teíre. Ébáráhmaga wene arambehri iní wenáwíq Égah abariúwana animai maqmarowe. Anehe Manikánka Ébáráhma teawena, Arene ahreurá orenínéna animai maqmiankéhe úwe. *(Stat 16.15, 21.2)*

**23** Wega irarúnka mó opéq mi orénínká animai maqmiowe. Minayabe se abahnináhnah míowana Manikáne ehwehnka aiq teíre.

**24** Mi inítéráq pabeqme ehwéhne. Mina maqmíoya inítewé téhtaré éhwéh tahnsanéna mahraue kéhre. Égahwe ebeqte éhwéh tahnsane. Moke wene animárimé saiqnariáh ké wóe.

**25** Árébia marákórápéqté sáwéh áwíq Sáináie.\* Égahwe mi sawéh tahnsane. Wereq wene animári saiqnariáh ké púana we moq mah marákóípéqté Sarúsarama suwahpeq tahnsáne.

**26** Mó iní, wene ahreurá íopeqté Sárúsárámawé iteruwahpeq mire. We iteino wíre. Wene animári ite íre saiqnariéh ké úne.

**27** Manikáne ehwehnka aiq mahraréna, Orahiníno, arupipeq eyoyóue míahno. Ani íre uwo uwoue maqmiyahna iníno, arupipeq eyoyóue iwíah íwíahúno. Áuwéh inímé áhnte anímárínseq míankehe. Wenawehqpa mía míai inímé peh táchmaro anímárínseq míagehe ire. *(Aisaia 54.1)*

**28** Néne iyahnabo anímáríno, Manikánka omasa éhwéh teawunka mi korénínká Áhísáhki maqmiowe. Mina inserah Manikánka omasa éhwéh teiátáinka ite wene animári úkue míone.

**29** Mi tanáhráq wenanoga pehipi maqmoi anímáigá Manikánka irarúnka maqmoi anímái áwíoqnówe. Mina únserah amahnága peh sinowaréhga maqmiáh kégá ite Manikáne Awanka maqitéh ké íwíoqnahwe.

**30** Íwíoqnahnsabé Manikáne ehwehnka mahraréna, Arambehri inínseq wenahninseq kaqsuo. Mi anínká Ébáráhmane ahreuráné ah-ninkáwáreq monseráhnue sibowáné náneq awaq miehneho. Awaq miehnehboq ebeq piah ahnínkáwáreq wenanoreq kaqsuo ire. *(Stat 21.10; Sóni 8.35)*

**31** Néne iyahnabo anímáríno, ite Sísa tagariona puaq arambehri inímé ite íre wene animári múne. Írakaumo. Ite wene ahreuráné animári múne.

## 5

### Wehukene sásánká ite saiqnariehneho i ehwéhne.

**1** Mósísine ehwehnka saiqnariarairaç Sísa Karáhénçabe aiq pútare ataráúnaga ite sabi iuwátáire. Mi ehwéhká móñkakáq saiqnariehnehboq peh morá Sísansabé aiq pútare ate sansanoro.

**2** Íné Poraga teiníboq írátíáhro. Asiu kegá síú amurúráhnserah itega itene íú amurúráhnaraç Manikánka itensabé, Kawerowe aitankéhe íwíáhoo? Mira íwíahirataç Sísa Karáhéga miraú arámbéhrígá ite íre séhréh aitahráhire.

**3** Mónkakáq teiníboq írátíáhro. Asiu kené síú amurúráh sásá miraonehe íwíahirataç moke Mósísine ehweh sehgióro aitankéhe.

**4** Mósísine ehweh sehgióneheqmúne íwíáho keo, mira íwíáhonka Sísa Karáhéga séhréh aiteth sásá aiq súáhwana wega íre séhréh aitéhre.

**5** Sísa Karáhénçabe aiq pútare atonayabé Manikáne Awanka séhréh aitéhrana Manikánka, Kaweqtaç mía míaowe aitankéhe. Itega mira íwíáhéq áwénunúne.

**6** Sísa Karáhéreq mía míao kegá síú amurúráh sásánkákáq síú íre amurúráh sásánkákáq monseráhnire. Mi sansátáré mirairanka íre séhréh aitahráhire. Peh morá Sísansabé aiq pútare ateq mó keyábé irutaboiro sansánká séhréh aitahráhire.

\* **4:25:** Manikánka sehgióro ú ehweh Sáinái sawéhrápéq Mósisi teawuwana sehiranúwe.

<sup>7</sup> Menahmé itega aiq pútaq sansá kawerue sehgirowe. Mi sansá súáhro insega teiena pagu pagunurairo?

<sup>8</sup> Minawé íre Maniká, ite omaq itárái anínká iwíáh aitárái ehwéhne. Mó iwíáhigeheéna aneq ehwéh teiníkono?

<sup>9</sup> Iteriborehga mah pabéqmé éhwéh iraréra, Párawahipéq pehgáriq muoráhi naneq maréhrataq mi paráwáh moke muinae ewe.\*

<sup>10</sup> Péhe éhwéh irari anínká mó ehwéh teínsábé itene irupipeq iwíáh kikirowe. Mi pehe éhwéhni aní insebómo. Manikánka we tagéna kamah awinkéhe. Itene Wahnahnka séhréh aitahna puaq péhe éhwéh sueq ínéga teiú éhwéh mó nkakáq sehgioneheqmóe íwíáhuge.

<sup>11</sup> Néne iyahnabo anímáríno, Manikánka kawerowe aitankéhboq itene iú amurúráhro tei teinutaq tahirímé mó kegá íre níwíoqnah irino. Sísa Karáhéga itene ahbabáq kaqsuena ite kaweraitanieéna awankátaq táhpawe putio ehweh tei teinunsabé mó kegá abiahnsa aintera níwíoqnahwe.

<sup>12</sup> Itene iú amurúráhro tei teino kegá seyene áwáhnta pirúéhrataq aiq kawerinae.

#### *Mó keyábé irutaboiréq we séhréh atéhoro i ehwéhne.*

<sup>13</sup> Néne iyahnabo anímáríno, mó naneqka ite íre saiqnariankeheéna Manikánka itensabé, Ínéba sero ue omaq itáráire. Mó naneqka ite íre saiqnariéhnsábé ite iuwahbeh sansá íre kaweq sansá pehipi miraoneheqmúne íwíáhiyehboq peh mó keyábé irutaboiréq we séhréh atéhoro.

<sup>14</sup> Mósísiga sehgóro ú ehweh áwahewé Sísaga aiq mahraréna, Arerensabé iwíáhue arutaboirónanserah mó keyábé moq iwíáhue arutaboiroro.

<sup>15</sup> Póéráhqka tópah nehtaq mó áwáhu poeráhq pawe kaqsúéh serahniyeho. Mirairataq tobhue kobeq séberiyehboq kawerurero.

#### *Manikáne Awanka iwíáh aitéhnserahnoro i ehwéhne.*

<sup>16</sup> Teiníboq írátíáhro. Manikáne Awanka iwíáh aitéh serahnoro. Manikáne Awanka iwíáh aitéh iwíáh sehgírataq itene irupipeqté áhbábáq iwíáh íre sehgioneheqmóe.

<sup>17</sup> Itene irupipeqté áhbábáq iwíáhákáq Manikáne Awanka iwíáh aitéh iwíáhákáq íre monseráh púana tobéhinonóye. Minayabe ite iuwahbeh sansá íre miraorahowe.

<sup>18</sup> Manikáne Awanka iwíáh aitéh iwíáh sehgírataq Mósísine ehwehnka ite íre wahnahnaitahráhire.

#### *Irupipeqté áhbábáq iwíáhgá miraúna sansánsábé éhwéhne.*

<sup>19</sup> Itene irupipeqté áhbábáq iwíáhgá mirai sansá tagaríáhwe. Mahna tahnsane. Mó aníné ahre weh abariéwé, íre kaweq iwíáhwé, ahbabáq sansamé,

<sup>20</sup> péhepehe maníkánsábé iwíáh iwíáh atewé, ánégiewé, ebehwe, tobéhwé, ehwehwé, mó anínsábé aru págege atewé, ménsámehnsánsabe aigará pabekime, abiahnsa atewé, peh morá arerensabé iwíáh iwíáhewé, sainkéwé,

<sup>21</sup> mó keyábé íre kaweq iwíáh aritewé, píah néra múguwahgu agéwé, píribahriwe, ahriahri ehwehwé, irupipeqté áhbábáqká moke mahna tahnsa ahbabáq áhwárehre. Menah teiátáu ehwéh mó nkakáq teiníe. Mina tahnsano ke Manikánka wahnah wahnah-nirabeq íre kioráhowe.

#### *Manikáne Awanka iwíáh aitéhnsábé éhwéhne.*

<sup>22</sup> Manikáne Awanka iwíáh aitéh sánsámári teiníe. Mó keyábé arutaboiréwé, aru eyoyówé, aru ukiqme méwé, uwáréqme méwé, séhréh atewé, tábúsoqme ah nogewé, tábúsoqme arámbéhriewé,

\* **5:9:** Mi pabéqmé éhwéh áwahe mahrarúwe. Mina inserah itene irupipeq pehgáriq íre kaweq iwíáh kahnaraq mótaq anotah ahbabáq úkinae. Ahwa kené pabeqme ehwéhmé mahna tahnsa kékre. Uwaruntútaq pehgáriq irá kekiaráhtáq apubúue anotah irárehre.

<sup>23</sup> mó ke suwahbeh sansá miraéwé, we awahbeh sansá suena kaweq sansánewé, minawari moke Manikáne Awanka iwíáh aitéh sánsáne. Sehgíoro i ehwéhnká mah kawéq sánsá íre ahqáho aitahráhire.

<sup>24</sup> Sísa Karáhé tagaríah kégá iwíáhést Sísa pukú awánkátaq itene irupipeqté áhbábáqsábé iuwahbeh iwíáhwé, igará pabeki iwíáhwé aiq sutause.

<sup>25</sup> Manikáne Awanka organúq ítárái puaq wega iwíáh aitéhnsábé sehjioneheqmúne.

<sup>26</sup> Mó ke kiotaikuge éq píribahriyeho. Mó ke ahbabárarítého. Mó kené ménsámehnsánsabe igará pabekíneho.

## 6

### *Iteite we séhréh atéhoro i ehwéhne.*

<sup>1</sup> Néne iyahnabo anímáríno, Sísa tagaríeh áninká ahbabáréna Sísane sánsá suena peh túbáh agínawe íre kawerire. Mi áninká mónkakáq Sísane sánsá kawerue sehginkeheéq ite Manikáne Awane sansá tábúsoqme sehgió kégá mi aní pehwehrue séhréh atáhro. Owainawanka ite moq ahbabáq iwíáh aitehnehboq kawerurero.

<sup>2</sup> Iteite we séhréh atéhést aru ukiq átéhoro. Mirairataqmé Sísa Karáhéga sehgióro i ehwéh kawerue sehgoráhowe.

<sup>3</sup> Pehgáriq aninká iwíáhéra, Íné anotah aní múge ime wewensabé péhe iwíáhire.

<sup>4</sup> Ómiga wene wene arambehri tagéra, Aiq kawerugapómo éra iwíáhue tagahro. Arerene arambehriq mó aníné arambehri kiotaikínayabé iwíáh iwíáhiyehboq peh morá arerene arambehriyabé iwíáh iwíáhoro.

<sup>5</sup> Minayabe arerene arambehri kawerue sehgio.

<sup>6</sup> Manikáne ehweh áwáhnorinana íréh áninkáwé moke kaweq naneq áwáhnori aní náwino.

### *Kaweq ayúnkákáq íre kaweq ayúnkákáqsábé pabeqme ehwéhne.*

<sup>7</sup> Péhe iwíáhiyehboq tábúsoqme iwíáhoro. Manikánsabe anetaníbo iwíáho ke kamah arinawire. Wehukenínká abehq naneq ayú uqmarahnaraq íre kaweq será iyanae. Kaweq naneq ayú uqmarahnaraq kaweq será iyanae.

<sup>8</sup> Mina inserah arene arupipeqté áhbábáq iwíáh sehginaraq kaweqtapéq íre awaqme iraipéq pokiniewóne. Manikáne Awanka iwíáh atéh iwíáh sehginaraq oga mérapeq awaq miankéhe.

<sup>9</sup> Kaweq sansánéq arambehri túbáh agiyehboq mi sansá íre susa peh kawerue sehírataq Manikánka sainsuahna tanáhráq kagai apéq náinkéhe.

<sup>10</sup> Minayabe séhréh arite tanáhráq kahnaraq ómi kawerarítáhro. Sísa tagaríah ké anotahtaq séhréh ariteq kawerarítáhro.

### *Poraga Sísa awankátaq táhpagúnsabe iwíáh iwíáh ú ehwehne.*

<sup>11</sup> Moke mahna parabarúó éhwéhmé ínéga peh ehweh teawúgana mó aninká sehiranéwéhre. Amahnága ínénéga sehirankara mewe mah pahsí sehiranue parabaruanié. Néne anotah sehirá tagahro.

<sup>12</sup> Síú amurúráh kégá peh wehuke suwahbeh sansánsábé iwíáh iwíáhéra íú amurúráhro aitera pagu pagunowe. Pagu pagunéra peh morá Sísa awankátaq táhparó ehweh teri terinotaq tahirímé mó Asiu kegá síwíoqnah irino.

<sup>13</sup> Síú amurúráh kégá Mósísine ehweh moke íre sehgiro peh ákáhtaq sehgirowe. Itega íú amurúráhro e ehwéh sehírataq sega iwíáh iwíáhigehe. Itene ehweh kawerue sehgiówe éra iwíáh iwíáhigeheéra ite pagu pagunowe.

<sup>14</sup> Ínéga mirauraunsabé íre iwíáh iwíáhéra peh morá Sísaga miraúnsabe iwíáh iwíáhinauge. Sísa awankátaq táhpawé putionka mah marákóípéqté sánsánsábé néne iwíáhipeq aiq sutauge. We putio tanáhráq íné moq pukuraunsabé mah marákóípéqté sánsá sehgieyabe íre nuwahbehre.

<sup>15</sup> Síú amurúruáh sánsánsábé íre iwíáh íwíáhorahi naneq mire. Síú íre amurúruáh sánsánsábé moq monserahnire. Peh Manikáne Awanka wehukeníné arupipeq kawer- atéhrana o aní úkinsabé minawé anotah iwíáh íwíáhorahi naneq mire.

<sup>16</sup> Manikánka mi iwíáh sehgó ké wene animáriñsábé arutaboiréna siru ukiq sitéhre. Mi ke aiq pútaq Ísara kahnáh móe.

<sup>17</sup> Mó kegá niru págege aintéhoéna ínéwé Sísane arambehriu aní ména wene sánsá sehgiráuge. Mirauraunsabé mó kegá nubiq matowana ninonkataq náonabí kéhre.

<sup>18</sup> Néne iyahnabo anímáriño, itene Wahnah Sísa Karáhéga séhréh aitéhre. Aiq míre.

## Épésa Ebeq sáhnsahwe ahrebé ehwehne.

Poraga Épésa suwahpeq mó opéq mó opérue kosíwáhnorúwe. Anehe we Aroma suwahpeq karábúsiipéq míotaq wega mah pahsí sehiranéna Tíkíkúsi awuwana wega Épésa suwahpeq Sísa tagariáh ké mewe móriewe. Mah pahsí áawahewé Maniká tagariáh ké moke morá íwíáhue peh morá ké tahnsa míagehe teíre. Manikánka wene kaweq sansá sokigi ariuwe teíre. Weh ahre kawerue míageheéna teíre. Anehete éhwéhmé owainawa kiotaikorahúna ehwéh teíre.

*Poraga Épésa suwahpeqte ké siu pahsíe.*

<sup>1</sup> Épésa suwahpeqte kéo, íné Poraga sehiranu pahsí sáhnsahwe tagahro. Ite Manikáne animári méq Sísa Karáhéne sansá kawerue sehgówe. Sísa Karáhé éhwéh síwáhnorinkeheéna Manikánka we awahbeh sansánéna omaq intena eqmaq nuwowe.

<sup>2</sup> Maniká Iteriboreq itene Wahnah Sísa Karáhérareqka ite séhréh aitera iru ukiq itehye.

*Manikánka ite Sísa tagariona ke áhnte kaweq naneq nái náini ehwéhne.*

<sup>3</sup> Itene Wahnah Sísa Karáhéne abowá Manikánsabe íwíáh íwíáh atone. Ite Sísa Karáhérareq mía míáunayabé Maniká Iteriboga ite págege aitankeheéna moke íópeqté kaweq naneq nái náinire.

<sup>4</sup> Manikánka mah marákó márakó íre mirarotaq wereq Sísa Karáhérareqne animári míageheéna omaq itowe. Wega tagehtaq íre ahbabáq ke méq peh kaweqtaq mía míageheéna omaq itowe.

<sup>5</sup> Mah marákó márakó íre mirarotaq Manikánka itensabé anotahtaq arutaboiréna we awahbeh sansánéna íwíáhue omaq itowe. Wega íwíáhéná, Sísa Karáhégá miraínaga wensabé aiq pútare ataneherao ke néne animári úkigehe íwíáhúwe.

<sup>6</sup> Wene arutaboiri ahnínkáwágá miraúnsabe Manikánka anotahtaq séhréh aitena wáh kaweraitowe. Minayabe Manikánsabe, Anotah aní móne ateq wenawíq pankereq íwíáh íwíáh atone.

<sup>7</sup> Sísa Karáhégá ite meirena itene ahbabáq kaweraitanieéna putiotaq wene korahq tuwe. Wega miraúnsabe Manikánka anotahtaq arutaboiraitena itene ahbabáq sabi iuena insahwé aitowe.

<sup>8</sup> Insahwé aitena anotahtaq arutaboiraitena itensabé, Ahrebia ánimári méq tábúsoqme íwíáhoraho ke míáhro aitowe.

<sup>9</sup> Sísa Karáhégá miraúnsabe Manikánka naho mirainauge ú íwíáh we awahbeh íwíáh íre teiasa peh amahnága teíre.

<sup>10</sup> Awehraq tanáhráq sínaraq Manikánka moke miraú naneqmarí soruparankéhe. Moke íópeqté naneqkakáq mah marákó márakóípéqté naneqkakáq soruparená Sísa Karáhénabe, Minawari moke wahnahnúno atankéhe.

<sup>11</sup> Manikánka moke wene arambehri pehipi íre miraia ebeqme tábúsoqme íwíáhéná anehe miraire. Miraue tábúsoqme íwíáhéná ite Sísa Karáhéraq méq wene animári míageheéna Manikánka íwíáhue omaq itowe.

<sup>12</sup> Ite Asiu kegá Sísansabé téh aiq pútare ateq wene sánsá sehgjune. Itega, Maniká téhrehnka inserahni aní ména págege aní míéhre ateq wensabé íwíáh íwíáh atageheéna ite omaq itowe.

<sup>13</sup> Itega moq aiq pútäq ehwéhmé ite kaweraitahráhi ehwéh írátótaq Sísa Karáhénabe aiq pútare atárówana Manikánka Wenawa iteba eqmataire. Manikánka, Sísansabé aiq pútare atéhra kebá Néniwa eqmaraníe únsabe wene kaweq ánimári míageheéna Wenawa iteba eqmataire.

<sup>14</sup> Manikáne Awanka itereq mía puaq Manikánka náiníe i naneq náinawire aiq tagarione. Wega kaweraitárái puaq mókake weba míaéq moke kaweq naneq meyaneheqmúne éq áwénunúne. Áwénunéq wensabé iwíah íwíah atone.

*Poraga Épésa suwahpeqte kékabé púrerarito ehwéhne.*

<sup>15</sup> Ínéga írátíomé itega itene Wahnah Sísansabé aiq pútare ateq Maniká tagaríah kékabé irutaboirowe. Itega irutaboiro ehwéh irena

<sup>16</sup> Manikánsabe kaweróne ata ataéna íre túbáh aguge. Púrerutaq itensabé niahreraq matawéna ite éhwéh Maniká Iteribo teawa teawanuge.

<sup>17</sup> Itene Wahnah Sísá Karáhéne Manikánsabe púrerue kaweq iwíah arito teawúge. Itega Manikáne sansá kawerue ahteborgeheéna wensabé, Arene sásá sokigi ario teawúge. Maniká Iteribo kiotaiki aní ména anotah tehrehnkakáq ání míéhre.

<sup>18</sup> Itega áwénunúna naneqme áhnte kaweq naneqme awaq miageheéna Manikánka ite omaq itowe. Minayabe kawerue tagariageheéna Manikánsabe, Itene irupipeqté iúrá tagahro arito teawúge.

<sup>19</sup> Itega Manikáne págege arámbéhrí íre agehgamarahráhúne. Wensabé aiq pútare atona ke Manikánka anotahtaq págege aitena séhréh aita aitaire. Minayabe itega ahteborgeheéna púreruge.

<sup>20</sup> Sísá Karáhé pukúwana Manikánka we iriwe organúq atena págege atena íópeq wene ayah púpeq tútuue míahno atonserah ite moq págege aitena séhréh aita aitaire.

<sup>21</sup> Sísá Karáhéga moke wahnah kereq anotah anímárnseq íópeqté kéné wahnah kereq págege kereq kiotaikire. Wenawíqka moke mó ke síwíq kiotaikire. Amahnágaákáq mókakeakáq wenawíqka peh kiotaikinae.

<sup>22</sup> Manikánka Sísansabé, Moke wahnahnúno atena moke íné tagaríah ké auráq matawé wahnahnarito atowe.

<sup>23</sup> Moke we tagariona ke Sísá Karáhéne anonka tahnsá miónana we itene iyahqno tahnsa míéhre. Wega Maniká tagariona ke auráq matawéna wahnahnaitéhre. Wega moke kéh náneq miraue náiena wahnahnire.

## 2

*Manikánka ite iriwe organúq itena Sísareq wahnahnoro aito ehwéhne.*

<sup>1</sup> Menah itega Manikáne ehweh anterueq ahbabáq aruqarurowe. Itene ahbabáqka ite subiq sutairaq ite pusa ké tahnsa míarowe.

<sup>2</sup> Mi tanáhráq itega mah marákóipéqté áhbábáq sásá sehgieq owainawamaríné wahnahne sásá sehgirowe. Mi ahbabáq wáhnáhnká moke Manikáne ehweh anterúah ké aiq saiqnariéhre.

<sup>3</sup> Menah itega moq Manikáne ehweh anterúah kégá ahbabáro serahnuraune. Itene irupipeqté iuwahbeh iwíahga aiq saiqnariéh púaq itega irutaboiro sansánkákáq ite iuwahbeh iwíahkákáq sehgirowe. Mi sansámári sehgieq Manikánka ahbabáq ke kamah aritahna naneq ite moq meyahráhuraune.

<sup>4-5</sup> Itega wene ehweh anterutauna puana itene ahbabáqka ite iubiq sutainsabé ite pusa ké tahnsa míaraune. Peh pusa ké tahnsa míaraunaraq Manikánka itensabé anotahtaq arutaboiraitena kaweraitena organúq ítáráire. Organúq ítáráinsabé Sísá Karáhéreq mía míáune. Manikánka séhréh aitowaq Sísansabé aiq pútare atáráúnayabé ite kaweraitáráire. Peh morá Manikánka arutaboiraitéh sásánká ite meirena kaweraitáráire.

<sup>6</sup> Manikánka Sísá Karáhé iriwe organúq atotaq ite moq wereq iriwe organúq itena Sísá Karáhéreq íópeq tútuue wahnahnoro aitowe.

<sup>7</sup> Sísá Karáhéga miraúnsabe Manikánka ite iwíahéna mi kawéq sásá miraúwe. Manikánka árahinsabé miraúwo? Wega ite ómi keyábé anotahtaq arutaboiraito sansa

pahsuanieéna miraúwe. Mókake mó tanáhráq mó tanáhrárue ahriahri mina aiq ahtebage-heéna ite organúq itena Sísa Karáhéreq íópeq tútuue wahnahnoro aitowe.

<sup>8</sup> Itega Sísa Karáhénabe aiq pútare atárónsabé Manikánka ite anotahtaq arutaboirait-ena ite meirena kaweraitáráire. Íre iteitega mirauronka kaweraitáráire. Írakaumo. Manikánka wáh kaweraitáráire.

<sup>9</sup> Íre iteitega arambehriuronka kaweraitáráire. Minayabe iteíwíq íre pankerahráhowe. Írakaumo. Itega mirauronsabé íre iwíáh íwíáhorahowe.

<sup>10</sup> Sísa Karáhéga miraúnsabe Manikánka ite organúq itena we awahbeh arámbéhrí miraigeheéna omaq itena mi arámbéhrí kawerarowe.

### *Sísaga miraúnka ite morá ké tahnsa míone i ehwéhne.*

<sup>11</sup> Ite íre Asiu ke peh nahnso ke míáhwe. Asiu kegá sene síu amurúruera ite tagéra, Síú íre amurúráh ké wóe aitárówe. Ite nahnso ke méq Sísa íre tagariaro ke míaro tanáhráqsábé iwíáhoro.

<sup>12</sup> Mi tanáhráq itega Sísa Karáhé íre tagariarowe. Asiu kené naruo méq Manikánka mirainauge ú ehweh, wene omasa éhwéh íre írátówe. Itega mah marákóípéqté sánsá sehgieq Maniká Iteribo íre tagariarowe. Mókake Manikánka kaweraitanawire íwíáh íre urowe.

<sup>13</sup> Ite wáhnaupéqté ké míarotaq Sísa Karáhéga ite kaweraitanieéna putiowana wene korahqka insahwé aitowaq amahnága ite Sísareq mía míaq íre wáhnaupéqté ké míáhwe.

<sup>14</sup> Menah Asiu kegá nahnso keyábé, Iuwahriehre arítárówara nahnso kegá moq Asiu keyábé, Iuwahriehre arítárówe. Kuri ogirahrue kéhnserah Asiu kereq nahnso kereqne suwahrieh iwíáhgá kuri tahnsá ógírahq kowana Sísa Karáhéga ómi itene ahbabáqsabe pukúnka mi kuri saweyuena iru ukiq itowe.

<sup>15</sup> Sísaga miraúnsabe ite morá ké míonana Mósísiga sehgóro ú ehwehnká wehuke íre saiqnariahrahire. Sísaga miraúnka Asiu kereq nahnso kereq insahwé aitenasabé, Ínéreq mía míaq morá ké míáhro aitowe.

<sup>16</sup> Wega itene ahbabáqsabe awankátaq táhpawe pukútaq itene iuwahrieh íwíáh kaqui-uwena Asiu kereq nahnso kereq insahwé aitenasabé Manikápa móitowe.

<sup>17</sup> Menah Asiu ke Manikánseq wahtotaq míarowaq ite nahnso ke íre wahtotaq míarowe. Sísa Karáhéga séna insahwé aite ehweh ite nahnso kereq Asiu kereq iru ukire ehweh teiteinuraire.

<sup>18</sup> Sísa Karáhéga nahnso kereq Asiu kereq kaweraitena Manikáne Awa iteba eqmaq áuwátáiraq ite Maniká Iteriboba kowíahrahüne.

### *Ite Manikáne nah tahnsa müne i ehwéhne.*

<sup>19</sup> Minayabe ite nahnso ke íre wáhnaupéqté ké míáhwe. Írakaumo. Ite peh Manikáne animári méq wenkahnáh míáhwe.

<sup>20</sup> Ite Manikánka píeh náh tahnsa míáhwaq ite eqmaq iuwátái kereq Manikáne ehweh iraru kereq nahwiahnsanse tahnsá míonana Sísa Karáhé wahq tahnsa míéhre.

<sup>21</sup> Abogéh awanká wahqtáq kawerue táhpawe kéhnserah ite Sísareq mía míaonehe. Manikánka píeh náh púana anotah nah kanae. Peh wewene kaweq nahne.

<sup>22</sup> Manikánka itereq moke mó we tagariáh kereq moráráq sorupaitáráiraq ite wene kaweq nah míone. Wereq Wenawanseqka mi nahupéq mía míaóye.

## 3

### *Poraga Sísa éhweh nahnso ke koreriu ehwéhne.*

<sup>1</sup> Íné Pora Sísa Karáhéne arambehriu anínéna ite nahnso ke séhréh aitáráunsabé mó kegá karábúsiipéq móíntárówe.

<sup>2</sup> Manikánka ite nahnso ke séhréh aitankeheéna wega ínénabe arutaboiraintena omaq intena, Kosíwáhnorúno aintaráime írátówe.

<sup>3</sup> Asiu kereq nahnso kereq morá ké úké ehwehmé nahomé kopípéq kowe. Menah Manikánka mi ehwéh teniátáirana minayabe métáq mah pahsíípéq pehgáriq ehwéh sehiranue aiq teiewóge.

<sup>4</sup> Sísa Karáhéga Asiu kereq nahnso kereqsabé mirainaú arámbéhrí nahomé kopípéq kowaq itega néne pehgáriq ehwéh kawerue sáhnsahírataq íné Poraga Sísa Karáhéga miraú arambehri aiq kawerue ahtebehre íwíahigehe.

<sup>5</sup> Naho Manikánka mi kopéqté éhwéh wehuke íre teiasa peh amahnága Manikáne Awanka mi iwíáh aitéhraq Manikánka eqmaro kereq wene ehweh irare kereqka irone.

<sup>6</sup> Naho kopípéq ko ehwéhmé pahsuqme teiníboq íráhro. Amahnága Manikánka íre peh morá Asiu ke kaweraitéhre. Sísa Karáhé éhweh ireq wensabé aiq pútare atona kewé Manikánka moke kaweraitéhre. Moke kaweraitéhre púaq Sísansabé aiq pútare atona kewé nahnso kereq Asiu kereq peh morá ké míone. Sísa Karáhéga miraúnsabe Manikánka náinie i naneqmarí ite ómi morábí awaq mianéhe.

<sup>7</sup> Manikánka ínénabe arutaboiraintena omaq intena, Mah kawéq éhwéh kosíwáhnorúno aintowe. Mi arámbéhrí kawerue mirainkeheéna Manikánka págege aintena séhréh ainta aintaraire.

<sup>8</sup> Moke Manikáne arambehrio kegá íné kiotaikowana Manikánka ínénabe arutaboiraintena séhréh aintéhre. Íre ínénéga kaweq arámbéhríuraunka Manikánka o arámbéhrí niátáire. Írakaumo. Wewega iwíahéna ínénabe, Sísa Karáhé éhweh kosíwáhnorúno éna eqmaq núwátáire. Sísawe áhnte matiéh ání míéhrana mina matiéh náneqme íre sáhnsahoráhire.

<sup>9</sup> Manikánka moke ménsámehsánkakaq wehukeakáq mirarena wega mirainauge ú iwíáh naho íre teiasa peh kopípéq kowe. Peh kopípéq kowana amahnága wehukega wene iwíáh ahtebageheéna kosíwáhnorúno aintaráire.

<sup>10</sup> Naho Manikáne iwíáh peh kopípéq kowara amahnága ite Asiu kereq nahnso kereqka morárág momiwíue wensabé iwíáh iwíahúne. Iwíáh iwíahúnara íópeqté anotah anímárinseq mibeqté wáhnáh kereqka ite tagéra Manikáne ahtebia iwíáh ahtebéra iwíáh iwíahigehe.

<sup>11</sup> Manikánka naho iwíahéna, Mókake Sísa Karáhéga miraína arámbéhrígá wensabé aiq pútare atáh kewé Asiu kereq nahnso kereq peh morá ké míagehe úwe. Amahnága mi arámbéhrí aiq parabarúéhre.

<sup>12</sup> Itene Wahnah Sísa Karáhénabe aiq pútare ateq wereq mía míáune. Mía míáunayabé we Maniká míéhrabeqte áh púana Manikánsabe íre áhreia wensabé itene iwíáh teawa teawanúne.

<sup>13</sup> Amahnága teiúmé ite séhréh aítónsbé mó kegá níwíognahnsabé iwíáh kíkíriyeho. Minayabe ireq túbah agiyehboq ite séhréh aító púaq Sísane sánsá kawerue sehgióro.

### *Épésa kegá Sísane sánsá kawerue sehgiheheéna Poraga púrerarito ehwéhne.*

<sup>14</sup> Manikánka áhnte miraurai naneqsabé iwíahéna nirehunseraráq ména Maniká Iteribonsabé iwíáh iwíahéna púreruge.

<sup>15</sup> Maniká Iteribowe moke Sísansabé aiq pútare atáh kéné Sibowá míéhre. We mah marákóípéqté kereq íópeq pokó kereqne Iteríbo míéhre. Wega ite moke íwíraitéhre.

<sup>16</sup> Manikámé áhnte kaweq naneq matiéhre. Minayabe ínéga wensabé, Arenawanka ite séhréh aitena págege aitankeheéna púreruge.

<sup>17</sup> Itega Sísa Karáhénabe aiq pútare atáh púana wega itene irupipeq mía míaire.

Awanká ánúqka marákóipeq íre wahto túírana mi awánká págegeue kéhnserah itega mó keyábé irutaboirirataq Sísane sánsá ambubu atawéq kawerue sehgióro.

<sup>18</sup> Sísa Karáhéga itensabé anotahtaq arutaboiraitéhre. Wega íre pehgáritaq arutaboiraitena peh anotahtaq arutaboiraitéhre. Itereq moke mó Maniká tagariáh kereqka minayabe ahtebageheéna itensabé púreruge.

<sup>19</sup> Wega arutaboiraitéh sánsámé anotah sansá púaq minayabe itega íre moke ahtebahrahúne. Mi sansánkákáq wene moke mó sansánkákáq ahtebageheéna itensabé púreruge.

<sup>20</sup> Manikánka págegeue séhréh aitená áhnte miraorahire. Wega miraorahinka itega iwíáhue púrerona naneq kiotaikire.

<sup>21</sup> Sísá Karáhéga miraúnabe ite we tagariona kegá momiwíeq amahnágákáq mókakeakáq ahriahri Manikánsabe iwíáh iwíáh ataneheqmúne. Aiq míre.

## 4

### *Ite Maniká tagariona ke Sísá Karáhéne anonka tahnsá míone i ehwéhne.*

<sup>1</sup> Íné Poraga itene Wahnahne arambehri mirauraunsabé karábúsiipéq móíntárówana mahtaq míónsábé néne ehweh kawerue íráhro. Manikánka ite omaq itena kaweraitáraínsabé we awahbeh sansá tábúsoqme sehgióro.

<sup>2</sup> Píribahri ke míehboq ahriahri peh uwaresa ké méq pehwehrue míáhro. Wensabé wensabé arutaboiréq we séhréh atéhoro.

<sup>3</sup> Manikáne Awanka iru ukiq ítéhnsábé mó iwíáh mó iwíáhiyehboq peh morá iwíáhoro.

<sup>4</sup> Manikánka omaq itowaq minayabe, Mókake moraráq kaweqtapéq awaq mianéhe iwíáhúne. Mira iwíáhúnayabé ite peh morá ké úkuraune. Manikáne Awame peh morá áníne.

<sup>5</sup> Itene Wahnah moq peh morá áníne. Wensabé aiq pútare ate sansa moq peh morá sánsáne. Wenawírue wání meona sansá peh moráe.

<sup>6</sup> Manikámé peh morá áníne. We mah kehiná kékínáné Iteribo ména itetaq moke wahnahnéna ite míonarabeq arambehriéna moke itene irupipeq míéhre.

<sup>7</sup> Sísá Karáhéga wene arambehriraq ite sainsúéhnserah itega kawerue miraigeheéna wega ite mó aní mó anínue íopeqté naneq náiená págege aitéhre.

<sup>8</sup> Minayabe Manikáne ehwehnka mahraréna,  
Wega íopeq kiutaq áhnte saiqnarito ke meriqmena móritena wehuke wene arambehriraq sainsuena íopeqté naneq náriená págege arítéhre ire. *(Buk Song 68.18)*

<sup>9</sup> Íopeq kiu ehweh áwahewé Sísá Karáhéga íre peh íopeq kiuwe sokigi aíre. Írakaumo. Téhwe we marakóipeq tumíowe.

<sup>10</sup> Marakóipeq tumío anínká iriwe ména íopeq kiwéna moke íopeqkákáq mah marákó mårákóákáq wahnahninieéna kiuwe.

<sup>11</sup> Sísá Karáhéga wene arambehri sainsúéhre. Wega mó keyábé, Eqmaro kene arambehri miraoro aitená mó keyábé, Manikáne Awanka sokigi arí éhwéh pahsúáh ké míáhro aitená mó keyábé, Nahnsó ke su wahpeq Manikáne ehweh koreri sererinoro aitená mó keyábé, Íné tagariáh kéráq wahnahné arámbéhríoro aitená mó keyábé, Manikáne ehweh síwáhnoré arámbéhríráq ítéhre.

<sup>12</sup> Ite Maniká tagariáh kégá Sísá Karáhéne arambehri kawerue miraigehe aitéhre. Sísá Karáhé tagariáh ké págege aitená kaweqtáq mía míageheéna wega mi arámbéhríwárítáq wahnah ke sainsúéhre.

<sup>13</sup> Ite Sísá tagariona ke wene sánsá ahtebéq moraráq kawerue sehgiéheéna wega mi arámbéhríwárítáq wahnah ke sainsúéhre. Sísane arambehriwarítáq wahnah kegá séhréh aitéhrataq moke ite Maniká tagariona ke morá ké méq anonani tahnsa míone. Anonani tahnsa méq wenahni Sísá Karáhéne sansá kawerue ahtebéq tábúsoqme sehgiéheqmúne.

<sup>14</sup> Wene sánsá tábúsoqme sehgiónaraq káriq anínká áhwára áhwára inserahni sansá íre oneheqmúne. Mi tanáhráq müguwahgu sansá íre sehgiéhe. Mó kegá péhe éhwéh íwáhnorirataq sensabé íre aiq pútare aritanéhe.

**15** Itega péhe éhwéh pehfragéq mó keyábé irutaboiréq aiq pútaq ehwéh pehwehrue irarero. Áhwára áhwára sansá sueq Sísa Karáhéne sansá tábúsoqme sehgioneheqmúne. We itene iyahqno tahnsa míehraq ite wene anonka tahnsá míone.

**16** Wehukeníné arupipeqté ívíahgá wene aigará, ayahnkara, aura mó arámbéhrí mó arámbéhríue sainsúéhnserah Sísa Karáhéne sansá tábúsoqme sehgioneheqmúne. We itene iyahqno tahnsa míehraq ite wene anonka tahnsá míone. Wega saiiúwéh árámbéhríúayabé ite wene anonka tahnsánue kaweqlaq míone. Wega saiiúwéh árámbéhrí tábúsoqme sehgiónaraq we séhréh atéhonehe. Wensabé wensabé irutaboiréq iteite we séhréh atéhúnaga ite Sísane anonka kaweqlaq méq anonukúne.

### *Ahbabáq kega mirao serahniyehboq kawerurero i ehwéhne.*

**17** Itene Wahnahne sánsá págegeue teiníboq írátíáhro. Maniká íre tagariáh náhnsó kégá mirao serahniyeho. Segá peh ahbabáq iwiáhéra

**18** sirupipeq sunkíkírirara íre tábúsoqme iwiáhorahowe. Se múgu wahguéra saiyyoo puara Manikánka organúq sitahráhi sansá íre ahtebahwe.

**19** Segá kaweqlaq sansá suera ahbabáq aruqarurowe. Segá íre mirao naneq sansá pehipi miraéra minayabe íre siyehitehre. Segá mirao serahniyehboq kawerurero.

**20-21** Segá mirao sansámé íre Sísa Karáhéne sansáne. Ite Sísane sánsá ahtebarotaq mi ahbabáq sánsá íre ahtebarowe. Itega Sísa Karáhé éhwéh ireq kéraneheqmúne ívíáhowaq ínereq mó kereqka wene aiq pútaq sansá íwáhnoruraune.

**22** Itene irupipeqté áhbábáq ívíahgá íre kaweqlaq naneqmarínsábé arutaboirowana menah saiqnariaraira q ahbabáq sansa sehgirowe. Amahnága itene irupipeqté áhbábáq ívíah súáhro.

**23** Itene irupipeq kaweqlaq iwiáh kankehboq peh kaweqlaq sansánsábé iwiáhoro. Manikánka kaweqlaq ména iwiáhinserahnoro.

**24** Miraéq tábúsoqme iwiáhqué Maniká awahbeh sansá sehgieq kaweqlaq mía míaoro.

### *Abiahnsaninaraq apubúue parabaruo i ehwéhne.*

**25** Ite Sísa Karáhéne anímári méq peh morá káhnáh míáh púaq péhe éhwéh irariyehboq peh aiq pútaq ehwéh irarero.

**26** Mó anínsábé aru págegeue abiahnsanéq ahbabáriyehboq apubúue parabarúáhro. Abiahnsanónawe ío tupekínaraq abiahnsa peh kehnehboq apubúue parabarúáhro.

**27** Owainawanka iteba séna ahbabáq íúgi ínehboq abiahnsanirataq apubúue parabarúáhro.

**28** Menah aebóuro kegá mókake mó aebóiyehboq ápeq meyagéhboq arambehrioro. Tabonah ke nárieq séhréh aritaneheéq arambehrioro.

**29** Ahbabáratahráhi ehwéh irariyehboq peh morá séhréh atahráhi ehwéh irarero. Séhréh atahráhi ehwéh irarinaraq íréhra kegá tábúsoqme iwiáhéra kaweqlaq míagehe.

**30** Abehq éhwéh irarirataq Manikáne Awane aru págege agíneho. Manikáne Awanka iteba mía míai puaq ite wene animári míonana Sísa Karáhéne sansá tábúsoqme iwiáhéra kawerai-tankéhe.

**31** Teiéna sansámé súáhro. Abiahnsame, áyátewé, taonsahwé, tobeh ehwehmé, éhruru ehwéhmé, ahbabáq atewé, moke mi sansámári súáhro.

**32** Mi ahbabáq sánsámári sueq mó keyábé irutaboiréq we séhréh atéhoro. Sísa Karáhéga miraúnsabe Maniká Iteriboga itene ahbabáqsabe íre iwiáhue ahreraq matiéhre. Mina inserah mó anínká are ahbabáratahnah mi ahbabáq íre iwiáhue ahreraq matiahno.

### *Wensabé wensabé irutaboiréq we séhréh atéhoro i ehwéhne.*

**1** Ite Manikáne arutaboiri anímári míonayabé we awahbeh sansá sehgio.

<sup>2</sup> Naho Asiu kegá Maniká titiratówana kaweq kunkúni naneq mire éna kawerowe aritowe. Sega titiratówana Manikánka, Kawerowe aritonserah Sísa Karáhé ite kaweraitanieéna pukúwana Manikánka wensabé, kaweróne atowe. Sísaga pukútaq itensabé anotahtaq arutaboirúnserah itewe moq wensabé wensabé irutaboiréq we séhréh atéhoro.

<sup>3</sup> Itewe Manikáne animári míah púaq ahbabáq sansa miraome íre ábrehre. Mó aníné weh ahre abariéwé, íre kaweq sansámé, mó aníné ménsámehsánsabe aigará pabekime pehragahro. Ite Manikáne animári míah púaq minawarinsábé íre ehwehnoro.

<sup>4</sup> Ehbone, múgu wahgu ehwéhmé, ogie ehwéhmé pehragahro. Minawari íre ábrehre sansáne. Írakaumo. Moke ahbabáq pehragéq peh Manikánsabe kaweróne ateq wensabé iwíah íwíah atáhro.

<sup>5</sup> Ménsámehsánsabe arutaboiri anímé owainawansabé titiratéh ání tahnsane. Minayabe ménsámehsánsabe arutabairo kewé, mó aníné weh ahre abario kewé, íre kaweq sansá mira aruqaruro kewé Sísa Karáhéreq Maniká Iteriboreqka wahnah wahnahnoyarabeq íre kioráhowe. Minayabe ahtebahro.

### *Peh téhrehrabeqte kaweq sansánoro i ehwéhne.*

<sup>6</sup> Manikánka mi sansáno ke íre kamah arinkéhe eme péhe éhwéhnowe. Sene múgu wahgu ehwéhnsábé aiq pútare arítéhboq kawerurero. Manikánka mi ahbabáq sánsáno ke, wene ehweh íre sehgiro ke anotahtaq kamah arinkéhe.

<sup>7</sup> Minayabe mi ahbabáq sánsáno kereq íre míáhro. Sene ahbabáq insoqitéhboq sereq íre míáhro.

<sup>8</sup> Menah itewe mi ahbabáro ke tahnsanéq sunkíkírirabeq míarowe. Amahnága itene Wahnahne animári míah púaq téhrehrabeq míáhwe. Ite téhrehrabeq míah púaq sunkíkírirabeqte sánsá pehragéq peh morá téhrehrabeqte káwéq sánsánoro.

<sup>9</sup> Téhrehrabeqte sánsá sehgiro kegá kaweq sansánéra tábúsoqme arámbéhriéra aiq pútäq ehwéh irarewe.

<sup>10</sup> Itene Wahnah awahbeh sansá ahtebéq sehgióro.

<sup>11</sup> Sunkíkírirabeqte áhbábáq sánsáno kereq íre méq peh sene ahbabáq pahsúáhro. Sene ahbabáq sansanká kaweq naneq íre áhwárahrahire.

<sup>12</sup> Sega kopípéq mirao sansámé niyehiteh sansá púana minayabe móme íre irarinie.

<sup>13</sup> Téhrehnka moke sansá áwahe sokigi ainieéna ábóraq marahráhire.

<sup>14</sup> Téhrehnka moke sansá áwahe ábórararuahna puana mó íre kopéq suahráhire. Minayabe Manikáne ehwehnka mahraréna, Sugahna aníno, irigúno. Pusa ké míáhrabeqte iriwe míáhno. Iriwe míéhrataqmé Sísa Karáhéga téhrehme kaweq sansámé sokigi ainkéhe ire. *(Aisaia 26.19)*

### *Píah nahnsabé múgu wahgu agéra ahbabáq aitahráhi sansáne i ehwéhne.*

<sup>15</sup> Itega sehgió sánsá kawerue auráq matíáhro. Múgu wahgu kegá onserahniyehboq peh ahtebia ké tahnsanue míáhro.

<sup>16</sup> Mah tanáhráq pehipi sotaikínehboq ahriahri Manikáne arambehri miraoro. Mah tanáhráq íre kaweq tanáhráq púaq kawerue arambehrioro.

<sup>17</sup> Múgu wahgu sansániyehboq itene Wahnah awahbeh sansá ahtebéq sehgióro.

<sup>18</sup> Píah nahnsabé múgu wahgu iyeho. Ahqáho. Mi sansanká ahbabáq aitahráhire. Manikáne Awanka itene sánsá moke wahnahninkehboq teaweq, Nirupipeq mía míaé auráq íntáriahno teawéro.

<sup>19</sup> Ítereq mó Sísa tagaríah kéreq moráráq méq itene Wahnahnsabé íwíah íwíah atanéhboq Sísansabé íwíah íwíah igónkónoro. Moke Púkuipéqté ígónkómé momiwíorabeqte ígónkómé Manikáne Awanka íwíah aitárái igónkómé wensabé íwíah íwíahoro. Itene irupipeq eyoyóue igonkónéq itene Wahnahnsabé íwíah íwíahoro.

<sup>20</sup> Ahriahri Maniká Iteribonsabé moke mó naneqsabé, Kaweróne atáhro. Itene Wahnah Sísa Karáhé áwírue kaweróne atáhro.

### *Ahrerono, iteruwehqsone ehweh kawerue sehgióro i ehwéhne.*

<sup>21</sup> Itega Sísa Karáhénabe irutaboiréq áhteno puaq morání moráníue Sísa tagaríah kéné ehweh ireq sehgóro.

<sup>22</sup> Ahrerono, Sísa itene Wahnahne ehweh kawerue sehgiónserah iteruwehqsone ehweh moq kawerue sehgóro.

<sup>23</sup> Sísa Karáhéga we tagaríah kéráq wahnahninserah awehkawagá wene ahreraq wahnahninkehe. Sísa Karáhéga ite kaweraitéhnsábé ite we tagariona ke wene anonka tahnsá úkue míone.

<sup>24</sup> Minayabe ite Sísa tagariona kegá wene ehweh kawerue sehgiunanserah ahreronká iteruwehqsone ehweh kawerue sehgóro.

### *Weho, itene ahreronsábé irutaboiroro i ehwéhne.*

<sup>25</sup> Sísa Karáhéga ite we tagariona ke arutaboiraitena ite kaweraitanieéna pukúwe. Weho, Sísaga itensabé arutaboirinserah itene ahreronsábé moq irutaboiroro.

<sup>26</sup> Sísaga ite kaweraitanieéna pukúwaq wene kawe q ehwéh írátáúnaga kawe qtaq méq wání meraune. Mirauraunayabé amahnága kawe qtaq míahrahúne.

<sup>27</sup> Ite we tagariona ke íre ahbabária peh kawe qtaq mía míageheéna Sísaga ite kaweraitanieéna pukúwe.

<sup>28</sup> Wehga wene anonka arutaboiréna kawerue wahnahninserah wene ahreyabé moq arutaboirue wahnahninkehe. Wene ahreyabé arutaboiri wehgá wewensabé moq arutaboirire.

<sup>29</sup> Wehukenínká wewene anonkansabé, Nuwahriehre íwíáh íre iwiáhire. Wewene anonkansabé arutaboiréna kawerue wahnahnéna táchutahurire. Ite Sísa tagariona ke wene animári púana wega ite kawerue wahnahnaitéhre.

<sup>30</sup> Ite Sísa Karáhéne anonka tahnsá púana wega wahnahnaitéhre.

<sup>31</sup> Minayabe Manikáne ehwehnka mahraréna, Wehga wenanoibone nahtapeq suena wene ahrereq mía míainkehe. Se morá ání tahnsanue míagehe ire. *(Stat 2.24)*

<sup>32</sup> Mi ehwéhnká íre peh morá weh ahreyabé irarire. Mi ehwéhnká Sísa Karáhérreq we tagariona kereqsabé moq irarire.

<sup>33</sup> Weho, morá ání tahnsanue míagehe irarinsabé arerene anonkansabé arutaboiré kawerue wahnahnónanserah arene ahreyabé moq arutaboirúno. Ahrega wenawehqne ehweh kaweruwe irena wensabé íwíáhinkehe.

## 6

### *Iteinoibone ehweh íráhro i ehwéhne.*

<sup>1</sup> Animáríno, iteinoibone ehweh íráhro. Itene Wahnahnka sene ehweh íráhro aitéhnsábé mina aiq kawe q sansáne.

<sup>2-3</sup> Manikánka sehgóro ú ehwehnká mahraréna, Iteinoibonsabé iwiáh íwíáhoro. Mirairataq kawe qtaq méq mah marákóráq ore orení uragéhe ire. *(Lo 5.16)*

Wega sehgóro ú ehweh irarútaq wega mah omásá éhwéh téh irarúwe.

### *Itene animári tábúsoqme síwáhnororo i ehwéhne.*

<sup>4</sup> Sibowárého, itene animárínsábé áhnte ehwéh aruqaruronka siwahsoreqsirara sega itensabé abiahnsa aitagéhe. Minayabe mi sansá sueq itene animárínká itene Wahnahne sánsá kawerue ahtebagehboq tábúsoqme síwáhnororo.

### *Itene Wahnahne ehweh kawerue sehgóro i ehwéhne.*

<sup>5</sup> Mó kené arambehrriraq saiqnariáh kéo, itene marakóipeqté wáhnáhmárlínsábé áhtenéq sene ehweh kawerue sehgóro. Sene arambehrriraq taoraho iyehboq Sísa Karáhéne arambehri kawerue miraonserah sene arambehri moq miraoro.

<sup>6</sup> Íre peh morá sega tagehrataq kawerue arambehrioro. Írakaumo. Segá íre míéhrataqkakáq kawerue arambehrioro. Ite Sísa Karáhéne arambehrio ke púaq moke mirao arámbéhri kawerue arambehrioro. Minawé Maniká Iteribo awahbeh sansáne.

<sup>7</sup> Itene marakóipeqté wáhnáhné arambehri miraotaq íre peh morá sene arambehri miraowe. Mi arámbéhríwé Sísa itene Wahnahne arambehri úkire.

<sup>8</sup> Minayabe mi arámbéhrírataq iru eyoyóue kawerue arambehrioro. Sísa itene Wahnahnká moke kaweq arámbéhrío ke ápeq náinkéhe. Arambehri saiqnaríah kéréq sene arambehriyabé móne méyah kéréq peh morá íwíáhena mókake ápeq náinkéhe.

<sup>9</sup> Arambehriraq wahnahno keo, iteba arambehrio keyábé peh kaweq sansánoro. Anotah ehwéh arítéhboq itene ehweh kawerue sehgírataq itega se pehwehrue arítáhro. Itereq sereqne íópeqté Wáhnáhnká íre mó iwiáh mó iwiáhire. Wega moke wehukeyabé peh morá iwiáhi puaq minayabe ahreraq matawéq kawerurero.

### *Sísa tagariáh kégá owainawamarínseq ebehúne i ehwéhne.*

<sup>10</sup> Ínéga parabaruanau ehwéh íráhro. Itene Wahnahme ayahnsa kira anínéna págegeue mía míaire. Ite moq mina tahnsa míaneheéq wega séhréh aitéhnsábé weba wahtotaq mía míaeq págegeue mía míaoro.

<sup>11</sup> Owainawanka ahbabáq aitehnehboq itega kaweqtaq míaneheéq Manikánka nái íq, póríáh, téhnké sokahue míáhro.

<sup>12</sup> Íre wehukereq ebehúne. Írakaumo. Owainawamarínseq sene wahnahmarínseq sunkíkrirabeqte wahnáhnseq áhnte íópeqté áhbábáq kéréq ebehúne.

<sup>13</sup> Minayabe Manikánka nái íq, póríáh, téhnké sokahue míáhro. Mirairataq owainawamaríká iteba siraq ebehirataq sega ite íre iuboráhowaq peh págegeue méq ebehorahowe. Ebeh parabarueq págegeue míahrahowe.

### *Owainawanseq ebehúna naneqsabé pabeqme ehwéhne.*

<sup>14</sup> Owainawanseq kawerue ebehoneheéq teiú náneqmarí sokah sokahue míáhro. Aiq pútaq ehwéh irareme itene áréti tahnsáne. Kaweqtaq mía míáewé káhpahraté miraia síótí tahnsane.

<sup>15</sup> Manikáne kaweq ehwéh insahwé aite ehwéh teriéme itene igárápíté súú tahnsáne.

<sup>16</sup> Sísansabé aiq pútare atewé itene tehnke tahnsane. Mi tehnké mararaq pentabehrataq owainawane poriahga íre séuqmianae.

<sup>17</sup> Manikánka aiq kaweraitéhmé itene págege ayáhúq tahnsane. Manikáne púkuipéqté éhwéhmé itene poka tahnsane. Mi ehwéh irarirataq Manikáne Awanka séhréh aitanae.

<sup>18</sup> Manikáne Awanka iwiáh aitahna naneqsabé ahriahri púrerororo. Mó naneq mó naneqsabé iwiáhue púrerororo. Kawerue púreroneheéq túbah agiyehboq áwéh panantágínaq tagéq moke Maniká tagariáh kékabé púrerororo.

<sup>19</sup> Ínénabe moq púreraintáhro. Íné íre áhreia Manikáne kaweq ehwéh peh kawerue pahsuaníboq Manikánsabe, Íné págege ate séhréh ato ue teawéro.

<sup>20</sup> Íné Manikáne ehwéh koreri terinu aní múge. Teri terinunsabé mó kegá karábúsiipéq móintáhwe. Kaweq ehwéh págegeue teri teriné sansamé kaweq sansáne. Ínéga íre áhreia peh tábúsoqme mirainiboq púreraintáhro.

### *Poraga Manikánsabe mi ke moke kawerarito ú ehwéhne.*

<sup>21</sup> Itene iruí íyáhnábó aní wenawíq Tíkíkúsie. Wega itene Wahnahne arambehri kawerue mira aruqarurire. Wega íné éhwéh teinkeheeána iteba eqmaróge.

<sup>22</sup> Ínémá árahue míéhre iwiáhoo? Íné aneq arámbéhríre iwiáhoo? Íné éhwéh Tíkíkásaga moke teiená itene irupipeq eyoyó aitankéhe.

<sup>23</sup> Maniká Iteriboreq itene Wahnah Sísa Karáhérreqa itene iru ukiq itehye. Itega kawerue aiq pútare ariteq mó keyábé irutaboirigeheéta séhréh aitehye.

<sup>24</sup> Itene Wahnah Sísa Karáhénsabe anotahtaq irutaboiro kewé Manikánka séhréh aitéhre.

## Píripái Ebeq sáhnsahwe ahtebé ehwehne.

Píripái suwahpeqme Másérónía marákórápéq kowe. Poraga mibeqté kékabé anotahtaq arutaboiréna mah pahsí sehiranúwe. Mah pahsíipéq wega mó naneq mó naneq ehwéh sehiranéna sega Sísane sánsá ambubu atawéq kawerue sehgeheéna mah pahsí sehiranúwe. Segá mótaq mótarue Pora móne náwúwana wega sensabé kawerowe aritowe. Wega sensabé, Ahriahri iru eyoyóéq iwíáh íwíáhoro úwe.

### Poraga Píripái suwahpeqte ké siu pahsíe.

<sup>1</sup> Píripái suwahpeqte kéo, íné Porane páhsí sáhnsahwe tagahro. Moke Sísa Karáhéne animárínseq wahnahno kereq séhréh arító kérero, mah pahsí kawerue tagahro. Ínéreq Tímótireqka Sísa Karáhéne arambehriúya anité úye.

<sup>2</sup> Maniká Iteriboreq itene Wahnah Sísa Karáhéreqka ite séhréh aitera itene iru ukiq itagéhe.

#### *Poraga Píripái ke púrerarito ehwéhne.*

<sup>3</sup> Itensabé niahreraq kéhtáq ahriahri Maniká Iteribonsabé kaweróne atena iwíáh íwíáh atóge.

<sup>4</sup> Itensabé púreraitótáq ahriahri nirupipeq eyoyóirana púreraitóge.

<sup>5</sup> Ínéga Sísane kaweq ehwéh téh teíátautakákáq amahnágaákáq séhréh aintáhwe. Séhréh aintáhwe púana itensabé púreraitótáq ahriahri nirupipeq eyoyóirana púreraitóge.

<sup>6</sup> Íné aiq tagariómé Maniká Iteriboga itene irupipeq kaweq arámbéhrí áhwáraraire. Mi arámbéhrí íre túbah agia Sísa Karáhé tuinagake Manikánka parabaruwanawire.

<sup>7</sup> Manikánka Sísane kaweq ehwéh koreri terinúno urairana tábúsoqme koreri terinurauge. Sísane kaweq sansásabé ehweho kereq moq teri terinurauge. Teri terinurautakákáq amahnága karábúsiipéq míotáqkákáq mi arámbéhrí mirainkeheéq itega náni náninéq séhréh aintáhwe. Minayabe itensabé ahriahri nirutaboiraitóge. Mira íwíáh aitómé aiq tábúsoqme íwíáhuge.

<sup>8</sup> Manikánka aiq tagariéhmé Sísa Karáhéga itensabé arutaboiraitena íné mira íwíáh aintéh púana ínéga itensabé moq nirutaboiraitóge.

<sup>9</sup> Itega mó keyábé anotahtaq irutaboiraritengeheéna itensabé púreraitóge. Irutaboiréq ahtebia ké tábúsoqme íwíáho ke míageheéna itensabé púreraitóge.

<sup>10</sup> Mina tahnsa ké míéhrataq ite peh kaweq sansá omaq itahráhire. Peh kaweq sansá omaq itahráhinsabé mirairataq Sísa Karáhé tuinagake ite íre ahbabáq ke méq peh kaweqtaq míagehe.

<sup>11</sup> Sísa Karáhéga séhréh aitahnaga ite peh kaweq ke míagehe. Ite tagehra kegá Maniká Iteribo áwíq pankerera wensabé íwíáh íwíáh atagéhe.

#### *Pora karábúsiipéq mó ehwehne.*

<sup>12</sup> Néne iyahnabo anímáriño, mah ehwéh iragéhboq kawerue írátiáhro. Ínéga Sísa Karáhéne arambehri mirauraunsabé saiqnaintera karábúsiipéq íntárówe. Íntáróme sega kaweq ehwéhmé íre saiqnariahrahewe. Írakaumo. Segá íné karábúsiipéq íntárónka kaweq ehwéh íre saiqnaruto puana peh págegeue abae aguraire.

<sup>13</sup> Minawé moke mahtaqté wáhnáhné sóntia kereq mó kereqka tagariáhwe.

<sup>14</sup> Íné karábúsiipéq míónsabé kaweq ehwéh abae agurairara áhnte Sísa tagariáh kégá írähwe. Írähwana itene Wahnahna séhréh arítéhrara sega moq íre áhreia Manikáne ehwéh pahtsúáhwe.

<sup>15</sup> Táhmaro kegá néne arambehri tagéra, Ite moq anotah anímári míaneheqmúne íwíahéra Sísá Karáhé éhwéh teri terinowe. Mó kegá peh kawerue íwíahéra mi ehwéh teri terinowe.

<sup>16</sup> Ínéga Sísá Karáhé éhwéh pahsutaunsabé karábúsiipéq móíntárówe. Minawé kaweq kegá tagéra ínénabe sirutaboíréra Sísá éhwéh teri terinowe.

<sup>17</sup> Íre kaweq íwíáho kegá sensíwíq pankeranehe íwíahéra, Amahnága Pora karábúsiipéq míehnsábé we kamah aweneheéq Sísá éhwéh teri terinonehe ewe.

<sup>18</sup> Minayabe abiahnsanugo? Írakaumo. Nirupipeq eyoyóire. Mó terié ké kaweq íwíahowara mó terié ké íre kaweq íwíahowe. Moke sega Sísá Karáhé éhwéh teri terinonsabé nirupipeq eyoyóire.

### *Poraga Sísareq méyabe awahbó ehwehne.*

<sup>19</sup> Itega ínénabe púreraintáhnká Sísá Karáhéne Awanka séhréh aintéhrana karábúsiipéqté pugeq nuwagéhe íwíahuge. Mira íwíahunka nirupipeq eyoyóire.

<sup>20</sup> Mókakeakáq peh eyoyóinae. Wega níátái arámbéhrí kawerue mirainieéna anotah nirútábóírige. Niyehtegurégúonehoéna mi arámbéhríyábé kawerue mirainauge. Íné íre áhreia peh ahriahri Sísá Karáhé éhwéh teri terinuraunserah amahnágaákáq pahsuqme terieyabe nuwahbehere. Miraonaraq oga míanabu pukinabugapómo néne arambehri tagehra kegá Sísá Karáhénabe íwíáh íwíáh atagéhe.

<sup>21</sup> Íné oga míó tánáhráq peh Sísá Karáhéreq mía míainie. Íné pukonaraq weba mía míaoñawe anotah kawerinawire.

<sup>22</sup> Íné mah marákóípéq oga míahnaraq mó kaweq arámbéhríéna áhnte ke séhréh ari-tahráhoge. Minayabe anerininkono? Íre tagarióge.

<sup>23</sup> Anerininkono íwíahéna téhtaré íwíahuge. Niru eyoyói sansámé néne ninonka suena Sísaba pokéyabe nuwahbehere íwíahuge. Sísaba pokéyabe níranawé

<sup>24</sup> peh mahtaq ména ite séhréh aitahráhoge íwíahuge.

<sup>25</sup> Ite séhréh aitahráhoge tagarió púana mahtaq ména ite séhréh aitanauge. Ínéga ite séhréh aitáhnaga ite Sísane sánsá ambubu atiéhra puana itene irupipeq eyoyóinae.

<sup>26</sup> Ínéga iteba konaraq íné tagéq Sísá Karáhénabe íwíáh íwíáh atagéhe.

### *Itene naruoga íwíoqnah ehwéhne.*

<sup>27</sup> Anotah ehwéh teiníboq íratíáhro. Sísá Karáhéne kaweq ehwéh tábúsoqme sehgíóro. Sehgírataq itega peh morá íwíáhue kaweqtaq mía míaigehe. Kweqtaq mía míaeq moráénue Sísane sánsá ambubu atawéq wene ehwéh teri terinigehe. Mirairataq iteba konaraqpópoq mahtaq míahnaraqpópoq ite kaweqtaq mía míao ehwéh iraníe.

<sup>28</sup> Itene naruoyabé íre áhreoro. Sensabé íre áhreirataq itene naruoga mina tagéra íwíahéra, Ite pukoneheqmúne. Peh moró Manikánka Píripái suwahpeqte ké séhréh arítéhnsábé kaweqtaq míaneheqmóe siahtebagehe.

<sup>29</sup> Manikánka itensabé, Sísansabé aiq pútare atáhro éna néne arambehri miraoro. Miraéq wenawíq pankeréhrataqmé itensabé suwahrieh kegá íwíoqnagehe ire.

<sup>30</sup> Menah ínéga Sísane arambehri mirauraunsabé níwíoqnarowaq tagarowe. Amahnágaákáq Sísane arambehri miraunsabé mó kegá níwíoqnah ehwéh itega íráhwe. Itereq ínereqka ahbabáq saiqnarueq peh morá árámbéhríúne. Minayabe Sísane ehwehnsabé suwahrieh kegá íwíoqnahwe.

## 2

### *Moráénue séhréh atéhoro i ehwéhne.*

<sup>1</sup> Itega Sísá Karáhéreq mía míaoñawa aiq págege aitehro? Wega itensabé arutaboíraitéhnsábé itene irupipeq eyoyóiro? Itereq Manikáne Awanseqka moráénoo? Itega mó ke séhréh ariteq sensabé irutaboiroo?

<sup>2</sup> Kowe irataq moráénoro. Mó keyábé irutaboirariteq wensabé wensabé arutaboiratéhoro. Peh morá iwíahue míáhro. Ite mi ehwéh sehgiranka nirupipeq eyoyónkehe.

<sup>3</sup> Itene arambehri mirairataq peh iteitensabé iwíah iwíáhiyeho. Ite mó ke kiotaikuna ke úne iwíáhiyehboq íre píribahrioro. Írakaumo. Mó kegá ite kiotaikowe iwíahéq uwaresa ké míáhro.

<sup>4</sup> Íre peh morá iteitene arambehriyabé auráq matíáhro. Itene iyahnabone náneq moq iwíahue séhréh arítáhro.

*Sísaga, Íné anotah aní múde íre ú púana Manikánka wenawíq pankero ehwéhne.*

<sup>5</sup> Sísa Karáhéga iwíahúnserahnoro.

<sup>6</sup> Wereq Manikánseq senahnáéra monseráhnuye. Minayabe Sísaga, Íné Nánibo míéhrabeq peh we tahnsá anotah Wahnáh ání míanauge iwíáhuwo? Írakaumo.

<sup>7</sup> Ite kaweraitanieéna Wenabo míéhrabeq íopeq suena wehukení úkéna arambehri aní tahnsa úkúwe.

<sup>8</sup> We wehukení úkéna mah marákóípéq míotaq íre píribahri anínéna peh Wenabo awahbeh sansá ahriahri tábúsoqme miraúwe. Miraúnsabe awankátaq táhpague putiowe.

<sup>9</sup> Minayabe Manikánka Sísa iriatena wega wahnahnirabeq móatowe. Móatena anotah aní míáhno ato puana wenawíqka moke mó ke síwíq kiotaikire.

<sup>10</sup> Minayabe moke íopeqté kereq mah marákó márákóípéqté kereq iraipéqté kereqka sirenunseraráq méra Sísa áwíq pankeragéhe.

<sup>11</sup> Pankerera, Sísa Karáhé aiq pútaq anotah Wahnáh míre pahsuqme irarigehe. Irari-ranka Maniká Iteribo áwíq pankeragéhe.

*Kaweptaq méq eyoyóue arambehriioro i ehwéhne.*

<sup>12</sup> Néne iyahnabo anímáriño, iteba míarautaq néne ehwehme kawerue sehgirowe. Amahnága iteba íre míótáqkákáq moq kawerue sehgióro. Oga mía míaoneheéq wene ehwehnsabé áhreue iransánéq kawerue sehgióro.

<sup>13</sup> Itega Maniká awahbeh sansá kawerue ireq tábúsoqme miraigeheéna wega itene irupipeq ména ahriahri séhréh aitéhre. Minayabe wene ehwehnsabé áhreue iransánéq kawerue sehgióro.

<sup>14</sup> Itega arambehriirataq íre síehruruoro. Íre síehruruéq peh ahriahri eyoyóue arambehriioro.

<sup>15</sup> Mah marákó márákóípéq áhnte ahbabáq kereq ahkaragára kereq míáhwe. Itewe se míáhtáq mirao serahniyehboq peh Manikáne kaweql anímári míáhro. Wene kaweql anímári méq ite íre ahbabária peh kaweptaq mía míaoneheéq eyoyóue arambehriioro. Wehyoqka íopeq téhréna ábóraq kéhnsarah ahbabáq ke míáhrabeq itene kaweql arámbéhri ábóraq kékraq oga mía mía ehwéh teri terinowe.

<sup>16</sup> Minayabe Sísa Karáhé tuinagake néne arambehriyabé kaweróne aintankéhe. Itega oga mía mía ehwéh kawerue pahsúáhnsabé néne arambehri íre abehq úkia peh ábóraq kék púana iwíah iwíáhinie.

<sup>17</sup> Itega Sísane sánsá kawerue sehgiheheéna séhréh aítaráuge. Séhréh aítaráunsabé ahbabáq kega nubiq suanerabowapómo. Anetaníbo. Itereq iwíah iwíáhéna nirupipeq eyoyóire.

<sup>18</sup> Ite moq iwíah iwíáhoro. Ínéreq iwíah iwíahéq itene irupipeq eyoyóue iwíah iwíáhoro.

*Poraga Tímoti Píripái su wahpeq eqmaraníe ú ehwéhne.*

<sup>19</sup> Itene Wahnah Sísaga iwíah aintahnana Tímoti mótaq iteba eqmaraníe. Wega itene arambehri tagéna ínéba kouwekue sereninkéhe. Íráhnaraq nirupipeq eyoyóinae.

<sup>20</sup> Tímótiga íné iwíahunserahnéna ite kaweptaq méyabe arutaboiréna, Árahue Píripái ke séhréh aritaníkono iwíáhire. Mó mina tahnsa iwíáho kewé ínéreq íre míáhwe.

<sup>21</sup> Segá íre Sísá Karáhéne arambehri peh seyene arambehriyabé sirutaboirowe.

<sup>22</sup> Sísane kaweq ewhéh teri teri arámbéhríurautaq Tímóti nénahni tahnsanéna séhréh aintaráire. Séhréh aintaráinsabé itega wene sásá tagaríhwe.

<sup>23</sup> Minayabe áwénunéna, Mahtaq ínéba aneqpopoq kanabirapómo éna Tímóti iteba eqmaraníe.

<sup>24</sup> Ínéga iwíáhume itene Wahnah Manikánka íné séhréh aintahnana ínéga moq iteba mótaq koraganie.

### *Poraga wehukeni wenáwíq Épápórítia Píripái su wahpeq eqmaraníe ú ehwehne.*

<sup>25</sup> Épápórítaga íné séhréh aintankeheeéq itega ínéba eqmaq áuwátówe. Eqmaq áuwátówana we nánibáq tahnsa mýarairata morárág arambehriurauye. Wega itensabé anotah arútábóíri puana amahnág iteba eqmaraníe íwíáhuge.

<sup>26</sup> Wega itensabé anotah arútábóírena ite tageyabe awahbehre. We awahreuraire uro ewhéh íratónsabe wene arupipeq iwíáh kikirire.

<sup>27</sup> We aiq pútaq awahreéna peh áura pukuraire. Manikánka wensabé arutaboirurainsabé we kaweratáráire. We pukuraitaq tahirímé nirupipeq áhnte pagégéurai irino. Minayabe Manikánka íre peh wensabé arutaboiréna ínénabé moq arutaboiraintáráire.

<sup>28</sup> Itega we tagéq itene irupipeq eyoyóinkeeéna iteba eqmaraníe. Itene irupipeq eyoyóínayabé néne nirupipeq umehime moq eyoyóinae.

<sup>29</sup> We itene Wahnahne ani míéhnsabé eyoyóue mehwéh atáhro. Mina tahnsa ké síwíq pankereq sensabé iwíáh íwíáhoro.

<sup>30</sup> Ite íre wahto míáh púaq íné íre séhréh aintahráhowe. Minayabe itega Épápórítansabé, Koséhréh ato éq ínéba eqmaq áuwátówana wewensabé íre iwíáhire. Írakaumo. Peh íné séhréh aintena Sísá Karáhéne arambehri miraurainsabé áura pukuraire. Minayabe ayahmaq aweq iwíáh íwíáhoro.

## 3

### *Sísansabé aiq pútare atáh kewé kaweq ke wóe i ewhéhne.*

<sup>1</sup> Néne iyahnabo anímáríno, mó ewhéh kékre. Itene Wahnahnsabé iwíáh íwíáh ateq itene irupipeq eyoyó ke míáhro. Métáq sehiranue teí éhwéh móñkakáq séhréh aitanieéna teiníe.

<sup>2</sup> Ahbabáq aruqaruro ke, úrinsi iánká tahnsa sásáno kegá péhe sásá aitehboq auráq matíáhro. Segá, Ite Asiu kené sásánéq íú amurúráhro ue pagu paguno ke wóe.

<sup>3</sup> Manikáne Awanka séhréh aitéhraq itega Manikánsabe iwíáh íwíáh ateq Sísá Karáhé áwíq pankerone. Minayabe ite Manikáne animári míone. Ite tagarionawe síú amurúráh sásánká wehuke íre séhréh aritahráhire.

<sup>4</sup> Teiníboq írátiáhro. Wehukega mirao sansánká kawerarítéhtáq tahirímé ínéga miraurau sansánká íné aiq kaweraintárái irino. Ínéga miraurau sansánká áhnte mó kegá mirauro sansá aiq kiotaikuraire.

<sup>5</sup> Náinoibo akéq Pénsámíni kahnáh ákéq Asiu aníté wóye. Náinoga íné maqmarotaq abapeqte apahtáró wéhkáh sótaikútaq níú amurúrówe. Náinoibo akéqká Íbaru ewhéh Asiu kené ehwehnóyansabé ínéga moq Íbaru kené ehwehnuge. Anonútáutaq Mósísiga sehgóro ú ehwehnsabé Péhrasi kené sásá kawerue miraurauge.

<sup>6</sup> Manikáne arambehri págegeue mirauge íwíáhena Sísá tagariáh ké síwíqnarauge. Mósísiga sehgóro ú ehweh íre anterusa peh kawerue sehgorauge. Wehukega néne sásá iwíáhue tagéra ahbabáq anine íre orahurowe.

<sup>7</sup> Minayabe ínéga iwíáhuraume, Íné kaweqtaq míóge urauge.

Amahnágá Sísá Karáhéne sansá miraunsabé néne naho kiotaikurai sansá abehq náneq úkire iwíáhuge.

<sup>8</sup> Íre peh morá néne naho sansá abehq náneq úkire. Írakaumo. Moke mó sansá abehq náneq úkire íwíahuge. Itene Wahnah Sísá Karáhé tagarió sánsánká moke mó sansá kiotaikirana moke mó sansá abehq náneq úkire. Sísá Karáhéne sansá sehgiónsábé moke mó sansá abehq náneq tahnsáne íwíahéna sutauge. Peh morá Sísá Karáhénabe nirutaboiréna mó sansá sutauge. Peh wereq mía míainieéna sutauge.

<sup>9</sup> Suena amahnága íné Sísareq mía míáeyabe nuwahbehre.

Mósísiga sehgióro ú ehweh sehgiúnká, Kaweqtaq míahne aintahráhiro? Írakaumo. Peh Sísá Karáhénabe aiq pútare atáráunsabé Manikánka, Kaweqtaq míahne aintaráire.

<sup>10</sup> Sísá Karáhé tagarawéyabe nuwahbehre. Manikánka Sísá iriato púana wega págege aintahráhire. Págege aintahnayabé níre. Íné wene iyahnabo aní mío púara mó kegá Sísá áwíoqnonserah níwíoqnagehe. Sísaga we puké tanahráqsábé íwíahurainserah íné moq mina tahnsa íwíahinie.

<sup>11</sup> Ínéga iwiáhume mókake íné moq iriintena oga mérapeq móintanawire íwíahuge.

### *Poraga, Tauntahu arámbéhrínie ú ehwehne.*

<sup>12</sup> Sísá Karáhé tahnsa amahnága íre úkuge. Ahriahri kaweqtaq mía míau aní amahnága íre úkuge. Peh kaweqtaq méyabe nuwahbehre. Sísá Karáhéga omaq intena kaweraintárái puana ínéga págegeue arambehriuge.

<sup>13</sup> Néne iyahnabo anímáriño, amahnága Sísá tahnsa íre úkuge. Íné peh morá íwíáh kéhre. Menah tanáhráqsábé anetaníbo íwíahéna peh morá mókakeyabé íwíahue págege arámbéhríuge.

<sup>14</sup> Sísá Karáhéne sansá kawerue sehgiúnsábé Manikánka ínénabe, Kaweróne. Íopeq mahbeq kio. Ínéba mía míáuno aintanawire. Mi tanáhráq nina apéqsábé íwíahue págege arámbéhríuge.

<sup>15</sup> Tábúsoqme iwiáhoraho keo, itega moq mina tahnsa íwíáhoro. Itega mó iwiáhirataq minayabe Manikánka sokigi aitankéhe.

<sup>16</sup> Itega kaweqtaq mía míauraunanserah mókakeakáq kawerue mía míáoneheqmúne íwíáhoro.

<sup>17</sup> Néne iyahnabo anímáriño, iteba míarautaq néne sánsá tagarowe. Mitaq ínéga mía míauraunserahnue míáhro. Miraurau sansá miraira ke kawerue tagarawéq sene ehweh íráhro.

<sup>18</sup> Sísá Karáhéga itene ahbabáqsabe awankátaq táhpawe pukú ehweh áhnte kegá íre irera peh ahbabáq aruqaruwore. Minayabe sega Sísá Karáhéne naruo úkowe. Mi ehwéh menah teiena amahnágaákáq nirupipeq umehirana mónkakáq teiúge.

<sup>19</sup> Sinonkanka suwahbeh naneq mira aruqaruro puana minawé sene maniká tahnsa úkire. Mah marákóípéqté náneqmarínsábé íwíáh íwíahéra sene siyehitech sansánsábé íwíáh íwíáh atáhwe. Mi sansáno kega iraipéq pokoneherawoe.

<sup>20</sup> Iteitene irutaboiri matábúwé íopeq kéhraq mitaqté sánsánúne. Mibeqté ite kaweraítéh aní, itene Wahnah Sísá Karáhéga tuinawire. Wega tuina tanáhráqsábé irutaboiréq áwénunúne.

<sup>21</sup> Itene mareqmareq pukorahi inónká wene págegeue kagai anonká tahnsa úqitankéhe. Sísá Karáhéga moke wehukeakáq ménsámehnsánkakaq págegeue wahnahnorahi puana wega itene mareqmareq inónká págegeue kagai anonká úqitankéhe.

## 4

### *Itega peh morá íwíahéq iru eyoyóue iahtebahro i ehwéhne.*

<sup>1</sup> Néne niruní íyáhnábó anímáriño, itensabé nirutaboiruge. Itega Sísane sánsá kawerue sehgió púana nirupipeq íwíáh íwíahue eyoyóire. Néne niruní íyáhnábó anímáriño, mókakeakáq kawerue sehgióro.

<sup>2</sup> Íyúóriareq Síntíkireq korenítéo, néne ehwéh íráhtao. Itene Wahnah peh morá ání mire. Minayabe uwaresa ínité méta peh morá íwíáhotao.

<sup>3</sup> Néne weho, mi iníté kawerue séhréh arito. Segá íné séhréh aintáróye. Sísane kaweq ehwéh teri terinurautaq sereq Kéménareq ínéreq arambehrio kerekka séhréh aintárówe. Oga mía míaoneherao kené síwíq kék púkúipéq Manikánka sensíwíq aiq sehiranaréhre.

### *Iwíáh kikiriyeboq Manikánsabe teawéro i ehwéhne.*

<sup>4</sup> Ahriahri itene Wahnahnsabé iwíáh íwíáh ateq itene irupipeq eyoyóo ke míáhro. Mónkakáq teiníboq írátíáhro. Itene irupipeq eyoyóo ke míáhro.

<sup>5</sup> Ómiga tagagehboq uwaresa ánímári mía míaoro. Itene Wahnah tuina tanáhráqmé peh áhníbórani.

<sup>6</sup> Itene irupipeq iwíáh kikiriyeboq moke aru págegeorahi naneqsabé Maniká teawéro. Wensabé iwíáh íwíáh ateq ite iwíáho naneqsabé teawéro.

<sup>7</sup> Mirairataq Manikánka itene iru ukiq itankéhe. Iru ukiqite sansa áwahewé íre iahtebahrahúne. Manikánka itene iru ukiq itahnaga ite Sísa Karáhéreq mía míaúnana itene irupipeq íre iwíáh kikirúne. Írakaumo. Peh iru ukiréhraq míone.

### *Peh kaweq naneqsabé iwíáhoro i ehwehne.*

<sup>8</sup> Néne iyahnabo ánímáriño, mó ehwéh kékhe. Teina kawéq náneqmarínsábé iwíáhoro. Aiq pútaq ehwéhmé, séhréh arite sansámé, kaweqtaq mía míaome, tabasíwe mía míaome, kaweq naneqmarínsábewé, kiotaiki sansámé, uwaréqme, mía míaome, minawarinsábé iwíáhoro.

<sup>9</sup> Íwáhnoruraugaq írátó ehwéh sehgióro. Ínéga miraurau serahnoro. Mirairataq Manikánka iteba mía míáena itene iru ukiq itankéhe.

### *Poraga Píripái kegá we náwa náwanunsabé iwíáh íwíáh ú ehwehne.*

<sup>10</sup> Itene Wahnahne arambehri mirainkeheéq móñkakáq níátówe. Minayabe nirupipeq eyoyóue itene Wahnahnsabé iwíáh íwíáh atóge. Menah moq itega ínésabe irutaboirain-teq peh mi tanáhráq íre nieráhurowe.

<sup>11</sup> Íne tabonah aní míónsábé mi ehwéh irarugo? Írakaumo. Íné tabonah aní míarautaqkákáq nirupipeq íre umehire. Ahriahri níru eyoyóire.

<sup>12</sup> Íné tabonah aní míarautaqkákáq áhnte káráitaqkákáq monseráhnue níru pehwehrue eyoyóire. Niyahbankiréh sánsánkákáq nirupibi sansankákáq tagarióge. Áhnte kék tánáhráqkákáq tabonah tanahráqkákáq tagarióge. Moke mi tanáhráq monseráhnue níru pehwehríbeq eyoyóire. Minayabe niahtearauge.

<sup>13</sup> Sísaga págege aintahráhire. Peh wewega págege aintéhká ínéga moke miraorahuge.

<sup>14</sup> Íre kaweq sunúq káráitaq itega íné séhréh aintaronsabé kawerurowe.

<sup>15</sup> Másérónía suwahpeq suena Sísane kaweq ehwéh téh teri terinurautaq itega náni náninurowe. Ite Píripái suwahpeqte kégá tagariáhmé mó Sísa tagariáh kégá íre náníátówe. Írakaumo. Peh itebataq náni náninurowe.

<sup>16</sup> Íné Tésárónáika suwahpeq ména tabonah aní míarautaq itega séhréh ainteq mótaq mótarue náni náninurowe.

<sup>17</sup> Íre peh íné náni náninuro naneqsabé nirutaboiruge. Írakaumo. Peh morá itega náni náninuronsabé kagai apéq mókake meyagéhe. Minayabe iwíáhume nuwahbehre.

<sup>18</sup> Épáporítaga itega eqmato naneq níátáinsabé amahnága áhnte matíóge. Itega Manikánsabe iruí púaq áhnte náníátówe. Minawé Maniká awahbeh sansáne. Itega mirauronsabé wega kawerowe aitéhre.

<sup>19</sup> Sísa Karáhé áhnte matiéh ání mía míaire. Minayabe Maniká Nániboga ite íre kék náneq moke náinkéhe.

<sup>20</sup> Maniká Iteribonsabé ahriahri iwíáh íwíáh atanéhe. Aiq míre.

*Poraga Píripái keyábé iroro arito ehwehne.*

<sup>21</sup> Ínéga moke mibeqté Sísáhrine tagaríah kékabé iroro uge. Moke ínéreq mahtaqté Manikáne animárinká moq itensabé iroro ewe.

<sup>22</sup> Mahtaq anotah wahnáh ání Sísáhrine nahtapeq méra wene arambehri mirao kereqka íné pagunera itensabé iroro terio ewe. Ómi mahtaqté Sísáhrine tagaríah kégá itensabé iroro ewe.

<sup>23</sup> Itene Wahnah Sísáhrine tagaríah itensabé arutaboiréna itene irupipeq mía míaéna séhréh aitéhre.

## Kórósia Ebeq sáhnsahwe ahtebé ehwehne.

Kórósia suwahpeqme Esia marákórápéq kowe. Mó kegá Kórósia suwahpeqte ké Sísa éhweh teriuwara mibeqté kégá Sísansabé aiq pútare atówe. Anehe mó kegá péhe éhwéh síwáhnoruwana Poraga mina irena mah pahsípqué ahqáho aritena aiq pútaq ehwéh síwáhnoruwe. Wega mahraue síwáhnoréna, Sísa Karáhéga moke kék náneq mirarena webataq ite kaweraitena ite kiotaiki Wahnáh mía míaire. Minayabe wene aiq pútaq sansá ambubu atawéq tábúsoqme sehgóro éna Poraga mah pahsí sehiranúwe.

### Poraga Kórósia suwahpeqte ké siu pahsíe.

<sup>1</sup> Kórósia suwahpeqte kéo, íné Porane páhsí sáhnsahwe tagahro. Sísa Karáhé éhweh kosíwáhnorinkehééna Manikánka omaq intena eqmaq núwátáire. Ínéreq Tímótireqka Sísa Karáhéne arambehriúya aníté úye.

<sup>2</sup> Itewe Sísa Karáhéne sansá kawerue ambubu atíahwe. Maniká Iteriboga ite séhréh aitena iru ukiq itankéhe.

#### *Kórósia kegá Sísansabé aiq pútare atera kéró ehwehne.*

<sup>3</sup> Maniká we Sísa Karáhé itene Wahnahne abowáe. Itensabé púreraitoataq Manikánsabe kaweróne ateta ahriahri iwíah iwíah atoye.

<sup>4</sup> Sísa Karáhéne sansá aiq kawerue ahtebéq tábúsoqme sehgieq ómi Manikáne animárínsábé irutaboirowe. Minayabe ireta itensabé púreraitoataq Manikánsabe kaweróne ateta ahriahri iwíah iwíah atoye.

<sup>5</sup> Aiq pútaq ehwéhmé kaweq ehwéh téh írótaq íópeq oga mérapeq awaq mianeheqmúne iwíahhéq irutaboirowe. Irutaboironsabé itega Sísane sánsá miraéq we tagariáh kékabé irutaboirowe.

<sup>6</sup> Manikánka séhréh aitahráhi ehwéh írátótaq aiq pútare atera ahtebarowe. Minayabe mi tanáhráq Manikánka kaweraitáráire. Sísa tagariáh kégá mah kehiná kékíná mah kawéq ehwéh teri terinowana Manikánka íráh kék moq kawerarítéhre.

<sup>7</sup> Mi kawéq ehwéhmé ite Kórósia ke iwáhnorurai anímé Épárásí Sísa Karáhéne arambehri aní ména itereq arambehri. Arambehriraq wensabé irutaboirúne. Iteba íre pokorahúyansabé Épárásiga Sísa Karáhéne sansá kawerue iwáhnoruráire.

<sup>8</sup> Wega teiena, Manikáne Awanka séhréh aitárái puaq itega mó keyábé áhnte irútábóirowe uraire.

<sup>9</sup> Wega teiátáitaqkákáq menahnkákáq amahnágaákáq itensabé púreraitáráuye. Ite íre túbah agia peh ahriahri púreraitáráuye. Manikáne Awanka awahbeh iwíah wene sánsá iahtebagehééta púreraitoate.

<sup>10</sup> Manikáne Awanka miraínaraq ite ahtebia kék tábúsoqme íráh kék míagehe. Minayabe wega mirainkehééta itensabé púreraitoate. Iahtebehrataq Maniká awahbeh sansá miraéq kaweqtaq mía míorahowe. Itega áhnte kawéq árámbéhrí miraorahéq Maniká tábúsoqme tagariagehe.

<sup>11</sup> Íre kaweq sunúq sínaraq ite uwaresa ánímári tabasíwe míageheéna Maniká págege aní púana wega ite págege aitéhre. Wega ite séhréh aitena págege aitankehééta itensabé púreraitoate.

<sup>12</sup> Ite págege anímári méq itene irupipeq eyoyóue Maniká Iteribonsabé kaweróne atáhro. Manikánka wahnahnirabeq téhrehrabéqme áhnte kawéq náneq kékhe. Mókake ite wene animári mibeq méq mi kawéq náneq meyageheéna Manikánka aiq kaweraitáráire.

<sup>13</sup> Sunkíkírirabeq owainawanka saiqnariarairabeqte Manikánka ite meiqmena wene arunáwí áhnínkawágá wahnahnirabeq móítáráire.

<sup>14</sup> Sísaga miraúnsabe Manikánka itene ahbabáq kaqiuwena insahwé aítéhre.

*Poraga Sísa Karáhé éhwéh pahqsuo ehwéhne.*

<sup>15</sup> Wehukega Maniká íre tagahrahúne. Sísa Karáhewé Maniká tahnса aní míéhre. Téhwe Sísa Karáhé ména moke miraro naneqmarí kiotaikéna wahnahnire.

<sup>16</sup> Wega moke íopeqté náneqkakáq mah marákóipéqté náneqmarínkákáq mirarowe. Moke ábóraq kék náneqmarínkákáq kopípéq kék náneqmarínkákáq mirarowe. Wega moke íopeqté kéné wahnahmarínkákáq moke anotah wahnáh ánímárínkákáq moke págege naneqkakáq omaq sitowe. Wenahninká moke kék náneqmarínkákáq wahnahninkeheéna Manikánka, Miraúno atowana mirarowe.

<sup>17</sup> Moke miraro naneqmarínkákáq íre kotaq Sísa Karáhé míowe. We íre míéhtáq tahirímé moke kék náneqmarínkákáq apubúue taqnobagi irino.

<sup>18</sup> Sísa tagariona ke moráénue wene anonka tahnsá míonana wega wahnahnaitena itene iyahqno tahnса míéhre. Sísa Karáhé mía míainsabé moke ite we tagariona ke oga mía míaorahúne. Sísa pukéna we ebeq organukú púaq anehe ite moq organukoneheqmúne. Organukúnsabe moke ite kiotaiqme ména wahnah wahnahnire.

<sup>19</sup> Manikánka iwíáhúnka abowá mía míainserah wenahni moq mía míaire.

<sup>20</sup> Wenahninká miraúnsabe Manikánka, Íné moke kék náneqkakáq kaweraritanauge iwíáhúwe. Sísa awankátaq táhpague pukútaq wene korahq tunsabe Manikánka itene iru ukiq itéhre. Iru ukiq itena moke mah marákóipéqté náneqkakáq íopeqté náneqkakáq kaweraraníe iwíáhúwe.

<sup>21</sup> Menah ite Manikáne naruo anímári méq wensabé iuwahriehre iwíáhéo ahbabáq iwiáhue ahbabáq aruqarururowe.

<sup>22</sup> Sísaga itene ahbabáqsabe awankátaq pukúnsabe Manikánka amahnága ite insahwé aítaráire. Wega ite íre ehweh aitanieéna insahwé aítaráire. Ite íre ahbabária peh weba kaweqlaq mía míageheéna insahwé aítaráire.

<sup>23</sup> Sísane kaweqlaq ehweh teri terininkeheéna íné Pora eqmaq núwátáire. Mah kawéq éhwéhmé mah kehiná kékíná teri terinúne. Mah éhwéhmé ambubu atawéq sehgóro. Kaweqlaq nahnká íre míu míuia peh págegeue kagainserah mó éhwéhnsábé itene irupipeq iwíáh kikiriyehboq Sísa ehweh ambubu atíáhro. Mah kawéq éhwéh írátótaq itega, Oga mía míaonehe iwíáhowe.

*Poraga Kórósia ke séhréh arito ehwehne.*

<sup>24</sup> Ite séhréh aítaráunsabé níwíoqnahwe. Minayabe nirupipeq íre umehia peh eyoyóire. Sísa tagariáh kék áhnte úkéq kaweqlaq míageheéna arambehriunsabé níwíoqnahwe. Ite Sísa tagariona ke moráénéq wene anonka tahnsá míone. Wene anonka tahnsá míonayabé wehukega níwíoqnahtaq Sísa Karáhé moq áwíoqnahwe.

<sup>25</sup> Ite kaweqlaq míageheéna Manikánka, Sísa tagariáh kék séhréh arito aintaráire. Aintaráirana arambehriéna Manikáne ehweh moke pahsuqme teri terinuge.

<sup>26</sup> Naho naho Manikánka wene epéqté éhwéh íre teriasa peh amahnága wene animári teíre.

<sup>27</sup> We awahbeh sansánéna naho íre teriasa éhwéh amahnága ite nahnsó kereq itereq teíre. Mi epéqté éhwéhmé mahraréna, Sísa Karáhé itene irupipeq míéhrana moke Manikánka wahnahnirabeq áhnte kawéq náneq kékhrabeq seneherawoe ire. Mi éhwéhmé anotah kawéq éhwéhniká ite ómi kehiná séhréh aitahráhi ehwehne.

<sup>28</sup> Moke mah kehiná kékínánká irageheéna we éhwéh ómi teri terinuge. Ómi íráh kégá Sísa Karáhéne sansá ahtebéra kawerue miraigeheéna tábúsoqme síwáhnoréna kawerue miraoro éna pagu pagunuge.

<sup>29</sup> Ínéga kawerue mirainkeheéna Manikánka anotahtaq págege aintéhre. Págege aintéhniká áhntetaq arambehri aruqaruruge.

## 2

*Manikánsabe aiq pútare ateq péhe éhwéh saiqnaruanéhe i ehwéhne*

<sup>1</sup> Itereq Áráórísia suwahpeqte kéreq mó Sísa tagariáh kéreqka néne niuranabiahtapeq íre tagarowe. Itega Sísane sásá ahtebéq kawerue mirageheéna áhntetaq arambehriuge. Minawé íráhro.

<sup>2</sup> Manikánka itene irupipeq kaweç iwíáh aitankeheéna arambehriuge. Mó kereq iteitereqsabé wensabé wensabé irutaboirigeheéna ite aiq pútaq ehwéh kawerue ahtebageheéna arambehriuge. Manikánka naho íre teiasa peh amahnága teí éhwéhmé Sísa Karáhé éhwehne. Minayabeákáq Sísaga miraorahi sansánkákáqsabé ahtebageheéna teiúge.

<sup>3</sup> Késiipéq kaweç mensáméhnsá kopípéq kéhnserah Manikáne ahtebia sásámé Sísaba kékre.

<sup>4</sup> Mó kegá péhe éhwéh kawerue teiraq aiq pútare arítéhoéna teiúge.

<sup>5</sup> Ínéga iteba íre mía míaugana peh néne iwíáh iteba kagaire. Sísa Karáhéne sansá ambubu atawéq moraráq kawerue miraonsabé irena nirupipeq eyoyóire.

*Sísareq mía míáéq oga mérapeq awaqme ehwehne.*

<sup>6</sup> Itega Sísa Karáhénabe aiq pútare ateq we itene Wahnah mía míai puaq we kéraneheqmúne íwíáhuowe. Itega mira íwíáhuronserahnoro. Ahriahri wereq mía míaoro.

<sup>7</sup> Íwáhnoruro sansá kawerue iahtebahro. Anotah awánkánká áhnte anúq kéna págegeue kagainserah itega Sísa kawerue tagariagehboq weba mía míaoro. Págege marákóráq piéhra nahnká íre míu míuia peh kaweçtaq kagainserah mi sansá ambubu atawéq mira aruqaruroro. Mira aruqarurirataq Manikánsabe íwíáh íwíáhoro.

<sup>8</sup> Péhe éhwéhnsabé aiq pútare arítéhboq kawerue íwíáhue tagariáhro. Íre Sísa Karáhéne sansá peh wehukene íwíáh ehwehmé, abehq éhwéhmé, itene igaqnaréhne sansánsabé éhwéhmé, owainawamaríné sansánsabé éhwéhmé teírataq mi ehwéhnsabé aiq pútare arítého.

<sup>9</sup> Sísa Karáhewé wehukení úkéna Maniká Wenabo tahnsanéna abowágá inserah moke miraorahire.

<sup>10</sup> Ite wereq mía míáuna puaq kaweçtaq míahrahéq oga mía míáune. Wega moke mó wahnáhmári kiotaqme wahnahnire.

<sup>11</sup> Itega Sísa tagariáh púaq Manikáne aiq pútaq sansá miraorahowe. Íre itene inonka amurúreyabe peh itene irupipeqté áhbábáqkákáq abehq íwíáhákáq sueq kaweç sansá miraorahowe.

<sup>12</sup> Ite Sísaba mía míáéq wání merowe. Itega weba mía míaconsabé sega Sísa maisatotaq ite moq maisatowe. Manikánka Sísa iriwe organúq atonsabe aiq pútare atárónsabé Manikánka ite moq iriwe organúq ítáráire.

<sup>13</sup> Manikáne ehweh íre írátótaq ahbabáqka ite saiqnariaraire. Saiqnariaraireq peh ahbabáq aruqarururonsabé ite pusa ké tahná míarowe. Ite Sísaba mía míáúnayabé Manikánka itene ahbabáqsabe moke insahwé aitená organúq ítáráire.

<sup>14</sup> Wega sehgóro ú sansa itega íre sehgráúnayabé itene ahbabáq áhnte káráire. Manikánka mina sehgóro ú sansa Sísa pukú awánkátáq táhparó púana mi sansá parabaruowe.

<sup>15</sup> Mitaq Manikánka moke owainawamarínseq sene wahnahmarínseq kiotaqme ména se saiqnaruowe. Saiqnéna anotah wahnáh áninká karábúsiipéq móritéhra ke sabironserahnue sabirúwe. Sabirúwara we míorabeq se abehq náneq tahná úkuwara ómiga tagowe.

*Itega Sísareq pukowanana sehgóro ú ehwehká íre séhréh aitahráhire i ehwéhne.*

<sup>16</sup> Minayabe itega táchutahuqkakáq wáninkakaq íre awehrionsabé mó kegá ehweh aitého. Ábáhré tanahráqmé, ío serariéh tánáhráqmé, ahrena ahrena wehekáhmé sega miraoro ira sansá íre mirairataqmé ehweh aitého.

<sup>17</sup> Minawé peh mókake sína naneqsabé peh mánkánah tahnsá míre. Sísa Karahéwé aiq pútaq aní míéh púaq tagagehe.

<sup>18</sup> Mó kegá itensabé, Peh morá awehrio kewé íopeqté kékabé iwíáh arítáh kewé sensiwanka áhntetaq tagah kewé mó ke kiotaikowe teigéhe. Sega mi ehwéh aitéhransabé íre iwíáhoro. Mi ehwéhmé peh wehukeníné ehweh puaq íre aiq pútare arítáhro. Mi ehwéh irare kegá seyega iwíáhéra ite ahtebia ké úne éra píribahriowe.

<sup>19</sup> Sewe Sísane sánsá íre ambubu atíáhwe. Sísa tagariona kewé wene anonka tahnsá miónana wega wahnahnaitena itene iyahqno tahnasa míéhre. Itene inonka onkakaq onunkakaq kékabé púana itene inonka págegeue kékre. Minayabe Manikánka séhréh aitéhraq ite Sísa tagariona ke wene anonka tahnsá méq anonukúne.

<sup>20</sup> Sísa Karáhéra itene ahbabáqsabe pukútaq owainawamarí kiotaikú púana sega ite saiqnariórabeqte sabiuowe. Minayabe itega mah marákóípéqté abehq sánsámé aneqs-abé miraoo? Aneqsabé wehukega teié sánsámári sehgioo?

<sup>21</sup> Peh wehukega itensabé, Mahna íre táhtoro. Mina íre nahro. Mó naneq pehragahro eme aneqsabé sene ehweh iraho?

<sup>22</sup> Segá irare naneqme íre kagaorahi naneq puana parabaginawire. Minawé peh wehukega iwíáhue sehgióro e sansáne.

<sup>23</sup> Mi ehwéh sehgió kégá, Kaweq sansáne iwíáhowe. Mi sansá sehgió kégá iwíáhéra, Mó sansámé kaweq iwíáh iwíáhé sansa míre. Mó sansámé uwaresa sánsá míre. Mó sansámárimé inonka kaweq wahnahnorahi sansámári míre ewe. Mina pehragahro e ehwéhnkáwé, mah marákóípéqté abehq sánsámé íre séhréh aitená saiqnaruahráhire.

### 3

#### *Sísareq moraráq irigowana ehwéhne.*

<sup>1</sup> Ite Sísa Karáhéra mía míaonsabé Manikánka we iriwe organúq atotaq ite moq iriwe organúq itowe. Minayabe Sísa Karáhéra míéhrabeqte sánsásabé irutaboiroro. We íopeq Manikáne ayah púpeq tútuue ména wahnah wahnahnire.

<sup>2</sup> Mah marákóípéqté sánsásabé iwíáhéq irutaboiriyehboq peh Sísa míéhrabeqte sánsásabé iwíáh iwíáhue irutaboiroro.

<sup>3</sup> Sísa pukútaq ite moq wereq pukéq amahnága wereq Maniká Iteriboreq kopípéq moraráq míáhwe. Minayabe Sísa míéhrabeqte sánsásabé iwíáh iwíáhue irutaboiroro.

<sup>4</sup> Sísa Karáhérwé itene ogamé áwahe wíre. Wega kaweq tehreh naneqkakáq tuinagake itega moq wereq tuigéhe.

#### *Ite o ke úkurauna ehwéhne.*

<sup>5</sup> Minayabe itene irupipeqté áhbábárorahi iwíáh súáhro. Mó aníné ahre ahrari weh mahbi abarié iwíáhwé, íre kaweq iwíáhwé, ahbabáq sansa sehgie iwíáhwé, mó aníné ménsámehsánsabe aigará pabeki iwíáhwé súáhro. Mó aníné ménsámehsánsabe aigará pabekime, minawé péhepehe manikánsabé iwíáh atáh sánsáne.

<sup>6</sup> Mina tahnasa ahbabáronsabé Manikánka anotah abiáhnsá aritená kamah arinawire.

<sup>7</sup> Menah iteitega mina tahnasa áhbábáq mira aruqaruruowe.

<sup>8</sup> Amahnágawé mina tahnasa áhbábáq sánsá moke súáhro. Taonsahwé, abiahnsa atewé, mó aní ahbabáq atewé, mó anínsabé péhepehe ehwéh atewé, ehbome, mina tahnasa áhbábáq sánsá moke súáhro.

<sup>9</sup> Itene irupipeqté áhbábáq iwíáhwé, ahbabáq sansamé airaiq súáhnsabé wensabé wensabé péhe éhwéh teawíiyeho.

<sup>10</sup> Itega o ke úkurowe. Manikánka ite kaweq iwíáh aitowaq itega we tahnsá kaweq ke mía míaigehe.

<sup>11</sup> Sísane sánsá mirao kewé peh morá ké tahnsane. Káríki kewé, Asiu kewé, síú amurúráh kewé, síú íre amurúráh kewé, mó ehwéhnkákáq irare kewé, mó sansá mirao kewé, mó kené arambehriraq saiqnariáh kewé, arambehriyabé ápeq meyáh kewé, móke

mina tahnса kе Sísane ehweh sehgíowe. Sísа Karáhégа moke mina tahnса kéné sirupipeq mía míaire. Sega wereq mía míaconsabé sene sirupipeq mía míaire.

*Moke mó keyábé irutaboiré sansa sehgíoro i ehwéhne.*

<sup>12</sup> Manikánka itensabé arutaboiréna wene kaweq anímári míageheéna omaq itáráire. Minayabe teínserah sansánue míáhro. Mó keyábé irutaboirue séhréh arítáhro. Ite iuwahbeh naneq iwíáh sueq mó keyábé siru ukisiteq uwaresa ánímári míáhro.

<sup>13</sup> Mó kegá íre kaweraitéhrataqmé peh uwaresa kе míáhro. Itene Wahnahnka itene ahbabáqsabe íre iwíáhue ahreraq matiéhre. Mina inserah itebaqté áninká are ahbabáratahnaraq wene ahbabáqsabe íre iwíáhue ahreraq matiahno. Mó keyábé irutaboiro sansánká moke mó kawéq sánsámári kiotaikire.

<sup>14</sup> Moke mó keyábé irutaboiroro. Mah sansánká moke mó sansá kiotaikéna moke mó sansá págege atena séhréh atéhre.

<sup>15</sup> Sísа Karáhégа itene iru ukiq itena peh morá iwíáh aitáráire. Minayabe ite iru ukiqme míáhro. Iru ukiqme méq peh morá kе tahnса míageheéna omaq itáráire. Minayabe ite iru ukiqme mía míaoro. Manikánsabe ahriahri iwíáhue kaweróne átahro.

<sup>16</sup> Sísа Karáhéné ehweh itene irupipeq ambubu atawéq iwíáhue tagahro. Ite morání moráninué Sísane sánsá ahtebagehboq we kawerue teawíeq síwáhnororo. Ite igonkónirataq itene irupipeq Manikánsabe iwíáh iwíáhoro. Buk Songipéqté ígonkónkákáq ároturapeqté ígonkónkákáq Manikáne Awanka iwíáh atahna igónkónkákáq igonkónéq itene irupipeq Manikánsabe iwíáh iwíáhoro.

<sup>17</sup> Sísа itene Wahnah míéh púaq moke miraira arámbéhrí kawerue miraéq moke irarira ehwéh kawerue irarero. Mirairataq Sísа itene Wahnah áwírue Maniká Iteribonsabé kaweróne ateq wensabé iwíáh iwíáh atáhro.

*Poraga Sísа tagariáh káríró ánínsábé irari ehwéhne.*

<sup>18</sup> Ahrerono, iteruwehqsonе ehweh kawerue íráhro. Minawé Maniká itene Wahnah awahbeh sansáne.

<sup>19</sup> Weho, itene ahreronsabé irutaboiroro. Íre áyátehreh sah subóro.

<sup>20</sup> Animáríno, ite inoibone ehweh saiyoiyehboq kawerue íráhro. Minawé Maniká awahbeh sansáne.

<sup>21</sup> Sibowárého, itene animárínká itene ehwehnsabé abiahnsanue anetaníbo iwíáhiyehboq pehipi íre ehweh arítáhro.

*Wahnah kené ehweh kawerue íráhro i ehwéhne.*

<sup>22</sup> Mó kené arambehri keo, itene marakóipeqté wáhnah kéné ehweh moke kawerue íráhro. Itene wahnah kegá ite kaweq arámbéhrí ánímári móe iwíáhigeéq peh morá se míáhtáq tauntahunue arámbéhríewé kaweq sansápo? Írakaumo. Maniká itene Wahnahnka tagaríehnsabé wensabé áhreéq iwíáhue ahriahri kawerue arambehrioro.

<sup>23</sup> Moke miraira arámbéhríwé tauntahunue arambehrioro. Íre peh morá wehukega wahnahnonsabé Manikánsabe moq wahnahni puaq kawerue arambehrioro.

<sup>24</sup> Ite kiotaiqme wahnáhmé Sísа Karáhé wíre. Itewe peh wene arambehriúna anímári müne. Wega mókake kaweq naneq oga mé apéq náinkéhe. Minawé tagaríahwe.

<sup>25</sup> Manikánka ahbabáq ani kamah awinawire. Wega moke wehuke peh morá sánsánéna tábúsoqme sainsuanawire.

## 4

<sup>1</sup> Wahnah keo, itene arambehri ke tábúsoqme wahnahnéq pehwehrue kawerarítáhro. Iteitene Wahnah íópeq míena tagaríehre. Minawé aiq írátíahwe.

*Itega págegeue púreréq kaweq sansánoro i ehwéhne.*

<sup>2</sup> Púreré sansa túbah agiyehboq ahriahri púreroro. Púrerirataq itene irupipeq taora-hoiyehboq kawerue iwíáhue Manikánsabe iwíáh iwíáh atáhro.

<sup>3</sup> Itensabéákáq púreraitáhro. Manikánka naho íre teiasa éhwéh amahnága íróge. Mó ke Sísa Karáhé éhwéh koreriniboq Manikánka mi ahtápéqté ónsá sinkehboq púreraintáhro. Mi éhwéh teri terinuraunsabé suwahriarai kegá íné karábúsiipéq méintárówana míóge.

<sup>4</sup> Sísa éhwéh tábúsoqme teri terime kaweq sansáne. Ínéga kawerue mirainkeheéq púreraintáhro.

<sup>5</sup> Sísa íre tagariáh kégá itene sánsá tagahnsabé kawerue iwíahéq tabasíwe míáhro. Seba míéhrataq ahrebawé anímári méq Sísane sánsá kawerue sokigioro.

<sup>6</sup> Ehweh irarirataq iwíahue tábúsoqme ehwéhnoro. Mó kegá itene ehwehnsabé kasenirataq iwíahue tábúsoqme teriéro. Minayabe iahtebahro.

### *Poraga téhranité Kórósia kebá eqmaqsuo éhwéhne.*

<sup>7</sup> Ínéreq Tíkíkúsireqme Sísa itene Wahnahne arambehri moráráq miraurauye. Wega mi arámbéhrí kawerue mira aruqarurire. We áhnte niruní ání míre. Wega néne sánsá teinkéhe.

<sup>8</sup> Ite págege aitená mahtaq miraúna sansá teinkeheéna eqmaraníe.

<sup>9</sup> Ónésímagá moq Sísane arambehri kawerue mira aruqarurire. We iruí ání ména iteruwahrah aní míre. Wereq Tíkíkúsireq iteba moráráq konaraq itega mahtaq moke miraúna sansá sega teigéhe.

### *Poraga Kórósia suwahpeqte kékabé iroro i éhwéhne.*

<sup>10</sup> Ínéreq karábúsiipéq míoya aní Árísátákiga itensabé iroro ire. Páhnábásane anahnowáné ani Máhkaga moq itensabé iroro ire. Menah ehweh teiátáunserah wega iteba kínaraq mehwéh ateq kirabooro.

<sup>11</sup> Mahtaqté ání Sísasa we mó awíq Sásátaga moq itensabé iroro ire. Mi anímári Asiu anímári móe. Ínéga Manikánka wahnahnirabeqte árámbéhrí mirautaq sebataq ínéreq arambehriowe. Segá anotahtaq séhréh aintáhwe.

<sup>12</sup> Épárásíwe iteruwahrah aní ména Sísa Karáhéne arambehri mira aruqaruréna itensabé iroro ire. Wega ahriahri itensabé áhntetaq púreraitéhre. Itega Maniká awahbeh sánsá iahtebéq ambubu atawéq kawerue sehgigeheéna púreraitéhre.

<sup>13</sup> Áráórísía suwahpeqte kéreq Íérápórísia suwahpeqte kéreq itereq séhréh aitanieéna wega págegeue arambehrhire. Minawé tagarawéna teiúge.

<sup>14</sup> Árúkawe niruní sótéh ánine. Wereq Témásireqka itensabé iroro éye.

<sup>15</sup> Áráórísía suwahpeqte Sísa tagariáh kéreq Nímbareq wene nahtapeq momiwí aruqaruro kereqsabé iroro teriéro.

<sup>16</sup> Mah pahsí sáhnsahwe parabarúéhrataq Áráórísía suwahpeqte Sísa tagariáh kégá sáhnsahigéhboq síero. Áráórísía suwahpeqte Sísa tagariáh ké síú pahsí kiwewe sáhnsahwe tagahro.

<sup>17</sup> Áhkípúsansabé, Itene Wahnahnká omaq atarái arámbéhrí kawerue miraue parabaruo teawéro.

<sup>18</sup> Íné Poraga amahnága ínénéne niyahnkaratáté mah anéhété éhwéh sehiranuge. Karábúsiipéq míónsábé ahreraq matíáhro. Manikánka ite séhréh aitahráhire. Mirainkeheéna itensabé púreraitóge.

## 1 Tésárónáíka Ebeq sáhnsahwe ahtebé ehwehne.

Tésárónáíka suwahpeqme Másérónía marákórápéq kowe. Poraga mitaq Sísa éhweh síwáhnorúwara mitaqté kégá Sísansabé aiq pútare atónsabe mó kegá Poransabé abi-ahnsa atera kaqsúówana wega mó ke suwahpeq pokúwe. Anehe tanahráq Asiu kegá Tésárónáíka suwahpeqte Sísa tagariáh ké síwióqnowana Poraga irena mah pahsí sehiranúwe. Wega sensabé, túbah agiyehboq Sísane ehweh tauntahunue sehgóro úwe. Wega Sísga tuina tanáhráqsábéákáq mah pahsíúpéq sehiranue teriuwe.

### **Poraga Tésárónáíka ke ebeq siu pahsíe.**

<sup>1</sup> Ite apáhránító íwíq Pora, Sáíra, Tímoti, míone. Itene páhsí sáhnsahwe tagahro. Tésárónáíka suwahpeqte Sísa tagariáh kéo, itewe Maniká Iteriboreq itene Wahnah Sísa Karáhéreq moraráq mía míaowe. Mía míaonsabé sega ite séhréh aitera itene iru ukiq itagéhe.

*Tésárónáíka kegá aiq pútare atónsabe Poraga iwiáh iwiáhú ehwehne.*

<sup>2</sup> Ahriahri itensabé ahreraq matawéq púreréq Manikánsabe iwiáh iwiáh ata ataúne.

<sup>3</sup> Itega púrerúnaraq itensabé ahriahri púreraitone. Itega Sísansabé kawerue aiq pútare atáh púaq anotah arámbéhríowe. Itega mó keyábé irutaboiru puaq séhréh arítáhwe. Itene Wahnah Sísa Karáhéga aiq tuinawire iwiáhonsabé itega wene kaweq sansá ambubu atawéq sehgíowe.

<sup>4</sup> Itene iyahnabo anímáráino, Manikánka itensabé arutaboiréna wene animári míageheéna omaq itáráire. Minayabe tagarione.

<sup>5</sup> Itega Manikáne kaweq ehwéh teiátáúnaraq íre peh ehweh teiátáúne. Írakaumo. Manikáne Awanka séhréh aitáráiraq mah ehwéh aiq pútaq ehwéhne tagariona puaq págegeue teiátáúne. Iteba míaraunaraq séhréh aiteq kaweqtaq mía míauraunaq tagariáhwe.

<sup>6</sup> Itega mirauraunanserah itega moq miraurowe. Itene Wahnahne sánsá kawerue miraurowe. Manikáne ehweh írátótaq aiq pútare atárówara mó kegá iwióqnarowe. Iwióqnarowaq itega, Manikáne ehweh peh aiq pútaq ehwéhne iwiáhurowana Manikáne Awanka irupipeq anotah eyóyó aitáráire.

<sup>7</sup> Itega kaweqtaq mía míaonsabé moke Másérónía marákórápéqté Sísa tagariáh kéreq Ákáia marákórápéqté Sísa tagariáh kéreqka irera, Mina tahnsanonehe iwiáhewe.

<sup>8</sup> Itega itene Wahnah ehweh Másérónía marákórápéqté kéreq Ákáia marákórápéqté kéreq teríátówe. Íre peh morá mi kegá írátówe. Írakaumo. Itega Manikánsabe aiq pútare ató ehweh mah kehiná kékínánká írátówe. Moke aiq írátó puaq itega mókakáq íre teríátáúne.

<sup>9</sup> Iteba suraunaraq itega kawerue mehwéh aitárówe. Itega péhepehe maníká aiq sueq aiq pútaq Maníká kétówe. Webataq aiq pútaq Maníká ména oga mía míai aníne iwiáhíg wene arambehri miraowe. Seyega mi ehwéh tei teinowe.

<sup>10</sup> Manikáne ahninkáwá íópeqté tuina tanáhráqsábé áwénunowe. Mókakewe Manikánka ahbabáq ke kamah arinawire. Sísga itene ahbabáqsabe pukúwana Manikánka we organúq atowe. Organúq atowana wega ite kaweraito púana mókake Manikánka ite íre kamah ainkéhe.

## 2

*Poraga Tésárónáíka suwahpeq miraú arámbéhríyábé éhwéhne.*

<sup>1</sup> Nánuwahrah Sísa tagariáh kéo, iteba míarauna arámbéhrí íre abehq árámbehríurauge. Minawé ite tagariáhwe.

<sup>2</sup> Iteba íre surautaq Píripái suwahpeq míaraunara mó kegá iubiq marera íwíoqnarowe. Minawé ite írátíáhwe. Iteba surautaq Maniká Iteriboga págege aitárái puaq itene ehwehnsabé suwahrieh keyábé íre áhreia peh wene kaweq ehwéh págegeue íwáhnoruraune.

<sup>3</sup> Itega íwáhnoruraunawe áhwára áhwára ehwéh íre teiátáúne. Ahbabáq ehwehmé péhe éhwéhmé íre teiasa peh tábúsoqme íwáhnoruraune.

<sup>4</sup> Manikánka itene irupipeqté íwíáh tagéna kawerowe éna itensabé, Néne kaweq ehwéh koreriéro urainsabé íwáhnoruraune. Íwáhnoréq íre wehukega ehnenehne aitáhnsabé irutaboirúne. Manikánka itene irupipeq tagariéhnsabé peh morá wega kawerowe aitéhnsabé iuwahbehre.

<sup>5</sup> Itega ehweh teiátáúnaraq íre ehnenehne aitáráúne. Minawé ite tagariáhwe. Itene ménsámehnsánsabe ehnenehnenu meyanéhe íwíáh íre uraune. Minawé Manikánka tagariéhre.

<sup>6</sup> Itereq mó kereqka ite iwíáh íwíáh aitárónsabewé íre iuwahbaraire.

<sup>7</sup> Sísa Karáhéga ite eqmaq iúwátái puaq itega séhréh aito teiátáúnaraq tahirí kaweri irino. Anowagá wene animári wahnahnéna kawerue auráq matiéhnserah iteba míaraunaraq pehwehrue íwáhnoruraune.

<sup>8</sup> Itensabé anotah irúí púaq Manikáne kaweq ehwéh teiátáúne. Itega íre peh teiátáúnayabé itensabé anotahtaq irutaboirurauna puaq séhréh aitaneheéq iubiq suahráhi arámbéhríuraune.

<sup>9</sup> Itene iyahnabo anímáríno, itega Manikáne kaweq ehwéh teiátáúnaraq itene táhutahuq paigmaraneheéq arambehriuraune. Ineh inehonehoéq itega wéhékáhnkakaq inokáhpeqkakáq anotah págegeue arambehriuraune. Minawé ite iahreraq kéhre.

<sup>10</sup> Ite Sísansabé aiq pútare atáró kebá míaraunaraq itega íre ahbabária peh kaweqtaq mía míauraune. Minawé itereq Manikánseq tagariáhwe.

<sup>11</sup> Sibowágá wene animári kawerue síwáhnorinserah itega pehwehrue íwáhnoruraune. Minawé tagariáhwe.

<sup>12</sup> Ite kaweq iwíáh aiteq itene irupipeq eyoyóinkeheéq íwáhnoruraune. Itensabé teiunawe Manikánka wahnah wahnahnirabeq áhnte kawéq mápére. Wega ite mitaq míageheéna omaq itéhre. Minayabe, Wega kaweqtaq mía míainserahnue mía míaoro ue pagu pagunéq teiátáúne.

### *Mó kegá Sísa tagariáh ké síwíoqnarowara peh kaweqtaq míaro ehwéhne.*

<sup>13</sup> Itega Manikáne ehweh teiátáúnaraq írátówe. Írátótaq peh wehukene ehwehne íre iwíáhurowe. Írakaumo. Peh Manikáne ehweh mire íwíáhurowe. Mira íwíáhuronsabé itega púrerúnaraq Manikánsabe iwíáh íwíáh atone. Mi ehwéhmé aiq pútaq Manikáne ehwehne. Itega Manikáne ehwehnsabé aiq pútare atárónsabé mi ehwéhnká séhréh aitáráire.

<sup>14</sup> Itene iyahnabo anímáríno, itega Súria marákórápéqté Maniká tagariáh ké tahnsa úkurowe. Asiu kegá mitaq Sísa Karáhé tagariáh ké síwíoqnarowe. Segá síwíoqnaronserah iteruwahrahga moq íwíoqnarowe.

<sup>15</sup> Asiu kegá Manikáne ehweh iraru ke subiq súówe. Segá itene Wahnah Sísa subiq suera ite íwíoqnéra kaqíuwówe. Segá Maniká awahbeh sansá anteruera mah kehiná kékínáné naruo úkurowe.

<sup>16</sup> Nahnsó kegá Sísansabé aiq pútare atera oga mía míageheéq itega Manikáne ehweh teriátáúne. Teriátáúnaraq Asiu kegá itensabé ahqáho aitera íwíoqnarowe. Minayabe sene ahbabáq kagaéna áhnte káráire. Amahnága Manikánka sensabé anotah abiáhnsá arítéhre.

### *Poraga Tésárónáika kebá koragyéyabe awahbó ehwéhne.*

<sup>17</sup> Itene iyahnabo anímáríno, menah Asiu kegá kaqíuwátótaq iteba íre méq sibowágá wene animárlinsabé sirutaboirinserah itensabé anotahtaq irutaboiruraune. Itensabé íre

ibitarusa peh iteba kouwekue tagéyabe iuwahbaraire. Iteba pokoneheéq mótaq mótarue ah kabaréq iwíáh kikiruraune.

<sup>18</sup> Ite koragéyabe iuwahbarairana íné Poraga mónkakáq mónkakárue ah kabarurauge. Kabaruraugana owainawanka ite saiqnaiúwátáire.

<sup>19</sup> Itega Sísa kawerue kéráhwe. Minayabe itene Wahnah Sísa tuinagake itene irupipeq eyoyóinae.

<sup>20</sup> Itega Sísa kawerue kéráhnsábé iwíáh íwíáhéq itene irupipeq anotahtaq eyoyóire.

## 3

### *Poraga Tímóti Tésárónáika ke séhréh aritankeheéna eqmaq auwo ehwéhne.*

<sup>1</sup> Itensabé iwíáh kikiréq iteba moke íre korahúnayabé itega Tímóti eqmareta ínéreq Sáírareqka itebataq Áténi suwahpeq míarauye.

<sup>2</sup> Tímótiwe Manikáne arambehri aní míre. Itereq wereq moráráq arambehriuraune. We Sísa Karáhéne ehweh síwáhnori aní míre. Wega ite íwáhnorinkeheéta eqmatáuye. Itega Sísane sánsá kawerue miraigeheéna págege aitena íwáhnorinkehe.

<sup>3</sup> Mó kegá ite íwíoqnehrataq ite iwíáh kikiréta Sísane sánsá súéhoéta Tímótiga séhréh aitankeheéta iteba eqmatáuye. Sísane sánsá mirao puara mó kegá ite íwíoqnanerawoe. Minawé ite aiq tagariáhwe.

<sup>4</sup> Iteba míaraunaraq, Mó kegá ite íwíoqnanerawoe aiq teiátáúne. Itega aiq teiátáúnanserah menah íwíoqnarowe. Minawé tagariáhwe.

<sup>5</sup> Minayabe ínéga mó íre áwénunorahinsabé Tímóti eqmatáuge. Owainawanka áhwárawe tagéna túbah agoro teíraq wene ehweh sehgiowámo. Sísane sánsá ambubu atiahwamo íwíáhurauge. Itene arambehri abehq náneq úkíneho. Minayabe Tímótiga koragéna teinkeheéna eqmatáuge.

### *Tímótiga kaweq ehwéh Pora teawuwana iwíáh íwíáhú ehwéhne.*

<sup>6</sup> Amahnága Tímótiga kouwekuraitaq ite éhweh teiátáire. Itewe Sísansabé aiq pútare atáró sansá ambubu atawéq mó keyábé irutaboirarítáhwe uraire. Ínéreq mahtaq míáh kéreqka itensabé iwíáhue irutaboiréq ite tagéyabe iuwahbehre. Mira únanserah itega moq ite tagéyabe iuwahbehre urairaqtíráitáunaraq irupipeq eyoyóuraire.

<sup>7</sup> Itene iyahnabo anímárido, mó kegá ínéreq mahtaq míáh kéreq íwíoqnarowana íéruraitaq itega Sísansabé aiq pútare ateq kéráhnsábé itene iru eyoyóire.

<sup>8</sup> Itene Wahnahne sánsá kawerue sehgiónsábé iru anotah kawérire.

<sup>9</sup> Minayabe itene kaweq sansánsábé iwíáhéq Manikánsabe kaweróne ateq wensabé iwíáh íwíáhúne.

<sup>10</sup> Ite koragéyabe iuwahbehre. Itega íre tábúsoqme íráh éhwéh íwáhnoréyabe iuwahbehre. Minayabe ahriahri wehekáhnkákáq inokáhpeqkakáq púreq aruqarurúne.

### *Poraga se koragéyabe Manikánka séhréh atankeheéna púrerú ehwéhne.*

<sup>11</sup> Iteba konayabé Maniká Iteriboreq Sísa itene Wahnahnseqsabé, Séhréh aitáhtao ue púrerúne.

<sup>12</sup> Itensabé anotah irútábóírúne. Mina únanserah iteitereq ómi kehinánseqsabé anotah irútábóírigéheéq itensabé púreraitone.

<sup>13</sup> Itega mirairataqmé Manikánka págege aitahnaraqmé kaweqtaq míá míaigehe. Mókake itene Wahnah Sísareq ómi wensabé aiq pútare atáh kéreqka kiwekue tuigéhe. Mitaqkake ite Maniká Iteriboba míanehe irataq íre ahbabária peh kaweqtaq míagehe.

## 4

### *Mó kené ahre weh abariiyehboq pehragahro i ehwéhne.*

<sup>1</sup> Itene iyahnabo anímáríno, itega Manikáne kaweq sansá íwáhnoruraunaq ahbebéq mira aruqarurowe. Itene Wahnah Sísa áwírue teiníe. Mina onserah ahriahri kawerue miraigeheéq pagu pagunéq teiátáune.

<sup>2</sup> Sísa itene anotah wahnáhnká teríero urainsabé wene sánsá íwáhnoruraunaq ahtebarowe.

<sup>3</sup> Mó kené ahre weh abariiyehboq pehragéq peh kaweqtaq mía míaoro. Minawé Manikáne sansáne.

<sup>4</sup> Itene ahbabáq iwiáh sueq tabasíwe méq Maniká awahbeh sansánoro.

<sup>5</sup> Maniká íre tagaríeh áninká ahre ahrari tagéna, Pehipi abariinie íwíáhire. Itega mina tahnaniyeho.

<sup>6</sup> Mó aníné ahre abari anímé mi iníné awehkawa moq ahbabáratéhre. Itene Wahnah Sísaga mina tahnza áhbábáq ké kamah arinawire. Minayabe menahmé págegeue teiátáuge.

<sup>7</sup> Mina tahnza áhbábárigheéna Manikánka ite íáhrabéna omaq itáráiro? Ahqáho. Írakaumo. Peh kaweqtaq mía míaigeheéna íáhrabéna omaq itáráire.

<sup>8</sup> Mi ehwéhnsábé anetaníbo íwíáho kegá íre peh wehukene ehweh anterúáhwe. Írakaumo. Sega Manikáne ehweh anterúáhwe. Manikánka ite séhréh aitankeheéna Wenawa iteba eqmataire.

### *Peh kaweq sansánoro i ehwéhne.*

<sup>9</sup> Sísa tagaríah kékabé irutaboiré ehwehmé Manikánka aiq íwáhnori puaq itega mi ehwéh íre sehiranue teienéhe.

<sup>10</sup> Itewe Másérónia marákórápéq Sísa tagaríah kékabé irutaboirowe. Itene iyahnabo anímáríno, ahriahri irutaboiroro éq pagu pagunúne.

<sup>11</sup> Pehwehrue mía míaoro. Íre itereq wehgaq naneqme pehragéq peh iteitene naneq auráq matíáhro. Taoraho iyehboq ibobiah taebewe arambehrioro. Mi ehwéh aiq teiátáuge.

<sup>12</sup> Mirairataq Sísa íre tagaríah kégá itene sánsá tagéra kaweq ke wóe éra itensabé iwíáh iwíáh aitagéhe. Mirairataq ite tabonah ke íre míagehe.

### *Itene Wahnahnka kiweküe ite tumeirankéhe i ehwéhne.*

<sup>13</sup> Itene iyahnabo anímáríno, itega kawerue iragéhboq pukia ké ehweh teienéhe. Íre ahtebah kegá pusa kékabé ibitunatúnáno serahniyehboq teienéhe.

<sup>14</sup> Sísa pukéna oga úkúnsabe aiq pútare atone. Aiq pútare ateq ite tagarionawe wensabé aiq pútare ató ke pukotaq Manikánka organúq sitankéhe. Sísa tuinagake wereq sereq moraráq tuoneherawoe.

<sup>15</sup> Itene Wahnahnka íwáhnorurai ehwéh teienéhe. Itene Wahnah Sísa tuinagake ite oga míona kegá pukia ké íre kiotaikorahúne. Írakaumo.

<sup>16</sup> Mitaqkake Manikánka anotahtaq sawaiinae. Íopeqté kéné wahnahnka moq sawaiinae. Manikáne pembíáhnka anotahtaq ehwehninae. Ehwehníaraq itene anotah wahnáhnká íopeqté tuinawire. Tuinaraq wensabé aiq pútare atera pukuro kewé ebeq irigigehe.

<sup>17</sup> Anehe íopeqté kégá ite oga míona ke tumeiqmera itene Wahnahpa móitagéhe. Íopeq írabúyá kéhrabeq irigira kereq moraráq kie kiugmianéhe. Mitaq itene Wahnahnseq piehgionéhe. Piehgiónaraq weba ahriahri mía míaonehe.

<sup>18</sup> Itereq íréhra kerekne irupipeq eyoyóinkehboq mah ehwéh terieq moraráq iwíáh iwíáhoro.

## 5

### *Sísa tuina tanáhráqsábé kawerue sokahue méq áwénunonehe i ehwéhne.*

<sup>1</sup> Itene iyahnabo anímáríno, wega tuina wehekáhmé itega íre sehiranue teieráhúne.

<sup>2</sup> Inokáhpeq wehukega sene ménsámehnsá íre wahnahno tanáhráq aebó áninká sire. Mina inserah itene Wahnah tuina tanáhráq sinawire. Minawé ite tagaríhwe.

<sup>3</sup> Mitaqkake wehukega mahra íwiahéra, Amahnága peh kaweq tanáhráre. Ite peh kaweqtaq míone íwiahigehe. Iwiahirataq íre kaweq sunúqká seba apubúue séna kamah arinkéhe. Kía miéh íninká ani maqmianaitaq apubúue érire. Mina inserah mi tanáhráq apubúue sinawire. Apubúue sína puara wehukega íre pehbeheráh pokorahowe.

<sup>4</sup> Itene iyahnabo anímáriño, aebó áninká apubúue sinserah Sísaga apubúue tuinawire. Ite íre sunkíkírirabeqte ké míahwe. Minayabe mi wehekáh sína tanáhráq íre áhtenigehe.

<sup>5</sup> Ite wéhékáh peh téhrehrabeq kaweqtaq mía míao ke wóe. Ite íre inokáhpeq sunkíkírirabeq míona ke úne.

<sup>6</sup> Minayabe íre irasa kégá sugáhnserahniyehboq peh tótuméq uqmatianehe.

<sup>7</sup> Suga sugao kegá inokáhpeq sugáhwé. Píah nah kegá inokáhpeq múguwahgu agowe.

<sup>8</sup> Ite wéhékáh nogó ké tahnsa ké míona puaq tabasíwe míaneheqmúne. Itega Sísansabé aiq pútare ateq mó keyábé irutaboironehe. Minawé itene tehnke tahnsane. Sísaga ite kaweraitráinsabé mókake ite tumeirankéhe íwiahúne. Mira íwiahwé itene káhpahraté miraia ayáhúq tahnsane.

<sup>9</sup> Manikánka ite anotah kamáh ainieéna íre omaq itáráire. Írakaumo. Itene Wahnah Sísá Karáhéga ite kaweraitena mókake tumeirankeheéna omaq itáráire.

<sup>10</sup> Ite oga míáhnaraq Sísaga tuinabirapómo. Ite pukonaraq tuinabirapómo. Wega itene ahbabáqsabe pukú púana tuinagake weba oga mía míaoneheqmúne.

<sup>11</sup> Iteitene irupipeq eyoyóinkehboq mi ehwéh we teawíoro. Menah itega aiq mirauron-serah mókakeakáq moq mira aruqaruroro.

### *Ite moke kaweq sansá miraigeheéna Manikánka séhréh aitáhráhi ehwéhne.*

<sup>12</sup> Itene iyahnabo anímáriño, ite íwáhnorigeheéna Manikánka itetaq wahnah ke omaq sitáráire. Ite Sísane sánsá ahtebéq kawerue sehgigeheéra arambehriue íwáhnorowe. Sensíwiq pankereq sensabé íwiah íwiah arítáhro.

<sup>13</sup> Segá mi arámbéhri miraonsabé irutaboirue sensabé íwiah íwiah arítáhro. Iteite peh morá íwähéq pehwehrue míáhro.

<sup>14</sup> Itene iyahnabo anímáriño, teiéna ehwéh írátáhro. Taoraho keyábé, Kawerue arambehrioro arítáhro. Áhre keyábé Manikáne ehweh ahreraq sitáhro. Mareqmarero ke séhréh arítáhro. Ómi mi kebá méq uwaréqme ke míáhro.

<sup>15</sup> Ite ahbabáraitéhra kewé íre ahbabárarítáhro. Peh ahriahri Manikáne animári we séhréh atéhéq pehrápeqte ké moq séhréh arítáhro.

<sup>16</sup> Ahriahri iru eyoyó ke míáhro.

<sup>17</sup> Púreq aruqaruroro.

<sup>18</sup> Kaweq sunúq íre kaweq sunúq ahriahri Manikánsabe, Kaweróne ateq iwíah íwiah atáhro. Minawé Maniká awahbeh sansáne. Ite Sísá Karáhé tagaríah púaq mina tahn-sanoro.

<sup>19</sup> Manikáne Awanka iwíah aitená miraoro ínawe ahqáho atého.

<sup>20</sup> Manikáne ehweh irare kené ehwehnsabé siwiréh ariteq anetaníbo íwáhiyeho.

<sup>21</sup> Moke íréhra ehwéhkákáq wehukene sansánkákáq íwiahue tagéq peh kaweq ehwéh sehgieq kaweq sansá ambubu atíáhro.

<sup>22</sup> Moke ahbabáq sansa pehragahro.

### *Páhsí parabaginai ehwéhne.*

<sup>23</sup> Maniká aru ukiréh áninká wewega itene iru ukiq itena kaweq iwíah aitankéhe. Wega iteiuwankakáq itene irupipeqkákáq itene inonkankakáq wahnahnaitankéhe. Itene Wahnah Sísá Karáhéga tuinagake ite íre ahbabária peh kaweqtaq míagehe.

<sup>24</sup> Omaq itárái anínká séhréh aitankéhe. Wega irari ehwéhmé ahriahri sehgó ání púana séhréh aitená mirainawire.

<sup>25</sup> Itene iyahnabo anímáríno, itensabé púreraitáhro.

<sup>26</sup> Ómi mitaq Sísa tagaríah ké mehweh arítáhro.

<sup>27</sup> Sísa tagaríah ké moke iragéhboq mah pahsí sáhnsáhóro. Itene Wahnah áwírue sáhnsáhóro teiúge.

<sup>28</sup> Itene Wahnah Sísa Karáhéga ite arutaboiréna séhréh aitéhre.

## 2 Tésárónáíka Ebeq sáhnsahwe ahtebé ehwehne.

Táhmaro Tésárónáíka suwahpeqte kégá Sísaga tuina tanáhráqsábé múguwahgu iwíáhéra, Wega aiq kowekuraire ue síwáhnoruwe. Poraga mi ehwéh irena mi kegá aiq pútaq ehwéh siahtebageheéna mah pahsí sehiranúwe. Wega sensabé, Péhe éhwéh pehragéq taora-hoiyehboq Sísa itene Wahnahne sánsá tauntahunue sehgióro ue mah pahsí sehiranúwe.

### **Poraga Tésárónáíka suwahpeqte ké anehe siu pahsíe.**

<sup>1</sup> Ite apáhránító íwíq Pora, Sáíra, Tímóti, míone. Itene páhsí sáhnsahwe tagahro. Tésárónáíka suwahpeqte Sísa tagaríah kéo, itewe Maniká Iteriboreq Sísa Karáhē itene Wahnahnseq moraráq mía míaowe.

<sup>2</sup> Mía míaonsabé Maniká Iteriboreq Sísa Karéhéreqka ite séhréh aitera itene iru ukiq itagéhe.

#### *Íre kaweq sunúqkákáq Sísa tagaríah kégá wene sánsá kawerue sehgiro ehwéhne.*

<sup>3</sup> Itene iyahnabo anímáríno, Sísame sánsá aiq kawerue ahtebéq tábúsoqme sehgirowe. Itega wensabé wensabé arutaboiratéhowe. Menah peh ákáhtaq ahtebéq irutaboirurowe. Amahnága anotahtaq ahtebéq irutaboirurowe. Minayabe itensabé ahreraq matawéq Manikánsabe kaweróne ateq iwiáh iwíáhúne.

<sup>4</sup> Íre kaweq sunúq mó kegá íwíoqnarotaq itega Sísame sánsá kawerue ambubu atawéq sehgirowe. Anetaníbo íwíáh íre iwiáhia peh Sísame sánsá aiq pútare ateq wene sánsá tábúsoqme miraowe. Minayabe ite mó kehiná suwahpeq Maniká tagaríah kereq míonaraq itene kaweq sansá teri terinúne.

#### *Sísaga tuinagake we íre tagaríah kékamah arie ehwéhne.*

<sup>5</sup> Sísame sánsá sehgiró puara mó kegá íwíoqnahwe. Minayabe Manikánka itensabé, Kawerowe aitahnaq mókake wega wahnahnirabeq awaq miagéhe. Wega wehuke saraqme sainsuahnaraq peh tábúsoqme mirainkehe.

<sup>6</sup> Manikánka peh tábúsoqme sansánue ite íwíoqnah ke ehweh págegeue kamah arinkéhe.

<sup>7</sup> Sísame íopeqté tuinagake itereq itereqne íerime parabaruankéhe. Mitaqkake itene Wahnah Sísame wene págege íopeqté kereqka anotah iróbínánínaakáq tuoneherawoe.

<sup>8</sup> Túírataq ite Manikánsabe iuwahriehre éra Sísa itene Wahnahne ehweh íre sehgió kékamah arinawire.

<sup>9</sup> Kamah arinara se itene Wahnah míéhrabeq ahriahri íre míaneherawoe. Wega téhrehrabeq págegeue arambehriirabeq íre míaneherawoe. Se peh iraipéq ahriahri méra síéríayabé kamah oneherawoe.

<sup>10</sup> Sísa tuina wehekáh we tagariona ke, wensabé aiq pútare atona kegá wensabé anotahtaq iwiáh iwiáh atanéhe. Itega teiátáuna ehwéh Sísa éhwhehsabé aiq pútare uro puaq ite moq mitaq méq wensabé iwiáh iwiáh atagéhe.

#### *Sísa tagaríah kégá wene ehweh kawerue sehgihehéra púreru ehwéhne.*

<sup>11</sup> Mókake sína tanáhráqté náneqsabé iwiáhquéq itensabé púreréq, Séhréh arito ue púreraita aitaúne. Manikánka ite omaq itena, Kaweq sansánoro aitáráire. Ite Manikánsabe aiq pútare ateq kaweq arámbéhríoneheqmúne urowe. Itega moke wega teiu naneq kawerue miraigeheéna págege aito ue púreraitone.

<sup>12</sup> Itene anotah Wahnah Sísa áwíq pankereq wensabé iwiáh iwiáh atagehehehéq púreraitone. Wene sánsá kawerue mirairataqmé Maniká Iteriboreq itene Wahnah Sísa Karáhéreqka iteíwíq pankerera kawerowe aitera ite séhréh aitagéhe.

## 2

*Manikáne ehwehnsabé awahrieh aní éhwehne.*

<sup>1</sup> Itene iyahnabo anímáríno, itene Wahnah Sísa Karáhéga tuinagake itereq míageheéna tumeirankéhe. Mi tanáhráq múguwahgu iwíáhiyehoéna kawerue irageheéna teiníe.

<sup>2</sup> Mi wehekáh aiq sótaikuraire e ke míáhwe. Mó anínká iwíáhéra, Manikáne Awanka iwíáh aintaráime aiq sótaikuraire uraire. Mó anínká Manikáne ehweh síwáhnoréna, Aiq sótaikuraire uraire. Mó anínká péhenéna, Ite Porarehga páhsipéq mi wehekáh aiq sótaikurai ewhéh aiq sehiranurowe uraire. Sene ehweh íratíowana iwíáh kikirirana irupipeq íre kawerínehboq Sísa aiq tutaire uro ewhéhnsabé íre aiq pútare arítáhro.

<sup>3</sup> Péhe éhwéhnsabé aiq pútare arítéhboq íratíáhro. Sísa tuina wehekáhmé íre pehipi tuinawire. Írakaumo. Ebeqme áhnte saiyo kegá Sísane sásá suera wensabé ahqáho ataneherawoe. Mitaqkake Manikáne ehwehnsabé awahrieh anímé, iraipéq míanaína anímé áboraraginawire.

<sup>4</sup> Áhnte kegá, Mina itene maniká míre éra iwíáh iwíáh atáhwe. Áboraragína anínká moke mi naneqsabé ahqáho inawire. Minawarimé abehq nánere éna wenáwíq pankerena ínébataq anotah aní múge inawire. Manikánsabe iwíáh iwíáh atona nahtápéq kiwéna, Íné Maniká múge inawire.

<sup>5</sup> Iteba míarautaq mah ewhéh aiq teiátáuge. Minawé aiq ibitagiro?

<sup>6</sup> Mi aní amahnága íre ábóraq míáhrahinsabé tagaríáhwe. Manikánka mi tanáhráq aiq awehraq mire iwíáhínaraqmé we áboraraginawire.

<sup>7</sup> Amahnága ahkaragára sansámárimé peh kopípéq kéhre. Ahkaragáraga saiqnariéh anínká pokíñaraq mi sansá áboraraginawire.

<sup>8</sup> Téhwe Manikáne ehwehnsabé awahrieh anínká áboraragínana anehe Sísa tuinae. Itene anotah Wahnáh téhreh naneqkakáq tuinaraq wene áwéhipeqté éúqká mi aní tabiqsuankéhe. Téhreh naneqka mi aní íre kaweraruanawire.

<sup>9</sup> Manikáne ehwehnsabé awahrieh aní sínaraq owainawanka págege atahna puana wega péhe ótág sásánkákáq íre miraorahi sansánkákáq mirainawire.

<sup>10</sup> Mi anínká áhnte ahbabáq sásá miraéna iraipéq pokira keyábé wene péhe sásánsabé, Aiq pútare aintáhro aritanawire. Segá aiq pútaq ewhéh Manikáne kawerarite ehwehnsabé suwahríáhna puara mi aníné péhe sásánsabé aiq pútare atera iraipéq pokigehe.

<sup>11</sup> Minayabe Manikánka sene iwíáh íre kaweraritanae. Segá aiq pútaq sansánsabé, Ite iuwahriehre ira puana Manikánka péhe sásánsabé aiq pútare atáhro inae. Minayabe se péhe sásánsabé aiq pútare atagéhe.

<sup>12</sup> Segá aiq pútaq ewhéhnsabé íre aiq pútare atera peh ahbabáqsabe suwahbáhna puana Manikánka anotah ewhéh aritená sainsuanawire.

*Manikánka ite meirena kaweraitankeheéna aiq omaq ito ewhéhne.*

<sup>13</sup> Itene iyahnabo anímáríno, Manikánka itensabé arutaboiraitéhre. Itega íre ibitarusa peh itensabé iwíáhéra wensabé iwíáh iwíáh atone. Wega ite meirena kaweraitankeheéna téh omaq itowana Wenawanka ite kaweqtaq míageheéna moq omaq itowe. Itega wene ehwehnsabé aiq pútare atáró puana Manikánka kaweraitáráire.

<sup>14</sup> Itega teiátáuna ewhéh aiq pútare aitárónsabé itene Wahnah Sísa Karáhé téhrehnkakáq míéhrabeq pokigeheéna omaq itowe.

<sup>15</sup> Minayabe íwáhnorurauna sansá ambubu atíáhro. Itene iyahnabo anímáríno, mi sansá íwéhipeqté éhwéhnikákáq páhsipéqté éhwéhnikákáq íwáhnoruraune. Mi ewhéh kawerue ambubu atíáhro.

<sup>16</sup> Itene Wahnah Sísa Karáhéreq Maniká Iteriboreqka itensabé sirutaboiróye. Segá itene irupipeq aiq kaweraitáróyansabé itene irupipeq ahriahri eyoyóinae. Ite séhréh aitera oga míaoneheqmúne iwíáh aitáráóye.

<sup>17</sup> Itega kaweq arámbéhríeq kaweq ehwéh irarigeheéra sega ite kawerue séhréh aitera págege aitagéhe.

### 3

#### *Manikánka ite séhréh aitankéhboq púreraitáhro i ehwéhne.*

<sup>1</sup> Itene iyahnabo anímáríno, mó ehwéh kéhre. Sísa itene Wahnahne ehweh abae aginkehboq itensabé púreraitáhro. Itega mi ehwéh téh írátótaq kawerue ireq ambubu atiarowe. Mó kegá mina onserahnigehboq púrerarítáhro.

<sup>2</sup> Sísane ehweh teriunaraq mi ehwéhnsábé mó kegá aiq pútare atáhwara mó kegá íre aiq pútare atáhwe. Íre aiq pútare atáh ké ahkaragára ahbabáq kega iubíyehboq púreraitáhro.

<sup>3</sup> Itene anotah Wahnáhnká anetaníbo íwíáh íre iwíáhia peh kawerue wahnahnai-tankéhe. Owainawanka ite ahbabáraitehnehoéna itene anotah Wahnáhnká séhréh aitená págege aitankéhe.

<sup>4</sup> Sehgíoro urauna ehwéh aiq kawerue sehgíowe. Itega iwíáhúnawe, Mókakeakáq kawerue sehgigéhe íwíáhúne. Itene Wahnahnka mi iwíáh aitéhrana irupipeq kawerire.

<sup>5</sup> Itene anotah Wahnáhnká iwíáh aitahnaq Manikánka arutaboiri sansá iahtebagehe. Sísa Karáhégá wene arambehri ambubu atawéna kawerue sehgjunsarah miraigehe.

#### *Ómiga arambehrioro i ehwéhne.*

<sup>6</sup> Itene iyahnabo anímáríno, itene anotah Wahnáh Sísa Karáhé áwírue teiníe. Táhmaro Sísa tagariáh kégá taorahoéra íwáhnorurauna ehwéh anterúáhwe. Mina tahnsa kéreq íre míáhro.

<sup>7</sup> Ite tagariáhmé iteba míaraunaraq íre taorahouraune. Itega miraurauna serahnoro.

<sup>8</sup> Iteba míaraunaraq itene tópah pehipi íre naraune. Írakaumo. Inokáhpeqkakáq wéhékáhnkakaq págegeue arambehriuraune. Iru págege aitéhoéq íre ineh inehia itene táhutahuqsabé arambehriuraune.

<sup>9</sup> Íwáhnorúnayabé itega táhutahuq náiéro irarurauno? Írakaumo. Náiéro íre iraruraune. Itega arambehriurauna sansá tagéq mina tahnsanigeheéq mirauraune.

<sup>10</sup> Iteba míaraunaraq mahraréq, Arambehriyabé taorahoí aní tópah íre náiéro uraune.

<sup>11</sup> Amahnága ite táhmaro peh taorahoéq íre arambehriowe. Peh íre itereq wehgariraq irare irareowe. Minayabe mó kegá teiátówaq írátáúne.

<sup>12</sup> Itene anotah Wahnáh Sísa Karáhé áwírue taoraho keyabé mah ehwéh teríero aitone. Mahraréq, Itene táhutahuq mewe nagehboq tabasíwe méq kawerue arambehrioro teríero.

<sup>13</sup> Itene iyahnabo anímáríno, kaweq sansá miraéyabe taorahoiyehboq peh ahriahri mira aruqaruroro.

<sup>14</sup> Mah pahsíípéqté éhwéh anteruahna aní peh áwé tagahro. We ayehitawiankéhboq pehragéq weba íre kowíáhro.

<sup>15</sup> We naruo aní míre íwíáhiyeho. We iteruwahrah aní púana wega tábúsoqme íwíáhinkehboq peh kaweq sansánúno págegeue teawéro.

#### *Iru ukiq itahráhi ehwéhne.*

<sup>16</sup> Itene anotah Wahnáhmé iru ukiq itahráhi aníne. Kaweq sunúqkákáq íre kaweq sunúqkákáq ahriahri wega itene iru ukiq itahráhire. Wega itene iru ukiq itena iteba mía míainkeheeéq púrerúne.

#### *Porane páhsí parabaginai ehwéhne.*

<sup>17</sup> Íné Poraga amahnága ínénéne niyahtate mahna parabaginai ehwéh sehiranuge. Moke ínéga íátáu pahtí mahna tahnsa séhírá káráire. Mahna tahnsa séhíramé peh ínénéne sehirá míre.

<sup>18</sup> Itene anotah Wahnáh Sísa Karáhégá ite moke séhréh aitéhre.

## 1 Tímóti Ebeq sáhnsahwe ahtebé ehwehne.

Tímótine anowawé Asiu iní míowana wenabowe nahnsa aní míowe. Poraga Tímóti áwáhnorúwana wega Porane ehweh tábúsoqme sehgiwe. Mah pahsíipéq Poraga Tímótinsabé mahrarue teawena, Péhe éhwéh irare keyábewé, Manikánsabe iwiáh iwiáh ate sansánsábewé, Sísa tagariáh kéráq wahnahno keyábewé, Sísa tagariáh ké síwáhnoréna kaweq sansá sehgleyabewé, orenínsó keweínínsó séhréh ariteyabewé, tauntahunue arambéhriýabewé, móneyabé kawerue iwiáhéyabewé, áwáhnorúwe. Poraga mah ehwéhnikákáq mó ehwéhnikákáq mah pahsíipéq sehiranúwe.

### Poraga Tímóti ebeq awu pahsíe.

**1** Tímótio, íné Porane páhsíi sáhnsahwe tagáhno. Sísa Karáhéreq Maniká ite kaweraitéh ánínseqka, Sísa éhweh kosíwáhnorúno aintera eqmaq núwátóye. Mókake Sísa Karáhéba kaweq matábúrápéq oga mía míaonehe iwiáhúne.

**2** Ínéga Sísa éhweh áwáhnorurautaq ahtebarona puah are nénahni úkurone. Maniká Iteriboreq Sísa Karáhé itene Wahnahnseqka are séhréh atera sirutaboiratera arene aru ukiq atagéhe.

#### *Péhe éhwéhnsábé ahqáho ataneheqmúne i ehwehne.*

**3** Íné Másérónia marákórápéq pokinaurautaq arensabé, Épésa suwahpeq míahno éna amahnága moq mitaq míahno teawúge. Táhmaro areba míah kégá péhe éhwéh síwáhnorowe. Arega mi keyábé, Itene péhe éhwéh mó síwáhnoriyehboq túbáh agoro terio.

**4** Áwahe ehwehnkakákáq sigaqnaréh síwíqmari iwiáho ehwéhnikákáq síwáhnorowara írah kégá ehwehowe. Mina tahnsa éhwéhnikáwé peh müguwahgu iwiáh aritahnara Manikáne sansá íre ahtebahrahowe. Minayabe, Túbáh agoro terio. Sísansabé aiq pútare atéhranka ahtebahrahowe.

**5** Kawerue síwáhnorinaraq íréhra kegá ahbabáq íre miraia sirupipeq mó keyábé sirutaboiraritagéhe. Sirupipeqté áhbabáq sánsánsábé íre sirutaboiréra peh kaweqlaq míéhransabe sirupipeq pehwehrue míagehe. Sísansabé aiq pútare atéhra puara mó keyábé sirutaboiraritagéhe.

**6** Táhmaro kegá mi kawéq sánsá sinehepeq suera peh seyene iwiáhéra peh abehq éhwéhmárínowe.

**7** Segá Manikánka sehgóro ú ehweh síwáhnoréyabe suwahbówe. Ite aiq ahtebóne iwiáhéra síwáhnoro éhwéh sirupipeq íre irasa pehipi irareowe.

**8** Ite tagarionawe Mósísiga sehgóro ú ehwehnká wehukene ahbabáq sansa sokigorahi éhwéhne. Mi éhwéhniká ahbabáq sansa sokigi inkeheéna Manikánka mi éhwéh omaq atowe. Mi éhwéhniká miraínaraq aiq kaweq éhwéhne atone.

**9** Mósísiga sehgóro ú ehwehmé íre peh morá kaweq keyábé sehgóro irarúwe. Írakaumo. Wene ehweh anterúáh kewé, píribahri kewé, Manikánsabe suwahrieh kewé, ahbabáq kewe Manikáne sansánsábé suwahriehre éra peh mah marákóipéqté sánsá sehgóro kewé sinoibo subiq súáh kewé mó ke subiq súáh kewé moke mina tahnsa kékabéwé mi éhwéh irarúwe.

**10** Mó kené ahre weh abariira kewé wehukenínká mó áwáhu wehukéní ahkaragára sansá mirao kewé mó kené animári aebóo kewé péhe éhwéh irare kewé mó keyábé péhepehe aritewé moke mó íre kaweq sansá mirao keyábé Mósísiga sehgóro ú ehweh teriuwe. Moke mina tahnsa ahbabáq kégá aiq pútak éhwéh anterúáhwe.

**11** Aiq pútak éhwéhmé íre mó éhwéhne. Írakaumo. Peh morá Manikánka korerio teníátái éhwéhne. Ínéga wene kaweq éhwéhmé teríú aní múge. Mi éhwéhniká, Maniká páge

anínéna anotah tehrehrabeq mía míai aníne teíre. Minayabe iwíáhéra wensabé iwíáh íwíáh atóge.

*Manikánka wensabé arutaboirúnsabe Poraga kawerónne ato ehwéhne.*

**12** Itene Wahnah Sísá Karáhéga wene arambehri mirainkeheéna eqmaq núwátáire. Ínéga kawerue arambehrinawire íwíáhéra págege aintáráire. Minayabe kawerónne atóge.

**13** Íné Sísá íre tagariarautaq íné wene naruó aní míárauge. Wene naruó aní ména wensabé áwíoqnéna éhruru atáráuge. Wensabé íre aiq pútare atena peh mágwuhagú aní ména mi ahbabáruraugana wega ínénabe arutaboiraintena insahwé aintáráire.

**14** Itene Wahnah Sísá Karáhéga iwíáh aintena íné anotah sehréh aintárái puana wensabé aiq pútare atena nirutaboirurauge.

**15** Ahbabáqka ite saiqnariaraitaq Sísá Karáhéga ite meirena kaweraitanieéna mah marákóípéq tumíowe. Tumío ehwéhmé anotah kawéq éhwéh púaq ómiga aiq ahtebahrahúne. Ahtebéq aiq pútaq ehwéhne irarúne. Áhnte ahbabáq ké míáhwana ínéga ahbabáq aní míáraugana néne ahbabáqka moke mó kené ahbabáq kiotaikuraire.

**16** Kiotaikurairara mah kehiná kékínánká, Sísá ahriahri uwaresa ání míéhre tagageheéna wega ínénabe arutaboiréna kaweraintáráire. Kaweraintáráirara wehukega íné tagéra iwíáhéra, Ite moq kaweraitahráhire éra aiq pútare atéhransabé oga mérapeq awaq miagéhe.

**17** Manikámé we mía míai Wahnáh míre. We íre pukorahi aníne. Wehukene siuranka Maniká íre tagahrahewe. Webataq Manikáne. Ahriahri we anotah Wahnáh míéhre éq wenáwíq pankereq wensabé iwíáh íwíáh atone. Aiq mire.

*Ahbabáq sansansábé ahqáho ate peh kaweq sansá sehgio i ehwéhne.*

**18** Tímótio, are nénahni úkurone. Manikáne ehweh iraruro kegá are éhweh irarurowe. Minayabe sehgie sansa teawiníe. Segá iraruro ehwéh ahreraq matawé ahbabáq sansansásabé anotahtaq ahqáho ate Manikáne arambehri tauntahunue sehgio.

**19** Manikáne sansá ambubu atawé kaweqtaq míéhnaraqmé arene aru ukiqme míániewóne.

Táhmaro kegá ahbabárára siru págegeuronsabé anetaníbo íwíáhéra Sísane sánsá sinehepeq sutowe. Sinehepeq sutonsabé abehq úkurowe.

**20** Mina tahnsanuya aníté sensíwíq Íménéúsireq Árékásántareq míéhye. Segá Manikánsabe éhruruuyansabé owainawanka anotahtaq kamah arinara siahtebageheéna owainawapa míáhtao arítóge.

## 2

*Ómi keyábé púrerarítáhro i ehwéhne.*

**1** Téhwe sehgie ehwéh teawiníe. Ómi keyábé mahraoro terio. Manikánsabe kawerónne ue iwíáh íwíáh ateq mah kehiná kékínánká iwíáhue púrerarítáhro. Manikánka séhréh aritankéhboq púrerarítáhro terio.

**2** Ite pehwehrue méq tabasíwe méq kaweqtaq míanehboq wahnah kereq anotah anímárinseqsabé púrerarítáhro terio.

**3** Minawé kaweq sansáne. Manikámé ite kaweraitéh ání púana mi sansá miraúna keyábé awahbehre.

**4** Wega moke mah kehiná kékínánká aiq pútaq ehwéh ahtebéyabe awahbehre. Ahtebhrataq wega kaweraitahráhire.

**5** Manikámé peh morá áníne. Wehukega Maniká tagariageheéna mibeq mahbeq arítéh ánímé peh morá Sísá Karáhé míéhre.

**6** Ómi ite insahwé aitanieéna avehraq tanáhráq itene ahbabáqsabe pukúwe. Pukúnsabe Manikánka ite sokigiéna, Moke mah kehiná kékíná kaweraiteyabe nuwahbehre uraire.

<sup>7</sup> Mi ehwéh síwáhnorinkeheéna Manikánka eqmaq núwátáire. Íné íre péhenia peh aiq pútariahnsanuge. Nahnso kegá aiq pútaq ehwéh irera Manikáne sansá ahtebageheéna koreri terinúno éna eqmaq núwátáire.

<sup>8</sup> Íné nu wahbeh sansá teawiníe. Arega ómi kehiná su wahpeqte wéhyábé síwáhnoré mahraré, Weho, ibiahnsanome ehwehome pehragéq peh kaweqtaq méq iyahnkara pankeqme púreroro ue síwáhnorúno.

### *Ahreronsábé kaweqtaq míáhro arito i ehwéhne.*

<sup>9</sup> Mó ahréró síwáhnoro ahréróno, tabasíwe méq kawerue inerinerue míáhro. Áhnte awahriq naneq pehragéq peh áberáhna korósí sukiwe míáhro. Pásésuqme áhnte moné tahnsa korosíwé awahriq naneqmarínsábé íre iwíáh íwíáhoro.

<sup>10</sup> Íre iwíáhéq peh Manikáne ehweh sehgieq mó naneq mó naneq kaweq arámbéhríoro. Íre korósi peh itega kaweq arámbéhríome itene awahriq naneq tahnsa kéhre. Íné Manikáne sansá tagarióge irari inínká miraínaraq aiq kawerinae.

<sup>11</sup> Momiwíorabeq ahreronká íre ehwehnia peh ehiya méra Manikáne ehweh kawerue irera ahtebagehe.

<sup>12</sup> Momiwíorabeq ahre inínká weh wahnahnue síwáhnorineho. Írakaumo. Síwáhnorinehboq peh ehiyamé ehweh irankéhe.

<sup>13</sup> Ahrerono, írátíáhro. Téhwe Manikánka Éhráma mirarena anehe wene ahre Íwi mirarowe.

<sup>14</sup> Éhrámaga owainawane péhe éhwéh íre aiq pútare atowe. Írakaumo. Peh wene ahregá owainawane péhe éhwéh irena Manikáne ehweh anteruowe.

<sup>15</sup> Ahre inínká Sísane sánsá ambubu atawéna mó keyábé arutaboiréna kaweqtaq ména tabasíwe míahnaraqmé aiq kaweq sansáne. Mina tahnsa inínsónká ani maqmaréhrataq Manikánka kaweraritankéhe.

## 3

### *Peh kaweqtaq míáh kégá Sísá tagariáh kéráq wahnahnoraho ehwéhne.*

<sup>1</sup> Sísá tagariáh kéráq wahnahnéyabe awahbeh anímé anotah kawéq árámbehrí miraéyabe awahbehre. Minawé aiq pútaq ehwéhne.

<sup>2</sup> Sísá tagariáh kéráq wahnahné arambehri miraéyabe awahbeh anímé peh kaweqtaq mía míai anínká wahnahnorahire. Peh morá áhré matiéh ánímé, tabasíwe míeh ánímé, uwaresa ánímé, tábúsoqme iwíáhi anímé, nahnso mehwehue kiraboi anímé, Maniká awahbeh sansá kawerue síwáhnororahi anímé, peh mina tahnsa anínká Sísá tagariáh kéráq wahnahnorahire.

<sup>3</sup> Mi arámbéhrí íre wahnahnorahi anínsábé teawiníe. Píah néna múguwahgu aruqaruri anímé, móneyabé arutaboiri anímé, tobeh aruqaruri anímé, ehweh aruqaruri anímé íre wahnahnorahire. Peh uwaresa ánímé wahnahnorahire.

<sup>4</sup> Wene ani ahre kawerue wahnahní anínká Sísá tagariáh kéráq wahnahní aní míahrahire. Sibowáné ehweh íre irasa pehipi anterúáh ánímáríné sibowáwé íre wahnahnorahire.

<sup>5</sup> Wene ani ahre íre kawerue auráq matiahnaraqmé Sísá tagariáh kéráq árahue kawerue wahnahnorahiro?

<sup>6</sup> Peh amahnága Sísansabé aiq pútare atéh anínká íre wahnahnorahire. Peh amahnága aiq pútare atéh anínká wahnahníaraq píribahriéna, Íné anotah aní múge íwíáhinabomo. Iwíáhínaqmé Manikánka naho owainawa kamah awunserah kamah awinawire.

<sup>7</sup> Sísá íre tagariáh kégá, Peh kaweq aníne atáh ánímé Sísá tagariáh kéráq wahnahní aní míahrahire. We íre kaweq aní míre íwíáhirataq sega éhruruuirana owainawanka mi aní saiqnarianawire.

*Peh morá kaweq sansáno ke Sísá tagariáh kéné morábí matíáh ménsáméhnsátáq wahnahnoraho ehwéhne.*

<sup>8</sup> Peh kaweqtaq méra kaweq iwíáho kegá Sísá tagariáh kéné morábí matíáh ménsáméhnsátáq wahnahnorahowe. Píah naruqnaruro kewé, mó kené ménsámehnsánsabe aigará pabeki kewé íre wahnahnorahowe.

<sup>9</sup> Siru ukiqme méra peh Manikáne sansá kawerue ambubu atíáh kégá wahnahnorahowe.

<sup>10</sup> Téhwe pehgáriq arámbéhrí sieq áhwárawe tagahro. Tagehrataq kawerue aram-behriéra kaweqtaq mía míairataq morábí matiéhra mensáméhnsátáq wahnahnorahowe.

<sup>11</sup> Sene ahrero moq peh kaweqtaq mía míao inínsó míéhrataqmé sensuvehqsonka wahnahnorahowe. Sene ahreronká péhe éhwéh íre aritera peh tabasíwe míéhrataqmé sensuvehqsonka wahnahnorahowe. Sene ahreronká íre sibitarusa peh kaweq arámbéhríéra mó ke séhréh arítéhrataqmé sensuvehqsonka wahnahnorahowe.

<sup>12</sup> Peh morá áhré matíáh kewé sene ani ahre kawerue wahnahnó kewé mi arámbéhríráq wahnahnorahowe.

<sup>13</sup> Sísá tagariáh kéné wahnahnka kawerue wahnahnotaq tagah kegá sensíwíq pankeráhwé. Sensíwíq pankeráhwara kawerue wahnahnéra íre áhreia Sísá Karáhé éhwéh pahsuqme teriéwe.

*Manikáne sansá áwahewé anotah naneq mire i ehwéhne.*

<sup>14</sup> Pehgáriq tanáhráq areba koraganie íwíáhéna mah pahsí sehiranue áwúge.

<sup>15</sup> Areba íre apubúue konaraq arega Sísá tagariáh kégá momiwírarabeqte sánsámé Manikáne animáriásabé ahreraq matiankeheéna mah pahsí sehiranue áwúge. Maniká oga mía míairaq ite Sísá tagariona ke wene animári míone. Awankátate nah pegiqmárahnsérah ite Sísá tagariona kegá momiwírabeq aiq pútaq ehwéh pankerone.

<sup>16</sup> Ite kawerue tagarionawe Manikáne kaweq sansá nahomé kopéq kowana Sísá tutai puana amahnága ábóraragire. Wene sánsá áwahewé anotah nanere. Minayabe mah igónkónká aiq mahraréna,

We wehukení úkúwara wehukega we tagowaná

Manikáne Awanka wene sánsá peh kaweq sansáne atowe. Íopeqté kégá moq we tagowe.

Manikánka wene kaweq matábúrápéq tumerena,

Mahtaq anotah Wahnáh ání míahno atowe.

Mó kegá we éhwéh mah kehiná kékíná míáhrabeq teriéwara mah marákó márakóípéqté íráh kegá wensabé aiq pútare átahwe ire.

## 4

*Péhe éhwéhká wehukene iwiáh íre kaweraritéhre i ehwéhne.*

<sup>1</sup> Anehe tanáhráqmé táhmaro kegá wahnsane péhe éhwéh irera sehigéhe. Mó kegá owainawamaríné ehweh síwáhnorirara irera Sísane sánsá suagéhe. Minayabe Manikáne Awanka aiq pahsuqme iraruraire.

<sup>2</sup> Péhe éhwéh irera sirupipeq múguwahgu agéra ahbabáq sansansábé íre siyehitáhnara peh péhe éhwéh síwáhnorigehe.

<sup>3</sup> Péhe éhwéh síwáhnoréra, Mahbiga ahre mewe weh úkiyehboq peh ítaq mahbígáú mía míaoro éra mó naneq tahutáhúq órira míre ahriahri awehrioro éra síwáhnorigehe.

Moke táhutahuqme Manikánka aiq mirarowe. Minayabe wensabé aiq pútare atera aiq pútaq ehwéh íratiáh kegá wensabé kaweróne atera mi tahutáhúq pehipi nahwe.

<sup>4</sup> Moke Manikánka miraro naneqme aiq kaweq nanere. Minayabe itega íre awehria peh wensabé kaweróne ateq pehipi nanehe.

<sup>5</sup> Manikánka moke táhutahuq nah naneq mire insabé itega wensabé kaweróne atona puaq íre awehria pehipi nóne.

*Poraga Tímótinsabé Sísane kaweq arámbéhrí ání míahno ato ehwéhne.*

<sup>6</sup> Arega mah ehwéh Sísa tagaríah ké síwáhnorinaraq Sísa Karáhéne kaweq arámbéhri ání míankehe. Aiq pútare atahna ehwéhnká are págege ataráirah kaweq sansá ambubu atiarone.

<sup>7</sup> Ahbabáq áwahe ehwehmé, múguwahgu ehwéhmé pehfragáhno. Peh Manikáne kaweq sansá miraúno.

<sup>8</sup> Wehukene ayahnsa págege arite sansamé ákáhtaq kaweq sansáne. Manikáne kaweqtaq mé sansámé anotah kawéq sánsáne. Wene sánsá sehgió kégá amahnága oga míah tánáhráqkákáq mókakeakáq oga mía míaoneherawoe.

<sup>9</sup> Mah ehwéhmé aiq pútaq ehwéh míre. Ómiga irera aiq pútare atéhrataqmé aiq kawerinae.

<sup>10</sup> Maniká oga mía mía anínéna moke mah kehiná kékíná merirena kaweraritahráhire. Wensabé aiq pútare atáh ké aiq kawerarítéhre. Minayabe aiq pútare ateq págegeue arambéhriúne.

<sup>11</sup> Mah ehwéhmé síwáhnoré, Kawerue sehgió terio.

<sup>12</sup> Are íre anonani míahnayabé mó kegá awiréh atéhrataq ahqáho arito. Peh kaweq ehwéh iraré kaweqtaq mía míaé mó keyábé arutaboirúno. Aiq pútare atahna sansá ambubu atawé peh kaweq sansá miraúno. Sísa tagaríah kégá are tagéra arene sánsá miraigehboq teawú éhwéh sehgio.

<sup>13</sup> Areba íre apubúue konaraq wehuke míáhtáq Manikáne ehweh sáhnsahwe pahsuqme kawerue síwáhnorúno.

<sup>14</sup> Aboawah wehgá siyahnkaratáté arenaneq táhtoréra Manikáne Awanka iwíah arítárái ehwéh irarurotaq Manikánka págege ataráire. Sega iraruro ehwéhmé kawerue ahreraq matawé sehgio.

<sup>15</sup> Arene arambéhri kawerue miraúno. Ómiga tagéra kaweq sansáne íwíahigehboq teawú éhwéh ambubu atawé sehgio.

<sup>16</sup> Arerensabéákáq arega síwáhnoróna ehwéhnkákáq auráq matiahno. Teawú ehweh ambubu atawé sehgio. Mirainaraqmé íre arebataq áhnte arene ehweh írah kéréq moq oga mérapeq awaq miagéhe.

## 5

### *Poraga kaweq siwáhnóré salsa Tímóti teawu ehwéhne.*

<sup>1</sup> Arega aboawah wehreq orerónseq ehweh terínaraq píribahriinehboq arenabouránsábé tábúsoqme ehwéh teawenanserah pehwehrue terio. Mahbireq o menáhwénseqsabé arenábáq áwáhnorónanserahnue kawerue síwáhnorúno.

<sup>2</sup> Aboawah ahrérónseq orenínsónseq arenanoura auráq matawé séhréh atahnanserahnúno. Ahre ahrariyabé arenanahno auráq matawé séhréh atahnanserahnúno. Sene sinonkataq táhtoréhnehboq pehfragé séhréh arito.

### *Kéweinínsó kiraboé ehwehne.*

<sup>3</sup> Íre aninkákáq óréni kéweinínsábé kaweq sansánúno.

<sup>4</sup> Kéweiní wene aninseq anahwareq míéhrataq sega auráq matawéra kiraboigehe. Sinoiboga sene animári ebeq kirabouronsabé se ore orení úkirataq sene animárínká se kiraboigehe. Sene kárironaní kiraboéyabe seyene arambéhrie. Minawé Maniká awahbeh sansáne.

<sup>5</sup> Íre aninkákáq anahwankákáq kewéinímé orení úkínaraq wega iwíahéna, Manikánka séhréh aintankéhe ire. Minayabe wega wéhékáhnkakaq inokáhpeqkakáq Manikánsabe, Íné séhréh ainto éna púreq aruqarurire.

<sup>6</sup> Mah maráköipéqté náneqsabé arutaboiréna peh we awahbeh naneq sehgi kewéinímé pusa aní tahnsa míéhre.

<sup>7</sup> Minayabe kewéinínsósabé mah ehwéh kawerue síwáhnorúno. Sega kaweqtaq mía míairataq mó kegá se íre síéhruruigehe.

**8** Wehga wenawahrahreq wene kárironanínseq íre auráq matawéna kiraboiínaraq Sísane sánsá aiq anterúéh púana anotah ahbabáq sánsánire. Mi ahbabáqká Sísa íre tagariáh kéné ahbabáq aiq kiotaikire.

**9** Sísa tagariáh kégá morábí kiraboigehboq keweinínsó síwíq sehiranúno. Orenímé 60 opéq sotaiki orenímé peh morá wéhráq míarai inímé wenawíq sehiranare kirabooro arito.

**10** Mó kegá, We kaweq arámbéhrí mira aruqarururai iní míre atáh inímé kirabooro arito. Wene animári kawerue sóránkirai inímé, nahnsó mehwéh aritená kirabourai inímé, Sísa tagariáh kégá íre wahtopeqte surowana sigará pabeq pabeq arítárái inímé, suwahre ke soberurái inímé, mó ke kawerarítárái inímé mina tahnsa kaweq arámbéhrí mira aruqarururo keweinínsó síwíq sehiranúno. Mina tahnsa inímé orení úkínaraq Sísa tagariáh kégá morábí kiraboigehe.

**11** Kiraboirataqmé o ahré keweinínsó síwíq íre sehiranúno. Téhwe Sísa Karáhéne arambehri miraoneheqmúne iraréra anehe mi arámbéhrí sinehepeq suera wehkigehe.

**12** Mirairataqmé seyene ehweh anterúáhnsábé itene Wahnahnka ehweh aritankéhe.

**13** Segá taoraho ke úkéra mó kené nahtapeq poku pokuéra íre sereq wehgaq naneq mire éra éhruruirataq sensíwíq pehragáhno. Mina tahnsa keweinínsó síwíq íre sehiranúno.

**14** Íné teríumé o ahré keweinínsónká mó wehkéra ani maqmarera kawerue sóránkírataqmé kaweq sansá míre. Kaweq sansánowara itene naruoga sene kaweq sansá tagéra íre iéhruruorahowe.

**15** Táhmaro keweinínsónká Sísane sánsá sinehepeq suera owainawa kérówe. Minayabe tagariáhwe.

**16** Sísa tagariéh ínínká wenawahrah keweinínsó kirabo arito ato. Sísa tagariáh kégá keweiní kóréní wene iyahnabo íre míéhrataq wahba kirabo atahro arito. Peh morá sensuwahrah íre míáh keweinínsómé Sísa tagariáh kégá wahba kirabo aritahro arito.

### *Sísa tagariáh kéráq wahnahnko ke séhréh ariteq náriéro i ehwéhne.*

**17** Sísa tagariáh kéráq wahnahnko kegá kawerue wahnahnirataq sensíwíq pankereq awehraq apéq nári nárinoro terio. Segá Sísa éhweh tei teinéra íwáhnorirataqmé anotah iwiáh íwáh ariteq awehraq apéq nári nárinoro terio.

**18** Minayabe Manikáne ehwehnka aiq mahraréna,  
Káhoga sera sombirah arámbéhríínaraq wene áwéhraq íre múusú atáhro. Pehipi nankehe ire.

Wene ehwehnka mó mahraréna,

Ite séhréh aitéh ání awehraq apéq náwéro ire. *(Lo 25.4; Mátíyu 10.10; 1 Kórína 7.9)*  
Mina onserah Sísa tagariáh kéráq wahnahnko kegá kaweruwe arambehriirataq awehraq apéq nári nárinoro terio.

**19** Peh morá áninká Sísa tagariáh kéráq wahnahní anínsábé ehweh atahnaraq mi ehwéhmé íre iro. Téhranítégábópoq apahránítóbópoq ehweh atéhrataq sene ehweh iwiáhue tagáhno.

**20** Wahnah anímárínká ahbabárirataq áhnte wehuké momiwíorabeq mó wahnáh ání mó wahnáh ánínue ehweh arítáhro terio. Mó wahnáh kégá irera áhreéra kaweqtaq mía míaigehboq ehweh arítáhro terio.

### *Poraga Tímótinsabé miraúno i ehwéhne.*

**21** Peh morá sánsá ómi keyábé miraúno. Anotah anínseq arenawahrahreq mó sansá miraé moke mó ke mó sansá miraé anotah íre kawerinae. Ómi keyábé peh monseráhnue iwiáhue saraqmaro. Manikánseq Sísa Karáhéreq Manikánka omaq sito íópeqté kereká tagariáhwe. Segá tagariáhtáq mahna teawú éhwéh sehgio pahsuqme teiúge.

<sup>22</sup> Sísa tagaríah kéráq wahnahni aní míankeheé íre apubúue ayahnkara táhtoqme omaq ato. Mó anínká ahbabárínaraq arega moq mina tahnsaninehboq peh kaweqtaq mía míáuno.

<sup>23</sup> Are awahreé arupipeq érinsabé íre peh morá wání náhno. Náhníáq sera anonkakaq pehgáriq náhno.

<sup>24</sup> Mó kené ahbabáq ábóraq kéhrara tagah kegá ehweh arítáhwe. Mó kené ahbabáq amahnága íre ábóraq kék púana peh mókake ábóraq kanawire.

<sup>25</sup> Mina inserah wehukene kaweq arámbéhri ábóraq kékre. Kaweq arámbéhri íre apubúue ábóraq kahnaraq minaakaq mókake ábóraq kanawire.

## 6

### *Arambehrio keyábé kawerue arambehrioro i ehwéhne.*

<sup>1</sup> Sísa tagaríah kék arambehri keyábé mahraré, Itene wahnah kené ehweh kawerue ireq sensíwíq pankeráhro arito. Itene wahnah kegá itene sánsá tagéra Manikáne ehwehnsabé ahqáho atera wenáwíqsabe éhruruiyehboq kawerue arambehrioro arito.

<sup>2</sup> Arambehriraq atéh áninká Sísa tagariahnaraq wene arambehri áninká iwíáhénéa, Íné arambehriraq intéh ánime nánuwah tahnsá míeh púana peh taoraho arámbéhriinie iwíáhineho. Írakaumo. Kawerue iwíáhinkehboq mi aní áwáhnoruno. Mi anínká arambehriraq atéh ání arutaboirue séhréh atena kawerue arambehriinkehboq áwáhnoruno. Arambehrio kegá mira iwíáhirataq sega anotah kawéq árámbéhrió ke míagehe.

### *Mónayabé arutaboirome ahbabáq áwahe wíre i ehwéhne.*

Wehukega kaweq sansá miraigehboq teawú éhwéhmé ahriahri síwáhnoré kawerue sehgióro arito.

<sup>3</sup> Itene Wahnah Sísa Karáhéne aiq pútaq ehwéhká Manikáne sansá kawerue iwáhnorire. Mi ehwéh suena peh mó ehwéh áwáhnori animé

<sup>4</sup> we píribahri aní ména peh íre íréh ání míéhre. Peh ehwehýabe awahbeh aní míre. Wega síwáhnorirara wene ehweh íráh kéká mó keyábé íre kaweq iwíáhéra ehwehéra síéhruruéra

<sup>5</sup> tobehéra ahbabáq iwiáhowe. Ahbabáq iwiáhéra aiq pútaq ehwéh íre irera peh múguwahguowe. Múguwahguonsabé péhe iwíáhéra, Ite Manikáne sansá sehgiunayabé áhnte mensáméhnsá pehipi meyanheqmúne iwíáhowe.

<sup>6</sup> Manikáne sansá sehgiunaraq wega áhnte kaweq naneq nái náinire. Ménsámehnsánsabe íre irutaboiria peh wega nái naneq awehraq kékre iwíáhúnaraq itene iru ukiréhre.

<sup>7</sup> Iteinoréhga maqítáhtáq íre ménsámehnsánkakaq maqítáhwe. Ite pukonaraq íre itene ménsámehnsánkakaq meweq pukoneheqmúne.

<sup>8</sup> Minayabe táchutahuqkakáq korósiakáq kahnaraq, Aiq awehraq kékre iwíáhoneheqmúne.

<sup>9</sup> Áhnte moné meyanéhe iwíáho kéké ménsámehnsánsabe sirutaboiro kewé ahbabárorahowe. Sirutaboiro naneqka kahnkapi wah paríehnserahnire. Se sirutaboiro naneqka ahbabáraritéhre.

<sup>10</sup> Mónayabé arutaboiré sansamé ahbabáq áwahe wíre. Mónayabé sirutaboiro puara táhmaro kegá móne meyanheéra Sísane sánsá sinehepeq sutowe. Minayabe sirupipeq anotah uméh meyáhwe.

### *Oga mía mía sansá ambubu atawé sehgio i ehwéhne.*

<sup>11</sup> Are Manikáne ani móne. Wene ani míahnayabé ménsámehnsánsabe arutaboirineho. Moke íre kaweq sansá anehepeq suo. Kaweqtaq mé Maniká awahbeh sansá sehgio. Manikáne ehwehnsabé aiq pútare ate mó keyábé arutaboirúno. Kaweq sansá págegeue sehgie uwaresa ání míahno. Mi sansámárlínsabé arutaboiré sehgio.

<sup>12</sup> Árésísi anínká, Íné kiotaikinauge íwíahéna pehbeheráh pokire. Mina inserah arega Sísane sánsá ambubu atawé mahraue iwíahé, Íné kiotaikéna oga mérapeq awaq mianauge íwíahúno. Arega, Íné Sísansabé aiq pútare atena wene sánsá sehginauge iraruronaraq áhnte kegá írátówe. Mi tanáhráq oga mérapeq awaq miankeheéna Manikánka omaq atáráire. Minayabe oga mía mía sansá ambubu atawé sehgio.

<sup>13</sup> Moke oga míona naneqmarí Manikánka oga míáhro aitéhre. Manikánseq Sísa Karáhéreqka tagariehyataq teawú éhwéh iro. Wahnah aní wenáwíqtare Póntíasa Páíraga Sísa ehweh atotaq Sísaga íre áhreia pahsuqme teawuwe. Manikánseq Sísa Karáhéreqka tagariehyataq Sísaga pahsuqme teawunserah ínéga are teawúge.

<sup>14</sup> Sísaga íre áhreia pahsutainserah ínéga teawú éhwéh kawerue tábúsoqme sehgio. Peh morá áhwára áhwára sansá íre miraúno. Amahnágaákáq mókakeakáq itene Wahnah Sísa Karáhéga tuina tanáhráqkákáq kawerue sehgio.

<sup>15</sup> Manikánka webataq omaq atárái tanáhráq Sísa tuinawire. Maniká webataq moke mó wahnáhmári kiotaiqme aní púaq wensabé íwíah íwíah atone.

<sup>16</sup> Webataq íre pukorahi anínéna peh ahriahri mía míáéna wehukega íre pokorahi téhrehrabeq mía míaire. Wehukega sene siuratate we íre tagahwe. Segá we íre tagahra-howe. Wega ahriahri wahnahninkehe. Wensabé íwíah íwíah atone. Aiq miraonehe-qmúne.

### *Áhnte mensáméhnsá matíáh kékáyáhé éhwéhne.*

<sup>17</sup> Mah marákóípéq méra áhnte monéákáq ménsámehnsánkakaq matíáh kékáyáhé píribahri iyehboq sene ménsámehnsánsabe íre íwíah íwíahoro terio. Ménsámehnsánkakaq móneakáq apubúue taqnobagína nanere. Minayabe íwíah íwíahiyeho terio. Itene irupipeq eyoyínkeheéna Manikánka áhnte kaweq naneq nái náinire. Minayabe peh wensabé aiq pútare ateq íwíah íwíah atáhro terio.

<sup>18</sup> Kaweq sansá miraoro terio. Mó ke séhréh ariteq kawerarítáhro terio. Anah ke míéhboq wehweh ke míáhro terio.

<sup>19</sup> Mirairataqmé sene ogamé tanahráq peh kaweq tanahráq kanae. Mókake oga mérapeq awaq mera peh kagaorahi apéq meyagéhe.

<sup>20</sup> Tímótio, teawú éhwéh auráq matawé ambubu atiahno. Íre Manikáne íwíah peh wehukene íwíah ehwehmé pehfragáhno. Abehq múguwahgu éhwéh pehfragáhno. Mi éhwéhnsábé táchmaro kegá ahtebia éhwéhne atáhwe. Ahtebia éhwéhne atáh kégá péhe íwíahowe.

<sup>21</sup> Mi éhwéhnsábé íwíah íwíah kegá Sísane sánsá sinehepeq súáhwe. Manikánka itensabé arutaboiréna séhréh aitéhre.

## 2 Tímóti Ebeq sáhnsahwe ahbebé ehwehne.

Pora karábúsiipéq míotaq wega iwíáhéna, Ínéga pukinauge éna mah pahsí sehiranúwe. Mah pahsíipéq Poraga Tímótinsabé, Manikáne kaweq arámbéhrí ání míankehboq wene arampehri miraé tauntahunue arambéhríuno teawuwe. Wega ahabbabáq sansa anehe tanáhráhq sínaraqsábé sehiranéna we pukinaú ehwéhkákáq moq sehiranue Tímóti teawuwe.

### Poraga Tímóti anehe awu pahsíe.

<sup>1</sup> Tímótio, íné Porane páhsí sáhnsahwe tagáhno. Sísa Karáhé éhweh síwáhnorinkeheéna Manikánka iwíáhue eqmaq núwátáire. Wensabé aiq pútare atáh kégá oga mérapeq awaq mianeherawoe. Mi ehwéh wehuke terinkeheéna eqmaq núwátáire.

<sup>2</sup> Arewe nirutaboiru aní móne. Maniká Iteriboreq Sísa Karáhé itene Wahnahnseqka arensabé sirutaboiréra séhréh atera arene aru ukiq atagéhe.

#### *Sísa éhweh ayehitegurégúinehboq teri terinúno ú ehwehne.*

<sup>3</sup> Náinahbúréhga Manikánka sehgóro ú ehweh kawerue sehgiúwe. Ínéga moq kawerue sehgiúnsábé nirupipeq íre umehia peh kawerire. Wéhékáhkakaq inokáhpéeqkakáq ínéga púreq aruqarurutaq arensabé ahreraq matawéna púreratena Manikánsabe kaweróna ata atauge.

<sup>4</sup> Are áuwátáutaq ibisaronayabé niahrreraq matawéna arensabé nirutaboiratóge. Nirupipeq eyoyóinkehboq are tagéyabe níre.

<sup>5</sup> Arega Manikánsabe kawerue aiq pútare atahnawe niahrreraq kékre. Íné aiq tagariómé arenanahrá Áróísireq arenano Íyúnísireqka ebeqme Sísansabé aiq pútare atáróyah anehe arega moq wensabé aiq pútare atáróne.

<sup>6</sup> Néne niyahnkaratáté arenaneq táhtoqme púreratáráutaq Manikánka miraúno urai arámbéhrí teawena págege atáráire. Teawátái arámbéhríwe tauntahunue mira aruqarurúno.

<sup>7</sup> Manikánka áhreé sansa íre sokigi aiátáire. Peh págegeue mé sansamé, mó keyábé irutaboiré sansamé, tabasíwe mé sansamé sokigi aiátáire.

<sup>8</sup> Itene Wahnah Sísa éhweh teri terinéyabe íre ayehitegurégúúno. Karábúsiipéq míónsábé ínénsabe moq íre ayehitegurégúúno. Sísa éhweh teri terinónayabé mó kegá áwíoqnaneherawoe. Áwíoqnehransabé íre áhreia Manikánka págege atahnah teri terinúno.

<sup>9</sup> Wewene kaweq anímári míageheéna Manikánka omaq itena kaweraitáráire. Íre itega kawerue arambéhriraunayabé kaweraitáráire. Írakaumo. Peh wewe awahbeh iwíáhue séhréh aitena kaweraitáráire. Naho naho mah marákó márakó íre kotaq Manikánka iwíáhéna, Sísa Karáhéga mirainayabé wehuke arutaboiréna kaweraritanauge úwe.

<sup>10</sup> Arutaboiréna, Kaweraritanauge úwana Sísa Karáhé, ite kaweraitéh áninká marakóipeq tunsabe Manikánka arutaboiraitéh sásá sokigi aitowe. Marakóipeq tuena pukéna oga úkúnsabe amahnága ite pukéyabe íre áhreúne. Írakaumo. Itega tagarionawe Manikáne kaweq ehwéh irona puaq oga mía míaoneheqmúne.

<sup>11</sup> Manikánka ínénsabe, Sísa éhweh koreri teriné íné nuwahbeh ehwéh kosíwáhnorúno éna eqmaq núwátáire.

<sup>12</sup> Eqmaq núwátáirana teniátái ehwéh sehgiúnsábé níwíoqnahwe. Aiq pútare atáráu anímé aiq tagarió púana wensabé íre niyehitegurégúuge. Írakaumo. Manikánka teniátái arámbéhrí mókakeakáq Sísa tuina tanáhráqkákáq wahnahnaintahráhire. Íné tagariómé wega kawerue wahnahnaintanawire.

<sup>13</sup> Ínéga peh aiq pútaq ehwéh áwáhnorurauge. Moke áwáhnorurau ehwéh ambubu atiahno. Ínéga áwáhnoruraunserah mó ke síwáhnorúno. Sísa Karáhénsabe ahriahri aiq pútare ateq wensabé anotahtaq arutaboirúno. Wereq mía míaé síwáhnorúno.

<sup>14</sup> Manikánka áwáhnorurai ehwéh áhnte kaweq ehwéhnirah kawerue ahreraq matawé ambubu atiahno. Kawerue mirainkeheéna Manikáne Awanka itene irupipeq mía míaéna séhréh aitahráhire.

<sup>15</sup> Are tagariahnawe Pígérúsireq Érámogénireq moke Esia marákórápéqté kéreqka íné nuwera pokurowe.

<sup>16</sup> Íné karábúsiipéq míónsábé Ónésíma íre ayehitegurégúia séhréh aintaráinsabé nirupipeq eyoyúraire. Minayabe itene Wahnahnka mi karírónánínsábé arutaboiréna séhréh atankeheéna púreruge.

<sup>17</sup> Ónésíma Aroma suwahpeq suraitaq ínénsabe áhnte ninebahréna íné tagaraitaq séhréh aintaráire.

<sup>18</sup> Are aiq tagariahnawe íné Épésa suwahpeq míarautaq wega áhntetaq séhréh aintaráire. Séhréh aintaráinsabé itene Wahnahnka tuinagake Ónésímansabé arutaboiréna kaweróne atankeheéna púreruge.

## 2

### *Sísane arambehri sehgleyabe pabeqme ehwéhtáróe.*

<sup>1</sup> Tímótio, are nénahni úkurone. Are Sísa Karáhéne ani míahnana wega arensabé arutaboiréna séhréh atéhnsábé págege aní míahno.

<sup>2</sup> Áhnte kegá mírotaq are áwáhnorurauge. Manikáne ehweh kawerue sehgiera mó ke síwáhnororaho ke síwáhnorúno.

<sup>3</sup> Págege sontiá anínká éreyabe íre áhreire. Mina inserah arega Sísa Karáhéne arambehri miraónayabé áwíoqnehrataqmé íre áhreia peh kawerue mira aruqarurúno.

<sup>4</sup> Sontiá anínká wene kiápéténine arambehri kawerue mirainieéna wenawahpeqte árámbéhrí moq íre miraire. Írakaumo. Kíápéténiga kaweróne atankeheéna kawerue arambehrière.

<sup>5</sup> Árésiséna pehbeheráh poki anínká ápeq pehipi íre meyéhre. Árésísi sansá tábúsoqme sehgi anínká kiotaikínaraq ápeq meyéhre.

<sup>6</sup> Wahba só uqmarera náwe soráhwe. Ménsámhensá nera kahnaraq abobiah taebewe arambehrii anínká ebeq koawaq miankéhe.

<sup>7</sup> Mah pabéqmé éhwéhtáró iwíáhue iro. Itene Wahnahnka tábúsoqme iwíáh atahnaraq moke ahtebankehe.

### *Áwíoqnehrataq Sísane sásá sehgioneheqmúne ú ehwehne.*

<sup>8</sup> Kaweq ehwéh teawátáume ahreraq matiahno. Teawátáu ehwéhmé Sísa Karáhewé Tébítine anahwa míowe. We wehukení ména pukéna mó oga úkúwe.

<sup>9</sup> Mah kawéq éhwéh teri terinuraunsabé níwíognéra ahbabáq ani tahnsa séniraté táhrarera meniqmera karábúsiipéq móíntówe. Karábúsiipéq móintera Manikáne ehweh íre saiqnaruahráhowe.

<sup>10</sup> Níwíognéyabewé, karábúsiipéq méyabewé, séniraté táhrareyabewé, minawarinsábé íre áhreuge. Manikánka omaq sitéh kégá Sísa Karáhénsabe aiq pútare atera oga mérapeq awaq miageheéna mi ke séhréh aritanauge. Segá wene kaweq matábúrapéq pokue mitaq ahriahri weba míaigheéna séhréh aritanauge.

<sup>11</sup> Teawéna ehwéh peh aiq pútaq ehwéhnéna mahraréna, We pukútaq ite moq pukowane. Minayabe wereq oga mía míaoneheqmúne.

<sup>12</sup> Áwíoqnehrataq wene sásá ambubu atiáhnaraqmé wereq moraráq wahnahnoneheqmúne. Áwíoqnehrataq wensabé ahqáho atáhnaraq mókake wega itensabé moq ahqáho aitanawire.

<sup>13</sup> Wene sánsá sehgiioneheqmúne íwíáho kegá íre mirairataq Manikánka mirainauge urai ehwéh sehginawire. Wene sánsá íre anteruahráhire. Írakaumo. Íre anteruahráhi puana sehginawire ire.

*Manikáne arambehri tauntahunue miraúno teawu ehwéhne.*

<sup>14</sup> Mah ehwéh ahreraq sito. Manikánka tagariéhtáq pehgáriq naneqsabé íre ehwehoro terio. Pehgáriq naneqsabé ehwehonka íre séhréh aritahráhire. Írakaumo. Íre séhréh aritasa peh íráh ké ahbabáq aritéhre.

<sup>15</sup> Manikánka arensabé kaweróne atankéhboq wene arambehri kawerue miraúno. Mirainaraq arerene arambehriyabé íre ayehitáhnah peh Manikáne ehweh kawerue ahtebé tábúsoqme síwáhnorinkehe.

<sup>16</sup> Íre Manikáne iwíáh peh wehukene iwíáh ehwehmé, abehq múguwahgu ehwéhmé pehfragáhno. Abehq múguwahgu ehwéh íráh kewé mi ehwéhnká íre kaweç iwíáh aritéhrara Manikáne sansá sinehepeç súáhwe.

<sup>17</sup> Náonka wehukeníné anonka íre kaweratéhrana anotah naonkákáq míéhre. Mina inserah abehq éhwéhnká wehukeníné iwíáh íre kaweraruanawire. Mina tahnsa abehq éhwéh iraréya aníté Íménéúsireq Pírétúsireq míehye.

<sup>18</sup> Segá aiq pútaq ehwéh suera péhe éhwéh mahraréra, Ite pukérapeq iriwe oga úkuraunayabé mókake mó íre irigonehe óye. Sene ehwehnka táhmaro íráh kéné iwíáh íre kaweraritehye.

<sup>19</sup> Anotah ebáhnabaga íre kúrugúruia peh págegeue kagainserah Manikánka miraú naneq áwahewé peh págegeue kagaire. Manikáne ehwehnka mahraréna, Itene Wahnhahnka moke wene animári tagaríehre ire.

Wene ehwehnka mó mahraréna,  
Itene Wahnhahnka tagariione irare keo, ahbabáq peh kaweçtaq mía míaoro ire.

<sup>20</sup> Anotah nahtápéq áhnte kunúbáwárínkákáq antéhyamárínkákáq kékre. Mó antéhyámárimé áhnte moné tahnsa antéhyámárine. Mó antéhyámárimé peh awankátate miraia antéhyámárine. Mó antéhyámárimé peh marakórate miraia antéhyámárine. Abehq árámbéhríeyabewé íroke antéhyámé awehrare. Kaweç arámbéhríeyabewé peh morá kaweç antéhyá ábérrehre.

<sup>21</sup> Wehukenínká íre kaweç sansá suena kaweçtaq mía míáéna we kaweç antéhyá tahnsanire. We aiq pútaq Manikáne ani ména itene Wahnhahnne arambehriire. Wega moke kaweç arámbéhrí miraorahire.

<sup>22</sup> Ahrari abarié iwíáh kahnahwe mi iwíáh sue móbeq míahno. Peh kaweçtaq méwé, aiq pútaq ehwéh ambubu atawéwé, mó keyábé arutaboíréwé, aru ukiqme méwé, mah sansámári sehgio. Sirupipeq ahbabáq íre kék kégá mi sansámári miraigehe. Segá itene Wahnhahnsebá áhrabue mahraréra, Séhréh aito éra mi sansámári miraigehe.

<sup>23</sup> Abehq múguwahgu ehwéhmé pehfragáhno. Are tagariahnawe múguwahgu ehwéhmé tobenorahi naneq mire.

<sup>24</sup> Itene Wahnhahnne arambehri ani teawe, Íre ehwehúno. Írakaumo. Peh mó ke míéhrarabeq áyáteh sansá sue uwaresa ání mé kawerue síwáhnorúno ato.

<sup>25</sup> Wene ehwehnsabé íre kowe atáh ké pehwehrue móñkakákáq síwáhnorínana Manikánka séhréh aritahnara sene ahbabáq sansa suera aiq pútaq ehwéh iragéhe.

<sup>26</sup> Wene arambehri miraigeheéna owainawanka ahbabáq ke saiqnariéhre. Saiqnariéhrara aiq pútaq ehwéh íréhrataq segá tábúsoqme iwíáhéra owainawane ahbabáq sansa suera kaweçtaq míagehe.

### 3

*Anehe tanáhráq wehukega áhnte ahbabáq sansan neherawoe i ehwéhne.*

<sup>1</sup> Anehe tanáhráq anotah íre kaweç sunúq sinæ. Minawé iro.

<sup>2</sup> Mi tanáhráq wehukega peh seyensabé suwahbanae. Mónayabé sirutaboiro ke méra píribahri saiyo ke míaneherawoe. Mó ke áhnte éhwéh aritera sinoibone ehweh anteruaneherawoe. Mó keyábé kawerowe íre arítáh ké míaneherawoe. Maniká awahbeh sansánsabé íre suwahbáhna ke míaneherawoe.

<sup>3</sup> Mó keyábé íre sirutaboironeherawoe. Íre insahwé arítáh ké míaneherawoe. Íre insahwé aritera síehruruo ke míaneherawoe. Íre tabasíwe mía aisobuya ké míaneherawoe. Kaweqtaq méyabe suwahrieh ke méra

<sup>4</sup> owinahwino ke míaneherawoe. Apubúue íre kaweq sansánoneherawoe. Ite anotah ke úne íwíaho ke méra Manikánsabe iuwahriehre oneherawoe. Mah marákóípéqté náneqsabé sirutaboiro ke míaneherawoe.

<sup>5</sup> Segá peh ábóraqsabé Manikáne sansá miráera peh Manikánka págege aritahráhi sansánsabé ahqáho atera íre miraowe. Moke mina tahnsano ké sueq móbeq míáhro.

<sup>6</sup> Mina tahnsa kégá múguwahgu ahreroné nahtapeq pokue ehnenehnenu sístáhnorowara sene péhe éhwéh íráhwe. Mi ahrérónká áhnte ahbabáruronsabé sirupipeq umehire. Íre kaweq naneqmarínsabé sigará pabeku pabekuire.

<sup>7</sup> Sigará pabekirara segá mó sístáhnori aní mó sístáhnori aníné ehweh irera peh Manikáne aiq pútaq éhwéh íre íráhwe.

<sup>8</sup> Wehukeníté sensíwíq Sánésireq Sámbárésireqka Mósísinsabé ahqáho atóyanserah mi sansáno wehgá aiq pútaq ehwehnsabé ahqáho atáhwe. Manikáne ehwehnsabé ahqáho atáh púara peh múguwahgu íwíahurowe.

<sup>9</sup> Mi aníténé ahbabáq ábóraq konserah ómiga mi kené ahbabáq mókake tagagehe. Minayabe mó kegá sene ehwehnsabé íre aiq pútare arítáh púara sene arambehri íre anotah úkorahire.

### *Manikáne ehweh ambubu atawé sehgio i éhwéhne.*

<sup>10</sup> Arega menah ínéba míaroná puah néne sánsá aiq tagariahne. Maniká awahbeh sansá sístáhnoréna kaweq sansánurauge. Moke néne sánsámé arega áwahe aiq tagariahne. Manikánsabe aiq pútare atena wene sansá ambubu atawéna uwaresa ání ména mó keyábé nirutaboiruge. Tabasíwe aní míóge.

<sup>11</sup> Are tagariahnawe mó kegá íné níwíoqnarowana níéruraire. Ántíoka suwahpeqkakáq Áíkónia suwahpeqkakáq Árísáta suwahpeqkakáq míarautaq anotahtaq níwíoqnarowah tagariahne. Níwíoqnarotaq itene Wahnahnka séhréh aintárái puana íné kaweqtaq míóge. Segá íné íre nubiq suahráhurowe.

<sup>12</sup> Ite tagarionawe Sísa Karáhéreq méra kaweqtaq méyabe suwahbeh kewé mó kegá sístioqnaneherawoe.

<sup>13</sup> Ahbabáq kereq péhe éhwéh sístáhnoro kereqka mó kené péhe éhwéhnsabé aiq pútare arítáhwe. Segá múguwahgu agéra sístáhnorirataq íréhra kegá moq péhe éhwéhnsabé aiq pútare aritanéherawoe. Segá amahnága ahbabárera mókakewe anotah ahbabároneherawoe.

<sup>14</sup> Arewe aiq pútare ate ahtebarona sansá kawerue sehgio. Are tagariahnawe itega kaweq éhwéh are áwáhnoruraunayabé kawerue sehgio.

<sup>15</sup> Are animai míaronaraq Manikáne ehweh sáhnsahe sansa áhwárarone. Áhwárawe wene ehweh ahriahri sáhnsahonaga ahtebé Sísa Karáhénsabe aiq pútare atárónana kaweratáráire.

<sup>16</sup> Manikáne ehweh sehiranutaq Manikáne Awanka íwíah aritená séhréh aritowe. Manikáne ehweh ahtebáhnaga sístáhnoronaraq múguwahgu éhwéh tábúsoq sitahráhóne. Ahbabáq sansa tábúsoq sitahráhóne. Manikáne ehweh ahtebáhnaga aiq pútaq éhwéhmé kaweqtaq mé sansamé terienawe kawerue sístáhnororahóne.

<sup>17</sup> Wene ehwehnka ite Sísa tagariona kegá kaweq sansánéq moke kaweq arámbéhri miraorahúne.

## 4

*Manikáne ehweh págegeue pahsuo i ehwéhne.*

<sup>1</sup> Sísa Karáhéga tuinagake moke oga míah kéreq pukia kéreq sainsuankéhe. Wega tuinaraq ahriahri wahnahnaitanawire. Minayabe wereq Manikánseq tagariehya puah teawéna ehwéh kawerue iro.

<sup>2</sup> Manikáne ehwehnsabé suwahbeh kereq íre suwahbeh kereq teri terinúno. Se iragéhboq kawerue síwáhnorúno. Wene ehwehnka sirupipeq pankehboq págegeue síwáhnorúno. Sísansabé aiq pútare atera wene sánsá kawerue sehgigéhboq kawerue síwáhnorúno. Maniká awahbeh sansá síwáhnorinaraq uwaresa ání míahno.

<sup>3</sup> Írátíahno. Mókake wehukega aiq pútaq ehwéhmé íre irera peh seye suwahbeh naneqs-abé sirutaboironeherawoe. Seye suwahbeh ehwéh síwáhnoro keyábé, Íwáhnorigehboq máhoro aritaneherawoe.

<sup>4</sup> Segá aiq pútaq ehwéh sinehepeq suera wehukene áwahe ehwehnsabé aiq pútare aritaneherawoe.

<sup>5</sup> Ahriahri peh kaweç iwíáhúno. Kaweç sunúqkákáq íre kaweç sunúqkákáq ahriahri Sísane sánsá sehgio. Áhnte kegá Sísa éhweh iragéhboq teri terinúno. Manikáne Awanka teawátái arámbéhrí miraue parabaru.

*Poraga, Kagai apéq náninkéhe i ehwéhne.*

<sup>6</sup> Íné pukona tanáhráq aiq sinare. Mi tanáhráqmé aiq wahtonire. Asiu kegá sene sánsánéra náhniáq sera ano Manikánsabe titiréra ahkiónserah íné moke néne aram-behriyabé moq Manikánsabe titiruge.

<sup>7</sup> Manikánka niátái arámbéhrí kawerue mira aruqaruruge. Mi arámbéhrí aiq parabarúóge. Sísane sánsá íre susa peh kawerue sehgiúge.

<sup>8</sup> Wehukenínká árésiséna kiotaiki aní awahriq ayáhúq áwínserah Manikánka kaweqtaq kagai apéq náninkéhe. Minayabe itene Wahnahnka ínénabe, Kaweqtaq míahne aintankéhe. Mi apéq íópeq intena we tuinagake náninkéhe. Wega tábúsoqme iwíáhue sainsuahnaraq íre ínébataq náninkéhe. Írakaumo. Ómi we tuina tanáhráqsábé áwénuno ke ápeq sienä kawerowe aritankéhe.

*Poraga Tímótinsabé, Ínéba apubúue súno ato ehwéhne.*

<sup>9</sup> Arega miraorahinaraq iwíáhue tagé ínéba apubúue súno.

<sup>10</sup> Témásiga mah marákóípéqté náneqsabé arutaboiréna íné nuwena Tésárónáíka suwahpeq pokuraire. Káréséniga Kárétia marákórápéq pokurairana Táításaga Támésia marákórápéq pokuraire.

<sup>11</sup> Árúka webataq ínéreq mioye. Néne arambehriwe Máhkaga kawerue séhréh aintahráhi aní míre. Séhréh aintankéhboq meqme súno.

<sup>12</sup> Tílkúsiwe Épésa suwahpeq eqmaq áuwátáuge.

<sup>13</sup> Néne káhq ambántá Tóasa suwahpeq Kápúsine nahtapeq matauge. Ínéba sinaraq minaakaq púkuwarínkákáq sehirania kanéhwárínkákáq mewe súno.

<sup>14</sup> Káhpah kaweraqari aní wenáwíq Árekásántaga anotahtaq íre kaweraintaráire. Minayabe itene Wahnahnka kamah awinkéhe.

<sup>15</sup> Wega itene ehwehnsabé págegeue ahqáho aitáráinsabé arega we auráq matiahno.

<sup>16</sup> Téhwe sega ehweh aintárótaq ómiga íné íre níehnehia nuwera pokurowe. Minayabe Manikánka kamah arinehoéna sensabé púrerarítaráuge.

<sup>17</sup> Nahnsionka itene Wahnahnka ehweh irageheéna tábúsoqme teríátáutaq itene Wahnahnka íné séhréh aintena págege aintáráire. Segá nubiç suaneheraurotaq wega séhréh aintarái puara túbah agurowe.

<sup>18</sup> Ahbabáq aintéhrakake Manikánka séhréh aintankéhe. Wega wahnahnirabeq íópeq míankeheéna tumeiqmena móintankéhe. Ahriahri wensabé iwíáh iwíáh atanéhe. Aiq míre.

<sup>19</sup> Ákúírareq wene ahre Párísírareq Ónésíma karírónánínseqsabé iroro terio.

<sup>20</sup> Érásátiga Kórína suwahpeq míéhre. Tárópíma awahreurairana Mírétsísi suwahpeq áuwátáuge.

<sup>21</sup> Ópeq íre sínaraq ínéba súno. Mahtaqté ánímári sensíwíq Íyúbúrúsi, Púrénísi, Árínúsi, Káróríarehga arensabé iraúno atáhwe. Sereq ómi mahtaqté Sísa tagariáh kéreqka arensabé iraúno ewe.

<sup>22</sup> Itene Wahnahnka arereq mía míaire. Wega arensabé arutaboiréna séhréh atéhre.

## Táítása Ebeq sáhnsahwe ahbebé ehwehne.

Táításawe íre Asiu anínéna Porane ehweh kawerue sehgienna Kíriti marákórápéqté ké, Sísa tagariáh ké séhréh aritena kawerue wahnahnúwe. Poraga karábúsiipéq míotaq mah pahsí sehiranúwe. Wega Táításansabé Sísa tagariáh kéráq wahnahno ke omaq site sansánsábé, síwáhnoré sansánsábé, kawetaq mé sansánsábé ue mah ehwéhmári sehiranue Táítasa teawuwe.

### Poraga Táítasa awu pahsíe.

<sup>1</sup> Táításao, íné Porane páhsí sáhnsahwe tagáhno. Íné Manikáne arambehriu aní múge. Sísa Karáhéga we éhweh kosíwáhnorúno aintena eqmaq nútátáire. Manikánka omaq sito ke séhréh aritankeheéna eqmaq nútátáire. Segá aiq pútaq sansá Manikáne kaweq sansá ahtebagheboq kosíwáhnorúno éna eqmaq nútátáire.

<sup>2</sup> Itega Sísansabé aiq pútare ateq oga mérapeq kiwíanehe iwíáhúne. Naho Maniká, íre péhenorahi anínká mahraréna, Ínéga omaq sitáhna kegá oga mérapeq awaq miagéhe úwe.

<sup>3</sup> Oga mérapeq awaq miagéhe éna wewega iwíáhi tanáhráq mah kawéq éhwéh itene irupipeq iwíáh aitáráire. Maniká, ite kaweraitéh áninká ínensabe, Mah kawéq éhwéh koreri terinúno aintaráirana teri terinuge.

<sup>4</sup> Táításao, néne páhsí sáhnsahwe tagáhno. Itega morá iwíáhue Sísansabé aiq pútare atoyansabé are nénahni úkurone. Maniká Iteriboreq Sísa Karáhé, ite kaweraitarái anínseqka are séhréh atera arene aru ukiq atéhye.

#### *Sísa tagariáh kéráq wahnahno ke omaq siteyabe éhwéhne.*

<sup>5</sup> Ite íre parabaruoya arámbéhrí arega mirainkeheéna Kíriti marákóráq áuwátáuge. Mó kehiná suwahpeq mó kehiná suwahperue Sísa tagariáh kéráq wahnah anímári míagehboq omaq sito. Teawátáunserahnue omaq sito.

<sup>6</sup> Peh kaweqtaq mía míai anímé peh morá áhré matiéh ánime Sísa tagariáh kéráq wahnah aní míahrahire. Peh morá Sísansabé aiq pútare atáh ánímáríné sibowáwé wahnah aní míahrahire. Wene animárinká ahbabárera sibowáné ehweh anterúáh ánímáríné sibowáwé wahnah aní íre míahrahire.

<sup>7</sup> Sísa tagariáh kéráq wahnah arítéh áninká Manikáne arambehri auráq matiéh púana peh kaweqtaq mía míai anínká wahnah aní míahrahire. Píribahri anímé, áyáteh anímé, píah néna muguwahgu aruqaruri anímé, tobeh aruqaruri anímé, móneyabé arutaboiri anímé íre wahnahnorahire. Írakaumo.

<sup>8</sup> Nahnso ke kawerue kírabo arítéh ánime, kaweqtaq méyabe arutaboiri anímé, tabasíwe míéh ánime, kaweq iwíáhue arambehri anímé, Maniká awahbeh sansá sehgi ánime, wewene kaweq iwíáh ambubu atiéh ánime Sísa tagariáh kéráq wahnahnorahire.

<sup>9</sup> Áwáhnoro ehwéh kawerue ambubu atiéh áninká mó ke kawerue síwáhnororahire. Wega aiq pútaq ehwéhnsábé suwahrieh ke síwáhnoréna sene iwíáh kaweraritankéhe.

#### *Péhe éhwéh síwáhnoro keyábé éhwéhne.*

<sup>10</sup> Kíriti marákórápéqté ké auráq matíahro. Píribahri ke méra sega abehq éhwéhnéra péhe éhwéhnuwe. Asiu kené síú amurúrue sansa sehgióro e kewé áhnte mina tahnza míáhwe.

<sup>11</sup> Segá mó kené móne meyaneheéra áhnte mi karíronánínsábé péhe éhwéh síwáhnorowe. Mi karíronání aiq pútaq sansá súéhboq péhe kéné ehwehnsabé ehiya míáhro arito.

<sup>12</sup> Kíriti marákóípéqté ání Kíriti ke seyene ehweh irari anínká mahraréna, Kíriti marákórápéqté kégá péhe éhwéh irare irareo ke wóe. Se áwéh keropia póéráhq tahnza ké méra taorahoue kobukahburo ke wóe ire.

<sup>13</sup> Wega irari ehweh aiq pútaq ehwéhne. Minayabe Kíriti keyábé págegeue síwáhnorúno.

<sup>14</sup> Aiq pútaq ehwéhnsábé suwahrieh kegá sehgíóro e ehwéhnkákáq Asiu kené péhe áwahe ehwéhnkákáq suera Sísane sánsá kawerue sehgigéhboq págegeue síwáhnorúno.

<sup>15</sup> Kaweqtaq mía miao kegá moke táhutahuq íre órirane éra peh nah naneq mire éra nahwe. Sísansabé íre aiq pútare atáh áhbárérá kewé moke mah marákóípéq kék néaneq tagéra íre kaweq nanere iwiáhowe. Sene sirupipeq ahbabáq áhwárera kaweq sansá íre iratíáh púara sega kaweq iwiáh íre orahowe.

<sup>16</sup> Segá mahraréra, Itega Maniká tagarione irarewe. Iraréra Manikáne ehweh anteruera ahbabárera kaweq arámbéhrí íre miraorahowe. Minayabe ite tagarionawe se Maniká íre tagariáhwe.

## 2

### *Aboawah wehyábé síwáhnoré ehwehne.*

<sup>1</sup> Arerega peh tábúsoqme aiq pútaq ehwéh síwáhnorúno.

<sup>2</sup> Aboawah wehyábé mahraré, Múgu wahgu iyehboq áhnte piáh né pehragahro. Peh tábúsoqme iwiáhoro. Tabasíwe mía miao. Aiq pútaq sansá ahtebawe sehgíóro. Manikánsabe irutaboiréq wehukeyabé irutaboiroro. Sísane sánsá kawerue sehgíóro terio.

### *Aboawah ahréyábé síwáhnoré ehwehne.*

<sup>3</sup> Aboawah ahrérónsábé mahraré, Manikánsabe áhtenéq kaweqlaq mía miao. Mó keyábé péhe éhwéh aritého. Piáhyabé irutaboiriyeho. Peh kaweq sansá síwáhnororo terio.

<sup>4</sup> Segá ibehinínsónsábé mahraue síwáhnororo arito. Iteruwehqsonseq itene animárínseqsabé kawerue irutaboiroro teríero terio.

<sup>5</sup> Iteitene kaweq iwiáh ambubu atawéq sehgíóro teríero terio. Mó weh pehragéq peh morá arenawehq kéro teríero terio. Íre itereq morábí néaneq pehragéq peh iteitene arambéhriue areqnahreq ahréró míáhro teríero terio. Peh kaweqlaq mía miaoéq iteruwehqsonseq ehweh kawerue íráhro teríero terio. Segá mah ehwéh sehgírataq mó kegá Manikáne ehwehnsabé íre awiréh atahráhowe.

### *Mahbigaunsábé síwáhnoré ehwehne.*

<sup>6</sup> Mahbigaunsábé iteitene kaweq iwiáh ambubu atawéq sehgíóro terio.

<sup>7</sup> Segá are tagéra ahtebagehboq arega peh kaweq sansánúno. Síwáhnoróna tanáhráq ogiogi pehragé peh kawerue tábúsoqme síwáhnorúno.

<sup>8</sup> Mirainaraq are áwíoqnah kegá tagéra siyehitáhnayabé íre ehwehia peh túbáh agigehe.

### *Mó kené arambéhri keyábé síwáhnoré ehwehne.*

<sup>9</sup> Mó kené arambéhri arítah kékabé mahraré, Píribahri sansá sueq ite arambéhriraq ítéh áníné ehweh kawerue ireq itene arambéhri tábúsoqme miraoro terio.

<sup>10</sup> Sene ménsámehnsá aebóiyeho. Peh kawerue auráq sitáriáhro terio. Mirairara taghehra kegá Maniká ite kaweraitéh áníné sánsá aiq kaweqlaq mía miao ire.

### *Sísa tuina tanáhráqsábé éhwéhne.*

<sup>11</sup> Manikánka mah kehiná kékhnánsábé arutaboiréna aiq sokigi aintéhre. Arutaboiréna ómi kaweraritáhráhire.

<sup>12</sup> Itensabé arutaboiréna mahraréna, Ínénabe íre aiq pútare aintáh kékabé onserahniyeho. Mah marákóípéqté sánsánsábé irutaboiriyeho. Mah tanáhráq peh kaweqlaq iwiáhue tabasíwe méq ínéga unserah kaweqlaq mía miao ire.

<sup>13</sup> Sísa Karáhé itene Maniká míre. We ite meirena kaweraitéh ání míre. Mókake we téreh naneqkakáq tuina tanáhráqsábé iwiáh iwiáhíq kaweqlaq mía miaoéq áwénunúne.

<sup>14</sup> Webataq wene kaweqlaq animári mía miaoagheéna Sísa itene ahbabáqsabe wene korahqtaté paiqmaranieéna putiowe. Minayabe itene ahbabáq sansa moke sueq peh kaweqlaq arámbéhríyabé irutaboironehe.

<sup>15</sup> Teawewó éhwéh síwáhnorúno. Peh kaweq sansá sehgíoro arito. Ahbabáq sansa miraiyeho arito. Segá arene ehwehnsabé anetaníbo iwíáhiyehboq págegeue síwáhnorúno.

### 3

#### *Manikánka kaweraitárainsabé kaweq sansánonehe i ehwéhne.*

<sup>1</sup> Arega síwáhnorina keyábé mahraré, Kámáhni kereq sene wahnah kereqne ehweh kawerue íráhro arito. Mi kegá kaweq arámbéhrí miraoro irataq apubúue miraoro arito.

<sup>2</sup> Síehruruiyeho terio. Ehweh aruqaruriyehboq pehwehribeq méq uwaresa ánímári méq kaweraritáhro terio.

<sup>3</sup> Naho iteitega saiyoéq ehweh anterueq péhe éhwéhnsábé aiq pútare atáráúnana ahbabáqsabe iuwahbaraire. Ahbabáqsabe iuwahbarainsabé ahkaragáraga ite saiqnariaraire. Saiqnariararaq ahriahri ahbabáq aruqaruréq mó kené ménsámehnsánsabe igará pabekuraire. Mó kegá itensabé iuwahriehre ewaq itega moq wensabé wensabé iuwahriehre iwíáhuraune.

<sup>4</sup> Maniká, ite kaweraitéh áninká itensabé arutaboiréna kaweq sansá aitená arutaboiré sansa sokigi aiíre.

<sup>5</sup> Sokigi aiená kawetaq míáhwe aitáráire. Íre iteitene kaweq arámbéhríyábé kaweraitáráire. Peh wewega arutaboiraitena itene ahbabáq sabi íúátáire. Sabi iuena itene irupipeq pabeq paberaitáráire. Pabeq paberaitárái puana Manikáne Awanka o awá maqmarena organúq ítáráire.

<sup>6</sup> Wenawanka organúq ítáráirana iteba mía míainkeheéna Manikánka Wenawa eqmaq áuwátáire. Sísa Karáhéga ite kaweraitárainsabé eqmaq áuwátáire.

<sup>7</sup> Sísa Karáhéga itensabé arutaboiréna kaweraitárainsabé Manikánka ite organúq ítáráire. Organúq ítáráiraq oga mía míáeq oga mérapeq awaq meyabe áwénunúne.

<sup>8</sup> Teawú éhwéhnsábé aiq pútare atone.

Manikánsabe aiq pútare atáh kégá, Tábúsoqme kaweq arámbéhrí miraonehe iwíáhigehboq mótaq mótarue mah ehwéh págegeue síwáhnorúno. Wehukega kawerue ahtebagehboq mah ehwéh síwáhnorúno. Mah ehwéh aiq pútaq ehwéhnéna ómi ke séhréh aritahráhire.

<sup>9</sup> Táhmaro kegá abehq éhwéhnéra sigaqnaréh síwíq pankerera tobehewe. Mi kegá Mósísiga sehgíoro ú ehwehnsábé moq tobehewe. Síwáhnorinaraq mi tobého ehwéh pehragáhno. Minawarimé íre iahtebahrahi naneq mire. Pehragáhno.

<sup>10</sup> Sísa tagariáh kégá ehwehiyehboq abehq éhwéh aruqaruri aníné iwíáh tábúsoq ato. Mó tanáhráq mó tanáhráru teawinana íre irahnaraq auwe móbeq míahno.

<sup>11</sup> Wene arupipeq ahbabáq áhwáreh puana wega íre kaweq iwíáhorahire. Wewene ahbabáqka kamah awinkéhe.

#### *Páhsí parabaginai ehwéhne.*

<sup>12</sup> Wehukeníté sensíwíq Átémásareq Tíkíkúsireq míéhye. Mótaq mi aníté areba eqmaraníe. Areba sirataq arega mitaq sue Níkópórísi suwahpeq ínéba peheráh súno. Moke sóiriri tanáhráq Níkópórísi suwahpeq kowíanie iwíáhuge.

<sup>13</sup> Sehgíoro ú ehweh ahtebeh aní wenáwíq Sénási wereq wene iyahnabo aní Ápóroreq itega mi aníté séhréh arito. Segá mó ke apubúue korerigéhboq se íre kék náneqmarí nario.

<sup>14</sup> Itega wahnahno kegá séhrého sansá ahtebagehboq kaweq arámbéhrí miraoro terio. Túbhá agiyehboq Síane arambehrio ke nárieq séhréh arítáhro terio.

<sup>15</sup> Moke ínéreq míáh kégá itensabé iroro ewe. Mibeqté Sísa tagariáh ké, itensabé sirutaboiro keyábé iroro terio. Manikánka ite ómi séhréh aítéhre.

## Píremóna Ebeq sáhnsahwe ahtebé ehwehne.

Píremónawe anotah weh ména Sísansabé aiq pútare ato anínéna Porane iyahnabo aní míowe. Píremónane arambehri aní wenawíq Ónésímae. Poraga Píremónansabé, Arene arambehri anínsabé arutaboiré pehwehrue wahnahnato ue mah pahsí sehiranúwe.

### *Poraga Píremóna awu pahsíe.*

<sup>1</sup> Píremónao, íné Porareq Tímótireqne páhsí sáhnsahwe tagáhno. Ínéreq iteribáq Tímótireqka miraúya arámbéhríwé arega moq mira aruqaruróne. Arewe itene kaweq iyáhnábó ání móne. Íné Sísa Karáhéne ehweh teri terinunsabé karábúsiipéq míóge.

<sup>2</sup> Ápiao, are iteinahno wone. Áhkípúsao, arereq itereqka Manikáne kaweq sansá págegeue sehgjune. Arene nahtapeq momiwío keo, ite Sísa tagaríah ké wóe.

<sup>3</sup> Maniká Iteriboreq itene Wahnah Sísa Karáhéreqka ite séhréh aitera itene iru ukiq aitehye.

### *Poraga Píremónane kaweq sansánsabé iwíáh iwíáhú ehwehne.*

<sup>4</sup> Ínéga púrerutaq ahriahri arensabé niahreraq matawéna Manikánsabe iwíáh iwíáh atóge.

<sup>5</sup> Mó kegá are éhweh teniera, Itene Wahnah Sísansabé aiq pútare ate arutaboiróne éra moke Manikáne animárínsabé arutaboiróne ewe. Minayabe púrerutaq ahriahri arensabé niahreraq matawéna Manikánsabe iwíáh iwíáh atóge.

<sup>6</sup> Arereq itereqka monseráhnue Sísa Karáhénsabe aiq pútare atone. Wega ite séhréh aitena kaweraitéhre. Minayabe arereq itereqka kawerue iahtebaneheéna púreraita aitauge.

<sup>7</sup> Píremónao, are nánibáq móne. Arega Manikáne animárínsabé arutaboirarite sene sirupipeq eyoyóinkeheé séhréh aritahne. Minayabe nirupipeq anotahtaq eyoyóire.

### *Poraga Píremónansabé, Ónésíma pehragé mehweh ato ú ehwehne.*

<sup>8</sup> Arega íné Pora nuwahbeh arámbéhrí mirainkeheéna Sísa Karáhé áwírue teaweráhuge.

<sup>9</sup> Arega ínénsabe arutaboiraintahna puana págege ehwéh íre teawiníe. Íné Porawe Sísa Karáhéne ani ména wene arambehri mirauraunsabé karábúsiipéq míóge.

<sup>10</sup> Íné karábúsiipéq míarautaq arene arambehri aní Ónésímagá surairana Sísa éhweh teawátáugana irena aiq pútare atáráire. Minayabe néne ani úkurona puah we séhréh ato.

<sup>11</sup> Menah Ónésímagá arene arambehri aní ména íre kawerue séhréh atáráire. Amahnágá wega arereq ínéreq kawerue séhréh aitahráhire.

<sup>12</sup> Ínéga wensabé anotahtaq nirutaboiratena areba eqmaraníe.

<sup>13</sup> Sísane kaweq ehwéh teríátáunsabé karábúsiipéq míóge. Minayabe arega íné séhréh aintarónanserah Ónésímagá séhréh aintahráhire. Wega íné séhréh aintankeheéna ínéreq mýabé nuwahbehre.

<sup>14</sup> Arensabé, Íné nuwahbeh ehwéh sehgio éna págegeue íre teawiníe. Írakaumo. Íre néne iwíáhga peh arerega iwíáhue miraúno. Arega, Íné Pora séhréh atanauge iwíáhínaraqmé peh arerega iwíáhue miraúno.

<sup>15</sup> Menah Ónésímagá are auwena ínéba suraire. Ínéba séna Sísa Karáhéne ani úkurainsabé mókake areba ahriahri míankehe.

<sup>16</sup> Amahnágá we íre peh morá arene arambehri aní míankehe. Írakaumo. We arene arambehri aní ména amahnágá itene Wahnah tagaríeh púana arenábáq tahnsa ména are

kawerue séhréh atankéhe. Minayabe arega wensabé anotahtaq arutaboirinkehe. Ínéga wensabé nirutaboiruge. We nánibáq tahnsa míéhre iwíáhéra nirutaboiruge.

<sup>17</sup> Ínéreq arereq morá árámbéhrí áníté úye iwíáhono? Mira iwíáhinaraqmé arega íné mehwéh aintahnanserah Ónésíma moq mehwéh ato.

<sup>18</sup> Menah wega are ahbabáq atáráiro? Wega arene ménsámehnsá merairo? Wega merai naneqsabé ínéga are náwiníe.

<sup>19</sup> Ínénéga awinauge. Íné Poraga aiq iraruge.

Mah pahsí néne niyahnkaratátē sehiranaróge. Ínéga Sísa éhweh are teawátáutaq arega wensabé aiq pútare atáróne. Minayabe ápeq nánio íre atáráuge. Mókakeakáq ápeq nánio íre ataníe.

<sup>20</sup> Nánibáro, arereq ínéreq Sísa Karáhé itene Wahnahne aníté míoye. Minayabe íné séhréh ainte nirupipeq eyoyó ainto.

<sup>21</sup> Íné tagariómé arega íre peh morá ínéga sehiranue teawú éhwéh mirainkehe. Arega mó kaweç sansánkákáq mirainkehe.

<sup>22</sup> Wahnah anínká íné pugeq nuwankéhboq púrerainto. Pugeq nuwahnaraq areba kinauge. Minayabe arene nahtapeq máhriq kaweraintewahno.

*Porareq morá árámbéhrí ánímárínká Píremónansabé iraúno ató ehwehne.*

<sup>23</sup> Wehukení wenáwíq Épárasi mahtaq míéhre. Wega Sísa Karáhé éhweh teri terinurainsabé ínéreq karábúsiipéq míoye. Arensabé iraúno ire.

<sup>24</sup> Ínéba arambehrio ke Máhkareq Árísátákireq Témásireq Árukareqka moq arensabé iraúno ewe.

<sup>25</sup> Itene Wahnah Sísa Karáhéga iteba mía míáéna arutaboiréna séhréh aitéhre.

## Íbaru Ke Ebeq sáhnsahwe ahtebé ehwehne.

Íbaru ke, Asiu ke, Ísara kewé se peh morá ké míáhwe. Se apahtáró áwíq kéhre. Mah pahsí sehiranú ani áwíq íre kéhrana peh anehete ehwéh Porane ehwéh tahnsá púara áhnte kegá, Poraga sehiranúwe ívíáhowe. Mó kegá Sísa tagariáh Íbárú ké síwíoqnowe. Mi tanáhráq mah pahsí sehiranú aninká sensabé, Ite túbah agiyehboq peh tábúsoqme ívíáhoro ue Sísane sánsá ambubu atiageheéna mah pahsí sehiranúwe. Sísawe aiq pútaq Manikáne ah-ninkáwáéna íópeqté kerek Manikáne ehwéh iraru kerek Mósísireq kiotaikúwe. Manikánka Sísa mibeq mahbeq arítéh ání míankeheéna omaq atowe. Sísaga miraúnsabe Manikánka o moráéné ehwéh áhwárówe. Minayabe íre kaweq sunúq sínaraq túbah agiyehboq peh Sísane sánsá ambubu atawéq tauntahunue sehgóro ue Íbaru Ke sehiranue teriwe.

### Íbaru ke siu pahsíe.

<sup>1</sup> Naho Manikánka mó tanáhráq mó tanáhráruue wene ehwéh iraru ke ívíáh aritowara mó sansá mó sansánue itene igaqnaréh ehwéh teríúwe.

<sup>2</sup> Teríuwana amahnága anehe tanahráq wenahni ívíáh atowana wega Wenabone sánsá teiena sokigi aiíre. Manikánka irarúwana wenahninká moke mah marákó márakóákáq íópeqkákáq mirarowe. Wenahninká mókake moke wahnahninkeheéna omaq atowe.

<sup>3</sup> Maniká téhrehnka inserahni aní míéhrana wenahni moq téhrehnka inserahni aní míéhre. Maniká mía míainserah wenahni moq monseráh áníne. Wega págege ehwéh irarinka moke mah marákó márakóákáq íópeqkákáq kaweqtaq kagaire. Wega wehukene ahbabáq aiq kaweraitena íópeq Maniká Iteribone ayah púpeq tútuue mía míaire.

#### *Manikáne ahninkáwágá íópeqté ké kiotaikire i ehwéhne.*

<sup>4</sup> Manikánka wenahni áwíratowana mi awíqká moke íópeqté ké síwíq kiotaikire. Mina inserah wenahninká moke íópeqté ké kiotaikire.

<sup>5</sup> Minayabe Manikáne ehwehnka mahraréna,  
Are nénahni móne. Amahnága íné Arenabo míóge ire. *(Buk Song 2.7)*  
Mi sehiránká mó mahraréna,  
Íné Wenabo míahnana we nénahni míankehe ire. *(2 Samuel 7.14)*

Manikánka íópeqté kékabé mah ehwéh irarúwo? Írakaumo. Peh morá wenahninsábé irarúwe.

<sup>6</sup> Manikánka wene ebeq piah aní mah marákóípéq eqmaq auwanaútaqsabé wene ehwehnka mahraréna,  
Íópeqté kékabé ómiga nénahninsábé ívíáh ívíáh atáhro ire. *(Lo 32.43)*

<sup>7</sup> Íópeqté kékabé Manikáne ehwehnka mó mahraréna,  
Wega íópeqté ké sóiriq tahnsá mirarena  
se wene arambehri ke irobina tahnsá mirarowe ire. *(Buk Song 104.4)*

<sup>8</sup> Wenahninsábé Manikáne ehwehnka mahraréna,  
Manikáno, arega wahnah wahnahnóna tanáhráq peh ahriahri kagainawire.  
Arega wahnah wahnahnónawe tábúsoqme ívíáhue mirainiewóne.

<sup>9</sup> Are moke ahbabáq sansansábé awahriehrana  
peh kaweq sansánsábé awahbehre.  
Awahbeh puana íné Maniká Arenaboga are anotah aní mé moke wahnahnúno atóge.  
Arene wehgauné sirupipeq eyoyó aritena  
arene arupipeq anotah eyoyó atóge ire. *(Aisaia 61.1)*

<sup>10</sup> Wenahninsábé Manikáne ehwehnka mó mahraréna,

Itene Wahnahno, téhwe arega mah marákó márakkó mirarónana págegeue kéhre.  
 Moke íópeq kék náneq arerene ayahtate miraróna.  
<sup>11</sup> Mókake moke mah mensáméhnsá tabanagínaraq  
 are peh mía míainiewóne.  
 Ambanta nahonáh úkinserah mah marákó márakkóákáq íópeqkákáq nahonáh úkéna íre  
 kaweraginawire.  
<sup>12</sup> Wehukenínká wene máhti sabaréhnserah  
 arega mah marákó márakkóákáq íópeqkákáq sabaráruankéhe.  
 Wehga wene nahonáh kórósi ugurúruena  
 o korósí sukiwíéhnserah mirainkehe.  
 Arewe ahriahri monseráhnue mía míainiewóne.  
 Arene oga mé tanahráq íre parabaginawire ire. (Buk Song 104.4)  
<sup>13</sup> Manikáne ehwehnka mó mahraréna,  
 Arega niyah púpeq tútuue míahno.  
 Moke arene naruo arene aigúnúbá tahnsa méra  
 arene ehweh sehgóro aritaníe ire. (Buk Song 110.1)  
 Manikánka íópeqté kékabé mah ehwéh irarúwo? Írakaumo. Peh morá wenahninsábé  
 irarúwe.  
<sup>14</sup> Minayabe íópeqté kéké aneq kebo? Íópeqté kéké wehukene siwa tahnsá méra  
 Manikáne arambehri miraowe. Manikánka kawerarítéh kék séhréh aritageheéna íópeqté  
 kék siqmaréhre.

## 2

### *Manikánka ite meirena kaweratárái ehwéhne.*

<sup>1</sup> Manikáne ahninkáwá anotah Wahnáh mía míainsabé itega írátáuna ehwéh ambubu  
 atawéq sehgonéhe. Itega íre túbáh agia peh wene ehweh sehgonéheqmúne.

<sup>2</sup> Naho Manikánka íópeqté kék iwiáh aritowara sega iraruwara itene igaqnaréhga írówe.  
 Manikánka mi ehwéh íre sehgiú ke kamah ariuwe.

<sup>3</sup> Minayabe itega Manikánka kaweraitéh éhwéhnsábé anetaníbo íwíáhonaraq kaweqtaq  
 mía míaonehnkono? Írakaumo. Wene ehwehnsabé anetaníbo íwíáhonaraq Manikánka ite  
 moq kamah ainawire.

Téhwe itene Wahnahnka wene kaweraitéh éhwéh teriuwara mi ehwéh író kega, Aiq  
 pútaq ehwéhne teiúwe.

<sup>4</sup> Író kega kaweraitéh éhwéh teiútáq Manikánka págege aritonka sega págege sansánéra  
 ótaq sansánéra íre tagarió sansanuwe. Manikánka miraúnsabe, Mi ehwéhmé peh aiq pútaq  
 ehwéhne ue pahsuowe. Wene arambehri kawerue miraigeheéna Manikánka iwiáhue  
 Wenawanka nái náneq náiuwe.

### *Sísaga webataq ite meirena kaweraitahráhi aníne i ehwéhne.*

<sup>5</sup> Manikánka íópeqté kékabé, O marákó márakkóráq wahnahnoro aritanabo? Írakaumo.

<sup>6</sup> Minayabe wene Púkuipéq wehukenínká mahraréna,

Manikáno, arega ite wehukeyabé iwiáhónawe  
 ite aneq tahnsá kékabuno?

Itewe peh abehq naneq mune.

Aneqsabé kawerue wahnahnaitahno?

<sup>7</sup> Peh wahto tanahráq íópeqté kéká ite kiotaikowe.

Arega ite pankere omaq ite iteíwíq pankerahne.

<sup>8</sup> Arega moke miraóna naneqsabé wahnahnoro aitahne ire. (Buk Song 8.4-6)

Ite tagónawe amahnága tánháráq wehukenínká moke kék náneq íre wahnahnatiéhre.  
 Írakaumo.

<sup>9</sup> Itega peh Sísa tagónana we anotah aní míéhre. Menah wahto tanahráq we arambehri aní úkurairara íopeqté ké síwíqka wenawíq kiotaikuraire. Manikánka séhréh aitowana Sísaga mah kehiná kékínáné ahbabáq kaweraitanieéna putiowe. Wega itene ahbabáq kaweraitanieéna érúwana pukúnsabe Manikánka we iriatena wenawíq pankeq atena, Anotah aní mé wahnahnúno atowe.

<sup>10</sup> Manikánka moke kék néeq mirarena wahnahnatéhre. Minayabe áhnte kegá wenahnimáhq úkéra wene kaweq téhrehrabeq míageheéna Manikánka Sísa eqmarowana éruwe pukúwe. Manikánka miraúnsabe Sísawe iteruwah úkéna áhnte ke séhréh aitena kaweraitéhre.

<sup>11</sup> Sísaga itene ahbabáq aiq kaweraitéhnsábé wereq ite kaweraitéh kérreqne Iteribo peh morá aní míéhre. Minayabe Sísaga itensabé, Nánuwahrah woe aiteyabe íre ayehitehre.

<sup>12</sup> Minayabe Manikáne ehwehnka mahraréna,  
Are éhweh nánuwahrah teriníe.  
Are tagariáh ké momiwíotaq  
arenawíq pankeranieéna  
arensabé igonkónue iwíáh iwíáh ataníe ire.

(Buk Song 22.22)

<sup>13</sup> Mi ehwéhnká mó mahraréna,  
Wega omasa éhwéh sehginawire iwíáhuge ire.  
Mi ehwéhnká mó mahraréna,  
Ínéreq moke Manikánka nání ánímárínseq aiq míone ire.

(Aisaia 8.17)

(Aisaia 8.18)

### Sísaga wehuke séhréh aitanieéna wehukeni úkú ehwehne.

<sup>14</sup> Ite Manikáne animárímé peh wehuke míona. Peh wehuke míona puana Sísaga ite kaweraitanieéna wehukeni úkéna ite tahnsá míowe. Owainawanka puké sansatáq wahnahnatiéhre. Sísaga owainawa anehinsaruanieéna putiowe.

<sup>15</sup> Sísaga miraúnka wehuke puké tanahráqsábé anotah áhreo ke sabirúéhrara amahnága íre áhreowe.

<sup>16</sup> Minawé wega íopeqté ké séhréh aritehro? Írakaumo. Wega ite Ébáráhma kahnáh séhréh aitéhre.

<sup>17</sup> Sísaga wehukene ahbabáq kawerarena insahwé aitanieéna wehukeni úkéna wehukene sánsánúwe. Manikáne arambehri mirainieéna itene mibeq mahbeq aitéh aní mianieéna wehukeni úkéna wehukene sánsánúwe.

<sup>18</sup> Áhwáré naneqka weba sútaq Sísa anotahtaq érúwana íre ahbabárúwe. Minayabe amahnága áhwáré naneq iteba sitaq wega ite séhréh aitahráhire.

## 3

### Sísaga miraúnka Mósísine arambehri kiotaikú ehwehne.

<sup>1</sup> Néne iyahnabo anímáríno, Sísansabé iwíáhue tagahro. Manikánka ite omaq itena íáhraburainsabé itega Sísansabé aiq pútare ateq we tagariáhwe. Manikáne ehweh mibeq mahbeq aitéh aní miankeheéna Manikánka Sísa eqmarowaq itega we éhweh teri terinúne.

<sup>2</sup> Wene arambehri mirainkeheéna Manikánka Sísa omaq atena eqmarowe. Mósísiga Ísara ke séhréh aritena Manikáne arambehri kawerue sehgiunserah Sísaga moq Manikáne arambehri tábuosoqme sehígire.

<sup>3</sup> Wehukenká kaweq nah pearéhrara tagah kegá mi nahnsábé ákáhtaq iwíáh iwíáhéra mi nah pearéh áninsábé anotah iwíáh iwíáhwe. Mina inserah Manikánka Mósísinsabé ákáhtaq iwíáh iwíáhéra Sísansabé anotahtaq iwíáh iwíáhira.

<sup>4</sup> Nah pehipi íre kékhrara peh wehukega pearáhnserah moke mah marákó márákó kék náneqme Manikánka mirarowe.

<sup>5</sup> Mósisi Manikáne arambehri anínéna Ísara ke míotaq moke Manikáne arambehri kawerue sehgiuwé. Naho Manikánka we iwíáh atowana Mósísiga mókake sína naneqsabé irarúwe.

<sup>6</sup> Minayabe Sísa Karáhewé Manikáne ahninkáwá ména moke Manikáne animári kawerue wahnahni. Itene wahnahnsabé aiq pútare ateq wega mirainie ú ehweh mirainawire íwíahonaraq we kahnáh míaneheqmúne.

*Manikáne ehweh anterúáh kégá ahrenérapeq íre serahowe i ehwéhne.*

<sup>7</sup> Ite Manikáne animári méq Wenawane ehweh irone. Minayabe Wenawanka Púkuipéq mahraréna,

Iboramé itega íné Manikáne ehweh íréhrataq

<sup>8</sup> saiyoiyehboq kawerue íráhro.

Naho itene igaqnáréhga abatapi míótaq  
sega néne ehweh íre irera peh saiyoéra níwíoqnowe.

Sega mirau serahniyeho.

<sup>9</sup> Mitaq ínéga itene igaqnáréh 40 opéq séhréh arítáhwara sega néne ótaq sansá tagéra minayabe íre iwíahia peh saiyoéra níwíoqnowe.

<sup>10</sup> Saiyoéra níwíoqno puana  
mi keyábé nibiahnsa arítáhwae.

Minayabe ínéga mahraréna,

Mi kegá néne sánsá íre ahtebra  
peh ahriahri ahbabáq aruqarurowe ewae.

<sup>11</sup> Ínéga abiahsanéna sensabé pahsuena,  
Ahrenérapeq ínéba íre seneheqmóe ewae ire.

(Buk Song 95.7-11)

<sup>12</sup> Néne iyahnabo anímáríno, itene irupipeq ahbabáq iwiáhéq túbah agiyeho. Maniká Iteribowe oga mía míai aní míre. Wene sánsá inehepeq súéhboq kawerurero.

<sup>13</sup> Ahbabáq sansanká ite míáhrabeqte ání saiqnariehnehboq Sísa kawerue kéraneheéq mó wehekáh mó wehekáhnue kaweq ehwéh we teawiéq we séhréh atéhoro.

<sup>14</sup> Itega Sísansabé téh kawerue aiq pútare ataráúnanserah mókakeakáq pukona tanáhráqkákáq wene sánsá íre túbah agia peh kawerue ambubu atíahnaraq Sísa Karáhéreq moraráq mía míaoneheqmúne.

<sup>15</sup> Métág sehiranue teiewónserah mónkakáq sehiraninie. Minayabe Manikáne ehwehnka mahraréna,

Iboramé itega íné Manikáne ehweh íréhrataq  
saiyoiyehboq kawerue íráhro.

Naho itene igaqnáréhga néne ehweh íre irera  
peh saiyoéra níwíoqnowe.

Sega mitaq mirau serahniyeho ire.

(Buk Song 95.7-8)

<sup>16</sup> Manikáne ehweh írótaq íre sehgira peh saiyoue míó kewe inséréhbo? Mósísiga Ísípi marákórápéqté meriqmena mórito kewe moke mi ke saiyo kée.

<sup>17</sup> Áhnte opéq 40 opéq Manikánka abiahsa arito kewe inséréhbo? Ahbabáq aruqaruro keyábé abiahsa aritowara abatapi pukuwe.

<sup>18</sup> Manikánka abiahsanéna iwiáhena, Ahrenérapeq ínéba íre seneheqmóe úmé inséréhyabe irarúwo? Wene ehweh anteruera anetaníbo íwíáho keyábé irarúwe.

<sup>19</sup> Segá Manikáne ehwehnsabé anetaníbo íwíáho puara sega ahrenérapeq weba íre korahuwe. Minayabe ireq iwiáhue tagarione.

## 4

*Maniká tagariáh kégá ahrenérapeq kioraho ehwéhne.*

<sup>1</sup> Naho Manikánka itensabé, Ínéba sirataq ahrenagehe úwe. Túbah aginie íwíáho keo, Manikáne ahrenérapeq íre kíyehboq áhreoro.

<sup>2</sup> Ísara kegá Manikáne kaweq ehwéh írówaq itega moq írátáúne. Segá írótaq mi ehwéhnsabé íre aiq pútare atówe. Minayabe mi ehwéhnká íre séhréh aritahráhúwe.

<sup>3</sup> Wene ehwehnsabé aiq pútare atona kegá Manikáne ahrenérapeq kiorahúne. Minayabe Manikáne ehwehnka mahraréna,  
Ínéga abiahsanéna sensabé pahsuena,  
Ahrenérapeq ínéba íre kioneheqmóe ewae ire.

(Buk Song 95.7-11)

Wega mah marákó márákó mirarena wene arambehri parabaruowe.

<sup>4</sup> Abapeqte téhtaré wéhékáhnsabé Manikáne ehwehnka mahraréna,  
Manikánka moke wene arambehri parabaruena abapete téhtaréráq ahrenówe ire. (Buk Song 95.11)

<sup>5</sup> Ahrenónsabe wene ehwehnka mó mahraréna,  
Ahrenérapeq ínéba íre kioneherawoe ewae ire.

(Buk Song 95.11)

<sup>6</sup> Kaweq ehwéh téh író kega mi ehwéhnsabé íre aiq pútare atónsabe sega Manikáne ahrenérapeq íre kioráhuwe. Íre kioráhuara kaweq ehwéh sehgó kégá ahrenérapeq kioráhowe.

<sup>7</sup> Minayabe Manikánka mó tanáhráq omaq atena mi tanáhráqsábé, Iborane atowe. Iborane atowana áhnte opéq parabagúwana Manikánka Tébíti iwíáh atowana sehiranue mahraréna,  
Iboramé itega íné Manikáne ehweh íréhrataq

saiyoiyehboq kawerue íráhro úwe.

(Buk Song 95.7-8)

<sup>8</sup> Minayabe Sósúaga itene igaqnáréh meriqmena ahrenérapeq móritotaq tahirímé mó tanáhráq Manikánka mó wehekáhnsabé íre irarú irino.

<sup>9</sup> Minayabe Manikáne animári ahrenahraho tanáhráq peh kagainae.

<sup>10</sup> Manikánka wene arambehri abapete morá wéhékáh parabaruena abapete téhtaré wéhékáhtáq ahrenónserah weba séra mía míao kegá moq sene ahwimi parabaruera ahrenahrahewe.

<sup>11</sup> Manikáne ahrenérapeq kioneheéq págegeue arambehrionehe íwíáhqué miraoro. Itene igaqnáréhga Manikáne ehweh anteruera ahrenérapeq íre kíú serahniyeho.

<sup>12</sup> Manikáne ehwehme organúq itahráhi naneréna págegeue arambehrire. Págegeue arambehríena áwéhreh sogíq tahnsane. Sogiqme peh ákáhtaq áwéhrehra Manikáne ehweh anotah áwéhrehre. Manikáne ehwehnka wehukeníné arupipeq amurúréhre. Wene iwíáhákáq wenawapipeqkákáq mi ehwéhniká amurúruena sainsúéhre. Wehukeníné ayahnsankakaq ayahnsapeqté ábígnónkákáq mi ehwéhniká amurúruena sainsúéhre. Mi ehwéhniká wehukení awahbeh iwíáhákáq moke mó iwíáhákáq sokigi aíre.

<sup>13</sup> Manikánka moke miraú naneq tagehtaq wehukega kopéq suahráhoo? Írakaumo. Moke minawari Manikánka tagehtaq ábóraq kéhrana taga tagaire. Minayabe mókake Manikánka moke itene sánsá saraqmarankéhe.

### Sísawe itene ehweh mibeq mahbeq aitéh ání míre i ehwéhne.

<sup>14</sup> Manikáne ehweh mibeq mahbeq aitéh ání íópeq Manikáne auranabiahtapeq míéhre. Mi anímé Sísá Manikáne ahninkáwáe. Minayabe itega aiq pútare atona ehwéh ambubu atianeheqmúne íwíáhqué miraoro.

<sup>15</sup> Ahbabáq iwiáh sínaraq iteriahríah íre kaqsuahráhúne. Owainawanka ite íwíoqnehtaq Manikáne ehweh mibeq mahbeq aitéh áninká anetaníbo íre iwíáhia peh arutaboiraitena séhréh aitéhre. Owainawanka amahnágá ite íwíoqnehnserah Sísá marakóipeq míotaq áwíoqñówana Sísaga íre ahbabárúwe.

<sup>16</sup> Minayabe itega Manikánsabe íre áhreia wega ite séhréh aitankeheéq weba wahtotaq kowíaneheqmúne íwíáhoro. Mitaq kowíáhnaraq irupipeq umeh agínaraq Manikánka itensabé arutaboiraitena séhréh aitankéhe.

<sup>1</sup> Manikáne ehweh mibeq mahbeq aitéh áninká ite Asiu ke séhréh aitankeheéq ite miónarabeqte ání mó tanáhráq mó aní mó tanáhráq mó anínue omaq sitáhwe. Manikánka itene ahbabáq kaweraitankeheéna wene ehweh mibeq mahbeq aitéh áninká mó naneq mó nanerue Maniká titiratéhre.

<sup>2</sup> Titiratena we peh wehukení púana kaweqlaq íre mía míorahire. Minayabe wega múguwahguo kereq áhwáro kereq pehwehrue arítéhre.

<sup>3</sup> Manikáne ehweh mibeq mahbeq aitéh áninká mó kené ahbabáqsabe Manikánsabe ménkámehnkáne korahqtaté titiratéhre. Íre peh morá mó kené ahbabáqsabe titiratéhre. We moq ahbabároraí aní púana wewene ahbabáqsabeákáq Maniká titiratéhre.

<sup>4</sup> Mibeq mahbeq aitéh árámbéhríwé anotah arámbéhrí wíre. Minayabe wehukeníká, Íné mi arámbéhrí mirainie íre orahire. Mi arámbéhrí mirainkeheéna Manikánka wehukení omaq atena naho Áróni omaq atonserah omaq atéhre.

<sup>5</sup> Wehukeníká, Íné mi arámbéhrí mirainie íre orahúnserah Sísá Karáhéga, Néníwíq pankerena Manikáne ehweh mibeq mahbeq arítéh ání míanie íre úwe. Írakaumo. Manikánka wensabé omaq atena minayabe wene ehwehnka mahraréna,

Are nénahni móne. Ibora íné Arenabo ména anotah aní míahno atóge ire. (*Buk Song 2.7*)

<sup>6</sup> Wene ehwehnka mó mahraréna,

Are néne ehweh mibeq mahbeq aritahna aní ahriahri mía míainiewóne. Wehukení wenawíq Mékiséréki néne ehweh mibeq mahbeq arítéh ání mía míáunserah are moq mina tahnasa mía míainiewóne ire. (*Buk Song 11.4*)

<sup>7</sup> Sísá marakóipeq míotaq wega Maniká ehweh teawena púrerúwe. Manikánka Sísá puké tanahráq ahqáho atahráhú púana Sísaga anotahtaq púreréna áhnte ibisówe. We awahbeh iwíáh íre sehgira peh Maniká awahbeh iwíáh sehgíuwana Manikánka Sísaga púrerú ehweh irowe.

<sup>8</sup> Sísawe Manikáne ahninkáwá ména áhnte erúnsabe Wenabone ehweh sehgiu sansa ahtebówe.

<sup>9</sup> Sísaga Wenabone ehweh tábúsoqme sehgiunsabe amahnága Sísaga wene ehweh sehgó ké kaweraritena organúq sitahnara oga mérageq mía míonehrawoe.

<sup>10</sup> Minayabe Manikánka wensabé, Are néne ehweh mibeq mahbeq aritahna aní mía míainiewóne. Mékiséréki néne ehweh mibeq mahbeq arito ani mía míáunserah are moq mina tahnasa mía míainiewóne atowe.

### *Káriq anínká mía míai serahniyeho i ehwéhne.*

<sup>11</sup> Minayabe áhnte mó ehwéh kékre. Itega íre apubúue ahtebahraho puana mah ehwéh teiyabe págege arámbéhríe.

<sup>12</sup> Ite íre wahto tanáhráq Sísane ehweh írah púaq wene sánsá ahtebahtaq tahirímé mó ke síwáhnoro irino. Itega íre kawerue ahtebahraho Manikáne ehweh áwahewé mó anínká ite íwáhnorire. Inahunah áninká págege tahutáhúq íre nahrahéna peh náh nehnserahnnowe.

<sup>13</sup> Náh neh anínká pehgáriq aní púana tábúsoqmaréh sánsá íre ahtebahrahire.

<sup>14</sup> Págege tahutáhúqmé peh morá anowaninká nahrahéne. Págege tahutáhúq nahraho kegá tábúsoqme iwíáhorahowé. Minayabe sega kaweq sansánkákáq íre kaweq sansánkákáq saraqmarera kawerue ahtebahrahowe.

## 6

### *Tauntahu ke méq Manikánka ite náina naneqsabé áwénunoro i ehwéhne.*

<sup>1</sup> Sísá Karáhéne ehweh peh morá áwahewé móñkakákáq íre íwáhnorinie. Págege ehwéh iragéhboq anehete ehwéhnikákáq íwáhnorinie. Nah pe anínká íre peh morá nahwiahnsanse pearéhre. Mina inserah áwahe ehwéh mitaq mareq anehete ehwéhnikákáq írahro. Itene abehq árámbéhrí inehapeq sueq Manikánsabe aiq pútare ate ehwéh aiq írátówe.

<sup>2</sup> Wání mewe ehweh aiq írátówe. Wehukeníné ayahqnotaq táhtoqme púrerate ehwehmé aiq írátówe. Pusa ké iriwe organúq site ehwehnkákáq mi tanáhráq Manikánka kaweqtapéqkákáq iraipéqkákáq sainsue ewhéhkákáq aiq írátówe. Mina tahnса áwahe ewhéh aiq írátó puaq mitaq mareq anehete ewhéh íráhro.

<sup>3</sup> Manikánka kowe aitahnaraq itega miraoneheqmúne.

*Sísane ehweh sinehepeq súáh kégá weba íre kouwekoraho ewhéhne.*

<sup>4</sup> Sísane sánsá ahtebéra sehgiro kegá mi sansá sinehepeq súáhmé árahue móñkakák sehgigéhbo? Sega íópeqté Manikáne téhreh naneq merowana Manikáne Awanka seba kowíaraire.

<sup>5</sup> Sega Manikáne ehweh irera sehgirosabé aiq pútaq ewhéhne íwíáhurowe. Mókake sína tanáhráqsábé ahtebéra, Mi tanáhráq Manikánka págegeue arambehrinkehe íwíáhurowe.

<sup>6</sup> Mira íwíáhéra Sísane sánsá sinehepeq súáhmé sega móñkakák íre sehgioráhowe. Sega Sísansabé, Iuwahriehre íwíáhonsabé Manikáne ahninkáwá awankátaq móñkakák táhparáhnserahnowe. Sega miraotaq Sísa íre tagariáh kégá tagéra Sísansabé awiréh atáhwe. Minayabe wene sánsá sinehepeq súáh kégá Sísaba mó íre kouwekorahowе.

<sup>7</sup> Ibonsirana marakó tantanirana mitaq kaweq tahutáhúq kíréhrara wehukega nahwe. Minayabe Manikánka, Aiq kaweq marákóe atéhre.

<sup>8</sup> Marakóraq peh abehq náhgáqkákáq tahwenkaránkakaq kíréhtáq peh abehq márákóe. Minayabe Manikánka, Íre kaweq marákóe atena kekiruanawire.

<sup>9</sup> Néne iyahnabo animáríno, mah pagégé éhwéh teiúnsábé itega mi marakó tahnса ké úkigehe íwíáhugo? Írakaumo. Itene Wahnahne sánsá kawerue sehgigehe íwíáhuge. Sísaga meirena kaweraitená séhréh aítéh púaq itega wene sánsá sehgíówe.

<sup>10</sup> Manikánka pehipi íre ehweh aitankéhe. Itega mirauro arámbéhrí íre abitagiae. Írakaumo. Menahnkákáq amahnágaákáq Manikáne animárí kawerue séhréh aritena Manikánsabe irutaboirowe. Minayabe wega íre abitagiae.

<sup>11</sup> Íné nuwahbehme itega amahnága tauntahunue mira onserah mókakeakák ahriahriakák miraoro. Minayabe nuwahbehre. Mirairataq itega áwénuno naneqmarí mókake náinkéhe.

<sup>12</sup> Ite taoraho agiyeho. Peh abobiah taebera ké méq Manikánka mirainawire íwíáhéq wega náina naneqsabé kawerue áwénunoro. Mirairataq wega náinawire.

*Manikánka omasa náneqsabé aiq pútare atanéhe i ewhéhne.*

<sup>13</sup> Manikánka Ébáráhma ehweh teawutaq wega omasa éhwéh teawena, Aiq mirainaúge úwe. Mó anínká Maniká íre kiotaiki puana wega mi ewhéh irarútaq wewenáwírue irarúwe.

<sup>14</sup> Manikánka Ébáráhmansabé mahraréna, Are séhréh atanauge. Mókake ínéga séhréh atáhnaga arenanahréh íregáritaq úkigehe úwe.

*(Stat 22.17)*

<sup>15</sup> Ébáráhmaga árahinabomo íre íwíáhia peh kawerue áwénunúwana Manikánka teawu ewhéh aiq pútaragúwe.

<sup>16</sup> Wehukenínká omasa éhwéh iraritaq wega mó aní anotah aníne áwírue mi ewhéh irarire. Minawé Asiu kené sánsáne. Wehukenínká mi sansánínaraq wensabé ehweh atáh ké túbáh agorahowе.

<sup>17</sup> Manikánka omasa éhwéh irarútaq író kega, Wega mó íwíáhinabomo íwíáhiyeho éna Manikánka wewenáwírue mi ewhéh irarúwe.

<sup>18</sup> Minayabe Manikánka téhtaré pággéé éhwéh aiq irarú púana wega mó íwíáh íre orahire. Wega péhe éhwéh íre orahinsabé ite Manikápa kowía míaúna ke íwíáh íwíáhunayabé irupipeq eyoyóire. Irupipeq eyoyóínaq Manikáne ehwehnka aiq pútaraginawire íwíáhéq minawé áwénunoneheqmúne.

<sup>19</sup> Anotah awánká kaweq anúq kéhrana sóiriqka mi awánká íre pankonoráhire. Mina in-serah itega Manikáne ehweh aiq pútaraginawire íwíáhúnaga irupipeq kaweq awánká ánúq tahnsaniraq kaweqtaq mía míau. Itega kawerue áwénunúnayabé mókake Manikánka wene íópeqté páqnáhípéq móitankéhe.

<sup>20</sup> Ite séhréh aitanieéna Sísaga mitaq ebeq kienä ite mibeq mahbeq aítéh ání úkéna ahri-ahri mía míainawire. Wehukení wenáwíq Mékiséréki Manikáne ehweh mibeq mahbeq arítéh ání mía míau. Sísa moq mina tahnsa ahriahri mía míaire.

## 7

### *Mékiséréki anotah aníne i ehwéhne.*

<sup>1</sup> Manikámé anotah aní míowana Mékisérékiga Sáréma su wahpeqte kē wahnahnéna Manikáne ehweh mibeq mahbeq arito ani míowe. Ébáráhmareq we kéró kereqka mó wahnáh kéréq se kéríró kereqka ebehéra mi ke subiq súówe. Segá kouwekutaq Mékisérékireq Ébáráhmareqka piehgíuye. Mitaq wega Ébáráhmansabé kaweq ehwéh teawuwe.

<sup>2</sup> Kaweq ehwéh atowana Ébáráhmaga moke ebehurabeqte meyo mensáméhnsá nayáhnkú saraqmarena Mékiséréki peh morá awuwe. Mékisérékiwe mi awíq áwahewé kaweq sansá mirai wahnáhne. We Sáréma su wahpeqte kéné wahnah aní ména we mó awíqmé áwahewé aru ukiqme sansani wahnáh aníne.

<sup>3</sup> Wenanoibonkakáq wene aigaqnaréhakaq we maqmio tanahráqkákáq we pukú tanahráqkákáqsábé éhwéhmé íre kékre. We Manikáne ahninkáwá tahnsanéna ahriahri wene ehweh mibeq mahbeq arito aní mía míauwe.

<sup>4</sup> Mékiséréki anotah aní míonsabe we éhwéh ahtebagehboq íráhro. Itene igaqna Ébáráhmaga moke ebehurabeqte meyo mensáméhnsá nayáhnkú saraqmarena we peh morá awuwe.

<sup>5</sup> Ébáráhmane anahwa wenáwíq Áríwáie. Mi anímé we kahnáh Manikáne ehweh mibeq mahbeq arito ke míowe. Mósísiga sehgóro ú ehwehnká mahraréna, Ísara kegá sene meyáh ménsáméhnsá nayáhnkú saraqmahwara Áríwái kahnáhnká peh morá pehipi meyówe. Áríwái kahnáh kéréq moke mó Ísara kereqne sigaqnawé Ébáráhmae. Sensuwahrah Isárá kégá sene meyo mensáméhnsá nayáhnkú saraqmárówara Áríwái kahnáhnká peh morá pehipi meweewe.

<sup>6</sup> Manikánka omasa éhwéh Ébáráhma teawéna, Miranauge teawuwana Mékisérékiwe íre Áríwái kahnáh aní míowe. Ébáráhmaga mi mensáméhnsá nayáhnkú saraqmarena Mékiséréki peh morá awuwana Ébáráhmansabé kaweq ehwéh atowe.

<sup>7</sup> Ite ahtebónawe ahriahri kaweq ehwéh atéh ánínká mi ehwéh teawí ání kiotaikire.

<sup>8</sup> Áríwái kahnáhnká Manikáne ehweh mibeq mahbeq arítáh árámbéhrí mirautaq sega Ísara kegá sene saraqmáró mensáméhnsá peh morá pehipi meweowe. Áríwái kahnáh mótaq mótarue pukuwana Mékiséréki oga mía míai aníne uwana wega peh morá saraqmaro naneq pehipi meyowe.

<sup>9</sup> Itega mahraue irarerahúne. Áríwái kahnáhnká Ísara kegá saraqmáró mensáméhnsá peh morá pehipi meweoe kee. Téhwe Ébáráhmaga Mékiséréki ahtapeq tagéna peh morá saraqmaro naneq awutaq wenanah Áríwáiga moq Mékiséréki awuwe.

<sup>10</sup> Mi tanáhráq Áríwáine anowagá we íre maqmio púana wega Mékiséréki árahue awuwo? Ébáráhmawe Áríwáine aigaqna púana minayabe wega Mékiséréki peh morá saraqmaro naneq awutaq wenanah Áríwáiga moq awuwe.

*Sísawe Manikáne o mibeq mahbeq arítéh ánímé kiotaiki aníne i ehwéhne.*

<sup>11</sup> Mósísiga sehgóro ú ehweh Ísara ke teriena peh morá Árívái kahnáhnká Manikáne ehweh mibeq mahbeq arítáh árámbéhrí mirauwe. Mi arámbéhrí miraé sansa wehuke kawerarotaq tahirímé mó aní Manikáne ehweh mibeq mahbeq arítéh ání íre sú irino. Sú anínká íre Áríváireq Áróñireq kahnáh ánínéna peh Mékiséreki tahnsánéna Manikáne ehweh mibeq mahbeq aitéh ání míéhre.

<sup>12</sup> Mó anínká Manikáne ehweh mibeq mahbeq arítáh kéné arambehri awaq mionsabe miraira sansá o sansa úkinae.

<sup>13</sup> Manikánka omaq ato anímé íre Árívái kahnáh ánínéna we Súra kahnáh ání ména mi kegá tahberaq Maniká titirue náwe arámbéhrí íre mirauwe.

<sup>14</sup> Ite ahtebómé Súra kahnáhnká Manikáne ehweh mibeq mahbeq arítáh ké míagehe éhwéh Mósísiga íre irarúwe. Sísa itene Wahnahme we Súra kahnáh áníne. Minayabe ite aiq ahtebóne.

<sup>15</sup> Íre Árívái kahnáh ání peh mó aní Manikáne ehweh mibeq mahbeq aitéh ání ábóraragéna we Mékiséreki tahnsá ání míaire.

<sup>16</sup> Omaq ato anímé we kahnáh aiq awehraq kéhre íwíáhúnsabe omaq atoo? Írakaumo. Itene Wahnah ahriahri págegeue mía míai puana we Manikáne ehweh mibeq mahbeq aitéh ání úkúwe.

<sup>17</sup> Minayabe Manikáne ehwehnka mahraréna,  
Are Manikáne ehweh mibeq mahbeq aritahna aní mé ahriahri mía míainiewóne.  
Mékiséreki Manikáne ehweh mibeq mahbeq arito ani mía míáunserah are moq mina tahnsa mía míainiewóne ire. *(Buk Song 110.4)*

<sup>18</sup> Naho sehgóro ú ehwehmé íre págege aitahráhi éhwéhne. Mi éhwéhniká ite íre séhréh aitahráhinsabé Manikánka mi éhwéh aiq meruowe.

<sup>19</sup> Mósísiga sehgóro ú ehwehnká itereq mó naneqkakaq íre airaiq kaweraitahráhire. Manikánka o sansa omaq atowana mi sansánká Mósísiga sehgóro ú sansa kiotaikiraq itega Maniká Iteriboba wahtotaq kowíahrahúne.

<sup>20</sup> Wene ehweh mibeq mahbeq aitéh ání míankeheéna Manikánka Sísa omaq atotaq íre pehipi omaq atowe. Írakaumo. Peh págege éhwéhnue omaq atowe. Téhwe mó kegá Manikáne ehweh mibeq mahbeq arítáh ké úkutaq wehukenínká pehipi omaq sitena íre págege éhwéhnúwe.

<sup>21</sup> Peh morá Sísa Manikáne ehweh mibeq mahbeq aitéh ání míankeheéna Manikánka omaq atotaq págege éhwéhnue omaq atowe. Minayabe Manikáne ehwehnka mahraréna, Itene Wahnahnka págege éhwéhni puana wega mó iwiáh íre inawire. Are wene ehweh mibeq mahbeq arítéh ání ahriahri mía míainiewóne ire. *(Buk Song 110.4)*

<sup>22</sup> Sísaga omasa éhwéhmé áhnte kawéq éhwéhne. Mi éhwéhniká naho éhwéh kiotaikire. Minayabe itega aiq irone.

### *Sísa ite mibeq mahbeq aitéh ání míaire i éhwéhne.*

<sup>23</sup> Téhwe Manikáne ehweh mibeq mahbeq arító ke áhnte míowe. Se peh wehuke puara mótaq mótarue puku pukuunsabé peh morá anínká mi arámbéhrí ahriahri íre sehgioráhúwe.

<sup>24</sup> Sísaga íre mina tahnsa miraire. We peh mía míai aní púana Manikáne ehweh mibeq mahbeq aitéh árámbéhrí ahriahri sehgíre.

<sup>25</sup> Minayabe amahnágáákáq mókakeakáq Sísaga wensabé aiq pútare atáh ké kaweraritená Manikápa móritahnara oga mía míáoneherawoe. Sísa ahriahri mía míáéna itene ehweh Maniká teawí púana ite séhréh aita aitaire.

<sup>26</sup> Sísawe Manikáne ehweh mibeq mahbeq aitéh ání mía míainsabé peh ábérehrama ite séhréh aitéhre. Wega íre ahbabária peh Maniká awahbeh sansánéna kaweqtaq mía míaire. We tábúsuréh ánínéna ahbabáq kega mira onserah íre mirairana Manikánka we iriatena íópeq móatowe.

<sup>27</sup> Téhwe Manikáne ehweh mibeq mahbeq arító kega mó wehekáh mó wehekáhnue ménkámehnkáne korahqtaté Manikánsabe titiratówe. Ebeqme sega seyene ahbabáqsabe kaweraitankehééra Manikánsabe titiratówe. Anehemé sega mó kené ahbabáqsabe kaweraritankehééra titiratówe. Sísaga íre mina tahnsanire. We awankátaq táhpawe pukú tanahráq itene ahbabáqsabe peh morá tánáhráq wene anonkataté Manikánsabe titiratówe. Wega mi arámbéhrí aiq parabaruuo púana wega móñkakáq íre mirainawire.

<sup>28</sup> Téhwe Manikáne ehweh mibeq mahbeq arító ke míagehehéra Mósísiga sehgóro ú ehweh sehgiro kegá kaweqtaq íre míahraho ke omaq sitowe. Anehemé Manikánka págege ehwéhnue mi arámbéhrí mirainkehééna wenahni omaq atowana we ahriahri kaweqtaq mía míaire.

## 8

### *Sísawe íópeq Manikáne ehweh mibeq mahbeq aitéh áníne i ehwéhne.*

<sup>1</sup> Ínéga teiú éhwéhmé áwahe ahtebagehboq íráhro. Sísawe kaweqtaq mía míai puana ite séhréh aitéhre. We Manikáne ehweh mibeq mahbeq aitéh ání mía míáéna amahnága íópeq ména mibeqté anotah wahnáh Maniká Iteribone ayah púpeq tútuue míéhre.

<sup>2</sup> Sísaga Maniká Iteribone kaweq nahtápéq ména wene ehweh mibeq mahbeq aitéh árámbéhrí mira aruqarurire. Mi nahmé wehukega íre pera peh morá Maniká itene Wahnhnka pearowe.

<sup>3</sup> Mah marákóipéq Manikáne ehweh mibeq mahbeq arítáh kégá Maniká titiréra mó naneq mó nanerue awigehehéra omaq sitówe. Segá miraunserah Sísa ite séhréh aitéh áninká moq aíq áwíre.

<sup>4</sup> Mósísiga sehgóro ú ehwehnká mahraréna, Peh morá Áríwái kahnáh wéhgá Manikáne ehweh mibeq mahbeq arítáh kéné arambehri miraorahire ire. Peh mi kahnáh wéhgá mó naneq mó naneqtáté Manikánsabe titiratáhwe. Minayabe amahnága Sísaga mah marákóipéq míéhtáq tahirímé mi arámbéhrí íre mirai irino.

<sup>5</sup> Manikáne ehweh mibeq mahbeq aitéh ánínúrá ména wega íópeqté náhtápéq arambehrière. Mah marákóipéq mibeq mahbeq arítáh kégá arambehrio nahmé peh íópeqté náhné mánkánah tahnsáne. Mánkánah tahnsá púana Mósísiga Manikáne wéhuwehu nah sériraté pianaútaq Manikánka wensabé, Ínéga sáwéhrapeq sokigi awátáu serahnue tábusoqme pearo úwe.

<sup>6</sup> Manikáne ehweh mibeq mahbeq aitéh ání míankehééna Manikánka Sísa omaq atowana wene arambehriga moke mó mibeq mahbeq aitáh kéné arambehri kiotaikire. Mi arámbéhrí miraútaq Sísaga Manikánseq wehukereq moráéné ehweh áhwárówe. Sísane moráénia éhwéhnká naho moráénia éhwéh kiotaikire. Sísaga mirainauge ú ehweh áhnte kawéq ómásá éhwéh púana mi éhwéhnká téh ko ehweh kiotaikire.

<sup>7</sup> Wehukega téh ko moráéné ehweh sehgoráhutaq tahirímé mó moráéné ehweh íre áhwáró irino.

<sup>8</sup> Manikánka wehukene ahbabáq tagéna mahraréna,

Íratiáhro. Íné itene Wahnhnka mahraréna, Mókake ínéreq Ísara kereq o moráéné ehweh áhwáranehe. Súra kahnáh kereq ínéreq o moráéné ehweh áhwáranehe.

<sup>9</sup> Mi éhwéhmé íre sigaqnaréhreq ínéreq moráénowana tahnsá éhwéhne. Ínéga Ísípi marákórápéqté meriqmena móritáhwataq sereq ínéreq moráénowane. Segá ite moráeno éhwéh anterúó púana ínéga se peh áwé tagahwae.

<sup>10</sup> Íné itene Wahnhnka mó mahraréna, Mi tanáhráq parabagínaraq Ísara kereq ínéreq o moráéné ehweh áhwáranehe. Ínéga sehgóro ú ehweh sene iwiáhipec sitena sene sirupipeq sehiranaraníe. Íné sene Maniká míahnara se néne animári míagehe.

11 Anotah awíqkákáq kéreq íre anotah awíqkákáq kéreq ómiga íné tagariagehe. Ómiga íné aiq tagaríehra puara sene iyahnaboreq sensuwahrahreqsabé íre síwáhnorigehe. Itene Wahnah tagaríahro íre terigéhe.

12 Ómiga íné aiq tagaríehra puana ínéga sensabé nirutaboiraritena sene ahbabáq kaweraritaníe. Sene ahbabáqsabe mó íre iwíáhue niahreraq matianie uge úwe. (*Jeremaiá 31.31-34*)

13 Manikánka, O moráéné ehweh áhwáranehe insabé téh ko ehweh nahonáh úkire. Nahonáh úki naneq apubúue parabaginæ.

## 9

### *Korahq titiré sansánká wehuke íre airaiq kaweraritahráhú ehwehne.*

1 Téh ko ehwéhká Manikánsabe iwíáh iwíáh ate sansa sokigi aíre. Mi tanáhráq Manikánsabe iwíáh iwíáh atáh náh kowe.

2 Segá mi nah sériraté pearówe. Ébeq paqnáhípéq áráhmuwe, tahbewe, Maniká áwú parétíwé kowara mitaqsábé Kaweqtapére áwíratówe.

3 Mi nahupéq mó mapéq kowana ákáhpi parahnkeq tahnsá ónsá kowe. Mó mapéq Anotah Kawéqtápére áwíratówe.

4 Mitaq kaweq kunkúni naneq pariageheéra kóraraté akariaró tahbé kowe. Moráéné sehiránia ebáh kánéhwé pójísiipéq kowe. Mi pokísíwé kóraraté akariaró pokísíe. Mi pokísíipéq iópeqté tópáhnkákáq Árónine pegiqnáhnkarankákáq sehiránia ébáh kánéhráréákáq kowe. Iópeqté tópáhmé kóraraté akariaró motóréipéq kowe. Mi pegiqnáhnkárámé Áróniga matiotaq ánáh aunúwe.

5 Mi pokísí maraipéq kowana Maniká míéhrabeqte áníté tahnsa náneqtaré sehwerapeq kowe. Manikáne térehre naneq tagageheéna mitaq kowe. Sene oe awenahpeqté wehukene ahbabáq kawerorahirabeq kowe. Amahnága mah ehwéh áwahewé íre íwáhnorinie.

6 Teiú ménsáméhnsá kawerarówara mó wehekáh mó wehekáhnue Manikáne ehweh mibeq mahbeq arítáh kégá Kaweqtapéq kibekéra sene arambehri mira aruqaruowé.

7 Peh morá mitaq arambehrio kené wahnahnka webataq Anotah Kawéqtápéq morá ópéqmé peh morá tánáhráq kienä tueyokúwe. Wega mibeq pehipi íre kiuwe. Írakaumo. Wega mibeq kiutaq korahq mewena wene ahbabáqkakaq mó kegá áhwára áhwáraue mirau ahbabáqkákáq kaweraritankeheéna mi koráhq Maniká nauwuwe.

8 Kaweqtapéq arambehri peh kéhnsábé itega Maniká míéhrabeqte áh íre ábóraq kéhre. Minayabe Manikáne Awanka aiq sokigi aíre.

9 Maniká míéhrabeqte áh íre ábóraq kéhnsábé mi seríraté pearó nahnká amahnága míáh ké sokigi aíre. Mi nahtápéq wehukega mó naneq mó naneq Maniká titirue náwúwe. Segá mi sansánunka sirupipeq íre kaweraritahráhúwe.

10 Mi sansámé peh táhutahuq awehrié sásánkákáq sosue sansánkákáq kowe. Mi sansánká íre sirupipeq peh morá sinonka kawerarite sansane. Sísa Karáhéga o sansa íre áhwárariotaq Mósísiga sehgóro ú ehweh sehgeheéna mi tanáhráq kowe.

### *Sísaga wewene korahqtaté titirúnka wehuke kaweraritahráhí ehwehne.*

11 Sísa Karáhéga tuena kaweq sansá áhwáréna íre wehukega pearó nahtápéq Manikáne ehweh mibeq mahbeq aítéh ání míá míáéna mitaq arambehriúwe. Mi nah áhnte kawéq náhnéna moke mó iwíáh iwíáh atáh sérí náh kiotaikire. Mi nahmé íre mah marákó mårákóipéqté náh tahnsane.

12 Sísa Karáhéga mi nahtápéq kienä Anotah Kawéqtápéqté paqnahipeq ménkámehnkáne korahq íre mewena kiuwe. Kienä wewene korahq mewena Maniká titirue náwúwe. Ite ogá mérapeq awaq miageheéna wene korahqtaté paiqitowe.

<sup>13</sup> Wehukene sinonka soqsuaneherautaq Manikáne ehweh mibeq mahbeq arítáh kégá káho áráhqne anonka iraipéq agera mibeqté tánahákáq ménkámehnkáne korahqkakáq mewera mó ke soqsuageheéra káqsuahruwe.

<sup>14</sup> Sega miraunsabé Sísane korahqka mi sansá kiotaikire. Sísaga íre ahbabária peh kaweqtaq mía míaire. Manikáne Awame mía míai anínéna Sísa págege atowana wene korahq Maniká titirue náwuwe. Wene korahqtaté soqsuqme kaweraitéh púaq abehq árámbéhríyábé íre iwiáh íwíáhia peh Maniká itene oga mía míai Wahnáhné sánsá sehjonehqmúne íwíáhúne.

*Sísaga wene korahqtaté o moráéné sansa áhwáraro ehwéhne.*

<sup>15</sup> Minayabe Sísa Karáhéga o moráéné sansa áhwárówe. Téh ko moráéné sansa koataq wehukene ahbabáq kaweraritanieéna Sísa pukúwe. Sísa pukútaq wega miraúnka Manikánka omaq itena íáhrabi kegá oga mérapeq awaq miageheéna Sísa Karáhéga o moráéné sansa áhwárówe. Áhwárówana Manikánka náiníe ú naneq awaq miagéhe.

<sup>16</sup> Wehukení oga míéhtáq wenawahrahga wene ménsámehnssá íre awaq miahráhowe. Peh morá we pukínaraq wenawahrahga tagéra aiq pukire éra awaq miagéhe.

<sup>17</sup> Puki anínká sehiranurai pepáhqtáq tagéra sehirranka irarinserahnue wene ménsámehnssá saraqmarera awaq míáhwe. We oga míéhtáq wenawahrahga mi pepáhqtáq kékéh íre sehgoráhowe.

<sup>18</sup> Ebeqte ko moráéné sansa áhwárotaq pehipi íre áhwáréra peh korahqkakáq áhwárowe.

<sup>19</sup> Téhwe Mósísiga mi sansá págegeinkeheéna ménkámehnká subiqme mi kané korahqtaté titirúwe. Titirinaútaq téhwe Mósísiga moke Manikánka sehgóro ú ehweh teriena anehe káho áráhqne korahqkakáq wáninkakaq peh morá ántéhyápípquéq ahkiuwe. Ahkiwena awanká ánáhakaq tautáúq nahniáqkákáq mewena mi korahq pámbáhue sehgóro ú ehweh ko pukúákáq moke mío keakáq sensineq káqsuahrúwe.

<sup>20</sup> Mósísiga káqsuahréna mío keyabé,

Itega Manikánka sehgóro i ehwéh págegeue sehgeheéna korahqtaté káqsuahruge úwe.

*(Kisim Bek 24.8)*

<sup>21</sup> Manikánsabe iwiáh íwíáh ató nah sériraté pearó nahnkákáq moke mibeqté ménsáméhnssánkákáq Mósísiga mi korahqtaté káqsuahrúwe.

<sup>22</sup> Mósísiga sehgóro ú ehwehnká teiena,

Peh morá korahqka moke kékéh náneq kawerorahire. Peh morá korahq túínsábé Manikánka wehukene ahbabáq kawerarítéhre ire. *(Wok Pris 17.11)*

*Sísaga peh morá tánáhráq Maniká titirue náwena pukú ehwéhne.*

<sup>23</sup> Wehukega ménkámenkáne korahq titiré sansanká íópeqté titiré sansa sokigi aíre. Mah marákóípéq titiré sansa sehgó kégá peh ménkámehnkáne korahq titirowe. Íópeq titiré sansanútaq Sísaga wewene korahq titirúwe. Minayabe íópeq titirú sansa anotah kaweq sansá púana mi sansánká ménkámenkáne korahq titiré sansa kiotaikire.

<sup>24</sup> Sísa Karáhéga Manikánsabe iwiáh íwíáh ató nahmé wehukega sériraté pearó nahupéqmé íre kibekia peh íópeq kibekúwe. Mina pearó nahmé wéhuwehu nahmirana íópeqté náh ahriahri kékéh náhne. Minayabe Sísaga íópeq kékéh náh Maniká Iteribone auranabiahtapeq mía míáéna ite séhréh aita aitaire.

<sup>25</sup> Mó opéq mó opérue mah marákóípéq Manikáne ehweh mibeq mahbeq arítéh ánínká Maniká titirinieéna nahupeqte Kaweqtapéq ménkámehnkáne korahq mewena kibekúwe. Mina únserah Sísa Karáhéga mó opéq mó opérue Maniká íre titirúwe.

<sup>26</sup> Miraútaq tahirímé mó tanáhráq mó tanáhrárue mah marákó mårákó miraútaqkakáq amahnágaákáq áhnte tanáhráq Sísa éri irino. Mah tanáhráq parabagina uraitaq Sísaga peh morágáké tuena wehukene ahbabáqsabe kaweraritanieéna pukúwe. Sísaga Maniká titirue náwunka ite kaweraitahráhire.

<sup>27</sup> Wehukení móñkakáq móñkakárue íre pukia peh morá tánáhráq pukinawire. Mina inserah Sísa moq peh morá tánáhráq pukúwe. Wehuke pukirataq anehe Manikánka ehwéh aritena sainsuankéhe.

<sup>28</sup> Minayabe áhnte kené ahbabáqsabe Sísa Karáhéga peh morá tánáhráq Maniká titiratena pukúwe. Itene ahbabáqsabe aiq kaweraito púana mókake we tuinaraq mi arámbéhrí móñkakáq íre mirainawire. Wensabé aiq pútare ateq áwénunúna ke airaiq kaweraitanieéna tuinkéhe.

## 10

*Ménkámehnkáne korahqka titirorahi naneqme íre awehrare i ehwéhne.*

<sup>1</sup> Mósísiga sehgíoro ú ehwehnká mókake sína naneqmarínsábé peh pikisah tahnsá púana mi ehwéhnká áwahe íre tábúsoqme sokigi aieráhire. Mi ehwéh irarúnka mó opéq mó opérue wehukega titiraruqarurowe. Manikánsabe iwíáh iwíáh atáh náhtápéq se kegá titiré sansa sehgiónká kaweraritahráhi? Írakaumo. Mi sansánká wehuke íre airaiq kaweraritahráhire.

<sup>2</sup> Titiré sansa sehgiónká kawerarítéhtáq tahirímé sega mó opéq mó opérue íre titiraruqaruro irino. Kawerarítéhtáq tahirímé sene ahbabáqsabe móñkakáq íre iwíáhia titiré sansa aiq súah irino.

<sup>3</sup> Segá mó opéq mó opérue titirotaq sene ahbabáqsabe íre kawerorahia peh iwíáh aruqarurowe.

<sup>4</sup> Mémene korahqkakáq káhone korahqkakáq wehukene ahbabáq íre kawerari-tahráhi puara sene ahbabáqsabe iwíáh aruqarurowe.

<sup>5</sup> Minayabe Sísa Karáhéga marakóipeq tuinaútaq wega Manikánsabe mahraréna, Are ménkámehnkáne korahqtaté titiré sansansábé íre awahbehre. Arene arambehri mirainkeheé arega ninonka aiq kaweraintahne.

<sup>6</sup> Wehukene ahbabáq kawerariteyabe ménkámehnká arene tahberapeq age sansánkákáq sene korahqtaté titiré sansankákáqsábé íre awahbehre.

<sup>7</sup> Minayabe ínéga arensabé mahraréna, Maniká Nániboo, are awahbeh arámbéhrí mirainieéna aiq tutauge. Púkuipéqté éhwéhnká íné éhwéh aiq irarinserah sehginauge uge úwe.

(Buk Song 40.6-8)

<sup>8</sup> Téhwe Sísa Karáhéga mahraréna, Are ménkámehnkáne korahqtaté titiré sansásábé íre awahbehre. Wehukene ahbabáq kawerariteyabe ménkámehnká arene tahberapeq age sansankákáq sene korahqtaté titiré sansankákáqsábé íre awahbehre úwe. Wehukega mi titiré sansa pehipi íre miraia peh Mósísine ehwéh sehgíoro únsabe mirauwe.

<sup>9</sup> Anehe Sísga mó mahraréna, Are awahbeh arámbéhrí mirainieéna tumióge úwe. Minayabe wega naho titiré sansa suena itene ahbabáqsabe kaweraitanieéna o sansa áhwárówe.

<sup>10</sup> Sísa Karáhéga Maniká awahbó arámbéhrí kawerue miraéna peh morá tánáhráq pukéna wene anonkataté Maniká titiratowe. Wega miraúnka itene ahbabáq kaweraitowaq amahnága ite kaweetaq mía míauñe.

*Sísga titirúnka itene ahbabáq airaiq kaweraitéhre i ehwéhne.*

<sup>11</sup> Manikáne ehwéh mibeq mahbeq arítáh kégá mó wehekáhnue iriwe méra peh morá mi titiré arámbéhrí aruqarurowe. Mi titiré arámbéhrónka wehukene ahbabáq íre kaweraritahráhire.

<sup>12</sup> Sísa Karáhéga peh morágáké itene ahbabáqsabe peh morá tánáhráq titirúnka ahriahri peh awehraq kagaire. Wega titirarena Manikáne ayah púpeq tútuue mía míaire.

<sup>13</sup> Tútuue mía míáéna áwénunire. Mókake Manikánka, Arene naruo págegeue wahnhanrito teawinkeheéna áwénunire.

<sup>14</sup> Wega morágáké titirúnka ite ahriahri kaweqtaq mía míaigeheéna itene ahbabáqsabe airaiq kaweraitowe.

<sup>15</sup> Minayabe Manikáne Awanka teíre. Wega Púkuipéq ebeq mahraréna,

<sup>16</sup> Itene Wahnahnka mahraréna, Mi tanáhráq parabagínaraq ínéga o moráéné sansa áhwáranie. Néne ehweh kawerue siahtebagehboq sirupipeq mi ehwéh siahtebari-taníe. Néne ehweh kawerue siahrreraq matiagehboq mi ehwéh iwíáh aritaníe úwe ire. *(Jeremaia 31.33)*

<sup>17</sup> Púkuipéq anehe mó mahraréna,  
Sene ahbabáqkakaq sene ahkaragáraakáq mó íre niahreraq matianie ire. *(Jeremaia 31.34)*

<sup>18</sup> Wehukene ahbabáq airaiq kaweraitená mó íre ahreraq matiéh púara wehukega mónkakáq titirigehboq? Ahqáho. Írakaumo. Mó íre titirorahowe.

### *Itega Manikánsabe aiq pútare ateq weba wahtotaq kowíanehe i ehwéhne.*

<sup>19</sup> Néne iyahnabo anímáríno, Sísa pukútaq wene korahq tunsabe itega íre áhreia peh Kaweqtapéq Maniká míéhrabeq kioráhúne.

<sup>20</sup> Sísaga kaweq o ah sabaro púaq itega oga mérapeq Maniká míéhrabeq kioráhúne. Sísa pukútaq Manikánsabe iwíáh atáh náhtápéqté parahnkeq tahnsá ónsá senahpeqté subame tuwe. Miraúmé mi paráhnkéq Sísame anonkansabé sokigi aiíre.

<sup>21</sup> Sísa Karáhewé amahnága Manikáne ehweh mibeq mahbeq aítéh ání anotah anínéna Manikáne animári wahnah aítéhre.

<sup>22</sup> Wega kaweq wanítáté itene inonka aiq pabeq paberaitéhre. Sísame korahqtaté itene irupipeq káqsuahraitéhre púaq itene ahbabáq peh kéhre iwíáh íre úne. Minayabe itene irupipeq kaweq iwíáhqué, Manikánsabe aiq pútare ateq weba wahtotaq kowíanehe iwíáhoro.

<sup>23</sup> Manikánka mirainauge ú ehweh aiq pútaraginawire iwíáhúne. Minayabe itega íre túbáh agia peh wega mirainawire iwíáhqué ambubu atianeheqmúne iwíáhoro.

<sup>24</sup> Mó Sísa tagariáh kékéyáh sensabé irutaboiréq we séhréh atéhonehe iwíáhoro.

<sup>25</sup> Sísa tagariáh kékéyáh momiwíé sansa súého. Táhmaro mó kegá aiq suto serahniyeho. Írakaumo. Itene Wahnah tuina tanáhráq aiq wahtonagi puaq itene irupipeq kaweq iwíáh kankehboq síwáhnoréq we séhréh atéhoro.

### *Manikáne ahninkáwáné ehweh inehapeq súého i ehwéhne.*

<sup>26</sup> Íratiáhro. Téhwe Sísame sánsá aiq ahtebéq anehe iteitene iuwahbeh iwíáh miraéq ahbabáq aruqarurirataq mi ahbabáq kaweraiteyabe mó íre titirorahire. Írakaumo.

<sup>27</sup> Mó íre titirorahi puaq peh áhreéq iransánéq Manikánka ehweh aitahna tanáhráqsábé áwénunoneheqmóe. Manikánsabe ahqáho atáh kékéyáh tabikira iráípésabé áwénunoneheqmóe.

<sup>28</sup> Wehukenínká Mósísiga sehgóro ú ehweh anteruowara téhranítégábópoq apahránítogábópoq tagéra wene ahbabáq pahsutowara író kega ahbabáq aninsábé íre sirutaboiratasu subiq súówe.

<sup>29</sup> Ite kaweqtaq mía míaigeheéna Sísame korahqka kaweraitowana anehe mó anínká mi koráhqkákáq Sísaga o moráéné sansankákáqsábé abehq náneq mire éna anetaníbo iwíáhéné Manikáne ahninkáwá anehapeq súého. Mósísine ehweh anteruo anímé wehukega íre sirutaboiratasu peh kamah awera subiq súówe. Subiq súónsabe Manikáne Awanka séhréh atéh sánsá anehapeq súého anímé Manikánka mi aní aneratankéhbo? Mókake wega mi aní anotahtaq kamah awinawire.

<sup>30</sup> Maniká ite tagariona anínká púkuipéq aiq mahraréna,  
Ahbabáqsabe ayahqmarewé ínénéne arambehri wire ire. *(Lo 32.35)*

Wene ehwehnka mó mahraréna,  
Itene Wahnahnka wene animári sainsuena ehweh aritanawire ire. *(Lo 32.36)*

**31** Maniká oga mía míai anínéna ahbabáq ke sainsuena ehweh aritahna puaq áhreéq wene sánsá anehepeq súéhneho íwíáhoro.

### *Sísansabé aiq pútare ateq wene sánsá págegeue sehgóro i ehwéhne.*

**32** Itega Sísansabé téh aiq pútare atáró tanáhráqsábé iahreraq matiáhro. Manikáne sansá téreh tahnsánirara mó kegá íwíoqnarowaq wene sánsá íre susa peh ambubu atiarowe.

**33** Wehuke míópi ite iriitárówara íre kaweq ehwéh aitera íwíoqnarowe. Sega mó tanáhráq mó ke moq síwíoqnarowaq mi keyábé irutaboiréq kosiéhnehurowe.

**34** Sega Sísa tagaríah ké karábúsíipéq móritárówqaq sensabé irutaboiréq séhréh arítárówe. Mó kegá itene ménsámehnsá moke pehipi meraotaq ite íre abiahnsania peh irupipeq eyoyói ke míarowe. Oganúq ítéh náneq mó kegá íre meyahráhowe íwíáhuro puaq irupipeq eyoyó ke míarowe.

**35** Menah itega Sísane sánsá kawerue sehgirowe. Ahriahri sehgioneheqmúne íwíáh íre súáhro. Írakaumo. Itega íre súéhrataqmé Manikánka anotah apéq náinkéhe.

**36** Mi apéq náinkeheéq Maniká awahbeh arámbéhri págegeue sehgóro. Ahriahri mirairataqmé Manikánka náina apéq aiq náinawire.

**37** Minayabe wene ehwehnka mahraréna, Pehgáriq tanáhráq parabagínaraq tuinie i anímé tuinawire. We íre túbáh agia peh apubúue tuinawire.

**38** Néne ani kaweqtaq mía míai anínká ínénabe aiq pútare ainta aintai puana kaweqtaq mía míainkehe. Peh néne sánsá suena túbáh agi ánínsábé íre nuwahbanawire ire.

### *(Habakuk 2.3-4)*

**39** Itega wene sánsá ambubu atawéq íre kugeqnáhnúne. Ahqáho. Iraipéq pokoneherao ke tahnsa ké íre míone. Írakaumo. Sísansabé aiq pútare ateq oga mérapeq awaq miona ke úne.

## 11

### *Manikánsabe aiq pútare ateyabe áwahe ehwéhne.*

**1** Manikánsabe aiq pútare atona sansá sehgianawe Manikánka irarú ehweh aiq pútaraginawire íwíáhéq minayabe áwénunuúne. Itene iuranka mi naneqsabé íre tagónayabé anetaníbo. Peh ite iahtebónawé wega irarú ehweh peh aiq pútaraginawire.

**2** Naho naho itene igaqnaréhga Manikánsabe aiq pútare atówana wega sensabé kawerowe aritowe.

**3** Manikánka irarúnka mah marákó márákóákáq íopekákáq miraro ehwéhnsábé aiq pútare atone. Amahnága moke tagóna naneqme íre tagahrahúna naneqtaté Manikánka mirarowe.

### *Ábériréh Ínókureh Nóahrehga Manikánsabe aiq pútare ato ehwéhne.*

**4** Ábériga Maniká titirútaq wensabé aiq pútare ato púana wene arambehriga wenawah Kéínine arambehri kiotaikúwe. Wega Manikánsabe aiq pútare atonsabe Manikánka wensabé, Kaweróne. Kaweqtaq míahne atowe. Ábéri naho pukúwe. We oga míotaq Manikánsabe kawerue aiq pútare ato ehweh amahnáákáq teíre. *(Stat 4.3-10)*

**5** Ínókuga Manikánsabe aiq pútare atowana Manikánka we tumero púana íre pukúwe. We tabanagútaq mó kegá we kabaruwana Manikánka we tumero púana íre ábóraq marówe. Púkuipéqté éhwéhniká mahraréna, Manikánka we íre tumero tanáhráq Ínókuga Maniká awahbeh sansánúwe ire. *(Stat 5.21-24)*

**6** Peh morá Manikánsabe aiq pútare atáh kegá we awahbeh sansá sehgioráhowe. Wehukenínká Manikápa pehipi íre kioráhire. Ebeqme wega, Maniká aiq míéhre íwíáhéra, We anebahrúna ke mókake kaweraitanawire íwíáhínaraqmé weba kioráhire.

**7** Nóahga Manikánsabe aiq pútare atowana Manikánka sinaú tanáhráqsábé teawuwe. Teawuwana Nóahga mi tanáhráqsábé íre tagótaq mi ehwéhnsábé aiq pútare atena

Manikáne ehweh sehgiuwe. Wega mi ehwéh sehgiena anotah sipí mirarowe. Nóahreh karíónáninká sípiipéq kibekue méra wání piotaq íre pukuwe. Nóahga Manikánsabe aiq pútare atonserah mah marákó márákóípéq mío kega íre aiq pútare atówe. Minayabe Manikánka mi keyábé ehweh aritena kamah ariuwe. Nóahga Manikánsabe aiq pútare atonsabe Manikánka, Are kaweqtaq míahne atowe. *(Stat 6.13-22)*

*Ébáráhmareq Sárahreqka Manikánsabe aiq pútare atóya ehwéhne.*

**8** Manikánka Ébáráhma téh áhrabútaq Ébáráhmaga Manikánsabe aiq pútare atena wene ehweh sehgiena wenawahpeq suena wega íre tagario marákórápéq, Manikánka náwiníe ú marákórápéq pokúwe.\*

**9** Wega Manikánsabe aiq pútare atena náwiníe ue omasa márákórápéq pokéna wáhnaupéqté kéné marakórapeq kowíowe. Wega peh úqnapipéq seri nahtápéq kaegaeúwara wenahnité Áhísáhkireq Sékópareqka moq úqnapipéq kaegaeuye. Mi anítégá Manikánka Ébáráhma teawu ehwéhnsábé moq aiq pútare atera mi ehwéh aiq pútaraginawire éra áwénunuye.

**10** Ébáráhmaga Manikánka webataq áhwáraro mapéq kagai mapéq kibekinie íwíahúwe. Mitaq kibekéyabe arutaboiréna áwénunúwe.

**11** Ébáráhmane ahre Sárah orenínéna inahupeq mó íre kaegaeútaq Ébáráhmaga iwíahéna, Manikánka, We animai maqmiankéhe ue omasa éhwéh aiq pútaraginawire ú púana Manikánka Sárah séhréh atowana animai maqmiowe.

**12** Ébáráhma pukorahú koré míotaq wene ahrega animai maqmiowe. Mi aní anonurowara wenanahréh peh íregáritaq úkue míowe. Íopeq wehyoq áhnte kéhnserah wenanahréh peh íregáritaq úkue míowe. Náhmbísibeq arahwé áhnte kéhrara wehukega íre sáhnsahoráhonserah wenanahréh peh íregáritaq úkue míowe.

**13** Moke teiú ánímári Manikánsabe aiq pútare atera sene marakóipeq mé tanahráq parabagútaq pukuwe. Segá marakóipeq oga mío tanahráq Manikánka mókake náiníe ú naneqmarí íre meyówe. Írakaumo. Wehukenínká áwénuni naneq íre wahtote tagehnserah mi kegá áwénunu naneqmarí sirupipeq tagéra iwíah íwíahéra, Ite marakóipeq míonaraq peh wáhnaupéqté ké tahnsa míone éra pahsúówe.

**14** Mahna tahnsa éhwéh pahsúó kega íre mah marákóípéqsábé peh kaweq matábúrápéqsábé sirutaboiruwe.

**15** Ébáráhmarehga suto marákóyábé íre sirutaboiruwe. Írakaumo. Mitaq sirutaboirutaq tahirímé kouwekorahu irino.

**16** Suto marákóyábé íre sirutaboiruwe. Írakaumo. Peh íopeq kiotaiki mapéqsábé sirutaboiruwe. Segá Manikánsabe, Arebataq Maniká Iteribo wone atónsabe Manikánka sene ehwehnsabé íre ayehítówe. Írakaumo. Peh segá awaq miageheéna wega íópipeq kaweq matábúrápéq kawerarowe.

**17-18** Manikánka Ébáráhmansabé, Mókake arenahni Áhísáhkine animári arenanahréh míagehe úwe. Anehe wega Ébáráhmansabé, Arene mahbi Áhísáhkiwe subiqme titirainto teawuwe. Teawena, Ébáráhmaga mi ehwéh sehginabomo éna áhwárawe tagówe. Ébáráhmaga Manikánsabe aiq pútare atena, Wene ehweh sehginauge íwíahéna wenahni subiq suanaúwe.

**19** Subiq suanaútaq íwíahéna, Ínéga we subiq súáhnaraq Manikánka organúq atahráhire úwe. Puki anínká oga úkue Wenaboba mía míainserah Áhísáhki áura pukéna we moq wenaboba mía míauwe.

*Áhísáhkireh Sékópareh Sóséparehga Manikánsabe aiq pútare ató ehwehne.*

\* **11:8:** Ébáráhma wenawíq áwahewé áhnte kehináné sibowáe. Stat 17.5 tagáhno. Moke we éhwéh Stat sapta 12-23 kékre.

**20** Áhísáhkiga Manikánsabe aiq pútare atena orerague pukinaútaq wenahnité Sékópareq Ísoreqsabé kaweq ehwéh teríúwe. Wega anehe sína naneqsabé irarúwe. *(Stat 27.27-29,39-40)*

**21** Sékópaga moq Manikánsabe aiq pútare atena orerague pukinaútaq wenahni Sósépane anitýábé kaweq ehwéh aritena wene pegiqnáhnkarataq káuqmunue saqmatawéna Manikánsabe iwiáh iwiáh atowe. *(Stat 47.31-48.20)*

**22** Sósépaga moq Manikánsabe aiq pútare atena orerague pukinaútaq Ísara kegá Ísípi marákórápéq súéhra ehwéhnikákáq wene ayahnsa kiroqmera pokira ehwéhnikákáq irarúwe. *(Stat 50.24-25; Kisim Bek 13.19)*

### *Mósísiga Manikánsabe aiq pútare ato ehwéhne.*

**23** Mósísine anoiboga Ísípi marákórápéq méra Manikánsabe aiq pútare atera Mósísí maqmaroyataq sene naruoga subíyehoéra apahtáró iótáq sene ani kopéq átóye. Mibeqté wáhnáhnká Ísara keyabé, Animai maqmaréhrataq subiq súáhro úwara Mósísine anoiboga sene animai tagéra, Kaweq mai wíre iwiáhéra íre áhreia subiq súáhro ú ehweh anterúóye. *(Kisim Bek 1.22, 2.2)*

**24** Mósísí inahunahní míotaq mibeqté kéné wahnahne ayahunkawagá meyowe. Mósísiga Manikánsabe aiq pútare atena anonükútaq, Íné íre mi iníné ahninkáwá úge. Írakaumo úwe.

**25** Írakaumo iwiáhéra, Ahbabáq miraonawe pehgáriq tanáhráq iwiáh iwiáhé sansa púana íre mirainauge úwe. Minayabe Ísípi kegá wenawahrah Isará ké síwíoqnotaq Mósísiga mina tagéna, Ísípi aní míanie íre iwiáhia peh, Nánuwahrah Manikáne animárínseq míanie iwiáhúwe.

**26** Manikáne animárínseq míanie iwiáhéra, Sína anímé Karáhéne sánsá sehgónsabé Ísípi kegá níwíoqnagehe. Anetaníbo. Manikáne sansá sehginíe. Wega nánina naneq-marínká Ísípi marákórápéq moke móneakáq kaweq awáhriq náneqmarínkákáq kiotakinae iwiáhúwe. *(Kisim Bek 1.22, 2.2,10-12)*

**27** Mibeqté wáhnáh áninká Mósísinsabé abiahnsa atowana wega Manikánsabe aiq pútare atena íre áhreia Ísípi marákórápéq suena pokúwe. Wehukega sene siuratare Maniká íre tagahrahuwana Mósísiga wene arupipeqté iwiáhgá Maniká tagówe. We tagó púana págege atowana wene kaweq sansá ambubu atawéna sehgiwe.

**28** Wega Manikánsabe aiq pútare atena wene ehweh irena sótaikú siahreraq ko sansa áhwárówe. Áhwáréna Ísara keyabé, Sipisípiq subiqme mi kané korahq itene méhpehtapéq abaq máráhro aritowe. Mirairataq íopeqté áninká sótaikéna itene ebeq piah anímári íre subiq suankéhe teriuwe. *(Kisim Bek 2.15, 12.21-30)*

### *Áhnte Ísara kegá Manikáne sansá ambubu atawéra sehgíú ehwehne.*

**29** Ísara kegá Manikánsabe aiq pútare atera anotah waní kéráwéguwe. Mi waní áwíqmé Káhtore Soréq Wáníne. Ísara kegá mi wanítáq kéráwégonehera utaq mi waní taraqnágúwara sega awaho marákóráq nogónserahnue kéaguwe. Ísípi ebehu kegá sinehe kaqme kéra Ísara kegá onserahnoneheqmúne iwiáhéra mitaq kéráwégonehera utaq mi waní anotah waní piowara wáninkue pukuwe.

**30** Mó tanáhráq Ísara kegá Manikánsabe aiq pútare atera wene ehweh sehgíú púara Séríko suwahpeq ebah kuri pera áhtápéq abapete téhtaré wéhékáh abugeqnáhnuríowana mi ebáh kúri sokogúwe.

**31** Séríko suwahpeqte weh aebó íní wenáwíq Áráhpa míowe. Mi ebáh kúri íre sokogútaq mi inínká Manikánsabe aiq pútare atena téhtaré Ísará ánítégá ahboerayeheéra suyataq mehwéh aritena séhréh aritowe. Séríko suwahpeqte kégá Manikánsabe íre aiq pútare atówana peh morá mi inínká wensabé aiq pútare atowe. Minayabe mi ebáh kúri

sokogútaq Ísara kegá moke Séríko suwahpeqte ké subiqme oraruera peh morá mina séhréh arito iní íre subiq susa pehragatówe.

<sup>32</sup> Manikánsabe aiq pútare ató ke éhwéh mó teiníkono? Wehuke síwíqmari Kíréóni, Páraki, Sáhmúsóni, Sépáta, Tébítí, Sáhmúérireh mó Manikáne ehweh iraru kereqne ehweh áhnte kék púana moke íre teieráhuge.

<sup>33</sup> Segá Manikánsabe aiq pútare atówe. Mibeqté táhmaro kégá mó marákórápéqté kereq ebehutaq kiotaikuwe. Mibeqté táhmaro kegá kaweq sansánéra Manikánka náinie ú naneq meyówe. Mibeqté táhmaro kegá Manikánsabe aiq pútare atonka úrinsi iá tahnsa kane áwéh músúriowe.

<sup>34</sup> Mibeqté táhmaro kegá anotah iraró puinsúowe. Mibeqté táhmaro kegá sene naruoga pokatate kiraranehera utaq íre subiq súowara sabigue pehbeheráh pokuwe. Mibeqté táhmaro ké mareqmareq keéra Manikánsabe aiq pútare atónsabe tauntahu ke úkuwe. Mibeqté táhmaro kegá ebehutaq tauntahunéra wáhnaupéqté kék subipáhrarúowe.

<sup>35</sup> Mibeqté táhmaro ahrérónká Manikánsabe aiq pútare ató púara sensuwehqso pukutaq mó organúkuwe. Mibeqté táhmaro kegá Manikánsabe aiq pútare atówara sene naruoga se saiqnariówe. Saiqnariówara segá Manikáne sansá sinehepeq súótaq tahirímé sene naruoga soraq súó irino. Sene sinonkansabé íre sirutaboiria peh oga mérapeqsábé sirutaboiru puara Manikáne sansá ambubu atió púara sene naruoga subiq súowara pukuwe.

<sup>36</sup> Maniká íre tagarió kega mó táhmaro ke siwiréh aritera sahtáté subiqmarera séniraté táhru táhruue karábúsiipéq móritówe.

<sup>37</sup> Mó kegá táhmaro ebahnsatake tuparuqme subiq súowe. Segá mó táhmaro ke sóraté ákah kiraq súowe. Segá mó táhmaro ke pokatate kiraq suqme subiq súowe. Manikánsabe aiq pútare ató ke tabonahuwara sene naruoga síwioqnéra íre kawerarítowara korósi tabónáhunsabé sipisípiqne áúakaq mémene áúakaqtáté aneranerue míowe.

<sup>38</sup> Aneranerue méra abatapi pokéra sáwéhrapeqkákáq ónapipéqkákáq kaegaeuwe. Se kaweq ke míowara mó mah marákóípéqté kégá íre kaweq ke míowana sensabé siyehítówe.

<sup>39</sup> Segá Manikánsabe aiq pútare ató púana wega sensabé kawerowe aritowe. Se marakóipeq mótaq Manikánka nárinie ue omasa náneqmarí íre meyówe.

<sup>40</sup> Manikánka wensabé aiq pútare atona ke kaweq ah sabaitowe. Naho mío kega mi ahtápéq ebeq íre kíúwe. Írakaumo. Íre kíuwana Manikánka, Sereq itereq moraráq kigehe aitowe.

## 12

### *Itega Sísa tagéq iwiáh iwiáh atanéhe i ehwéhne.*

<sup>1</sup> Mina teiú kégá Manikánsabe kawerue aiq pútare atera amahnága sensuwanka ite abugeqnáhnurawéra iwahnkanowe. Segá Manikánsabe kawerue aiq pútare atónsabe itega iwiáhue tagéq kaweq ahtápéq korahúne. Manikáne ahtapeq tauntahunue nogonéhboq moke umehi naneq sueq ahbabárorahi naneqmarí inehepeq suaneheqmúne.

<sup>2</sup> Sísansabé ahriahri tagéq iwiáh iwiáh atanéhe. Itega wensabé téh aiq pútare atáráunaraq séhréh aitená mókakeakáq séhréh aitankéhe. Minayabe wene sánsánsábé iwiáhue taganehe. Segá Sísa awankátaq táhpawé subiq suanehera utaq wega, Mókake nirupipeq eyoyó aintanawire iwiáhúwe. Minayabe awankátaq táhpawé puké sansa ayehiteh sansansábé íre iwiáhia amahnága Manikáne ayah púpeq tútuue mía míaire.

### *Wene animári ahbabárirataq Manikánka kaweraritanieéna kamah arinkéhe i ehwéhne.*

<sup>3</sup> Ahbabáq kega Sísansabé anotah abiáhnsá atera áwíoqnotaq wega págegeue ména íre túbáh agúwe. Minayabe iwiáhéq túbáh agiyehboq wene sánsá peh kawerue sehgióro.

<sup>4</sup> Itega ahbabáq saiqnaruaneheéq págegeue arambehriowe. Miraonsabé ahbabáq kega iwióqnahtaq itene korahq íre túíraq peh oga míáhwe. Minayabe iwiáhue tagahro.

<sup>5</sup> Wene púkuipéqté éhwéh págege ehwéh iahreraq kehro? Mi ehwéhká mahraréna,

Nénahníno, itene Wahnahnka are kaweratanieéna kamah awinah ahtebáhno. Wega arensabé, Íre kaweróne atahnaraq arega wene sánsá sehgleyabe anetaníbo íwíáhineho. Íakaumo.

<sup>6</sup> Arutaboiri anínká ahbabáríñaraq itene Wahnahnka kaweratanieéna kamah awinkéhe. Wega moke wene animári úko ke wahnahnatawéna se ahbabárírataq kamah arinkéhe ire. *(Sindaun 3.11-12)*

<sup>7</sup> Wene kaweç anímári míageheéna itega ahbabárúnaraq Maniká Iteriboga kaweratanieéna kamah aíre. Wega kamah aina tanáhráq minayabe íwíáhést pehwehrue méq wega sokigi aina naneq ahtebéq págegeue míáhro. Sene animári kaweçtaq míageheéra kaweç sibówáréhga wahnahnaritera kawerue kamah arié mino.

<sup>8</sup> Ite ahbabárotaq Maniká Iteriboga peh áwé tagehtaq tahirímé ite íre wene animári pehipéqté ánímári míáh irino.

<sup>9</sup> Iteriborehga ite kaweraitaneheéra kamah aiéwaq sene ehweh ireq sensabé kowe ariteq íwíáh íwíáhúne. Minayabe Maniká Iteribonsabé anotahtaq kowe atáhro. Wega iteiwa auráq matawéna kamah ainaraq kowe atáhro. Kowe atáhnaraq oga míá míaoneheqmúne.

<sup>10</sup> Iteriborehga ite káriq anímári míarauna tanáhráq seyega íwíáhuronserah íwáhnoréra kamah aiátówe. Ite we kaweçtaq míá mía inserahnigeheéra Manikánka íwáhnoréna kawerue kamah ainainire.

<sup>11</sup> Wega kamah aí tánáhráq itene irupipeq íre eyoyóia peh umeh agire. Téhwe itene irupipeq umeh agiraq sokigi aí náneq ahtebónaraq anehe ite kaweçtaq méq itene iru ukiqme míahrahúne.

### *Tauntahu ke méq Sísane arambehrioro i ehwéhne.*

<sup>12</sup> Mareqmareq ayáhkáránkákáq ké míéhboq tauntahu ke méq Sísane arambehrioro. Mareqmareq aréhúnkákáq ké míéhboq tauntahu ke méq

<sup>13</sup> wene obarisa áhtápéq nogóro. Mirairataq itene igará íre mareqmarerinae. Írakaumo. Peh kawetaq kagaina.

<sup>14</sup> Moke mó kereq kaweçtaq méq uwaresa ké méq arambehrioro. Manikánka kaweçtaq míá mía inserahnigehéq arambehrioro. Ahbabáq kega itene Wahnah íre tagagehe.

<sup>15</sup> Manikánka séhréh aítéh sánsá sehgónsabé túbah agiyehboq kawerurero. Kítabéh awanká sera tahnsá úkéq mó ke ahbabáq aritéhboq kawerurero.

<sup>16</sup> Mó aníné weh ahre abarie sansá pehragahro. Wehukení wenáwíq Ísoe. Wega arupibiútaq tira táchútahúq meyanieéna moke awaqmiahrahi naneq paiqmarowe. Wega Manikánka ebeq piah aní aweráhi naneqsabé anetaníbo íwíáhúwe. Wega miraú serahniyehboq kawerurero.

<sup>17</sup> Téhwe Ísoga awaq miahrahi naneq paiqmarena anehe minayabe arutaboiréna wenabonsabé, Kawerainto éna ibisówe. Téhwe wega mi naneqsabé anetaníbo íwíáhéra aiq paiqmaro púana anehe móntakákáq íre meyahráhire.

### *Itega o Sarúsarama suwahpeq íópipeq kékhrabeq aíq sewe i ehwéhne.*

<sup>18</sup> Itega íre tagahraho mapéq sewe. Íre táhtorahráho mapéq sewe. Ísara kegá tagahraho sawéh áwíq Sáinái suwe. Táhtorahráho sawéhrápéq suwe. Itega Ísara kegá íre mirau serahnowe. Itega mina tahnsa tagahraho sawéhrápéq íre koragarowe. Segá mi sawéhráq koragéra anotah irobina tagéra anehe anotah sunkíkírú tagéra anotah soírírú tagowe.

<sup>19</sup> Tagowana pembíáhnúwara irera mó aníné ehweh írówe. Segá mi ehwéh téh írótaq áhreéra Mósísinsabé, Mi ehwéh mó ireyabe iuwahriehre éra mó íre irarúno teawo éra pagu pagunuwe.

<sup>20</sup> Manikánka sensabé, Wehukeníkábópoq ménkámehnkánkábópoq mah sawéhráq abasáhnaraq ebahnserá tuparuqme subiq súáhro aritonsabe áhreéra Mósísinsabé, Mó íre irarúno teawo éra pagu pagunuwe.

<sup>21</sup> Segá tago naneqsabé áhreorahi naneq puana anotahtaq áhreuwe. Minayabe Mósísiga mahraréna, Íné áhreéna iransánuge úwe. *(Kisim Bek 19.12-13,16)*

<sup>22</sup> Ísara kegá áhreu naneqsabé suronserah itega íre sewe. Írakaumo. Sáióna sawéhrápéqmé Maniká oga mía míairabeq we kahnáh suwahpeq mire. Íopeq o Sarúsarama suwahpeq mire. Itega mitaq sewe. Mitaq peh íregárítatq íopeqté kégá iwíáh iwíáh orabeq sewe.

<sup>23</sup> Manikánka ite omaq sito kene sensíwíqmari sehiranue íopeq marowe. Marowaq téh omaq sito kegá íopeq momiwíorabeq sewe. Manikánka moke mah kehiná kékhná ehweh aitena saiuwankéhe. Weba aiq sewe. Manikánka kaweqtaq mía míao ke aiq kaweraritowara sensiwamarí míáhrabeq sewe.

<sup>24</sup> Itega Sísaba sewe. Sísaga o moráéné ehweh áhwárótaq wene korahq tunka mi ehwéh págege arowe. Sísane korahqka íre Ábérine korahqka irarú serahnuwe. Írakaumo. Sísane korahqka Ábérine korahq kiotakéna peh kaweq ehwéh irarire.

### *Manikánka teí éhwéh anterúéhboq kawerurero i ehwéhne.*

<sup>25</sup> Iahre parosa ké méq Manikánka teí éhwéh anterúéhboq kawerurero. Naho mah marákóípéq míó keyabé págege ehwéh teriuwara anterúówe. Segá anterúónsabe Manikánka kamah ariu púara segá íre kopératorahuwe. Itega moq íre kopératorahúne. Írakaumo. Amahnága Manikánka íopeqté éhwéh teí púaq itega mi ehwéh inehapeq súáhnaraq wega ite anotahtaq kamahinkéhe.

<sup>26</sup> Naho Manikánka ehweh teriutaq mah marákó márakó máríúwe. Amahnága wega mahraréna,

Mókake íre peh morá mah marákó márakóyábé mónkakáq máríúno atanauge.

Íopeqkákáqsábé moq, Máríúno atanauge ire. *(Hagai 2.6)*

<sup>27</sup> Wega, Mónkakáq máríúno atanauge insabé mah ehwéh irahráhúne. Wega miraro naneqmarí kúrugúruorahi naneqmarínsábé, Kúrugúruúno atahnana tabanagine. Peh morá íre kúrugúruorahi naneqmarí kagainawire.

<sup>28</sup> Manikánka wahnah wahnahnirabeq íre kúrugúruorahire. Wega itensabé, Awaq míáhro aitéhnsábé wensabé áhtenéq we awahbeh sansánéq wensabé iwíáh iwíáh atone.

<sup>29</sup> Manikámé moke toráh agorahi irá tahnsane. Minayabe wensabé áhtenéq iwíáh iwíáh atone.

## 13

### *Wensabé wensabé arutaboiratéhoro i ehwéhne.*

<sup>1</sup> Sísá tagariáh kéo, wensabé wensabé arutaboiratéhoro.

<sup>2</sup> Wáhnaupéqté kégá iteba sirataq kawerue mehweh ariteq kirabo arítáhro. Menah mó kegá seba suro ke mehweh aritera kirabo aritera suro ke peh wáhnaupéqté kée iwíáhurowe. Írakaumo. Peh íopeqté ké mehweh aritera kirabo arítárówe.

<sup>3</sup> Sísá tagariáh ké karábúsiipéq míéhrataq sensabé iwíáhoro. Sensabé iwíáhéq sirutaboirirranka sereq moraráq karábúsiipéq mé tahnsa iwíáhoro. Sísá tagariáh ké síwíóqnehrataq sensabé iwíáhoro. Iteitene inonka moq íerire iwíáhéq sensabé iwíáhoro.

<sup>4</sup> Ahre mewe sansamé wehké sansamé kaweq sansáne. Minayabe wehga mó aníné ahre abariíneho. Ahrega mó aníné weh abariíneho. Mó aníné ahre weh abario ke Manikánka ehweh aritena kamah arinkéhe.

### *Mónayabé irutaboiriyeho i ehwéhne.*

<sup>5</sup> Mónayabé irutaboiriyehboq peh matiéhra naneqsabé aiq avehraq mire iwíáhoro. Minayabe Manikánka aiq mahraréna,

Are íre auwaníe. Inehapeq íre auwaníe. Írakaumo ire. *(Lo 31.6)*

<sup>6</sup> Minayabe árahinabomo iwíáh íre oro. Peh págegeue Manikáne ehwehnka irarinserah irarenehe. Wene ehwehnka mahraréna,

Néne Wahnahnka séhréh aintéh púana íre áhreinie. Wega séhréh aintéh púara mó kegá pehipi íre kamah anigéhe ire. *(Buk Song 118.6)*

*Sísa kéreyabe íre iyehitegurégúia peh kéranehe i ehwéhne.*

<sup>7</sup> Ite Sísa tagariáh kéráq wahnahno kegá Manikáne ehweh íwáhnoruowaq sensabé iwíáhoro. Sega kaweq arámbéhríéra Manikánsabe kawerue aiq pútare atárónserahnoro.

<sup>8</sup> Sísa Karahéwé menahnkákáq amahnágaákáq mókakeakákáq ahriahri peh monseráhnué mía míaire.

<sup>9</sup> Mó kegá áwánáh éhwéh teírataq mi ehwéhnsábé aiq pútare arítéhranka Manikáne sansá súého. Wega séhréh aitéhnsábé iteiyuwa págegeue míahrahúne. Mó naneq tahutáhúq awehrié sansa sehgonka iteuwa íre págege aitahráhire. Mina tahnsa sánsá sehgonka wehuke íre séhréh aitahráhire.

<sup>10</sup> Peh ite Sísa tagariona kené o tahbé kékre. Manikáne mibeq mahbeq arítáh ké nahoh táhbérápéqté mewe nah kegá o tahbérápéqté táhútáhúq íre mewe nahwe. Írakaumo.\*

<sup>11</sup> Manikáne ehweh mibeq mahbeq arítáh kégá Anotah Kawéqtápéq pokotaq wehukene ahbabáqsabe kaweraritankehéra ménkámehnkáne korahq mewera titirowe. Peh korahq mewera titiréra mi kamáríné sinonka mewera ahnansahrapeq ira paríahwe.

<sup>12</sup> Mira onserah itene ahbabáqsabe kaweraitanieéna Sísaga ahnansahrapeq awankátaq táhpawe pukéna wene korahq tunka kaweraitéhre.

<sup>13</sup> Minayabe ite iuwahbeh sansá sueq ahnansahrapeq Sísaba kowíanehe. Mó kegá Sísa áwíoqnowe. Itega weba wahtotaq kowíahnaraq sega ite moq íwíoqnaneherawoe. Íwíoqnehransabé anetaníbo éq weba kowíanehe iwíáhoro.

<sup>14</sup> Mah marákó márákóípéq ite mía míaona matábúrápquéq íre kékre. Minayabe peh kagaína matábúrápquéqsábé áwénunúne.

<sup>15</sup> Áwénunéq amahnága ite ménkámehnkátate íre titiria peh ahriahri Manikánsabe Sísa áwírue kaweróne ateq itene íwéhrate iwíáh iwíáh atanéhe.

<sup>16</sup> Kaweq sansá súéhboq ahriahri kaweq sansánoro. Ite matiéhra naneq wenawíoro. Mi sansátáré Maniká awahbeh sansá púaq ibitaginehboq kawerue miraoro.

*Itetaq wahnahno kené ehweh sehgóro i ehwéhne.*

<sup>17</sup> Ite Sísa tagariáh kéráq wahnahno kegá ite séhréh aitaneheéra ite auráq matíáhwe. Moke sene arámbéhríyábé Maniká teawigéhe. Minayabe itetaq wahnahno kené ehweh ireq kawerue sehgóro. Sehgírataq sene arambehri eyoyóue miraorahowe. Sirupipeq umeh agínaraq sega ite íre séhréh aitahráhowe.

<sup>18</sup> Itensabé ahriahri púreraitáhro. Itega kaweq sansánuraunayabé irupipeq eyoyóire. Mókakeakákáq ahriahri itega kaweq sansánéyabe iuwahbehre.

<sup>19</sup> Iteba apubúue kouwekinibooq Manikánsabe íné séhréh ainto ue púreraitáhro.

<sup>20</sup> Sísa itene Wahnah pukútaq Manikánka iriwe organúq atowe. Sísaga itene ahbabáqsabe pukúwana wene korahq tunka moráéné ehweh kawerarowana kagaire. Minayabe Sísaga ite Manikáne sipisípiq wahnahnaita aitaire. Manikánka iru ukiq itena

<sup>21</sup> wene arambehri kawerue miraigeheéna séhréh aitéhre. Itene irupipeq we awahbeh sansá aitahnana kagainkehe. Sísa Karahé anotah aní méq wensabé ahriahri iwíáh iwíáh atanéhe. Aiq miraoneheqmúne.

*Páhsí parabaginai ehwéhne.*

<sup>22</sup> Néne iyahnabo anímáriño, itene irupipeq kaweraitanieéna mah pahsí sehiranuge. Mah pahsí peh wahtotaq ehwéh púaq kawerue sáhnsahwe íráhro.

<sup>23</sup> Iteribáq Tímoti karábúsiipéqté pugeq áuwátówe. Wega ínéba apubúue sínaraq iteba moraráq koragayehetauye.

\* **13:10:** Mi o tahbé áwahewé mahraréna, Sísa Karahé tahpato awanká itene o tahbé tahnsane. We pukúnka ite oga mé topáh o tahbérápéqté tópáh nónie ire.

<sup>24</sup> Moke itene wahnahmarínseq Manikáne animárínseqsabé iroro teriéro. Moke Ítári marákórápéqté Sísa tagaríáh kégá itensabé iroro ewe.

<sup>25</sup> Manikánka ite ómiyabé arutaboiraitena séhréh aitéhre.

## Sémisi Ebeq sáhnsahwe ahtebé ehwehne.

Áhnte ahtébíá kégá, Sémisiwe Sísane ábákawae íwíáhowe. Sémisiwe Sarúsarama suwah-peqte Sísa tagariáh kéráq wahnahnú aninéna mah pahsí Sísa tagariáh Ásíú ké séhréh aritanieéna sehiranúwe. Wega iwiáhéra, Sísansabé aiq pútare atáh kégá íre túbáh agia peh kaweq sansá miraigehe. Mirairataqmé sene kaweq sansá tagah kegá iwiáhéra, Mah kegá aiq pútaq Sísa tagariáh ké wóe íwíáhigehe. Mah pahsí sáhnsáho kegá Sísane sánsá tábúsoqme sehgihehéna Manikánka Sémisi iwiáh atowana mah pahsí sehiranúwe.

### Sémisiga mah pahsí sehiranúwe.

**1** Ínéwé Sémisi Maniká Iteriboreq itene Wahnah Sísa Karáhéreqne arambehri aní mûge. Néne páhsí sáhnsahwe tagahro. Ite Ísara ke airápété téhtaré káhnáh míone. Itene igaqnaréha wáhnaupéqté kéné marakórapeq abae agunsabé mó ke suwahpeq míáhwe. Ite ómiga néne ehweh sáhnsahwe íráhro.

#### *Moke ite áhwáreh naneqka págege aitéh éhwéhne.*

**2** Néne iyahnabo anímáriño, moke áhwáré naneq sínaraq iru ukiqme míáhro.

**3** Íre kaweq sunúq sínaq Manikánsabe aiq pútare ateq wene sánsá íre susa peh kawerue sehgirätaq págegeue míáhrahewe. Minawé aiq tagariáhwe.

**4** Wene sánsá íre susa peh kawerue sehgirätaq ite kaweqtaq míagehe. Ite kaweqtaq míéhrataqmé Manikánka séhréh aitena wega náina naneq íre tabonahigehe.

#### *Ahtebé iwiáh tabonahi anínká púrerinkehe i ehwéhne.*

**5** Íre ahtebéh anínká Manikánsabe, Ahtebé iwiáh nánio ue púreríñaraq Manikánka ahtebé iwiáh atankéhe.

**6** Manikánsabe, Nánio ue púrerirataq náninabomo árahinabomo íwíáhiyehboq peh aiq pútaq náninawire íwíáhoro. Wáninka mó kantoq mé kantorinserah árahinabomo íwíáhi anínká mó iwiáh mó iwiáhire.

**7** Manikánka náninabomo árahinabomo íwíáhi anímé wega íre náwinawire.

**8** Mó iwiáh mó iwiáhi anínká tábúsoqme arámbéhrí íre miraia peh áhwára áhwáraire. Wega náninabomo árahinabomo íwíáhinsabé Manikánka íre náwinawire.

#### *Tabonah kereq áhnte mensáméhnsánkákáq kériqsabé irari ehwéhne.*

**9** Sísa tagariéh ání tabonahínaraq Manikánka wensabé, Anotah aní míahno atahnana iwiáh íwíáhinkehe.

**10** Üworapeqté náneq kirena áraniwe ehyataginserah áhnte monéákáq ménsámehnsánkakaq sorupeh aní pukinae. Minayabe Manikánka áhnte moné matiéh áninsábé, Pehgáriq aní míahno atahnana iwiáh íwíáhinkehe.

**11** Ehbiehbeq anotah patáhitaq uworapeqté náneq ehyatague ára megínaraq íre kaweq naneq úkinae. Mina inserah áhnte monéákáq áninká áhnte ahwími árámbéhríñaraq pukinawire.

#### *Manikánka ite ahbabáqtaqpeq íre móitahráhi ehwéhne.*

**12** Menah Manikánka mahraréna, Ínénsabe arutaboiri anínká mókake kagai apéq náwénaraq oga mía míainkehe ire. Minayabe ahbabárarahi tanáhráq sínaraq mi ahbabáqsbé ahqáho atéh áninká kaweqtaq míahnaraq wega kagai apéq awaq mena iwiáh íwíáhinkehe.

**13** Mó aníné arupipeqté íwíáhgá we abarirana wega, Ahbabárinie íwíáhínaraq, Manikánka mi iwiáh aintéhre íwíáhineho. Írakaumo. Ahbabáqka Maniká íre sabirorahi puana wega mó ke ahbabáqtaqpeq íre móitahráhire.

<sup>14</sup> Téhwe itene irupipeqté iwíáhgá morání morániné iwíáh abarire. Minayabe ite ahbabárigeheéna iteitene íre kaweq naneqsabé irutaboirúnaga ite ehnenehnénéna péhe éhwéh aitéhre.

<sup>15</sup> Kía míéh íníné arupipeq káriq aní míéhrana mina inserah itene irupipeq ahbabáq iwiáh kéhre. Kía míéh ínínká ani maqmaréhnserah itene irupipeqté iwíáhgá ahbabáq áhwárehre. Áhwárehraha ahbabáqka ite saiqnariahnaq áhnte ahbabáq aruqarurirataq pukoneheqmóe.

<sup>16</sup> Néne iyahnabo anímáriño, péhe éhwéhnsábé aiq pútare arítého.

<sup>17</sup> Moke kaweq naneqmarí íópeqté Ítéribogá aiq náire. We peh ahriahri téhrehrabeq míai anínéna moke kaweq naneqmarí nái náinire. Mánkánahnka ebeq íre wahtonagéna anehe pehgáriragire. Manikánka íre mina tahnsanire. We íre mó sansá mó sansáni aní míre. We peh ahriahri téhrehrabeq míai aníne.

<sup>18</sup> Maniká Iteribo wewega iwíáhéra ite omaq itowe. Omaq itonsabe wene aiq pútaq éhwéh írátáúnaraq aiq pútare atáráúnana wega, Néne animári móe aitená kaweraitáráire. Téhwe ite kaweraitena anehe mó ke kaweraritankéhe.

### *Manikáne ehweh ireq sehgóro i éhwéhne.*

<sup>19</sup> Néne iyahnabo anímáriño, kawerue íráhro. Mó kegá ehwehnirataq ahkabaqme ireq kawerue iwíáhoro. Sene ehweh ireq pehwehrue iwíáhue ehwehnoro. Íre apubúue abiahnsanoro.

<sup>20</sup> Apubúue abiahnsano kegá Manikáne kaweq sansá íre miraorahowe.

<sup>21</sup> Íre mirao naneq sansánkákáq moke ahbabáq sansankákáq áhnte kagaire. Moke mi sansá itene irupipeqté suáhro. Manikánka wene ehweh ayu tahnsa itene irupipeq uqmataire. Minayabe iteite iuwahbeh sansá sueq wene ehweh kawerue sehgírataq itene iru kaweraitankéhe.

<sup>22</sup> Minayabe Manikáne ehweh kawerue sehgóro. Íre peh iahrega íráhro. Írakaumo. Peh iahrega íráhnaraqmé peh iteitene péhe iwíáhyábé aiq pútare atagéhe.

<sup>23</sup> Wehukenínká Manikáne ehweh peh ahrega irena íre sehginaraq we timanopipéq tageh aní tahnsane.

<sup>24</sup> Mi aní wene náwíqkakáq auranabiah timanopipéq tagéna timano mitaq marena pokéna wene auranabiah apubúue abitagire.

<sup>25</sup> Manikáne ehwehme anotah kawéq éhwéhne. Mi éhwéh irena kawerue sehgi ánime ahbabáqka íre saiqnariahrahire. Mi éhwéh íre abitarusa peh timanopipéq taga tagainserah sáhnsahena kawerue sehginaraq Manikánka, Kaweróne atankéhe.

<sup>26</sup> Wehukenínká iwíáhéra, Ínéwé Sísansabé aiq pútare atóge éna Manikánsabe kawerue iwíáh íwíáh atóge éna ahriahri abehq éhwéh iraréna wene péhe éhwéhniká wewe péhenuiéhre. Mi anínká, Ínéwé Sísansabé aiq pútare atóge éna Manikánsabe iwíáh íwíáh atóge ime íre awehraq kék púana peh abehq iwíáhire.

<sup>27</sup> Manikáne ehweh sehgiro kegá ehneranimárnseq kéweinínsónseq íre kaweq sunúq séhréh aritera mah marákóípéqté áhbábáq sánsá íre miraia peh kaweqlaq mía míaowe. Minawé Maniká awahbeh sansáne.

## 2

### *Peh morá sánsá ómi kehinánsábé miraoro i éhwéhne.*

<sup>1</sup> Néne iyahnabo anímáriño, itene Wahnah Sísa Karahé íópeq wahnahni anínsábé aiq pútare atáhwe. Minayabe anotah keyábé iwíáh íwíáhéq kawerariteq pehrápeqte kék inehapeq suého.

<sup>2</sup> Ite momiwíorabeq kaweq korósíákáq kaweq awáhríq náneqkakáq ánínseq tabonah aní subankia korósíákáq ánínseqka iteba sirataq mó anínsábé mó iwiáh mó anínsábé mó iwíáhiyeho.

<sup>3</sup> Itega kaweq korósíákáq ánínsábé, Kaweqtapéq tútuue míahno ateq tabonah anínsábé mobeq koiriwe míahno. Mahtaq igárápí tútuue míahno atého.

<sup>4</sup> Mira íwíáhome itega korósi tagahnsabé mó ke kaweq kee íwíáhariteq mó ke abehq kée íwíáh arítáhwe. Mira íwíáhome itega saraqmáráh wáhnáhmárinká íre kawerue saraqmáráhnserah iwíáhowe.

<sup>5</sup> Néne iyahnabo anímáríno, néne ehweh íráhro. Manikánka mahraréna, Ínénabe sirutaboiro kegá wahnah wahnahurabeq awaq miagéhe ire. Wensabé aiq pútare atera kaweqtapéq awaq miageheéna Manikánka mah marákóípéqté tábónáh ké omaq sitéhre.

<sup>6</sup> Itewe aneqsabé tabonah keyábé síehruruo? Áhnte mensáméhnsánkákáq kégá ite íre kaweraitáh mino. Ite meiqmera ehwehorabeq móítáh mino.

<sup>7</sup> Manikánka itensabé, Sísa Karáhéne animári móe aitéhre. Aitéhrara ménsámehsánkakáq kégá Sísa Karáhéne kaweq awíqsábé abehq éhwéh atáhwe. Segá mina tahnsa áhbábárowe.

<sup>8</sup> Maniká itene Wahnahne ehwehnka mahraréna, Arerensabé arutaboirónanserah mó keyábéákáq arutaboirúno ire. *(Wok Pris 19.18)* Minayabe itega mó keyábé irutaboiro ehwéh sehgóimé kaweq sansánowe.

<sup>9</sup> Itega anotah keyábé iwíáh íwíáhést pehrápeqte ke inehepeq súáhmé mina íre kaweq sansánowe. Manikáne ehweh anterúáh púana mi ehwéhnká itensabé ahbabáq ke woe aitéhre.

<sup>10</sup> Minayabe Mósísiga sehgóiro ú ehweh áhnte kawerue sehgi áninká peh morá éhwéh antehruéhmé wega moke mi ehwéh aiq anteruéhre.

<sup>11</sup> Manikánka mahraréna,  
Mó aníné ahre weh abariiyeho ire.

Wega mó mahraréna,  
Mó aní subiq súého ire. *(Kisim Bek 20.13-14; Lo 5.17-18)*

Minayabe arega mó aníné ahre weh íre abariia peh mó aní subiq suahnawe arega mi ehwéh aiq anteruahne.

<sup>12</sup> Manikánka sehgóiro ú ehwehnká ahbabáq saiqnariahnaraq wehuke soraq suahráhire. Wega mi ehwéhnsabé iwíáhéra mah kehiná kékínáné sánsá saraqmarankéhe. Minayabe iwíáhue kaweq ehwéh iraréq kaweq sansánoró.

<sup>13</sup> Wehukenínká mó keyábé íre arutaboirínaraq Manikánka ehweh aitahna tanáhráq mi aní kamah awinkéhe. Mi tanáhráq mó keyábé arutaboiri anínsábé, Kaweróne atankéhe.

### *Íné aiq pútare atóge i anínká íre kaweq sansanéna abehq íwíáhi ehwéhne.*

<sup>14</sup> Néne iyahnabo anímáríno, peh morá áninká mahraréna, Ínega Sísansabé aiq pútare atóge ire. Wega iraréna Síane sánsá íre sehgóimé wene ehwehme peh abehq úkire. Ínega Sísansabé aiq pútare atóge irarinka we kaweratahráhiro? Írakaumo. Peh wewene ehwehnka íre kaweratahráhire.

<sup>15</sup> Arega Sísa tagaríáh wéh áhré tagé korósíakáq táhutahuqkakáq tabonahotaq

<sup>16</sup> íre náriasa peh ehweh teawenawe arene ehweh peh abehq náneq úkire. Arega wensabé, Tototaq mé ayahbankikitaq mé pehwehrue pokéwahno teawenawe íre náriasa arene ehwehnka árahue séhréh atankéhbo? Írakaumo. Arene ehweh peh abehq náneq úkire.

<sup>17</sup> Arega Sísansabé aiq pútare atóge íwíáhést mó ke íre séhréh aritahnawe arene iwíáh peh abehq náneq úkire.

<sup>18</sup> Mó morá áninká mahraréna, Mó kegá peh Sísansabé aiq pútare atáhwara mó kegá peh kaweq sansá miraowe ire. Mi ehwéhnsabé teiníe. Arega Sísansabé aiq pútare ate kaweq sansá íre miraónawe ínega are tagéna arensabé, Árahue Sísa tagariahna aní móne atanínkono? Ínega kaweq sansá miraonayabé arega tagé ínénabe, Sísa aiq pútare atahna aní móne ue ahtebahrahóne.

<sup>19</sup> Manikámé peh morá áníne aiq pútare atóge énawe aiq kaweróne. Peh morá mina irarénaga íre awehraq mire. Owainawamarínká moq minayabe aiq pútare atera áhreéra iransánowe.

<sup>20</sup> Aiq pútare atahnayabé aiq awehraq mire íwíáhono? Aneqsabé kaweq arámbéhríininkono íwíáhono? Múgu wahgu aní móne. Peh morá aiq pútare atóge énawe íre awehraq mire. Mahnayabe áwahewé teinie.

<sup>21</sup> Itene igaqna Ébáráhmaga Manikáne ehweh sehginieéna wenahni Áhísáhki subiqme titirinaúwe. Wega íre túbáh agia peh Manikáne ehweh segiunsabe Manikánka wensabé, Kaueróne. Kaweqtaq míahne atóge úwe. (*Stat 22.1-14*)

<sup>22</sup> Ébáráhmaga Manikánsabe aiq pútare atena págegeue sehgoráhi ehwéh teawutaq túbáh agnie íre úwe. Wega peh Manikánsabe aiq pútare atóge éna wene ehweh sehginauge íwíáhúwe. Sehgiunka wega Manikánsabe aiq pútare atowe sokigi awuwe. Minawé aiq ahtebaho?

<sup>23</sup> Manikáne ehwehnka mahrraréna, Ébáráhmaga Manikánsabe aiq pútare atonsabe Manikánka wensabé, Kaueróne. Kaweqtaq míahne atóge úwe íre.

Manikánka Ébáráhmansabé mó mahrraréna,  
Areve néne iyahnabo aní móne atowe úwe. (*Stat 15.6; Aisaia 41.8*)

Ébáráhmaga Manikáne ehweh kauerue sehgiunsabe mah pukúipéqté éhwéhnká aiq pútaragúwe.

<sup>24</sup> Manikánsabe aiq pútare atóge irarime íre awehraq mire. Írakaumo. Peh Manikánsabe aiq pútare atena wene ehweh sehgi ánínsábé Manikánka, Kaueróne. Kaweqtaq míahne atéhre. Minawé aiq ahtebaho?

<sup>25</sup> Weh aebó íní wenáwíq Áráhpae. Téhtaré Ísará ánítégá nahnsó kené marakó ahboergeheéna Sósúaga eqmarowe. Eqmarowana Áráhpane nahtaqpeq suyana wega mi aníté mehwehue kirabo aritena wenawahpeqte kégá subíyehoéna mó ahtápéq sokigi ariuwe. Wega miraúnsabe Manikánka, Kaueróne. Kaweqtaq míahne atowe. (*Josua 2.1-21; Íbaru Ke 11.31*)

<sup>26</sup> Wehukeníné awanka wene anonka suena airaiq pokitaq we pusa ání míéhre. Mina inserah Manikánsabe aiq pútare atóge irari anínká wene kaweq sansá íre sehgmé we pusa ání tahnsa míéhre.

### 3

#### *Itene ehwehme iwiáhue tagéq pehwehrue irarero i ehwéhne.*

<sup>1</sup> Néne iyahnabo anímárnó, Manikánka ite síwáhnorúna kené arambehri iwiáhue tagéna págegeue ehweh aitahráhire. Minayabe tagariáhwe. Wega mó Sísa tagariáh kéné arambehri pehwehrue iwiáhue tagehre. Minayabe wehukega momiwíorabeq síwáhnoro ke áhnte úkiyeho.

<sup>2</sup> Ite ómiga mótaq mótarue áhwára áhwáraúne. Ehweh iraré tanahráq ahriahri áhwára áhwára ehwéh íre irari anímé kaweqtaq mía míaire. Wene áwéhipeqté éhwéh kauerue wahnahn puana wega wene moke anonka kauerue wahnahnatiahrahire.

<sup>3</sup> Anotah ka wenáwíq ósiga itene ehweh kauerue irankeheeéq áwéhipeq áhíniraté iyarone. Miraonaga ite iuwahbehrabeq ósiga meiqmena móítéhre.

<sup>4</sup> Sípi soberi sansánsábé iwiáhoro. Sípiwe anotah nanere. Anotah soirírinka sípi tauntahunue pagunoráhire. Sípi soberi anínká pehgáriq awánkátáté miraia náneq paberéhrana sípiga wehukenínká pokinie irabeq pokire.

<sup>5</sup> Mina inserah anehbíwé pehgáriq naneréna peh anotah arámbéhrí kékre. Anehbíga mó ke ahbabáratahráhire.

Ite tagarionawe pehgáriq irágá anotah irárawe abae ague uworapeqté áhnte awánká tahrahire.

<sup>6</sup> Ahbabáq ehwéhmé ira tahnsáne. Pehgáriq irágá anotah irárawe abae aginserah ahbabáq ehwéhnká moq abaeue anotah agirana mó ahbabáq áhwárehre. Iraipéqté éhwéhnká ahbabáq iwiáh áhwárehrana ahbabáq anotah agorahire.

<sup>7</sup> Moke ménkámehnkámé, kabarame, weheme sóreq wanípípéqté páhmé wehukene kirabo kamarí úkorahowara wahnahnarítáhwe.

<sup>8</sup> Mó morá áninká wewene ahbabáq ehweh íre saiqnarena wahnahnatiahrahire. Wehenka wehuke pehrana pukorahire. Ahbabáq ehwéhnká apubúue abae agéna wehenka wehukení pehnserahnire.

<sup>9</sup> Itene íwéhipeqté éhwéhnká itene Wahnah Maniká Iteribonsabé iwíáh iwíáh ateq anehe mó ke Manikánka we tahnsá miraro keyabé abehq éhwéh arítáhwe.

<sup>10</sup> Iwíáh iwíáh ate ehwéhnkákáq abehq éhwéhnkákáq peh morá áwéhipeqté sire. Minawé íre kaweq sansáne.

<sup>11</sup> Néne iyahnabo anímáríno, arahnome kaweq né wanínkákáq abiqnóno wanínkákáq morábíté íre sire.

<sup>12</sup> Pópo awánkátáq inunara será íre iyahráhire. Párúq nahniáqtáq pópo será íre iyahráhire. Abiqnóno wanínká né waní íre úkorahire. Minayabe kaweq ehwéhnkákáq ahbabáq ehwehnkákáq peh morá áwéhipeqté sime anotah íre kaweq sansáne.

### *Kaweq iwíáhi anínká kaweq sansáninkehe i ehwéhne.*

<sup>13</sup> Ite míonarabeqte ahtebia ání kaweq iwíáhi anímé insebo? Ahtebia áninká íre saiyoí anínéna wewene áwíq íre pankeréhre. Peh ahtebia sánsánéna kaweqtaq mía míairara mó kegá we tagéra, Ahtebia ánine igehe.

<sup>14</sup> Itega irupipeq mó keyábé anotah abiáhnsánéq ahriahri iteitene íwíq árahue pankeranéhnkono íwíáhirataqmé ite ahtebia ké méq kaweq iwíáhúna ke míone íwíáhiyeho. Péhe iwíáhiyeho. Aiq pútaq ehwéhnsábé péhe ehwéhne atého.

<sup>15</sup> Íopeqté Ítéribogá mina tahnsa iwíáh íre áhwárehre. Írakaumo. Mi iwíáhwé mah marákóípéqté iwíáh wíre. Itene irupipeqté íwíáhgá mina tahnsa iwíáh aitéhrana owainawanka moq mi iwíáh aitéhre.

<sup>16</sup> Irátíáhro. Sirupipeq mó keyábé abiahnsanéra ahriahri seyene síwíq pankeráh kégá íre kaweqtaq mía míáowe. Íre kaweqtaq mía míáera áhnte ahbabárowe.

<sup>17</sup> Íopeqté Ítéribogá iwíáh aitéh iwíáhwé ahriahri kaweq iwíáhe. Manikáne Awanka iwíáh aitéh kégá pehwehrue méq uwaréqme méq mó kené ehweh ireq mó keyábé sirutaboiréq kaweq sansá ariteq anotah anínseq íre áwíqkakaq anínseqsabé peh morá íwíáhéq ehweh pehipi íre iraria miraonehe e ehweh mira aruqarurowe.

<sup>18</sup> Itega uwaréqme peh morá iwíáh kahnaraq minawé sotápéq ayu uqmaráhnserah mire. Uwaréqme peh morá iwíáh kahnaraq peh kaweq sansámári miraorahúne. Minawé sotápéqté ménsáméhnsá kawerue kíréhnserah mire.

## 4

### *Mah marákóípéqté sánsánsábé awahbeh anímé Manikáne naruо aní mire i ehwéhne.*

<sup>1</sup> Itega ehwehquéq tobéhírataq mi sansámé aneq áwahe kehro? Itene irupipeqté iuwahbeh iwíáhgá moke mi íre káwéq sansá áhwáreh mino.

<sup>2</sup> Ite iuwahbeh naneqmarí íre meyahráhonsabé meyaneheeéq mó ke subiq súáhwe. Mó kené ménsámehnsánsabe aigará pabekiraq íre meyahráhonsabé meyaneheeéq ehwehue tobéhewe. Ite iuwahbeh naneq Manikánsabe, Náio ue íre teawéwe. Minayabe mi naneq íre matiáhwe.

<sup>3</sup> Itega wensabé, Náio urome wega aneqsabé íre náiasa túbáh agiro? Itega íre tábúsoqme iwíahue, Náio urowe. Íre Manikáne arambehri miraoneheéq peh iteitene iuwahbeh naneq náio uronsabé túbáh agire.

<sup>4</sup> Ahbabáq inínká wenawehq auwena mó weh kéréhnserah itega Maniká auweq mah marákóípéqté sánsá sehgiówe. Mah marákóípéqté sánsá sehgí ánime Maniká Iteribone naru aní míehre. Minawé aiq iahtebaho? Mah marákóípéqté náneqsabé arutaboiri anínká Manikáne naru aní úkire.

<sup>5</sup> Manikáne ehwehnka mahraréna, Manikánka Wenawa eqmaréhrana irupipeq tumiéhre. Itega Manikánsabe kawerue irutaboirigeheéna wega págegeue wahnahnaitéhre ire.

Aiq irarinsabé itega, Mi ewhéh peh abehq éhwéhne iwíáhiyeho.

<sup>6</sup> Manikánka ite anotahtaq séhréh aita aitaire. Minayabe wene ehwehnka mahraréna, Sensíwíq pankeráh kewé Manikánka íre séhréhia peh ahqáho arítéhre.

Sensíwíq íre pankeráh kewé Manikánka séhréh arítéhre ire. *(Sindaun 3.34)*

<sup>7</sup> Minayabe iteitene píribahri iwíáh sueq Maniká Iteriboga teí éhwéh kawerue sehgióro. Owainawansabé ahqáho atéhrataq wega iuwena pokinkehe.

<sup>8</sup> Maniká Iteriboba séq wene ehweh kawerue íráhro. Mirairataq wega iteba séna séhréh aitankéhe. Wehukenínká ayahnkara pabeq paberitaq ayahnkara aiq kawerire. Ahbabáq keo, mina inserah itene irupipeqté áhbábáq sueq kawerurero. Mó iwíáh mó iwíáho keo, itene irupipeq kaweq iwíáhigehboq mah marákóípéqté náneqsabé íre irutaboiroro.

<sup>9</sup> Itene ahbabáqsabe iwíáhqué wíréh wíréh ehweh sueq ibisahro. Itene irupipeqté eyoyói iwíáh sueq íre kawerurauge iwíáhoro.

<sup>10</sup> Itega Manikánsabe, Íné pehgáriq aní púana ínériahriáh íre awehraq aní míoge teawéro. Teawenana wega séhréh aitena ite moraní moranínu, Anotah aní míahno aitankéhe.

### *Mó keyábé ehweh arítého i ewhéhne.*

<sup>11</sup> Néne iyahnabo anímáríno, itega mó ke Manikáne animárínsabé íre kaweq ehweh ariteq abehq ánímári móe ariteho. Mirairataqmé Manikáne ehwehnsabé moq mina tahnsanowe. Wene ehwehnsabé awahrieh anínká mi ehweh íre sehgiéna, Peh abehq éhwéhne atéhre.

<sup>12</sup> Manikánka webataq sehgióro ú ehweh teí púana wewega ite sainsuena ehweh aitahráhire. Webataq mó ke kaweraritená mó ke íre kawerarítéhre. Minayabe itewe peh wehuke míáh púaq mó keyábé ehweh arítého. Minawé peh Manikáne arambehri wire.

### *Ite píribahriéq saiyo ke míyeho i ewhéhne.*

<sup>13</sup> Táhmaro itega mahraréq, Ahbiah mó ke suwahpeq pokue mitaq peh morá ópéq méq arambehriue áhnte moné meyanéhe ewe.

<sup>14</sup> Mira iwíáho keo, teiníboq íratiáhro. Mókakeyabé ite íre tagariáhwe. Mi tanáhráq ite oga míaneherabowamo. Itene oga mé tanáhráq nonahweyah tahnsáne. Nonahweyahna pehgáriq tanáhráq kéné apubúue sawekinserah itene ogamé tanáhráq moq apubúue parabagorahire.

<sup>15</sup> Minayabe itega iwíáhona ehweh sueq mahraréq, Itene Wahnahnka kowe aitahnaraq ite oga méq mahraue arambehrionehe ero.

<sup>16</sup> Amahnágawé iteitensabé iwíáh iwíáhqué ite íwíq pankereq, Iteriahríah miraoneheqmúne ewe. Mina tahnsa píribahri sansámé íre kaweq sansáne.

<sup>17</sup> Kawerue iwíáhuno. Are kaweq sansá miraéyabe ahtebhnaraqmé mi sansá miraúno. Íre mirainaraqmé aiq ahbabáriniewón.

<sup>1</sup> Áhnte mensáméhnsánkákáq kéo, minayabe ehweh teiníboq írátíáhro. Itene ménsámehnsá pehipi kékhsábé íre kaweq sunúq sína puaq uwo uwo éq ibisahro.

<sup>2</sup> Itega áhnte mitaq sáhato mensáméhnsá sósahbahrankírana itene kaweq korósíákáq wenuqka naruéhre.

<sup>3</sup> Itene móne ebáhmári íregárítäq pehipi kagairana awehgárógrírara mó kegá tagéra are anah ani móne íwíáhigehe. Itega móneyabé irutaboiréq amahnága áhnte soruparáh púana mókake kamah aina tanáhráq íérinawire. Wehukení osoq míéhrana érinserah íérinawire.

<sup>4</sup> Kawerue írátíáhro. Itene sotápéq arambehrio ke íre awehraq apéq náriéwara sega itensabé abiahnsa aitera, Íre kawerowe aitáhwe. Maniká itene págege Wahnáhnká sene ehweh aiq íréhre.

<sup>5</sup> Ite mah marákóípéq méq áhnte kaweq naneq meweéq ite iuwahbeh sansánowe. Minayabe wehga mayawenkakaq póéráhq subiqme kahnirinserah Manikánka ite anotahtaq kamah ainkéhe.

<sup>6</sup> Itega kaweqtaq míáh ké, itene ehwehnsabé íre ahqáho aitáh kewé ehweh ariteq subiq súahwe.

### *Itega págegeue méq Sísá tuina tanáhráqsábé áwénunoro i ehwéhne.*

<sup>7</sup> Néne iyahnabo anímáríno, itene Wahnah tuina tanáhráqsábé kawerue áwénunoro. Sonsoréh áninká wene so uqmarena ibonsi tanáhráqsábé áwénunire. Ménsámehnsá kíréhtáq mó ibonsi tanáhráq áwénunéna nera kankeheéna mó áwénunire.

<sup>8</sup> Sonsoréh áninká áwénuninserah ite moq itene Wahnah sína tanáhráqsábé kawerue áwénunoro. Wega tuina tanáhráq aiq wahto agi puaq aiq sinawire íwíáhquéq áwénunoro.

<sup>9</sup> Néne iyahnabo anímáríno, mó Sísá tagariáh kékabé wensabé wensabé abiahnsa ariteq síéhruruirataq itene Wahnahnka moq itensabé ehweh aitanawire. Ehweh aitana tuina tanáhráqmé áhnibóránire.

<sup>10</sup> Néne iyahnabo anímáríno, Manikáne ehweh iraru kegá wenawírue wene ehweh pahsúónsabe iwíáhoro. Sene naruoga síwíoqnotaq sene arambehri íre susa peh págegeue sehgiúwe. Segá mirau serahnoro.

<sup>11</sup> Segá Manikáne arambehri íre susa peh págegeue sehgiúnsabé se kaweq ke wóe aritone. Naho naho wehukení wenawíq Sóba míowe. Íre kaweq sunúq weba sútaq wega Manikáne sansá sehgienna, Maniká kaweq aní mía míaire íwíáhéra pehwehrue míowe. Minayabe Manikánka we séhréh atowaq tagariáhwe. Manikánka itensabé moq anotahtaq arutaboiréna ahriahri séhréh aitéhre.

### *Iónka tagariéhtáq aiq pútaruge íre irarero i ehwéhne.*

<sup>12</sup> Néne iyahnabo anímáríno, mó kegá itene ehwehnsabé aiq pútare aitageheeéq mó naneq áwírue íre irarero. Pópoqnahga tagariéhtáq aiq pútarahnsanuge íre irarero. Iónka tagariéhtáq aiq pútarahnsanuge íre irarero. Moke mó mina tahnsa éhwéh íre irarero. Itega mina tahnsa éhwéh irarirataq Manikánka ehweh aitankéhe. Ite kowe iwíáhirataq peh kowe ero. Ahqáho iwíáhirataq peh ahqáho ero.

### *Manikánka kaweqtaq míá míai aniné púreq ehwéh íréhre i ehwéhne.*

<sup>13</sup> Ite míáhrabeqte áníné arupipeq umeh agínaraq wensabé púrerúno atóge. Wene arupipeq eyoyói anínsábé igonkónue Manikánsabe iwíáh íwíáhuno atóge.

<sup>14</sup> Awahre anínsábé Sísá tagariáh kéráq wahnahno abóawáh wéhyábé síáhrabúno atóge. Segá awahre anípá séra itene Wahnah áwírue wéri abaq atera wene awahreyabé púreratagéhe.

<sup>15</sup> Manikánka mah awáhré ání kaweratanawire íwíáhue púrerirataq Manikánka mi aniné ahhbabáq kaqsuena wene awahre kaweratankéhe. Kaweratahnana awaho ani míánkehe.

<sup>16</sup> Minayabe itene ahbabáqmari we teawíoro. Awaho animári míaneheéq we púreratéhoro. Kaweqtaq míai anínká Manikánsabe púrerínaraq wega irena págegeue mirainkehe.

<sup>17</sup> Manikáne ehweh irarú ani wenawíq Éráísa. We peh wehukení ména ite tahnsá míowe. Wega Manikánsabe íre ibonsinkeheéna anotahtaq púreruwana apahtáró ópéqkákáq mó akáhtáq ópéqkákáq íre ibonsúwe.

<sup>18</sup> Anehe wega mó púreruwana íópeqté áhnte ibónsúwana mah marákóípéqté ménsáméhnsá kawerue kirowe.

*Túbáh agí anínká ehweh móñkakáq sehginkeheéq koséhréh atáhro i ehwéhne.*

<sup>19</sup> Néne iyahnabo anímáríno, ite míáhrabeqte ání aiq pútaq ehwéh suena túbáh agínaraq mi ehwéh móñkakáq sehginkeheéq koséhréh atáhro.

<sup>20</sup> Mi ahbabáq áninká abehq sánsániraq ite séhréh atáhnsábé wene ahbabáq sansa súéhrana Manikánka wene áhnte ahbabáq kaqsúeh púana wenawa iraipéq íre pokinkehe. Minawé ahreraq matíahro.

## 1 Píta Ebeq sáhnsahwe ahtebé ehwehne.

Sísa tagaríah ké mó mapéq mó mapérue abae aguwana Pítaga mi keyábé iwíáhéné mah pahsí sehiranúwe. Mah ebéqté páhsíípéq sehiranéna, Íre kaweq sunúq iteba sínaraq Sísane sánsá ambubu atawéq kawerue sehgióro. Sísa tagaríah kéráq wahnahno kegá mi keyábé arutaboirue pehwehrue wahnahnarítáhro. Manikánka píribahri ke íre séhréhia peh ahqáho arítéhre. Owainawansabé anotahtaq ahqáho atáhro ue sehiranúwe. Sísa tagaríah kégá wene sánsá kawerue sehgiheéna Pítaga mah pahsí sehiranúwe.

### Pítaga ebeq sehiranú pahsíe.

**1** Íné Pítane páhsí sáhnsahwe tagahro. Sísa Karáhéga íné omaq intena eqmaq nuwowe. Ite Sísa tagaríah ké méq Asiu ke méq wáhnaupéqté kéné marakórapeq mía míao ke wóe. Ite Póntusa marákórápéq Kárétia marákórápéq Kápárósia marákórápéq Esia marákórápéq Pítinía marákórápéq mía míaowe.

**2** Maniká Iteriboga iwíáhue ite omaq itowana Sísa Karáhéga wene korahqtaté itene irupipeq kaweraitáráire. Kaweraitáráirana wene ehweh sehgieq wene kaweq anímári míageheéna Manikáne Awanka séhréh aitéhre. Maniká Iteriboga itene iru ukiq itena anotahtaq séhréh aitéhre.

#### *Íopeq oga mérapeqsábé áwénuné ehwehne.*

**3** Itene Wahnah Sísa Karáhéne Abowá, itene Manikánsabe iwíáh iwíáh atone. Manikánka itensabé anotah arútábóiri puana Sísa Karáhé pukúwana iriwe organúq atotaq ite moq organúq itowe. Minayabe ite oga mía míaoneheqmúne iwíáhúne.

**4** Íopeq pokona tanáhráq Maniká Iteriboga omaq itena áhnte kaweq naneqmarí náinkéhe. Wega mi naneqmarí íopeq sáharéhrana mitaq íre kambarékia peh kaweqtaq kagaire. Minawari awaq meyabe itene iru eyoyóue áwénunúne.

**5** Itega Sísansabé aiq pútare atona puana Manikánka amahnága págegeue wahnahnaitahnaq mókake kaweqtapéq awaq mianéhe. Anehe tanáhráq Manikánka ite airaiq kaweraitahna tanáhráqsábé áwénunúne.

**6** Mókake ite airaiq kaweraitahnayabé iru eyoyóue míáhwe. Amahnága pehgáriq tanáhráq íre kaweq sunúqká ite áhwárawe tagéna kamah aíre.

**7** Minayabe íre kaweq sunúq iteba sínaraq itega Sísane sánsá ambubu atawéq peh kawerue sehgírataqmé minawé kaweq sansáne.

Minawé wehukega ebah moné mirao sansá tahnsane. Móne mirao naneq ebáh áwíq kórae. Wehukega mi ebáh kaweraraneheéra iraipéq parearáhwana abehq náneq tagirana anehe peh kaweq koráwé kékre. Itega Sísansabé kawerue aiq pútare atáhnká mi kawéq ébáh kiotaqme peh kagaire. Kórawe íre kagaorahi nanere. Íre kaweq sunúqká áhwárawe tagáhnaraq itega Sísane sánsá ambubu atawéq peh kawerue sehgírataq mókake Sísa Karáhéga tuinagake itensabé, Káwerewe éna anotah anímári míáhro aitankéhe.

**8** Itene iuranka Sísa íre tagéq pehipi wensabé irutaboirowe. Amahnága itene iuranka Sísa íre tagia pehipi wensabé aiq pútare ateq anotahtaq iru eyoyóue iwíáh iwíáhowe. Iru eyoyóinsabé irareyabe itene ehweh íre avehraq kékre.

**9** Itega Sísansabé aiq pútare atáh púana Manikánka iteiwa kaweraitéhre.

**10** Manikáne Awanka sokigi ariu ehweh pahsuq pahsuro kégá ite kaweraitéhra ehweh naho iraruwe. Iraréa, Wega árahue kaweraitehrámo iwíáhéra áwahe kabaréra kasenuwe.

**11** Sísa Karáhéne Awanka iwíáh aritowara sega Karáhé éhweh iraréa we érinana anehe anotah aní úkina ehwéh iraruwe. Iraréa, Ite meirahna anínká aneq tanáhráq tuinabomo? Mi tanáhráq aneq ábóarinabomo iwíáhéra,

<sup>12</sup> Itega irarúna ehwéhmé íre ite oga mé tanahráq peh mó tanáhráq aiq pútaragínara mó kegá tagagehe uwe. Naho sega aiq pútaq ehwéh iraréra sehiranurowaq itega amahnága írátíahwe. Manikánka Wenawa íópeqté eqmaréhrana kaweq ehwéh tei teino ke págege arítéhrara aiq pútaq ehwéh tei teinowe. Mah ehwéh íópeqté kégá moq ahtebéyabe suwahbehre.

*Manikánka ite kaweqtaq míageheéna omaq itéh éhwéhne.*

<sup>13</sup> Minayabe itewe tábúsoqme iwíáhue kaweq sansánoro. Sísa Karáhéga tuina tanáhráq anotahtaq séhréh aitankéhe. Minayabe iwíáhue áwénunoro.

<sup>14</sup> Ite múguwahguue míarotaq itene ahbabáq iwiáhgá saiqnariaraire. Amahnága mi ahbabáq íwíáh sueq

<sup>15</sup> Manikáne animári míah púaq wene sánsá kawerue sehgóro. Ite omaq itéh ání ahriahri kaweqtaq mía míainserah ite moq kaweqtaq méq moke mirao sansá kaweq sansánoro.

<sup>16</sup> Minayabe Manikáne ehwehnka aiq mahraréna,  
Íné kaweqtaq mía míau puaq ite moq kaweqtaq mía míaoro ire. *(Wok Pris 11.44-45)*

*Manikánka anotah apéqtátē ite paiqmaro ehwéhne.*

<sup>17</sup> Itega Manikánsabe, Iteriboe atahwe. Wega peh morá íwíáhue ómi wehukene aram-behri agehgaqme tagéna sainsúéhre. Minayabe itega mah marákóípéq míah tánáhráq wensabé áhtenoro.

<sup>18</sup> Itega itene igaqnaréhne abehq sánsá sehgironka saiqnariowe. Manikánka anotah apéqtátē paiqmaronka saiqnariomé sabiruowe. Ite aiq tagaríahmé móneakáq ménsámehnsánkakaq abehq úkorahi naneq puana wega minarate íre paiqmarowe. Írakaumo.

<sup>19</sup> Sísa Karáhéga itene ahbabáqsabe pukúwana Manikánka Sísane kaweq koráhqtátē ite sabiruanieéna paiqmarowe. Sísawe awaho sipísípíq áráhq tahnsa ména itene ahbabáqsabe pukúwe.\*

<sup>20</sup> Manikánka mah marákó márakkó íre mirarotaq ite meirankeheéna Sísa omaq atowe. Ite séhréh aitankeheéna marakóipeq ábóraraginkehe úwana ábórarúwe.

<sup>21</sup> Wega ite séhréh aitáráinsabé Manikánsabe aiq pútare atáhwe. Sísa pukútaq Manikánka iriwe organúq atena wensabé, Anotah ání míahno atowe. Miraúnsabe itega Manikánsabe aiq pútare ateq wene omasa éhwéh moke mirainkéhe íwíáhéq minayabe áwénunowe.

*Sísa tagaríáh kékabé kawerue irutaboiroro i ehwéhne.*

<sup>22</sup> Itega aiq pútaq ehwéh ireq kawerue sehgironsabé kaweqtaq míahwe. Kaweqtaq méq mó Sísa tagaríáh kékabé kawerue irutaboiroro. Sensabé pehgáriqtaq irutaboiriyehboq anotahtaq irutaboiroro.

<sup>23</sup> Manikáne ehwehme organúq itahráhi ehwéhnéna ahriahri kagainawire. Itega mi ehwéh ireq aiq pútare atáh púana Manikánka irupipeq o awá maqitáráire. Iteiuwa íre pukorahiraq peh ahriahri mía míaoneheqmóe. Manikáne ehweh kagainsabé

<sup>24</sup> wene ehwehnka mahraréna,  
Mah kehiná kékíná peh wahto tanahráq mah marákóípéq míahwe. Se uworapeqté naneq tahnsá míahwe. Segá iwíáh íwíáho naneqme peh uworapeqté wéhgánáh ára tahnsáne. Uworapeq kíreh naneq ehyatagirana árame pururuqnagire.

<sup>25</sup> Itene Wahnahne ehweh mina tahnsa íre miraia peh ahriahri kagainawire ire. *(Aisaia 40.6-8)*

Mah ehwéhmé aiq tei teino kaweq ehwéhne.

\* <sup>1:19:</sup> Manikánka sene ahbabáqsabe kaweraritankeheéra Ísara kegá sipisípiqtaté Maniká titiratowe. Awahreéna soriqnahnuq sipisípíq íre subisa peh awaho mío sipisípíqtaté titiruwe. Wok Pris 22.17-25 tagáhno. Pítaga mi sansá iwíáhena, Sísawe awaho sipisípíq áráhq tahnsa míéhre ue sehiranúwe.

## 2

*Ite sunkíkírirabeqte meiqmena téhrehrabeq móito ehwéhne.*

<sup>1</sup> Manikánka o awá maqitárái puaq moke íre kaweq sansá súáhro. Péhe éhwéh irareme, moke péhe sánsámé, mó kené ménsámehsánsabe igárá pabekime, éhruru ehwéhmé, mi sansámári moke súáhro.

<sup>2</sup> Inahunah anínká náhnsabe arutaboiréna nehnserah Manikáne ehwehnsabé irutaboiroro. Itega mi ehwéh ireq sehgírataq págegeue míahrahowe.

<sup>3</sup> Minayabe itene Wahnahnka kaweraitéhmé ahtebéq iwíáh iwíáhewe.

<sup>4</sup> Sísá itene Wahnhah oga mía mía wahq tahnsa míre. Weba sero. Áhnte kegá wensabé, Iuwahriehre atówana Manikánka wensabé, Are omaq atóge éna, Arega moke mó ke kiotaikóna aní móne úwe.

<sup>5</sup> We itene oga mía mía wahq tahnsaniraq weba séq wene nahwiahnsanse tahnsá míagehe. Minayabe Maniká Iteriboga mi nahwíáhnsánsérátē wene nah pearankéhe. Ite mitaq Manikáne mibeq mahbeq arítáh ké méq Sísá Karáhéga miraúnsabe Manikánsabe kaweróne ateq wensabé iwíáh iwíáh ataneheqmóe.

<sup>6</sup> Minayabe Manikáne ehwehnka aiq mahraréna,

Íratíáhro. Sáíóna sawéhrápéq néne nah pearaníe. Omaq ato anínká mitaq kaweq wahq tahnsá míankehe.\* Wensabé aiq pútare atáh kégá anehe íre siyehitanawire ire.

(Aisaia 28.16)

<sup>7</sup> Wensabé aiq pútare atáh kégá, We anotah kawéq áníne íwíáhewe. Wensabé íre aiq pútare atáh kékabé Manikáne ehwehnka mó mahraréna,

Nah píáh kégá suto wahqká moke nahwiahnsanse kiotaikire ire. (Buk Song 118.22)

<sup>8</sup> Manikáne ehwehnka mó mahraréna,

Mi wahqmé wehuke siyobeq patame inahnsuboráhowe. Wehukega wahqtáq siyobeq patame surahoneherawoe ire. (Aisaia 8.14-15)

Wahqtaq siyobeq patame inahnsubónserah Manikáne ehwehnsabé iuwahriehre e kewé ahbabárowe. Naho Manikánka iwíáhéná, Mókake mi kegá néne ehwehnsabé suwahriáhnaraq ahbabárigéhe úwe.

<sup>9</sup> Itewe mina tahnsa íre owe. Manikáne kaweq anímári wenkahnáh míageheéna omaq itowe. Itene Wahnahnne mibeq mahbeq arítáh ké míageheéna ite omaq itowe. Wega séhréh aítéh árámbéhrí teri terinigeheéna ite omaq itowe. Menah ite sunkíkírirabeq míarowana Manikánka itensabé, Máhoro urairaq itega mitaq sueq wene kaweq téhrehrabeq kowíarowe.

<sup>10</sup> Menah íre kaweq ke méq amahnága ite Manikáne animári míáhwe. Menah wega kamah aieráhuraire. Amahnága wene animári míáhnsábé íre kamah ainkéhe.

*Peh kaweq sansá sehgioneheqmúne i ehwéhne.*

<sup>11</sup> Néne iyahnabo anímáriño, néne ehweh teiníboq kawerue íráhro. Ite wáhnaupéqté ké suwahpeq tahnsá míáhtáq sene ahbabáq íre sehgíowe. Mina onserah itene irupipeqté áhbábáq íwíáhgá iteiwa áúgi ínhoéq íre sehgira peh ahqáho atáhro.

<sup>12</sup> Sísá íre tagaríáh ké míáhrabeq tábúsoqme sansánéq kaweqlaq mía míaoro. Segá itensabé, Ahbabáq ke woe aítéhrataq itene kaweq sansá tagéra mó iwíáhéra itensabé, Peh kaweq sansáno ke wóe aitagéhe. Mira íwíáhirataq Sísá tuinagake segá Manikánsabe íwíáh atagéhe.

*Wahnahnno kené ehweh íráhro i ehwéhne.*

<sup>13</sup> Itene iópeqté Wáhnáhnsábé iwíáhéo mah marákóípéq wahnahnno kené ehweh íráhro. Kámáhni wahnáh ánínseq wega eqmaréh wahnáh kereqne ehweh íráhro.

<sup>14</sup> Kámáhni kegá ahbabáq ke kamah ariera kaweq sansáno keyábé, Kawerowe arítáhwe.

\* **2:6:** Káríki ehwéhmé íre wahqtaq pabeqme peh ebahtaq pabeqme ehwéh mirarire.

**15** Maniká awahbeh sansá sehgóro. Kaweq sansá sehgonka múguwahgu kené íehruru ehwéh saiqnaruagéhe.

**16** Umehga íre saiqnariéh ké tahnsa míáhro. Mó naneqka ite íre saiqnariéh púaq, Pehipi ahbabáronehe íwíáhiyehboq Manikáne arambehrio ke míáhro.

**17** Moke ómiyabé íwíáh íwíáhoro. Sísa tagaríah kékabé irutaboiroro. Manikánsabe áhtenoro. Mah marákóipéqté wáhnáh kékabé íwíáh íwíáhoro.

### *Sísaga kaweq sansánúnsrah itega moq miraoro i ehwéhne.*

**18** Mó kené arambehri arítáh kéo, itene marakóipeqté wáhnáhnsábé íwíáh íwíáhéq wene ehweh kawerue íráhro. Íre peh morá kawerue séhréh aitáh wáhnáh kéné ehweh íráhro. Írakaumo. Págegeue wahnahno keyabé áhtenéq sene ehweh moq íráhro.

**19** Mó kegá kamah airaq kaweq sansánirataq Manikánsabe, Kawerowe aitankéhe. We awahbeh sansá mirao puana wega itensabé, Kawerowe aitankéhe.

**20** Itega ahbabárisabé mó kegá iubiqme kamah aírataq kawerowe íre aitahráhi mino. Kaweq sansánirara mó kegá kamah aírataq Manikánsabe, Kawerowe aitankéhe.

**21** Itega kaweq sansá mirageheéna Manikánsabe omaq itowe. Sísa Karáhégá itene ahbabáqsabe putiotaq wene arupipeq umeh ague wene anonka érúwe. Wega kaweq sansánúnsrah itega moq miraoro.

**22** Sísaga íre ahbabáruwe. Wega péhe éhwéh íre irarúwe.

**23** Segá we abehq éhwéh atótaq wega sensabé íre síwiowé. Segá we áwíoqnowana érútaq wega sensabé, Mókake kamah ainauge íre irarúwe. Írakaumo. Manikánsabe tábúsoqme agehmarena sainsuanawire éna, Wega íné kawerue wahnahnaintankéhe íwíáhúwe.

**24** Itene ahbabáq sansa sueq kaweqtaq mía míageheéna Sísa Karáhégá awankátaq táhpawe pukútaq itene ahbabáqmari wene anonkataq moke meyowe. Sísame anonkataq purambura agúnka ite kaweraitowe.

**25** Itewe sipisípiqka wene ah suena peh tanahraipéq móbuq mahbuq inserahnurowe. Amahnága itene Wahnahpa kouwekowana wega iteiwa kawerue wahnahnaitéhe.

## 3

### *Weh ahreyabé éhwéhne.*

**1** Ahrerono, iteruwehqsonka ehweh kawerue íráhro. Iteruwehqsonka Manikáne ehweh íre aiq pútare atéhrataq itene kaweq sansá tagagehboq sene ehweh íráhro. Íre itega teríra ehwéhnsábé peh itega kaweq sansánira tagéra, Íné moq Sísa kéranié íwíáhigehe.

**2** Iwíáhéra, Néne ahrega kaweqtaq mé sansáni púana, Íné moq Sísa kéranié íwíáhigehe.

**3** Ahrerono, awahriq naneqsabé íre irutaboiroro. Kaweq korósíyábé itene iyahra kaweré náneqsabé moke awahriq naneqsabé íre irutaboiroro. Íre arene anonkataq awahriq naneqsabé

**4** peh morá itene irupipeqté kaweq iwíáhyábé irutaboiroro. Kaweq iwíáhirataq iru pehwehrue mía míorahowe. Minawé Maniká awahbeh sansáne.

**5** Naho Manikánsabe aiq pútare atera wensabé íwíáh íwíáh ató ininsónká mi sansánéra sensuwehqsonka ehweh írówe.

**6** Ébáráhmane ahre Sárahga wenawehqne ehweh sehgienna wensabé, Néne wahnah mone atowe. Ahrerono, itega kaweq sansánéq mó naneqsabé íre áhreirataq Sárahne ayahunkawa tahnsa míagehe.

**7** Weho, itene ahreronsábé íwíáhést sereq kaweqtaq mía míaoro. Itereq itene ahreronsseq oga mérapeq moráráq awaq miagéhe. Ahreróné sinonkame íre págege wehne sinonka tahnsáne. Minayabe itene ahreronsábé íwíáh íwíáhést pehwehrue arítáhro. Mirairataq Manikánsabe itene púreq ehwéh irankéhe.

### *Ahriahri mó ke kaweq sansá aritanéhe i ehwéhne.*

**8** Amahnága teiú éhwéhkákáq kawerue íráhro. Ite ómiga peh morá íwíáhoro. Moke Sísa tagaríah kékabé irutaboiréq we séhréh atéhoro. Píribahri iyehboq uwaresa ké míáhro.

**9** Are ahbabáratahaña aní ahbabáratéhneho. Arensabé ehbonawi anínsábé íre kaweq éhwéh atéhneho. Ahbabáq sansa pehragé are ahbabáratahaña anímé Manikánsabe, Séhréh ate kawerato ue púrerúno. Miraigeheéna Manikánka ite omaq itena íáhrabúwe. Itega mó ke séhréh ariteq kawerarítéhrataq Maniká Iteriboga itensabé, Kawerówe aitena séhréh aitankéhe.

**10** Minayabe Manikáne ehwehnka aiq mahraréna,  
Oga méyabe irutaboiréq kaweqtaq méyabe irutaboiro keo, ahbabáq ehweh sueq péhe éhwéh íre teriéro.

**11** Ahbabáq sansa sueq kaweq sansánoro. Peh morá íwíáhéq iru ukiq itahráhi sansánsábé irutaboiréq sehgíoro.

**12** Itene Wahnahnka kaweqtaq mía míao ke tagéna sega púrero éhwéh ahriahri irena peh ahbabáq sansano keyábé abiahnsa arítéhre ire. *(Buk Song 34.12-16)*

### *Kaweq sansánirataq iru eyoyóue míahrahi éhwéhne.*

**13** Itega kaweq sansánsábé irutaboiréq sehgírataq inseréhga kamah aigéhbo?

**14** Itega kaweq sansánirara mó kegá íwíoqnehrataq iru eyoyóue míáhro. Íwíoqnehra keyábé áhreeq itene irupipeq iwíáh kikiriyeho. Írakaumo.

**15** Itene irupipeq Sísa Karáhénabe iwíáh íwíáhéq, We itene Wahnah mire íwíáhoro.

Mó kegá itensabé, Itega oga mía míaoneheqmúne íwíáhome aneqsabé mira íwíáhoo éra ahkakebopoq kasenigehe. Kasenirataqmé tábúsoqme terieneheéq íwíáhue mi ehweh kaweroro.

**16** Kaseno keyabé ehweh ayahqmarahnaraq mi keyabé iwíáh íwíáhéq pehwehrue terio. Kaweq sansánúne íwíáhonehboq kaweqtaq mía míaoro. Kaweqtaq mía míaeq Sísane kaweq sansá sehgiósábé mó kegá íéhruru aitéhrataq sega anehe íwíáhirame siyehitanae.

**17** Itega kaweq sansánúnaraq Manikánka kowe aritahnara mó kegá íwíoqnehrataq itega kaweq sansánúna puana aiq kawerire. Itega ahbabáq sansanúnaraq mó kegá kamah áirataq ahbabáq sansanúna puana íre kawerire.

### *Sísaga itene ahbabáqsabe pukéna irigue organíkú ehwehne.*

**18** Sísa Karáhégá miraúnsabe iwíáhoro. We ahriahri kaweqtaq mía míairaq itewe íre kaweqtaq mía míáune. Wega Manikánseq itereq insahwé aitanieéna peh morá tánáhráq itene ahbabáqsabe pukúwe. We mónkakáq íre pukinae. We pukútaq wene anonka pukúwana Wenawame íópeq peh oga míéhre.

**19** Oga ména pokue wene ehweh íre sehgiú kene siwamarí karábúsiipéq míótaq kosíwáhnorúwe.

**20** Mi ke oga míótaq wehukení wenawíq Nóah marakóipeq míowe. Nóah míotaq mi kené ahbabáq áhnte agúwe. Áhnte agúwana Manikánka íre apubúue kamah ariuwe. Írakaumo. Peh síwénunúwe. Síwénunúwana Nóahga sípi aiq mirarowana anotah ibónsúnka mi ke wánínuwe. Wánínuwara peh Nóahreh karíronání abapete apahtáró ké méra síipiipéq kibekuwé. Kibekuwana wání piotaq íre pukia peh kaweqtaq míowe. *(Stat 6.1-7.24, 8.18)*

**21** Pio wanímé pikísah tahnsáne. Itega meweúna wanímé naho Nóah míotaq pio wání tahnsane. Íre itene inonkataté náwíq sorahruveyabe wání meyone. Írakaumo. Ite wání meyonaraq íwíáhéq, Sísa Karáhé iriwe organíkúnsabe ahriahri wene sánsá sehginauge íwíáhúne.

**22** Sísa Karáhégá íópeq pokéna Maniká Iteribone ayah púpeq ména moke íópeqté kéréq mibeqté wáhnáh kéréq wahnahnarítéhre.

<sup>1</sup> Sísa Karáhéne anonka érútaq wega iwíahú serahnoro. Wene anonka éri anínká íre ahbabáq aruqarurire.

<sup>2</sup> Wega mah marákóípéq míeh tánáhráq wene ahbabáq iwiáh íre sehgíre. Írakaumo. Wene ahbabáq suena Maniká awahbeh sansánire.

<sup>3</sup> Menahmé itega Sísa íre tagariáh kégá ahbabáro serahnurowe. Menah itega mó kené ahre weh abariéq íre kaweq iwíahéq píah narotaq múguwahgu agéq Manikáne ehweh anterueq péhepehe maníkánsábé iwíah iwíah arítárowe.

<sup>4</sup> Amahnága Sísa íre tagariáh kégá mi ahbabáq sánsámári miraotaq itega sereq moráráq íre miraonsabé sega áhtenéra itensabé íehruruowe.

<sup>5</sup> Mókake Maniká anotah sáhsí anínká ehweh aritahnaraq sega irigue sene ahbabáqmari pahsuagéhe. Wega moke oga míah kéreq pusa kéreq ehweh aitená sainsuanawire.

<sup>6</sup> Minayabe moke pukuro ke oga míáhtáq mó kegá Manikáne ehweh teri terinuwara írówe. Maniká oga míá mísá inserahnigeheéra teriuwara írówe. Irera ahbabáq kega onserahnéra sinonka pukuwe.

### *We séhréh atéhoro i ehwéhne.*

<sup>7</sup> Moke náneq parabagína tanáhráq aiq wahtonire. Kawerue púreronehboq tabasíwe méq tábúsoqme iwíahoro.

<sup>8</sup> Kiotaiki sansá teiníboq íráhro. Moke Sísa tagariáh ánímári wensabé wensabé irutaboiratéhoro. Irutaboirinaraqmé mó anínká are ahbabáq atahnaraqmé arega íre iwíahue ahreraq matiankehe.

<sup>9</sup> Maniká tagariáh kégá iteba sirataq kawerue séhréh ariteq iru eyoyóue wenáwíoro. Mirairataqmé mi keyabé íre síéhruru arítáhro.

<sup>10</sup> We tagariáh ké séhréh aritageheéna Manikánka itensabé arutaboiréna morání moráníne kaweq naneq íátáire. Kaweq naneq íátáinsabé wene sánsá kawerue sehgieq we séhréh atéhoro.

<sup>11</sup> Manikánka, Néne ehweh terio atéh anínká wene ehweh tábúsoqme irarinkehe. Séhréh ariteh anínká Manikánka págege atahnana séhréh aritankéhe. Mirairataq tagehra kegá iwíahéra, Sísa Karáhéne sansá aiq kaweq sansáne éra Manikánsabe iwíah iwíah atagéhe. We anotah anínéna áhnte págege aní míá míai puaq wensabé ahriahri iwíah iwíah atanéhe. Aiq miraoneheqmúne.

### *Sísa áwíoqnonserah ite moq íwíoqnagehe i ehwéhne.*

<sup>12</sup> Néne iyahnabo ánímáriño, itensabé nirutaboiruge. Íre kaweq sunúq ite áhwáré tanahráq sínaraq áhteniyeho. Íre kaweq sunúq áhwáreh naneqka peh morá ínéba sire iwíahiyeho. Írakaumo.

<sup>13</sup> Mó kegá Sísa Karáhé áwíoqnonserah ite íwíoqnehrataq iwíah iwíahoro. Minayabe wega tuinaraq itene irupipeq eyoyóínaq iwíah iwíahigehe.

<sup>14</sup> Itega Sísa Karáhéne sansá sehgiónsábé mó kegá íre kaweq ehwéh aitéhrataq iru ukiqme míáhro. Manikáne Awa págege kiotaiki anínéna iteba míá míai puaq iru eyoyóue míáhro.

<sup>15</sup> Mó aní subiq suewé, aebówé, ahkaragárawe, mina tahnsa ahbabáq íre miraoro. Íre itereq wehgaq mire pehragahro. Itega mina tahnsa ahbabárotaq mó kegá kamah aiémé minawé áhnte iyehiteh sansáne.

<sup>16</sup> Ite Sísa tagariáh ké míáhnsábé mó kegá íwíoqnehrataq minawé íre iyehiteh sansáne. Mó kegá ite Sísa Karáhéne animári móe aítáhnsábé iyehitegurégúiyehboq peh Manikánsabe iwíah iwíah atáhro.

<sup>17</sup> Ehweh aite tanahráq aiq sire. Mi tanáhráq ite Manikáne animáripá ebeq áhwáranae. Anehemé Manikánka wene kaweq ehwéh anterúáh ké ehweh aritena anotahtaq kamah arí mino.

<sup>18</sup> Minayabe Manikáne ehwehnka aiq mahraréna, Tábúsuráh ké kawerariteyabe págege sansáne. Manikánsabe suwahrieh ahbábáq kewé árahiro? Árahue kaweraritankéhbo úwe. *(Sindaun 11.31)*

<sup>19</sup> Manikánka kowe aritahnara mó kegá íwíoqnehrataq peh kaweq sansá miraéq Manikánsabe, Arensabé aiq pútare ateq arene sánsá sehgioneheqmúne teawéro. Teawirataqmé wega kawerue wahnahnaitankéhe.

## 5

### *Sísa tagariáh kéráq wahnahnarite ehwéhne.*

<sup>1</sup> Sísa tagariáh kéráq wahnahno keo, ehweh teiníboq írátíáhro. Íné moq Sísa tagariáh kéráq wahnahnu aní múge. Sísa Karáhé awankátaq érúwana pukútaq niuranka tagahwae. Wega tuina tanáhráq kaweq naneq náiena anotah aní ména kawerue wahnahninkehe. Minayabe Sísa tagariáh ké kawerue wahnahnarítáhro.

<sup>2</sup> Sipisípiq wahnáhnká wene kamári wahnahninserah ite moq Maniká tagariáh kéráq kawerue wahnahnarítáhro. Wehukega pagu pagunonsabé mi arámbéhrí mirainie íwíáhiyeho. Peh Manikánka miraoro aitéhnsábé we tagariáh kéráq kawerue wahnahninie íwíáhoro. Mi arámbéhríunsabé ápeq meyaníe íwíáhiyehboq peh mi arámbéhríyábe irutaboirue miraoro.

<sup>3</sup> Mah marákóípéqté wáhnáh kégá págegeue wahnahno serahniyehboq pehwehrue méq kaweq sansánirataq itega wahnahnarítáh kégá tagéra sega moq pehwehrue méra kaweq sansánighe.

<sup>4</sup> Mirairataq kiotaiqme wahnáh tuinaraq wega itensabé, Kawerowe aitankéhe. Mi tanáhráq wega náina naneq íre parabagia peh ahriahri kagainawire.

### *Manikánka píribahri ke íre séhréh aritankéhe i ehwéhne.*

<sup>5</sup> Mahbigaunseq o menahwénsónsero, Sísa tagariáh kéráq wahnahno kené ehweh íráhro. Ite ómi píribahri sansá sueq mó kené ehweh ireq we séhréh atéhoro. Minayabe Manikáne ehwehnka mahraréna, Sensíwíq pankeráh kewé Manikánka íre séhréhia peh ahqáho aritéhre. Sensíwíq íre pankeráh kewé Manikánka séhréh aritéhre ire. *(Sindaun 3.34)*

<sup>6</sup> Minayabe iteitene iuwahbeh íwíáh sueq Manikánsabe, Wahnahnainte séhréh ainto teawírataq wewega íwíáhina tanáhráq anotah aní míahno aitankéhe.

<sup>7</sup> Wega itensabé arutaboiraitéh púaq moke ite íwíáh kikiro naneq teawéro.

### *Owainawansabé anotahtaq ahqáho atáhro i ehwéhne.*

<sup>8</sup> Itene naruó anímé owainawane. Anotah pusí tahnza kanká wah pawe nanieéna ahkabaqmena nogínserah wega wehuke ahbabáq aitanieéna ahkabaqmena nogíre. Minayabe áwéh panantágínaq tagariáhro.

<sup>9</sup> Sísansabé aiq pútare ateq owainawansabé anotahtaq ahqáho atáhro. Ite tagarionawe íre itebataq moke mah marákóípéq Sísa tagariáh ké moq síwíoqnehrara siru umehire. Owainawanka íwíoqnáhnaraq minayabe íwíáhíg wensabé ahqáho ata ataoro.

<sup>10</sup> Ahriahri Sísa Karáhéreq oga mérapeq mía míageheéna Manikánka itensabé arutaboiréna omaq itowe. Manikámé áhnte séhréh aitéh áníne. Minayabe wahto tanáhráq iru umeh agínana Manikánka ite kaweqtaq míageheéna anotahtaq págege aitankéhe.

<sup>11</sup> We ahriahri págegeue kiotaiqme aní mía míaire. Aiq pútaq ehwehne.

### *Páhsí parabaginai ehwéhne.*

<sup>12</sup> Sísa tagariéh ání wenawíq Sáírae. Íné tagariómé wega Sísame sansá kawerue sehgíre. Mah karíq páhsí sehiraninie ugana wega íné séhréh aintéhre. Ite kaweq íwíáh aitanieéna Manikánka séhréh aitéh éhwéh sehiranue teiúge. Wene aiq pútaq sansá kawerue sehgióro.

<sup>13</sup> Pábíróni suwahpeqte Sísa tagariáh kégá itensabé iroro ewe. Manikánka se moq omaq sitowe. Nánibáq Máhkaga moq itensabé iroro ire.

<sup>14</sup> Moke mibeqté Sísa tagariáh kékabé irutaboiréq we mehwéh atéhoro.  
Ite Sísa Karáhéreq mía míao puana Manikánka iru ukiq itéhre.

## 2 Pítá Ebeq sáhnsahwe ahtebé ehwehne.

Pítaga wene anehete pahsí sehiranútaq péhe éhwéh síwáhnoro kegá Sísansabé ainq pútare atáh kéké síwáhnorúwe. Péhe kégá íre kaweq iwiáh aritehoéna Pítaga mah pahsí sehiranúwe. Sísa itene Wahnah tuina tanahráqsábé kawerue siahtebageheéna mah pahsí sehiranue teriuwe.

### Pítaga anehe sehiranú pahsíe.

<sup>1</sup> Íné Pítane páhsí sáhnsahwe tagahro. Sísa Karáhéga íné omaq intena eqmaq nuwowana wene arambehri mira aruqaruruge. Maniká Iteriboreq Sísa Karáhé ite meirena kaweraitén ánínseq kaweqtaq mía míaire. Séhréh aitehyá puaq Sísansabé ainq pútare atáráúnanserah itega moq ainq pútare atáhwe.

<sup>2</sup> Itega Maniká Iteriboreq itene Wahnah Sísa Karáhéreq tagariáh púara sega ite áhntetaq séhréh aitera iru ukiq itagéhe.

#### *Manikáne animári míageheéna wega ite omaq ito ehwéhne.*

<sup>3</sup> Sísa Karáhéwé anotah anínéna kaweqtaq mía míaire. Wega inserahnue mía míageheéna ite omaq itowe. We Maniká ména págegeue séhréh aitéh púaq ite wene ehweh ireq kaweqtaq míahrahúne.

<sup>4</sup> Wega kaweqtaq ména séhréh aitanauge i ehwéh teíre. Mi ehwéhmé áhnte kawéq ehwéhne. Itega mi ehwéhnsábé ainq pútare atéhrataq wega séhréh aitanawire. Wega séhréh aitéhnká mah marákóípéqté áhbábáqká ite íre saiqnariahrahire. Íre saiqnariahrahí puaq Manikánka inserah kaweqtaq mía míorahowé.

<sup>5</sup> Minayabe iwiáhqué Sísansabé ainq pútare ateq kaweq sansánoro. Kaweq sansánéq ahtebahro.

<sup>6</sup> Ahtebéq tabasíwe míáhro. Tabasíwe méq Sísame sánsámé íre túbáh agia peh ahriahri sehgióro. Sísame sánsásábé íre túbáh agia peh ahriahri sehgieq Manikánka kaweqtaq mía mía inserahnoro.

<sup>7</sup> Manikánka kaweqtaq mía mía inserahnéq we séhréh atéhoro. Séhréh atéheéq mó keyábé irutaboiroro.

<sup>8</sup> Itega kawerue mirairataq itene Wahnah Sísa Karáhéne sansá ahtebéq kawerue sehgióneheqmóe.

<sup>9</sup> Mi kawéq sánsá íre sehgiá kewé sirupipeqté aúrá pira kéké tahnsa móe. Manikánka sene ahbabáq kawerarítáráime ainq sibitagi.

<sup>10</sup> Néne iyahnabo anímáríno, Manikánka ite omaq itena íáhraburairaq we kétówe. Sísame sánsá ambubu atawéq kawerue kéráhro. Kawerue kéréhrataq mókake wene sánsá íre suagéhe.

<sup>11</sup> Itega wene sánsá íre susa peh kawerue sehgiórateq itene Wahnah Sísa Karáhé, ite meirena kaweraitén ánínká ahriahri wahnah wahnahnirabeqte ónsá siitená itensabé, Mahbeq kíóro aitankéhe.

<sup>12</sup> Teiú ehwéh ireq kawerue iwiáhigeheéna ahriahri teiena iahreraq itaníe. Mi ehwéh ireq ainq pútaq sansá sehgiuruq sehgiuruwe.

<sup>13</sup> Teiú ehwéh kawerue iwiáhigeheéna amahnága oga míó tánáhráq mókakáq iahreraq itóge. Iahreraq itómé kaweq sansáne iwiáhuge.

<sup>14</sup> Íné írátíomé pehgáriq mókake íné pukéna ninonka suanauge. Minawé itene Wahnah Sísa Karáhéga pahsuqme teniátáire.

<sup>15</sup> Amahnága mah ehwéh tei teinunsabé pukonaraq iahreraq matawéq iwiáhigehe.

#### *Manikánka Sísa téhreh awuwara eqmaro kega tago ehwéhne.*

<sup>16</sup> Itene Wahnah Sísa Karáhéga págege sansá miraúnsabe teiune. Wega mó tuinaraqsábé teiune. Mah ewhéhmé íre wehukene áwahe ehwehne. Írakaumo. Íre wehukega iwíahue áhwárawe irarenserah ewhéhne. Manikánka Sísa págege atena téreh awuwaq itene iuranka tagahwane.

<sup>17</sup> Maniká Iteriboga sáwéhrapeq Sísansabé iwíah iwíah atena kaweq téreh naneqqakáq ábórraragéna mahraréna, Mah anímé niruní nénáhní míre. Wensabé nirutaboiréna wega miraime íné nuwahbeh arámbéhrí aní míre úwe.

<sup>18</sup> Itega mi sawéhrápéq méq íopeqté éhwéh irarútaq itene iahrega irahwáne.

<sup>19</sup> Mi ewhéh aiq íráhwansabé Manikáne ehweh iraru kené ehwehme aiq pútaq éhwéhne iwíahuge. Manikáne ehweh iraru kené ehweh kawerue íráhro. Sunkíkírirabeq áráhmuga téhrehra tagahnserah Manikáne ehweh iraru kené ehweh ireq ahtebahrahewe. Tuembíná kiembogirana áhníbórá téhrehre. Mina inserah itega Sísa tagariáhnsábé irupipeq téhrehre.

### *Manikáne Awanka iwíah aritowara Manikáne ehweh pahsúó ehwehne.*

<sup>20</sup> Téhwe teiéna ewhéh kawerue ahtebagehboq írátiáhro. Manikáne ehweh iraru kené sehiramé wehukega seriahriáh íre ahtebahrahewe.

<sup>21</sup> Manikáne ehweh iraru kegá íre seyega iwíahue Manikáne púku sehiranuwe. Manikáne Awanka mi ke iwíah aritowara sega Manikáne ehweh pahsúowe.

## 2

### *Manikánka ahbabáq ke kamah arinawire i ehwehne.*

(Súta 4-13)

<sup>1</sup> Naho mó kegá péhenéra, Itewe Manikáne ehweh irarúna ke úne éra peh seyene péhe éhwéh irare irareuwe. Segá miraunserah mókake iteba péhe éhwéh íwáhnorira ke méra íre kawerorahi ehweh mótaq mótarue íwáhnorigehe. Itene Wahnahnka sene ahbabáqsabe paiqmarowara sega wensabé ahqáho atéhra puana wega apubúue kamah arinkéhe.

<sup>2</sup> Segá íre kaweq sansá sehgitataq tagehra kegá aiq pútaq sansánsábé éhruruigehe.

<sup>3</sup> Íwáhnorira kegá mónega sigará pabekína puara itene móne meyaneheéra ehnenehnenué péhe éhwéh teigéhe. Sene ahbabáqsabe sáhnsáhí áninká íre peh áwé tagehre. Sene ahbabáqmari moke aiq tagariéh púana we tábuosoqme ehweh aritená kamah arinkéhe.

<sup>4</sup> Íopeqté kegá ahbabárutaq Manikáne anetaníbo íre iwíahia peh iraipéq sitowe. Se sunkíkíri matáípéq méra ehweh aritahna tanáhráqsábé áwénunowe.

<sup>5</sup> Naho naho Nóahga ahbabáq keyabé, Kaweqtaq míáhro teri terinúwana Manikáne mi ahbabáq ké íre peh áwé tagówe. Wega, Wání pio atowana wání pionka moke wehuke subipáhraruoware. Subipáhraruowara peh morá Nóahreq abapete téhranítéreq kaweqtaq míowe.

<sup>6</sup> Sóróma suwahpeqte kéreq Kómóra suwahpeqte kéreqka áhnte ahbabáruwana Manikáne ehweh aritená ira kekpiarowana mi anótáh mátábúráré moke irarawe tabipáhraguwana peh tanah úkúwe. Miraúnsabe mókake ahbabárrira kegá mi ehweh irera iwíahue tagagehe. Itene ahbabáq sansa íre súáhnaraqmé ite moq kamah ainawire iwíahigehe.

<sup>7</sup> Sóróma suwahpeq iraranaútaq kaweqtaq mía míau ani wenawíq Áróta mitaq míowe. Mibeqté kegá áhnte ahbabárue ahkaragárauwana Árótaga kaweqtaq mía míauñsabe tagéna wene arupipeq umehúwana Manikáne mi ke subipáhraruanaútaq Áróta meqmena móbeq móatowe.

<sup>8</sup> Áróta ahbabáq keba mía míauñaq mó wehekáh mó wehekáhne sene ahbabáq sansa tagéna sene ahbabáq ehweh irena sega Manikáne ehweh anterúónsabe wene arupipeq umeh agu aguúwe.

<sup>9</sup> Íre kaweq sunúq sínaraq Manikánka Nóahreq ÁrótaREQ séhréh aritonserah ite kaweqtaq mía míáuna ke moq séhréh aitahráhire. Anotah ewhéh aritahna tanáhráq íre suriahnaraq Manikánka ahbabáq ke auráq matawéna kamah arinawire.

<sup>10</sup> Ahbabáq kene sirupipeqté íwíah sehgiera mó kené weh ahre abariéra Manikáne ehwehnsabé abehq éhwéhne íwíahira kewé Manikánka anotahtaq kamah arinkéhe.

Mi ahbabáq kewé píribahri saiyo ke méra íre áhreia peh íópeqté kiotaiko keyábé abehq éhwéh arítáhwe.

<sup>11</sup> Íópeqté kégá mi piríbáhrí ké kiotaikéra anotah pagégé ké méra mó íópeqté ké Maniká míéhrabeq kiotaiko keyábé íre ehweh arítáhwe.

<sup>12</sup> Íre ehweh arítáhwara ahbabáq kega áwéhq poeráhq tahnsa méra peh se suwahbeh sansánowe. Wehukega áwéhq poeráhq pahwana pukinserah mi kené ahbabáqka kamah arinara íre kaweragoneherawoe. Segá íre ahtebah naneqsabé éhruruowe.

<sup>13</sup> Segá mó ke ahbabárarítónsabe mi kegá moq ahbabáraritagéhe. Segá íre peh inokáhpeq ahbabárera wéhékáhnakaq suwahbeh ahbabáq miraéra minayabe iwiáh íwíahowe. Itega táhutahurorabeq segá sene siyehiteh sansánonsabé ite íre kaweraitera sene péhe sánsánsábé iwiáh íwíahowe.

<sup>14</sup> Segá ahbabároneheéra mó kené ahrero siwahnkanéra, Abariinie íwíahowe. Se ahri-ahri ahbabáqsabe suwahbehere. Sísane sánsá íre moke ahtebah ke ahbabárigeheéra péhe éhwéh síwáhnoro kegá ehnenehnenu pagu pagunarítáhwe. Mó kené ménsámehsánsabe aigará pabeki iwiáh sirupipeq ahriahri kagaire. Mókake Manikánka mi ahbabáq ké anotahtaq kamah arinkéhe.

<sup>15</sup> Segá aiq pútaq sansá suera aura pira kánká tanahraipéq móbuq mahburue nogínserah mi kegá ahbabárowe.

Wehukení wenáwíq Péóri míowana wenahni wenáwíq Péráma míowe. Pérámagá iwiáhéné, Ahbabáq sansanonaraq ápeq náninkéhe éna móneyabé arutaboíréna ahbabáruwe. Teiú kewé mina tahnsanowe.

<sup>16</sup> Tónkiwarí íre ehwehnorahi kamári míowana peh morá Pérámane tónkiga wehukene ehwehnue Pérámansabé, Íre kaweróne atowana wega mi kané ehweh irena múguwahgu sansá suena túbáh agúwe.

<sup>17</sup> Ahbabáq kewe wání arahno taraqnáginserah ké tahnsa móe. Mi kewé sóiririrana sabona abae aginserah ké tahnsa móe. Se anotah sunkíkírirabeq míageheéna Manikánka sunkíkírirabeq omaq marowe.

<sup>18</sup> Segá píribahri saiyo ehwehnowe. Mó kegá sene ahbabáq suera peh míáhwe. Peh míáhwara teiú áhbábáq ké síúgio ke méra mó ke ahbabáraritogeheéra sensabé, Mó kené weh ahre abarioro éra ehnenehnenu pagu pagunarítáhwe.

<sup>19</sup> Pagu pagunaritera síúgira keyábé, Itene sánsá mirairataqmé mó naneqka itene iru íre umehinawire. Mó naneqka ite íre saiqnarianawire éra iuwahbáhna sansámé pehipi miraigehe ewe.

Mi ewhéhmé mó ke teriutaq seyene ahbabáq sansanká se saiqnaríéhre. Aneq sansápópoq wehukení saiqnariahnaraqmé wewe awahbeh sansá íre miraorahire. Írakaumo. Mi sansánká we aiq saiqnaríeh púana peh mi sansá sehgóre.

<sup>20</sup> Mah marákóípéqté áhbábáq sánsánká wehuke saiqnaríéhtáq itene Wahnah Sísa Karáhé éhwéh irera wensabé aiq pútare atáhwe. Aiq pútare atáhwana sene ahbabáqka saiqnaríéhtáq Sísa ite kaweraitéh áninká sabiruena kaweraritéhre. Kaweraritéhrana sene ahbabáqka mó saiqnaríéhrara anotahtaq íre kaweqtaq míaneherawoe. Téhwe segá Sísane sánsánsábé iuwahriehre íwíahurotaq se íre kaweqtaq míarowe. Segá, Ahbabáq sansa sueq Sísane sánsá sehgóneheqmúne íwíahéra anehe sene ahbabáqka mó saiqnaríéhrara se anotahtaq íre kaweqtaq míáhwe.

<sup>21</sup> Mi kegá kaweqtaq míáh sánsá íre tagaríáhtáq tahirímé peh ákáhtaq kamah arí irino. Kaweqtaq míáh sánsá aiq tagaríáh púara anehe kaweq ehwéh sinehepeq súéhrataq anotahtaq kamah arinkéhe.

<sup>22</sup> Itene igaqnaréhga pabeqme ehwéh mahraréra, Ianká mugiq suena kouwekue mina mugiq súéh náneq mó sewe nanae uwe. Mó pabéqmé éhwéh mahraréra, Póéráhqne abowágá wene ka pabeq paberatéhrana mi kanká apubúue segarúpípéq kaboririre uwe. Mina inserah wehukega Sísane sánsá sinehepeq suera sega suto ahbabáq mó sehgrataqmé mah pabéqmé éhwéhtáré aiq pútaragire.

### 3

#### *Itene Wahnah tuina tanáhráqsábé éhwéhne.*

<sup>1</sup> Néne iyahnabo anímáriño, mah pahsíwé anehete pahsí sehiranue íúge. Itega kaweq iwíáhigeheéna mah pahsíráré sehiranue iahreraq ítóge.

<sup>2</sup> Manikáne ehweh iraru kegá anehe sína naneqsabé púkuipéq teiúwe. Sene ehweh iwíáhigeheéna ínéga iahreraq ítóge. Itene Wahnah ite kaweraitéh áníné éhwéh moq iahreraq ítóge. Wega eqmaro ke teriátáirara sega iteba séra teiátowaq itega íratárówe.

<sup>3</sup> Téhwe teiú éhwéh íráhro. Anehe tanahráq sene sirupipeqté áhbábáq íwíáhgá saiqnariahna kegá iteba sigehe. Segá itensabé iwiréh aitera

<sup>4</sup> mahraréra, Ínéga kiwekinauge ú anímé eheq míehro? Wega íre tuinkéhe. Itene igaqnaréh pukutaqkákáq amahnágaákáq Manikánka moke ménsámehnsá téh miraronserahnue peh kagai mino igehe.

<sup>5</sup> Segá mirariransabé Manikánka irarú ehweh áhwára áhwáraue iragéhe. Naho naho Manikánka irarútaq íó miraréna anehe sóreq waní ákáhipeq mah marákó márakó mirarowe.

<sup>6</sup> Manikánka mó irarúwana anotah waní pionka moke mah marákó márakó íre kawerarowe.

<sup>7</sup> Manikánka aiq irarúnka íopeqkákáq mah marákó márakóákáq amahnága kagaire. Ehweh aritahna tanáhráq wega moke ahbabáq ke ehweh aritená mah marákó márakó iraragúno atahnana moke toráh aginawire.

<sup>8</sup> Itene iyahnabo anímáriño, teiú éhwéh ibitaruéhboq íratíáhro. Maniká itene Wahnahnka, Peh morá wéhékáhnkákáq 1 táhúseni (1,000) opéqkákáqsábé peh monseráh tánáhráre íwíáhire.

<sup>9</sup> Manikánka omasa éhwéh íre miraurainsabé aiq túbáh agire íwíáhoo? Írakaumo. Ite iraipéq pokiyehoéna íwénunire. Itene ahbabáq sueq wene ehweh sehgigeheéna íwénunire.

#### *Mah marákó márakóákáq iónkakaq parabaginae i ehwéhne.*

<sup>10</sup> Itene Wahnah tuina tanáhráqmé aebói anínká sinserahnue mi tanáhráq sinae. Mi tanáhráq íopeqté anotah ehwéhnéna íopeq tabanagine. Moke mibeq kék náneqmarítoráh aginae. Mah marákó márakóákáq moke mitaq kék náneqmarínkákáq parabaginae.

<sup>11</sup> Moke minawari apubúue toráh agína puaq itene sánsánsábé íwíáhue tagahro. Ite kaweqtaq míáira kegá míagehe úwe. Minayabe áwénunúne.

<sup>12</sup> Mirairataq Manikánka tuina tanáhráqsábé áwénunoro. Mi tanáhráq apubúue sinkehééq wene sánsá kawerue sehgióro. Mi tanáhráq íómé toráh ague parabaginae. Anotah irágá púana íopeqté náneqmarí moke toráh aginae.

<sup>13</sup> Manikánka o marákóákáq o ionkákáq miraraníe úwe. Mitaq peh tábúsoqme kaweqtaq míáira kegá míagehe úwe. Minayabe áwénunúne.

#### *Itene Wahnah tuina tanáhráqsábé kawerue áwénunoro i ehwéhne.*

<sup>14</sup> Néne iyahnabo anímáriño, mi tanáhráq áwénunúayabé wega itensabé, Kawerowe aitankeheéq moke itene ahbabáq sueq kaweqtaq méq we awahbeh sansáñoro.

<sup>15</sup> Itene Wahnhahnka íre apubúue kamah aiasa pehwehrue íwénuni tanáhráq wensabé áhrabo ke kaweraritankéhe. Minayabe iteruwah, itene iyahnabo aní Pora Manikánka ahtebia íwíáh atowana sehiranue teiátáire.

<sup>16</sup> Ínéga teiú éhwéh Poraga moq moke wene páhsí sehiranue teiátáire. Wene ehweh mó ehwéhmé pahsuqme ehwéh kéhrana mó ehwéhmé págege ehwéh kékre. Mi pagégé ehwéhmé íre tábúsoqme iwíáhoraho kegá múguwahguéra úbíráhbíq ehweh síwáhnorowe. Íre peh morá Porane sehira mó Manikáne púkuipéqté ehwéhkákáq moq úbíráhbíq ehweh síwáhnorowe. Sega miraonsabé anotah kamáh arinkéhe.

<sup>17</sup> Néne iyahnabo anímáríno, ite anehe sína tanáhráqsábé tagariáhwe. Manikáne ehweh anterúáh kégá péhe ehwéh íwáhnorotaq sene ehwehnsabé aiq pútare ariteq kaweq sansá súéhboq kawerurero.

<sup>18</sup> Itene Wahnah, ite kaweraitéh ání, Sísa Karáhéga séhréh aitahnaq wene sánsá kawerue ahtebahro. Amahnágaákáq wensabé iwíáh iwíáh ateq ahriahri wensabé iwíáh iwíáh atanéhe. Aiq mire.

## 1 Sóni Ebeq sáhnsahwe ahtebé ehwehne.

Sóniga mah pahsíákáq 2 Sóni pahsíákáq 3 Sóni pahsíákáq Sokigi pukúákáq mó wenawíq kék pukúakáq sehiranúwe. Mah pahsíípéq sehiranue mahrráéna, Sunkírírábeqté kéné péhe éhwéh sehgiyehboq peh téhrehrabeq nogóro. Itega morání moráninkáue moke mó keyábé irutaboiroro. Peh morá Manikáne ahninkwáreq mía míao kegá oga mérapeq awaq miagéhe ue sehiranúwe. Áhnte kegá oga mérapeq awaq miageheéna mah pahsí sehiranúwe.

### Sóniga ebeq sehiranú pahsíe.

*Sísa Karáhewé oga mía míai Ehwéhne i ehwehne.*

(Sóni 1.1-14)

<sup>1</sup> Oga mía míai Ehwéh\* ánínsábé teiúge. Mi Ehwéh téh mío anínsábé teiúge. Wene ehweh irahwáne. Itene iuranka we tagahwane. Itega we tagéq itene iyahnkaratáté wenaneq táhtorahwáne.

<sup>2</sup> Oga mía míai aní tuerígútaq itega tagéq teiune. Oga mía míai anímé Maniká Iteriboreq mía míáéna tuerígútaq we tagahwanayabé teiune.

<sup>3</sup> Itega we tagéq wene ehweh ireq minayabe teiune. Itereq itereq morá íwíáhoneheéq teiune. Maniká Iteriboreq wenahni Sísa Karáhewé itereqka morá íwíáhonehe.

<sup>4</sup> Itega moraráq itene irupipeq anotah íwíáhoneheéq mahnawé sehiranue teiune.

*Itega peh téhrehrabeq mía míáoneheqmúne i ehwehne.*

<sup>5</sup> Sísa Karáhégá irarú ehweh ireq teiune. Manikámé téhrehnserahni aní míre. Wene arupipeq pehgáriq sunkíkíq íre kékre. Peh téhrehnka inserahni aní míre.

<sup>6</sup> Itereq Sísa Karáhégá irarúna kegá sunkírírábeq míáhnaraq itega péhenéq aiq pútaq sansá íre sehgiune.

<sup>7</sup> Wega téhrehrabeq mía míainserah itega mía míáunawe itega morá íwíáhúnana wenahni Sísa Karáhéné korahqtaté itene ahbabáqsabe moke kaweraita aitaire.

<sup>8</sup> Itega iraréq, Ite íre ahbabáq animári múne irarúnaga itene irupipeqte péhe éhwéhniká péhe aitéhre. Péhe aitéhrana aiq pútaq ehweh itene irupipeq íre kékre.

<sup>9</sup> Itene ahbabáqsabe Maniká pahsuqme teawunawe we kawerue tábúsoqme íwíáhéná itene ahbabáqsabe insahwé aitena itene irupipeqté áhbábáq íwíáh moke kaqíuwéhre.

<sup>10</sup> Ite íre ahbabárúne irarúnaga Manikánsabe, Péhe aní móne atonana itene irupipeq wene ehweh íre kékre.

## 2

*Sísa íéhnehéna insahwé aitéhre i ehwehne.*

<sup>1</sup> Néne animáriño, ite íre ahbabárigeheéna mahnawé sehiranue teiúge. Ahbabárúnaraqmé Sísa Karáhégá Maniká Iteribone auranabiahtapeq ména íéhnehire. Sísa Karáhewé peh kaweqtaq mía míai aníne.

<sup>2</sup> Manikánsabe itene ahbabáqsabe abiahnsa aitéh púana insahwé aitankeheéna Sísa íéhnehéna wene korahqtaté paiqmarowe. Íre itebataq itene ahbabáqsabe, moke mah kehiná kékínáné ahbabáqsabe insahwé aitéhre.

*Maniká tagariéh áninká wene sánsá sehgíre i ehwehne.*

<sup>3</sup> Itega ahtebahrahúnawe Manikánsabe sehgíóro ú ehweh sehgiónaraqmé itega we aiq tagarione.

\* **1:1:** Ehwehme Sísa Karáhée. Sóni 1.1-5,14 tagáhno.

<sup>4</sup> Wega sehgóro ú ehweh anetaníbo éna, Ínéga we tagaríóge irari anínká péhenéna wene arupipeq aiq pútaq ehwéh íre kékre.

<sup>5</sup> Wega sehgóro ú ehweh sehgó áninká Manikánsabe aiq pútaq arutaboiratéhre. Itega iahtebahrahúnawe mi sansá miraonaraqmé itereq wereq moráráq mía míauáne.

<sup>6</sup> Wereq mía míauge iraréna aníno, Sísaga kaweqtaq mía míainserah are moq kaweqtaq mía míauáno.

<sup>7</sup> Néne iyahnabo animáríno, o sehgóro i ehwéh íre sehiranue teiúge. Írakaumo. Mah ehwéh itega téhwe író ehweh míre. Wega naho sehgóro ú ehwehmé itene iahrega író ehweh míre. *(Sóni 13.34)*

<sup>8</sup> Sunkíqmé parabagirana amahnága aiq téhrehre. Aiq téhreh puana Sísaga wene animárínsábé arutaboirinserah itega moq sensabé irutaboirowe. Itega sensabé irutaboironsabé wega naho sehgóro ú ehweh peh o ehweh tahná úkire. Mi ehwéhnsábé sehiranue teiúge.

<sup>9</sup> Ínéga téhrehabeq míóge irari anínká Sísá tagaríeh áninsábé, Nuwahriehre ime we peh sunkírirabeq mía míaire.

<sup>10</sup> Wenawahrah anínsábé arutaboiri anínká téhrehabeq nogíre. Téhrehabeq nogírana mitaq mó morá inahnsuboráhi naneq íre kékre.

<sup>11</sup> Sísá tagaríeh áninsábé nuwahriehre íwáhi anínká sunkírirabeq míéhre. Sunkírirabeq nogí puana, Eheq pokugamo éna sunkírinka we saiqnariéh puana wene auranka íre tagahrahire.

<sup>12</sup> Néne animáríno, Sísaga wenawírue itene ahbabáqsabe insahwé aitéh púana sehiranue teiúge.

<sup>13</sup> Nániboreho, téh mío ani tagaríah púana sehiranue teiúge.

Nánibáqmarino, itega ahbabáq ani kaqsuq kaqsuro puana sehiranue teiúge.

<sup>14</sup> Néne animáríno, itega Maniká Iteribo tagaríah púana sehiranue teiúge.

Nániboreho, téh mío ani tagaríah púana aiq sehiranue teiúge.

Nánibáqmarino, ite págegeue míáh púana aiq sehiranue teiúge. Manikáne ehweh itene irupipeq kagairaç ahbabáq ani kaqsuq kaqsuro puana aiq sehiranue teiúge.

### *Mah marákóípéqté sánsánsábé íre irutaboiroro i ehwéhne.*

<sup>15</sup> Mah marákóípéqté sánsánkákáq mahtaqté naneqkakáqsábé íre irutaboiroro. Mah marákóípéqté sánsánsábé arutaboiri anínká Maniká Iteribonsabé íre arutaboirorahire.

<sup>16</sup> Sirupipeqté áhbábáq íwíahgá sirutaboirome, auranka tageh mensáméhnsánsábé aigará pabekime, píribahri saiyo sansámé, moke mah mårákóípéqté sánsámé, Maniká Iteriboga íre áhwárehre. Írakaumo. Mina moke peh mah marákóípéqté áhbábáq sánsá míre.

<sup>17</sup> Mah marákó mårákó parabaginawire. Moke mah marákóípéqté sánsánkákáq moq parabaginawire. Parabagínana mah marákóípéqté aigará pabeki naneqkakáq íwíah íwíahúna naneqkakáq moq parabaginawire. Parabagínara Maniká awahbeh arámbéhri mira aruqaruro kewé ahriahri mía míoneherawoe.

### *Sísá Karáhéne naruo ábórarago ehwéhne.*

<sup>18</sup> Néne animáríno, amahnága anehe tanahráre. Mó kegá, Sísá Karáhénabe ahqáho atahna anínká sinæ urowaq aiq írátáúne. Írátáúnara amahnága wensabé áhnte ahqáho atáh ké aiq míáhwe. Aiq míáh púaq amahnága anehe tanahráq aiq sime tagarione.

<sup>19</sup> Mi kegá itereq méra íre ite tahnsá íwíah ke míáh púara ite iuwera pokowe. Ite tahnsá íwíah ke míáhtáq tahirímé itereq mía míauána irino. Segá ite iuwera pokonsabé se íre ite kahnáh móe íwíahorahúne.

<sup>20</sup> Manikánka Wenawa iteba eqmatairana íwíah aitéh púaq itega moke aiq iahtebahwe.

<sup>21</sup> Aiq pútaq ehwéh íre írátíáhnsábé sehiranue teiugo? Írakaumo. Aiq pútaq ehwéh aiq írátláh púana sehiranue teiúge. Aiq pútaq ehwéhnská péhe éhwéh íre úkorahi puana sehiranue teiúge.

<sup>22</sup> Péhe ánímé insebo? Manikánka itene ahbabáqsabe kaweraitena tumeirankeheéna omaq ato aní íre Sísa wire irari ánímé wewe péhe ání míre. Maniká Iteriboreq wenah-ninseqsabé íre aiq pútare arítéh áninká wewe Sísa Karáhéne naruuo aní míre.

<sup>23</sup> Sísa sinehepeq súah kégá Maniká Iteribo moq sinehepeq súahwe. Sísansabé aiq pútare atáh kégá Maniká Iteribonsabé moq aiq pútare atáhwe.

### *Manikáne Awanka moke aiq pútaq ehwéh íwáhnorre i ehwéhne.*

<sup>24</sup> Itega téh író ehweh kawerue ambubu atawéq sehgóro. Mirairataq Maniká Iteriboreq wenahninseq itereq morárág mía míagehe.

<sup>25</sup> Sísa Karáhéga itensabé, Oga mérapeq awaq miagéhe éna ínénéga irarúnsabe aiq awaq miagéhe teiátáire.

<sup>26</sup> Péhe éhwéh tei teino keyábé sehiranue teiúge.

<sup>27</sup> Sísa Karáhéga Manikáne Awa iteba eqmatairana itereq mía míáéna ite moke íwáhnori puaq, Mó íwáhnori aní insebo íwíáhiyehboq Manikáne Awanka moke íwáhnorinkehe. Wega íre péhenia peh aiq pútaq ehwéh íwáhnorre. Wega íwáhnorinserah Sísareq mía míaoro.

### *Amahnága ite Manikáne animári múne i ehwéhne.*

<sup>28</sup> Néne animáriño, wega tuinagake itega íre iyehitegurégúia peh kawerire íwíáhigehboq Sísareq mía míaoro.

<sup>29</sup> We kaweqtaq mía míai aní míre íwíáhéq moke kaweqtaq mía míao ke wene animári úkurowe íwíáhorahowe.

## 3

<sup>1</sup> Maniká Iteriboga itensabé anotahtaq arutaboiraitéhre. Arutaboiraitéhnsábé wega, Néne animári móe aitéhre. Ite aiq pútaq wene animári múne. Ahbabáq kehiná kékínánká Manikánsabe, Iuwahriehre atáh púara itensabé moq, Iuwahriehre aitáhwe.

<sup>2</sup> Néne iyahnabo animáriño, ite amahnága Manikáne animári múne. Mókake ite aneq tahnsánue míanehnkono? Amahnága mina íre ahtebóne. Sísga tuinagake itega we kawerue tagéq we tahnsánue míaneheqmúne. Mina aiq ahtebóne.

<sup>3</sup> Sísga kaweqtaq mía míaire. Minayabe wensabé áwénuno kegá moq kaweqtaq méyabe suwahbehrara kaweqtaq mía míaowe.

### *Ahbabáqsabe teí éhwéhne.*

<sup>4</sup> Ahbabáro kegá Manikánka sehgóro ú ehweh aiq anterúáhwe. Ahbabáqmé aneqpomo? Manikánka sehgóro ú ehweh anterúáhmé minawé ahbabáq míre.

<sup>5</sup> Sísga itene ahbabáq meyanieéna wehukení úkue tuména ahriahri íre ahbabáq ani mía míaire. Mina aiq ahtebahwe.

<sup>6</sup> Sísga itene ahbabáq aruqarurire. Ahbabáq aruqaruri aninká Sísa íre ahtebéna we íre tagaríehre.

### *Sísga owainawane arambehri sabiruanieéna tumío ehwéhne.*

<sup>7</sup> Néne animáriño, mó kené péhe éhwéhnsábé, Aiq pútaq ehwéhne arítého. Sísga kaweqtaq mía míai inserahnue kaweq sansá mira aruqaruri aninká kaweqtaq mía míaire.

<sup>8</sup> Téhwe owainawanka ahbabáq aruqarurú púana amahnága ahbabáq aruqaruro kewé owainawane animári móe. Owainawane arambehri sabiruanieéna Manikáne ahninkáwágá wehukení úkue tumíowe.

<sup>9</sup> Manikánka organúq atéh áninká íre ahbabáq aruqarurire. Manikáne Awanka wene arupipeq mía míai puana we íre ahbabáq aruqarurire. Manikánka organúq atéh púana we íre ahbabáq aruqarurorahire.

<sup>10</sup> Manikáne animári inseréhbo? Owainawane animári inseréhbo? Mahraue tagahrahúne. Ahbabáq aruqaruro kewé íre Manikáne animári móe. Manikáne animáriinsábé suwahrieh kewé íre Manikáne animári móe.

### *Wensabé wensabé arutaboiratéhoro i ehwéhne.*

**11** Wensabé wensabé arutaboiratéhoro. Mi ehwéhmé naho naho aiq író ehwehne.

**12** Wehukení wenáwíq Kéínie. Wega miraú serahniyeho. We owainawane aninéna wenábáq subiq suowe. Aneqsabé subiq suoo? Wenábáqka kaweq sansánuwana we ahbabáq sansanéna wenábáq subiq suowe.

**13** Nánuwahraho, mah marákóípéqté áhbábáq kégá itensabé suwahriehre eme íre áhtenoro.

**14** Menah itewe pusa ké tahnza míaraune. Amahnága itega Sísa tagariáh kékabé irutaboirúnayabé oga míone ue tagariahrahúne. Mó keyábé íre sirutaboiro kewé peh pusa ké tahnza míahwe.

**15** Mó Sísa tagariéh áninsábé awahrieh anínká wehukení subiq súeh ání tahnza míéhre. Wehukení subiq súeh ánime oga mérapeq íre awaq miahrahire. Minawé aiq ahtebahwe.

**16** Sísaga itensabé anotahtaq arutaboiri puana itene ahbabásabe pukúwe. Wega aiq miraúnsabe irutaboiré sansa ahtebóne. Wega miraúnserah itega moq Sísa tagariáh kékabé irutaboiré séhréh aritanéhe.

**17** Wehukenínká áhnte mah marákóípéqté ménsáméhnsá matawéna Sísa tagariéh ání tabonah ání tagéna wensabé ayaqnehnsabé mi anínká Manikáne arutaboiré sansa íre sehgiére. Minawé aiq tagarione.

**18** Néne animáríno, ínéga mó keyábé nirutaboiruge pehipi irariyehboq séhréh arítáhro. Peh morá séhréh arítáh kégá aiq pútaq sirutaboiro ke míahwe. Minayabe itega séhréh aritaneheqmúne.

### *Moke Sísa tagariáh kégá siru eyoyóue míahrahewe i ehwéhne.*

**19-20** Itega Sísa tagariáh kékabé irutaboiré séhréh arítáhnaraqmé itega aiq pútaq wene ehweh sehgiune íwíáhorahúne. Itene irupipeqté íwíáhgá ite ehweh aitahnaraq itene iru págegeue umeh agirana Manikánka moke tagariéhre. Wene iwiáhgawé itene irupipeqté íwíáh kiotaikire. Minayabe iwiáhéq Manikánseq mía míaeq iru eyoyó agorahire.

**21** Néne iyahnabo anímáríno, itene irupipeqté íwíáhgá íre koti aitahnaraqmé ite Manikáne auranabiahtapeq iriwe méq págege ke míone.

**22** Wega sehgióro i ehwéh sehgieq we awahbeh sansá miraúnawe wega itene púreq ehwéh irena náire.

**23** Manikánka sehgióro i ehwéhká teímé wenahni Sísa Karáhénabe aiq pútare ateq wega teínserah wensabé wensabé arutaboiratéhoro.

**24** Manikánka sehgióro i ehwéh sehgió kéké wereq mía míowana wega sereq mía míaire. Wega Wenawa iteba eqmaréhrana itereq mía míaire. Itereq mía míáena we sokigi aímé itereq Manikánseq moraráq mía míáune.

## 4

### *Péhe éhwéhnsábé aiq pútare arítéhboq iwiáhue tagahro i ehwéhne.*

**1** Néne iyahnabo anímáríno, áhnte péhe éhwéh teri terino ke mah marákóípéq míahwe. Sega, Manikáne Awanka itensabé iwiáh aitéhre éra péhenowe. Sene ehwehnsabé aiq pútare arítéhboq kawerue iwiáhue tagahro. Wehukení iwiáhnorirataq Manikáne Awanka iwiáh aritehrápomo. Mó anínká iwiáh aritehrápomo éq iwiáhue tagahro.

**2** Sísa Karáhé wehukení úkue tumíowe irari anímé aiq pútaq iwiáhowana Manikáne Awanka mi iwiáh arítéhre. Minayabe itega, Manikáne Awapomo iwiáhirataq áhwárawe tagéq ahtebagehe.

**3** Sísa Karáhé íre wehukení úkue tumíowe irari anímé péhe iwiáhirana Sísa Karáhéné naruo anínká mi iwiáh atéhre. Manikáne Awanka mi iwiáh íre atéhrana peh owainawanka mi iwiáh atéhre. Mira iwiáho kegá peh Sísa Karáhéné naruo míahwe. Mi péhe éhwéh irare kegá seneherawoe éhwéh írátówe. Sega amahnága mah marákó mårákóípéq aiq míahwe.

<sup>4</sup> Néne animáríno, ite Manikáne animári móe. Itega péhe kéné ehweh íre irasa se saiqnarúahwe. Árahue saiqnaruaho? Péhe éhwéh irari awánká mah marákóípéqté kéné sirupipeq míéhrana Manikáne Awanka mi awá aiq kiotaikire. Manikáne Awanka itene irupipeq míeh púana itega moq péhe kéné ehweh aiq saiqnarúahwe.

<sup>5</sup> Péheno ke mah marákóípéqté ké púara peh marakóipeqté éhwéh irarirara mó marákóípéqté kégá sene ehweh irera sehgiówe.

<sup>6</sup> Itewe íre mina tahnsanéq peh Manikáne animári múne. Maniká tagaríah kégá itene ehweh írátiáhwe. Manikánsabe suwahrieh kegá itene ehweh íre írátiáhwe. Minayabe itega íwáhnori ehweh ireq iwíahue tagéq aiq pútaq ehwéhnkákáq péhe éhwéhnkákáq saraqmarahráhowe.

*Manikánsabe arutaboiri anínká mó keyábé moq arutaboirinkehe i ehwéhne.*

<sup>7</sup> Néne iyahnabo anímáríno, Manikánka ahriahri arutaboiri aní míeh púaq wensabé wensabé arutaboiratéhoro. Sirutaboiro kewé Manikáne animári méra Maniká aiq tagaríahwe.

<sup>8</sup> Manikánka ahriahri arutaboiri aní míeh púara mó ke séhréh ariteyabe suwahrieh kegá Maniká íre tagaríahwe.

<sup>9</sup> Ite oga mía míageheéna Manikánka webataq wenahni mah marákóípéq eqmarowe. Eqmaronsabe ite tagarionawe Maniká anotahtaq arutaboiraitéh ání míéhre.

<sup>10</sup> Itega naho Manikánsabe íre irutaboirowane. Téhwe wega itensabé arutaboiraitena itene ahbabáqsabe insahwé aitanieéna wenahni eqmarowe. Sísaga wene korahqtaté paiqmarankeheéna eqmarowe.

<sup>11</sup> Néne iyahnabo anímáríno, Manikánka itensabé anotah arútábóíraitéh púaq itega wensabé wensabé arutaboiratéhoro.

<sup>12</sup> Itene iuranka Maniká íre tagarione. Íre tagéq itega wensabé wensabé arutabironaraqmé we itereq mía míaire. Mía míáéna séhréh aitéhraq itega mó keyábé kawerue irutaboirúne.

<sup>13</sup> Ite tagarionawe Manikánka Wenawa iteba eqmaréh púaq Manikánseq itereq moráráq mía míáúne.

<sup>14</sup> Mah kehiná kékíná oga mía míageheéna Maniká Iteriboga wenahninká insahwé aitankeheéna eqmarowe. Minayabe tagéq teiune.

<sup>15</sup> Sísa aiq pútaq Manikáne ahninkáwá wíre atéh ánímé wereq Manikánseq moráráq mía míáoye.

<sup>16</sup> Aiq pútare ateq ite tagarionawe Manikánka itensabé anotahtaq arutaboiraitéhre. Itensabé arutaboiraitéhnsábé mó keyábé irutaboirúne.

Manikánka arutaboiré sansa áhwárehre. Áhwárehraq mó keyabé irutaboirúnaraq ite Manikánseq mía míauvana we itereq mía míaire.

<sup>17</sup> Maniká arutaboiri aní mía míainserah ite mah marákóípéq mé tanahráq mó keyábé anotahtaq irutaboiraritone. Minayabe wega ehweh aitahna tanáhráqsábé íre áhreúne.

<sup>18</sup> Arutaboiri anínká íre áhreire. Arutaboiré sansanká áhree sansa kaqsuahráhire. Ahbabáq aninká, Kamah aníneho éna áhre aruqaruréna arutaboiri aní íre míáhrähire.

<sup>19</sup> Manikánka itensabé téh arutaboiraito púaq itega amahnága mó keyábé irutaboirúne.

<sup>20</sup> Manikánsabe nirutaboiruge i anínká mó Sísa tagariéh ánínsábé awahriehre éna anetaníbo íwíahime wega péhe íwíahire. Wega Sísa tagariéh ání tagéna Maniká íre tagehre. Minayabe wega tageh anínsábé awahrieh puana Manikánsabe íre arutaboiratéhre.

<sup>21</sup> Sísaga sehgióro ú ehwéhnká mahraréna,

Manikánsabe arutaboiratéh ánínká íné tagariáh kéreq moq arutaboiritarahro uraire.  
(Sóni 13.34)

## 5

*Sísa tagariáh kégá mah marákóípéqté áhbábáq sánsá suqsuro ehwéhne.*

<sup>1</sup> Manikánka itene ahbabáqsabe kaweraitena tumeirankeheéna omaq ato anímé Sísa wire íwíáho kewé se Manikáne animárí móe. Maniká Iteribonsabé sirutaboiro kewé wene animárínsábéákáq moq sirutaboirowe.

<sup>2</sup> Itega tagarionawe itega Manikánsabe irutaboiréq wega sehgóro i ehwéh sehgiunayabé Manikáne animárínsábé moq irutaboirúne.

<sup>3</sup> Itewe Manikánsabe irutaboirúna kegá wega sehgóro i ehwéh kawerue sehgiune. Wega sehgóro i ehwéh sehgieyabe itene irupipeq íre umehi naneq mire. Írakaumo.

<sup>4</sup> Manikáne animárínká mah marákóípéqté áhbábáq sánsá suqsurowe. Wensabé aiq pútare atonaga ahbabáq sansa kiotaikéq mi sansámári suahráhúne.

*Manikánka wenahni éhweh pahsúéh ehwéhne.*

<sup>5</sup> Insegá mah marákóípéqté áhbábáq sánsá kiotaikéna suahráhiro? Sísa aiq pútaq Manikáne ahninkáwá wíre atéh áninká mah marákóípéqté áhbábáq sánsá kiotaikéna suahráhire.

<sup>6</sup> Sísa Karáhéga wání meanieéna Sóniba súwe. Íre peh morá wání meanieéna mah marákóípéq tuwe. Írakaumo. Itene ahbabáqsabe pukinieéna tuwe. Itene ahbabáqsabe pukúwana wene korahq tuwe. Manikáne Awanka aiq pútari aní púana wega Sísa éhweh peh aiq pútaq ehwéh tei teinire.

<sup>7</sup> Apahtáró éhwéhnká wene sánsá teíre.

<sup>8</sup> Manikáne Awanka teí éhwéhnkákáq wání meawu ehwehnkákáq korahq tu ehwehnkákáq mi ehwéhtárágá peh morá éhwéh teíre.

<sup>9</sup> Wehukene ehweh ireq aiq pútaq ehwéhne irarúne. Manikáne ehwehnka wehukene ehweh anotahtaq kiotaikire. Manikánka wenahni éhweh teímé íráhro.

<sup>10</sup> Manikáne ahninkáwánsábé aiq pútare atéh áninká Manikáne ehweh wene arupipeq aiq íréhre. Wene ehwehnsabé íre aiq pútare atéh áninká Manikánsabe péhe ání móne atéhre. Wene ahninkáwá éhwehnsabé íre aiq pútare atéh púana wega Manikánsabe péhe ání móne atéhre.

<sup>11</sup> Manikánka teí éhwéhmé oga mérapeq awaq miageheéna wega organúq ítéhre. Wenahniká miraúnsabe organúq ítéhre.

<sup>12</sup> Manikáne ahninkáwáreq mía míai anímé oga mérapeq awaq míéhre. Manikáne ahninkáwáreq íre mía míai anímé oga mérapeq awaq miehro? Írakaumo. Oga mérapeq íre awaq míéhre.

*Itega oga mérapeq awaq míone éq aiq irona ehwéhne.*

<sup>13</sup> Manikáne ahninkáwánsábé aiq pútare atáh kéo, itega oga mérapeq aiq awaq míone éq ahtebageheéna sehiranue teiúge.

<sup>14</sup> Itega Maniká awahbeh íwíáh sehgieq wensabé, Miraúno únana itene ehweh íréhre. Wensabé íre áhreéq peh weba kúnana itene ehweh íréhre. Minawé aiq tagarione.

<sup>15</sup> Ite tagarionawe itega púrerúna ehwéh wega moke íréhre. Minayabe itega wensabé, Náio teawénaraqmé wega náinawire tagarione.

<sup>16</sup> Sísa tagariéh áninká we íre pukorahi ahbabárlínaq tagéq Manikánsabe kawerato ue púreroro. Púrerirana Manikáne kaweratankéhe. Íre pukorahi ahbabáqsábé sehiranue teiúge. Pukorahi ahbabáqsábé púreroro íre teiúge.

<sup>17</sup> Moke íre tábúsuréh sánsámárimé aiq ahbabáq míre. Mó ahbabáqmé pukorahi ahbabárlína mó ahbabáqmé íre pukorahi ahbabáre.

<sup>18</sup> Ite tagarionawe Manikáne animárínká íre ahbabáq aruqarurowe. Írakaumo. Manikáne ahninkáwágá wene animárí wahnah wahnahni puana owainawanka íre saiqnariahrahéna se pehragarítéhre.

<sup>19</sup> Moke mah marákó márákó owainawane ayahpeq kéhrana peh itewe Manikáne animári míone. Minawé aiq tagarione.

<sup>20</sup> Mahraue tagarionawe Manikáne ahninkágá séna Manikáne iwíáh aitéhraq minayabe aiq pútari aní tagariahrahúne. Aiq pútari anínseq wenahni Sísa Karáhéreq itereq moraráq mía míaúne. Sísa Karáhewé aiq pútaq Maniká ména ahriahri míai aníne.

<sup>21</sup> Néne animáríno, péhepehe maníká pehragéq peh móbeq míáhro.

## 2 Sóni Ebeq sáhnsahwe ahtebé ehwehne.

Mah pahsiípéq Sóni áwíq íre kérara peh ahtebia kégá Sóniga aiq sehiranúwe íwíáhowe. Sega iwíáhome wene naruoyabé áhreú púana wenawíq íre sehiranúwe. Mina únserah wega Sísa tagaríah kée íwíáhéna omaq atéh ínínseq wene animárínseqsabé pabeqme ehwéhnue sehiranúwe. Áhnte ahtébiá kégá mira íwíáhowe. Ite íre tagarione. Páhsí sehiranú aninká mahraréna, Mó keyábé irutaboiroro. Péhe éhwéh tei teino kegá Sísa Karáhé wehukení úkue tumíonsabe íre aiq pútare atáhwe. Mi kewé Sísa Karáhéne naruwoe ue sehiranúwe.

### *Sóniga ákáhpi sehiranú pahsie.*

<sup>1</sup> Manikánka omaq atéh ínínseq arene animárínseqsabé íné Sóni aboawah wehéna teiúge. Itega aiq pútaq sansá sehgónsábé itensabé nirutaboiruge. Íre ínébataq ínéga peh ómi aiq pútaq ehwéh sehgó kéréqka itensabé irutaboirúne.

<sup>2</sup> Aiq pútaq ehwéh itene irupipeq kagaéna ahriahri mitaq kagai puaq itensabé irutaboirúne.

<sup>3</sup> Maniká Iteriboreq wenahni Sísa Karáhéreqka ite séhréh aitera sirutaboiraitera iru ukiq itehye. Sega aiq pútaq sansánéra itensabé sirutaboiraitehye.

### *Mó keyábé irutaboiré sansa kawerue sehgóro i ehwéhne.*

<sup>4</sup> Itene animári aiq pútaq ehwéh sehgónsábé iwíáh íwíáhuge. Sega Maniká Iteriboga sehgóro ú ehwéh aiq íráhwe.

<sup>5</sup> Ínéga teiú éhwéhmé kawerue íráhro. Íre o sehgóro i ehwéh sehiranue teiúge. Mah ehwéhmé itega téh aiq írató ehwéhne. Wensabé wensabé arutaboiratéhoro éhwéh teiúge.

<sup>6</sup> Irutaboiré sansamé mahraue kékre. Manikáne sansá sehgóro ire. Wega sehgóro ú ehwéh téh íratówe. Mi ehwéhmé mahraréna, Irutaboiré sansa kawerue sehgóro ire.

### *Sísa Karáhéne ehwehme ambubu atawéq sehgióneheqmúne i ehwéhne.*

<sup>7</sup> Áhnte péhe éhwéh irare ke mah marákóípéq míáhwe. Sega Sísa Karáhé wehukení úkue tumíonsabe íre aiq pútare atáhwe. Mina tahnsa kewé péhe íwíáh aitahráho ke méra sewe Sísa Karáhéne naruwoe.

<sup>8</sup> Itega kaweq arámbéhríuronsabé ápeq tabanagínehboq kawerurero. Itene ápeq moke meyagéhboq kaweroro.

<sup>9</sup> Sísa Karáhéne ehweh suena mó ehwéh sehgó ánime Maniká moq aiq áuwéhre. Sísa Karáhéne ehweh ambubu atawéna sehgó ánime Manikánseq wenahninseqka wereq mía míaóye.

<sup>10</sup> Íre Sísa Karáhéne ehweh peh mó ehwéh íwáhnori anínká iteba sínaraq we mehweh atého. Itene nahupeq móátéhboq peh áwéragahro.

<sup>11</sup> Péhe éhwéh íwáhnori aní mehweh atéh anínká wene ahbabáq sansa séhréh atéhre.

### *Sóniga mi ke koragéyabe awahbeh ehwéhne.*

<sup>12</sup> Íné áhnte mó ehwéh kékranawé amahnága pépahqtaq sehiranéyabe nuwahriehre. Iteba koragéyabe nuwahbehre. Iteba konaraq itereq moraráq ehwehnéq mi tanáhráq íwíáh íwíáhonehe.

<sup>13</sup> Manikánka omaq atéh íní arenanahnnone animárínká itensabé iroro ewe.

## 3 Sóni Ebeq sáhnsahwe ahṭebé ehwehne.

Mah pahsíipéq Sóni áwíq íre kérara peh ahṭebia kégá Sóniga sehiranúwe íwíáhowe. Páhsí sehiranú aninká wene iyahnabo aní aboawah wehgá sáhnsahinkehééna sehiranúwe. Wega mahraréna, Ahbabáq sansa pehragé peh kaweq sansánúno. Ahbabáq aruqaruri anímé Maniká íre tagariéhre ue sehiranúwe.

### *Sóniga anehe sehiranú pahsíe.*

<sup>1</sup> Káiúsio, íné aboawah wehne páhsí sehiranúwe tagáhno. Ínéga arensabé aiq pútaq nirutaboiruge.

<sup>2</sup> Néne iyahnabo aníno, arenawa kaweqtaq mía míaime aiq tagarióge. Mina ónanserah are kaweqtaq mé awaho ani mía míainkehééna púreratóge.

<sup>3</sup> Arega aiq pútaq ehwéh sehciona puah arewe kaweqtaq mía míáone. Mó Sísa tagariáh kégá séra mi ehwéh teniátónsabé nirupipeq anotahtaq eyoyóuraire.

<sup>4</sup> Ínéga Sísa éhweh síwáhnorurau kegá wene sánsá kawerue sehgiónsábé nirupipeq anotahtaq eyoyóire.

### *Sísa tagariáh ké séhréh arite ehwéhne.*

<sup>5</sup> Néne iyahnabo aníno, arega mó Sísa tagariáh ké séhréh aritahne. Arega nahnsu su wahpeqte Sísa tagariáh ké moq mehweh arite séhréh aritahnawe kaweróne. Mina kaweq sansáne.

<sup>6</sup> Arega kaweraritahna kegá mahtaq Sísa tagariáh ké teriera, Káiúsiwe anotah arútábóíri aní míre ewe. Segá Manikáne arambehri miraonsabé sega are auwera pokoneherairataq séhréh arite se íre matiáh náneq nário. Maniká Iteribo awahbehnserah séhréh arite nário.

<sup>7</sup> Segá Sísane arambehri miraonehe íwíáhéra Sísa íre tagariáh kéné ménsámehnsá íre mewera pehipi pokuwe.

<sup>8</sup> Minayabe mina tahnsa pokoneheraira ke íre matiáh náneq nário. Mó ke aiq pútaq ehwéh iragéhboq miraue séhréh arito. Miraue sereq itereq moraráq arambehriéq Manikáne aiq pútaq ehwéh terienéhe.

### *Saiyo píribahri anínká íre kaweq sansánú ehwéhne.*

<sup>9</sup> Ínéga arenawahrah Sísa tagariáh ké páhsí sehiranue síátáuge. Wehukení wenáwíq Tíótárépésa seba míéhre. Wega píribahriéna, Ínébataq mahtaqté kéné wahnah mugé íwíáhinsabé itene ehweh íre irasa peh anehepeq sutaire.

<sup>10</sup> Iteba konaraq wene ahbabáqmé pahsuqme ehwéh ataníe. Wega íre kaweq ehwéh aintena péhe éhwéh aintaráire. Péhe éhwéh aintena íre peh morá mi ahbabáruraire. Sísa tagariáh kégá mitaq surowana wega íre mehweh arítaráire. Íre mehweh aritena mitaqté Sísa tagariáh kégá mi ke mehweh aritého éna momiwí nahtápéqté kaqsutaire.

<sup>11</sup> Néne iyahnabo aníno, ahbabáq sansa pehragé peh kaweq sansánúno. Kaweq sansá mira aruqaruri anímé Manikáne anine. Ahbabáq aruqaruri anímé Maniká íre tagariéhre.

<sup>12</sup> Wehukení wenáwíq Témítíúsiga Manikáne arambehri kawerue mira aruqaruri puara ómiga we kaweq aníne íwíáhowe. Manikáne aiq pútaq ehwéh moq wene kaweq sansá pahsúéhre. Ínéga moq, We kaweq aníne teawúgah are tagariahnawe, Néne ehwehme peh aiq pútaq ehwéhne.

### *Sóniga we koragéyabe awahbó ehwéhne.*

<sup>13</sup> Íné áhnte mó ehwéh kéraranawe peh pépahqtaq sehiranéyabe nuwahriehre.

<sup>14</sup> Pehgáriq tanáhráq are koraganie íwíáhuge. Mitaqkake pehipi ehwehnoyehe.

<sup>15</sup> Manikánka arene aru ukiq atéhre. Mahtaqté arene iyahnaboga arensabé iraúno ewe. Mibeqté itene iyahnaboyabé iroro terio.

## Súta Ebeq sáhnsahwe ahbebé ehwehne.

Áhnte ahtébiá kégá, Sútawe Sísareq Sémísireqne sibákawa wíre íwíáhowe. Sútaga íre peh morá áninsábé iwíáhéra mah pahsí sehiranéna peh moke Maniká Iteriboga omaq sito keyabé sehiranúwe. Wega mahraréna, Anehe tanahráqmé seye suwahbeh ahbabáq miraira kegá aiq pútaq ehwéhnsábé awiréh atagéhe. Mi kegá Sísa tagariáh ké saiqnaritaneheéra péhe éhwéh terigéhe. Itene Wahnah Sísa Karáhéga itensabé arutaboiréna mókake oga mía míaorabeq móitankéhe. Mi tanáhráqsábé áwénunéq wene ehweh kawerue ireq sehgióro ue Sútaga sehiranúwe.

### *Sútaga sehiranú pahsíe.*

<sup>1</sup> Moke Maniká Iteriboga omaq itárái keo, íné Sútane páhsí sáhnsahwe tagahro. Maniká Iteriboga itensabé arutaboiraitéhrana Sísa Karáhéga kawerue wahnahnaitéhre. Íné Sémísine ábákawa ména Sísa Karáhéne arambehriu aní múge.

<sup>2</sup> Maniká Iteriboreq Sísa Karáhéreqka séhréh aitehyanka iruí sánsámé iru ukiqite sansamé mó keyábé irutaboiré sansamé itene irupipeq anotah úkinkehe.

### *Kaweq ehwéhnsábé íre suwahbeh kegá Sísa tagariáh kéká sewe i ehwéhne.*

(2 Píta 2.1-18)

<sup>3</sup> Néne iyahnabo anímáríno, Manikánka ite meirena kaweraitaráinsabé ite wene animári méq peh morá ké tahná míone. Minayabe sehiranue teinieutaq mó ehwéh niahreraq kéhre. Mina niahreraq kékéh teiníe. Manikánka Sísa tagariáh ké wene sánsá aiq teiátáire. Minayabe péhe éhwéh aiq pútare atehboq peh morá wega teiátái ehwéh ambubu atawéq sehgíoro.

<sup>4</sup> Manikáne sansá íre sehgíó ké táhmaroga iteba epéráhpérue míáhwe. Segá péhenéra, Manikánka ite séhréh aitéh púana itega ahbabáronaraq wega itensabé íre abiahnsa aitankéhe ewe. Mira íwíáhéra ahbabáq aruqaruwé. Mi sansá mirao puara itene Wahnah Sísa Karáhénabe ahqáho atáhwe. Mi kewé iraipéq pokoneherawoe. Minayabe Manikánka naho aiq irarúwe.

<sup>5</sup> Téhwe Manikánka Ísara ke Ísípi marákórápéqté koweriqmena méritowe. Anehe áhnte mérito kega wene ehwehnsabé íre aiq pútare atónsabe wega se oraruowe. Itega mi ehwéh aiq irátowana mónkakáq ahreraq itahnaq íwíáhigehe.

<sup>6</sup> Manikánka íópeqté ké omaq sito arámbéhri arítowara táhmaroga wene ehweh anterúónsabe Manikánka se táhru táhruarena sunkíkírirabeq máruntitowe. Se amahnága mitaq peh mía míaowana mókake ehweh aritahna tanáhráq sínaraq Manikánka ehweh aritena kamah arinkéhe. Minayabe íwíáhue tagahro.

<sup>7</sup> Sóróma suwahpeqte kéreq Kómora suwahpeqte kéreq wahtotaq kehiná suwahpeqte kéreqka moq ahbabárára ahkaragára sansánuwe. Ahkaragára sansánuwana Manikánka kagai iráráté kamah ariuwe.

Manikánka ahbabáru ke kamah ariunsabe íwíáhue tagéq mi kegá ahbabárunserah íre oro.

<sup>8</sup> Amahnága teiú ké ite péhe éhwéh aítah kégá moq ahbabárowe. Segá múguwahguéra peh áónáho ke tahná míra seyene sinonka ahbabárawíáhwe. Ahbabáruera Manikáne ehwehnsabé suwahriehre. Segá téhreh naneqkakáq íópeqté kékéh sehgíoro.

<sup>9</sup> Anotah íópeqté ání wenawíq Máhíkérie. Wereq owainawanseqka Mósísine anonkansabé ehwehuyye. Ehwehuyataq Máhíkériga owainawansabé íre éhruruúwe. Írakaumo. Wega owainawansabé, Manikánka ehweh atankéhe teawuwe.

<sup>10</sup> Mi pehe kégá íre mina tahnsanéra sega íre tagariáh náneqmarí síehruruowe. Áwéhq poeráhqká íre iwíahéna peh wene anonkanka awahbeh sansá pehipi mirainserah sega aiq miraowe. Segá miraonka seye kamah aríre.

<sup>11</sup> Naho kegá ahbabáru serahnowe. Kéiniga ahbabárú serahnowe. Pérámaga móneyabé wene aigará pabekúwara ahbabárú serahnowe. Kórahga saiyoéna wene wahnahne ehweh anteruo serahnéra mi ke airaiq tabanagowe. (*Stat 4.3-8; Namba 16.1-35, 22.1-35*)

<sup>12</sup> Itega moráráq nahtaq mi pehe kégá ábóraq ahbabárowe. Segá peh seyensabé sirutaboiréra seye suwahbeh sansá sehgirowe. Se íre ibonkakáq írabúyá tahnsanéra peh sóiriqka paentarúeh írabúyá tahnsa míahwe. Sera íyéh tánáhráq awanká sera íre íyéhnserahnowe. Se ánúqkakaq pagogi awanká aiq ehyatagi awanká tahnsa míahwe.

<sup>13</sup> Wání periéhrana áhnte atútú kéhnserah sega áhnte ahbabáq kékre. Wání periéhrana nonarehya ábóraq kéhnserah sene ahbabáq ábóraq kékre. Wehyoqka ah íre nora peh wewega túbíginserah mi kegá kaweq ahmé íre nogówe. Segá ahriahri anotah sunkíkírirabeq mía míageheéna Manikánka mitaq sene máhriq arítáráire.

<sup>14</sup> Éhrámataté áhwárawe mó mitaqté sínáhbúwá mó mahtaqté sínáhbúwá sure sure abapete téhtaré ání wenawíq Ínókutaq seawehraruwe. Manikánka mi aní iwíah atowana wega teiu keyabé naho naho mahraréna, Tagariáhro. Itene Wahnhnseq we míéhrabeqte íópeqté kerekka áhnte kereq tuoneherawoe.

<sup>15</sup> Segá túírataq Manikánka ómi keyábé ehweh aritena sainsuena moke ahbabáq ke Manikánsabe ahqáho atáh kewé kamah arinkéhe. Mi kegá Manikánsabe ahqáho atera ahbabáq aruqaruréra Manikánsabe íre kaweq ahbabáq éhwéh éhruruonsabé wega anotahtaq kamah arinkéhe.

<sup>16</sup> Teiú kék sirupipeq umehi ke méra, Íre kawerire irare irareo ke míahwe. Seye suwahbeh ahbabáq miraéra seyensabé iwíah iwíah éra píribahriéra seye síwíq pankerera seyene iwíah miraigeheéra mó keyábé ehnenehne arítáhwe.

### *Anehe tanahráqsábé irari ehwéhne.*

<sup>17</sup> Néne iyahnabo anímáríno, itene Wahnh Sísa Karahéga wene ehweh teri terinige-heéna wehuke eqmarowe. Manikáne Awanka mina eqmaro ke iwíah aritowara anehe tanahráqsábé teiátówe. Sene ehweh ahreraq matíahro.

<sup>18</sup> Eqmaro kega aiq mahraréra, Anehe tanahráqmé seye suwahbeh ahbabáq miraira kegá aiq pútaq ehwéhnsábé awiréh atagéhe urowe.

<sup>19</sup> Urowara amahnága mina tahnsa ke míahwana sene péhe éhwéhniká Sísa tagariáh kék sainkowe. Manikáne Awanka mi ke íre iwíah aritahnara peh wehukene iwíah iwáhnorigehe.

<sup>20</sup> Néne iyahnabo anímáríno, Iteitega Sísane kaweq sansá ambubu atawéq tábúsoqme sehgióro. Manikáne Awanka séhréh aitahnaq púreq aruqaruroro.

<sup>21</sup> Maniká Iteriboga itensabé arutaboiri puaq wene ehweh kawerue ireq sehgióro. Itene Wahnh Sísa Karahéga itensabé arutaboiréra mókake oga mía míorabeq móitankéhe. Mi tanáhráqsábé áwénunéq wene ehweh kawerue ireq sehgióro.

<sup>22</sup> Manikáne ehwehnsabé aiq pútaq ehwehpómo iwíáho ke séhréh ariteq tábúsoqme síwáhnororo.

<sup>23</sup> Itega toráh aginai topáh sokeráhnserah árahinabomo iwíáho ke iraipéq pokiyehboq apubúue séhréh ariteq síwáhnororo. Mó ke ahbabáq keyabé áhreéq irutaboiroro. Wehukeníká náwíbagi korósí sukleyabe awahriehnserah mi kené ahbabáq sansa iuwahriáhnaq pehragahro. Sene ahbabáq sansa iuwahriáhnaq pehragéq peh seyensabé irutaboiroro.

### *Manikánsabe iwíah iwíah ateq wenawíq pankerone i ehwéhne.*

<sup>24</sup> Ahbabáqka ite saiqnariehnehboq Maniká Iteriboga kawerue wahnahnaitahráhire. Ite wereq méq mó oga míáhna tanáhráq peh kaweqtaq méq irupipeq eyoyóigeheéna Maniká Iteriboga wahnahnaitankéhe.

<sup>25</sup> Maniká Iteribo webataq Manikáne. Wereq itene Wahnah Sísa Karáhéreqka ite meirera aiq kaweraitehye. Wega nahomé, amahnágawé, mókakewe, ahriahri kiotaiki Wahnáh ánínéna págegeue wahnah wahnahnire. Wensabé iwíáh íwíáh ateq wenáwíq pankerone. Ahriahri pankeraneheqmúne. Aiq mire.

## Sokigi

### Ebeq sáhnsahwe ahtebé ehwehne.

Sónine naruoga we Pátímósi marákórápéq saiqnariotaq wenawanka tagówana Sísaga áhnte naneqmarí sokigi awuwana tagówe. Mi tanáhráqmé Sísansabé aiq pútare ató kene naruoga se anotahtaq síwioqnowe. Sóniga sehiranú ehweh áwahewé Sísa Karáhé anotah Wahnáh ánínéna moke wene naruoreq owainawanseq saiqnariankehe. Wega mi arámbéhří parabarúéhrana moke Sísansabé aiq pútare atera wene sánsá íre susa peh ambubu atiéhra kewe Manikánka síwíq pankerena wereq ahriahri mía míageheéna kaweraritankéhe.

### Sísa Karáhéga Sóni sokigi awu ehwehne.

<sup>1</sup> Naho kopípéq ko ehwéh Sísa Karáhéga amahnága ábóraq maréhre. Téhwe Manikánka mah ehwéh Sísa teawena wene arambehrio ke sokigi arinkeheéna mókake ábóraragína naneq teawátaire.

Íné Sóni Sísane arambehriu aní múge. Sísa Karáhéga wene íopeqté ání eqmaréhrana mah ehwéh sokigi aníraná sehiranuge.

<sup>2</sup> Íné Sóniga Manikáne ehwehnkakáq Sísa Karáhéga sokigi aní éhwéhnkákáq moke sehiranue teiníe.

<sup>3</sup> Manikánka wene ehweh iwíáh aintéhrana sehiranuge. Mah ehwéh mó kegá irageheéna sáhnsahwe terí ánínsábé Manikánka, Kawerone atéhrana iwíáh iwíáhire. Mah ehwéh irera sehgiro kereqsabé Manikánka, Kawerowe aritéhrara iwíáh iwíáhowe. Mah ehwéh aiq pútaragína tanáhráq áhníbóráni puara iwíáh iwíáhowe.

#### *Sóniga abapete téhtaré Sísa tagaríáh kéhíná suwahpeq siu pahsí sehiranú ehwehne.*

<sup>4</sup> Ite Esia marákórápéqté ké abapete téhtaré Sísa tagaríáh ké iteruwahpeq iteruwahperue míáhwe. Itega irageheéna íné Sóniga mah pahsí sehiranue íúge.

Manikámé naho mía míáu anínéna amahnága moq ména mókakeakáq peh mía míaina tuinawire. Wega wahnah wahnahnitaq íopeqté ké abapete téhranítégá wene auranabi-ahtapeq mía míawe. Sereq Sísa Karáhéreq Maniká Iteriboreqka itensabé sirutaboi aitera séhréh aitera itene iru ukiq ítahwe.

<sup>5</sup> Sísa Karáhé marakóipeq míotaq Wenabone sánsá sokigi aiená Wenabone ehweh pahsuowe. Manikánka Sísa ebeq iriwe organúq atowana Sísaga moke mah marákóípéqté wáhnáhmári kiotaikéna wahnahnarítéhre.

Wega itensabé arutaboiraitena itene ahbabáqka ite saiqnariaraita wene korahq tunka ite kaweraitáráire.

<sup>6</sup> Maniká anotah Wahnáh ánínéna Sísane Abowá míéhre. Wene animári méq wene ehweh mibeq mahbeq aritona ke míageheéna Sísaga ite kaweraitáráire. Sísa Karáhéwé anotah anínéna págege sansá mira aruqarurinsabé ahriahri iwíáh iwíáh atone. Aiq mire.

<sup>7</sup> Tagaríáhro. Wega íopeqté piribirroyahnkakaq tuinawire. Tuinaraq ómi mah kehiná kéhínánká we tagagehe. We sehsabíó kega moq tagagehe. Mah kehiná kéhínánká we tagéra áhreéra ibisaneherawoe. Teiúnserah ábóraraginawire. Aiq mire.

<sup>8</sup> Maniká, moke miraorahi anínká mahraréna,

Íné ebeqte aní ména

íné moq anehete aní múge ire.

Webataq Maniká míre. We naho mía míáu anínéna amahnága moq ména mókakeakáq peh mía míaina tuinawire.

#### *Sóniga Sísa Karáhé tagó ehwehne.*

<sup>9</sup> Íné Sóni iteruwah uge. Sísane sánsá sehgiunayabé mó kegá itereq ínéreq íwíognahwe. Sísa itene Wahnahne arambehri kawerue miraéq áwénunúne. Mókake wega wah-nah wahnahnirabeq moraráq mía míaoneheqmúne. Manikáne ehwehnkakáq Sísa Karáhéga sokigi aní éhwéhkákáq teri terinuraunsabé sega íné kaqme wáhnaupéqté kéné marakórapeq, Pátámósa marákórápéq móíntárówe.\*

<sup>10</sup> Manikáne wéhékáhtáq Wenawanka iwíáh aintehrana néniwanka tagehrana inehep-eqte anotah ewhéh íróge. Író éhwéhmé pembíahnka tahnsa éhwéhne.

<sup>11</sup> Mi ehwéhká mahraréna, Arenawanka tageh naneqsabé púkuipéq sehiranue abapete téhtaré kékíná suwahpeq

Sísa tagariáh ké momiwíuriáhrabeq nário. Épésa suwahpeq, Síména suwah-peq, Pégámúma suwahpeq, Táiyátáira suwahpeq, Sáhrísi suwahpeq, Pírárepia suwahpeq, Áráóríisia suwahpeq, miraue mi kehiná suwahpeq Sísa tagariáh ké momiwíuriáhrabeq nário ire.

<sup>12</sup> Nário irana íné tení ání taganieéna pabeqme tagéna abapete téhtaré kawe q aráhmú, kóraraté miraia aráhmú tagoge.

<sup>13</sup> Áráhmuwarí kéhrabeq ákáhpi wehukení úkú ani iriwe ména íre wahto korósí sukiwe miéhre. Kaweq arétí, kóraraté miraia áréti wene ákáhnababí kéhrana tagoge.

<sup>14</sup> Wene ayahqnonkakaq ayahrankakáq anotah tabérábééna sipisípiqne áyó tahn-sanéna piribírioyah tahnsane. Wene aurame anotah irárehnserahne.

<sup>15</sup> Wene aigáramé káhpahga aurehtehrinsrahne. Wene ehwehme anotah wanínká ahkuaq ahkuarinsrahne.

<sup>16</sup> Wene ayah púpeq abapete téhtaré wéhyóq táhtotiéhre. Éberiopéq éberiopérue áwéhria póká wene áwéhipeq kéhrana auranabiah pópoqnahga anotah tehréna wéhékáhnabubu anotah patáhgá téhrehnserahnire.

<sup>17</sup> Téhreh serahnirana íné Sóniga we tagéna wene aigárapí inahnsubena pusa ání tahnsa míoge. Pusa ání tahnsa míóganá wene púpeqte áyáhtáté íné táhtorena ínénabe, íre áhreúno. Íné ebeqte ání múde. Íné anehete ání múde.

<sup>18</sup> Ínéwé oga mía míau ání múde. Íné pukéna amahnága oga mía míaugah tagáhne. Mókakeakáq oga mía míainauge. Pükérapeqté kiákáq irapeqté kiákáq matióge.

<sup>19</sup> Amahnága tagáhna naneqme mókake anehe tanahrág sína naneq moke sehiranúno.

<sup>20</sup> Niyah púpeq abapete téhtaré wéhyóq matiógah tagáhne. Abapete téhtaré kóraraté miraia aráhmú tagáhne. Minawarimé áwahe teawiníe. Abapete téhtaré áráhmú ume abapete téhtaré kékíná suwahpeqte Sísa tagariáh kékabé íraruge. Abapete téhtaré wéhyóre ume íopeqté kégá abapete téhtaré kékíná suwahpeqte Sísa tagariáh kéráq auráq matiáhwe ire.

## 2

### *Épésa suwahpeqte Sísa tagariáh ké teriu ehwéhne.*

<sup>1</sup> Íné ehweh tení áninká mó mahraréna, íopeqté áninká Épésa suwahpeqte Sísa tagariáh kéráq auráq matiéhre. Mi anínsábé mah ewhéh sehiranue teawo.\*

Niyah púpeq abapete téhtaré wéhyóq matawéna kawe q aráhmú, kóraraté miraia aráhmú kékítáq nogena mah ewhéh teawiníboq iro.

<sup>2</sup> Arega miraona sansá aiq tagarióge. Are abobiah taebewe arambehrona sansá aiq tagarióge. Arega néne sánsá íre susa peh kawerue sehigionana tagarióge. Arega ahbabáq keyabé íre awahbehme aiq tagarióge. Péhepehenéra, Manikánka ite aiq eqmaq

\* **1:9:** Pátámósa marákowé pehgáriq marákóéna sóreq waní ákáhpi kékre. Aroma kegá iwíahéra, Mi marákowé peh karábusi kené metabue uwe. \* **2:1:** Sísaga Sóninsabé, Néne ehweh íopeqté ké terio éna íre mi kené sánsá peh mibeqté síosipeqté kéné sánsásabé iwíahéna pahsuowe.

íuwéhnsábé itene ehweh íráhro uro keyabé sene ehweh áhwárawe tagé sene péhe sánsá pahsuahne.

<sup>3</sup> Néne arambehri miraónayabé mó kegá áwíoqnarowah arega anetaníbo íre iwíáhia peh néne sánsá ambubu atawé kawerue sehgonana tagarióge.

<sup>4</sup> Peh morá íre tábúsoq marahna naneq teawiníe. Arega ínénabe téh aiq pútare aintárónaraq anotahtaq arutaboiraintaróne. Amahnága túbáh ague írakaunóne.

<sup>5</sup> Arega ínénabe téh anotahtaq arutaboiraintárónayabé iwíáhue tagáhno. Amahnága arega peh ákáhtaq arutaboiraintahnayabé íre kaweróne. Minayabe iwíáhue tagé téh miraurónanserah mónkakáq miraúno. Arega mó iwíáh íre inaraq areba kure areba kék áráhmú sabiwianauge.

<sup>6</sup> Mó kawéq sánsá matiahne. Níkóra kéráh kéné sánsá sehgó kégá ahbabáq miraonsabé awahriehrana íné moq mi sansánsábé nuwahriehre.<sup>†</sup>

<sup>7</sup> Íre parosa áhréákáq ánino, Manikáne Awanka Sísa tagariáh ké teí éhwéhmé kawerue iro. Ahbabáq kiotaikina anínsábé, Íné Manikáne kaweq matábúrápéqté áwánká ara oga mía míaorahi será náhno ataníe ire.

### *Síména su wahpeqte Sísa tagariáh ké teriu ehwéhne.*

<sup>8</sup> Íné ehweh tení áninká mó mahraréna, Íopeqté áninká Síména su wahpeqte Sísa tagariáh kéráq auráq matiéhre. Mi anínsábé mah ehwéh sehiranue teawo.

Íné ebeqte aní múge. Íné anehete aní múge. Íné pukéna iriwe oga úkurau aní múge. Mah ehwéh teawiníboq iro.

<sup>9</sup> Íre kaweq sunúq surainsabé arene arupipeq umehirana tagoge. Are tabonah aní míahnana tagoge. Móneakáq ménsámehnsánkakaq íre kékre énayabé peh morá ínéga náwú náneqmarí áhnte matiahne.

Péhenéra, Asiu anímári múne irare kegá are éhruruowana íróge. Se íre Asiu kahnáhnéra peh owainawa kahnáh míáhwe.

<sup>10</sup> Segá are áwíoqnehrataqmé íre áhreúno. Owainawanka mirainaga mó kegá ite táhmaro karábúsiipéq itagéhe. Mi tanáhráq wega áhwárawe tagáhnana nayáhnkú wéhékáh íre kaweq sunúq kanawire. Are pukina tanáhráqkákáq néne sánsá íre susa peh kawerue sehginaraq oga mía mía apéq awiníe.

<sup>11</sup> Íre parosa áhréákáq ánino, Manikáne Awanka Sísa tagariáh ké teí éhwéhmé kawerue iro. Ahbabáq kiotaikina anímé anehe puké tanahráq iraipéq íre kaqauwankéhe. Írakaumo ire.

### *Pégámúma su wahpeqte Sísa tagariáh ké teriu ehwéhne.*

<sup>12</sup> Íné ehweh tení áninká mó mahraréna, Íopeqté áninká Pégámúma su wahpeqte Sísa tagariáh kéráq auráq matiéhre. Mi anínsábé mah ehwéh sehiranue teawo.

Éberiopéq éberiopérue áwéhria poká néne níwéhipeq kékre. Mah ehwéh teiníboq íratiáhro.

<sup>13</sup> Owainawanka arenawahpeq wahnah wahnahnime aiq tagoge. Néníwíqsabe íre ayehitégurégúia peh néne ehweh teri terinurone. Arenawahpeqte mátábúwé aiq tagarióge. Owainawanka arene mátaburapeq mía míairara ínénabe su wahrieh kegá néne ehweh pahsutai aní Ántípa subiq sutotaq arega néne sánsá íre susa peh kawerue sehgonana tagoge.

<sup>14</sup> Arega íre tábúsoq marahna sansá teawiníe. Are míahnarabeqte mó táhmaro kegá Pérámane sansá sehgówe. Ísara kegá ahbabárigéheéna Pérámaga naho Péráki péhe sánsá sokigi awuwe. Sokigi awuwana Pérákiga Ísara ke ahbabáq sansa sokigi ariuwara sega péhepehe maníkánsábé titirue náwú tahutáhúq néra mó kené weh ahre pehipi abariowe.

<sup>15</sup> Are míahnarabeqte mó táhmaro kegá Níkóra kéráh kéné sánsá ahbabáq sansa sehgówe.

<sup>†</sup> **2:6:** Níkóra kéró kegá síwáhnoréra, Péhepehe maníkánsábé iwiáh íwíáhoro aritera, Mó kené weh ahre abariowe éra síwáhnoruwe.

<sup>16</sup> Mi ahbabáq sánsá sue peh kaweq sansánúno. Íre mirainaraqmé mótaq areba kure níwéhipeqté pótáráté mi ahbabáq ké apiwe kamah ariníe.

<sup>17</sup> Íre parosa áhréákáq ánino, Manikáne Awanka Sísá tagariáh ké teí éhwéhmé kawerue iro. Ahbabáq kiotaikina anímé íópeqté tópáh, kopésúó tópáh náwiníe. Ínéga o awíq taberábe ebáhtáq sehiranarena náwiníe. Wehukega mi awíq íre ahtabahwana peh morá matiéh áninká ahtebankehe ire.

### *Táiyátáíra su wahpeqte Sísá tagariáh ké teriu ehwéhne.*

<sup>18</sup> Íné ehweh tení áninká mó mahraréna, Íópeqté áninká Táiyátáíra su wahpeqte Sísá tagariáh kéráq auráq matiéhre. Mi anínsábé mah ehwéh sehiranue teawo.

Íné Manikáne ahninkáwáéna néne niurame ira tahnsáne. Néne nigarámá káhpahga aurehtehrinserahne. Mah ehwéh teiníboq írátiahno.

<sup>19</sup> Arene sánsá moke tagarióge. Arega ínénabe aiq pútare ainte mó keyábé arutaboiré séhréh aritahne. Arega néne sánsá íre susa peh kawerue sehgonana tagarióge. Arega anehepeqte árámbéhriónaga arene ebeqte árámbéhri kiotaikirana tagoge.

<sup>20</sup> Peh morá íre tábúsoq marahna naneq teawiníe. Mó ahré íní wenawíq Sésébérie. Wega areba ména néne arambehri ke péhe ehwéh síwáhnorire. Wega péhenéna, Íné Manikáne ehweh iraru iní múge éna Manikáne arambehrio keyábé síwáhnoréna, Itega mó kené weh ahre pehipi abarioro. Péhepehe maníkánsábé titirue nárie tahutáhúq nahro síwáhnorire. Mi pehe sánsá síwáhnoriraq arega íre ahqáho atahne.

<sup>21</sup> Wene ahbabáq sansa suankeheéna peh áwé tagogana wega mi ahbabáq sánsá sueyabe íre awahbehre.

<sup>22</sup> Minayabe mi iníseq we abario kereqsabé, Awahreoro aritená anotahtaq kamah ariníe. Sene ahbabáq sansa íre susa peh mirairataq kamah ariníe.

<sup>23</sup> Mi iní kéráh ánímári subiq suaníe. Subiq suahnaq ite Sísá tagariáh kégá tagéq Maníkánka wehukene sirupipeq sene iwíáhipeq aiq tagariéhre ahtebagehe. Itega miraira sansá tagéna morání moráníne saime náiníe.

<sup>24</sup> Ite Táiyátáíra su wahpeqte Sísá tagariáh ké táhmaro itega mi ahbabáq ínínsá sánsá íre sehgiówe. Mó kegá mi ahbabáq sánsánsábé iraréra, Owainawane kopésúéh ehwéh íráhro ewaq itega ahqáho aritahwe. Itensabé mó págege ehwéh íre aitaníe.

<sup>25</sup> Peh morá itega írátíah sánsá íné túona tanáhráqkákáq kawerue sehgióro.

<sup>26</sup> Ahbabáq kiotaikéna néne sánsá anehe tanáhráqkákáq kawerue sehginga anínsábé, Mah kehiná kékíná wahnahnarito ataníe.

<sup>27</sup> Nániboga ínénabe, Wahnah arito aintéhnserah wensabé moq, Wahnah arito ataníe. Wehukenínká anotah sahtáté kunuba subiqme piteruéhnserah ahbabáq keraq wahnahnaritankéhe.

<sup>28</sup> Wahnhahnarítéh ání anotah wehyóq tuembíná náwiníe.

<sup>29</sup> Íre parosa áhréákáq ánino, Manikáne Awanka Sísá tagariáh ké teí éhwéhmé kawerue iro ire.

## 3

### *Sáhrísi su wahpeqte Sísá tagariáh ké teriu ehwéhne.*

<sup>1</sup> Íné ehweh tení áninká mó mahraréna, Íópeqté áninká Sáhrísi su wahpeqte Sísá tagariáh kéráq auráq matiéhre. Mi anínsábé mah ehwéh sehiranue teawo.

Abapete téhtaré íópeqté kégá ínéba mía míaowana abapete téhtaré wehyóq táhtotawéna mah ehwéh teawiníboq iro. Arene sánsámé moke tagarióge. Mó kegá are tagéra, Kaweq ogamé sansanóna aní móne atáhwana ínéga mó iwíáhéna, Are pusa aní míahne uge.

<sup>2</sup> Minayabe irigue arega moke matiahna sansá, íre soraq suahna sansá ambubu atawé tábúsoqme sehgio. Arene sánsá aiq tagarióge. Moke arene sánsánsábé Maníkánka, Íre tábúsoq marahne íwíáhire.

<sup>3</sup> Arega írátóna ehwéhnkákáq ahtebarona ehwéhnkákáq mónkakákáq iwíáhue tagé kawerue sehgio. Ahbabáq sansa sue kaweç sansánúno. Arega íre mirainaraq areba séna kamah awinauge. Aebó áninká iwíáhue sinserah are íre tagariahna tanáhráq areba sinauge.

<sup>4</sup> Ite Sáhrísi suwahpeqte Sísa tagariáh ké ite mó táhmaro íre ahbabária peh kaweqtaq míah púaq taberábe korósí aneranerarueq ínéreq moráráq nogigéhe.

<sup>5</sup> Ahbabáq kiotaiki aní taberábe korósí sukiwe míahno atena oga mérapeq awaq míéhra ke síwíq kéhrabeq wenawíq íre sorahruaníe. Írakaumo. Peh Nániboreq íópeqté kereqpa wenawíq pahsuaníe.

<sup>6</sup> Íre parosa áhréákáq ánino, Manikáne Awanka Sísa tagariáh ké teí éhwéhmé kawerue iro ire.

### *Pírárépía suwahpeqte Sísa tagariáh ké teriu ehwéhne.*

<sup>7</sup> Íné ehweh tení áninká mó mahraréna, Íópeqté áninká Pírárépía suwahpeqte Sísa tagariáh kéráq auráq matiéhre. Mi anínsábé mah ehwéh sehiranue teawo.

Íné kaweqtaq mía míau anínéna aiq pútaq sansá áwahe aní múge. Tébítiga naho wahnahnúnserah ínéga págegeue wahnah wahnahnuge. Ínéga síú ónsá mó kegá íre paiqmarahráhowe. Ínéga paiqmaró ónsá mó kegá íre sioráhowe. Mah ehwéh teawiníboq írátiahno.

<sup>8</sup> Arene sásá moke tagarióge. Are peh ákáhtaq págege aní míahnana tagarióge. Arega néníwíq anehepeq íre susa peh néne sásá kawerue sehgionana tagarióge. Minayabe arene auranabiahtapeqté ónsá siatóvara mó kegá íre paiqmarahráhowe.

<sup>9</sup> Owainawansabé iwíáh iwíáh ataneheéra momiwío kegá péhepehenéra, Ite Asiu ke úne ewe. Ínéga miraoro unka mi kegá areba séra arene aigárátáq káuqmunue arensabé iwíáh iwíáhéra ínéga arensabé nirutaboirume ahtebagehe.

<sup>10</sup> Mah kehiná kékíná áhwárawe taganieéna íre kaweq sunúq mah marákó mårákó sinawire. Arega néne ehweh peh kawerue sehgiona puana are auráq matiáhnaga mi sunúqká are íre áwioqnankehe.

<sup>11</sup> Ínéga apubúue sinauge. Arega arambehriuronayabé merona apéq mó kegá meyéhboq ambubu atawé arega ahtebáhna sansá kawerue sehgio.

<sup>12</sup> Ínéga ahbabáq kiotaikina anínsábé Manikánsabe iwíáh iwíáh atáh náhtápéqté náhwíáhnsánsé tahnsa míahno ataníe. Wega mi nahupéqté ahriahri íre tueyokinkehe. Írakaumo. Maniká Nánibone mátabu o Sarúsarama suwahpeq íópeqté tuinawire. Mahna teawú mátábú áwíqkakaq Maniká Nánibo wenawíqkakaq néne o niwíqkákáq ahbabáq sansa kiotaikina aníné anonkataq sehiranaraníe.

<sup>13</sup> Íre parosa áhréákáq ánino, Manikáne Awanka Sísa tagariáh ké teí éhwéhmé kawerue iro ire.

### *Áráórísía suwahpeqte Sísa tagariáh ké teriu ehwéhne.*

<sup>14</sup> Íné ehweh tení áninká mó mahraréna, Íópeqté áninká Áráórísía suwahpeqte Sísa tagariáh kéráq auráq matiéhre. Mi anínsábé mah ehwéh sehiranue teawo.

Ínéwé aiq pútaq ehwéh áhwáro anínéna Manikáne ehweh tábúsoqme teri terinu anínéna peh aiq pútaru aní múge. Ínéwé moke Manikánka miraro naneqmarí áhwáro aní múge. Mah ehwéh teawiníboq iro.

<sup>15</sup> Arene sásá moke tagarióge. Arewe íre tuituiragire. Are íre osoréhre. Írakaumo. Are peh ákáhtaq osoréhnsábé íre nuwahbehre.

<sup>16</sup> Arewe peh ákáhtaq osoréh púana wehukenínká wene áwéhipeqté kahqmuri topáh kisúéhnserah are níwéhipeqté kisuanauge.

<sup>17</sup> Arega mahraré, Íné áhnte moné matawéna áhnte mensáméhnsá kéhre ene. Mó naneqsabé íre tabonahuge ene. Írakaumo. Arewe íre kaweqtaq míahne. Ahtebah kegá are tagéra, Múgu wahgu aníne iwíáhowe. Are tabonah aura pira aní mé pehrákora ání míahne.

<sup>18</sup> Minayabe teawiníboq iro. Are íre tabonah aní míankehboq áhnte kaweq naneq, kóra moné ínéba sebaiqmaro. Are pehrákora ání míahnana mó kegá tagehranka ayehitéhnehoé taberábe korósí úbíq miankéhboq sebaiqmaro. Arene auranka kawerue tagankehboq máráhsíni sebaiqme aurapi abaqmaro.

<sup>19</sup> Ínéga nirutaboiru kegá ahbabárotaq sensabé ehweh aritená kamah aríúge. Miraunsabé arene ahbabáq apubúue sue néne kaweq sansá sehgio.

<sup>20</sup> Tagariahno. Ínéga onsaraq iriwe ména pakobakoéna áhrabuge. Néne ehweh íréh áninká onsa siintahnana kibekue weba míanie. Wereq kiwéta táhutahuroyehe.

<sup>21</sup> Ínéga kiotaikéna Nániboga wahnah wahnahnirabeq wereq tútuue míóge. Ahbabáq sansa kiotaikína anínsábé, Máho teawiníe. Ínéga wahnah wahnahnurabeq tútuue míónserah arega moq ínéreq mahtaq wahnah wahnahnurabeq tútuue míahno ataníe.

<sup>22</sup> Íre parosa áhréákáq áníno, Manikáne Awanka Sísa tagariáh ké teí éhwéhmé kawerue iro ire.

## 4

### *Sega íópeq Manikánsabe iwíáh iwíáh atáh éhwéhne.*

<sup>1</sup> Anehe íné Sóniga mó tagogana íópeqté ónsá sírana tagoge. Írátáu ehwéh pembíáh tahnsa ehwéhká mó mahraréna, Anehe sína naneqsabé sokigi awiníboq íópeq kio ire.

<sup>2</sup> Íópeq kio irana Manikáne Awanka págege aintéhrana néniwanka tagéna wahnah wahnahnirabeqte síáhráq tútuue míéh ání tagoge.

<sup>3</sup> Aptahtáró ebáh síwíq sásípa, kóníriáni, éméra kéhre. Kóníriáni ebáhmé tautáúq ebáhne. Éméra ebáhmé sehenáh ebáhne. Patahga sásípa ebáhtáq patahirana téhrehnserah mitaq tútuue míéh ání wenaneq téhrehre. Tautáúq ebáh, kóníriáni ebáhnká tautáúrinserah mi aní wenaneq tautáúrire. Wahnah wahnahnirabeqte síáhráq ora pewe abugeqnáh atawéna sehenáh ebáh, éméra ebáhnká tahnsanue téhrehre.

<sup>4</sup> Wahnah wahnahnirabeqte síáhráq mó siáhwári abugeqnáh atiehrara 24 abóawáh wéhgá mitaq tútuue míáhwe. Se taberábe korósí úbíqme méra kaweq ayáhúq, kóraraté miraia áyáhúq sukiwe míáhwe.

<sup>5</sup> Wahnah wahnahnirabeqte síáhráqté sokaeqsuena ehwehnéna puruburuire. Mi siáh abiahtapeq abapete téhtaré kánéqká téhrehre. Mi kanéqmárimé Manikáne Awane.

<sup>6</sup> Mi siáh abiahtapeq anotah kawéhú tahnsa náneq, timano tahnsá náneq kéhre.

Itaréitaré oga míáh ká wahnah wahnahnirabeq abugeqnáh atawéna siuranabiahtapeqkakáq sinehepeqkakáq áhnte aurá kéhre.

<sup>7</sup> Ebeq oga míéh ká úrinsi iá tahnsa káne. Anehe oga míéh kámé awehq kaho tahnsane. Mó anehe oga míéh kámé wehukeníne auranabiah masa káne. Mó sinehe oga míéh kámé kúpapaqka puahmbuahninserah tahnsá káne.

<sup>8</sup> Mi itáréítáré oga míáh kámári mó ka mó kanue abapete morá óé kéné moke sinonkataq áhnte aurá kéhre. Sene oe awenahpeq moq áhnte aurá kéhre. Segá wéhékáhnkakaq inokáhpeqkakáq ahriahri mahraréra,

Maniká itene Wahnahnká moke miraorahire.

We peh kaweqtaq míá míai aníne.

We peh kaweqtaq míá míai aníne.

We peh kaweqtaq míá míai aníne.

We naho míá míáú anínéna

amahnága moq ména

mókakeakáq peh míá míaina tuinawire ewe.

<sup>9</sup> Wahnah wahnahnirabeqte síáhráq tútuue míeh áninká ahriahri mía míaire. Mina oga míah kámárínká wenawíq pankerera wensabé, Kaweróne atera iwíáh íwíáh atáhwe.

<sup>10</sup> Sega iwíáh íwíáh atáhtáq 24 abóawáh wéhgá wahnah wahnahnirabeqte síáhráq tútuue míeh ánibá sewe. Sega ahriahri mía míai áníné auranabiahtapeq séra sene kaweq ayáhúq mitaq marera káuqmunue, Arebataq anotah aní móne éra wensabé iwíáh íwíáh atáhwe.

<sup>11</sup> Iwíáh íwíáh atera igonkónue mahraréra,  
Arewa Maniká itene Wahnah mone.

Are anotah kawéq ání móne.  
Arensabé iwíáh íwíáh ateq arenawíq pankerone.

Anotah Wahnáh ání móne.

Arega moke miraorahóne.

Arega moke kéh náneq miraróne.

Are awahbeh sansámé mirarónana  
amahnágaákáq kagaire.

Minayabe arensabé iwíáh íwíáh atone éra igonkónowe.

## 5

### *Wehukega íre pugerahráhi pukú éhwéhne.*

<sup>1</sup> Íné Sóniga tagogana wahnah wahnahnirabeqte síáhráq tútuue míeh áníné ayah púpeq sehirankakaq pukú táhtotíehrana tagoge. Mi pukú abapete téhtaré únkúméhráté táhpatainsabé pehipi íre pugerahráhire.

<sup>2</sup> Pehipi íre pugerahráhinsabé íopeqté págege anínká anotah ehwéhnue mahraréna, Peh kaweqtaq mía míai anínká mi unkúmeh kéhsuena mi pukú pugerahráhire. Ahriahri kaweqtaq mía míai anímé insega pugerahráhiro ue kasenire.

<sup>3</sup> Insegá pugerahráhiro irana íopeqkákáq mah marákó márakóípéqkákáq pusa ké míáhrabeqkákáq púku pugeqme tagahrahi aní írakaunire.

<sup>4</sup> Mi pukú pugeqme tagahrahi aní írakauninsabé ínéga áhnte ibisoge.

<sup>5</sup> Áhnte ibisogana peh morá abóawáh wéhgá ínénabe, Íre ibisáhno. Tagáhno. Súra kahnáh ání míéhre.\* We úrinsi iá tahnsa aní míéhre. We Tébítine anahwa ména kiotaiki aní púana mi abápété téhtaré únkúmeh awehraq kéhsuahráhena mi pukúípéq tagahrahire ire.

### *Sóniga Sipisípiq Áráhq tagó ehwehne.*

<sup>6</sup> Ínéga tagome subiq suto Sipisípiq Áráhq míéhrana tagoge. Wahnah wahnahnirabeq oga míah kámári míáhrabeq ákáhpi iriwe míéhrara aboawah wehgá abugeqnáh atíáhwana tagoge. Sipisípiq Áráhqne ayahqnopeq abapete téhtaré pówéh kéna abapete téhtaré áúrá kéhre. Mi aurámárimé Manikáne íopeqté ké wóe. Wega mi ke mah marákó márakóípéq eqmaq suowe.

<sup>7</sup> Mi Sipisípiq Áráhqka kure wahnah wahnahnirabeqte síáhráq tútuue míeh áníné ayah púpeqte pukú meyéhre.

<sup>8</sup> Wega meyéhtáq itaréitaré oga míah kámáríNSEQ 24 abóawáh wéhreqka Sipisípiq Áráhqne auranabiahtapeq arehunseraráq méra káuqmunowe. Sega moke morá moránue kítah tahnsá náneqkakáq kóraraté miraia párétahákáq matawéra káuqmunue igonkónowe. Kaweq kunkúni naneq párétahipéq kéhre. Minawé Sísa tagaríah kégá púrero ehwéhne.

<sup>9</sup> Káuqmunue igonkóno kegá o igónkónéra mahraréra,  
Arega miraónaga mi pukú mewe kéhsuahráhóne.

Are subiq sutotaq Manikáne animári míageheé  
arene korahqtaté wehuke insahwé aritahne.

Arega íre peh morá kékíná insahwé aritahne.

\* **5:5:** Sísa kahnáhmé Súra kahnáh móe.

Mó kehiná suwahpeqte kéákáq  
 mó ehwéhkákáq kéákáq  
 mó kuasa mó kuasa kéákáq  
 mah marákó márakóípéqté kéákáq insahwé aritahne.

<sup>10</sup> Arega insahwé aritahna kegá  
 Manikáne ehweh mibeq mahbeq arítáh ké úkéra  
 wahnahnéra mókake mah marákó márakóípéq wahnahnaritagéhe éra igonkónowana  
 írátíóge.

*Sipisípiq Áráhqabe iwíáh íwíáh ate ehwéhne.*

<sup>11</sup> Íné Sóniga mó tagogara áhnte peh íregárataq íópeqté kégá igonkónowana íróge. Peh  
 áhnte tahušení kégá igonkónéra míáhwe. Wahnah wahnahnirabeq itaréitaré oga míáh ká  
 iriwe míáhrabeq 24 abóawáh wéh míáhrabeq íópeqté kégá abugeqnáh atawéra iriwe méra  
 igonkónowe.

<sup>12</sup> Segá anotahtaq igonkónéra mahraréra,  
 Subiq suto Sípísípiq Áráhqmé anotah aníne.  
 Minayabe wega págegeue wahnahnéra  
 áhnte kawéq náneq matawéna  
 ahtebia ánínéna moke mirorahire.  
 Moke mirorahi puaq wenawíq pankereq,  
 Kaweróne ateq iwíáh íwíáh atone ewana íróge.

<sup>13</sup> Manikánka moke miraro naneqmarínká igonkónowana íróge. Íópeqmé mah marákó  
 márakóípéqmé pusa ké míáhrabeqme sóreq wanípípéqmé moke mibeqté naneqmarínká  
 igonkónowana íróge. Igonkónéra mahraréra,  
 Wahnah wahnahnirabeqte síáhráq tútuue míéh ánínseq  
 Sipisípiq Áráhqseqne síwíq pankereq,  
 Kaweróye ariteq ahriahri iwíáh íwíáh aritone.  
 Anotah pagégé áníté míehya puaq  
 ahriahri itensabé iwíáh íwíáh aitone ewana íróge.

<sup>14</sup> Írogara itaréitaré oga míáh kámárínká, Aiq pútaróne ewara aboawah wehreqka  
 marakóipeq káuqmunue sensabé iwíáh íwíáh arítáhwe.

## 6

*Sipisípiq Áráhqka púkuraq unkumeh kéhsúéh éhwéhne.*

<sup>1</sup> Íné Sóniga tagogana Sipisípiq Áráhqka matiéh púkúráq abapete téhtaré unkúmeh kékre.  
 Sipisípiq Áráhqka náhmbáh 1 unkúmeh kéhsúéhrana peh morá oga míéh kánká anotahtaq  
 puruburu tahnsánué mahraréna, Mahbeq súno ire.

<sup>2</sup> Mahbeq súno irana taberábe osérág tútuue míéh áninká iq matiéhrana tagoge.  
 Tagogana wahnah kené ayahuq wene ayahqnotaq suki atéhrana pokue, Mó ke  
 subipáhraruanieéna pokire.

<sup>3</sup> Sipisípiq Áráhqka náhmbáh 2 unkúmeh kéhsúéhrana mó ogá míéh náneq kanká,  
 Mahbeq súno irana íróge.

<sup>4</sup> Írogana mó osé tautáuq osé ábóraragire. Manikánka mi osérág tútuue míéh ání págege  
 atena anotah ebeh poká awena wensabé, Mah marákó márakó pokue kaweq sunúq  
 parabaruo ire. Mibeqté kégá ebehéra we subiq súéhigeheéna págege atena ebeh poká  
 awire.

<sup>5</sup> Sipisípiq Áráhqka náhmbáh 3 unkúmeh kéhsúéhrana mó ogá míéh náneq kanká,  
 Mahbeq súno irana íróge. Irena tagogana mó osé pabusa osé ábóraragire. Mi osérág tútuue  
 míéh áninká ménsámehsá agehmare naneq matiéhrana tagoge.

<sup>6</sup> Itaréitaré oga míáh kámári iriwe míáhrabeqte wehukenínká tahnsa ehwehnirana íróge. Mi ehwéhká pabusa oséráq tútuue míéh ánínsábé mahraréna, Arega pokue arene arambehri miraé ehwehráhna tanáhráq sinkehe. Ehwehráhna tanáhráq púana táhutahuqme áhnte moné áwíroneherawoe. Óríwi awanká sónkákáq náhníáq sera sonkákáq pehragáhno.\* Íre apiaro irana íróge.

<sup>7</sup> Sipisípiq Áráhqka náhmbáh 4 unkúmhéh kéhsúéhrana mó oga míéh kánká, Mahbeq súno irana íróge.

<sup>8</sup> Irena tagogana mó osé wiehq osé ábóraragire. Óseraq tútuue míéh ání wenawíqmé Puké Anine. Mó aní wenawíqmé Iraipéqté Áníne. Wega Puké Ani anehe sire. Segá miraóyanka ebehéra áhnte pukowe. Segá miraóyanka ehwehrerara áhnte mó ke pukowe. Segá miraóyanka wehuke mó naneq awáhré mó naneq awáhréue pukowe. Segá wehuke suboráho naneq kamári eqmarehyara mi kamárínká áhnte mó ke subiq súáhwara pukowe. Mi anítégá mah kehiná kékíná itaréitaréráq saraqmarera apahtáró sárásá pehragéra peh morá sárásá moke subiq suehye. Miraóyara áhnte ke pukowe.

<sup>9</sup> Sipisípiq Áráhqka náhmbáh 5 unkúmhéh kéhsúéhrana Manikáne tahbe tehnopeq tagoge. Manikáne ehwehnsabé íre ahqáho atasa peh kawerue sehgiera wene ehweh tábúsoqme teri terinuro kewé mó kegá mí kawéq ké subiq sutowara sensiwamarí mitaq míáhwana tagoge.

<sup>10</sup> Tagogara sensiwamarínká anotahtaq mahraréra, Itene Wahnahno, arega moke wahnah wahnahnóne. Arega ahriahri kaweqlaq mía míáé peh aiq pútaq sansá miraóne. Mah marákóípéq míáh kégá ite iubiq sutonsabé ahkake ehweh arite ayahq maraníbo ewe.

<sup>11</sup> Ewara íópeqté kégá mó aní mó anínue íre wahto taberábe korósíwári náriera mahraréra, Pehgáriq tanáhráq ahrenahro. Itene naruoga ite iubiq sutonserah segá itereq arambehrio kerek iteruwahrahreq subiq súéhrataq anehe Manikánka ehweh aritankéhe ewe. Omaq sitéhra ke pukirataq wega ayahq marankéhe.

<sup>12</sup> Sipisípiq Áráhqka náhmbáh 6 unkúmhéh kéhsúéhrana anotah maríire. Wéhékáhte ió nahonáh pabusa ambéki únáh tahnsa úkire. Úkirana inokáhpeqte ió tubugonahgoitaq korahbagirana tagoge.

<sup>13</sup> Tagogana anotah soírírirana awanká ánáh pururuqnaginserah íópeqté wéhyóqmárínká marakóípeq megire.

<sup>14</sup> Megirara máhti sobuonserah ió moq sobuue tabanagire. Tabanagirana moke sáwéhwari móbeq agire. Moke sóreq waní ákáhpi kék marákó moq móbeq agire.

<sup>15</sup> Mi tanáhráq mah marákóípéqté wáhnáhmárnseq anotah wehwárínseq ebeho kené kiápéténíwarínseq áhnte monéákáq kerek tauntahu wehwárínseq arambehrriraq saiqnariáh kerek arambehriyabé ápeq meyhá kerekka pehbeheráh pokue táhmaro kegá íre ambarúnkákáq mátáípéq tabanagowara mó táhmaro kegá sáwéhrapeq ónapipéq tabanagowe.

<sup>16</sup> Tabanagéra sáwéhakaq ebahnkakáqsabé mahraréra, Ite akariue iubiq suo. Wahnah wahnahnirabeqte síáhráq tútuue míéh ánínseq Sipisípiq Áráhqseqka itensabé anotahtaq abiahnsa aitehyansabé akariue iubiq suo.

<sup>17</sup> Kamahina tanáhráq aiq si puara inseréhga kaweqlaq míáhraho ewe.

## 7

*Manikánka 144 táhúséni (144,000) Ísara ke omaq sito ehwéhne.*

<sup>1</sup> Íné Sóniga tagogara íópeqté itaréitaré kégá mah marákó márakkó ayehré ayehré iriwe méra sóiriq saiqnariáhwe. Sóiriqka marakóakaq sóreq wanínkákáq awankánkakaq sóiriríneho éra saiqnariáhwe.

---

\* **6:6:** Árúka 16.6 aigárápéqté éhwéh tagáhno.

<sup>2</sup> Mó íópeqté áninká ió kiembogirabeq kírama tagoge. Tagogana wega Maniká mía míai aníné mähki aritahráhi naneq ayahpi matiéhre. Matawéna wega íópeqté itaréitaré ké marakóakaq sóreq wanínkákáq íre kaweraruahráhi keyábé anotahtaq mahraréna,

<sup>3</sup> Marakóakaq sóreq wanínkákáq awankánkakaq amahnága pehragahro. Ebeqme Manikáne arambehri kené siyehitaq wene mähki sehiranaritanéhe. Arítáhnaraqmé anehe mi naneqmarí íre kawerarúáhro ire.

<sup>4</sup> Íópeqté kégá siyehitaq Manikáne mähki sehira meyáh kewé 144 táhúséni (144,000) kee ewana íróge. Ísara kewé airápété téhtaré káhnáh míáhwe. Mähki arítah kégá moke mó kahnáh mó kahnáhnu sehiranarítáhwe.

<sup>5</sup> Mähki sehiranarítáh kégá Súra kahnáh 12 táhúséni (12,000) ke sehiranaritera Árúbéni kahnáh 12 táhúséni ké sehiranaritera Ágáti kahnáh 12 táhúséni ké sehiranaritera

<sup>6</sup> Áséra kahnáh 12 táhúséni ké sehiranaritera Nápátári kahnáh 12 táhúséni ké sehiranaritera Mánáse kahnáh 12 táhúséni ké sehiranaritera

<sup>7</sup> Símíóni kahnáh 12 táhúséni ké sehiranaritera Árígá kahnáh 12 táhúséni ké sehiranaritera Ísákah kahnáh 12 táhúséni ké sehiranaritera

<sup>8</sup> Sébúrúna kahnáh 12 táhúséni ké sehiranaritera Sósépa kahnáh 12 táhúséni ké sehiranaritera Pénsámíni kahnáh 12 táhúséni ké sehiranarítáhwe. Miraue kahnáh sehiranarítáhwe.

### *Áhnte kegá Manikánsabe iwíáh íwíáh atáh éhwéhne.*

<sup>9</sup> Íné Sóniga togagara áhnte ke, íre sáhnsahoráho ke moráráq iriwe míáhwe. Mó kehiná su wahapeqte kéákáq mó kuasa mó kuasa kéákáq mah marákó márakóípéqté kéákáq mó ehwéhkákáq kéákáq mó tahnáró mó tahnáróue moráráq iriwe míáhwe. Wahnah wahnahnirabeqte síáhráq tútuue míéh anínseq Sipisípiq Áráhqseqne siuranabiahtapeq iriwe míáhwe. Segá íre wahto taberábe korósí sukiwe méra awanká ánáh táhtotawéra pore poreowe.

<sup>10</sup> Pore poreéra anotahtaq mahraréra, Wahnah wahnahnirabeqte síáhráq tútuue míéh ánime itene Manikáne. Wereq Sipisípiq Áráhqseqka insahwé aitáróyansabé amahnága kaweqtaq mía míáúne ewe.

<sup>11</sup> Wahnah wahnahnirabeqte síáhráq tútuue míéh anínseq aboawah wehreq oga míáh kámárinseq míáhtáq moke íópeqté kégá abugeqnáhnu iriwe míáhwe. Iriwe méra wahnah wahnahnirabeqte síáhráq tútuue míéh áníné auranabiahtapeq arehunseraráq méra káuqmunue Manikánsabe iwíáh íwíáh atáhwe.

<sup>12</sup> Iwíáh íwíáh atera mahraréra, Aiq míre. Maniká itene Wahnah anotah anínéna ahtebia ánine éq wensabé, Kaweróne ateq wenáwíq pankereq ayahmaq atone. We págege tauntahu aní míéh púaq ahriahri wensabé iwíáh íwíáh atone. Aiq miraoneheqmúne ewe.

### *Amahnága mah kahnáhné síérime aiq parabagire i ehwéhne.*

<sup>13</sup> Peh morá ábóáwáh wéhgá ínénabe kasenéna, Íre wahto taberábe korósíákáq ké inseréhbo? Se eheqte seo ire.

<sup>14</sup> Eheqte seo irana ínéga wensabé, Anotah aní móne. Are aiq tagariahne uge. Ugana wega ínénabe, Mi kené naruoga síwioqnéra kamah arítowara sene korósí Sipisípiq Áráhqne korahqipéq pabeq paberurowana taberábe agire.

<sup>15</sup> Minayabe Manikánsabe iwíáh íwíáh atáhrabeq méra wene auranabiahtapeq mía míáéra wéhékáhnkakaq inokáhpeqkakáq wensabé iwíáh íwíáh atáhwe. Wahnah wahnahnirabeqte síáhráq tútuue míéh áninká sereq míéh púana wahnahnaritená séhréh arítéhre.

<sup>16</sup> Se mókake íre sirupibiinawire. Íre tahbobóoneherawoe. Patahga íre kamah arinawire. Osoréh írágá íre tabisuanawire. Írakaumo.

**17** Wahnah wahnahnirabeqte Sipisípiq Áráhqka se wahnahnaritankéhe. Wahnah aritená oga mía míorahi waní arahno sokigi arinana Manikánka siurapite áqnú moke sorahuankéhe ire. *(Aisaia 4.5,6)*

## 8

### *Náhmbáh 7 unkúmeh kéhsúéh ehwehne.*

**1** Sipisípiq Áráhqka náhmbáh 7 unkúmeh kéhsúéhrara pehgáriq tanáhráq, ákáhtaq ahwáh íópeq íre ehwehnia peh ehiya míáhwe.

**2** Mi tanáhráq sótaikitaq íné Sóniga tagogara abapete téhraníté íópeqté ké míáhwe. Manikáne auranabiahtapeq iriwe mía míáéra abapete téhtaré pémbíáh meyáhwe.

**3** Meyáhwana mó íópeqté áninká sure Manikánsabe iwiáh íwiáh atáh táhbérápéq iriwe ména kóraraté miraia párétah matiéhre. Mi parétahípéq kaweq kunkúni pahuráh ira tehrana áúnirana kaweq kunkúnire. Áhnte kunkúni naneq náwéwana íópeqté áninká minaakaq Sísa tagariáh kéné púreq ehwéhnkákáq morábí ánkáru Manikánsabe iwiáh íwiáh atáh táhbé kóraraté miraia táhbérápéq titiratéhre.

**4** Titiratéhrana áúninkakákáq Sísa tagariáh kéné púreq ehwéhnkákáq íópeqté áníné párétahipéqté kiená kire kire Manikáne auranabiahtapeq kíre.

**5** Kírama íópeqté áninká Manikánsabe iwiáh íwiáh atáh táhbérápéqté írá tarasa mewena we matiéh párétahípéq obenkíq marena mah marákó márákóípéq tuparúéhre. Tuparúéhtáq puruburuéna anotah ehwéhnéna sokaesuena máriire.

### *Íópeqté kégá pembiáhno ehwéhne.*

**6** Abapete téhtaré íópeqté kégá abapete téhtaré pémbíáh matawéra pembiáhneneherawoe.

**7** Náhmbáh 1 íópeqté áninká pembiáhnirana obiaurankakákáq iraakákáq korahqkakákáq mah marákó márákóípéq tuparúéhrana sehekáhnkakákáq marakóakaq apahtáróráq saraqkirana peh morá sárásá tagirana téhtaré peh kíre. Peh kíhrana uwaruntúmé moke tagire.

**8** Náhmbáh 2 íópeqté áninká pembiáhnirara anotah iráreh sawéh tahnsa naneq sóreq wanípípéq tuparúéhrana wání apahtáróráq saraqme kéné peh morá sárásá korahq úkirana téhtaré sárásá peh kíre.

**9** Wánipeqté ménkáméhnká peh morá sárásá pukowana téhtaré sárásá peh oga míáhwana sípi peh morá sárásá wáninkowana téhtaré peh kíre.

**10** Náhmbáh 3 íópeqté áninká pembiáhnirana kánéqka téhrnserah anotah wehyóq téhréna íópeqté ísígue megire. Wání apahtáróráq saraqme kíhraraná wehyoqka wání aroipéqkákáq arahnotaqkakákáq peh morá sárásátáq surahire.

**11** Mi wehyóq áwíq Kítabeh Maráhsíníe. Mi wehyóqká ísígue márunsurahitaq wání peh morá sárásá kítabeh waní úki puara áhnte kegá pukowe.

**12** Náhmbáh 4 íópeqté áninká pembiáhnirana pópoqnahakákáq íónkakaq wehyoqmarínkákáq apahtáróráq saraqme kíhrana peh morá sárásá subírana íre téhria peh sunkíkíragire. Minayabe wehekáhnabubu peh ákáhtaq téhrerhana inokáhnabubu peh ákáhtaq íónitehrana wehyoqka peh ákáhtaq téhrehre.

**13** Íné Sóniga tagogana íópeq anotah kuqnúnká paqme kéné anotahtaq mahraréna, Mó íópeqté ánítogá pembiáhnenehera irataq anotah kamáh arieneherawoe éna uwo uwo uwo ire. Uwo uwo éna, Mah marákó márákóípéq míáh kékabé iwiáhunka nirupipeq anotah uméhire irana íróge.

## 9

### *Íre ambarúnkákáq mátáípéqté kíyábé éhwéhne.*

<sup>1</sup> Náhmbáh 5 íopeqté áninká pembiáhnirana íopeqté wéhyóqká ísígue mah marákó márákóípéq márunsurahiraná tagoge. Tagogana íre ambarúnkákáq mátáípéqté kí kéhrana wehyoqme áwíre.

<sup>2</sup> Áwírana wehyoqka onsa sírara abe kekíowana áhnte auninserah áunká íre ambarúnkákáq mátáípéqté kírana wéhékáh íotaqkakáq moke íopeqkákáq akari agirana sunkíkíragire.

<sup>3</sup> Sunkíkírirara áunirabeqte áhnte wahráhqmárinká séra mah marákó márákóípéq abae agowe. Mi kamári págege kamári méra wehiboyanka wehuke kamah arínserahnowe.

<sup>4</sup> Mi kamáriñsábé, Uwaruntúnkakaq awanká ánáhakaq moke kíréh náneqkakáq pehra-gahro. Peh morá siyehitaq Manikáne máhki íre kéké sítwíqnahro aritera sensabé,

<sup>5</sup> Wehuke subiq súéhboq peh moberíah íótáq sítwíqnahro arítáhwe. Wehiboyanka wehuke pehnserah mi kamárinká wehuke pahwana síérire.

<sup>6</sup> Áhnte síérirara mi tanáhráq pukéyabe suwahbehrara íre miraorahowe. Segá, Árahue pukinabugamo éra iwíáhue kabarowana írakaunire.

<sup>7</sup> Mi wahráhqmárímé ebehorahi oséwári tahnsa míáhwana tagoge. Siyahqnopeq wah-nah kené ayahuq, kóraraté miraia áyáhúq sukiwe míáhwana sene siuranabiah wehukene siuranabiah tahnsane.

<sup>8</sup> Sene siyahrame ahreroné íre wahto ayáhrá tahnsanirana sene sítewhwe wehuke parahi ka úrinsi iáné áwéh tahnsane.

<sup>9</sup> Sene ahrame káhpahraq kíhnserah ahráne. Áhnte ebehorahi oséwárinká sabirue nogí káhrégá pehbeheráh pokirana anotah ewhéhnire. Mina inserah mi wahráhqmárinká anotahtaq ehwehnove.

<sup>10</sup> Wehiboyanka pehnserah mi kané éhwegáránká pahrahire. Moberíah íótáq sene éhwegáránká wehuke pehrana síérire.

<sup>11</sup> Wáhrahqmaríné wahnahme íre ambarúnkákáq mátáípéqté ánine. Íbaru ewhéh Asiu kené ehwehme mi wahráhqmáríné wahnahme wenawíqmé Ábárónie. Káríki kené ehwehme mi awíqmé Wehuke Íre Kawerarítéh Ánine.\*

<sup>12</sup> Ebeqte íre kaweq sunúq aiq parabagirana téhtaré mó íre kaweq sunúq ábóraraginæ.

### *Ósewarítáq tútuue míáh kégá mirao naneqsabé ehwehne.*

<sup>13</sup> Náhmbáh 6 íopeqté áninká pembiáhnirana Manikáne auranabiahtapeq kéké táhbé, kóraraté miraia táhbé itaréitaré pówéhwári itaréitaré ayehráq kéhrana mitaqte ehwehni-rana íróge.

<sup>14</sup> Írógana mi ewhéhká pembiáhní anínsábé mahraréna, Íyúpétísa waní aroipéq mitaq itaréitaré íopeqté kéké táhru táhrue saiqnariáh kéké pugeq suo irana íróge.

<sup>15</sup> Segá mi opéqkákáq iónkakaq wéhékáhnkakaq áhwahakáqsábé aiq áwénunowe. Mi tanáhráqsábé áwénunowana pugeq súéhrara mah kehiná kéhíná apahtáróráq saraqme míáhwana peh morá túíná subiq suaneheéra pokowe.

<sup>16</sup> Pokowara sene ebeho kéké áhnte míáhwe. Segá ósene abobiahtaq tútuue méra peh íregáritaq 200,000,000 ke míáhwe irana íróge.

<sup>17</sup> Néniwanka tagehtaq ebeho keakáq sene óseakáq mahraue tagoge. Mi ke káhpahraté miraia síótí sukiwe míáhwana tagoge. Mó siótíwárimé tautáúrirana mó siótíwárimé kókomuirana mó siótíwárimé wiehq kéhrana tagoge. Ósewaríné siyahqnomé úrinsi iáné ayahqno tahnsane. Iraakáq áunkakaq osoréh ébáhnkákáq sene áwéhipeqté sire.

<sup>18</sup> Iraakáq áunkakaq osoréh ébáhnkákáq ósewaríné áwéhipeqté sinka mah kehiná kéhíná peh morá túíná subiq súéhre.

\* **9:11:** Mi anímé owainawane.

<sup>19</sup> Ósewarínká sene síwéhrate wehuke kamah ariera éhwegárátáté subiq súáhwe. Sene éhwegárá wehene ayahqno tahnsanéna wehuke kamah aríewe. Peh morá túiná subiq súáhwara téhtaré túiná íre pukowe.

<sup>20</sup> Íre puko kegá sene ahbabáq sansa peh sehgiówe. Sene ahbabáq sansa íre susa peh siyahtate mirao naneqmarínkákáq owainawamarínkákáqsábé iwíáh iwíáh arítáhwe. Siyahnkaratáté mirao naneqme kóraakáq káhpahakáq ebahnkakáq awankánkakaq mewe miraowe. Miraowana minawarinká íre tagahrahire. Íre irahráhire. Íre nogoráhire. Írakaunire.

<sup>21</sup> Mi kegá sene ahbabáq sansa íre susa peh mó ke subiq suera ánéhgie sansankákáq ahgora sansánkákáq miraowe. Sega mó kené ahre weh abariéra mó kené ménsámhensá aebóowe. Mi ahbabáq sánsámári íre susa peh matíáhwe.

## 10

### *Anotah íópeqté áninká miraú ehwehne.*

<sup>1</sup> Íné Sóniga tagogana mó aní, págege íópeqté áninká mibeqté tuirana tagoge. Tagogana wehukenínká ambanta úbíq míéhnserah wega írabúyá úbítíéhrana wene ayahqno abobórähpeq ora periéhrana wene auranabiah patah tahnsanéna wene aigará ira tehre.

<sup>2</sup> Wega pehgáriq pugesa pukú wene ayahpi matawéna mó aigará sóreq wanípípéq abasarawéna mó aigará mah marákórág abasarawéna anotahtaq sawaiire.

<sup>3</sup> Úrinsi iánká ehwehninserah anotahtaq sawaiire. Wega sawaiitaq abapete téhtaréráq puruburuire.

<sup>4</sup> Puruburuitaq, Ínéga sehiraninie utaq íópeqté éhwéhnká mahraréna, Sawaii ehwéhmé íre sehiranúno. Mi ehwéh peh epéq éhwéh kankehe ire.

<sup>5</sup> Peh epéq éhwéh kankehe irana sóreq wanítáq marakóraq abaseh aninká wene púpeqte áyah íoperue pankeréhre.

<sup>6</sup> Wene púpeqte áyah íoperue pankeréna Maniká oga mía míai aní wenawírue ehwehnire. Manikánka íópeqkákáq mitaq kék náneqmarínkákáq mirarena mah marákó márakóákáq mitaq kék náneqmarínkákáq mirarena sóreq wanínkákáq mipéq kék náneqmarínkákáq moke mirarowe. Íópeqté áninká Maniká áwírue mahraréna, Mah tanáhráq aiq parabaginaire. Manikánka mó íre íwénuninkehe. Írakaumo.

<sup>7</sup> Írakaumo éna mó mahraréna, Náhmbáh 7 íópeqté áninká pembíahnínaraq Manikáne épéqté éhwéh aiq pútaraginkehe. Wega naho íre teriasa peh wene ehweh iraru ke teriuwe ire.

<sup>8</sup> Irana íópeqté éhwéhmé íre sehiranúno éwéh éhwéhnká ínénabe mó mahraréna, Sóreq wanítáq marakóraq abaseh aninká pugesa pukú wene ayahpi matiéhre. Mi pukú koweo ire.

<sup>9</sup> Koweo irana íópeqté ánípá kure wensabé, Káriq pukú menio ugana wega ínénabe, Mewe náhno. Nehnaraq arene áwéhipeq sahq tahnsanínana arene arupipeq kítabanae ire.

<sup>10</sup> Irana ínéga íópeqté áníné ayahpíte pukú mewe noge. Níwéhraq sahqka teinserahni-rana nirupipeq áhnte kítabehre.

<sup>11</sup> Kítabehrana wega ínénabe, Manikánka, Irarúno atahnah arega mókake sína naneqs-abé irarinkehe. Mah kehiná kékhnámé sene marakówé, sene ehwehme, sene wahnah-marímé miraira naneqsabé irarinkehe ire.

## 11

### *Ehweh pahsúéhra anítéyábé éhwéhne.*

<sup>1</sup> Agehmare naneq pegiqnáhnkara tahnsa naneq nániéna ínénabe, Manikánsabe iwíáh iwíáh atáh náhtápéqkákáq mibeqté táhbéákáq iriwe koagehmaro. Mibeq Manikánsabe iwíáh iwíáh atáh kék sáhnsaho.

<sup>2</sup> Manikánsabe iwíáh iwíáh atáh náhtápéqté mátábú íre agehmaro. Mitaq wáhnaupéqté ké wéhuwa nárírara sega 42 ió Sarúsarama suwahpeq méra mi matábú íre kaweraruagéhe.

<sup>3</sup> Mi tanáhráq néne ehweh pahsúéhra aníté págege aritahnara sega nahonáh kórósí aneranerue méra áhnte ió 42 ió pahsuqme irarigehe ire.

<sup>4</sup> Téhtaré óríwí áwánkánkákáq téhtaré áráhmúákáq mah marákó márakóípéqté Wáhnáhné auranabiahtapeq kéhrara ehweh pahsúéhra aníté mi awánkátáré tahnsa móye. Mi aráhmúráré tahnsa móye.

<sup>5</sup> Mó kegá mi aníté íre kaweq sansá arítéhrataq mi aníténé síwéhipeqté íragá mi ke tabiq suanawire. Mi aníté íre kaweq sansá arítéhra kewé miraue pukigehe.

<sup>6</sup> Manikánka págege arítéhrara mi anítégá moke Manikáne ehweh pahsúéhra tanáhráq ibonsabé, Ahqáho atéhrataq íre ibonsorahire. Sene págege ewhéhnká moke wánimé korahq waní úkorahire. Sene págege ewhéhnká moke mó naneq mó naneq íroke naneqmarí mah kehiná kékínápá serahire. Sega suwahbáhnaraq mi sansámári miraigehe.

<sup>7</sup> Manikáne ehweh pahsúéhra tanáhráq parabagínaraq íre ambarúnkákáq mátáípéqté áwéhq poeráhpká kiembogue mi anítéreq ebehéna se kiotaikue subiq suankéhe.

<sup>8</sup> Subiq suahnaraq sene sinonka Sarúsarama suwahpeq anotah ahtápéq ábóraq kanae. Mi kehiná suwahpeqsabé pabeqme ewhéhmé Sóróma suwahpeqkakáq Ísípi marákórápéqkákáre. Mitaq sene Wahnhahnka awankátaq táhpawe pukúwe.

<sup>9</sup> Manikáne ehweh pahsúéhra aníténé sinonka apahtáró wéhekáhnkákáq mó ákáhtaq wehekáhnkákáq ómiga tagagehe. Mó kehiná suwahpeqte kéréq mó kuasa mó kuasa kéréq mó ewhéh mó ewhéhnkákáq kéréq mah marákó márakóípéqté kéréqka tagéra mi aníté maisareyabe ahqáho aritagéhe.

<sup>10</sup> Mi aníté íre pukirataq sene ewhehnka ahbabáq ke síwíognagehe. Síwíognáhna puara mi aníté pukirataq marakóípeqté kégá iwíáh iwíáhéra ábáhréra sene iyahnabo anímári ménsámehsá pehipi nárigéhe.

<sup>11</sup> Apahtáró wéhekáhnkákáq mó ákáhtaq wehekáhnkákáq parabagirana Manikánka mi aníté organúq sitahnara iriwe míéhrataq ómi se tagah kegá anotahtaq áhre agigehe.

<sup>12</sup> Áhre agirataq íopeqté éhwéhnká mi anítéyábé, Mahbeq kíotao ínara sene naruoga tagehrataq sega íópeq írabúyápipeq kibekoyeherawoye.

<sup>13</sup> Mi tanáhráq anotah mariitaq mi kehiná suwahpeq peh morá áyéhráq íre kawerarúéhtáq abapete itaréitaré áyéhráq peh kéhre. Máríinka áhnte ke 7 táhúséni (7,000) ke subiq súéhre. Peh awahoraq míáh kégá mina tagéra anotahtaq áhreéra Maniká íopeqté áninsábé iwíáh iwíáh atáhwe.

<sup>14</sup> Mi sunúq aiq parabagire. Mó íre kaweq sunúq anehe áhnibórá sinawire.

### *Aboawah wéhwárínká Manikánsabe iwíáh iwíáh atáh éhwéhne.*

<sup>15</sup> Náhmbáh 7 íopeqté áninká pembíáhniraná íopeqté éhwéhmárínká anotahtaq mahrarirana íróge. Mi ewhéhmárínká mahraréra, Manikánka eqmaréh ání itene Wahnhahnka mah marákó márakó wahnhahné arámbéhrí aiq awaq míéhre. Wega ahriahri wahnhahninkéhe ire.

<sup>16</sup> Manikáne auranabiahtapeq 24 abóáwáh wéhgá tútuue míáhrabeqte irigéra sene siuranabiah maraipérue Manikánsabe iwíáh iwíáh atera

<sup>17</sup> mahraréra,

Maniká itene Wahnhahn,  
arega moke miraorahón.

Areve naho míá míáé  
amahnág moq míá míáone.

Arega págegeue miraé  
mah marákó márakóípéq wahnhahné arámbéhrí  
aiq awaq meronayabé, Kaweróné atone.

<sup>18</sup> Arensabé suwahrieh kegá abiahnsanowah

arega moq sensabé abiahnsanónana  
 pusa ké sainsue tanahráq aiq sire.  
 Arene arambehri ke ápeq nárie tanahráq aiq sire.  
 Arene ehweh irare kereq  
 Sísa tagariáh kereq arensabé áhteno kereq  
 arene sánsá sehgíó kereq ápeq nárinkéhe.  
 Arega anotah kereq íre síwíqkakaq kereq  
 monserahnue iwíáhue tagé ápeq nárinkéhe.  
 Mah marákó márákó íre kawerarítáh ké  
 sainsue tanahráq aiq sire ewe.

<sup>19</sup> Mi tanáhráq íópeq Manikánsabe iwíáh iwíáh atáh náhtápéqté ónsá sírana Manikánka irarú ehweh kék púkú pökísí ábóraq kékre. Kéhrana sokaesuena anotah ehwéhnena puruburue máríirana anotah ibó obiaurankakáq íbónsirana tagoge.

## 12

### *Karahrabah tahnsá náneq kansábé éhwéhne.*

<sup>1</sup> Íópeq anotah naneq ábóraragirana tagoge. Íné Sóniga tagogana anotah iní patahraté aneranerue ména inokáhpeqte ío wene ai awenahpeq kékhrana wene ayahqnotaq airápété téhtaré wéhyóqmáránkánká áyáhúq sukiriéhrana tagoge.

<sup>2</sup> Mi iní kía ména wene ani maqmianai puana érinsabé anotahtaq uwo uwoire.

<sup>3</sup> Mó anotah naneq íópeq ábóraragirana tagoge. Íné tagogana tautáuq awasa káráhrábáhnaba ábóraragirana tagoge. Nayáhnkú pówéhkákáq abapete téhtaré áyáhqnónkákáq kékhrana mi ayáhqnótáq abapete téhtaré wáhnáh kéné ayahuq wene ayahqnomaritáq sukiriéhrana tagoge.

<sup>4</sup> Wene éhwegárátaté íópeqté wéhyóqmári subibinaruena mah marákóípéq tuparúéhrana mipéq sáhagire. Peh morá ákáhpite wéhyóqmári miraruéhrana ayehré ayehré kék wéhyóqmári peh kékre.

Mi inínká maqmianai aní nanieéna mi karáhrábáhnká mi iníné auranabiahtapeq ména áwénunire.

<sup>5</sup> We áwénunirana mi inínká animai maqmaréhrara sega mi aní apubúue tumeqmera Manikánka wahnah wahnahnirabeq móátáhwe. Mi anínká mah kehiná kékhná págege sahtáté págegeue wahnah wahnahninkeheéna Manikánka aiq omaq atéhre.

<sup>6</sup> Mi inínká maqmarena pehbeherá abatapi pokire. Wega káírabeq Manikánka wene máhriq kaweraréhrana wega apahtáró ópéq mó opéq ákáhtaq mitaq kowiéhrana Manikánka we wahnahnatéhre.

<sup>7</sup> Íópeq anotah ebéhowana tagoge. Íópeqté aní mi keráq wahnahni aní wenawíq Máhíkérie. Wereq we kéráh íópeqté kéréqka mi karáhrábáhnseq wene íópeqté kéráh kéréqka ebehowe.

<sup>8</sup> Íópeqté kéréqka mi karáhrábáhnseq we kéráh kéréq kiotaikéra kaqsúah púara íópeq mó íre míahrahewe.

<sup>9</sup> Íre míahrahowara íópeqté kégá mi karáhrábáhnseq we kéráh kéréq mah marákóípéq tuparúáhwe. Mi karáhrábáhmé we owainawamaríné wahnah mire. Nahomé we wehe ména we mó awíq Séténie. Wega mah kehiná kékhnánsábé péhe éhwéh teriu púara íre kaweq sansá miraowe.

### *Sísa tagariáh kégá owainawa kiotaiko éhwéhne.*

<sup>10</sup> Íópeqté anotah ehwéhnirana íróge. Mi ehwéhnká mahraréna, Wéhékáhnkakaq inokáhpeqkakáq owainawanka Maniká Iteribone auranabiahtapeq iteruwahrah ehweh arita aritaire. Amahnága íópeqté kégá owainawa íópeqté tunkaqsúahwana Maniká, ite

meirena kaweraitéh áninká págegeue wahnah wahnahni tanáhráq aiq sire. Ite meirena kaweraitankehéna Manikánka omaq atéh ání anotah aní úkéna págege aní úkire.

<sup>11</sup> Iteruwahga mah marárakóípété oga me tanahráq íre iwíáh íwáhia peh aiq pútaq ehwéh pahsuera Sipisípiq Áráhqne korahqtaté owainawa kiotaikowe. Sipisípiq Áráhqne ehweh sehgiunayabé iubiq suaneherabomo éra se puke tanahráqsábé íre áhreéra owainawa kiotaikowe.

<sup>12</sup> Íópeq míah kéo, minayabe iwíáh íwáhoro. Mah marákó mårákóípéq míah kéo, owainawanka ite kamah ainayabé itega uwo uwooneheqmóe. Owainawanka tagehme peh wahto tanahráq kék púana anotahtaq taonsahéna iteba aiq sire ire.

<sup>13</sup> Karahrabahnka tagehme, Íné mah marákóípéq tuparúáhwe éna animai maqmaréh íní subiq suanieéna káréhre.

<sup>14</sup> Mi iní anotah kuqnúné téhtaré óé áwéwana wega karahrabah auwena abatapi paqmena pokire. Mitaq apahtáró ópéq mó opéq ákáhtaq mi iní kirabo atagehe.

<sup>15</sup> Karahrabahnka mi iní wáninkinkehéna wání mugiq súéhrana anotah waní pewe wáninka mi iní káréhre.

<sup>16</sup> Káréhrana marakóga mi iní séhréh atanieéna marakó tahtahragirana mi waní mipéq tupekire.

<sup>17</sup> Mi iníné animárimé Manikáne ehweh sehgió kéreq Sísa éhweh terié kéreq míahwe. Míahwana karahrabahnka mi inínsábé anotahtaq abiahnsanéna mi iníné animárinseq ebehinieéna kogabaréna

<sup>18</sup> sóreq wanítápéq arahwéraq iriwe míéhre.

## 13

### *Kiembogi kanká mirai ehwéhne.*

<sup>1</sup> Íné Sóniga tagogana sóreq wanípípéqté anotah ka kiembogirana tagoge. Mi kamé abapete téhtaré áyáhqnónkákáq nayáhnkú pówéhákáq kéhrana tagoge. Mi powéhwárítáq nayáhnkú wáhnáh kéné ayahuq sukiriéhrana tagoge. Mi kané ayahqnomaritáq Manikánsabe éhruru atéh éhwéh sehira kéhrana tagoge.

<sup>2</sup> Mi kané págege anónkámé tanahraipéqté ká áwéhq pusíné anonka tahnsáne. Wene aigárámé anotah kané aigarár tahnsane. Wene áwéhwé úrinsi iáné áwéh tahnsáne. Karahrabahnka sóreq wanípípéqté kiembogi ka págege atena wene wahnah arámbéhrí awaq mio atéhre.

<sup>3</sup> Mi kané peh morá áyáhnótáq pukorahi nao káráírana wagirana mah kehiná kékhnánká kurináhnéra mi ka kéráhwe.

<sup>4</sup> Kéráhwana karahrabahnka mi ka págege atena, Wahnahnúno atéh púana mah kehiná kékhnánká karahrabahnsabé iwíáh íwáh atáhwe. Iwíáh íwáh atera kiembogi kansábé moq iwíáh íwáh atera mahraréra, Mi ka áhnte pagégé ká míre. Minayabe mi kamé insega we tahnsa míehro? Mi kanseq ebehínaraq insega kiotaikorahiro? Írakaumo ewe.

<sup>5</sup> Iwíáh atéhrana mi kanká wewensabé iwíáh íwáhi ehwéhnéna Manikánsabe éhruru atena 42 ió págegeue wahnahnire.

<sup>6</sup> Mi kanká Maniká áwíqkakaq we mía míairabeqkakáq íre kaweq ehwéh atena Manikánseq íópeq míah kékreqsabé siéhruru arítéhre.

<sup>7</sup> Owainawanka págege atowana mi kanká Maniká tagaríáh kék ebeh aritena kiotaikéna subipáhrarúéhre. Wega págegeue wahnahnéna mó kehiná suwahpeqte kékáq mó kuasa mó kuasa kékáq mó ehwéh mó ehwéhno keákáq mah marákó mårákóípéqté kékáq wahnahnarítéhre.

<sup>8</sup> Págegeue wahnahnarítéh púara mah kehiná kékhnánká mi kansábé iwíáh íwáh atagéhe. Manikánka mah marákó mårákó íre mirarotaq oga mérapeq awaq míéhra ke síwíq púkuipéq sehiranúwe. Sipisípiq Áráhq subiq súówana mó oga úkúwe. Mi pukúwé

wene púkue. Mi pukúípéq sensíwíq íre kéké ómiga kiembogi naneq kansábé iwíáh iwíáh atagéhe.

<sup>9</sup> Íre parosa áhréákáq kéo, kawerue íráhro.

<sup>10</sup> Mi tanáhráq Manikánka insebópoq karábúsiipéq míankeheéna omaq atahnaraq mó kegá mi aní meqmera móatagéhe. Pokatake kirasuqme subiq suagéheéna omaq atahnaraq mi aní pokatake kirasuqme subiq suagéhe. Maniká tagaríáh kéo, mi tanáhráqkákáq Manikánsabe aiq pútare ateq wene ehweh ambubu atawéq sehgióro.

### *Mó kiembogi kanká mirai ehwéhne.*

<sup>11</sup> Íné Sóniga tagogana mó kanká marakóipeqté kiembogirana tagoge. We káriq sipísípqué pówéhrare táhnsá wene ayahqnotaq kékhe. Anotah karáhrábáhnká ehwehní serahnire.

<sup>12</sup> Anehe kiembogi kanká ebeq kiembogi kané págege wahnáh arítéh árámbéhrí awaq míéhre. Awaq mena mah kehiná kékínánsábé, Náo wagi kansábé iwíáh iwíáh atáhro éna págege arítéhre. Págege aritena

<sup>13</sup> ótaq sansá págege sansánéna íópeqté irobinansabé, Mahbeq tuo iraritaq íópeqté irobina túírara áhnte kegá tagahwe.

<sup>14</sup> Tagahwana anehe kiembogi kanká ebeq kiembogi kané págege arámbéhrí awaq mena ótaq sansánire. Ótaq sansáni puara mah kehiná kékínánká wene péhe éhwéhnsábé aiq pútare atáhwe. Mó anínká ebeq kiembogi ka pokatake subírana pukéna oga úkire. Anehe kiembogi kanká mah kehiná kékínánsábé, Ebeq kiembogi kané píkisah mirareq, Minayabe iwíáh iwíáh atáhro arítéhre.

<sup>15</sup> Iwíáh iwíáh atáhro aritena ebeqte kané píkisah págege atéhrana píkisahga oga úkéna ehwehnire. Ehwehninka píkisahyabé íre iwíáh iwíáh atáh kék subiq súéhre.

<sup>16</sup> Anehete kanká mirarinka mah kehiná kékínánká sene siyah púpeqkakáq siyehitaqkakáq máhki meyáhwe. Wega moke anotah kereq íre sívíqkakaq kéréq áhnte moné kék kéréq tabonah kereq arambehriraq saiqnariáh kéréq arambehriyabé móne meyáh kéréq moke, Máhki meyáhro arítéhre.

<sup>17</sup> Mi mahkí ahqáho atáh kégá ménsámehnsá íre paiqmarahráhowe. Peh morá mi kané áwíqpópoq wene náhmbahpopoq máhki matíáh kégá ménsámehnsá paiqmarahráhowe.

<sup>18</sup> Teiú éhwéh iwíáhue tagahro. Ahtebahraho kegá mi kané náhmbahq ahtebahro. Mi nahmbáhqmé wehukeníné náhmbahq mire. Mi nahmbáhqmé mahraue 666 nahmbáhre.

## 14

### *Sipisípiq Áráhqne animárínká o igónkóno ehwéhne.*

<sup>1</sup> Íné Sóniga tagogana Sipisípiq Áráhq míéhrana tagoge. Wereq áhnte mó kereq 144 táhúséni (144,000) kereq Sáióna sawéhrápéq iriwe míáhwana tagoge. Sipisípiq Áráhq áwíqkakaq Wenabo áwíqkakaq mi kené siyehitaq kékhrana tagoge.

<sup>2</sup> Ahkuaq ahkuari wanínká uinserah ehwéhnéna anotah purúbúrúinserah íópeqté éhwéhniraná íróge. Mi ehwéhmé peh kaweq ehwéh áhnte kegá kítah subónserah ehwéhne.

<sup>3</sup> Segá Manikánka wahnah wahnahniabeq itaréitaré oga míáh káká míáhrabeq 24 abóáwáh wéh míáhrabeq iriwe méra o igónkónowe. Mó kegá mi igónkó íre ahtebahwara peh mi ke 144 táhúséni (144,000) kegá ahtebéra igonkónowe. Se marakóipeq míarotaq Sísaga wene korahqtaté insahwé aritena kawerarítáaire.

<sup>4</sup> Wehga ahbabáq ahréró íre abariéra peh kaweqtaq míá míáonserah mi kegá peh kaweqtaq méra Sipisípiq Áráhqka pokirabeq kéráhwe. Manikánseq Sipisípiq Áráhqseqka mi ke téh insahwé aritera kawerarítóye.

<sup>5</sup> Segá péhe éhwéh íre iraria peh kaweqtaq míá míáowe.

### *Apahránító íópeqté kégá pahsúó ehwéhne.*

<sup>6</sup> Íné Sóniga tagogana íópeq ákáhnabubu peh morá íópeqté áninká paqmíéhrana tagoge. Wega mah kehiná kékíná kaweq kagai ewhéh korerie arámbéhrí kékre. Mó kehiná suwahpeqte kéákáq mó kuasa mó kuasa keakáq mó ewhéh mó ewhéhkákáq kéákáq mah marákó mårákóípéqté kéákáq mi ewhéh korerie arámbéhrí kékre.

<sup>7</sup> Íópeqté áninká anotahtaq mahraréna, Manikánka ehweh aitená sainsue tanahráq aiq si puaq wensabé áhreeq iwíáh iwíáh atáhro. Íópeqkákáq mah marákó mårákóákáq sóreq wanínkákáq moke wání arahnonkakáq miraro aninsábé iwíáh iwíáh atáhro ire.

<sup>8</sup> Mó íópeqté áninká anehe séna anotahtaq mahraréna, Áhnte kehiná suwahpeq Pábíróni suwahpeq íre kaweragire. Moke mibeqté kégá miraonserah mah kehiná kékíná tagéra sene ahkaragára sansánowe. Píah néra ahbabáq ini abarionserah sega íre kaweq sansánowe. Minayabe Pábíróni suwahpeq aiq moke íre kaweragire ire.

<sup>9</sup> Mó íópeqté áninká sinehepeq séna anotahtaq mahraréna, Kiembogi kankákáq wene píksahakáqsábé iwíáh iwíáh atéh ání wene ayahnkarankákáq wene ayehtaqkakákáq máhki matiéh ání Manikánka mi aní kamah awinkéhe.

<sup>10</sup> Manikánka mi anínsábé anotah abiáhnsá atena irobinankakákáq osoréh ébáhnkákáqtáté kamah awinkéhe. Sipisípiq Áráhqseq moke Manikáne íópeqté kéréq tagahrabeq mi aní anotahtaq kamah awinkéhe.

<sup>11</sup> Uwo uwo orabeqte íráípéqté ahriahri áú kiegieire. Wehukega uwo uwoéra wéhékáhnkakaq inokáhpeqkakákáq íre ahrenahrahewe. Kiembogi kankákáq wene píksahakáqsábé iwíáh iwíáh atáh ké, máhki matíah kewé mitaq ahriahri mía míaigehe ire.

<sup>12</sup> Maniká tagariáh kéo, itega Sísansabé aiq pútare ateq Manikáne ehweh kawerue sehgóómé kawerowe. Teiú tánáhráqkákáq mi ewhéh ambubu atawéq Sísa kawerue kéráhro.

<sup>13</sup> Íné Sóniga írógana íópeqté éhwéhká mahraréna, Mahna teawú éhwéh sehiranúno. Manikáne arambehri sehgiera pukira kegá anehe iwíáh iwíáhighehe ire. Irana Manikáne Awanka moq ehweh mahraréna, Wega aiq irarire. Se pukirataq sene arambehriyabé ahrenagehe. Se pukirataq pehipi íre pukigehe. Írakaumo. Sene kaweq sansá mewera pokigehe ire.

### *Manikánka ahbabáq ke kamah arieyabe pabeqme ewhéhne.*

<sup>14</sup> Íné Sóniga mó tagogana taberábe piribíríoyáh ábóraq kékhrana tagoge. Piribirioyahtaq tútuue míeh ání wehukení úki anínéna wene ayahqnotaq kóraraté miraia áyáhúq sukirawéna wene ayahnkaratáq áwéhreh sogíq tahnsa matiéhrana tagoge.

<sup>15</sup> Mó íópeqté áninká Manikánsabe iwíáh iwíáh atáh náhúpéqté tueyokéna piribirioyahtaq tútuue míeh ánínsábé anotahtaq mahraréna, Mah marákó mårákó moke kiréh náneq nera kékhsábé koawaqme tanahráq aiq si puah arene áwéhreh sogíq mewe koawaqmio ire.

<sup>16</sup> Koawaqmio irana piribirioyahtaq tútuue míeh áninká marakóipeq tuména wene áwéhreh sogíqtáté koawaqmíéhre.

<sup>17</sup> Íné Sóniga tagogana mó íópeqté áninká Manikáne íópeqté náhúpéqté tueyokéna wene ayahpi áwéhreh sogíq matiéhrana tagoge.

<sup>18</sup> Mó íópeqté ání titiré tħabérápéqté séna iraraq wahnahni aní ména áwéhreh sogíq matiéh ánínsábé anotahtaq mahraréna, Marakóipeq moke náhníáq sera aiq nera kék púah arene sogíqtáté koawaqmio ire.

<sup>19</sup> Koawaqmio irana mi íópeqté áninká wene sogíqtáté marakóipeq koawaqmíena náhníáq sera sorupáréhre. Náhníáq sera ano sareranieéna sarere naneqpipéq sáharéhre. Manikánka ahbabáq keyabé anotah abiáhnsánéna wehukeníká náhníáq sera ano soruparéhnerah mi ke kamah arinkéhe.

<sup>20</sup> Sarere naneq kéhmé ahnansahrapere. Sareréh kóráhqká wání píehnserah tahnsánirana abae agire. Mi koráhqká wehukeniné akorapéq tahnsánue íre wahto 300 kirómítá tahnsanue abae agire.

## 15

### *Wehuke íre kawerariteyabe éhwéhne.*

<sup>1</sup> Íné Sóniga tagogana íópeq mó anotah naneq ábóraragirana tagéna áhtenuge. Abapete téhraníté íópeqté kégá wehuke íre kawerarite naneqmarí abapete téhtaré matiáhwana tagoge. Mi íre kaweq naneqmarí anehe sína nanere. Mó íre sinæ. Minawari parabagínana Manikáne abiahnsa aiq parabaginae.

<sup>2</sup> Íné Sóniga tagogana anotah kawéhú tahnsa náneq, irareh timánó tâhnsá náneq kéhrana tagoge. Kiotaiko kegá mitaq iriwe míáhwe. Sega kiembogi ka kiotaikowe. Mi kegá mi kané píkísah íre iwíáh iwíáh atera wene náhmbahq sene sinonkataq sehiranéyabe ahqáho atáhwe. Sega mitaq iriwe méra Manikáne kítah tahnsá náneq subera

<sup>3</sup> Manikáne arambehri aní Mósísireq Sipisípiq Áráhqseqne igonkónéra mahraréra, Maniká Iteriboo,

arega moke págege arámbéhrí miraorahone.

Minayabe tagéq áhtenéq

ahrensabé iwíáh iwíáh atone.

Arega moke mah kehiná kékhná wahnahnóne.

Arene sánsámé aiq pútaq tábúsoréh sánsáne.

<sup>4</sup> Itene Wahnahno,

arebataq kaweqtaq mía míáona aní púara

ómiga arensabé áhreéq arenáwíq pankergéhe.

Arene kaweq arámbéhrí ómiga tagahraho puara

mah kehiná kékhnánká sure

ahrensabé iwíáh iwíáh atagéhe ewe.

<sup>5</sup> Ewana íné Sóniga mó tagogana íópeq Manikáne nahtapeqté ónsá sírana tagoge. Mi nahmé marakó abatapi wéhuwa náh tahnsanéna peh íópeq kékhe. Mi nahtápéqté peh aiq pútaq ehwéh sire.

<sup>6</sup> Mi nahtápéqté abapete téhraníté íópeqté kégá wehuke kamah arieráhi naneqmarí morá moráue matiáhwe. Matawéra tueyokéra kaweq tabérabé kórósí aneranerue méra kóraraté miraia áréti sene siahwiraq kógahpawíáhwana tagoge.

<sup>7</sup> Maniká ahriahri oga mía míai anínká ahbabáq keyabé abiahnsani puana abapete téhtaré kóraraté miraia párétahípéq kamah arieráhi naneqme aiq obenkíq máréhre. Obenkíq máréhrana peh morá oga míéh kánká íópeqté ké mi párétah morá moráue náríre.

<sup>8</sup> Párétahwarí nárítáq Manikáne téreh naneqkakáq wene págege naneqkakáq áú tahnsa agirana Manikáne nahupeq áú marataragire. Minayabe mó anínká mibeq íre kibekorahire. Írakaumo. Peh áwénunirana abapete téhraníté íópeqté ké matiáh náneq wehuke kamah arieráhi naneq parabagínaraq kíbekinkehe.

## 16

### *Íópeqté kégá párétahipéq kék náneq márunantirúáh éhwéhne.*

<sup>1</sup> Íné Sóniga írogana Manikáne nahtapeqté éhwéhká mahrarirana íróge. Mi ehwéhká abapete téhraníté íópeqté kékabé mahraréna, Ite matiáh párétahípéq Manikánka kamah arieráhi naneq abapete téhtaré kékhe. Mina meweque mah marákó márákóípéq márunantirúáhro ire.

<sup>2</sup> Antirúáhro irana náhmbáh 1 íópeqté anínká mah marákó márákóípéq wene párétahipéq kék náneq márunantirúéhrana kiembogi kané máhki matiáh ké, wene

píkísahyabé iwíáh íwíáh atáh kewé íroke nao, íre kaweq kunkúni nao sene sinonkataq ábórarire.

<sup>3</sup> Náhmbáh 2 íopeqté áninká sóreq wanípípéq wene párétahipéq kék náneq máruntirúéhrana pukia aníné korahq tahnsá úkirana mi wanípípéq moke oga míah kámári pukowe.

<sup>4</sup> Náhmbáh 3 íopeqté áninká moke wání aroipéqkákáq arahnonkakáq wene párétahipéq kék náneq máruntirúéhrana mi wanímári korahq wání úkire.

<sup>5</sup> Úkirana mi wanítáq wahnahni íopeqté áninká mahraréna, Kaweqtaq mía míáona aníno, are naho mía míáé amahnága moq míahne. Arega peh kaweqtaq mé kaweq sansá mira aruqaruróne. Arega kamah ariena arámbéhríwé aiq tábúsoq marahne.

<sup>6</sup> Wehukega are tagariáh kéréq arene ehweh irare kéréq subiq súáhwana sene korahq túire. Mi ahbabáq kék korahq waní nagehe aritonayabe aiq kawerire ire.

<sup>7</sup> Manikánsabe titiré tahbérápéqté éhwéhnká íopeqté áníné ehweh irena minayabe mahraréna, Maniká Iteriboo, arega moke miraorahé itene Wahnah míahne. Arega kamah ariena arámbéhríwé tábúsoq marahne ire.

<sup>8</sup> Náhmbáh 4 íopeqté áninká patahi iótáq wene párétah antirúéhrana íónka anotah iráreh

<sup>9</sup> puana wehuke osoqsírara sene ahbabáq íre súáhwé. Se kamah arieráhi aní Manikánsabe íre iwíáh íwíáh atasa peh wensabé éhruruera wenawíqsabe abehq éhwéh atáhwe.

<sup>10</sup> Náhmbáh 5 íopeqté áninká kiembogi kanká wahnah wahnahnirabeq wene párétah máruntirúéhrana mi kanká wahnahno ke míáhrabeq sunkíkíragire. Sunkíkírirara wehuke anotahtaq síérinsabé uwo uwoéra sene sinehbi abonabonéra

<sup>11</sup> sene ahbabáq íre susa peh sene sírinkakákáq sene náonkakáqsábé iwíáhéra íopeqté Mánikánsábé íre iwíáh íwíáh atasa peh wensabé abehq éhwéh atáhwe.

<sup>12</sup> Náhmbáh 6 íopeqté áninká anotah waní aroipéq Íyúpétisa aroipéq wene párétah máruntirúéhrana mi waní taraqnágire. Ío kiembogirabeqte wáhnáh kékéq sene ebeho kerekka mi waní serawégeheéna taraqnágire.

<sup>13</sup> Taraqnágirana íné Sóniga tagogana karahrabahne áwéhipeqté io tahnsa ówáínawánká sirana kiembogi kané áwéhipeqté io tahnsa ówáínawánká moq sire. Sirana péhe éhwéh irari aníné áwéhipeqté io tahnsa ówáínawánká moq sirana tagoge.

<sup>14</sup> Mi ówáínawátáróga ótaq sansánéra mah marákó mårákóípéqté wáhnáhmárípá pokéra ebehoró iwíáh arítáhwe. Iwíáh arítáhwara mi wahnáhmárínká momiwíuera Manikánka omaq atéh wéhékáh ebehigeheéra mi iwíáh arítáhwe. Maniká, moke miraorahí anínká mi wehekáh moke mah kehiná kékíná kamah arinkéhe.

<sup>15</sup> Mó ehwéh írómé mahraréna, Aebó áninká sinserah ínéga apubúue sinauge. Sugéh ání wene korósi wahtotaq måréhnserah íwéh panantági ke míáhro. Mina tahnsa míah kék eyoyó ke méra íre pehrákora kék tahnsa míahwe. Pehrákora kewé mó kegá siwiréh arítáhnserahme sensabé íre siwiréh aritagéhe ire.

<sup>16</sup> Owainawamarínká moke wahnahmarí mórítáhwara momiwíuera ebeh marákórápéq pokowe. Mi marákowé Íbaru kené ehwehme Áhmágéróni marákóe atáhwe.

<sup>17</sup> Íné Sóniga tagogana náhmbáh 7 íopeqté áninká sóiriqtaq wene párétah antirúéhrana Manikáne nahtapeqté éhwéh wega wahnah wahnahnirabeqte éhwéhnká anotahtaq mahraréna, Aiq parabagire ire.

<sup>18</sup> Aiq parabagire irana sokaesuéhrana anotah ehwéhniraná puruburuirana anotahtaq máriire. Wehuke mah marákó mårákó míah tánáhráqmé mina tahnsa máriwé íre kagaire.

<sup>19</sup> Anotah matábúrápquéq apahtáró sainkue mah kehiná kékíná suwahpeqte náhmári sokogue íre kaweragire. Íre kaweragirana Manikánka Pábíróni suwahpeq, mi anótah mápquéq ahreraq matawéna mibeqté áhbábáq kékabé abiahnsa aritena anotahtaq kamah aríre.

<sup>20</sup> Sóreq waní ákáhpeq kék mårákowári tupekirana moke sáwéhwari tahperagire.

**21** Obiaurankakárue anotah ibónsirana mora mora serámé umeh óbíúráné ume-hwe 50 kiró tahnsá úméhi puana marakóipeq surahitaq wehuke subipáhrarúéhre. Subipáhrarúéhrara áhreéra Manikánsabe abehq éhwéh atáhwe.

## 17

### *Ahbabáq ini kamah awí éhwéhne.*

**1** Íné Sóniga métáq tagewómé íopeqté kégá abapete téhtaré párétáh morá moráue táhtotíáhwe. Peh morá párétáhákáq áninká ínéba séna ínésabe, Anotah ahbabáq íní, sóreq wanítáq tútuue míeh íní Manikánka we anotahtaq kamah awinkéhe. Wega kamah awina naneq tagankehboq máho ire.

**2** Mah marákó márakóípéqté wáhnáh kégá mi iní abariéra ahbabárowara mó marákóípéqté kégá moq abariéra ahbabárowe. Áhnte piáh nah kegá múguwahgu agonserah sega múguwahgu agowe ire.

**3** Íopeqté áninká néniwa mewena abatapi móíntéhrana tagogana ega poeráhq, áwéhq poeráhq tahnsa ká míéhrana tagoge. Mi kamé Manikánsabe éhruru atéh áwíqmári wene anonkataq áhnte kéhre. Mi ka abapete téhtaré áyáhqnó kéné nayáhnkú pówéh kéhrana wene abobiahtaq peh morá áninká tútuue míéhrana tagoge.

**4** Mi inímé mankuara korósíákáq tautáuq kórósíákáq aneranerue ména kóraraté miraia náneq awahriruéná áhnte kaweq pasésúq awahriruéná wene ayahpi kóraraté miraia káhpú matiéhre. Mi inímé mó naneq mó naneq ahbabárirana wene ahbabáqka mi kahpúípéq obenkíréhre.

**5** Wene ayehitaq pabeqme ehwéh sehiranue kéhrana tagoge. Mi sehiránká mahraréna, Pábíróni suwahpeqme ahbabáq ininsóné sinowae. Mah marákó márakóípéqté íre kaweq sansámárimé Pábíróni suwahpeq mi ahbabáq áwahe wire ire.

**6** Mi ininká Maniká tagaríáh kéréq Sísane sánsá pahsúáh kéréq subiq suena sene korahq néna píah neh aninká múguwahgu aginserah wega múguwahgu agirana tagoge. Mina tagotaq áhtenéna áhnte iwiáhuge.

**7** Íopeqté áninká ínésabe, Aneqsabé áhtenono? Mi ininká káhkouriéh ká abapete téhtaré áyáhqnó kéhrana nayáhnkú pówéh kékrah tagáhne. Mi kanká mi iníné epéráhpéq ehwehnkákáq áwahewé teawinié.

**8** Mi kamé naho míowe. Amahnága íre míéhre. Mókake íre ambarúnkákáq mátáípéqté kiembogínaraq Manikánka kamah awinkéhe. Manikánka mah marákó márakó íre mirarotaq oga mérapeq awaq míéhra ke síwíq púkuipéq sehiranúwe. Mi pukúípéq sensíwíq íre kék kégá mi ka tagéra áhtenigehe. Mi ka naho míowe. Amahnága íre míéhre. Mókake kiemboginæ. Minayabe mah kehiná kékhnánká mi ka tagéra áhtenigehe.

**9** Kauerue iwiáhorahi aninká teawú éhwéh ahtebahrahire. Arega tagáhna kané abapete téhtaré áyáhqnómé mina áwahewé abapete téhtaré sáwéhwári míre. Mi ininká mi sawéhwáritáq tútuue míéhre.

**10** Mi kané abapete téhtaré áyáhqnómé mina áwahewé abapete téhtaré wáhnáh kék wóe. Mi wahnáhmárimé moberíáh aiq pukurowana peh morá áninká amahnága wahnahnírana mó aninká mókake sínaraq peh wahto tanahráq wahnahninkehe.

**11** Naho ména amahnága íre míeh kámé we náhmbáh 8 wahnáh ání miankehe. We abapete téhtaré wahnáh káhnáh ání ména iraipéq pokinawire.

**12** Arega nayáhnkú pówéh tagáhne. Pówéh áwahewé nayáhnkú wahnáh kék wóe. Amahnága se íre wahnahnia peh mókake wahnahnigehe. Mi wahnáh kéréq áwéhq poeráhq tahnsa anínseqka wahnah arámbéhrí moráráq awaq miagéhe. Wahnah arámbéhrí awaq míéhrataq pehgáriq tanáhráq, peh morá áhwáh wahnahnigehe.

**13** Mi wahnáh kégá peh morá iwiáhéra awaq míah wahnáh arámbéhrí áwéhq poeráhq tahnsa ání awigéhe.

**14** Sereq Sipisípiq Áráhqseqka ebehowe. Sipisípiq Áráhqmé wahnah kené wahnah anínéna anotah animáríné wahnah aní míeh púana se subipáhraruanawire. Wereq míah kewé Manikánka omaq sitena síáhrabéna, Néne sánsá tábúsoqme sehgó ké wóe arítéhre ire. Íopeqté áninká mah ehwéh teníre.

**15** Íopeqté áninká ínénabe mó mahraréna, Ahbabáq ini tútuue míeh wání tagáhne. Mi wanímé áwahewé peh áhnte wehuké wíre. Se mó marákó mó marákórápéqté ké míahwe. Se mó kuasa mó kuasa ké míahwe. Se mó ehwéh mó ehwéhrnkákáq ké ue míahwe.

**16** Arega nayáhnkú pówéh tagáhne. Mi wahnáh kéreq áwéhq poeráhq tahnsa anínseqka mi ahbabáq ínínsábé íre suwahbanae. Sega moke wene ménsámehnsá meyehrana we pehrákora ání míanae. Sega wene awaq néra mi iní ira parianeherawoe.

**17** Maniká awahbeh iwíah sehgeheéna wega iwíah arítéhrana mi wahnáhmárínká morá íwíahéra se awaq míah wáhnáh árámbéhrí áwéhq poeráhq tahnsa aní áwéwe. Sega mirairana Manikáne ehweh aiq pútaraginawire.

**18** Arega métáq tagáhna iní áwahewé we anotah matábúrapéqté kée. Mi kegá mó marákórápéqté ké wahnahnawe ire. Íopeqté áninká mah ehwéh teníre.

## 18

### *Pábíróni matábú moke íre kaweragi ehwéhne.*

**1** Íné Sóniga tagogana mó íopeqté áninká mibeqté túírana tagoge. We anotah wahnáh aní míehrana wene téhreh naneqka mah marákó mårákó áhnte tehrehre.

**2** Wega anotahtaq mahraréna, Pábíróni matábú íre kaweragire. Mitaq owainawa-maríné mátabu úkire. Píoroqkakáq mó íre kaweq kabáramárínkákáq mitaq mía míaowe.

**3** Menah mah kehiná kéhínánká Pábíróni kené ahbabáq tagéra amahnága monseráhnowe. Pábíróni kegá ahbabáuronserah mah marákóípéqté wáhnáh kégá moq ahbabárowe. Pábíróni kegá ménsámehnsá moráráq sáhatonserah paiqmaq paiqmaro kegá íre tábúsoqme paiqmarera áhnte monéákáq ménsámehnsánkakaq moráráq sáharáhwe ire.

**4** Íné Sóniga írógana mó ehwéhnká íopeqté mahraréna, Néne animáríno, ahbabáórabeq sueq mobeq míahro. Ite moq kamah aiénehboq mibeqté áhbábáq pehragahro. Mi iníné ahbabáqka íúgi ínehboq we auweq mobeq míahro.

**5** Wene ahbabáq áhnte puana mi ahbabáq soruparéhtáq tahirímé anotah sawéh tahnsa úki irino. Manikánka moke wene ahbabáq ahreraq matiéhre ire.

**6** Wega mó ke íre kawerarítéhnserah kamahoro. Wega áhnte ahbabári puaq anotahtaq kamahoro.

**7** Wenawíq pankerena abarié sansankákáq mó ahbabáq sánsámárínkákáq áhnte mirau-rainsabé anotahtaq kamahoro. Wewensabé iwíah íwíahéna we awahbeh sansánéna wene arupipeq iwíahéna, Íné wahnah iní míóge. Íné íre keweini míóge. Mókake íné íre ibitunátúnáninie. Írakaumo ire.

**8** Mi inínká mi ehwéh irarinsabé ibiséna uwo uwo inkeheéna anotahtaq kamah awinkéhe. Maniká Iteribo, anotah anínká sainsuahna tanáhráq kamah awinkéhe. Wega kamah awinana peh morágáké mó naneq mó nanerue íre kaweq sunúq sineae. Mibeqté kégá awahreéra uwo uwoirana anotah ehwéhráhnana sene mátaburaq ira kekiaranae ire.

**9** Íopeqté éhwéhnká mó mahraréna, Mah marákóípéqté wáhnáh kégá Pábíróni suwahpe-pte kégá ahbabáru serahnowe. Minayabe Pábíróni matábú táhnaga áúnínara mi wahnáh kégá tagéra móbeq iriwe méra ibiséra uwo uwo oneherawoe.

**10** Segá mina kamah arina naneqsabé anotahtaq áhreéra móbeq kowéra mahraréra, Pábíróni suwahpeq anotah matábúo, arensabé iwíahéq uwo uwo úne. Peh morá áhwáh are kamahé tanahráq aiq si puaq uwo uwo úne igehe ire.

**11** Mi ehwéhnká mó mahraréna, Mi tanáhráq mah marákóípéqté paiqmaq paiqmaro kegá mi matábúyábé ibisera sirupipeq umehigehe. Aiq tagínayabé sene ménsámehnsá mó íre paiqmarahráho puara sirupipeq umehigehe.

**12** Segá paiqmaq paiqmaro mensáméhnsámé mahraue kórawe, móne mirao naneqme, awahriq naneqme, kaweq pasésúqmé, taberábe ambántámé, mankuara ambántámé, tautáúq ámbántámé, nigi tahnsá áwánká auwe, pówéhwé, kaweq awánkámé, káhpahwe, áhíniwe, kaweq sehirania ebáhmé,

**13** kímé, kaweq kunkúni irá pare naneqme, kaweq kunkúni unkúmehwé, wériwe, náhníáq sera anome, mayawemé, páráwahwe, wítiwe, káhowe, sipisípiqme, ósewe, ósega sabiri kahréwé miraue segá paiqma paiqmaro mensáméhnsáne. Wehukega ménkámehnká paiqmaq paiqmaronserah arambehrriraq saiqnariáh ke moq paiqmárahwe ire.

**14** Paiqmaq paiqmaro kegá Pábíroni suwahpeqte kékabé mahraréra, Iru páréh náneq aiq moke tabanagire. Moke itega iwiáh iwiáho naneq aiq moke tabanagire. Aiq tabanagi puana mókake íre ábóraq kanawire igehe ire.

**15** Ménsámehnsá paiqmaq paiqmaro kegá áhnte moné merowe. Mi kegá móbeq iriwe méra mi matábú kamah arínsábé áhreéra anotahtaq ibiséra sirupipeq umehigehe.

**16** Sirupipeq umehínara segá mahraréra, Pábíroni suwahpeq anotah matábúo, arensabé iwiáhqué uwo uwo úne. Mibeqté ké métáq áhnte kaweq tabérabé kórósíákáq mankuara ambántánkákáq tautáúq ámbántánkákáq méra kóraraté miraia náneqkakáq kaweq pasésúqkákáq mó awahriq naneqkakáq matíáhwana moke íre kaweragire.

**17** Moke sene móneakáq sene ménsámehnsánkakaq apubúue peh morá áhwáh ákáhpeq íre kaweragire igehe ire.

Sípiipéq arambehrio kereq sene wahnhnseq móbeq iriwe méra tagagehe.

**18** Mi matábú tahnaga áúnínara tagéra anotahtaq mahraréra, Mahna tahnsa anotah kawéq mátábú mó íre kék mino éra

**19** tanahuq siyahqnopeq abera ibiséra sirupipeq umehigehe. Ibiséra anotahtaq mahraréra, Pábíroni suwahpeq anotah matábúo, arensabé iwiáhqué uwo uwo úne. Ite sípiipéq arambehriúna kegá mi matábúrápéq itene ménsámehnsá paiqmaq paiqmarurau-nayabé áhnte moné meraune. Amahnága mibeq apubúue peh morá áhwáh ákáhpeq moke íre kaweragire igehe.

**20** Manikánka aiq kamah arí púaq we tagaríah kéréq we eqmaréh kéréq wene ehweh irare kereq íopeqté kérero, mibeqté kégá ite iwióqnaronsabé amahnága Manikánka aiq ayahq marena kamah arí púaq iwiáh iwiáhoro igehe ire.

**21** Íopeqté áníné ehweh parabagirana íné Sóniga tagogana págege íopeqté áninká anotah suaqsuaq ebáh pankeqme sóreq wanípípéq tuparúéhre. Tuparuena mahraréra, Ínéga mi ebáh tuparúógan tabanaginserah Pábíroni suwahpeqte ke kamah aríraná sene mátabu airaiq tabanaginawire.

**22** Pábíroni suwahpeq anotah matábúo, Mókake pontonka ehwehnéwé, pembíáhnka ehwehnéwé, kítahga ehwehnéwé itene marakóraq írakauni puara íre iraneherawoe. Sene siyahkaratáté ménsámehnsá miraé ahtebah kewé mitaq íre míaneherawoe. Suaqsuaq ebáhtáq arambehriéra suaqsuarira ehwéh íre iraneherawoe.

**23** Áráhmuga mitaq mó íre téhranae. O menáhwé íbhéhni ákéqné ehweh mitaq mó íre iraneherawoe. Menah mitaq paiqmaq paiqmaruro kewé mah marákóípéq anotah ke míarowe. Itega mah marákó mårákóípéqté kékhná síúgi urowe. Mókake mó íre miraoneheqmóe ire.

**24** Mibeqté kégá Maniká tagaríah kéréq wene ehweh iraruro kereq subiq sutowana sene korahq tutaire. Mah marákó mårákóípéq sene naruoga subiq suto kené korahq mitaq tutaire. Minayabe Manikánka Pábíroni suwahpeqte ke anotahtaq kamah arinkéhe.

## 19

### *Manikánsabe iwíáh iwíáh atáh éhwéhne.*

<sup>1</sup> Íné Sóniga írogana áhnte kegá íópeqté anotahtaq ehwehnnowana íróge. Írogara anotahtaq mahraréra, Maniká áwíq aiq pankerone. Maniká anotah anínéna págege arámbéhriéna ite meirena kaweraitárainsabé iwíáh iwíáhúne.

<sup>2</sup> Manikánka tábúsoqme iwíáhéné wehukene sásá sararéhre. Anotah ahbábáq íní mah kehiná kékína íre kawerarítárái inínirana Manikánka we ehweh atena kamah awíre. Mi inínká Manikáne arambehriuro ke subiq sutainsabé Manikánka minayabe kamah awíre ewe.

<sup>3</sup> Segá mónkakáq anotahtaq mahraréra, Maniká áwíq aiq pankerone. Wega kamah arírána mi matábú iraráhnana ahriahri áúninae ewe.

<sup>4</sup> Ewara mi 24 abóawáh wéhreq itaréitaré oga míah kámárínseqka Manikánka wah-nah wahnahnirabeqte síáhráq méra wene auranabiahtapeq srehunseraráq méra káuqmunue iwíáh iwíáh atera wensabé, Maniká áwíq aiq pankerone. Aiq mire ewe.

<sup>5</sup> Ewana Manikánka wah-nah wahnahnirabeqte éhwéhká mahraréra, Manikáne arambehrio keo, ite Manikánsabe áhteno ke wóe. Ite táhmaro anotah ke méq táhmaro íre áwíqkakaq ké wóe. Ite moke Maniká áwíq pankeráhro ire.

### *Sipisípiq Árähqka ahre merai ehwéhne.*

<sup>6</sup> Áhnte wehekéqká sorupawe moráráq méra ehwehnoserah ehwéh íróge. Mi ehwéhmé ahkuaq ahkuari waní, anotah wanínká uinserah ehwéhnéra anotah purúbúrúinserah ehwéhnowe. Mi ehwéhká anotahtaq mahraréra, Maniká áwíq pankerone. Maniká itene Wahnahnka moke miraorahire. Wega ahriahri wah-nah wahnahnire.

<sup>7</sup> Sipisípiq Árähqka ahre merai tanáhráq sirana wene ahre aiq sokah sokahue míeh púaq irupipeq eyoyóue méq Manikánsabe iwíáh iwíáh atone.

<sup>8</sup> Maniká tagariáh kéné kaweq arámbéhriwé taberábe korósí tahnsane. Minayabe Sipisípiq Árähqne ahre mi kawéq tábérábé kórósí anotah tehreh korósí aneranerue míehre ewe.

<sup>9</sup> Ewana íópeqté áninká ínénabe mahraréra, Teawéna ehwéh sehiranúno. Sehiranue mahraré, Sipisípiq Árähqka ahre meyhnsábé kaweraráh táhútáhúq nagehboq omaq itéh kékabé máhoro aitéhre. Itene irupipeq eyoyóinkehboq máhoro sehiranúno. Amahnága teawú ehwéhmé Manikáne aiq pútaq ehwéhne ire.

<sup>10</sup> Aiq pútaq ehwéhne irana ínéga íópeqté áninsábé iwíáh iwíáh atanieéna wene aigárátáq nirehunseraráq ména káuqmunugana wega ínénabe, Ahqáho aintena, Ínénabe íre iwíáh iwíáhuno. Arereq mó Sísane ehweh teri terino kereq wene arambehri anímári móe. Íné moq wene arambehriu aní múge. Minayabe webataq Manikánsabe iwíáh iwíáh ato. Sísaga pahsutai ehwéhká Manikáne ehweh irare ke págege aritena séhréh aritéhre ire.

### *Taberábe oséráq tútuue míeh áninsábé éhwéhne.*

<sup>11</sup> Íné Sóniga tagogana íópeqté ónsá sigirana taberábe osé mitaq míehrana tagoge. Mi kané abobiahtaq tútuue míeh áninká ebehéna ehweh aritena tábúsoqme saraqmáréhre. Saraqmáréhrara mó kegá wensabé, Aiq pútari aníne atera, Kawerue arambehrii aníne atáhwe.

<sup>12</sup> Wene ayahqnotaq wahnah kené ayahuqmari sukiwe míehre. Wene anonkataq wenawíq sehira kékhararawe mó kegá íre sáhnsahwe irahráhowana webataq mi awíq íratíehre.

<sup>13</sup> We korahq sosa korósí íre wahto korósí aneraneratíehrara wensabé, Manikáne Ehwehne ue áwíratáhwe. *(Sóni 1.1,14; 1 Sóni 5.7-8)*

<sup>14</sup> Moke íópeqté ebeho kegá kaweq tabérábé ámbántá aneraneréra taberábe oséwárítáq tútuue méra mi aní kéráhwe.

<sup>15</sup> Kéráhwana mi aníné áwéhipeq áwéhreh poká kékre. Mi pokátaté mah marákóípéqté kékamah ariena anotah sahtaté págegeue wahnahnaritankéhe. Maniká moke miraorahi anínká áhnte keyábé abiahnsa arítéhre. Wehukeníká náhníáq sera ano meyanieéna sera sareréhnserah óseraq tútuue míéh anínká mi ke anotahtaq kamah arinkéhe.

<sup>16</sup> Wene íre wahsto korósíráqkákáq wene aigárátáqkákáq wenawíq sehira kéhrana tagoge. Mi awíq áwahewé Moke anotah kené Wahnahne. Moke wahnah kené Wahnahne ire.

<sup>17</sup> Íné Sóniga tagogana peh morá íópeqté ání patahi iotáq iriwe míéhrana tagoge. Tagogana wega íópeq paqme nogó kábárámárlásabé anotahtaq mahraréna, Manikáne anotah tahutáhúq sewe nahro.

<sup>18</sup> Anotah wahnáh kéné awaqme, sóntia kené kíápéténi kené awaqme, tauntahu wehwáríné awaqme, ósene awaqme, óseraq tútuue nogó kéné awaqme sewe nahro. Arambehriraq saiqnariáh kereq arambehriyabé ápeq meyáh kereq anotah kereq íre síwíqkakaq kereqne siwaq sewe nahro ire.

<sup>19</sup> Íné Sóniga tagogana áwéhq poeráhq tahná anínseq mah kehiná kékhnáné wahnahmarínseq sene ebeh kereq momiwíuriáhwana tagoge. Segá taberábe oséráq tútuue míéh anínseq wene ebeho kereq ebehoneheéra momiwíuriáhwe.

<sup>20</sup> Métáq tagéwó ánímé péhe éhwéh irari anínká miraime áwéhq poeráhq tahná anínká tagehre. Tagehrana péhe éhwéh irari anínká ótaq sansá mirairara áwéhq poeráhq tahná aníné máhki matíáh kereq pikisahyabé iwíáh iwíáh atáh kereqka mi otáq sánsá tagéra iwíáh iwíáhéra wene péhe éhwéhnsabé aiq pútare atáhwe.

Amahnága áwéhq poeráhq tahná anínseq taberábe oséráq tútuue míéh anínseqka ebehoneheéra momiwíuriáhwe. Momiwíéra ebehowara taberábe oséráq tútuue míéh anínseq wene ebeho kereqka áwéhq poeráhq tahná anínseq péhe éhwéh irari anínseq saiqnariáhwe. Saiqnarawéra íre subiq susa peh anotah púrúrúia kawéhúpípqué, anotah osóréh íráreh kawéhúpípqué tuparúáhwe. Sano ebáhná anotah osóréhnserah mi kawéhúpípqué anotahtaq osorosoq aruqarurire.

<sup>21</sup> Taberábe oséráq tútuue míéh anínká wene áwéhipeqté ebeh pokátaté moke mó ebeho ke kiraqme subiq súéhrana kabaramarínká mi kené siwaq nahwana siyahbankiréhre.

## 20

### *Íópeqté anínká owainawa 1 táhúséni (1,000) opéq saiqnariankehe i ehwéhne.*

<sup>1</sup> Íné Sóniga tagogana íópeqté anínká mibeq tútuue míéhrana tagoge. Íre ambarúnkákáq mátáípéqté ónsáráté kíákáq anotah seniákáq matiéhrana tagoge.

<sup>2</sup> Wega owainawa táhtoqme mi seníraté táhru táhruire. Karahrabah tahná ánímé naho wehe úkorahú ánímé Séténíwe peh owainawane. Íópeqté anínká mi karáhrábáh táhru táhruarena tuparúéhrana wega áhnte opéq 1 táhúséni (1,000) opéq mitaq peh míanae.

<sup>3</sup> Owainawanka mah marákó márakóípéqté kék péhe iwíáh aritehnehoéna íópeqté anínká we táhru táhruue íre ambarúnkákáq mátáípéq tuparuena mibeqté ónsá paiqme págegeue áróki parúéhre. Mi tanáhráq 1 táhúséni (1,000) opéq parabagínaraq we mó wahto tanahráq ah noginkeheéna pugeq auwankéhe.

<sup>4</sup> Íné Sóniga wahnahnorabeqte síáhwári tagéna mitaq tútuue míáh kék moq tagoge. Manikánka mitaq tútuue míáh kékabé mahraréna, Wehukená mirauro sansá iwíáhue tagéq saraqmáráhro arítéhre. Síansabé aiq pútare atáh kégá wene ehweh teri terinéra kawerue sehgiera áwéhq poeráhq tahná anínkákáq wene pikisahakáqsabé íre iwíáh iwíáh atárówe. Wene máhki siyehitaqkákáq sene siyahkaratáqkákáq íre merowe. Íre meronsabé sene sánsánsabé suwahriehre arítáro kegá sene sinuo tehsúmetaté kiraq suera se subiq sutowe.

Subiq sutowara sensiwamarí míáhwana tagoge. Tagogara se mó oga ukéra áhnte opéq 1 táhúséni (1,000) opéq Sísa Karáhéreq wahnah wahnahnove.

<sup>5</sup> Mina ogá úké tanahráqmé ebeqte oga úké tanahráre. Mó pusa ké mi tanáhráq íre oga úkowe. Mi 1 táchuséni (1,000) opéq parabagínaraq oga úkigehe.

<sup>6</sup> Ebeqte oga úké tanahráq oga úkira kewé Manikánka omaq sito ke woe. Segá anotahtaq iwíáh iwíáhigehe. Mó puké tanahráqká se íre kamah arieráhire. Se Manikánseq Sísa Karáhëreqne ehweh mibeq mahbeq arítah ké méra áhnte opéq 1 táchuséni (1,000) opéq Sísareq moráráq wahnah wahnahnigehe.

### *Owainawa iraipéq airaiq tuparuahna ehwéhne.*

<sup>7</sup> Mi 1 táchuséni opéq parabagínaraq owainawa saiqnariéhmé soraq suankéhe. Soraq súéhrana owainawanka kiembogue

<sup>8</sup> mah marákó márakóípéqté ké péhe iwíáh aritanieéna ábóragire. Mah marákó márakóípéqté ké sensíwíq Kókireq Mágókireq áhnte ke míáhwe. Wehukega arahwé íre sáhnsahoráhonserah se áhnte ke puana íre sáhnsahoráhire. Mi ke ebehigeheéna owainawanka soruparítéhre.

<sup>9</sup> Moke mi kegá ebehoneheéra pokue Maniká tagaríah ké míáhrabeq wega arutaboiri ke suwahpeq abugeqnáhnuriáhwana íopeqté irobina tunse moke mi ke tabipáhrarúéhre.

<sup>10</sup> Tabipáhrarúéhrrana Manikánka owainawa, péhe iwíáh aritéh ání táhtoqme anotah púrúrúia káwéhú, osóréh ébáhnkákáq íráreh kawéhúpípéq tuparúéhre. Áwéhq poeráhq tahnsa ánínseq péhe éhwéh irari anínseq míehya iraipéq mitaq moráráq ahriahri mía míaoneherawoe. Wéhékáhnkakaq inokáhpeqkakáq kamah arinara ahriahri uwo uwo oneherawoe.

### *Ehweh aritena sainsue ehwehne.*

<sup>11</sup> Íné Sóniga tagogana wahnahnirabeqte síah, anotah taberábe siáh kéhrana tagoge. Mitaq tútuue wahnahni ání anotah aní púana we míéhtáq mah marákó márakóákáq íopeqkákáq íre kahrahire. Peh tabanagirana mó íre ábóraq kéhre.

<sup>12</sup> Moke pukia kewé anotah kereq íre síwíqkakaq kereq wahnahnirabeq iriwe míáhwana tagoge. Moke sene arambehri púkuipéq sehirania kéhrana mi pukúwári pugeqme tagehre. Mi wahnáhnká púkuipéqté séhírá tagéna wehukene arambehri iwíáhue tagéna ehweh aritena sainsúéhre. We mó pukú matiéhrana mi pukúwé oga mérapeq kioráho kené síwíq kéh pükúe.

<sup>13</sup> Sóreq wanínká pukia kényabé, Sóreq wanípípéqté kiembogue pokoro arítéhrara Puké Aninseq Iraipéqté Ánínseqka pukia kényabé, Iraipéq sueq pokoro aritehye. Pukia kégá pokue sainsúéh ánípá sewana wega oga míarotaté árámbéhrí pukia ké peh morání moráníue iwíáhue tagéna ehweh aritena sainsúéhre.

<sup>14</sup> Sainsuena Puké Aninseq Iraipéqté Ánínseq anotahtaq osoréh íráreh kawéhúpípéq tuparúéhre. Wehuke osoréh íráreh kawéhúpípéq tuparúéhmé anehete puké tanahráq míre.

<sup>15</sup> Oga mérapeq awaq míehra ke síwíq kéh pükúípéq tagéna mitaq síwíq íre kéh kewé anotah osoréh íráreh kawéhúpípéq tuparúéhre.

## 21

### *O ionkákáq o marákóákáq ábóraq kahna ehwéhne.*

<sup>1</sup> Íné Sóniga tagogana ebeq kéh íopeqkákáq mah marákó márakóákáq sóreq wanínkákáq moke tabanagirana o ionkákáq o marákóákáq ábóraq kéhrana tagoge.

<sup>2</sup> Manikáne kaweq matábú o Sarúsarama suwahpeq íopeq Maniká míéhrabeqte túírana tagoge. Wene iyahnaboga o ibehiní wenawehqpa móauwaneheéra awahrirue sokah sokah atáhnserah mi ke suwahpeq túírana tagoge.

<sup>3</sup> Wahnah wahnahnirabeqte éhwéhnká anotahtaq mahrarirana íróge. Anotahtaq mahraréna, Írátiáhro. Manikánka seba mía míánara se wene animári míagehe. Sereq mía míáéna sene Wahnah míankehe.

<sup>4</sup> Manikánka sereq mía míáéna sene siurapite áqnú moke sorahruankéhe. Mi tanáhráq wehuke mó íre pukigehe. Sirupipeq mó íre umehinae. Mó íre ibitunátúnánigehe. Mó íre ibisagehe. Mó íre síérinae. Menah kárái naneqmarí aiq parabagi puana mó íre kanae irana íróge.

### *Manikánka, Íné tábúsuráh kéné Wahnah míanie i ehwéhne.*

<sup>5</sup> Wahnah wahnahnirabeqte síáhráq tútuue míeh áninká mahraréna, Írátiáhro. Ínéga moke o naneq aiq miraróge ire. Aiq miraróge éna mahraréna, Néne ehweh aiq pútaq ehwéh púah sehiranúno. Ómi kegá mah ehwéh aiq pútaq ehwéhne íwíáhigeheé sehiranúno ire.

<sup>6</sup> Sehiranúno éna ínénabe, Moke áhwáro arámbéhrí aiq parabarúóge. Íné téh míáhwa aní múge. Íné anehemé mía míainie. Íné ebeqte aní ména anehete ání múge. Wání tahbobói aní oga mía mía arahnó wání pehipi náwiníe.

<sup>7</sup> Ahbabáq kiotaiki aninká moke kaweq naneq awaq miánkéhe. Ínéga wene Maniká míahnana we néne ani mía míainkehe ire.

### *Moke ahbabáq aruqaruro kegá iraipéq pokigehe i ehwéhne.*

<sup>8</sup> Wega mó mahraréna, Áhreéra néne sánsá íre sehgó kewé, néne ehwehnsabé íre aiq pútare aintáh kewé, ahbabáq aruqaruro kewé, mó ke subiq súah kewé, mó aníné weh ahre abario kewé, mó ke ánéhgíó kewé, ahgora sansáno kewé, péhepehe maníkánsabé íwíáh atáh kewé, moke péhe éhwéh irare irareo kewé, moke mi kegá iraipéq pokoneherawoe. Sega anotah púrúrúia osoréh íráreh kawéhúpípéq awaq miagéhe.

Peh anotah púrúrúia kawéhúmé osoréh ébáhnkákáq íráreh kawéhúpípéq tuparúáhwe. Sano ebáhnká anotah osóréhnserah mi kawéhúpípéq anotahtaq osorosoq aruqarurire. Iraipéq awaq mewé anehete puké tanahráq míre ire.

### *Sóniga o Sarúsarama suwahpeq tagó ehwéhne.*

<sup>9</sup> Wega mó mahraréna, Abapete téhraníté íópeqté ké kamah arieráhi naneq matawewáhwe. Íópeqté áninká mibeqté ínéba séna ínénabe, Mahbeq súno. Sipisípiq Áráhqne ibehiní sokigi awiníboq máho ire.

<sup>10</sup> Máho éna néniwa móintena anotah sawéhrápéq móintéhre. Manikáne kaweq matábú o Sarúsarama suwahpeq íópeq Maniká míéhrabeqte túírana tagoge.

<sup>11</sup> Manikáne téreh naneqka mi matábúráq anotahtaq térehre. Mi térehme mó kuasa térehre. Kaweq ebáh áhnte moné tahnsa ebáh áwíq sásípaga tahnsa térehre. Mi matábúwé timano tahnsa anotah téreh matábúe.

<sup>12</sup> Mi matábúráq anotah kurí kéhrana mi kuríípéq airápété téhtaré ónsá kéhrara airápété téhtaré íópeqté kegá mó onsáráq mó onsárárule wahnahnowe.

<sup>13</sup> Airápété téhtaré Ísara kahnáh mó kahnáh mó kahnáh síwíq sehirania morá moráue onsaraq kékre. Íó kiembogirabeqte ónsawé apahtáróe. Íó tupekirabeqte ónsawé apahtáróe. Ébeq ayehrápéqté ónsawé apahtáróe. Mó ébeq ayehrápéqté ónsawé apahtáróe.

<sup>14</sup> Mi kurí áwahebi airápété apahtáró págege ebáh kékre. Mi kurí ahpí Sipisípiq Áráhqka eqmaréh ké síwíq airápété téhraníté síwíq kékre.

<sup>15</sup> Íné ehweh tení áninká kaweq agehmare karatáté mi matábúákáq mi kuriákáq onsawárinkákáq agehmaranieéna matiéhre.

<sup>16</sup> Mi matábúwé ahnansahrapeq ébeq ahnánsáhrápéq nahorapeq nehwiehrapeq peh monseráhne. Íópeqté áninká agehmare karatáté agehmaréhrana peh íre wahto 2,200 kirómítá kékre. Sehwerapeq moq agehmaréhrana peh monseráhnire.

<sup>17</sup> Mi matábúrápéqté kúrígé tahperue agehmaréhmé 144 mitá tahnsane. Wehukeníká mátabu agehmaréhnserah íópeqté áninká agehmaréhre.

<sup>18</sup> Mi kuríwé sásípa ebáhtátē pera kuríe. Mi matábúráq kék náneqmarínká kórraraté miraia tímánónká tahnsanue anotah téhrehre.

<sup>19</sup> Mi matábú áwahewé áhnte kaweq ebáh awahriq naneq ebáhtátē pearéhre. Náhmbáh 2 ebáh mankuara ebáhmé sápáiæ. Náhmbáh 3 ebáhmé ágétie. Náhmbáh 4 ebáhmé sehenáh tahnsa ebáhmé émérae.

<sup>20</sup> Náhmbáh 5 ebáhmé sáróníkísie. Mi ebáhmé tautáuqkakaq taberábeakáq ébáhne. Náhmbáh 6 ebáhmé tautáuq ébáhmé kóníriánie. Náhmbáh 7 ebáh wiehq ebáhmé kárísráítie. Náhmbáh 8 ebáh sehenáh tahnsa ebáhmé pérírie. Náhmbáh 9 ebáh wiehq ebáhmé tópásie. Náhmbáh 10 ebáhmé kírisópésae. Náhmbáh 11 ebáhmé áhíásinie. Náhmbáh 12 ebáh tautáuq ebáhmé ámétisie. Mi ebáhmárimé mó naneq mó naneq tahnsá ebáhmárinéna áhnte moné tahnsa ebáhmáriné.

<sup>21</sup> Kuriraté ónsawé airápétē téhtaré ónsawé anotah pasésúq tahnsa naneq taberábe pasésúqtátē mó onsá mó onsáue miraia ónsawáríne. Mi matábúrápéqté áhmé kórraraté miraia áhnéna timanonka téhrehnserahni ahne.

<sup>22</sup> Íné tagome mi matábúráq Manikánsabe iwíáh iwíáh atáh náh íre kékhe. Írakaumo. Maniká itene Wahnah moke miraorahi anínseq Sipisípiq Áráhqseq mitaq míehya puana Manikánsabe iwíáh iwíáh atáh náh íre kékhe.

<sup>23</sup> Mitaq iónkakaq pópoqnahakáq íre kékhe. Írakaumo. Manikáne téhreh naneqka mitaq téhrehhrana Sipisípiq Áráhqka áráhmu tahnsá ání míehre.

<sup>24</sup> Manikáne téhreh naneqka téhrehrabeqme mah kehiná kékínánká mitaq nogigéhe. Mah marákóipéqté wáhnáh kégá sene kaweq mensáméhnsánkákáq mi matábúrápéq mewe sigehe.

<sup>25</sup> Wéhékáh mi matábúrápéqté ónsá íre paiqmaragéhe. Mitaq íre sunkíkírina puana mi onsá ahriahri íre paiqmaraneherawoe.

<sup>26</sup> Mah kehiná kékínáné kaweq naneqmarínkákáq sene awahriq naneqkakáq mi matábúrápéq mewe sigehe.

<sup>27</sup> Moke ahbabáq mitaq íre serahowe. Ahbabáro kereq péhe éhwéhnkákáq kereq mitaq íre serahowe. Ahqáho. Írakaumo. Peh morá Sipisípiq Áráhqne oga mérapeqté pükúípéq sensíwíq kék kégá mitaq serahowe.

## 22

*Oga mé wanínkákáq oga mé awánkánkákáqsábé éhwéhne.*

<sup>1</sup> Íopeqté áninká oga mé waní sokigi anírana mi wanímé timanonka téhrehnserahnire. Mi waní ahyahipeqmé Manikánseq Sipisípiq Áráhqseqka wahnahnóyarabeqte túíre.

<sup>2</sup> Tuena mi matábúrápéqté áh ákáhpi túíre. Oga mé awanká mi waní ayehrág éberiopéq éberioperue kékhe. Mi awánkátáq airápétē téhtaré mó naneq mó naneq seránue íyéhre. Mó iotáq mó naneq será iyena mó iotáq mó naneq seránue íyéhre. Mi awánká ánáhwarinká mah kehiná kékínáné kaweraritéhre.

<sup>3</sup> Manikánka kamah arina naneqmarí mitaq mó íre kanawire.

Manikánseq Sipisípiq Áráhqseqka mitaq wahnah wahnahnigehe. Moke Manikáne arambbehri kegá wensabé iwíáh iwíáh atagéhe.

<sup>4</sup> Iwíáh iwíáh atera wene auranabiah tagagehe. Wenawíq sene siyehitaq kanae.

<sup>5</sup> Mitaq íre sunkíkíraginae. Maniká itene Wahnahnka mitaq téhreh puana áráhmuakáq iónkakaq mitaq íre kanae. Írakaumo. Wene arambbehri kegá ahriahri mitaq wahnah wahnahnigehe.

*Sísaga, Apubíue tuinauge i ehwéhne.*

<sup>6</sup> Íopeqté áninká ínénabe mahraréna, Ínéga teawú éhwéh aiq pútaq ehwéh púana wehukega aiq pútare aintahráhowe. Maniká itene Wahnahnka wene ehweh irare ke

iwíáh arítéhrara pahsúáhwé. Amahnágawé áhníbórá sína naneqmarí wene arambehri ke sokigi arinkéheéna íópeqté ání eqmaréhrana túíre ire.

<sup>7</sup> Íópeqté áninká mó mahraréna, Írátíahno. Sísaga mahraréna, Íné apubúue tuinauge ire. Mah pukúípéqté éhwéh sehgió kégá iwíáh iwíáhigehe ire.

<sup>8</sup> Mah ehwéh irena mi naneqmarí tago anímé íné Sóni uge. Mah ehwéh irena mi naneqmarí tagotaq sokigii aníné aigárátáq iwíáh iwíáh atanieéna káuqmunue míógana

<sup>9</sup> wega ínénabe, Ahqáho. Íre miraúno. Íné itereq moráráq arambehriu aní múge. Manikáne ehweh irare kereq mah pukúípéqté éhwéh sehgió kereq itereq moráráq arambehriu aní múge. Manikánsabe webataq iwíáh iwíáh ato ire.

<sup>10</sup> Íópeqté áninká ínénabe mó mahraréna, Arega púkuipéq sehiranóna ehwéhmé unkumehrataq íre táhparo. Írakaumo. Mi tanáhráq áhníbóráni puah íre táhparo.

<sup>11</sup> Mi tanáhráq sínaraq ahbabáq kega peh ahbabárighehe. Íre mirao naneq sansáno kegá peh sene sánsá miraigehe. Tábúsoréh sánsáno kegá peh tábúsoréh sánsá miraigehe. Kaweqtaq mía míao kegá peh kaweqtaq mía míaigehe ire.

<sup>12</sup> Sísaga mahraréna, Írátíáhro. Íné apubúue tuinauge. Túónaraq wehukene arambehri saraqme tagéna awehraq apéq morání moráníue náinauge.

<sup>13</sup> Íné téh míáhwa aní múge. Íné anehemé mía míainauge. Íné ebeqte aní ména íné anehete aní múge. Íné moke náneq áwahe aní múge. Moke áhwáro arámbéhrí aiq parabarúó aní múge ire.

### *Kaweq matábúrápquéq íre kioráho keyábé éhwéhne.*

<sup>14</sup> Sísaga mó mahraréna, Wehukega sene korósi pabeq paberowana taberábe aginsabé iwíáh iwíáhowe. Mina inserah sene sirupipeq pabeq paberia kégá oga méräpeq mi kawéq matábúrápquéq kioráhonsabé iwíáh iwíáhigehe. Segá mitaq oga mé awankánara ísíwe nagehe.

<sup>15</sup> Ahbabáq kega mitaq íre kioráhowe. Ánéhgíó kereq mó kené weh ahre abario kereq mó aní subiq súáh kereq péhepehe maníkánsábé iwíáh iwíáh atáh kereq moke péhe éhwéh irare sansá suwahbeh kereq peh máhpeq mía míáéra mitaq íre kioráhowe ire.

<sup>16</sup> Íre kioráhowe éna ínénabe, Íné Sísa uge. Íné Tébítine anahwa úge. Íné tuembínága térehnserahni aní múge. Íné tagaríáh kégá mah ehwéh irageheéna íópeqté áninká mah ehwéh ite teiinkeheéna eqmaróge ire.

<sup>17</sup> Manikáne Awanseq Sísa tagaríáh kereqka Sísansabé, Mahbeq tuo ewe. Mah ehwéh íráh kégá moq mahbeq tuo igehe. Wání tahbobói kegá séra oga mé wanínsábé suwahbeh kegá pehipi nagehe.

### *Sóniga mah pukú sáhnsáhó kékabé págege ehwéh pahsúéh éhwéhne.*

<sup>18</sup> Mah pukúípéq mókake sína naneqsabé éhwéh aiq sehiranuge. Mi sehirá sáhnsahwe tagahro. Págege ehwéh teiníboq írátíáhro. Mah ehwéh síwáhnori aninká mó ehwéhkákáq masosahrue síwáhnorínaraq mah ehwéhká kamahorahi naneq teínserah mi aní moq anotahtaq kamah awinkéhe.

<sup>19</sup> Mah ehwéh síwáhnori aninká moke íre síwáhnoria peh ákáhtaq síwáhnorínaraqmé wega awaq miahráhi naneq Manikánsabe meyankéhe. Oga mé awankánarame mi aninká íre awaq miankéhe. Mah ehwéhmé kaweq matábúrápquéqsabé teíre. Mi aninká mi matábú íre awaq miankéhe.

<sup>20</sup> Mah ehwéh tení áninká mahraréna, Íné aiq pútaq apubúue tuinauge ire.

Aiq mire. Sísa itene Wahnahno, mahbeq tuo uge.

<sup>21</sup> Sísa itene Wahnahnsabe we tagariona keyabé arutaboiréna séhréh aitéhre. Aiq míre.

## Read the New Testament daily

*January*

| date | Scripture          |
|------|--------------------|
| 1    | Mátíyu 1.1-2.12    |
| 2    | Mátíyu 2.13-3.6    |
| 3    | Mátíyu 3.7-4.11    |
| 4    | Mátíyu 4.12-25     |
| 5    | Mátíyu 5.1-26      |
| 6    | Mátíyu 5.27-48     |
| 7    | Mátíyu 6.1-24      |
| 8    | Mátíyu 6.25-7.14   |
| 9    | Mátíyu 7.15-29     |
| 10   | Mátíyu 8.1-17      |
| 11   | Mátíyu 8.18-34     |
| 12   | Mátíyu 9.1-17      |
| 13   | Mátíyu 9.18-38     |
| 14   | Mátíyu 10.1-23     |
| 15   | Mátíyu 10.24-11.6  |
| 16   | Mátíyu 11.7-30     |
| 17   | Mátíyu 12.1-21     |
| 18   | Mátíyu 12.22-45    |
| 19   | Mátíyu 12.46-13.23 |
| 20   | Mátíyu 13.24-46    |
| 21   | Mátíyu 13.47-14.12 |
| 22   | Mátíyu 14.13-36    |
| 23   | Mátíyu 15.1-28     |
| 24   | Mátíyu 15.29-16.12 |
| 25   | Mátíyu 16.13-17.9  |
| 26   | Mátíyu 17.10-27    |
| 27   | Mátíyu 18.1-22     |
| 28   | Mátíyu 18.23-19.12 |
| 29   | Mátíyu 19.13-30    |
| 30   | Mátíyu 20.1-28     |
| 31   | Mátíyu 20.29-21.22 |

*February*

| date | Scripture          |
|------|--------------------|
| 1    | Mátiyu 21.23-46    |
| 2    | Mátiyu 22.1-33     |
| 3    | Mátiyu 22.34-23.12 |
| 4    | Mátiyu 23.13-39    |
| 5    | Mátiyu 24.1-28     |
| 6    | Mátiyu 24.29-51    |
| 7    | Mátiyu 25.1-30     |
| 8    | Mátiyu 25.31-26.13 |
| 9    | Mátiyu 26.14-46    |
| 10   | Mátiyu 26.47-68    |
| 11   | Mátiyu 26.69-27.14 |
| 12   | Mátiyu 27.15-31    |
| 13   | Mátiyu 27.32-66    |
| 14   | Mátiyu 28.1-20     |
| 15   | Máhka 1.1-28       |
| 16   | Máhka 1.29-2.12    |
| 17   | Máhka 2.13-3.6     |
| 18   | Máhka 3.7-30       |
| 19   | Máhka 3.31-4.25    |
| 20   | Máhka 4.26-5.20    |
| 21   | Máhka 5.21-43      |
| 22   | Máhka 6.1-29       |
| 23   | Máhka 6.30-56      |
| 24   | Máhka 7.1-23       |
| 25   | Máhka 7.24-8.10    |
| 26   | Máhka 8.11-9.1     |
| 27   | Máhka 9.2-29       |
| 28   | Máhka 9.30-10.12   |

| date | Scripture         |
|------|-------------------|
| 1    | Máhka 10.13-31    |
| 2    | Máhka 10.32-52    |
| 3    | Máhka 11.1-26     |
| 4    | Máhka 11.27-12.17 |
| 5    | Máhka 12.18-37    |
| 6    | Máhka 12.38-13.13 |
| 7    | Máhka 13.14-37    |
| 8    | Máhka 14.1-21     |
| 9    | Máhka 14.22-52    |
| 10   | Máhka 14.53-72    |
| 11   | Máhka 15.1-47     |
| 12   | Máhka 16.1-20     |
| 13   | Árúka 1.1-25      |
| 14   | Árúka 1.26-56     |
| 15   | Árúka 1.57-80     |
| 16   | Árúka 2.1-35      |
| 17   | Árúka 2.36-52     |
| 18   | Árúka 3.1-22      |
| 19   | Árúka 3.23-38     |
| 20   | Árúka 4.1-30      |
| 21   | Árúka 4.31-5.11   |
| 22   | Árúka 5.12-28     |
| 23   | Árúka 5.29-6.11   |
| 24   | Árúka 6.12-38     |
| 25   | Árúka 6.39-7.10   |
| 26   | Árúka 7.11-35     |
| 27   | Árúka 7.36-8.3    |
| 28   | Árúka 8.4-21      |
| 29   | Árúka 8.22-39     |
| 30   | Árúka 8.40-9.6    |
| 31   | Árúka 9.7-27      |

| date | Scripture         |
|------|-------------------|
| 1    | Árúka 9.28-50     |
| 2    | Árúka 9.51-10.12  |
| 3    | Árúka 10.13-37    |
| 4    | Árúka 10.38-11.13 |
| 5    | Árúka 11.14-36    |
| 6    | Árúka 11.37-12.7  |
| 7    | Árúka 12.8-34     |
| 8    | Árúka 12.35-59    |
| 9    | Árúka 13.1-21     |
| 10   | Árúka 13.22-14.6  |
| 11   | Árúka 14.7-35     |
| 12   | Árúka 15.1-32     |
| 13   | Árúka 16.1-18     |
| 14   | Árúka 16.19-17.10 |
| 15   | Árúka 17.11-37    |
| 16   | Árúka 18.1-17     |
| 17   | Árúka 18.18-43    |
| 18   | Árúka 19.1-27     |
| 19   | Árúka 19.28-48    |
| 20   | Árúka 20.1-26     |
| 21   | Árúka 20.27-47    |
| 22   | Árúka 21.1-28     |
| 23   | Árúka 21.29-22.13 |
| 24   | Árúka 22.14-34    |
| 25   | Árúka 22.35-53    |
| 26   | Árúka 22.54-23.12 |
| 27   | Árúka 23.13-43    |
| 28   | Árúka 23.44-24.12 |
| 29   | Árúka 24.13-53    |
| 30   | Sóni 1.1-28       |

| date | Scripture        |
|------|------------------|
| 1    | Sóni 1.29-51     |
| 2    | Sóni 2.1-25      |
| 3    | Sóni 3.1-21      |
| 4    | Sóni 3.22-4.3    |
| 5    | Sóni 4.4-42      |
| 6    | Sóni 4.43-54     |
| 7    | Sóni 5.1-23      |
| 8    | Sóni 5.24-47     |
| 9    | Sóni 6.1-21      |
| 10   | Sóni 6.22-40     |
| 11   | Sóni 6.41-71     |
| 12   | Sóni 7.1-29      |
| 13   | Sóni 7.30-52     |
| 14   | Sóni 7.53-8.20   |
| 15   | Sóni 8.21-30     |
| 16   | Sóni 8.31-59     |
| 17   | Sóni 9.1-41      |
| 18   | Sóni 10.1-21     |
| 19   | Sóni 10.22-42    |
| 20   | Sóni 11.1-53     |
| 21   | Sóni 11.54-12.19 |
| 22   | Sóni 12.20-50    |
| 23   | Sóni 13.1-30     |
| 24   | Sóni 13.31-14.14 |
| 25   | Sóni 14.15-31    |
| 26   | Sóni 15.1-27     |
| 27   | Sóni 16.1-33     |
| 28   | Sóni 17.1-26     |
| 29   | Sóni 18.1-24     |
| 30   | Sóni 18.25-19.22 |
| 31   | Sóni 19.23-42    |

| date | Scripture          |
|------|--------------------|
| 1    | Sóni 20.1-31       |
| 2    | Sóni 21.1-25       |
| 3    | Eqmaro 1.1-26      |
| 4    | Eqmaro 2.1-47      |
| 5    | Eqmaro 3.1-26      |
| 6    | Eqmaro 4.1-37      |
| 7    | Eqmaro 5.1-42      |
| 8    | Eqmaro 6.1-15      |
| 9    | Eqmaro 7.1-29      |
| 10   | Eqmaro 7.30-50     |
| 11   | Eqmaro 7.51-8.13   |
| 12   | Eqmaro 8.14-40     |
| 13   | Eqmaro 9.1-25      |
| 14   | Eqmaro 9.26-43     |
| 15   | Eqmaro 10.1-33     |
| 16   | Eqmaro 10.34-48    |
| 17   | Eqmaro 11.1-30     |
| 18   | Eqmaro 12.1-23     |
| 19   | Eqmaro 12.24-13.12 |
| 20   | Eqmaro 13.13-41    |
| 21   | Eqmaro 13.42-14.7  |
| 22   | Eqmaro 14.8-28     |
| 23   | Eqmaro 15.1-35     |
| 24   | Eqmaro 15.36-16.15 |
| 25   | Eqmaro 16.16-40    |
| 26   | Eqmaro 17.1-34     |
| 27   | Eqmaro 18.1-21     |
| 28   | Eqmaro 18.22-19.12 |
| 29   | Eqmaro 19.13-41    |
| 30   | Eqmaro 20.1-38     |

| date | Scripture          |
|------|--------------------|
| 1    | Eqmaro 21.1-16     |
| 2    | Eqmaro 21.17-36    |
| 3    | Eqmaro 21.37-22.16 |
| 4    | Eqmaro 22.17-23.10 |
| 5    | Eqmaro 23.11-35    |
| 6    | Eqmaro 24.1-27     |
| 7    | Eqmaro 25.1-27     |
| 8    | Eqmaro 26.1-32     |
| 9    | Eqmaro 27.1-20     |
| 10   | Eqmaro 27.21-44    |
| 11   | Eqmaro 28.1-31     |
| 12   | Aroma 1.1-17       |
| 13   | Aroma 1.18-32      |
| 14   | Aroma 2.1-24       |
| 15   | Aroma 2.25-3.8     |
| 16   | Aroma 3.9-31       |
| 17   | Aroma 4.1-12       |
| 18   | Aroma 4.13-5.5     |
| 19   | Aroma 5.6-21       |
| 20   | Aroma 6.1-23       |
| 21   | Aroma 7.1-14       |
| 22   | Aroma 7.15-8.6     |
| 23   | Aroma 8.7-21       |
| 24   | Aroma 8.22-39      |
| 25   | Aroma 9.1-21       |
| 26   | Aroma 9.22-10.13   |
| 27   | Aroma 10.14-11.12  |
| 28   | Aroma 11.13-36     |
| 29   | Aroma 12.1-21      |
| 30   | Aroma 13.1-14      |
| 31   | Aroma 14.1-23      |

| date | Scripture            |
|------|----------------------|
| 1    | Aroma 15.1-21        |
| 2    | Aroma 15.22-16.7     |
| 3    | Aroma 16.8-27        |
| 4    | 1 Kórína 1.1-17      |
| 5    | 1 Kórína 1.18-2.5    |
| 6    | 1 Kórína 2.6-3.4     |
| 7    | 1 Kórína 3.5-23      |
| 8    | 1 Kórína 4.1-21      |
| 9    | 1 Kórína 5.1-13      |
| 10   | 1 Kórína 6.1-20      |
| 11   | 1 Kórína 7.1-24      |
| 12   | 1 Kórína 7.25-40     |
| 13   | 1 Kórína 8.1-13      |
| 14   | 1 Kórína 9.1-18      |
| 15   | 1 Kórína 9.19-10.13  |
| 16   | 1 Kórína 10.14-11.1  |
| 17   | 1 Kórína 11.2-16     |
| 18   | 1 Kórína 11.17-34    |
| 19   | 1 Kórína 12.1-26     |
| 20   | 1 Kórína 12.27-13.13 |
| 21   | 1 Kórína 14.1-17     |
| 22   | 1 Kórína 14.18-40    |
| 23   | 1 Kórína 15.1-28     |
| 24   | 1 Kórína 15.29-58    |
| 25   | 1 Kórína 16.1-24     |
| 26   | 2 Kórína 1.1-11      |
| 27   | 2 Kórína 1.12-2.11   |
| 28   | 2 Kórína 2.12-17     |
| 29   | 2 Kórína 3.1-18      |
| 30   | 2 Kórína 4.1-12      |
| 31   | 2 Kórína 4.13-5.10   |

| date | Scripture          |
|------|--------------------|
| 1    | 2 Kórinta 5.11-21  |
| 2    | 2 Kórinta 6.1-13   |
| 3    | 2 Kórinta 6.14-7.7 |
| 4    | 2 Kórinta 7.8-16   |
| 5    | 2 Kórinta 8.1-15   |
| 6    | 2 Kórinta 8.16-24  |
| 7    | 2 Kórinta 9.1-15   |
| 8    | 2 Kórinta 10.1-18  |
| 9    | 2 Kórinta 11.1-15  |
| 10   | 2 Kórinta 11.16-33 |
| 11   | 2 Kórinta 12.1-10  |
| 12   | 2 Kórinta 12.11-21 |
| 13   | 2 Kórinta 13.1-14  |
| 14   | Káretíja 1.1-24    |
| 15   | Káretíja 2.1-16    |
| 16   | Káretíja 2.17-3.9  |
| 17   | Káretíja 3.10-22   |
| 18   | Káretíja 3.23-4.20 |
| 19   | Káretíja 4.21-5.12 |
| 20   | Káretíja 5.13-26   |
| 21   | Káretíja 6.1-18    |
| 22   | Épéza 1.1-23       |
| 23   | Épéza 2.1-22       |
| 24   | Épéza 3.1-21       |
| 25   | Épéza 4.1-16       |
| 26   | Épéza 4.17-5.2     |
| 27   | Épéza 5.3-33       |
| 28   | Épéza 6.1-24       |
| 29   | Píripái 1.1-26     |
| 30   | Píripái 1.27-2.18  |

| date | Scripture               |
|------|-------------------------|
| 1    | Píripái 2.19-3.6        |
| 2    | Píripái 3.7-4.1         |
| 3    | Píripái 4.2-23          |
| 4    | Kórósía 1.1-20          |
| 5    | Kórósía 1.21-2.7        |
| 6    | Kórósía 2.8-23          |
| 7    | Kórósía 3.1-17          |
| 8    | Kórósía 3.18-4.18       |
| 9    | 1 Tésárónáíka 1.1-2.9   |
| 10   | 1 Tésárónáíka 2.10-3.13 |
| 11   | 1 Tésárónáíka 4.1-5.3   |
| 12   | 1 Tésárónáíka 5.4-28    |
| 13   | 2 Tésárónáíka 1.1-12    |
| 14   | 2 Tésárónáíka 2.1-17    |
| 15   | 2 Tésárónáíka 3.1-18    |
| 16   | 1 Tímóti 1.1-20         |
| 17   | 1 Tímóti 2.1-15         |
| 18   | 1 Tímóti 3.1-16         |
| 19   | 1 Tímóti 4.1-16         |
| 20   | 1 Tímóti 5.1-25         |
| 21   | 1 Tímóti 6.1-21         |
| 22   | 2 Tímóti 1.1-18         |
| 23   | 2 Tímóti 2.1-21         |
| 24   | 2 Tímóti 2.22-3.17      |
| 25   | 2 Tímóti 4.1-22         |
| 26   | Táítása 1.1-16          |
| 27   | Táítása 2.1-14          |
| 28   | Táítása 2.15-3.15       |
| 29   | Píremóna 1.1-25         |
| 30   | Íbaru Ke 1.1-14         |
| 31   | Íbaru Ke 2.1-18         |

| date | Scripture            |
|------|----------------------|
| 1    | Íbaru Ke 3.1-19      |
| 2    | Íbaru Ke 4.1-13      |
| 3    | Íbaru Ke 4.14-5.14   |
| 4    | Íbaru Ke 6.1-20      |
| 5    | Íbaru Ke 7.1-19      |
| 6    | Íbaru Ke 7.20-28     |
| 7    | Íbaru Ke 8.1-13      |
| 8    | Íbaru Ke 9.1-10      |
| 9    | Íbaru Ke 9.11-28     |
| 10   | Íbaru Ke 10.1-18     |
| 11   | Íbaru Ke 10.19-39    |
| 12   | Íbaru Ke 11.1-16     |
| 13   | Íbaru Ke 11.17-31    |
| 14   | Íbaru Ke 11.32-12.13 |
| 15   | Íbaru Ke 12.14-29    |
| 16   | Íbaru Ke 13.1-25     |
| 17   | Sémísi 1.1-18        |
| 18   | Sémísi 1.19-2.17     |
| 19   | Sémísi 2.18-3.18     |
| 20   | Sémísi 4.1-17        |
| 21   | Sémísi 5.1-20        |
| 22   | 1 Píta 1.1-12        |
| 23   | 1 Píta 1.13-2.10     |
| 24   | 1 Píta 2.11-3.7      |
| 25   | 1 Píta 3.8-4.6       |
| 26   | 1 Píta 4.7-5.14      |
| 27   | 2 Píta 1.1-21        |
| 28   | 2 Píta 2.1-22        |
| 29   | 2 Píta 3.1-18        |
| 30   | 1 Sóni 1.1-10        |

| date | Scripture       |
|------|-----------------|
| 1    | 1 Sóni 2.1-17   |
| 2    | 1 Sóni 2.18-3.2 |
| 3    | 1 Sóni 3.3-24   |
| 4    | 1 Sóni 4.1-21   |
| 5    | 1 Sóni 5.1-21   |
| 6    | 2 Sóni 1.1-13   |
| 7    | 3 Sóni 1.1-14   |
| 8    | Súta 1.1-25     |
| 9    | Sokigi 1.1-20   |
| 10   | Sokigi 2.1-17   |
| 11   | Sokigi 2.18-3.6 |
| 12   | Sokigi 3.7-22   |
| 13   | Sokigi 4.1-11   |
| 14   | Sokigi 5.1-14   |
| 15   | Sokigi 6.1-17   |
| 16   | Sokigi 7.1-17   |
| 17   | Sokigi 8.1-13   |
| 18   | Sokigi 9.1-21   |
| 19   | Sokigi 10.1-11  |
| 20   | Sokigi 11.1-19  |
| 21   | Sokigi 12.1-18  |
| 22   | Sokigi 13.1-18  |
| 23   | Sokigi 14.1-20  |
| 24   | Sokigi 15.1-8   |
| 25   | Sokigi 16.1-21  |
| 26   | Sokigi 17.1-18  |
| 27   | Sokigi 18.1-24  |
| 28   | Sokigi 19.1-21  |
| 29   | Sokigi 20.1-15  |
| 30   | Sokigi 21.1-27  |
| 31   | Sokigi 22.1-21  |